





L. 11. 4











# VERITATES PRACTICÆ,

EX VITA DOMINI IESV, SANCTO-  
RVMQVE GESTIS, IN SINGVLOS ANNI DIES.

LEGENDÆ, CONSIDERANDÆ,  
PRÆDICANDÆ.

OPVS QVADRIPERTITVM.

PARS TERTIA, PARS ÆSTIVA.

A Dominica SS. Trinitatis, ad Dominicam  
decimamquintam post Pentecosten.

*Authore P. JULIANO HATNEVVE,*  
*Societatis IESV Sacerdote.*



ROTHOMAGI,

Sumptibus RICHARDI LALLEMANT, Illustrissimi Ar-  
chiepiscopi & Collegij Societatis IESV Typographi.

M. DC. LIII.

CVM PRIVILEGIO REGIS, ET APPROBATIONE DOCTORVM.

*Exemplum Cameracense M. H. B. 1653 ad V. S. S. S.*



Priuilegium Regis, Approbatio Doctorum, & Facultas  
Superiorum habentur in prima parte, post Præfationem.

Christianus Camerarius, M.D.C. LXX. II.





# INDEX VERITATVM

## IN SINGVLOS DIES, TERTIÆ PARTIS.

*DOMINICA SS. TRINITATIS, Quæ est prima post Pentecosten.*

Peruersa quædam est in mundo Trinitas, quæ nisi caueatur, Diuinam in nobis peruertit Trinitatem. pag. 1.

Sicut negando potius quàm affirmando Deus cognoscitur, ita & diligitur. 10.

Non minùs peccat, qui non satis, quàm qui nimis Deum scire vellet. 19.

*Duabus sequentibus Hebdomadis, de sanctissimo Sacramento renouante memoriam vitæ ac mortis D. N. quam representat.*

*FERIA 2. De Incarnatione Domini considerata in SS. Sacramento.*

Sic Deus dilexit mundum, vt quod Deo totus debet mundus, tu totum vnus debeas. 31.

Quò minùs potes reddere quæcumque debes, eò magis debes reddere quæcumque potes. ibid.

*FERIA 3. De Natiuitate Domini renouata in sanctissimo Sacramento.*

Reuocata quotidie noua Christi Natiuitas, nostram in Christo quotidianam prouocat nouitatem. 36.

*FERIA 4. De abscondita Christi D. vita, exhibita in SS. Sacramento.*

Nemo manifestiùs cum Christo viuit, quam qui occultius. 41.



*FERIA 5. Solemnitas SS. Sacramenti, De Conuersatione Domini, manifestata in SS. Sacramento.*

Quibus amarum est conuersari cum Christo, delicias eius conuertunt in amaritudinem. 46.

Qui cum fiducia non adeunt ad Gratiae Christi thronum: & se à throni secludunt gratia, & Christum excludunt à throno gratiae. 50.

Diuina licet magis timenda sint quàm humana: in Diuinis tamen minùs timenda est familiaritas quàm in humanis. 55.

Vel neutro, vel utroque simul oportet esse humilem, interno scilicet & externo actu.

Quæ Sacramento deberur humilitas, velut ipsum Sacramentum, sit indiuisa necesse est. 61.

Quæ hodiernum Christi triumphum Res vna magis illustrare debuerat, hæc vna magis obscurat. 69.

Sicut ab igne cera, sic deberent hodie peccatores à Christi perire facie. 76.

*FERIA 6. De Euangelica Doctrina summatim contenta in SS. Sacramento.*

Sacra Christi schola, Sacro-sanctum Sacramentum.

Hic totum discas Euangelium, breui compendio, nullo impendio. 80.

*SABBATO. De miraculis Christi D. rursum editis in SS. Sacramento.*

Nisi Christo resisteres, sic te Christus in se, sicut Panem consecratum, conuerteret. 86.

*DOMINICA INFRA OCTAVAS. Homo quidam fecit Cœnam magnam, & vocauit multos.*

Qui se excusat inuitatum, accusat inuitantem. 92.



Sat frequens multis Cœna est, quibus magna Cœna est infrequens.

Quos à Cœna videlicet res humanæ non auocant, hos à Cœna magna sæpe impediunt.

*FERIA 2. De virtutum Christi exemplis in SS. Sacramento exhibitis.*

Ad Sacramentum vnde Virtutes exeunt, reuertuntur. 109.

*FERIA 3. De beneficiis quæ olim mundo Christus D. & quæ modo confert in SS. Sacramento.*

Si quando pretiosa quæque pro cibo corporis danda sunt, semper pro cibo animæ sunt donanda. 110.

Ne forteingas te nihil habere pretiosum quod Christo dones, da quod est in te vilius, & Christo dabis quod est ipsi pretiosius. ibid.

*FERIA 4. De persecutionibus Domini dùm viueret, quas iterum suffert in SS. Sacramento.*

Sicut tolerandis injuriis Mensa nobis parata est, sic toleratæ injuriæ nos parant ad illam Mensam. 116.

*FERIA 5. De Christi D. Passione, morte & sepultura in SS. Sacramento.*

Satius esset nullo die velle viuere, quàm non omni die, velle cum Christo mori. 120.

*FERIA 6. De Christi D. resurgentis, ascendentis in cælum & ibidem regnantis, vita gloriosa quæ apparet in SS. Sacramento.*

Gloriam Christi vertimus in ignominiam, si aliam à Christo quærimus gloriam. 125.

*SABBATO. De Iudiciaria potestate quam Christus D. exercet in SS. Sacramento.*



Agni vel maxime formidanda ira.

130.

**DOMINICA III. POST PENTECOSTEN.**

*De oue perdita, quæ sita & inuenta.*

Qui sibi palpat quod non longe erret, periculosius sapiens errat quam qui aberrat longius. 138.

Quanta est Christi quærentis animam cura, tanta est animæ Christum fugientis incuria. 148.

Quod vnius conuersi peccatoris esse videtur, hoc est totius vniuersi negotium. 152.

*In quatuor sequentibus Hebdomadis exponitur Sermo Domini in monte.*

**FERIA 2.** *De prima Beatitudine, quæ est Paupertas spiritus.*

Beati pauperes spiritu. 159.

**FERIA 3.** *De 2. Beatitudine quæ est Mansuetudo.*

Beati mites. 163.

**FERIA 4.** *De 3. Beatitudine quæ est Lugentium.*

Beati qui lugent. 167.

**FERIA 5.** *De 4. Beatitudine quæ est Esuries & Sitis Iustitiæ.*

Beati qui esuriunt & sitiunt Iustitiam. 172.

**FERIA 6.** *De 5. Beatitudine quæ est Misericordia.*

Beati misericordes. 176.

**SABBATO.** *De 6. Beatitudine quæ est Mundities cordis.*

Beati mundo corde. 180.

**DOMINICA IV.** *De mira Petri piscatione, humilitate, & perfecta Conuersione.*

Nisi te humilies in prosperis, prospera te humiliabunt. 186.

**FERIA 2.** *De 7. Beatitudine quæ est Pacificatio.*



Beati pacifici.

191.

*FERIA 3. De 8. Beatitudine qua est tolerantia persecutionum propter Iustitiam.*

Beati qui persecutionem patiuntur propter Iustitiam. 193.

*FERIA 4. De eadem 8. Beatitudine qua spectat maledictiones aut benedictiones mundi.*

Beati estis cum maledixerint vobis.

198.

*FERIA 5. Vos estis sal terræ, lux mundi, Ciuitas supra montem. De cura propria perfectionis & proximorum, secundum triplicem perfectionis gradum.*

Qui non gradatim procedit in via virtutis, non in via virtutis incedit, sed vitij.

202.

*FERIA 6. Sic luceat lux vestra, &c. De bono exemplo.*

Sicut humanæ aspectu gloriæ non est opus ponendum, ita nec eius despectu deponendum.

206.

*SABBATO. Nolite putare quoniam veni solvere legem, &c.*

*Jota unum aut unus apex non prateribit à lege, donec omnia fiant.*

Cura rerum minimarum, rem procurat omnium maximam.

210.

Sæpe in minimis non est minima culpa.

213.

*DOMINICA V. De ira reprimenda. Ego autem dico vobis quia omnis qui irascitur fratri suo, &c.*

Hoc ipso ira est injustior, quod nulli umquam irascenti, sua ira videtur injusta.

216.

*FERIA 2. De oculo, manu, & pede amputandis.*

Qui non seruat consilia quia non sunt præcepta, nec ipsa etiam præcepta seruabit.

221.



*FERIA 3. De triplici hominum genere sub illis expresso  
symbolis, diligenter cauendo.*

Solum pietatis genus est, in re salutis aduersa, suis esse crue-  
delem. 225.

*FERIA 4. De perfecta mortificatione triplicis Concupis-  
centia, in illis etiam verbis comprehensa.*

Quò minus concupiscentia mortificabis, eò magis à con-  
cupiscentia mortificaberis. 228.

*FERIA 5. De sublimi perfectione Euangelica, quam Chri-  
stus D. proponit in suo sermone.*

Si quid videtur difficile quod dixit Christus, hoc ipso fa-  
cile redditur, quod Christus dixit. 233.

*FERIA 6. Ego autem dico vobis, diligite inimicos vestros.*

Si naturæ humanæ durum est obedire Christi præcepto,  
longè est durius Gratia, naturam humanam non obe-  
dire Christo. 237.

*SABBATO. Attendite ne Iustitiam vestram faciatis co-  
ram hominibus, vt videamini ab eis, &c. De respe-  
ctibus humanis fugiendis.*

Qui suam Iustitiam facit vt videatur, maximam quæ fieri  
possit, injustitiam videtur facere. 242.

*DOMINICA VI. De multa turba ex paucis pisci-  
culis & panibus, à Domino saturata.*

Non quod times, timendum est, ne desit tibi Deus: sed  
ne tu desis Deo. 247.

Qui nimis timet ne ipsi desit Deus, non satis timet quod  
est magis timendum, ne ipse Deo desit. 253.

Ars omnium artium quæstuosissima, est Eleemosyna. 257.

Nisi pauper affectu sis, vix satis affectus eris in pauperes. 264

*FERIA*



*FERIA 2. De prima petitione Orationis Dominica cui  
Superbia opponitur. SANCTIFICETVR NOMEN TVVM.*  
Primæ petitioni prima se opponit superbia. Quod Illa  
petit, hoc ista impetit. 269.

*FERIA 3. De 2. petitione cui Auaritia opponitur:  
ADVENIAT REGNVM TVVM.*

Qui terrena nimis desiderat, timet potius quàm reuera  
desideret, ne adueniat regnum Dei. 274.

*FERIA 4. De 3. petitione: & de Ira qua illi opponitur.  
FIAT VOLVNTAS TVA, &c.*

Nihil Iracundi minùs volunt, quàm quod magis pater  
Deum velle. 278.

*FERIA 5. De 4. petitione, & de vitio Intemperantia illi  
opposito: PANEM NOSTRVM QVOTIDIANVM, &c.*

Ipsa Intemperantis oratio qua panem orat, intemperans  
est & temeraria. 283.

*FERIA 6. De 5. petitione cui opponitur Inuidia,  
odium, &c. DIMITTE NOBIS DEBITA NOSTRA, &c.*

Sicut pauci dimittunt suis debitoribus, ita & paucis sua  
dimittuntur debita. 288.

*SABBATO. De 6. petitione cui repugnat Impudicitia,  
ET NE NOS INDVCAS IN TENTATIONEM.*

Hanc ad cæteras impudentiam Impudicus adjicit, vt  
Deum orando irrideat. 294.

*DOMINICA VII. De 7. petitione cui Acedia op-  
ponitur. SED LIBERA NOS A MALO.*

Et de Evangelica Lectione: Non potest arbor mala fructus bonos fa-  
cere, &c.



Vult & non vult piger.

299.

Qua ratione fit vt plures dici possint malæ quam bonæ arbores: eadem prorsus fiet, ni caueas, vt mala potius quàm bona sis arbor.

304.

*Hac Hebdomada, quidquid post Sermonem Domini proximè dictum vel factum est, refertur ad septem præcipuas virtutes. Id est, Theologicas & Cardinales.*

*FERIA 2. De fide Centurionis à Christo D. commendata. NON INVENI TANTAM FIDEM IN ISRAEL.*

Majoris est animi se Diuinæ fidei supponere quàm se Illi opponere.

313.

*FERIA 3. De suscitato Vidua Filio in ciuitate Naim: Et de spe retinenda in deploratis rebus.*

Non certius in spem itur, quàm contra spem.

319.

*FERIA 4. De Muliere peccatrice qua dilexit multum. Et de Charitate in Deum.*

Quæ Charitas dicitur, vniuersa delicta operire, ea prius dicenda est vniuersim aperire.

324.

Amantis lachrymæ eò suauiores quò amariore.

328.

Amori nihil est amarius quam quod sentitur suauius. *ibid.*

Nihil est ad amorem augendum magis appositum, quàm quod amori fuit aliquando magis oppositum.

329.

Amanti Deum animæ magis mirum est, quod non à mundo sic ametur & colatur Deus, quam sit mirum Mundo non amanti quod ab Amante sic ametur.

*ibid.*

Si scires quid sit Deum offendisse, non minus forte fletes quàm hæc peccatrix mulier. At vero non excusaris quod illud nescias.

330.

Amor Dei, mors est sui.

*ibid.*



*FERIA 5. De fugato Damonio caco & muto : Et de nostra per Christum Fortitudine contra Inimicos.*

Qua facilitate vincimur, eadem vincere possumus. 331.

*FERIA 6. De Verbis otiosis in die Iudicij condemnandis ; Et de usu Temperantiae in continenda lingua.*

Qua est Regula Temperantiae in edendo, eadem est in loquendo. 335.

*Vel sic :*

Eadem est oris Intemperantia in loquendo, qua est in edendo. ib.

*SABBATO. De injusta petitione signi caelestis quod Iudaei quaesierunt à Domino : Et de iusta eiusdem negatione.*

Nisi diligenter aduertas, quod petis à Deo iustius, hoc est quod petis iniustius. 340.

*DOMINICA VIII. De prudenti Villico Iniquitatis : FILII HUIUS SAECULI PRUDENTIORES, &c.*

Indigni sunt sua luce, lucis filij, qui minus clarè vident in suis, quàm filij huius saeculi. 345.

Filij huius saeculi quò prudentiores in generatione sua sunt, eò sibi maiorem ingenerant imprudentiam. 350.

*AD HÆC VERBA : Redde rationem Villicationis tuae.*

Qui ne terreatur, non cogitat reddendam rationem, magis terrendus est quia non illam cogitat. 358.

Qui se interrogat ante Iudicium, interrogatus in Iudicio facilius respondebit. 363.

*Facite vobis amicos de mammona iniquitatis, &c.*

Importuni, opportuni.

Id est, quos modo habes magis importunos in petendo, possunt esse aliquando tibi magis opportuni, te apud Deum adjuuando. 368.



*Hac Hebdomada, sex Parabole quæ profectum in via spiritali designent, proponuntur.*

*FERIA 2. Parabola seminis seminati in terram, triplici ex parte infœlicem.*

Verbum Dei non redit vacuum: aut profit necesse est recipienti, vel obsit. 375.

*FERIA 3. Parabola Zizaniorum. Cum dormirent homines, &c.*

Ne putes te benè semper excusatum, cum dicis, non putabam. 380.

*FERIA 4. Parabola seminis paulatim germinantis & incrementis, ubi exprimitur*

*Progressus spiritalis in quo quies & sollicitudo simul iungendæ sunt. Neque quies nisi sollicita. Neque sollicitudo nisi quieta.*

*Vel sic:*

Quæ ad progressum spiritualem sollicitudo valet, sit quieta, vel non valet. 385.

*FERIA 5. Parabola grani sinapis, & fermenti fermentati. De parvis magnificiendis.*

Nec magna bene, si parva malè. 389.

*FERIA 6. Parabola thesauri absconditi in agro pro quo emendo dantur omnia.*

Non tam spectatur quid dones pro Diuinis, quàm quid non dones. 394.

*SABBATO. Parabola pretiosa margarita.*

Quantum peritus & prudens est Euangelicæ margaritæ Negotiator, Tu tantum imperitus es & imprudens, nisi prospicias. 400.

*DOMINICA IX. De lachrymis à Christo D. fuscis*



*super Ierusalem.*

Nisi cor tuum moueatur ad Christi verba lachrymantis,  
Cor illud est de quo Sapiens: *Cor durum habebit malè in no-  
uissimo.* 408.

Si te cognosces, hoc in te flendum nosces quod deflet  
Christus. 414.

*Hac Hebdomada. De nostris Concupiscentiis Christo D. subjiendis,  
exemplo posito ex variis quæ occurrunt consideranda.*

*FERIA 2. De triplici hominum genere qui videntur  
velle sequi Christum, nec tamen Eum sequuntur.*

Affectum probat effectus. 418.

*FERIA 3. De sedata maris tempestate, imperio Christi.  
Tace, obmutesce.*

Vox illa vox Christi est dum commoueris, Tace, obmu-  
tesce: Nec tamen taces aut obmutescis. 424.

*FERIA 4. De legione Dæmonum imperio Christi ejecta  
ex possessis corporibus.*

Obedientia Dæmonum, nostræ est condemnatio inobe-  
dientiæ. 428.

*FERIA 5. De sanata Muliere Hamorrhœissa.*

Iniquè multum agunt qui tam multa agunt sanando cor-  
pori: tam pauca seruandæ animæ. 431.

*FERIA 6. De filia principis Jairi ressuscitata.*

Quam Christo debet anima subjectionem, debet ita in  
corpore reddere, ac extra corpus. 435.

*SABBATO. De duobus Cæcis à Christo D. illuminatis.*

Quo magis oculata est Concupiscentia, magis est cæca.  
439.

*DOMINICA X. De Phariseo & Publicano.*



Omnes insipientes & infœlices supra modum, superbi. 443.  
*Hac Hebdomada, De Missis ad predicandum Apostolis, & de his que  
spectant ad Missiones.*

*FERIA 2. De oratione quam exigit Christus D. ut mit-  
tantur Operarij in Messem.*

Sic pium est orare Deum pro salute proximi, ut sit im-  
pium non orare. 450.

*FERIA 3. De discretionem adhibenda iuvando proximo,  
& saluti animarum procuranda.*

Non plus ultra. 454.

*FERIA 4. De pace procuranda cum salute.*

Pax in pugna. 460.

*FERIA 5. De simplicitate iungenda prudentis.*

In spiritali pugna fortior est ouis lupo. 463.

*FERIA 6. De magnanimitate necessaria operariis Euan-  
gelicis: DICO VOBIS AMICIS MEIS, NE TERREA-  
MINI, &c.*

Plus est quod Christus monet ne terreamur, quàm quod  
mouent Inimici ut nos terreant. 468.

*SABBATO. De mala pace quam Christus suis vetat.*

Optabilius est bonum bellum quàm mala Pax. 473.

APPENDIX AD MISSIONES FRUCTUOSE OBEVNDAS.  
478.

Præter Instructiones familiares certis horis habendas, ad vitam recte in-  
stituendam: Triginta proponuntur Capita, unde materia Concionum de-  
sumi potest, ad assequendum finem Missionum, qui est vera Conuersio  
animarum: quibus adduntur quedam de Sacramento Confirmationis.

*DOMINICA XI. De surdo & muto sanato à Chri-  
sto D.*



Qui non audit, non audietur.

542.

Hac Hebdomada, De muliere Samaritana, siue de Anima peccatrice  
quæ in illa representatur.

*FERIA 2. De siti Christi Domini loquentis Samaritanæ.  
Da mihi bibere.*

Quod vel Inimico numquam negares, sapissimè recusas  
Christo.

550.

*FERIA 3. De Cognitione sui quam Mulier Samaritana,  
& Anima nostra haurit à Domino.*

Quæ à Christo hauritur nostri Cognitionis, omnem in nobis  
exhaurit fastum.

553.

*FERIA 4. De illustri Cognitione Christi Domini manifestantis  
seipsum Samaritanæ, & cuius peccatrici animæ.*

Numquam illustrius se manifestat Christus quàm dum  
animæ peccatricis illustrat Conscientiam, & peccatum  
latens ipsi manifestat.

559.

*FERIA 5. De sublimi Cognitione Dei quam Christus  
Samaritanæ communicat, & animæ sibi addictæ, siue  
de Cultu Dei in Spiritu & Veritate.*

Sicut Spiritus & Veritas sunt indiuisibiles, ita si in Spiritu  
& Veritate velis Deum adorare, oportet re toto indiuisim  
Dei esse.

564.

*FERIA 6. De continua Communicatione Christi cum  
anima quavis gratiosa & fidei, ad benè semper agendum:  
Ego sum qui loquor tecum.*

Quod Christus semper vellet nobiscum loqui & agere,  
si vellemus: sic certe volendum est.

568.

*SABBATO. De zelo qui ex cognito Christo sentitur, ad*



*Eum aliis manifestandum, exemplo Samaritane.*

Rape ad Eum quos potes. Nam si potes & non rapis, tot  
cœlo perdis, quot Christo lucrari poteras. 573.

**DOMINICA XII.** *Parabola Samaritani qui ho-  
minem à latronibus cæsum curauit.*

Si vis curari, cura. 584.

Hac Hebdomada post sanatum in piscina paralyticum, multa de Ma-  
gnanimitate & Humilitate simul iungendis.

**FERIA 2.** *De sanato paralytico iuxta piscinam, Vis  
sanus fieri.*

Quod videris tibi velle, velles quidem, sed verè non vis. 593.

**FERIA 3.** *De Humilitate Christi D. quæ post sanatum  
paralyticum eminuit.*

Hæc est maximè laudabilis Humilitas, quæ sic laudes fu-  
git vt laudanda non omittat. 597.

**FERIA 4.** *De magnifica Christi humilitate, seu, de  
humili eius magnificentia; ex his eius verbis, Non  
potest filius à se facere quidquam nisi quod viderit  
Patrem facientem.*

Nullus est diues, humili quantumuis paupere, magnifi-  
centior. 602.

**FERIA 5.** *De sublimi & humili potestate iudicandi ho-  
mines quam Christus sibi datam dicit.*

Superbo maximè formidandum Diuini Tribunal Iudicij.  
607.

**FERIA 6.** *De Claritate Christi quam non accipit ab ho-  
minibus.*

Claritas quæ ab hominibus accipitur, mera est obscuritas.

612.

**SABBATO.**



*SABBATO. De Repugnantia & Incompatibilitate Fidei  
cum vana gloria.*

Ne Diuina pereat Fides, pereat potius humana gloria.  
616.

*DOMINICA XIII. De decem Leprosis mundatis  
à Domino, quorum unus duntaxat acceptum agno-  
uit beneficium.*

Verè paucorum est vera Gratitude. 620.

Hac Hebdomada, De multiplicatis panibus, & de SS. Sacramento cu-  
ius figura quedam fuit illa panum multiplicatio.

*FERIA 2. De secessu Domini & Discipulorum eius in  
desertum.*

Christo non seruit, qui Christo quidem laborat, sibi verò  
quiescit. 627.

*FERIA 3. De multiplicatione panum quibus quinque  
hominum millia saturantur.*

Quod præsertim spectat Christus, non est quid ad se affe-  
ras, sed quid à te auferas. 630.

*FERIA 4. De submersione Petri ambulantis super aquas.*

Res aduersæ non possent quemquam dejicere, nisi se his  
priùs vellet subicere. 635.

*FERIA 5. De sanctissimo Sacramento, ut est panis vitæ.*

*Ego sum panis vitæ.*

Quàm pretiosus est Panis vitæ, tanto in pretio esse debe-  
ret vita, cuius est Panis.

*Vel sic:*

Quàm parùm pretiosus tibi sit Panis vitæ, apparet ex par-  
uo pretio, in quo illam habes vitam. 639.

*FERIA 6. De Sacratiss. Sacramento ut est Panis de cælo.*



Qui cœlesti pane sic viuunt vt cœlestes fiant , ita viuunt  
in suis corporibus, sicut Cœlites in assumptis. 643.

*SABBATO. De Diuinissimo Sacramento in veteri Man-  
na figurato.*

Qui oblatam expellit Sacramenti gratiam qua Diuinus ef-  
se possit, non minùs forte peccat quàm qui olim Man-  
na repulerunt. 646.

*DOMINICA XIV. Nemo potest duobus Dominis  
seruire, &c.*

Vel Domino Deo, vel libidini renuntiandum. 652.

Sollicitudo animi tantò minus probanda est, quantò magis  
probat Christus, seu quantis demonstrat rationibus, ne  
simus solliciti. *Octo afferuntur in textu Euangelij.* 659.

Nisi primùm quæras regnum Dei, quantumuis aliter illud  
quæras, non acquires. 662.

Sic primò quæri debet regnum Dei, vt secundo nil ita  
quæri possit. 667.

*Hac Hebdomada, quidquid capite 15. Matthæi continetur de accusatis  
Discipulis, quod non lauarent manus, & similia quæ representant  
Illusiones quasdam occurrentes in via spiritali, quibus prospicitur.*

*FERIA 2. Queruntur Scriba & Pharizæi apud Domi-  
num de Illius Discipulis.*

Nec propter alios à bono te excusabis, nec quemquam  
alium propter te accusabis. 673.

*FERIA 3. Respondet Dominus Pharizæis.*

Nemo sui boni vel mali, bonus Iudex. 677.

*FERIA 4. Populus hic labiis me honorat, Cor autem  
eorum longe est à me.*

Quò sæpe vehementiùs Deum oras, ore quidem Illi adstas  
propiùs, sed corde distas longiùs. 683.



*FERIA 5. Omnis plantatio quam non plantauit Pater meus cœlestis, eradicabitur.*

Humana Confilia cō sæpe pejora, quò meliora. 687.

*FERIA 6. De corde exeunt cogitationes male, &c. Hæc sunt quæ coinquinant hominem.*

Et si in aliis hominibus Concupiscentia sæpe peccatum minuit: In te tamen sapius auget. 692.

*SABBATO. De muliere Cananea.*

Sicut non satis fidit Deo qui nimis satagit: sic qui de suo non satis agit. 696.

*DIE II. IUNII. De sancto Barnaba. Erat vir bonus & plenus Spiritu sancto.*

Tantò vnusquisque est magis aut minùs verè bonus & sanctus, quanto magis minusue participat de Spiritu sancto. 701.

*DIE 21. IUNII. De B. Aloysio Gonzaga Societatis IESV. Consummatus in breui, expleuit tempora multa.*

Mendaces filij hominum in stateris, si res non pendunt cœli pretio. 705.

*DIE 24. IUNII. In Natiuitate S. Ioannis Baptiste. Quis putas Puer iste erit?*

Sicut prima & puerilis ætas, index est secutura vitæ præsentis, ita hæc vita præsens, indicium est futura post æternitatis. 709.

Sanctus Ioannes Electis est, sicut sagitta electa. 715.

*DIE 29. IUNII. In Festo SS. Apostolorum Petri & Pauli. Constitues eos Principes super omnem terram.*

Sicut fide, sic moribus, verè probantur subditi tantorum Principum. 718.



*DE S. PETRO. Et ipsi tamquam lapides viui superadi-  
ficamini.*

Cui sanctus Petrus petra viua non est, petra est scandali.

725.

*DE S. PAULO. Imitatores mei estote, sicut & Ego Christi.*

Licet Pauli magnitudo vix sit imitabilis: vix tamen alius  
est magis imitabilis quàm magnus Paulus.

732.

*DIE 2. IULII. In Festo Visitationis B. Mariæ Virginis.*

Diuinæ Visitationes rarò conueniunt cum humanis, nisi  
hæ raræ sint.

739.

*DIE 22. IULII. In Festo S. Mariæ Magdalena. Vides  
hanc mulierem?*

Tantum à perfecta pœnitentia deficies, quantum à pœni-  
tente Magdalena discedes.

745.

Magdalena seu Anima verè pœnitens, verus est Christi  
triumphus.

752.

Sicut Amor de Christo triumphat in Cruce: ita Christus  
de amore, in anima peccatrice Cruci subiecta.

ibid.

Quem non perfectè pœnitet, Christi triumpho inuidet.

ibid.

*DIE 25. IULII. In Festo S. Iacobi Apostoli, Potestis bi-  
bere Calicem, &c.*

Sicut possumus, sic debemus.

Qua ratione tenemus nos posse bibere Calicem Domini,  
eadem tenemur bibere.

753.

*DIE 26. IULII. In Festo S. Anna. Dominus mortificat  
& viuificat.*

Qui non vult mortificantem Dominum, non vult viuifi-  
cantem.

759.



*DIE 31. IULII. De S. Ignatio Fundatore Societatis IESV.  
Ad maiorem Dei Gloriam.*

Nulla operando potest esse major Gloria, quàm quæren-  
do maiorem Dei Gloriam. 763.

*Ibi Benjamin adolescentulus in mentis excessu.* Pf. 67.

Qui excellentior mentis excessus est, sic ad exemplum no-  
strum excellit in vita S. Ignatij, vt tota sit Eius vita si-  
mul ecstática, & tota exemplaris. 772.

*Ecce dedi te in lucem Gentium, vt sis salus mea vsque ad  
extremum terræ.* If. 49.

Quanto salutem omnium studio procurauit sanctus Igna-  
tius, tam studiosi omnes Illius esse debent, quibus est  
curæ sua salus. 794.

*DIE 4. AVGVSTI. De sancto Dominico Ordinis FF. Pra-  
dicatorum Fundatore.*

Nec lucere tantum, nec ardere: sed vtrumque simul. 796.

*DIE 6. AVGVSTI. In Festo Transfigurationis Domini:  
Hic est filius meus dilectus, &c.*

Nullus est Christianus qui non credat Christum esse filium  
Dei: & vix est vllus Christianus, qui hoc verè credat.  
802.

*DIE 10. AVGVSTI. In Festo S. Laurentij Martyris.  
Noli timere, cum ambulaueris in igne, non combure-  
ris, &c.*

Quò à suis Christus abesse putatur longiùs, hoc ipso pro-  
piùs ipsis adesse putandus est. 810.

*DIE 15. AVGVSTI. In Assumptione B. Mariæ Virginis.  
Porro, vnum est necessarium.*



Quod vnum est in Assumpta Virgine gloriosius, hoc est  
Assumptum ex Illo Vno necessario de quo Christus.

816.

Stellam è Corona Virginis extrahis qui humilitati tuæ par-  
tem detrahis.

Reginam sine regno dicimus, cum B. Virginem dicimus  
huius præcipue regni Reginam, nobis non Illi subjectis.

835.

Quàm Christus in Matrem pius est, concedendo Illi omnia-  
tam fumus impij, negando quod postulat.

838.

Quò te minùs sentis amare Christum, hoc ipso magis amo-  
re mori poteris.

846.

*DIE 20. AVGVSTI. In Festo S. Bernardi Abbatis. Homo  
sanctus manet in Sapientia sicut Sol.*

Vera Deuotio inter varietates locorum & temporum, in-  
uariabilis.

846.

*DIE 25. AVGVSTI. De S. Ludouico Rege. Certamen for-  
te dedit Illi vt vinceret.*

Ille inter potentes Potentissimus, qui contra magnam pec-  
candi potentiam certat & vincit.

856.

*DIE 28. AVGVSTI. De S. Augustino Episcopo & Do-  
ctore. Sagitta tua infixæ sunt mihi.*

Sagittæ Diuini amoris quanto magis lethiferæ, tantò ma-  
gis viuificæ.

862.

*DIE 29. AVGVSTI. In Festo Decollationis S. Ioannis Ba-  
ptiste.*

Mors Ioannis, Vox clamantis in deserto cordis est, contra  
proprias Concupiscentias.

872.

*DE VOTIS RELIGIOSIS. In die professionis. Holocau-  
sta tua in conspectu meo semper.*

877.



Professus idem ac profitens.

*DE VOTO PAUPERIATIS.* Quò quis pauperior, eò di-  
tior. 884.

*DE VOTO CASTITATIS.* Major est voluptas volupta-  
tem nolle, quàm velle: voluptatem vicisse, quam cæpisse.  
887.

*DE VOTO OBEDIENTIAE.* Quàm gloriosa est similitudo  
Christi, tam gloriosa est Obedientia. 893.

*DE RENOVATIONE VOTORUM.* *Prima die Recollectio-  
nis antecedentis. De ficu infructuosa.*

Religiosus infra vel supra regulam suam viuens, ficus est  
ficum non ferens. 899.

*DIE 2.* Quod te imparatum magis reddit ad ferendum  
fructum, hoc te paratiorem deberet reddere. 905.

*DIE 3.* Quantò minùs puniri timet infructuosus, tantò  
iam magis punitus est.

Frustra tibi Cultor si culturam non pateris. 913.

*IN DIE RENOVATIONIS.*

Vota non rectè renouas, nisi te vota renouent. 914.





# ERRATA TERTIÆ PARTIS.

Pagina.	Linea.	Erratum.	Correctio.
17	26	esse, sed quid	esse, quid
30	20	vnaquoque die	vnaquaque
48	29	Qui molestia	Quid molestia
113	19	pretiosa quæ que	quæque
142	35	desiretiam	desiretiam
159	10	Beatitu dine	Beatitudine
276	25	Sacramento Dei	Sacramenta
278	27	magis pater	pater
293	29	omissum	Sabbato
309	25	supora regulam	supra
341	23	nobis occidit	accidit
383	7	afferque illud	afferque
410	27	quodammoda	quodammodò
440	30	oculatos	oculatos
64	6	deinde est quando	deinde, quando est
702	4	quanti quemeriti	quantique meriti
760	27	hoc esse petere	hoc esset

DOMINICA





# DOMINICA SANCTISS. TRINITATIS,

QVÆ EST  
PRIMA POST PENTECOSTEN.

*Sanctus, Sanctus, Sanctus Dominus exercituum.*  
II. 6. Apoc. 4.

## VERITAS PRACTICA.

Peruersa quædam est in Mundo Trinitas, quæ nisi  
caueatur, Diuinam in nobis peruertit Trinitatem.

*RATIO EST, Quia tunc diuina in nobis Trinitas perueri di-  
cenda est, quando vel errore in intellectu, vel concupiscentia  
in voluntate, tria hæc quæ sunt præcipua mysterij capita vio-  
lantur; Vnitas essentiæ, Trinitas personarum, &  
æqualitas perfectionum.*

*Sed triplex concupiscentia de qua dicitur; Omne quod est in 1. Ioan. 2.  
mundo, concupiscentia carnis est, & concupiscen-  
tia oculorum, & superbia vitæ; Peruersa quædam est  
in mundo Trinitas quæ nisi caueatur, tria hæc præcipua capita  
in nostra violat voluntate.*

3. Pars.

A



2 Dominica SS. Trinitatis, j. post Pentecosten, Sanctus, &c.

Ergo & diuinam in nobis peruertit Trinitatem. Quod cum sit  
summopere detestandum, apparet quàm sit cauenda triplex illa  
concupiscentia.

### PRIMUM PUNCTUM.



1. Reg. 2.

VOD vniuersim Scriptura monet ne de rebus diu-  
nis & sublimibus sermones & discursus multipli-  
centur, hoc particulatim de Mysterio Sanctissimæ  
Trinitatis sancti Doctores dictum volunt; *Nolite  
multiplicare loqui sublimia gloriantes.*

Non vetat omnino loqui, sed *multiplicare loqui*, id est, ni-  
mis multa & plura quàm necesse sit ad fidem & cultum Diui-  
nitatis; Et certe necesse est omnino loqui de hoc Mysterio, cum  
primum sit quod loqui & audire debeamus, quia primum est &  
magis necessarium quod credere & colere teneamur: sed cum  
tam multa sint in eo sublimia, recondita, singularia, & singula-  
riter excedentia nostram intelligendi facultatem, periculosum  
est ne si plura quàm par sit multiplicentur, sit potius curiositatis  
& vanitatis, quàm religionis & obseruantia quæ summa tamen  
adhiberi debet in hoc recolendo Mysterio.

Ecclesi. 3.

Hoc ipsum est quod commendabat Sapiens: *Altiora te ne qua-  
sieris, & fortiora te ne scrutatus fueris; sed quæ præcepit tibi Deus, illa  
cogita semper, & in pluribus operibus eius ne fueris curiosus; Quæ qui-  
dem curiositas si timenda est in operibus Dei quæ dicuntur ad  
extra, quantò magis cauenda est in iis quæ sunt ad intra, quæ vene-  
rationem atque admirationem magis postulât quam discursum?*

Nec leuiter prætereundum est quod ibi dicitur, *quæ præcepit tibi  
Deus, illa cogita semper*; nam perinde est ac si diceretur, quando  
de Diuinitate cogitas, cogita semper seu potius de excolenda vo-  
luntate tua per veram obedientiam & charitatem, quam de co-  
lendo intellectu per multam scientiam & cognitionem; neque  
enim minus obest ad debitum Deo cultum exhibendum, deprau-  
ata per concupiscentiam voluntas, quàm corruptus per errorem  
intellectus: Vnde grauius sanctus Leo; *Virum Catholicum sicut  
nullo implicari errore, ita nulla oportet cupiditate violari. Cur enim  
vitandus est error nisi quia repugnat veritati quæ necessaria est*



*Peruersa quædam est in mundo Trinitas, quæ diuinam evertit. 3*

credendis & colendis mysteriis? Sed nonne Charitas æque necessaria est colendo Deo, ac Veritas? & nonne Charitati æque repugnat praua cupiditas, atque error veritati? Nonne ergo æque cauenda cupiditas? Nonne ergo æque cogitandum de illa cauenda vbi de diuinis mysteriis agitur, atque de errore vitando?

Quamobrem ad Diuini cultus praxim sic est proposita Veritas quæ modo expendatur, vt in ea expendenda simul intelligamus quod sicut in intellectu ita in voluntate nostra, constituitur aut evertitur Diuinitatis cultus; sicut in intellectu per errorem evertitur, ita in voluntate per cupiditatem; sicut denique in tribus quæ sunt præcipua Mysterij hodierni capita versari potest error, ita in his ipsis peruersa sistit cupiditas, quæ cum sit triplex triplicem quandam in mundo facit Trinitatem quæ diuinam in nobis plane peruertit, nisi diligentissime caueatur.

Ac primo quidem tria illa quæ dicuntur præcipua Mysterij sanctissimæ Trinitatis Capita vide quam commodè comprehendantur verbis allatis, *Sanctus, sanctus, sanctus, Dominus Sabaoth seu exercituum*. Quod enim in singulari numero dicitur *sanctus*, vnus esse Deus & Dominus intelligitur; Vnus vnitæ essentia, substantia, & natura; Nec vllò modo possunt esse plures. *Non est 1. Reg. 2. sanctus vt est Dominus, neque enim est alius extra te*; Est quidem alius intra sed non extra; & ita est alius intra vt non sit aliud, inquit sanctus Ioannes Chrysostomus.

Quod vero ter repetitur *sanctus*, Trinus esse in personis Deus denuntiatur, vt alibi passim scripturæ declarant distinctius: *Pater, Verbum, & Spiritus sanctus, & hi tres vnum sunt*, Pater seipsum intuens perfectam sui generat imaginem, qui Filius eius est eiusdem prorsus substantia; Non est enim otiosus & infœcundus Ille qui dat omnibus creaturis vim producendi simile. *Numquid ego 1. 66. qui alios parere facio, ipse non pariam, dicit Dominus? si ego qui generationem cæteris tribuo, sterilis ero, ait Dominus Deus tuus?* Hic autem Filius sic à Patre diligitur vt Patrem similiter diligat, atque ex hac mutua dilectione producitur Tertia Persona quæ Spiritus sanctus dicitur, eiusdem etiam cum Patre & Filio naturæ & substantiæ, non creatus nec genitus, sed procedens ex vtroque.

Nihil quidem in creatis est simile, sed tamen à creaturis possunt deduci quædam similitudines quæ hanc Trinitatem Personarum representant; vt in sole, substantia est solis, radius, & ca-



4 Dominica SS. Trinitatis, j. post Pentecosten, Sanctus, &c.

lor. In anima, tres sunt facultates, memoria, intellectus, & voluntas. In fonte reperitur scaturigo, fons & riuus. In arbore, radix, truncus, rami. In speculo, materia speculi, species rei representata per speculum, & eiusdem reflexio ad oculum. In sermone seu verbo, res concepta, conceptus, & expressio: sicque in aliis pluribus.

Quod denique sanctus & simili prorsus modo ter sanctus dicitur Dominus, sic perfectus in substantia & æqualiter in personis & attributis perfectus esse agnoscitur; Nam licet innumerae sint alia perfectiones, vna tamen omnes comprehendit Sanctitas, & idcirco præcipue memoratur quia nobis præcipue proponitur imitanda; non Potentia, non Altitudo, non Scientia, non Independentia quam peruersè rebellis angelus & primus homo ambierunt; sed sanctitas quæ omnibus commendatur: *Sancti eritis, quia ego sanctus sum.*

Exist. II.  
I. Per. I.

Hæc sunt itaque tria præcipua quæ de Patre, de Filio, & de Spiritu sancto sine differentia discretionis sentienda proponuntur, *ut in confessione vera sempiternæ Deitatis, & in personis proprietates, & in essentia unitas, & in maiestate adoretur æqualitas, quam laudant Angeli atque Archangeli, Cherubim quoque ac Seraphim, qui non cessant clamare quotidie una voce dicentes: Sanctus, sanctus, sanctus Dominus Deus Sabaoth.* Sic adora, sic venerare, sic concludere: Quandoquidem in his tribus summa credendorum de mysterio Trinitatis consistit, si quid contra in intellectu per errorem, aut in voluntate per concupiscentiam opponatur, plane in nobis destrui & perueri diuina Trinitas dici possit & debeat, quia sic fides per errorem perit, & Charitas per concupiscentiam: pereunte autem fide & charitate, perit aut peruertitur diuinus sanctissimæ Trinitatis cultus qui in illis maxime virtutibus situs est, ac tandem ubi peruersus est Trinitatis cultus, nonne ibi peruersa dici potest & ipsa diuina Trinitas?

O altitudo diuitiarum non modo sapientiæ & scientiæ Dei, sed & bonitatis & potentiæ qui sic patitur à nobis sua in diuinitate & natura violari, & offendi!

SECUNDVM PUNCTVM.

**S**ED triplex concupiscentia de qua dicitur: omne quod est in mundo, concupiscentia carnis est, & concupiscentia oculorum, &



*Peruersa quaedam est in mundo Trinitas, quæ diuinam euerit. §*  
superbia vitæ, *peruersa quaedam est in mundo Trinitas, quæ tria illa*  
*præcipua diuini mysterij capita in nostra violat voluntate.*

In nostro quidem intellectu tres esse possent errorum species quæ veram eorum trium capitum fidem euerterent; vt primo Atheismus, & paganismus qui vel Deum negant aut plures deos faciunt. Deinde Iudaismus, Arrianismus, & Sabellianismus qui vel negant Trinitatem personarum, aut distinctionem, aut diuinitatem. Denique blasphemiarum horrenda monstra quæ vel Diuinam Prouidentiam & Scientiam vel Bonitatem & Iustitiam diffitentur. Sed in his non immoramur quia contrà per Dei gratiam, *fide stamus.*

Verum non ita forte credimus aut intelligimus quæ de Cupiditate dicuntur; ac proinde illa fuerunt expressius distinguenda quæ modo singillatim & accurate expenderentur per tria illa capita, quorum primum est de Vnitate Dei, quam concupiscentia tam verè destruit & peruertit quàm verum est per concupiscentiam committi peccatum mortale, & in quolibet mortali peccato poni vltimum finem.

Non semper quidem mortale est quod parit concupiscentia, sed quoties tale parit peccatum, semper ita constans & verum est quod in eo ponitur vltimus finis, vt id de fide sit; hoc autem posito quid sequitur nisi Vnitatem Dei destrui? Nam cum sit ita proprium Deo, esse vltimum nostrum finem vt nisi talis esset non esset Deus, certe peccator qui hanc à Deo tollit perfectionem, quantum in ipso est, tollit ab eo Diuinitatem à qua inseparabilis est illa perfectio; & dum illam ipsam perfectionem attribuit creaturæ quæ est obiectum sui peccati, ponit in ea simul quandam diuinitatem seu quandam Idoli & Idololatriæ speciem, non quidem iudicio & cogitatione, sed affectu & æstimatione, vt loquuntur Theologi conformiter sacræ Scripturæ sanctisque Patribus.

*Consistentur se nosse Deum, inquit Apostolus, factis autem negant, Tit. 1.*  
Id est speculatiuè & intellectu, fatentur esse Deum vel illum esse Deum qui credendus & colendus proponitur: sed voluntate & affectu illum negant, quatenus id omne faciunt in praxi circa obiectum sui peccati quod soli Deo debetur; nempe sic toti cogitant, sic laborant, sic afficiuntur, sic mouentur, sic eò intentiones & affectus omnes dirigunt quasi illud quod concupiscitur esset Deus; quod erat soli Deo dandum negant, & quod erat negan-



6 Dominica SS. Trinitatis, j. post Pentecosten, Sanctus, &c.

Rom. 1. dum creaturæ, concedunt; *Commutterunt*, inquit idem Aposto-  
lus, *veritatem Dei in mendacium, & coluerunt, & seruiuerunt creaturæ*  
2. Pet. 2. *potius quam Creatori. Quod & sanctus Petrus appositè exprimit,*  
dum vno verbo ait, *Eum qui emit eos, Dominum negant*: quasi dice-  
ret, licet fateantur se ab eo emptos & se eius esse seruos, tamen id  
verbo tenus dicunt, nam re ipsa, non ei seruiunt, sed ventri, vel  
honorì, vel pecuniæ, seu potius concupiscentiæ quæ fertur circa  
Ibid. illa obiecta, vnde & vocat illos *seruos corruptionis*, & addit ratio-  
nem, *à quo enim quis superatus est, huius & seruus est*. Sic & rursus  
Rom. 16. Apostolus: *huiusmodi enim Christo Domino nostro non seruiunt sed suo*  
*ventri*. Quod vt manifestius significet quàm sit oppositum vnitati  
Dei, addit alibi: *Quorum Deus venter est*: Et de cupiditate pecuniæ,  
Phil. 3. *Idolorum*, inquit, *est seruitus*; Iterumque alibi quod videtur propius  
Eph. 5. dicere de auaritia, de omni alia concupiscentia facile est intelli-  
gere, dum ait: *Mortificate membra vestra quæ sunt super terram, forni-*  
Coloss. 3. *cationem, immunditiam, libidinem, concupiscentiam malam, & auari-*  
*tiam quæ est simulachrorum seruitus*; quasi diceret; tot sunt simula-  
chra & idola quibus tanquam Deo seruitur quot sunt malæ con-  
cupiscentiæ. Quod disertis verbis affirmat sanctus Hieronymus in  
Ps. 80. illum psalmi verbum, *non erit in te Deus recens*; QVÆCVMQVE,  
inquit, *habemus vitia & peccata, tot recentes habemus deos*; vidi mu-  
lierem, & concupiui, libido mihi Deus est; Et quoties vitiis vincimur,  
Deum negamus.

Sanctus quoque Cyprianus aut quisquis est author tractatus de  
duplici martyrio qui apud eum habetur, sic præclare; Cum Ty-  
rannus dicit, *abnega Christum, & immola Ioui*, sepe lingua negat, corde re-  
clamante; quanquam hoc grauissimum crimen, tamen aliquam impietatis  
culpam eleuat humane nature imbecillitas. Tibi Satanas loquitur per  
tuam concupiscentiam: *abnega Christum & esto diues*; sacrificia Mammo-  
na, & Christo nuntium remittito; Nec dicit, *morere*, sed potius oblecta  
oculos. Et tamen hic sponte submittis genua Satanae, & abnegato Christo,  
te totum illi mancipas! In quibus verbis & aliis quæ plura de hoc ar-  
gumento habet, aduerte non aliter illum velle peccatorē Christo  
renuntiare quam dum concupiscentiæ satisfacit; hoc enim ipso  
quo illi satisfacit, statuit sibi nouam quandam diuinitatem, & ve-  
ram destruit; *Verterunt ad me tergum & non faciem*! ô prauitatem  
Ier. 2. concupiscentiæ, ô animi prauæ concupiscentis dementiam!

IAM verò quod secundum est caput, Trinitatem persona-



*Peruersa quaedam est in mundo Trinitas, quæ diuinam euertit. 7*

rum multis modis expugnat Concupiscentia seu peccatum. Primo quidem eâ scedatur anima in triplici sua potentia quæ est Trinitatis imago, vnde in peccatorem sic grauiter S. Ambrosius: *Tu qui accepisti imaginem Dei, qui habes similitudinem eius, noli eam irrationabili fœditate consumere.* Deinde quia singulis personis, peccatum singularem quandam infert iniuriam: nempe Patri vt Creatori; Filio vt Redemptori; Spiritui sancto vt Sanctificanti animam; sicque creatura perit quodammodo Creatori; perit Redemptionis pretium, tot pereunt gratiæ quot receperat vel recepisset anima si sine peccato esset! ô quæ perditio!

*In caput  
15. Lucæ.*

Tertio denique vel maximè quia unicuique Diuinæ Trinitatis Personæ, sic vna ex tribus illis prauis concupiscentiis directe opponitur, atque vt est illis opposita sic à mundo adoratur & colitur, vt verè quidam poëta scripserit apud Cornelium.

*In ep. 1.  
Ioan. c. 2.*

*Ambitiosus honos, & opes, & fœda voluptas.*

*Hæc tria pro trino Numine, mundus habet.*

**P A T R I** opponitur auaritia seu concupiscentia diuitiarum, quia cùm Prima Persona sit origo bonitatis, & omnium bonorum quæ effusè communicat siue ad intra vt vocant, siue ad extra: vt pote à qua descendat omne datum optimum & omne donum perfectum, vt ait sanctus Iacobus, nihil illi magis oppositum esse potest quam illa concupiscentia quæ nimis cupide rapit aliena, & nimis auide retinet sua.

*Iac. 1.*

**F I L I O** cuius generatio diuina & humana tam pura est vt Pater sceminam nesciat, & Mater virum non cognoscat, nefandè opponitur concupiscentia carnis; ac proinde ex iniquis omnibus quos nouit Dominus in diem iudicij reservare cruciandos, magis autem eos reservat, inquit sanctus Petrus, qui post carnem in concupiscentia immunditiæ ambulant.

*2. Pet. 2.*

**S P I R I T V I S A N C T O** qui super humilem & trementem sermones suos, requiescit, & qui vt ait sanctus Augustinus, maxime ab humili recipitur, & à superbo reiicitur, aduersatur illa concupiscentia quæ dicitur superbia vitæ, & quæ tumentes & inflatos spiritus in homine mouet, tam oppositos Spiritui sancto, vt propterea dicatur, quem mundus non potest accipere, quia non videt, nec scit eum.

*Ioan. 14.*

**RESTAT** tertium de Perfectionibus diuinis considerare; primò



8 *Dominica SS. Trinitatis, j. post Pentecosten, Sanctus, &c.*

quidem quàm foede & procaciter pessundentur omnes à concupiscentia seu peccatore: Cum enim peccando nullam prorsus rationem habeat Diuinæ Immensitatis & Præsentiae quam reuereri deberet, nullam Sapientiae aut Sciētiae cui nihil esse potest occultum, nullam Bonitatis à qua sustentatur, nullam Iustitiae quæ peccati poenas reposcet, nonne quoties peccat, tum in diuinas illas insurgit perfectiones? Deinde vero considera quàm virtutis & perfectionum inæqualitatem in Deo ponat pro sua quisque concupiscentia; facile enim auarus credet Deum odisse superbiam aut luxuriam alterius, sed non ita suam cupiditatem, quam vocat prudentem sollicitudinem. Contrà verò superbus aut carnalis; in auarum quidquid aduersus peccatores scribitur, intorquebit: & quæ diuina sunt dicta contra superbiam quam vocat animi celsitudinem, irridebit. *Existimasti inique quod ero tui similis?*

¶ 49.

Denique quod ait sanctus Bernardus de voluntate propriâ, propriè de concupiscentia concupita seu volita debet intelligi: *Nunc autem & ipsum inquit, quantum in ipsa est, Deum perimit. Omnino enim vellet Deum peccata sua aut vindicare non posse, aut nolle, aut ea nescire. Vult ergo eum non esse Deum, quæ quantum in ipsa est vult eum aut impotentem, aut iniustum esse, aut insipientem. Crudelis plane, & omnino execranda malitia, quæ Dei potentiam, iustitiam, sapientiam perire desiderat. Id quidem horribile est dictu: sed factu quàm longe est horribilius?*

Serm. 3. de  
resur. Dom.

T E R T I V M P V N C T V M.

**H**INC ergo patet quàm verè triplex illa quæ in mundo est concupiscentia sit velut perversa quedam in mundo Trinitas, quæ nisi diligentissime caueatur, Diuinam in nobis peruertit Trinitatem. Sic enim in re concupita peccator acquiescit vt in ea suum summum bonum suamque beatitudinem videatur ponere. Probe scit impius, aut profecto scire debet, ex peccato, coelestem illam & æternam perire foelicitatem, nihil tamen curat, satis se beatum putat si quod concupiscit possideat; vellet nullam aliam esse foelicitatem præter concupiscentiam, aut se aliam simul facile consequuturum sibi fingit: atque interim quod pro sola Diuina & beata Trinitate fruenda deberet facere, facit pro sua triplici concupiscentia,



*Perversa quaedam est in mundo Trinitas, quæ diuinam euertit.* 9

concupiscentia, quod facere quid est aliud quam se velut Deum habere, proh nefas! & vnum illum ac trinum Dominum quem columnæ cœli pauent, & ad cuius nutum contremiscunt abnegare, despicerem, aspernari! *Obstupefcite cœli super hoc, & portæ eius* 1er. 2. *desolamini vehementer!* fierine potest vt homo hæc sciat, vt Christianus hæc credat & cupiditati peccando cedat!

Multum refert in hac materia probe illud intelligere quod de vltimo fine & summo bono in re concupita posito, atque à Diuinitate sublato dicitur; Hinc enim tota peccati grauitas & tota concupiscentiæ perniciēs. Quàm sint autem vera quæ dicta sunt sic vniuersim confirmat sanctus Augustinus vt quæ de vna Lib. 2. de Ciuil. Dei. c. 25. dicit concupiscentia diuitiarum seu de auaritia, de aliis facile intelligatur. *Perversi, inquit, & auari, frui volunt nummo, vt autem Deo; quoniam non nummum propter Deum impendunt, sed Deum propter nummum colunt, quia nimirum licet Deum agnoscant, & reuerentur tamquam rerum omnium parentem, immoderato tamen affectu quo in sordibus pecunia inhaerescunt, eum vltimum & summum bonum esse re & facto negare videntur, itaque in pecunia conuiuescunt, ac si nulla Dei cura & providentia egere deberent vquam.*

Hæc declarari possent fufius, sed ad praxim, illud Tobia tibi Tob. 4. tuisque familiare sit, atque in ore assiduum: *Omnibus diebus vitæ tuæ in mente habeto Deum, & caue ne aliquando peccato consentias. In mente habeto, Deum vnum esse, & Trinum & Sanctum; & hanc vnitatem & Trinitatem & Sanctitatem per peccatum violari! Si nolles errorem in intellectu, noli cupiditatem in voluntate: si nolles negare intellectu Deum, noli eum voluntate & factis negare. Si nolles credere plures Deos, noli plures peccando facere: si nolles veram & diuinam Trinitatem non credere, noli falsam illi & mundanam opponere.* Post concupiscentias tuas non eas & à voluntate tua auertere; Non regnet peccatum in vestro mortali corpore; vt obediatis concupiscentiis eius; sed neque exhibeatis membra vestra arma iniquitatis peccato, sed exhibete vos Deo. Ecclesi. 18. Rom. 6. Quid æquius? aut quid contra iniquius?

Vide in 4. parte, Fer. 2. Hebd. 16. vbi hæc declaratur veritas:

Nisi ab omni cupiditate voluntas, sicut ab omni errore intellectus verè conuertatur, vix vlla est vera conuersio.



## E O D E M D I E.

## ALIA VERITAS PRACTICA.

Sicut negando potiùs quàm affirmando Deus cognoscitur, ita & diligitur.

*SENSVS EST, Quòd sicut ex duobus modis quibus cognosci potest Deus, nempe negatione & affirmatione, melius negatione quàm affirmatione cognoscitur: ita ex duobus preceptorum generibus, nempe negatiuis & affirmatiuis siue positiuis, qui sunt duo etiam modi quibus diligi potest Deus, melius negatiuis diligitur quàm affirmatiuis, quod est apprime sciendum, ad veram Charitatis praxim.*

*RATIO magis vniuersalis quæ alias in se continet, siue pro cognitione, siue pro dilectione Dei, hæc est, quia tunc Deus dicitur melius in hac vita cognosci & diligi, quando minus imperfectè cognoscitur & diligitur.*

*Sed minus imperfectè cognoscitur & diligitur negatione quàm affirmatione.*

*Ergo & sic melius cognoscitur & diligitur: ac propterea modus iste negationis est perquam necessarius scitu & factu.*

## I. P V N C T V M.



**Q**UOD in Sacratissimo Diuinæ Trinitatis Mysterio magis considerandum est, hoc in eius Religioso cultu, nobis est etiam magis obseruandum.

Quid porro magis considerandum est in hoc Sacro sancto Mysterio, quàm quòd Deus intellectu suo se perfectè cognoscens, Verbum suum, id est, sui perfectam imaginem generat: & voluntate simul cum suo Verbo sese diligens, Spiritum Sanctum



*Si cut negando potius quàm affirmando Deus cognoscitur, &c. 11*

spirat ac producit? Hæc summa dicendorum omnium, sed summa quæ dicendo nunquam consummabitur. *Non est inuenire magna- Ecclesi. 18.*  
*alia Dei: Cùm consummauerit homo, tunc incipiet.*

Atque hoc est etiam quod in Sancto eius cultu, quem potissimum hic spectamus, nobis præcipue venit obseruandum, vt scilicet intellectum exerceamus ad Diuinas perfectiones cognoscendas, & voluntatem ad illas ex æquo diligendas. Hi sunt duo pedes quibus ad Deum ambulatur; hæ sunt duæ alæ quibus ad ipsum volatur, & duo brachia quibus eum amplectimur. Ambulatur ab incipientibus in via purgatiua; volatur à proficientibus in illuminatiua via; & qui dicuntur perfecti, dicuntur in Vnitua præsertim illum amplecti. O quis suaues illos amplexus explicet? quis vel alas quibus volatur, aut gressus quibus ambulatur?

Ex multis duo sunt magis generales modi quibus id agitur & declaratur, negando scilicet & affirmando; Quod vt fructuosius, & ad praxim accommodatius fiat, sic ipsos explicandos suscipimus, vt iam ex ipso intelligamus limine, *Negando potius quàm affirmando Deum posse à nobis cognosci & diligere.*

Ratio producetur commodius, quando de duobus illis modis, quantum satis est ad eorum intelligentiam, ex sanctis Doctoribus aliquid delibatum erit. Primus qui ad Deum cognoscendum illos proposuit, sanctus Dionysius, sic vtrumque paucis expressit, dicens, *Deum esse πᾶντων θεῶν καὶ πᾶντων ἀφαιρέσειν*, Lib. de diu. nom. c. 2.  
*omnium positionem & omnium ablationem*: quia videlicet cùm emi-  
nenter omnia contineat, sic dicitur omnia ponere: At cum illa longe alio modo contineat quàm quo concipimus, sic dicitur illa formaliter excludere siue auferre. Quod sancti Dionysij dictum, qui deinceps de cognoscendo Deo scripserunt, dilucidant duplici similitudine sculptoris & pictoris. Sicut enim sculptor non nisi detrahendo & auferendo subiectam elaborat effigiem; ita qui negando contemplatur Deum, vel quod contemplatur explanat. Contrà verò sicut pictor non nisi varia multiplicique colorum additione propositam format imaginem, sic qui affirmando præclara quæque de Deo prædicat.

Qui duo certè modi multum valent ad concipiendam aliquam Dei notitiam, sed multum etiam deficiunt, & nisi admodum imperfectè quantum ex parte nostra, possunt eam exprimere no-



tionem, non modò quæ Deo digna sit, sed quæ de Deo, quid sit, aliquid dicat. Nam primus cum sit negatiuus, apertè patet quod nihil de Deo asserat; Alter verò qui affirmatiuus dicitur, affirmat quidem aliquid, sed cùm illud aliquid nihil omnino sit quod Deus est, perinde quasi nihil diceret, non magis notificat quid sit Deus post affirmata omnia quàm si de illo nihil affirmasset. Nam quod à creato quouis intellectu non potest capi, quomodo potest exprimi? Quid facient multiplicata verba, cùm omnia simul collecta nil faciant? *Multa dicemus*, inquit Sapiens, *& deficiemus in verbis: consummatio autem sermonum ipse est in omnibus. Gloriantes ad quid valebimus! ipse enim omnipotens super omnia opera sua. Ne laboretis, non enim comprehendetis. Quis videbit eum & enarrabit? & quis magnificabit eum sicut est ab initio?*

*Ecclesi. 43.* Sic quando Apostolus ait nos ex parte tantum cognoscere, ac velut in speculo & in ænigmate, nihil aliud ait quàm imperfectè nos cognoscere.

*I. Cor. 13.*

Quod & idem prorsus est de affectu voluntatis in Deum, qui vel negatione vel positione cuiusdam actus exercetur; idest, cum propter Deum declinamus à malo, & facimus bonum. In quo duplici actu exercendo, quantumcumque perfecti sint, qui dicuntur in Vnitiua esse, non nisi tamen imperfectè Deum diligunt, propter cupiditatem naturalem qua vix omninò exuuntur, & donec plenè defecerit, non est totum cor hominis Deo diligendo, sicut meretur diligi & sicut in cœlo diligitur, vt expressè docet S. Thomas sequutus sanctum Augustinum.

*22. q. 44.  
a. 6.*

Atque his ita expositis, iam euidenter patebit ratio Veritatis propositæ, quantum ad primam illam præcipue partem qua dicitur tunc Deum melius cognosci & diligi, quando minus imperfectè cognoscitur & diligitur. Nam si, vt dictum est, non aliter quàm imperfectè, quàm ex parte cognosci possit Deus & diligi, quamdiu hic ab illo peregrinamur, quid euidentius quàm quod proponitur, tunc melius & perfectius illud esse quod est minus imperfectum; sicut vniuersim dici posset de quauis animi vel corporis naturali dote, quæ cùm raro perfecta reperiatur, perfecta tamen dicitur quæ ad alias comparata minus imperfecta censetur? Quod particulatim & expressè sanctus Thomas refert de primo mandato, quo iubemur ex toto corde Deum diligere, nam postquam dixit, *Deum intendere hoc præcepto vt homo totaliter Deo*

*Ibid.*



*Sicut negando potius quàm affirmando Deus cognoscitur, &c.* 17

*uniatur, quod non impletur plenè & perfectè, nisi quando in patria Deus erit omnia in omnibus; hæc addit, Et tamen in via tanto vnus alio perfectius implet, quantò magis accedit per quamdam similitudinem ad patrie perfectionem. Vbi & probat illud sancti Hieronymi docentis in expositione Catholicæ fidei, Quod maledictus qui dicit Deum impossibile aliquid præcepisse: Nec enim Deus præcepit aliud hic agendum quam quod homo possit: vnde si non possit quàm imperfectè, satis est vt quantum possit, minus imperfectè agat; Et hoc vnum ad perfectionem illi restat, vt quid possit cum gratia videat, & quod posse viderit, enitatur. Vnde inerti animæ præsumenti Deus hoc vel præsertim exprobrat: Ego scio, ait Dominus, iactantiam eius, & quod non sit iuxta eam virtus eius, nec iuxta quod poterat conata sit facere.* Iere. 48.

Numquid animæ tuæ, Lector, numquid hæc tibi competunt? Responde & prospice, priusquàm alios idem interroges.

## II. PUNCTVM.

**S***ed minus imperfectè Deus cognoscitur & diligitur negatione quàm affirmatione.*

Primò de cognitione patet: quando enim per modum negatiuum profiteor me nihil plane posse de Deo dicere vel cogitare, longè profiteor aliquid quod est sublimius & excellentius quàm quicquid de illo dixerò. Nam quicquid affirmatiue dixerò, totum finitum est, & tam angustis circumscriptum limitibus, quantæ sunt intellectus humani angustiae: Cum verò dico me nihil omnino posse dicere, tunc profiteor Deum esse ineffabilem, inconceptibilem, illimitatum, & non minus incomprehensibilem omni creato intellectu, quàm vel loco vel tempore; quod certè tantò est aliquid dignius aut tantò minus indignum aliquid & minus imperfectum, quanto Diuinam clarius infinitatem exhibet.

Sic Diuinus Dionysius cum de Deo multa sublimiter, tum se nihil dixisse putat sublimius, quàm cum dixit, *Deum esse non substantiam, non vitam, non lucem, non sensum, non mentem, non sapientiam, non bonitatem, non Deitatem, sed quoddam his omnibus eminentius & præstantius.* l. de Myst. Theol. c. ult.

Sic Diuus Augustinus: *Excedat, inquit, cor vestrum omnia visa,* In Psal. 26.



& excedat intentio vniuersas cogitationes vestras solennes ex carne eductas à sensibus carnis, & imaginatus nescio quo phantasmate. Totum ab animo rejicite, quicquid occurrerit, negate. Cognoscite infirmitatem cordis vestri: & quidquid occurrerit, quod cogitare possētis, dicite, non est illud, non enim si illud esset, mihi iam occurrisset.

Psal. 85.

Idemque rursus apertius ad illum Psalmi versiculum, *Non est similis tui in diis Domine.* QVANTVM autem, inquit, sit dissimilis Deus, non dixit, quia dici non potest. Intendat charitas vestra, Deus ineffabilis est: facilius dicimus quid non sit, quàm quid sit. Terram cogitas, non est hoc Deus: mare cogitas, non est hoc Deus. Omnia que sunt in terra, homines & animalia, non est hoc Deus. Omnia que sunt in mari, que volant per aërem, non est hoc Deus. Angelos cogitas, Virtutes, Potestates, Archangelos, Thronos, Sedes, Dominationes, non est hoc Deus. Et quid est hoc? solum potui dicere quid non sit. Queris quid sit? quod oculus non vidit, nec auris audiuit, nec in cor hominis ascendit. Quid queris vt ascendat in linguam, quod in cor non ascendit? non est similis tibi in diis Domine, & non est secundum opera tua. Sic paucis denique sanctus Gregorius: *Omne quod de Deo dicitur, eo ipso iam indignum est, quo potuit dici.*

20. Mor.  
24.

Ezech. 1.

Deinde verò de affectu voluntatis in Deum, quod religiosius exhiberi possit negatiuis quàm affirmatiuis præceptis, hæc suadent rationes. Prima, cum modus volendi sequatur modum cognoscendi, sit autem modus Dei cognoscendi aptior ille negatiuis quem vidimus, quid sequitur, nisi vt affectus etiam se illi modo conformet, & tantò affectus voluntatis sit nobilior, quanto se magis intellectui conformabit? Hinc fortè propterea demonstratum Prophetæ, *Quod manus hominis esset sub pennis illorum animalium que volare cernebat*, quasi diceretur, vt interpretatur S. Gregorius, affectus & effectus voluntatis sequi volatum seu contemplationem intellectus.

12. q. 100.  
al. 7.

Secundò, cum multò sint plura præcepta negatiua quàm affirmatiua, quis dubitet, quod in illis obseruandis maior sit fidelitas & probata virtutis exercitatio? Percurre Decalogum, vel si quæ alia sunt præcepta Diuina, & videbis omnia præter vnum aut alterum, esse negatiua. Rationem reddit sanctus Thomas, quæ hunc nostrum discursum seu institutum probandum valde confirmat, quod scilicet *negatio sese ad plura extendat quàm affirmatio*; plures sint personæ quibus non est inferenda iniuria, quàm



*Sicut negando potius quàm affirmando Deus cognoscitur, &c.* 15

quibus debita sint præstanda, Denique quod in ipsis etiam affirmatiuis semper est opposite negatio, non ita verò in negatiuis continetur affirmatio; quamobrem, vt dicebam, qui se in illis negatiuis constanter obseruandis Religiosum præbet, Religionem suam & fidelitatem probat apertius. Sic probatos ipse Deus suos declarat, non tam in bonis quæ faciant, quàm in malis quæ caueant. *Numquid considerasti seruum meum Iob quod non sit ei similis in terra, homo simplex & rectus, ac timens Deum & recedens à malo?* *BENEPLACITVM* quippe est Domino, recedere ab iniquitate, quasi diceret Sapiens, hoc est quod præcipue placet Deo; Qua de re fusius in prima parte.

Nunc autem tertio quod declarandum suscipitur, corroboratur firmitus ex difficultate naturali, quæ in negatiuis sentitur grauior quàm in aliis: Nam cum illa præcipue natiuam exacuant cupiditatem, quanta est huius omnino reprimendæ difficultas, tanta est in illis adimplendis præceptis. Da mihi hominem qui nulla rei cupiditate teneatur, hunc ipsum tibi dabo rerum suarum largitorem munificentissimum. *Sit diues sine macula*, idest sine praua cupiditate, *qui post aurum non abeat, nec speret in pecunia & thesauris*, inquit Sapiens, *tunc eleemosynas illius enarrabit omnis Ecclesia Sanctorum*, quasi diceret, nulla restat difficultas in affirmatiuis, si quæ in negatiuis est, fuerit superata: Quapropter ad hanc peruincendam, nonne & vis maior est adhibenda, & nonne maius inde colligi potest meritum?

Quarto denique, quod rem attingit propius, quantò minus aliquid in operibus nostris intercedit de inordinato nostri amore, tantò minùs illa sunt imperfecta, sicut quantò minùs de inferiori metallo permixtum erit auro, tantò erit aurum purius. At quis nescit in affirmatiuis, idest in præstandis bonis quæ iubentur vel consuluntur, plus inesse vanitatis, gloriolæ, iactantiunculæ, & eorum nescio quæ, priuatus nostri amor progenerat vitiorum; quàm in negatiuis, id est in cauendis duntaxat malis, siue peccatis; quod vix humanis patet oculis ac ne vix quidquam ipse qui malum cauet sibi quod placeat, reperit; cum totus sit in continenda natura quæ in illa propendet mala blandientia. Nonne idcirco Fortitudinis illa pars potior semper visa est, quæ in sustinendis quàm quæ in aggrediendis periculis exhibetur; quia scilicet minus est quo sibi naturaliter complacet qui sustinet,



quàm qui aggreditur; ac proinde minus imperfectè Deum diligit in tota fortitudine qui sustinendo diligit & diligendo patienter sustinet, quàm qui audacius propterea vellet arduum aliquid aggredi. Vnde in Sacris Prouerbiis, *melior est patiens viro forti, & qui dominatur animo suo expugnatore urbium.* Quo in sensu etiam sanctus Iacobus ait, *Patientia opus perfectum habet;* id est minus imperfectum, quia minus est illius cupiditatis siue amoris proprii, vnde imperfecta & manca redduntur opera. O quam multi falluntur in suis quæ putant bona, nec tamen sunt: & in suis quæ non putant, & tamen mala sunt.

## III. PUNCTVM.

*l. 10. Confess. c. 6.* Sicut igitur negando potius quàm affirmando Deus cognoscitur, ita & diligitur. Quod vtrumque simul egregiè videtur complexus Sanctus Augustinus, cum ipse Deo sic loquebatur: *quid autem amo cum te amo? Non speciem corporis, non decus temporis, nec candorem lucis, ecce istis amicis oculis: non dulces melodias suauium cantilenarum omnimodarum, non florum & vnguentorum & aromatum suauolentiam, non manna & mella, non membra acceptabilia carnis amplexibus, non hæc amo cum amo Deum meum; & tamen amo quandam lucem & quandam vocem, & quandam odorem, & quandam cibum, & quandam amplexum, cum amo Deum meum; lucem, vocem, odorem, cibum, amplexum interioris hominis mei, ubi fulget anima mea quod non capit locus, & ubi sonat quod non rapit tempus, & ubi olet quod non spargit flatus, & ubi sapit quod non minuit edacitas, & ubi heret quod non diuellit satietas. Hoc est quod amo, cum Deum meum amo. Et quid est hoc? Interrogavi terram, & dixit, non sum: quæcumque in eadem sunt, idem confessa sunt. Interrogavi mare & abyssos, & reptilia animarum viuarum, & responderunt, non sumus Deus tuus, quare super nos. Interrogavi auras stabiles, & inquit vniuersus aër cum incolis suis: fallitur Anaximenes, non sum Deus tuus. Interrogavi cælum, solem, lunam, stellas, neque nos sumus Deus quem queris, inquiunt. Et dixi omnibus his quæ circumdant fores carnis mea: dicite mihi de Deo meo, quod vos non estis, dicite mihi de illo aliquid: & exclamauerunt voce magna, Ipse fecit nos. Interrogatio mea, intentio mea: & responsio eorum, species eorum.*

Quæ



*Sicut negando potius quàm affirmando Deus cognoscitur, &c. 17*

Quæ quidem sancti Doctoris verba, quantum ad negatiuum cognoscendi Dei modum plana sunt & expedita: sed quid contineant ad praxim diuinæ dilectionis, quia non ita forte obuium, expendi debet attentius. Primò illud quàm piè, quàm fideliter; quamcunque de Deo cognitionem habet, statim ad eum diligendum transfert, non sola cognitione pascit intellectum, sed affectum simul, ac præcipue mouet atque inflamat, quia studiosè didicerat ab Apostolo, *Etsi nouerim mysteria omnia, 1. Cor. 13. & omnem scientiam, charitatem autem non habuero, nihil sum, nihil mihi prodest.*

Secundò, cum tantò verius diligatur Deus, quantò verius cognoscitur, vide quàm aptè veriore cognoscendi Dei modum vsurpet, nempe negatiuum, quo quidquid bonorum est optimum, ita de Deo negatur, vt simul intelligatur illi aliquid inesse melius; vnde ex veriore illa quæ haberi poterit, diuinarum perfectionum intelligentia, conformis generatur dilectio, quæ hoc ipso magis perfecta censenda est, quò magis vera. Congaudet quippe Charitas Veritati.

*Ibid.*

Tertiò diuinam dilectionem cum in primis ita puram & defœcatam esse oporteat, vt non solum vnus ametur Deus, sed vnum in Deo diligatur quod Deus est; quo id tandem modo intelligi & perfici tutius poterat, quàm agnoscendo, nihil aliud in Deo esse quàm ipsum Deum? vnde autem id agnosco, nisi cum audio, sic de Deo negari omnia, vt cum tamen in illo sunt omnia, non sint aliud quàm ipse Deus? Sic enim audiens Deum esse lucem & non esse, sed quid clarius, sed quid nobilius, ita inardesco ad amandum Deum ex amore lucis, vt non sit alius amor lucis & amor Dei; sed in luce Deum, & in Deo lucem quæ Deus est, vnicè diligam. *Non sunt prunæ quibus caleant, ait Propheta, nec focus vt sedeant ad eum. Quasi diceretur; In solo Deo verus ignescit amor, & verè cor inardescit.*

Nam quod quartò præsertim aduertendum, non est tantum in eo ponenda puritas diuinæ dilectionis, vt nihil in Deo præter Deum diligamus, sed vt eorum etiam quæ sunt in nobis & circa nos præter ipsum Deum, qui rebus in omnibus est spectandus & amandus, nihil prorsus velimus diligere, quod est profectò longè difficilior, & tantò magis propterea laborandum, vt à creaturis ad Creatorem penitus animum abstrahamus, atque illius



foli simus voluntate, cuius nos esse totos intellectu agnoscimus. At quo tandem modo id agnoscī datur luculentiū, quā quo S. Augustinus creaturas interrogat, an sint Deus suus, respondentque negatiue omnes, non sumus Deus tuus? Quod perinde est ac si dicerent, non sumus principium tuum, non sumus finis tuus, non sumus bonum tuum; Quod in nobis quæris, quære illud supra nos, ne si nos simul ames, minū purē Deum ames. O vox amabilis!

Quintò denique, quod ad praxim dilectionis apprimē facit; sicut illa est ad modum facilis ad Deum cognoscendum via, cum id solum negatur esse, quod reuera non est: sic planē ad eum diligendum, nihil accommodatius, quā vt creaturis negetur affectus qui negari debet. Interroga te ipsum quid ames? si respondere possis, non terram, non aërem, non aurum, non honorem, non quicquid creatum est, tunc profectò Deum facilius diliges, nam sine amore non potes viuere, vnde si Creaturis amorem negaueris, tunc quem ames, solus Creator supererit, dicetque cum Dauide, *Quid mihi est in cælo, & à te quid volui super terram? Deus cordis mei & pars mea Deus in æternum.*

Ps. 72.

Quod si te à creaturis amandis illectum sentis, dic illis, dic audacter, nos estis Deus meus, non estis bonum meum, non estis mea requies, non hoc estis quod quero, cum quero diligere. Quid procliuus? quid expeditius? si quid diceretur positiue faciendum, excusare forsan posses; sed cum in negatione totum sit positum, quid excusabis? Neque verò putes hac praxi solum euitari malum & nullum agi bonum: Nam sic, vt dictum est, Creaturis negando affectum, amoris ille actus est quem appropriatiuum dicunt, & qui tanti est pretij, vt valore & merito ceteris etiam præponderare dicatur actibus. Hoc est vno verbo recte amare, hoc est quod se serò fecisse deplorabat S. Augustinus, hoc est quod se tandem singulari Dei dono affectum prædicabat: *Sero te amavi pulchritudo tam antiqua & tam noua, serò te amavi: Ecce intus eras, & ego foris te querebam, & in ista formosa que fecisti, deformis irruēbam. Mecum eras & tecum non eram. Ea me tenebant longè à te, que si in te non essent, non essent. Vocasti & clamasti & rupisti surditatem meam. Cornuisti, splendisti, & fugasti cecitatem meam. Fragristi & duxi spiritum & anhelo tibi. Gustauī & esurio & sitio. Tetigisti me & exarsi in pacem tuam. Quali di-*

1. IO. c. 27.



Sicut negando potius quàm affirmando Deus cognoscitur, &c. 19  
ceret, vtrumque simul, ex diuino munere accedit, vt cum nega-  
rem sensibus quod ex cupiditate appeterent, Deus omni sensu  
suauior sese tum mihi sic communicaret, vt qui hanc velit parti-  
cipare suauitatem, id præsertim contendat vt neget suis sensibus  
quod hîc cupidius appetunt. Quod & paulò prius non minùs  
gratè dixerat, *Quàm suauē mihi subito factum est carere suauitati-*  
*bus nugarum, & quas amittere metus fuerat, iam dimittere gaudium* l. 9. c. 2.  
*erat. Ejiciebas enim eas à me, vera tu & summa suauitas: ejicie-*  
*bas & intrabas pro eis omni voluptate dulcior, sed non carni & san-*  
*guini: omni luce clarior, sed & omni secreto interior: omni honore*  
*sublimior, sed non sublimibus in se.*

Vide in 1. parte, Feria 3. Hebdomada 3. in Aduentu. & die 2. Ianuarij.

## E A D E M D I E.

AD HÆC, AVT SIMILIA SCRIPTVRÆ VERBA.

*Exaltate illum quantum potestis. Ecclesi. 43.*

*Huius rei gratia flecto genua ad Patrem D. N. Iesum*  
*Christi, vt possitis comprehendere cum omnibus*  
*Sanctis quæ sit latitudo, & longitudo, & subli-*  
*mitas, & profundum. Ephes. 3.*

## VERITAS PRACTICA.

Non minùs peccat qui non satis, quàm qui nimis  
Deum scire vellet.

RATIO EST, quia qui nimis Deum scire vellet, idcirco peccare  
diceretur, quia statutum sciendi modum suæ regulam non ser-  
uaret.

Sed qui non satis Deum scire vellet, non seruaret etiam statu-  
tam sciendi regulam.



Ergo non minus peccat qui non satis, quàm qui nimis Deum scire vellet. Quod quam sit commune multis & damnosum, patebit ex discursu.

## PRIMUM PUNCTUM.

Psal. 75.

Osee 4.



VM Psaltes Regius apertè dixerit, *notum in Iudæa Deum, & in Israël magnum nomen eius*: quid est quod ille Propheta Oseeas qui ex primis prophetasse memoratur, hinc potissimum Israëlitas arguit, & futurum cum illis iudicium Domino vehementer denuntiat, *quod non sit veritas, & non sit scientia Dei apud illos*? Nonne hoc mirum dictu & auditu, cum apud illos solos esset Dei scientia? Responderi forte posset Prophetam alloqui separatim Israëlitas qui ad Idola defecerant: sic enim ait, *audite Verbum Domini filij Israël*, Sed cum paulo post dicat vniuersim in terra non esse Dei scientiam, manifestè patet non ad solos Israëlitas, sed simul ad Iudæos omnes sermonem facere, vnde & apud Prophetam alium, hæc est Dei vox conquerentis, *propterea captiuus ductus est populus meus, quia non habuit scientiam*.

Is. 5.

Mal. 2.

An verò dici posset, quæ Dauidis & primorum Iudaici regni temporum vigeret scientia, sic paulatim extinctam vel sopitam esse, vt vix scintilla restaret vlla? Sed id cogitare vetat, quod nondum deessent sacerdotes *quorum labia custodirent scientiam, & ex quorum ore lex requireretur*.

1. Reg. 2.

1. Cor. 8.

Dicendum itaque videtur aptius, quod non esset scientia Dei practica, non esset in praxi scientia quam de Deo haberent, non sicut Deum nouerant, ita glorificarent & timerent, quod ex eo vel maxime patet, quia statim ad defectum scientiæ Propheta iungit hanc peccatorum congeriem: *maledictum & mendacium & homicidium & furtum & adulterium inundauerunt*. Quasi diceret, hoc est nescire Deum, sic peccare: quod expresse de filiis Heli dicitur, qui cum sacerdotes essent, quia tamen prauī erant & impij, dicuntur *filij Belial & nescientes Dominum*. Nonne hoc ipsum est quod euidenter significat Apostolus, qui postquam dixit *nos omnes habere scientiam*, mox paucis interjectis, *sed non in omnibus*, inquit, *est scientia*. Quasi diceret, quod his præsertim nimis patet temporibus, Quam multi sunt qui



Non minùs peccat qui non satis, quàm qui nimis Deum, &c. 21

de Deo ac Diuinis nimis scire appetunt, tam pauci sunt qui satis scire velint, quo scilicet modo & fine sciendum est. Peccant illi excessu, defectu isti; Nec minùs forte peccatum est iste defectus, quàm ille excessus; quod quia vix credi posset, idcirco præcipuè proposita Veritas in id incumbit, vt demonstret, *non minus eum peccare qui non satis, quàm qui nimis de Deo scire vellet.*

Sic autem faciliè demonstratur, si aduertas quid sit quomobrem peccet qui plus nimio de Diuinis scire velit. Nonne hinc peccatum oritur, quòd statutam unicuique de Diuinis sciendis regulam ac præscriptum modum non seruet? Nam cum habenda de re quavis scientiæ sit virtus aliqua moderatrix, quæ nimium discendi appetitum temperet; quantò id magis exigitur in Diuinis, vbi facilius est labi, & vbi lapsus est perniciosior? *Sicut qui mel multum comedit, non est ei bonum, inquit Sapiens, sic qui scrutator est Maiestatis opprimetur à gloria: Quod & alibi sic apertius: altiora te ne quaesieris, & fortiora te ne scrutatus fueris, sed quæ præcepit tibi Deus, illa cogita semper, & in pluribus operibus eius ne fueris curiosus.* Quod & serio grauiusque sanctus Apostolus: *Dico enim per gratiam quæ data est mihi, omnibus qui sunt inter vos, non plus sapere quàm oportet sapere, sed sapere ad sobrietatem: & unicuique sicut diuisit Deus mensuram fidei; Quid clarius? vnde sanctus Augustinus, sapite ad temperantiam; temperantia autem, inquit, est modus & temperamentum quo quisque uti debet, vt inter suos terminos se coërceat.*

Quapropter qui hos excedit terminos, peccat; quia discedit ab illius virtutis medio, cuius erat ipsum suis continere terminis, quos extra non nisi præceptum in vitium ruat. *Deus scientiarum Dominus est, & ipsi præparantur cogitationes, id est, tantum scire de Deo nos oportet quantum ipse velit; Temeritatis est plura scire velle, quam velit: peruersus ille est discendi & sciendi appetitus, quo primi nostri progenitores elusi sunt. Quàm longè sapientior noster Apostolus, qui de se ac de suis: Nos autem, inquit, non in immensum gloriabimur: sed secundum mensuram regulæ qua mensus est nobis Deus.* Audi curiosè perscrutator rerum diuinarum; Audi Apostolum profitentem sibi statutam esse regulam, imo & mensuram regulæ quam non sit ausus prætergredi: Tu verò nullis te coërceri fines limitibus, sed quo te feret impetus, audebis arcana illa quæ non licet homini loqui, quæ soli Deo nota sunt, velle

2. 2. q. 165.  
De studiositate.

Prov. 25.

Ecclesi. 3.

Rom. 12.

Ep. 47.

1. Reg. 2.

2. Cor. 10.



*Ecclesi. 37.* scrutari! O præsumptio nequissima, unde creata es operire aridam malitia!

### SECUNDVM PVNCTVM.

**S**ED qui non satis etiam de Deo scire vellet, non illam seruaret regulam & mensuram sciendi.

*Iob. 21.* Nam quid est non satis scire velle, nisi non velle quod te Deus scire velit, nisi non velle quod possis & quod debeas scire? Sicut enim nimis velle non aliter intelligitur quàm velle plusquam possis & debeas, seu plusquam Deus velit: sic planè non satis velle dicendum est, qui non velit, quod velit Deus, qui non velit quod possit & quod debeat: *Qui dixerunt Deo, recede à nobis, scientiam viarum tuarum nolumus.* Cum enim diuina voluntas sit regula siue mensura, quae se quisque metiatur, vt de Deo discat & sciat quod sibi sciendum est, profecto non minus illam violat regulam quisquis infra diuinam voluntatem agat, quàm qui supra se effert: defectus enim est, quo à mensura seu à medio & à regula perinde disceditur, atque excessu. Vnde iam supra S. Hieronymus: *In virtutibus, inquit, nec hyperbases nec ellipses, nec plus nec minus, sed omnia temperata.* Et si à recta via paululum declinaueris, non interest utrum ad dexteram vadas an ad sinistram, cum verum iter amiseris, Et sanctus Gregorius Nazianzenus, *Virtutem excessus & defectus peraeque labefactant, non secus ac regulam additio aliqua vel subtractio.*

*In Isaiam c. 52.* Quamobrem vnicuique particulatim attendendum quid sibi forte desit ex illa diuina Scientia, cuius defectu non modo fides in credendis, sed fidelitas in obseruandis Dei mandatis langueat, vnde grauiore in peccatum lapsus manifestè contingant. Nam *Ioh. 2. 3.* sicut dilectus ait Discipulus, *Qui dicit se nosse Deum & mandata eius non custodit, mendax est:* Et rursus *omnis qui peccat non cognouit eum:* Sic plane qui nosset Deum sicut potest & debet nosse, non peccaret tam abruptè saltem, tam frequenter & obstinatè. Nam qui Deum nouit, nouit quid sit peccatum, nouit eius grauitatem, sentit eius pondus, pertimescit eius perniciem, & tandem illud discit fugere quasi à facie colubri.

Discendum itaque diligentius peccatori quid sit Deus quem offendit, qualis quantusque sit in quem tam audacter peccat: &



discendum non more Philosophico, non modo Metaphysico & abstracto à sensibus, qualis solet in Schola tradi: sed faciliiori quadam & sensibili disciplina quam subministrat Apostolus: *Vt possitis*, inquit, *comprehendere cum omnibus sanctis quæ sit latitudo & longitudo & sublimitas & profundum*: Per has enim quatuor quas vocant positionum differentias satis vulgo notas, sic Inuisibilis & Immenſus exhibetur, vt ipsis propedum oculis cerni & manibus atrectari videatur: Vnde Apostolus non timuit verbum illud vsurpare, quod alioquin liberius & audacius crederetur, quomodo enim posſimus illum *comprehendere* qui comprehendendi non potest? At respondetur non potest quidem Deus perfecte vt in se est, comprehendendi; sed quantum potest à nobis, tunc comprehenditur, si per illa quatuor consideretur.

Est verò aliud in illo verbo *comprehendere* non minus obseruandum: nam intellectum non ita proprie spectat quàm voluntatem: non tam ad nudam & simplicem de Deo referendam cognitionem, illo excitamur verbo, quàm ad affectum ex illa Dei cognitione permouendum, & ita totum animum persuadendum, vt effectus inde tandem sequatur: atque id comprehendatur & teneatur quod tanquam finis quæritur, nempe cultus Dei & salus animæ, vel quiduis particularius eò spectans. Sic expresse S. Bernardus: *Ascendamus quadrigam istam, vt pote infirmi & imbecilles, indigentes tali vehiculo, si forte vel sic apprehendamus in quo apprehensi sumus, idest, huius ipsius vehiculi rationem. Nam hoc monitum habemus ab ipso auriga & primo currus huius exhibitore, vt studeamus comprehendere cum omnibus sanctis, quæ sit longitudo, latitudo, sublimitas & profundum. Comprehendere dixit non cognoscere, vt non curiositate contenti scientiæ, tota cura fructui inhiemus. Non in cognitione est fructus sed in comprehensione, alioquin scienti bonum & non facienti, ait quidam, peccatum est ei. Et ipse Paulus alio loco, sic currite, inquit, *vt comprehendatis*. Quod & paulò post fusiùs explicat, vt tertio puncto videbitur.*

Lib. 5. de  
confid. c. 13.

Iac. 4.  
I. Cor. 9.

Neque verò etiã putandum est, quod quæcumque quaternario illo Apostolico recensentur, sint unicuique omnia perdiscenda, sed ex multis quæ proponuntur, satis fuerit illa vt quiuis assumat, quæ sibi aptiora videbuntur, vt cum Diuina gratia discat à malo declinare & bonum facere. Iste est finis instituti de Deo nostri discursus, & hic eius ordo, vt quem ipse Apo-



stolus exhibet ordinem religiosè obseruantes, diuinam prius Essentiam, tum notiora eius Attributa in singulis quatuor gradibus pari adoranda cultu consideremus.

Jer. 23.

l. 5. de con-  
f. d. c. 13.

Prima est Latitudo, & prima quæ in considerationem venit, diuinæ Essentiæ Latitudo, ipsa est Immensitas qua vbique locorum præsens existit; *Numquid non calum & terram ego impleo, dicit Dominus?* Deinde verò, si sancto Bernardo credimus, *immensa est illa charitas quæ nihil odit eorum quæ fecit; qua solem suum oriri facit super bonos & malos, & pluit super iustos & iniustos: quæ non modo animi affectionem sed & cognitionem excedit, adjiciente Apostolo & dicente, scire etiam supereminentem scientiæ charitatem Christi.* Denique tanta est Diuinitatis latitudo, quanta est omnium perfectionum infinitas. Contemplare quidquid vbiuis est eximium & singulare, quidquid admirandum & illustre, quicquid perfectum & in quouis genere absolutum, sic totum plenè Deus possidet, nihil vt prorsus quod rationem boni habeat, illi desit, creataque omnia cum illo comparata, quæcumque sint, quasi non sint. *Ecce gentes quasi stilla situla & quasi momentum statera reputatae sunt: Ecce insulae quasi pulvis exigui; omnes gentes quasi non sint, sic sunt coram eo, & quasi nihilum & inane reputatae sunt ei.*

Is. 40.

Quod si ad singulas descendere velis Perfectiones, sic dices, Omnipotentiæ latitudinem non aliis circumscribi terminis, quàm omnium planè rerum, quæ cum non sint, possunt à Deo fieri, aut quæ cum sint, possunt ab eo destrui. Sic dices Sapientiam tali parem potentiæ, cum quidquid Potentia faciat, conseruet Sapientia. Nec minorem dices Scientiam, quæ quidquid potest esse, intelligit; & quidquid potest intelligi, comprehendit. Sicut verò ad Sanctitatem nihil addi potest, sic neque detrahi. Et sicut ad omne mali genus depellendum sese diffundit Misericordia, sic ad omne largiendum bonum se diuina protendit Bonitas, qua si fortè peccator abutatur, vbicumque tandem peccet, ibi Deus, ibi Iustitia tam integra, tam incorrupta, tam inuiolabilis, vt nullum quantumuis leue piaculum non sit expiandum. Denique Pulchritudo tanta, cuius vnus visio Beatos reddat; cuius vnus priuatio, poenam quam damni vocant, inuehat.

Ps. 47.

Ps. 144.

Ps. 146.

Nonne reuera *Magnus Dominus & laudabilis nimis?* Nonne is reuera est, cuius *Sapientia non est numerus, cuius magnitudinis non est finis?* Et tamen hunc peccator non vereris offendere: tantæ tu audes



*Non minùs peccat qui non satis, quàm qui nimis Deum, &c. 25*

audes Magnitudini te opponere ; tantam aspernari Bonitatem, tantam deridere Iustitiam ! Vndenam putas dicitur, *latum Dei* ps. 118.  
*mandatum nimis*, nisi quia diuinam latitudinem ita quodammodo participat, vt quantus huic debetur cultus, tantus diuinis obseruandis mandatis esset adhibendus, aut quanta est mandatorum Dei despectio, tanta diuinæ magnitudinis sit violatio.

Latitudini porro Longitudinem proximè iungit Apostolus, de qua hoc vnum sufficit dicere, quòd quanta quanta est æternitas, tanta est diuinæ Lōgitudō Essentiæ, tanta est diuinarum omnium perfectionum Longauias, tanta est Omnipotentia, tanta Sanctitas, tanta Misericordia, Bonitas, Iustitia, Pulchritudo ; nullum vt vnquam sit temporis aut loci spatium quo vel Deus inceperit esse quod est, vel quo desinat esse quod semper est, semper magnus, semper bonus, semper iustus, *A seculo & vsque in seculum* ps. 52.  
*in es Deus.*

Quàm longè peccator falleris, cum vno tibi licere loco vel tempore peccatum putas, quasi Deus non illo tam præsens & iustus esset loco vel tempore ! sunt ista maximè quæ prouocare dicuntur oculos Maiestatis eius, vt sciant omnes omni Deum colendum spatio ; *Dixerunt enim, dereliquit Dominus terram, & Dominus non videt.* Ezech. 9.  
*Igitur & meus non parces oculus, neque miserebor : viam eorum super caput eorum reddam.*

Tertiò sequitur Altitudo quæ si tamen attentè consideretur, prima videri possit quæ nos à peccando deterreat ; Ipsa est enim diuina Majestas, ipsa est absoluta summa, suprema, independens, & à qua omnes necessario creaturæ pendent, Dominatio. *Ecce ego Dominus Deus vniuersa carnis : numquid mihi difficile erit* 1er. 32.  
*omne verbum ? Dominus est, Dominus inquam tanti tamque alti & supremi dominij, vt cum de cunctis hominibus vel Angelis quidquid libuerit ordinarit, hoc vnum dici possit : Dominus est,* 1. Reg. 3.  
*quod bonum est in oculis suis, faciat. Quis enim dicet tibi, ait Deo Sapiens, Quid fecisti ? aut quis stabit contra iudicium tuum ? aut quis* Sap. 12.  
*in conspectu tuo veniet vindex iniquorum hominum, aut quis tibi imputabit si perierint nationes quas tu fecisti ?*

Habent vero singulæ perfectiones Sublime proprium aliquid quod miremur. Potentia talis est, nulli vt liberæ creaturæ vim inferat, nulla vt illi etiam creatura possit obistere. Sapientiæ mundum moderantis ea est suauitas coniuncta fortitudini, vt suis



Rom. 12.

ps. 6.

omnia relinquat motibus, quasi nil ageret; sic tamen agat cum omnibus, quasi non requiesceret. De perfecta Dei Scientia dubitarunt Pagani, ne si facerent Deum scientem omnium, facerent eum malum, ut qui non arceret mala quæ præsciret. Verum in hoc vel maxime mirabilis diuinæ est Altitudo scientiæ, quod ita quæuis futura mala præuideat, ut neque humanæ libertati sicut iam dictum est, neque diuinæ Sanctitati possit officere talis præuisio. Hæc est videlicet *altitudo diuitiarum sapientiæ & scientiæ Dei*, quam potissimum mirabatur Apostolus. Nonne verò in Sanctitate oportet inesse aliquid altius & sublimius quàm cogitari possit, cum in ea demiranda toti sint nobiliores Spiritus, neque unquã ab illo cessent trisagio celebrando, *Sanctus, Sanctus, Sanctus Dominus Deus exercituum*? Quid porro altius illa Bonitate & Misericordia, quæ dat omnibus affluenter, cum nulli quidquam debeat; quæ cum omnia dederit, nihil impropertat; quæ sua compensat dona; cui tardius videtur dare, quàm peccatori recipere; quæ se denique totam tam multis effundit donis & modis, quàm quisque velit frequentius in apertis & palam obuiis illam haurire Sacramentis? Ac tandem sicut diuina fruitione nihil homini potest contingere beatius, nihilue altius, nonne hinc euidenter patet quàm sit sublimis corona Iustitiæ quæ cuiusque meritis redditur, quàm sit excelsa illa iustitia, quæ nostra hæc exigua promerita tanti æstimat talique compensat præmio, qualis est ipsius Dei possessio.

Ser. 175. de Temp.]

Denique quod in tanta diuinarum perfectionum altitudine singularem habet admirationem, sic altus & sublimis est Deus, ut humilia & demissa potissimum respiciat, seseque quodammodo his adiungat; excelsa verò & tumentia peccatorum corda, quasi non videat, sic aspernatur. *Videte*, inquit S. Augustinus, *videte magnum miraculum: Altus est Deus, erigit te, & fugit à te: humilia te & descendit ad te. Quare hoc? quia excelsus est & humilia respicit, & alta de longe cognoscit. Humilia de proximo respicit ut attollat; alta idest superba de longe cognoscit ut deprimat.* Hocne peccator intelligit, hocne superbus cogitat, qui toties contra Deum intumescit? Nollet profecto nollet sic deprimi, si Deum ita nosset superbos deprimentem, vnde aptè Sapiens in Prouerbiis: *Superbus & arrogans vocatur indoctus*; Nescit quippe de Deo quod si sciret, non ita fortè superbus esset & arrogans.

Prou. 21.



*Non minus peccat qui non satis, quam qui nimis Deum, &c. 27*

Sed quod quartum restat, prosequamur. Profundum est, quod in diuina Essentia dicitur ipsa eius Incomprehensibilitas. In Potentia, potestas operandi quidquid velit ex nihilo, & ex tanta facilitate quanta id velit, Dixit & facta sunt. In Sapientia, diuinorum illa est abdita iudiciorum abyssus, quam nullus possit creatus penetrare intellectus. *Iudicia tua, abyssus multa.* In Scientia, *vinus est ille sermo Dei & efficax & penetrabilior omni gladio* Ps. 34  
Heb. 4. *incipiti, & pertingens usque ad diuisionem animae ac Spiritus, compagum quoque ac medullarum, & discretor cogitationum & intentionum cordis.* Et non est vlla creatura inuisibilis in conspectu eius, omnia autem nuda & aperta sunt in oculis eius, quasi qui rerum omnium anatonem & dissectionem faciat, hoc Græca innuit dictio. Sed cur sermo Dei dicitur diuina hæc scientia? Quia nempe folius Dei est de his loqui prout reuera sunt, quia magis profunda sunt quam vt possint intelligi vel exprimi; vnde sapienter Dauid; *Non est sermo in lingua mea. Ecce Domine, tu cognouisti omnia, nouissima & antiqua; mirabilis facta est scientia tua ex me, confortata est, & non potero ad eam.* Ps. 138.

In Sanctitate verò Profundum est ipsa Diuinitatis natura quæ sola ex se tanquam ex fundo suo habet vt sit sancta & perfecta, cum ex cæteris omnibus Sanctis nullus sit cuius natura sit Sanctitas, & cuius proinde Sanctitas non aliunde proueniat, nempe ex illo diuinæ Sanctitatis profundo, vnde quantumcumque deriuatur in alios, nunquam tamen exhauritur. *Deus solus iustificabitur,* Ecclesi. 18. ait Sapiens, idest, ille solus expers per sese totius probri & vitij. In Iustitia porro quale tandem illud punitionis æternæ profundum, quo ab vna culpa tot absorbentur Angeli, & vnde vt possent homines erui, Deum oportuit fieri hominem, dira pati & mori! quo certè in profundo Iustitiæ, latet & patet Profundum Bonitatis ac Misericordiæ circa humanum genus ita redemptum. Latet quidem quantum ad causam quæ nulla potest esse præterquam ipsa diuina Bonitas; patet porro quantum ad effectum, qui tam profundus est & intimus, vt quidquid est animarum penitius, eò se magis inferat. In diuina denique Pulchritudine quæ beatos facit, Profundum quidem dici posset quod beati vident, quia sic illud vident, vt sine vlllo fastidio videntes saturantur: Sed verius dicas, illud esse profundum quod Beati non vident, quia quantumcumque de Deo videant in ipso Deo, tale tamen hoc est Dei



profundum, vt restet semper infinitum videri quod solus videt Deus. *Abcondes eos in abscondito faciei tue.*

*Psal. 30.*

Hæc sunt ex multis pauca, quæ cum de Deo sciri possint & debeant, ex illa saltem parte, quæ refranandis cupiditalibus & cauendis peccatis est vnicuique particulatim necessaria, nonne qui nolit ea scire, non satis de Deo scire velit? Et nonne is qui non satis de Deo scire velit, non seruat regulam & mensuram sciendi, quam statutam vidimus, vt quantum velit Deus, seu quod idem est, quantum quisque potest & debet, tantum scire velit?

*L. Par. 28.*

*Fili mi, scito Deum patris tui, & seruito ei corde perfecto, & animo voluntario: omnium enim corda scrutatur Dominus, & vniuersas mentium cogitationes intelligit.* Quasi diceret Dauid, scito Deum, non vt illum scias, sed vt ei seruias; & quantum necesse est scire, vt ei seruias; tantum necesse est illum scire. Neque tibi fingas te satis illum scire, nisi ei seruias, nam ille nouit omnia; & quidquid dicas, probè intelligit an verè dicas. Vel sic interpretare: Vt Deo seruias, hoc in primis de Deo scire debes, quod omnium corda scrutatur & vniuersas cogitationes intelligit; sic enim à peccando deterreberis; aut nisi hæc de Deo scias & cogites: quidquid aliud noris, non satis de Deo scies, quia non illud scies quod est tibi maximè opportunum vt ei seruias. Hoc est quod dolebat

*Ioan. 17.*

Christus Dominus: *Pater iuste, mundus te non cognouit.*

### III. PUNCTVM.

**H**inc ergo manifestè patet, *Quod non minus errat, non minus peccat, qui non satis, quàm qui nimis Deum scire vellet.* Nam si propterea peccet, qui nimis scire desideret, quod mensuram sciendi violet, nonne ab illo etiam violatur qui non satis scire curat? Nonne in medio sistit illa mensura? Nonne ex æquo medium deferitur, si non satis coneris vt attingas, aut si supra quam oportet, efferaris? Nonne dextra perinde cauenda est ac sinistra volenti medium tenere iter? hoc vtrumque videtur Sapiens ad rem nostram opportunè complexus, cum dixit, *Qui altam facit domum suam, querit ruinam; & qui euitat discere, incidet in mala.* Nam quocumque modo quis supra suum statum molitur aliquid grandius, is altam dicitur facere domum suam; quod profectò is facit, qui de diuinis Mysteriis plura & sublimiora quàm ferre possit hu-

*Prov. 17.*



*Non minus peccat qui non satis, quam qui nimis Deum, &c. c. 29*

manum ingenium disceptare aggreditur, neque alium suae temeritatis exitum expectare potest quam ruinam fidei, pietatis, & salutis. Qui autem euitat ea discere quae diuinum timorem & amorem pariunt seu nutriunt, manifestè incidet in ea mala & peccata quae non nisi timore vel amore Dei cohibentur. *Nonne* Ecclesi. 1. *qui sine timore est non iustificabitur*, id est, non erit sine peccato? At nonne is sine timore est, qui nescit non quidem illa omnia quae de Deo commemorata sunt, sed horum vnum aliquid, quo discat magis colendum & timendum Deum quam vulgò colitur & timetur?

*Scito & vide quia malum & amarum est reliquisse te Dominum* 1er. 22 *Deum tuum, & non esse timorem mei apud te, dicit Dominus Deus.* Nonne hoc vides quale sit malum, non esse timorem aut amorem Dei? At simul vide & scito hodie non esse Dei timorem & amorem, ubi non est Dei scientia, ubi non est cognitio diuinæ Bonitatis & Iustitiae. Ne mihi nunc multitudinem aut difficultatem discendorum excuses; Vnum aut alterum ex omnibus est tenendum, discere Deum timere, discere diligere, & tenes omnia.

Hoc est enim illud comprehendere cum omnibus Sanctis quod commendat Apostolus, & quod sic explicat S. Bernardus: *Novimus hac, num ideo & arbitramur nos comprehendisse? Non ea dissipatio comprehendit, sed Sanctitas: si quomodo tamen comprehendere potest quod incomprehensibile est. At nisi posset, non dixisset Apostolus: ut comprehendamus cum omnibus Sanctis. Sancti igitur comprehendunt. Queris quomodo? si Sanctus es, comprehendisti & nosti: si non, esto, & tuo experimento scies. Sanctum facit affectio Sancta, & ipsa gemina; timor Domini Sanctus, & Sanctus amor. His perfecte affecta anima veluti quibusdam duobus brachiis suis comprehendit, amplectitur, stringit, tenet, & ait; Tenui eum, nec dimittam. Et timor quidem sublimi & profundo; amor lato longoque respondet. Quid tam timendum quam potestas, cui abscondi non potes? Poterat minus timeri Deus alterutro carens. Nunc autem perfecte oportet timeas illum, cui, nec oculus deest omnia vident, nec manus potens omnia. Quid item tam amabile, quam amor ipse quo amas & quo amaris? amabiliorem timen iuncta aeternitas facit; quae dum non excidit, foras mittit suspicionem. Ama igitur perseveranter & longanimiter & habes longitudo-  
Lib. 5. de  
confid. c. 14.*



30 FERIA 2. Hebd. 1. post Octau. Pent. de Incar. consid. in SS. SS.

*dumque apprehendisti. Aut si mauis quatuor aequè tuis diuinis quatuor respondere, facis hoc, si stupes, si paues, si ferues, si sustines. Stupenda planè sublimitas maiestatis, pauenda abyssus iudiciorum, feruorem exigit charitas, aternitas perseuerantiam sustinendi. Quis stupeat, nisi qui contemplatur gloriam Dei? Quis pauet, nisi qui scrutatur profundum Sapientiae? Quis feruet, nisi qui meditatur charitatem Dei? Quis sustinet & perseuerat in amore, nisi qui amulatur aternitatem charitatis? Nempe aternitatis quamdam imaginem perseuerantia præ se fert. Denique sola est cui aternitas redditur, vel potius quæ aternitati hominem reddit, dicente Domino: QUI PERSEVERAVERIT VSQUE IN FINEM HIC SALVVS ERIT.*

Vide in 4. parte, Fer. 4. Hebdomada 19.

Quicquid de Deo se scire dicant impij, Deum nescire dicendi sunt.



## AD DVAS SEQVENTES HEBDOMADAS.

MATERIA Considerationum & Veritatum desumetur ex sanctissimo Sacramento, quod sicut præcipuè dicitur institutum ad conseruandam & renouandam memoriam Vitæ ac Mortis Domini nostri Iesu Christi quam repræsentat: sic vnaquoque die pars aliqua insignior eius vitæ proponetur, atque inde conformis consideranda Veritas.

## FERIA SECVNDA. DE INCARNATIONE DOMINI CONSIDERANDA IN SANCTISSIMO SACRAMENTO.

*Sic Deus dilexit mundum, ut Filium suum  
unigenitum daret. Ioan. 3.*



*Quò minùs potes reddere quacumque debes, eò magis, &c.* 31

## VERITAS PRACTICA.

Sic Deus dilexit mundum, vt quod Deo totus debet  
Mundus, tu totum vnus debeas.

*RATIO EST facilis, quia quod Deo totus debet Mundus  
est donum vniogeniti Filij.*

*Sed tu totum hoc donum vnus debes, cum velut pro te vno  
totus sit datus filius.*

*Ergo & quod Deo totus debet mundus, tu totum vnus debes.*

Quæ certè consideratio perquam vtilis & fructuosa est: sed  
cum vix vllam habeat difficultatem, iungenda sequens  
Veritas:

*Quò minùs potes reddere quacumque debes, eò ma-  
gis debes reddere quacumque potes.*

*RATIO EST, Quia quò minùs potes reddere quacumque  
Deo debes aut hominibus, eò magis te illis debes submittere  
& probare impotentiam tuam ac bonam voluntatem persol-  
uendi omnia, si posses aut quando poteris.*

*Sed nisi reddas quacumque potes, non te magis submittes Deo,  
nec impotentiam tuam illi probabis, nec voluntatem satisfa-  
ciendi si posses.*

*Ergo quò minùs potes reddere quacumque debes, eò magis debes  
reddere, quacumque potes.*

## I. P V N C T V M.

**I**ANTA est Charitas, & tam admiranda dilectio, quam  
Deus mundo exhibuit, cum ei Filium suum vnigenitum  
dedit, vt ipse Filius de hac dilectione loquens, non nisi ad-  
mirans exclamet: *Sic Deus dilexit mundum!* Admirare tu cum



illo, expendens singulas diuinæ dilectionis circumstantias quæ habentur in prima parte, FERIA SECUNDA, primæ Aduentus Hebdomadæ. Tùm verò contemplare quàm sit quodammodo magis admiranda illa Charitas, quâ vel Deus Pater eundem Filium suum, vel Ipse Filius sicut olim in Incarnatione, mundo: sic tibi se in Sacramento dedit semper præsentem, semper fruendum, semper quoties volueris, magis ac magis vniendum! O certè mirum ac stupendum! pro te vno misello inter mortales hominione, sic Deum Optimum Maximum velle id toties quod semel pro toto se miratur fecisse mundo! Tu quis es cui tanta famulantur obsequia?

Primò quidem quàm præclare simul conueniant Incarnationis & sanctissimi Sacramenti mysteria, declarandum esset, nisi tam euidenter pateret, vt sanctus Chrysostomus non dubitaret asserere, sanctissimum hoc Sacramentum esse Incarnationis extensionem; & sanctus Augustinus verbum ipsum *Incarnare*, pro ipso consecrationis actu dicatur vsurpasse, dum hæc eius referuntur dicta. *O veneranda sacerdotum dignitas in quorum manibus velut in utero virginis Filius Dei Incarnatur!* Quid porro in sancto Thoma frequentius, quàm quod ait, *totum mysterium nostræ salutis in illo comprehenditur Sacramento?* Denique cui non sunt hæc Authoris de imitatione Christi obuia? Ita magnum, nouum & incundum tibi videri debet, cum celebras aut missam audis, ac si eodem Die Christus primum in uterum virginis descendens, homo factus esset, aut in cruce pendens pro salute hominum pateretur & moreretur.

Molina de  
Instructione  
Sacerd.  
tract. 1. c. 5.  
8. 2.

Lib. 4. c. 2.

32

Et certè quando hæc abessent testimonia, quis orthodoxus non credat, aut quis rerum tam parum intelligens diuinarum non agnoscat, quod sicut post quinque hæc verba consentientis virginis: *Fiat mihi secundum verbum tuum*, statim Verbum Diuinum in eius illapsum est vterum, & Caro factum est: ita post quinque verba sacerdotis: *Hoc est enim Corpus meum*, eodem instanti Christus idem prorsus substantia & persona, in manibus consecrantis se præsentem sistat, & tam verè tùm sit sub speciebus panis, quàm verè olim erat in utero sanctissimæ Matris; nec minus verè possit dicere quod ab illo dictum Propheta dixit, cum Incarnari cœpit: *Ego ipse qui loquebar, ecce adsum.* Quid similius? quid expressius? & quid vulgarius?

Quamobrem illis omiſſis aut præsuppositis, quod singulariter expendendum



*Quò minus potes reddere quaecumque debes, eò magis, &c.* 33

expendendum proponitur, ille est singularis amor, quo te Deus ita prosequitur, vt tantundem quotidie tibi vni per sacram impertiat Eucharistiam, quantum toti mundo, semel se incarnando, dedit. Non conueniebat profecto, vt se cuilibet particulari homini Christus vniret vnione illa quam vocant hypostaticam; neque tamē diuina bonitas sibi ac nobis deesse voluit, quin mirabile hoc inuentum excogitarit, quo se tam arctē nostris astringeret animis; atque vt ait S. Chrysostomus, *Per omnia nos ita sibi co-* *Hom. 60.*  
*augmentaret, vt hoc vno beneficio simul omnia complecteretur, &* *ad pop.*  
hoc vno dato daretur in singulos tibi dies totum simul collectum quidquid per partes dabat Christus dum viueret, aut quidquid modo ceteris vniuersim concedat hominibus.

Stupendus certe amor, & nunquam satis prædicatum donum, ex quo sequitur quod si amantem redamare velis, tantum illi debeas quantum totus simul mundus; vnde si omnium qui fuerunt, qui sunt, & qui futuri sunt corda solus haberes, tu ex illis totis Deum deberes diligere, cui tantum debes quantum reliqui homines. At saltem illum dilige ex toto corde tuo quod longe minus est illis & numero & merito. Ne vero possis vnquam excusare paruitatem aut impotentiam tuam in reddendo quod debes; Audi & expende Veritatem propositam; *Quò minus potes reddere quaecumque debes, eò magis debes reddere quaecumque potes.*

Ratio est familiaris & obuia nec minus tamen expendenda; quamobrem vide accuratē quā diligenter obseruetur inter homines quod si quis Debitor Creditori non possit ex toto satisfacere, saltem se illi submittat, suam illi probet inopiam & impotentiam, tantoque magis suam illi propensam voluntatem significet & paratum animū ad debita omnia persoluenda, quanto se impotentiorē profitetur. Nonne sic tibi velles fieri? Nonne sic te aliis dmitteres? Nonne forma & exemplum huius demissionis statutum est in illo Debitore qui Creditori suo & Domino *patientiam habe in me*, inquebat, *& omnia reddam tibi!* *Matth. 18.* Quæ certe animi preparatio tantum valuit apud Creditorem, vt omne propterea debitum debitori remiserit. An verò putas minus Deo deferendum quā hominibus? An putas tibi minus conuenire aut Deo minus esse gratum, si supplex illum sic ores vt patientiam in te habeat, & te omnia illi redditurum? Nonne idcirco Christus Dominus hoc parabolicum exemplum retulit vt indicaret idē



valere apud Deum quod apud homines; atque idem à nobis debitoribus præstandum Deo, quod præstatur hominibus? *Adhuc & vos sine intellectu estis?*

*ibid. 15.*

## II. P V N C T V M.

**S**ED nisi reddas quaecumque potes, non te summittes Deo, nec impotentiam tuam illi probabis, aut voluntatem satisfaciendi si posses.

Quomodo enim de impotentia poteris os aperire si non facis quæ potes? Nonne te arguet duplex malitia tua? vna quidem quod quæ potes negligas facere; altera vero quod negligentiam tuam ementito impotentia nomine dissimules & obuoluas! Itane Deo, cordium & virium scrutatori affingis? Ego scio, ait Dominus, iactantiam eius, & quod non sit iuxta eam virtus eius, nec iuxta quod poterat conata sit facere; quasi diceret, quidquid mihi affingas, ego scio quid reuera sit, ego scio quid possis vel non possis, & sicut arrogantis & iactabundi est plus promittere & præsumere quàm præstare possit, ita etiam negligentis & tepidi non id efficere quod per vires in Domino possit.

*Ex. 48.*

*Prov. 24.*

- Sic iam pridem ex Sacris audiuiſti Prouerbiis: *Si dixeris, vires non suppetunt, qui inspector est cordis ipse intelligit, & seruatorem anime tue nihil fallit, reddetque homini iuxta opera sua.* Quæ postrema Sapientis verba triplicem habent sensum valde accommodatum. Primus est quod Deus te iudicabit non ex sermone sed ex operibus: id est quidquid dicas ad te excusandum, nihil proderit si des operari quod potes. Secundus, frustra te excusas apud Deum de impotentia tua cum ipse videat ex operibus tuis quid possis, & ex illis te ipsum arguet & condemnabit. Tertius denique, ex illa tua negligentia qua non facis quod potes, conuinceris à Deo te neque plura facturum si plura posses, neque vllam in te esse voluntatem satisfaciendi debitis tuis. Cur enim non facis modo quæ potes & debes facere? Solius plane voluntatis defectus est quæ si modo deest in his paucis quæ potes, quomodo probas illam affuturam in aliis quæ non potes? Nonne illud ipsum est quod in Euangelio declaratur; *Qui fidelis est in minimo, & in maiori fidelis est: & qui in modico iniquus est, & in maiori iniquus est*, id est, indicat se futurum iniquum si maiora ei crederentur: Imo & de præſenti, iniquus est in maiori, si se in eo dicat fidelem futurum, cum sit infidelis in modico.

*Luc. 16.*



*Quò minus potes reddere quacumque debes, eò magis, &c.* 35

O quàm verè dictum à beato Iob : *Quod non iustificetur homo* Iob. 5.  
*compositus Deo : si voluerit contendere cum eo, non respondebit unum*  
*pro mille.*

### III. PUNCTVM.

**Q**UO minus ergo potes reddere quacumque debes, eò magis debes  
reddere quacumque potes. Nam sicut verè ostenderes te non  
posse plura reddere, si redderes quacumque potes : sic plane nisi  
hæc reddas quæ in tua sunt potestate, non probabis te impoten-  
tem esse ad plura quàm reddas, reddenda : vel certe non proba-  
bis ex sola impotentia fieri quod non reddas quæ plura debes, &  
quæ dicis te redditurum si posses. Esto enim non possis plura : ta-  
men in illa tua impotentia deberes præ te ferre bonam volunta-  
tem totius debiti persoluendi si facultas adesset ; at quomodo il-  
lam bonam voluntatem præ te feres, cùm voluntas desit in his  
quæ potes reddere ?

Vndenam putas factum quod Vidua illa paupercula quæ duos Luc. 21.  
tantum obolos misit in Gazophylacium, prælata est à Domino  
viris illis qui eò immittebant munera sua, nisi quia dando totum  
quod poterat, sic verè probabat se plura daturam si plura posse-  
disset ; Quod ditiores de se non ita probassent, cum non ita quod  
possent facerent. Sic plane de te iudica, aut si aliter iudicas, tei-  
psum decipis. *Insurgis in te testis iniquus, & mentita est iniquitas sibi.* Ps. 16.  
An verò putas sic te posse Deum decipere ? *Nolite errare, Deus non* Gal. 6.  
*irridetur : quæ enim seminaverit homo, hæc & metet.* Quasi dicat Apo-  
stolus, sicut nihil metitur vbi nihil seminatur : aut sicut non me-  
titur triticum vbi hordeum est seminatum ; ita plane nihil metes  
ex mendacio & falsitate, nisi mendacium & falsitatem. *Ventum se-* Osæ 8.  
*minabunt, & turbinem metent,* ait Propheta. In te vnum redundabit  
quidquid falsum & fictum cum Deo egeris. Tu solus falleris &  
decipieris. *Ipse deludet illusores,* inquit Sapiens, Et rursus : *Si fueris* Prom. 3.  
*illusor, solus portabis malum.* Ibid. 2.

Quamobrem quodcumque potest facere manus tua, instanter operare ;  
quia nec opus, nec ratio, nec sapientia, nec scientia erunt apud inferos, quo-  
tu properas ; Id est, alioquin nihil te excusabit nisi quod potes, fa-  
cias. Et tantum abest vt segnior esse possis & remissior ad agen-  
dum, quòd pauca possis agere ; quàm potius hinc te ardentiorē



36 FERIA 3. Hebd. 1. post Oct. Pent. de Nat. Domini renou. in SS. SS.

& constantiorem esse oportet siue vt sic indices non esse defectum voluntatis sed potentiae, si non plura facis: siue vt illam voluntatem tuam explices & exerceas quae non minus in paucis quam in multis acceptatur: siue ob id denique quod si pauca illa quae potes facere, non facias, nihil ergo supererit quod vnquam agas, nihil pro tot collatis beneficiis, pro tot culpis condonatis, pro tot communicatis gratiis, nihil pro tuo Christo toties, & tot modis pro te impenso!

1er. 2.

Matth. 25.

Pudendum quidem esset tam pauca posse in tam multis reddendis; sed tamen impotentia veniam habet, & pudorem abstergit bonitas Creditoris; at vero nolle illa pauca quae facile possis reddere, tam probrosum est & infame vt si laueris te nitro, & multiplicaueris tibi herbam borith; non possis eluere contractam maculam. *Seruum inutilem projicite.* Quid, si seruus ille sic etiam nocens?

Vide in 2. parte, FERIA 5. Hebdom. Septuagesimae, Vbi hoc exponitur Veritas.

Ingratus est tanti beneficii, qui se tantum ex parte immolat, se totum immolante Christo.



FERIA TERTIA.  
DE NATIVITATE DOMINI  
RENOVATA IN SANCTISSIMO  
SACRAMENTO.

*Paruulus natus est nobis, & Filius datus est nobis.*  
If. 9.

VERITAS PRACTICA.

Reuocata quotidie noua Christi Natiuitas, nostram  
in Christo quotidianam prouocat nouitatem.



*Renocata quotidie noua Christi Natiuitas, nostram in, &c. 37*

*RATIO EST, Quia reuocata quotidie noua Christi Natiuitas nouam nobis offert Christi charitatem & gratiam, qua si velimus, cum illo renascamur & renouemur.*

*Sed illa ipsa charitate & gratia nos excitat & prouocat ad id volendum quod offert.*

*Ergo & reuocata quotidie noua Christi Natiuitate nostram in Christo quotidianam prouocat nouitatem, siue quam vocant Spiritus Renouationem: Quae certe non est negligenda.*

### *I. P V N C T V M.*

**P**OSTQVAM tantisper in stabulo & praesepe nascentem Dominum fueris contemplatus, admirare vehementius Eundem illum quotidie sanctissimo in Sacramento veluti renascentem, & speciebus panis velut pannis inuolutum, atque in altera quadam Bethleem, id est, domo panis residentem suoque modo concinentes Angelos, *Gloria in altissimis Deo, & in terra pax hominibus bonae voluntatis.* *LUC. 2.*

Sed quod magis mirum, Ille ipse Infans semel olim natus in stabulo, & quotidie renascens in altari; simul etiam in pectore & in mente Sacerdotis, ac cuiuslibet Communicantis, sic renascitur quodammodo, & quasi de nouo se se offert nouamque gratiam, vt si velimus, ita cum ipso quotidie renascamur, & Spiritu renouemur. *O verè prodigam largitatem, sicut ait Vrbanus Papa, institutor huius proximae solemnitatis! Quis verò nolle tantae charitati & gratiae respondere? Quamobrem sic est instituta & proposita Veritas Practica vt probe intelligamus, quod reuocata quotidie in Sacramento noua Christi Natiuitas nostram in Christo quotidianam prouocat nouitatem, vt id re ipsa fiat quod tantopere commendabat Apostolus: Renouamini Spiritu mentis vestrae, & induite nouum hominem qui secundum Deum creatus est in iustitia & sanctitate veritatis.* *Ephes. 4. Coloss. 3.*

Ratio petitur ab illa ipsa Charitate & Gratia quae se se offerunt ad hunc finem, quibus certe par est respondere. Ac primo illud praesupponendum, vt primum totius Veritatis fundamentum, quod ea planè sit intentio Christi Domini renascentis in no-



bis, vt simul cum ipso renascamur & renouemur. Cum enim tanta sit humanæ fragilitatis miseria vt non minus animo quàm corpore quotidie senescamus, atque illud animi senium & vetustas non parùm salutis & perfectioni nostræ praiudicent; profecto de Diuina bonitate dubitari non potest quin prouiderit tale remedium in statu gratiæ quod vetustati renouandæ non minus aptum esset, quàm illa erat vitæ arbor in statu naturæ de qua dicitur quod idonea esset corporibus reparandis, ac in nouam reuocandis iuuentutem. Et cum illa vitæ arbor aperta esset figura sanctissimi Sacramenti, quis non videat figuram in eo adimpletam vt sic modo spirituales animæ restaurentur vires, sicut olim instaurata essent corpora: nec minus appareat Deo esse curæ spiritualem hanc nostram vitam, quàm corporalem, nec minus esse Christo potentiæ ad resarcienda peccati damna, quàm Adamo ad illa nobis inferenda. Sic enim apte Apostolus: *Si vnus delicto mors regnauit per vnum: multo magis abundantiam gratiæ & donationis, & iustitiæ accipientes in vita regnabunt per vnum Iesum Christum.* Expende illud, *in vita regnabunt*, neque enim tantum de vita æterna intelligendum est, sed de vita spiritali, in qua regnare est non veterascere.

Hanc autem gratiam de sanctissimo profluere Sacramento manifeste testatur Ecclesia dum in vna natalis Domini Missa sic orat: *Huius nos Domine Sacramenti semper nouitas natalis instauret, cuius Natiuitas singularis humanam repulit vetustatem.*

Iam vero quæ Christi Bonitas in tali gratia? Quæ Charitas in tanta bonitatis profusione, vt non semel in vita, non aliquoties, non per singulos vitæ annos, sed per vnâquamque constanter diem, sed incessanter quotidie sese offerat communicanti, quotidie Communicanti nouum afferat animum, nouam inferat gratiam, nouam inspiret vitam; Quasi diceret, Iam inchoemus nouiter nos diligere, & noua dilectionis testimonia nobis inuicem exhibere; *Prima abierunt, & ecce noua facio omnia*; En me præsentem & paratum ad id quod infirmum est, consolidandum; & quod egrotum sanandum; quod confractum alligandum: quod abiectum reducendum: quod perit requirendum, & quod pingue & forte, custodiendum. DIC mihi qua re indiges? Quid à me petis? quid tibi & aliis postulas? *Dilata os tuum & implebo illud*: Expande sinum pectoris & cõplebo illum nouis donis. Ego veni vt vitam habeas, & abundantius habeas.

Gen. 3.

Rom. 5.

Postcom-  
municatio se-  
cunda Mis-  
sa.

Apor. 21.

Ezech. 34.

ps. 39.

Ierem. 10.



Paruane videtur hæc tibi Charitas? parumne tanta bonitas  
& te merebitur?

II. P V N C T V M.

**S**ED si quid meretur, hoc maxime, ut id velis quod intendit, ut  
te sinas excitari & permoueri ad illam quam offert gratiam, ad  
illam quam offert nouitatem.

Sicut enim suos habent Gratiaæ particulares effectus & non  
alios, ita dicuntur à nobis recipi vel recusari prout tales earum  
effectus recipimus vel recusamus. *Contemplantes*, inquit Aposto- Hebr. 12.  
lus, *ne quis desit gratia Dei*. Quid est *contemplantes*, nisi attente spe-  
culantes quid velit illa gratia, quem in finem detur, quid à nobis  
requirat. Vnde & addit; *ne qua radix amaritudinis sursum germi-*  
*nans impediatur*; quasi diceret, cauendum ne qua cordis & animi  
motione præueniamur, quò minus attente contemplemur quò  
tendat affectus gratiaæ; vel potius quo minus parati simus ad nos  
tali affectui conformandos, ut si paci habenda cum omnibus, de-  
tur aliqua gratia, nos amari corde gratiam aliò detorqueamus.  
Quamobrem cum renascentis in Sacramento Christi Gratia de-  
tur in hunc præcipuè finem ut simul cum eo renascamur & reno-  
uemur, quid sequitur nisi quantum putamus optime de nobis me-  
ritum esse Christum, quantumque meritis eius respondere volu-  
mus, tanto id velimus affectu quod ipse à nobis exigit? *Ignem ve-* Luc. 12.  
*ni mittere in terram & quid volo nisi ut accendatur?* Hoc est vel  
loquendo vniuersim de gratiis, sicut qui mittit ignem in lignum  
nihil aliud expetit quàm ut ignis accendatur, sic Christus confe-  
rens gratias nihil magis optat quam ut finem suum habeant: vel  
si particulatim intelligas de gratia renouationis quæ velut ignis  
absumit omnem vetustatis rubiginem, *Quid volo*, inquit, aliud  
de tali collata gratia nisi quod vestrum est, mecum agere ad pro-  
ducendum illius effectum, id omnino agatis? *Expoliantes vos sci-*  
*licet veterem hominem cum actibus suis, & induentes nouum eum qui* Coloss. 3.  
*renouatur in agnitionem secundum imaginem eius qui creauit illum.*

Expende omnia atque imprimis postrema verba, *Secundum*  
*Imaginem eius qui creauit illum nouum hominem qui est induendus*; id  
est sicut ipse se renouat, sicut ipse renascitur in animis nostris, ita  
nos in ipso renouemur & renascamur, plenè, integrè, quotidie,



Apoc. 3. paribus semper animis. Cœnabo cum illo & ipse mecum; reciproca sit & mutua communicatio, necesse est.

### III. P V N C T V M.

SIC ergo renocata quotidie nona Christi natiuitas, nostram in Christo quotidianam prouocat nouitatem, Quia tam præstans gratia quæ se ad id offert, tam profusa bonitas quæ nos indignos sic præuenit, & tam constans Charitas quæ non cessat quotidie nobis bene uelle si uelimus, nos ita excitant & premunt ad uolendum, ut nimis durus sit animus qui tanto Charitatis incendio non emollescat, nimisque uerecundum & probrosum sit, si nobis obijceretur quod est in Propheta, Multo labore sudatum est, & non exiuit de ea nimia rubigo eius neque per ignem: Immunditia tua execrabilis, quia mundare te uolui, & non est mundata à sordibus tuis.

De hac animi renouatione plura in prima parte, & in fine huius; sed interim hic agnosce quàm parce utaris hoc beneficio quod Christus quotidianum esse uoluit.

Exod. 36. Dum fabricando sanctuario instarent artifices, Quotidiè, ait Scriptura, Mane uota populus offerebat. Sic plane cum Christo nobis esset agendum, sic quotidie renouatis uotis, uerus homo magis esset constringendus; sed heu magis è contra nouus homo astringitur cum uel abusu gratiarum uel non usu, quasi restringuntur eius manus ne possit benefacere. Si affiget homo Deum, quia uos crucifigitis me!

In hac certè quotidiana renouatione tantum ponebat Apostolus, ut licet aduersis undique premieretur: Propter quod, tamen diceret, non deficimus: sed licet is qui foris est noster homo corruptatur, tamen is qui intus est, RENOVATUR DE DIE IN DIEM.

Eccles. 1. Hoc plane est quod adumbrabat Sapiens cum dicere, Oritur sol, & occidit, & ad locum suum reuertitur, ibique renascens gyrat per meridiem, & flectitur ad Aquilonem lustrans uniuersa, in circuitu pergit spiritus, & in circulos suos reuertitur. Sic enim homo fidelis quotidie renascitur & perlustrat quæcumque sibi quoque die præstanda sunt, ut renouatis animis cuncta uelut in primo feruore peragat. Denique sic Scriptura quotidie quasi primo die proponeret quæ uitanda sunt uel agenda: Hodie Dominus Deus tuus precepit tibi ut facias mandata hæc atque iudicia, & custodias & impleas ex toto



*Renocata quotidie noua Christi Natiuitas, nostram in, &c. 41*  
toto corde tuo, & ex tota anima tua. Dominum elegisti ut sit tibi Deus,  
& ambules in viis eius: & Dominus elegit te hodie ut sis ei populus pe-  
culiaris.

Nonne id toto amplecteris pectore? An te pœnitet illius esse?  
An te illitotum tradere, nisi iam tradidisses? An quid cogitas  
retractandum? De his suspectus est qui se cum Christo quotidie  
renascente non renouat.



FERIA QVARTA.  
DE ABSCONDITA CHRISTI  
DOMINI VITA, EXHIBITA IN  
SANCTISSIMO SACRAMENTO.

*Vere tu es Deus absconditus, Deus Israël, Saluator.*

II. 45.

VERITAS PRACTICA.

Nemo manifestius cum Christo viuit, quàm qui oc-  
cultius.

RATIO EST, Quia nemo manifestius viuit cum Christo quàm  
qui manifestius viuit vitam supernaturalem & spiritualem.  
Sed nemo manifestius viuit vitam supernaturalem quam qui  
cum Christo viuit occultius.

Ergo nec manifestius cum Christo quis viuit, quàm qui occultius,  
quo sensu declarabitur.

I. P V N C T V M.

**V**ERE tu es Deus absconditus! Primo quidem in ipsa Diui-  
nitate, in ipsa Diuinitatis natura, in stupendis Diuinæ  
naturæ attributis: in Præsentiā inuisibili, in Sapientia in-  
uestigabili, in Bonitate inenarrabili & cunctis aliis incomprehen-

3. Pars.

F



Ps. 17. fibilibus. Caligo sub pedibus eius & ascendit super Cherubim, & volauit, volauit super pennas ventorum, & posuit tenebras latibulum suum.  
 1. Tim. 6. QVI lucem inhabitat inaccessibilem, quem nullus hominum vidit, sed nec videre potest. Quàm incomprehensibilia sunt iudicia eius, & inuestigabiles via eius!

Coloss. 1. & 2. Secundo in Incarnatione quod est *Mysterium absconditum* à sæculis & generationibus, in quo non modo latebat Diuinitas, sed & thesauri omnes Sapientiae & Scientiae in Christo erant absconditi. LO-  
 1. Cor. 2. QVIMVR Dei Sapientiam quæ in Mysterio abscondita est, inquit Apostolus, quam nemo principum huius sæculi cognouit, si enim cognouissent numquam Dominum gloria crucifixissent. IBI abscondita est fortitudo eius, ait Propheta. Posset etiam cogitari vita eius occulta & abscondita qua vel totos triginta annos latuit, vel toto vitæ tempore non alius quam fabri filius est habitus. Nonne hic  
 Matth. 13. est fabri filius? NONNE hic est faber Filius Mariæ?  
 Marci. 6.

Tertio in sanctissimo Sacramento ubi non modo Diuinitas sed & Humanitas prorsus abscondita: ubi quidquid est, totum mirabile, totum stupendum est; ubi consecratio, ubi operationes, ubi effectus, ubi omnia longe remota à sensibus, mysterium fidei totum, nec ipsa humana ratione curiosius inuestigandum. Verbis Christi defraudari non possumus, sensus vero noster deceptu facillimus est, inquit sanctus Chrysostomus.

Quarto denique in animis nostris verè Christus Dominus est, sed vere Deus absconditus, Det vobis, inquit Apostolus, secundum diuitias gloriæ suæ, virtute corroborari per Spiritum eius, in interiorem hominem, Christum habitare per fidem in cordibus vestris. Et rursum: An non cognoscitis vosmetipsos quia Christus Iesus in vobis est? Sic & nos in ipso sumus, in ipso manemus, in ipso viuimus; Manete in me, & ego in vobis. QVI manducat meam carnem & bibit meum sanguinem, in me manet, & ego in illo: sicut misit me viuens Pater & ego viuo propter Patrem: & qui manducat me & ipse viuet propter me. Sed vita illa nostra, vita est abscondita, vita occulta hominibus: Mortui enim estis, ait Apostolus, & vita vestra est abscondita cum Christo in Deo.

Atque hinc Veritas Practica quæ modò expendatur, Vt nemo manifestius cum Christo viuat, quàm qui occultius; hanc enim certam & manifestam notam agendæ cum Christo vitæ declarat Apostolus, s. vita sit abscondita; Sed & aperta est ratio: Quid enim cla-



*Nemo manifestius cum Christo uiuit, quàm qui occultius.* 43

rius quàm quod nemo manifestius cum Christo uiuat quam qui manifestius vitam uiuit spirituales & supernaturales, cœlestem & diuinam? *Qui delicias aspernari pro deliciis habent, inquit sanctus* *Oratione de*  
*Gregorius Nazianzenus, qui in mundo nihil habent, & mundo supe-* *pace.*  
*riores sunt; qui cùm in carne sint, extra tamen carnem uiuunt.* Vel, ut  
ait alter sanctus Gregorius Papa; *Qui voluptatibus carnis renun-*  
*tians cuncta sua terrena desideria per discipline cœlestis custodiam cal-* *Hom. II. in*  
*cat, ut nihil iam quod caro blanditur libeat; nihil quod carnalem vitam* *Euang.*  
*trucidat, spiritus perhorrescat.* Hæc est scilicet uita spiritalis, uita  
supernaturalis, uita Christiana, uita in Christo acta. Sed an sit  
uita tua, tu ipse uideris.

## II. P V N C T V M.

**A**T QVI manifestius nemo uitam illam uiuit supernaturalem quàm  
qui cum Christo uiuit occultius.

Tribus modis intelligi potest occulta cum Christo uita. Primò  
si remota sit à secularibus negotiis & curis, qualis est Regularium,  
uel eorum uita qui domi suæ priuatam & arctiorem uiuendi nor-  
mam seruant. Secundò si uita quidem sit publica & ciuilis quan-  
tùm ad uacationem & ministeria; sed multa in occulto bonâ fa-  
ciant, siue quæ Deum respiciunt in frequentandis Sacramentis &  
aliis pijs obeundis exercitationibus; siue quæ proximum in largis  
elemosynis, siue quæ ipsos spectant in variis uirtutum actibus  
frequentandis.

Tertiò denique siue illi religiosi sint siue seculares; siue priua-  
ti seu publici: siue soli sibi vacantes, siue proximorum salutis  
sic tamen uiuunt ut animam & omnia sua interna conforment  
quantum cum gratia possunt, Euangelicis præceptis, & consiliis,  
qui beatos credunt pauperes spiritu, & miseros diuites: qui bea-  
tiores eos putant qui lugent quam qui rident; & qui beatissimos se  
dicunt potius si maledicantur pro iustitia, quam si ab hominibus  
honorentur & benedicantur. Hi sunt præcipue quos dicimus oc-  
culte cum Christo uiuere: & hi sunt præ & ceteris qui manifestius  
uitam uiuunt supernaturalem; Quia quod in illis est occultius,  
hoc ipsum est magis supernaturale, hoc est magis supra huma-  
nam naturam, & communem uiuendi morem: nempe in diui-  
tiis paupertatem colere: in honoribus humilitatem; in deliciis



44 *Fetia* 4. *Hebd.* 1. *post Oct. Pent. de abs. Christi D. vita in SS. SS.*

asperitatem; in abundantia penuriam; in varia negotiorum di-  
uerſitate, eandem ſeruare animi aequalitatem, & puram Deo  
placendi intentionem; Quid occultius? quid rarius? & quid ſi-  
mul ſublimius & excellentius? *Rara hac anis ſuper terram*, ait ſan-  
ctus Bernardus. Hæc eſt aquila, inquit ſanctus Gregorius de qua  
*Iob. 39.* *Iob, Numquid ad præceptum tuum eleuabitur aquila, & in arduis po-*  
*31. Mor. 19.* *net nidum ſuum? Hac mulier amicta ſole & luna ſub pedibus eius, cui*  
*date ſunt ale due aquile magnæ ut volaret in deſertum, & in deſerto de-*  
*Apoc. 12.* *licius affluens, inde ascenderet innixa ſuper dilectum ſuum, ut eſt in*  
*Cant. 8.* *Canticis, & in Apocalypſi; ad illud ipſum exprimendum quod*  
dicimus de occulta vita, quæ eſt maniſeſtiùs vita ſpiritualeſis & ſu-  
pernaturalis. O vere theſaurus in agro abſconditus, pro quo  
emendo vendi debent vniuerſa.

### III. PUNCTVM.

**N**E M O igitur maniſeſtiùs cum Chriſto viuit quam qui occultius:  
Nam ſicut nemo maniſeſtiùs vitam viuit ſpiritualem & ſu-  
pernaturalem quam qui viuit occultius: ſic nemo maniſeſtiùs  
cum Chriſto viuit quam qui viuit illam vitam ſpiritualem quæ  
*Rom. 8.* tota Chriſti eſt, ſicut vita Chriſti tota lex & vita ſpiritus: *Lex*  
*ſpiritus vita in Chriſto Ieſu.*

Quamobrem colenda illa vita occulta & abſcondita, repri-  
mendi naturæ motus qui apparere geſtiunt, expectandum quod  
*Coloſſ. 3.* monet Apoſtolus: *Donec Chriſtus apparuerit vita veſtra, tunc, in-*  
quit, *& vos apparebitis cum ipſo in gloria;* vnde & concludit: *morti-*  
*ficate ergo membra veſtra quæ ſunt ſuper terram,* ideſt, quamdiu in ter-  
ra eſtis, quamdiu in hac mortali vita viuitis, quæ eſt velut hy-  
bernũ tempus quo arbores videntur mortuæ, & cum verno ſole  
reflorefcunt, ſic vos exiſtimate mortuos quantum ad naturæ cor-  
ruptæ motus inordinatos.

Sic præclare ſanctus Auguſtinus in illum Pſalmi verſiculum;  
*Pſ. 148.* *& exaltabit cornu populi ſui: MODO fructus per hybernũ in radice*  
*non apparent: attendis quaſi aridas arbores per hyemem; qui non nouit*  
*vinere, aridam putat vitẽ, & forte iuxta eſt quæ vere aruit: ſimiles*  
*ſunt ambæ per hyemem, illa viuit, illa mortua eſt, ſed illius vita, &*  
*illius mors in abſcondito eſt. Aeſtas præcedit, vita illius clarificatur*  
*mors illius maniſeſtatur, præcedit honor foliorum, ſæcunditas fructuum,*



Nemo manifestius cum Christo vivere, quam qui occultius. 45

vestitur vitis in facie ex eo quod habebat in radice. Ergo modo, fratres, tales sumus quales sunt & alij homines. Quomodo nascuntur, manducant, bibunt, viuunt, & vestiuntur, transigunt vitam istam, sic & sancti. Aliquando res ipsæ decipiunt homines & dicunt, Ecce postquam cepit esse Christianus, numquid non ei dolet caput, aut quia Christianus est quid habet plus à me? O vitis arida, attendis iuxta te vitem nudam in hyberno sed non aridam per æstatis vim. Et veniet Dominus honor noster qui latebat in radice, & tunc exaltabit cornu populi sui.

Itemque in hunc Psalmi trigesimi versum, Abscondes eos in abscondito multus tui. ESTO, inquit, domus eius, & erit domus tua; habitet in te, & tu habitabis in eo, si cum exceperis in hoc sæculo, in corde tuo: ille post hoc sæculum, excipiet te vultu suo.

Vide in 1. parte, die 14. Ianuarij:

Nemo securè apparet, nisi qui libenter latet.







FERIA QVINTA.  
**SOLEMNITAS**  
 SANCTISS. SACRAMENTI.  
 DE CONVERSATIONE DOMINI  
 MANIFESTATA IN SANCTISSIMO  
 SACRAMENTO.

*Hic est Deus noster, & non aestimabitur alius aduersus eum. Hic adinuenit omnem viam disciplina: post hac, in terris visus est, & cum hominibus conuersatus est. Baruch. 3.*

*Delicia mea esse cum Filiis hominum. Prou. 8.*

VERITAS PRACTICA.

Quibus amarum est conuersari cum Christo, delicias eius conuertunt in amaritudinem.

*RATIO EST, Quòd cum deliciae Christi sint conuersari cum hominibus, delicias illas conuertunt in amaritudinem, qui amarum Christo reddunt suam conuersationem.*

*Sed quibus amarum est cum Christo conuersari, amarum Christo reddunt suam conuersationem.*



Quibus amarum est conuersari cum Christo, delicias, &c. 47

Ergo illi delicias Christi conuertunt in amaritudinem; Quod sane est & multis commune & multum execrabile.

I. P V N C T V M.



DE Christo Domino conuersante inter homines dum viueret tria possent fructuose cogitari. Primum quam facilis semper esset & accommodatus ad omnes excipiendos; Idcirco flos campi dicitur non hortorum: & lilium conuallium non montium Cant. 2. quia liberius itur ab omnibus in campos quam in hortos qui clausi sunt, & in conualles facilius descenditur quàm in montes ascendatur. Secundum, quàm suauis esset & iucunda conuersatio de qua scilicet dictum erat: *Non habet amaritudinem conuersatio illius, nec tedium conuictus illius, sed letitiam & gaudium.* Sap. 3. Tertium denique quam esset benefica, fructuosa, & utilis, vt qui bene omnibus vellet & faceret, quantum in se erat, & omnes ad se idcirco inuitaret: *Venite ad me omnes qui laboratis & onerati estis, & ego reficiam vos.* Matth. 11. Idque vnum dolebat maxime si venire nollent: *Et non vultis venire ad me vt vitam habeatis!* Ioan. 5.

Hæc autem tria quàm facile appareant in sanctissimo Sacramento quis non videt? quid facilius ad aditum? quid familiarius ad congressum? quid suauius ad vsum? quid ad fructum vtilius? Certe dum Christus viueret sic in vno se continebat loco vt non esset in alio; at modo quàm in multis & diuersis! Sic vni sæpe se homini applicabat, vt non sic aliis intenderet: at modo simul omnibus qui se volent. Sic inuitabat ad se omnes, vt tamen Discipulos & Apostolos haberet coniunctiores: Iam vero singuli facti sunt eius contubernales, conuiuæ & commensales. *Iuxta te est in ore tuo, & in corde tuo.* Deut. 30. Intra nos habitat in nobis manet & viuit. *Vos enim estis templum Dei viui, sicut dicit Deus: & ipsi erunt mihi populus.* 2. Cor. 6. NE QVÆ enim est aut fuit aliquando tam grandis natio quæ habeat Deos appropinquantes sibi, sicut adest nobis Deus noster. Dent. 4. Hæc est diuina Sapiencia quæ cum semper tum hodie, sicut aiebat Sapiens, *Preoccupat qui se concupiscunt vt illis se prior ostendat.* Sap. 6. Qui de luce vigilauerit ad illam, non laborabit, assidentem enim illam foribus suis inueniet, quoniam dignos se ipsa circuit querens, & in viis



ostendit se hilariter, & in omni providentia occurrit illis. Quid familiarius, & quid aptius ad solemnitatem hodiernam?

Denique sicut nulla vox est qua suam hanc facilitatem Sapientia potuerit expressius significare quàm vox ista: *Delicia* seu quod voce designatur; *delicia mea esse cum Filiis hominum*: Sic nulla res est qua vocem illā verius impleuerit, & certius notificauerit quam hoc diuinissimo Sacramento quo se nobis communicat & nobiscum conuersatur: Quamobrem aduertant ij quibus amarum est sic familiariter & frequenter cum Christo conuersari, aduertant quàm sint Christo iniuri, quam iniqui & offensi; Sic enim *suauiores eius delicias conuertunt in amaritudinem*? Parumne tibi hoc videtur iniuriosum & iniquum?

Quomodo autem per eos amarefcant Christi deliciae, non potest melius declarari quàm si dicatur amarum fieri Christo quod cum hominibus conuersetur. Nam si suas ipse in familiari cum hominibus conuersatione ponit delicias, profecto qui hanc eius conuersationem reddet amaram, amaras eius reddet delicias: sicut amara mors dicitur quod separando corpus ab anima, vitam tollat in qua erant eius deliciae. *Siccine separat amara mors*? inquitbat ille Rex moriturus: sic amaræ fiunt deliciae quando tollitur vel quando inamarefcit conuersatio, in qua deliciae ponebantur. *Vae qui dicitis malum bonum, & bonum malum: ponentes amarum in dulce, & dulce in amarum!*

1. Reg. 15.

Is. 5.

## II. P V N C T V M.

**S**ED quibus amarum est cum Christo conuersari, amaram Christo reddunt suam conuersationem.

Non potest enim non esse amarum Christo, videre animos sic à se alienos vt durum sibi & amarum putent eum ipsò conuersari. *Quid inuenerunt in me iniquitatis? Qui molestia? quid iniustitiae? Popule meus quid feci tibi? aut quid molestus fui tibi? responde mihi.* Durum forte putabunt & molestum quod non possint cum eo conuersari, quin negotiis vel curis suis & cupiditatibus modum ponant. Esto sane, ponatur modus immodicus cupiditatibus, adeone vero hoc durum dici debet vt propterea non sit cum Christo conuersandum? Hoc est scilicet, hoc est quod non potest non illi esse amarum, cum videat animos coelo aduocatos sic

Ier. 2.

Mich. 6.



fic immodicis addictos cupiditatibus vt modum tenere nolint?

*Renuerunt accipere disciplinam. PEREAT Samaria quoniam ad amaritudinem concitauit Deum suum.*

*Ier. 5.  
Osia 14.*

III. PUNCTVM.

**Q**VIBVS ergo amarum est conuersari cum Christo, Delicias eius conuertunt in amaritudinem; Quia conuersationem illam in qua tuas ponit delicias ita reddunt amaram, vt quantæ fuissent deliciae, tanta fiat amaritudo. *Ecce in pace, Ecce in deliciis meis amaritudo mea amarissima. TRISTITIAM super tristitiam de quibus* *1. Cor. 2.* *oportuerat me gaudere; Vel enim fingunt se non audere: vel audent fingere se non posse sic mecum conuersari: & ex utroque duplex est malum, vnde tristitia duplicatur; Cur enim non audent? quia scilicet sanctus ego sum; At vero propterea deberent ad me accedere, vt ex me sanctitatem haurirent. Cur autem dicunt se non posse? Quia videlicet nimis implicati sunt suis cupiditatibus; At nonne idcirco satius esset se illis expedire vt ad me confugiant, quam me refugere ne se illis expediant? In felle amaritudinis & obligatione iniquitatis video te esse.* *Act. 8.* O timendum Christi visum! sed o magis timenda cordis amaritudo, & obligatio iniquitatis!

Expende quid sit obligatio iniquitatis; quam multi sic obligentur, quam sit verendum ne sis ex illis. Nempe illud est quod aiebat sanctus Augustinus, ligatus non ferro alieno, sed sua ferrea voluntate. *Velle meum, inquit, tenebat inimicus, & inde mihi* *1. 3. Conf.* *catenam fecerat, & constrinxerat me. Quippe ex voluntate peruersa, facta est libido: & dum seruitur libidini, facta est consuetudo: & dum consuetudini non resistitur, facta est necessitas: quibus quasi ansulis quibusdam sibi innoxis, vnde catenam appellari, tenebat me obstrictum dura seruitus.*

Sicut itaque constrictus & catena ligatus, ita retinetur, vt se ulterius mouere non possit, quam catena extendatur; sic constringuntur plurimi suis inordinatis affectibus, audentque dicere se non posse aliter facere, se non posse vacare pietati, se obligari mundo, familiae, vacationi quæ non permittit talem cum Christo conuersationem. Hæc est scilicet ordinaria mundi & mundanorum iniquitas quando sua Christo præferunt, & hæc est obli-



gatio iniquitatis, quando sic sua præferunt ut se ad id obligari fingant, nec se inde posse expedire credant.

O quàm sic sæpe te putas excusatum, cum inde magis accusaris! nam quod vocas impedimentum, mera est acedia, mera nau-  
fea: vel si mauis, ipsa est naturalis indoles plus æquo sui amans,  
quæ quicquid sensibus non arridet, velut damnum fugit suum: Et  
cum propterea virtute stimulanda esset, suo nativo potius dese-  
ritur torpori ac desidiæ: quod ne appareat vitium; Vellem, in-  
quis, aliud posse; Deum testor, per me non stat: sed talem se-  
cessum non patiuntur negotia, non permittit corporis valetudo,  
vetat officij ratio: sicque fraudulenter teipsum vel à piis libellis,  
vel à statis meditandi horis, vel ab ipso frequentiori commu-  
nionis usu, vel ab aliis demum Christianæ pietatis exercitatio-  
nibus abstrahis, quibus Diuina Christi Conuersatio colitur. At-  
que hæc est illa interior amaritudo, de qua seuerè Apostolus,  
*Hebr. 12.* *Ne qua, inquit, radix amaritudinis sursum germinans impediatur, &*  
*per illam inquinentur multi.*

*Apoc. 3.* Huic radici securim adhibe. Sonet vox ista in auribus: *Quia te-  
pidus es:* & quæ inde plura sequuntur, non cessent pectus pungere.

Quia verò etiam multi religiosum prætexunt cultum, & au-  
gustiores quamdam reuerentiam, ac dum cauent ne ista fami-  
liaritate de illo aliquid detrahant cultu: malunt minus esse fami-  
liares, ne sint minus religiosi; Contra ex verbis Apostoli:

*Hebr. 4.* *Adeamus ergo cum fiducia ad thronum gratiæ.*

Proponi hæc potest

### VERITAS PRACTICA.

Qui cum fiducia non adeunt ad gratiæ Christi thro-  
num: & se à throni secludunt gratia, & Christum  
excludunt à throno gratiæ.

RATIO postremæ partis quæ sola difficultatem habet, hæc est, quod  
qui negant aut diminuunt facilitatem & beneficentiam Christi  
Domini conuersantis nobiscum in sanctissimo Sacramento, Chri-  
stum excludunt à throno gratiæ.



Qui cum fiducia non adeunt ad Gratia Christi thronum, &c. 31

Sed qui cum fiducia non adeunt ad gratia Christi thronum, illi negant aut diminuunt facilitatem & beneficentiam Christi Domini conuersantis nobiscum in sanctissimo Sacramento.

Ergo hinc euidenter apparet Veritas, & quam sit irreligiosum, religioso quodam prae-textu se à familiaritate Christi velle abstrahere.

## I. P V N C T V M.

**P**RÆMITTI debet tanquam fundamentum Veritatis expendendæ, quod quadruplex dici potest Thronus Christi gratia. Primus est Incarnationis de quo euidenter Apostolus ex Psalte Regio: *Thronus tuus Deus, in seculum seculi, virga equitatis, virga regni tui.* Sicut enim Rex statim factus est ac incarnatus, ita & in throno sedisse dicendus est. Secundus est glorificationis, cum Christus resurrexit vel ad coelos ascendens in Patris sedit dextera, tunc in regnum venisse, & proprium possedisse thronum frequenter memorat S. Ioannes in Apocalypsi. *Qui viderit, dabo illi sedere mecum in throno meo.* Tertius est Iustificationis, cum in anima iusti tanquam Rex in proprio throno sedet, ut ait Author libri de Imitatione Christi, & de quo potest illud Davidis intelligi, *parauit in iudicio thronum suum.* Quartus denique profusionis gratia in sanctissimo Sacramento quem sic paucis expressit Sapiencia; *Thronus meus in columna nubis*, idest, obuelatus, coopertus, obumbratus: sic enim nobiscum conuersatur Christus, sicut olim Deus in columna nubis cum Israëlítico populo. Ps. l. 44.  
Hebr. 1.  
Apoc. 3.  
l. 2. c. 7.  
Ecclesi. 2. 4.

Cur hic porro Thronus dicatur profusionis gratia, perpendetur aptius in ipsa proposita veritatis declaratione, quæ non est tantum intelligenda de frequenti communionis vfu, sed de quibusuis pietatis officiis, quibus deuotio sanctissimi Sacramenti, & familiaris cum Christo conuersatio colitur & exercetur.

Hoc est enim adire cum fiducia ad hunc thronum gratia, crebro templa frequentare, vbi salutaris adoretur hostia: frequentes illuc pectoris iaculari motus, quibus vel laudetur, vel oretur, vel pio quouis alloquio nobiscum foueatur, ac de publicis simul priuatilque rebus familiariter agitetur. Hoc est, inquam, adire confidenter, hoc est admonentem audire Apostolum, *Adeamus ergo*



*cum fiducia*, hoc est Christi nutrire delicias, hoc est gratias eius demereri; Vt è contra, qui hoc non audent, qui adire refugium, quidquid prætexit religiosi cultus, audiant quàm se imprudentes, quauè Christum iniuria non cogitantes afficiant; *Se nempe à Throno secludunt gratia, & Christum excludunt à Throno gratia.*

De primo nulla difficultas, cum se illa euidenter priuent gratia, quam referre possent nisi seipsum ita secluderent. Quid clarius?

At de secundo fortè à quibusdam dubitari posset, & quæri quid est excludere Christum à throno gratiæ? Respondetur & declaratur prima propositio, nihil aliud esse quod quæritur, quàm vel negare de Christo, vel ita dictis aut factis minuere facilitatem sui communicandi, quæ per thronum gratiæ significatur, vt falsò Sacramentum dicatur thronus gratiæ. Nam sicut idcirco dicitur thronus gratiæ quia ibi se Christus magnificum & gloriosum præbet in conferendis facile gratiis; sic planè qui hanc neget magnificentiam, iure merito dici potest vel thronum, vel in throno sedentem exturbare. Non id agit quidem vt Christus illic adesse desinat, sed vt desinat esse thronus gratiæ. Sicut si dictus esset thronus Iustitiæ, quòd ibi singularem exerceret Iustitiam, nonne qui singularem illam negaret Iustitiam, negaret illum Iustitiæ thronum, qui non aliter talis dicitur thronus, quàm quòd talis exercetur Iustitia? Sic plane de throno gratiæ, si tollis rationem cur sic dicatur thronus, iam tollis ipsum thronum aut in throno sedentem; tollis autem rationem, si tollis facilitatem quam exhibet sui adeundi, si tollis propensionem quam præ se fert sui communicandi, si tollis illum quem euulgat familiarem cum hominibus conuersandi vsum, quia vt dictum est, propterea maxime dicitur thronus gratiæ, quia ibi præcipue regnat & triumphat gratia, ibi sedet ipse Author gratiæ, se suaque omnia tam effuse daturus, quàm paratus erit accipere qui se adire velit. Nonne si omnem tolleres à Sacramento gratiam, simul ipsam tolleres vim & efficaciam Sacramenti? Cur porro, nisi quia non est Sacramentum, nisi sit gratia? Sic prorsus si tollis facilitatem gratiæ, tollis & thronum gratiæ, quia non est thronus gratiæ, nisi sit tanta facilitas & vbertas, quanta dici potest & cogitari maxima.

psal. 110.

*Confessio & magnificentia opus eius.* Id est, sic est opus eius magnificentia, vt nisi accedat magnificentiæ confessio, non sit apud illum qui magnificentiam non confitetur, opus eius magnificentia.



II. PUNCTVM.

**S**ED qui cum fiducia non adeunt ad Gratia Christi thronum, non contententur, imò & factis negant aut diminuunt illam facilitatem & magnificentiam Christi Domini conuersantis nobiscum in sanctissimo Sacramento.

Quid est enim quamobrem non adeant, non confidant, non se magis communicent, nisi quia vel non putant reuera tantam inesse Christo sui communicandi bonitatem; aut qualis ea cumque sit, non esse nostrum illà tam familiariter & tam frequenter uti? Quid est quod Patriarcha Iacob non remittit filios in Ægyptum, ut inde frumentum conuehant, nisi quia Virum illic au- *Gen. 43.* diuit durius tractasse suos? Si sciret esse filium Ioseph qui dominatur Ægyptiis, an ita cunctaretur?

Quid est, quod qui lustrarunt terram promissionis, dicuntur *Num. 13.* illi terræ detraxisse, nisi quod negarunt vel tantam inesse soli vbertatem, vel tantam adeundi loci facilitatem quam Moses promittebat?

Cur ipsi Moses & Aaron accusantur, quod aliquando non sanctificauerint Dominum nisi quod illo tum die, quo grauius contra Deum populus murmuraret, minus fortè de Dei bonitate senserint quàm oportebat? *Ibid. 20.*

*Pete tibi signum à Domino Deo tuo, dixit Regi Achaz Propheta. 15. 7.* Non petam, inquit ille, & non tentabo Dominum; Religiosus scilicet Dei cultor! dum se Deum timere simulat, Deum non timuit offendere, quia sic oblatam recusauit bonitatem. Nonne sic errabant Pharisei quod nollent publicanos & peccatores tam libenter ad Christum accedere? Nonne sic ille de suo Domino malè est meritis qui talentum acceptum non duplicauit? Nonne sic Domini bonitatem negauit, quando illam credere noluit nec experiri? Sic illi planè qui cum fiducia non adeunt ad gratia Christi thronum, sic illi gratia detrahunt, sic illam negant bonitatem, dum se illi negant posse uti confidenter, & quā se ipsis facilitate offert. *Luc. 15. Matth. 25.*



## III. P V N C T V M.

Luc. 11.

**E**RGO illi & se à throni secludunt gratia, & Christum excludunt à throno gratie, cum illa throni exclusio sit ipsa gratia vel bonitatis negatio, quam præ se ferunt & apertè profitentur, quando illam non magis adire volunt, quam si nulla esset bonitas vel nulla gratia. *Ipsi non introistis, & eos qui introibant prohibuistis.* Quod quàm sit graue, quàm impium, & quàm horrendum, iam supra in secunda parte visum est, ubi hæc declaratur Veritas:

Fer. 2.

Hebd. 4.

post Octau.

Pasche.

Quàm gloriosum est Sacramento multa in nos posse si velimus, tam ignominiosum est pauca posse quod nolumus.

Certè sicut throni sedes non nisi gloriam & tranquillitatem designat, sic throni exturbatio quid nisi dedecus & dolorem inferat? Quid regi potest esse probrosius, quàm expelli regno, quam throno deturbari? Et ne in magnificis ac gloriosis vocabulis videamur vim facere, facilius pateretur Christus se nec Regem haberi, nec habere thronum, quàm se in illos non agnosci bonum ac facilem, qui sua velint bonitate uti. Nonne in regia sua dignitate contemptum passus est? nonne in sanctitate, in sapientia, in scientia, in potentia, & in quibusvis suis animi dotibus illus fuit? Cur porro nisi ut suam nobis apertiùs indicaret Bonitatem? Nonne tantò magis apparet eius bonitas, quantò minùs apparent alia, quibus propterea denudari voluit, ut magis appareret eius bonitas? quasi diceret, nihil in me spectes præter bonitatem. Tu verò nouus maiestatis cultor & prædicator, solam, inquires, intueri maiestatem: nil de bonitate, nihil de gratiis cogita. Potestne Christo aliquid cogitari magis oppositum?

Quam me autem iubet intueri maiestatem in Sacramento? Quid hinc apparet tam splendidum, quid tam magnificum, tam regium & tam timendum, ut me suo potissimum terrore percellat & occupet quam quod illic suis me allicit blanditiis? Nonne idcirco potius velata sunt illa splendentia, ne illorum fulgore deterreremur? Nonne idcirco sola vulgaria relicta sunt, ut eorum facilitate magis traheremur? Adoro quidem & veneror Maje-



statem, reueor Sanctitatem & Iustitiam, quæ quanta sit in hoc Sacramento, non dissimulatur infra, vbi ab ira Agni, quam sit timendum, ostenditur: Et iam supra etiam fusius in prima parte, vbi pauendum in loco sacro demonstratur, & ad locum sacrum non aliter accedendum quàm ad ipsum Sacramentum. Sed cur propterea Bonitatem excludis, cum potius ipse Dominus maiestatem latere velit, vt ipsa magis pateat Bonitas?

Sanè non debet Majestati præjudicare Bonitas, sed neque potest Majestas Bonitati officere. Nulla inter illas potest esse contentio quas ex æquo Dominus possidet, & quæ simul ita colendæ sunt, vt non minus ametur Majestas quàm Bonitas, nec minus timeatur bonitas quam majestas. Timor autem iste non est fugæ, nisi fuga sit culpæ. Qui diuinam timet bonitatem, fugit quantum quidem potest à culpa, sed quantum à culpa fugit, tantum ad ipsam accedit bonitatem.

Quod si dicas te timere ne familiaritas contemptum pariat, sicut in humanis accidit; audi sequentem propterea præcedenti connexam veritatem.

Diuina licet magis timenda sint quàm humana: in diuinis tamen minùs timenda est familiaritas quàm in humanis.

*RATIO proxima petenda est ab illo quem experimur in humanis contemptu, quem profectò parit familiaris vsus: unde si contemptus ille non sit timendus in diuinis sicut in humanis; nec erit ipsa etiam timenda familiaritas.*

*Sed in diuinis non est ille contemptus tam timendus quàm in humanis.*

*Ergo nec ipsa etiam familiaritas pertimescenda.*

*RATIO verò cur in diuinis non sit ille contemptus tam timendus, magis hic vrgeri debet, sicque demonstratur: Contemptus ille quem parit familiaritas, vel est à personis timendus, vel à rebus, vel ab ipso familiari vsu.*



*Sed nihil horum trium in diuinis accidit quod timeatur, sicut in humanis.*

*Ergo non est ita timendus.*

## I. P V N C T V M.

**R**ES afferuntur causæ præcipuæ quibus in humana & communi vita, familiaritas contemptum pariat.

*Ecclesi. 13.* Prima est ex personis quas inter, familiaris intercedit usus: cum enim sint homines & naturâ suâ versatiles & diuersis obnoxij cupiditatibus, vix aliquot simul menses transegerint, quin vel ipso sui alterius fastidio, vel detectis naturalibus vitiis, se mutuo ferre non possint; & quos natura sociarat, ipsa dis sociat. *Quid communicabit cacabus ad ollam? quando enim se colliserint, olla confringetur.*

*Prov. 18.* Secunda ex rebus ipsis occurrentibus, quæ dum vni placent, displicent alteri: tum verò inquit Sapiens, *Occasionem querit qui vult recedere ab amico*: Id est, vel contemnit quem prius diligebat, vel se ab illo contemptum queritur, unde occasionem recedendi captat.

*Ecclesi. 1.* Tertia denique, familiari hoc ipso usu satis comportum est pretiosa quæque vilescere; nam cum quidquid creatum est, sit finitum, sit caducum, nec satiendo capax animo; vix aliud quidquam inde referas quàm quod Sapiens: *Ecce vniversa vanitas & afflictio spiritus*. O si hoc saltem ex animo sentirent homines, & discerent ea virtute contemnere, quæ vident alioquin contemnenda!

## II. P V N C T V M.

**S**ED nihil horum trium in Diuinis accidit sicut in humanis.

*In Ps. 44.* Non primum, quia ex parte Christi nulla inconstantia, nulla vitiositas, nulla intercedere potest ratio, cur ille vno magis assimetur tempore quàm alio, cum sit vnus idemque sui semper similis, semper sanctus, semper amabilis, semper colendus. Si aliquid fedi inuenerimus in eo, ait S. Augustinus, *non amemus*. Ecce ipse inuenit multa feda, & amauit nos. Si aliquid fedi inuenerimus in eo, *non amemus*: quia & hoc ipsum quod carnem indutus est, ut de illo etiam diceretur. Vidimus eum, & non habebat speciem



ciem neque decorem: si consideres misericordiam qua factus est, & ibi pulcher est. Mihi autem absit gloriari dixit vnus amicorum sponsi, nisi in cruce Domini nostri Iesu Christi. Parum est vt non inde erubescas, nisi etiam & glories. Quare ergo non habuit speciem neque decorem? quia Christus crucifixus, Iudæis quidem scandalum, gentibus stultitia. Quare autem & in cruce habuit decorem? quia quod stultum est Dei, sapientius est quàm homines: & quod infirmum est Dei, fortius est quàm homines. Nobis ergo iam credentibus vbique sponsus pulcher occurrat. Pulcher Deus; verbum apud Deum. Pulcher in utero virginis, vbi non amisit diuinitatem & sumpsit humanitatem. Pulcher natus infans verbum, quia & cum esset infans, cum sugeret, cum manibus portaretur, cæli locuti sunt, Angeli laudes dixerunt, Magos stella direxit, adoratus est in præsepi, cibaria animalium mansuetorum. Pulcher ergo in cælo, pulcher in terra, pulcher in utero, pulcher in manibus parentum, pulcher in miraculis, pulcher in flagellis, pulcher inuitans ad vitam, pulcher non curans mortem, pulcher deponens animam, pulcher recipiens, pulcher in ligno, pulcher in sepulchro, pulcher in cælo, pulcher in intellectu. Audite Canticum, neque oculos vestros à splendore pulchritudinis illius auertat carnis infirmitas. Summa & vera pulchritudo, iustitia est. Ibi illum non videbis pulchrum, vbi deprehendes iniustum. Si vbique iustus, vbique decorus. Ex parte autem nostra deficere quidem possumus, sed hoc habet à Christo quisquis illi adhæret, vt vnus cum eo spiritus fiat, vno eodemque roboretur animo, atque vt ait Sapiens, *In sapientia maneat sicut sol, nec sicut luna mutetur.* Ecclesi. 27.

Secundum abest etiam ab hac diuina cum Christo consuetudine, nam licet multa hîc varia nobis contingant, cum nihil tamen aduersi sine diuino nutu eueniat, & diligentibus Deum omnia Rom. 8. cooperentur in bonum, Quid est, quod ab illo nos possit disungere? Quis nos separabit à charitate Christi? Vide locum Apostoli, & audi 1. I. de Mo. S. Augustinum verba eius minutatim exponentem: *Nemo nos* rib. Ecclesi. 6. 11. *separat à charitate Domini minando mortem: id ipsum enim quod diligimus Deum, mori non potest, cum mors ipsa sit non diligere Deum. Nemo ab ea separat, pollicendo vitam; nemo enim ab ipso fonte separat, pollicendo aquam. Non separat Angelus: non enim est Angelus, cum inheremus Deo, nostra mente potentior. Non separat virtus que potestatem habet in hoc mundo: nam toto mundo omnino sublimior est mens inherens Deo. Non separant instantes molestie: hoc enim leuiore eas*



*sentimus, quo ei unde nos separare moliantur, arctius inhaeremus. Non separat promissio futurorum: nam & quidquid boni futurum est, certius promittit Deus: & nihil est ipso Deo melius, qui iam bene sibi inhaerentibus praesens est. Non separat altitudo, neque profundum, quid enim mihi caelum polliceatur, ut à caeli fabricatore seiungar? aut quid terreat infernus, ut Deum deferam? quem si nunquam deseruisssem, inferna nesciuissem. Postremo quis me locus ab eius charitate diuelleret, qui non ubique totus esset, si ullo contineretur loco?*

Supereft tertium de familiari vfu quo sentimus arefcere quidquid floret amœnius, & obscurari quidquid splendet magnificentius: At non ita in Diuinis, non ita Christus excidit, non ita ille obsolescit, *Iac. I. Apud quem non est transmutatio nec vicissitudinis obumbratio. Non est in illo, EST & NON, inquit Apostolus de Sermone quem de Christo habuit, & de ipso Christo, sic namque pergit: Dei enim Filius Iesus Christus qui in vobis per nos praedicatus est, non fuit EST & NON, sed EST in illo, fuit. Quotquot enim promissiones Dei sunt, in illo, EST. Quasi diceret, totum praesens est quod de Christo asseritur, nam quod fuit & quod erit, nunc est quodammodo; nunc tam suavis congressu, tam mitis verbo & accessu tam facilis, quàm olim fuit. Nihil ex illo confenescit & deperit. Quod aliquando etiam futurum est in aeterna beatitudine, nunc est suo modo. Nempe futurum est, quando in caelo videbitur, ut ita satiet animum, nunquam tamen ut illa satietas fastidiosa sit, sed in quem semper desiderant Angeli, & beatorum animæ magis ac magis prospicere; sic enim de praesenti affirmat, & sic propterea nos ad se inuitat: *Eccles. 24. Transite ad me omnes qui concupiscitis me, & à generationibus meis implemini: Spiritus enim meus super mel dulcis, & hereditas mea super mel & fauim. Memoria mea in generationes saeculorum. Qui edunt me, adhuc esurient: & qui bibunt me, adhuc sitient. Poteratne quid exprimi significantius? aut**

*Homil. 36. certe si quid ultra desideres, praesto est S. Gregorius, ubi de corporalibus agit deliciis & spiritualibus: hæc enim humanæ & diuinæ simul familiaritati tam aptè conueniunt, ut sicut de illa humana dicitur, quod appetitus saturitatem, saturitas fastidium generat; ita de hac diuina sentitur, quod appetitus saturitatem, saturitas appetitum pariat. Augent enim huius diuinæ conuersationis deliciae desiderium in mente, dum satiant: quia quanto magis earum sapor percipitur, eo amplius cognoscitur, quod auidius ametur. Proinde Psalmista nos admonet*

*Psalm. 33.*



*dicens: gustate & videte quoniam suavis est Dominus.* Quem Psalmi versiculum, atque ipsius etiam Psalmistæ factum quo se immutauit coram Rege Achis vt habetur in libris Regum, commemorans S. Augustinus & applicans sanctissimo Sacramento: *Gusta, inquit, & vide quàm suavis est Dominus, si autem non intelligis, Rex es Achis, immutabit faciem suam Dauid, & recedet à te, & dimittet te & abiet.* Quasi diceret sanctus Doctor, nisi tu sentias illum suauem, non inde est quod non sit suavis Dominus, sed quod tibi sit immutatus, quia tu forte constitutum mutas ordinem, vis videre priusquam gustes, vis gustare priusquam te aliis ablactes creaturis.

III. PUNCTVM.

**I**N Diuinam igitur familiaritatem nihil eorum se ingerit, quæ in humana contemptum pariunt; ac proinde non est illa formidanda familiaritas, non est timendum ne sic forte vel Christum contemnamus, vel ab eo contemnamur. Nam si rectè sentimus, tantum abest vt quod iam dictum est, vel tantillum de debito detrahamus cultu, quin potius quanto magis se ipse nobis facilem præbet, tantò maiori bonitatis stupefacti miraculo, magis eum veneremur: Et quò ille ad nos descendit demissius, eò nos illum altius supra nos euehere, summisque prosequi cogitemus honoribus. Tu es ipse Rex noster. *Tu Domine susceptor meus es, gloria mea, & exaltans caput meum.* Et profectò Ille tam acceptam habet nostram animi propensionem, & indignam licet cordium communicationem, ac mutuam reciprocantium inter se voluntatum consensionem, vt Diuo conformiter Augustino sanctus obseruatit Chrysostomus, idcirco præcipue Deum nos castigare, *Cum nos viderit ab eius familiaritate resiliens, sic enim loquitur, & post pauca: Cum igitur videris, dilecte, tentationem nunc quidem extinctam, rursum autem animo accensam, ne animo concidas, neque refugas, sed unam spem teneas, illud intra te ipsum ratiocinans, quòd non perosus nec auersatus nos Deus inimicorum manibus tradit, sed studiosiores & sibi magis familiares facere volens.*

Hoc est scilicet in omni quidem negotio, sed præsertim in isto vel maxime perpendendum, quid velit Deus. Nam sicut nolentem & vetantem si quis propius auderet accedere, iure is merito temeritatis poenas daret; sic volentem, vocantem, inuitantem



ad se, & flagella minantem, nisi accedas, quis nisi rebellis & arrogans ausit refugere? Sic de Mose S. Gregorius, *Et superbus esset*

*i. p. Past. si vocantem praeceperet, & superbus si non sequeretur.*

c. 7.

Cant. I.

Serm. 35.

Quamobrem licet fidelis formidare posset anima, ne tanta Dei bonitate quantam experitur, forte aliquando abutatur; longe tamen magis reformidat, ne si metu abutendi repudiet tantam bonitatem, ipsa repudietur anima, & audiat, *Egredere, & abi post vestigia gregum, & pasce agnos tuos.* Quod praeclare S. Bernardus in illa sponsi ad sponfam verba sic exponit, *Qua enim anima semel à Domino didicit & accepit intrare ad seipsam, & in intimis suis Dei praesentiam suspirare, & querere faciem eius semper, spiritus est enim Deus, & qui querunt eum, oportet eos in spiritu ambulare, & non in carne, ut secundum carnem viuant: talis, inquam, anima nescio an vel ipsam gehennam ad tempus experiri horribilius penaliusue ducat, quam post spiritualis studij huius gustatam semel suauitatem exire denud ad illecebras vel potius ad molestias carnis, sensuumque inexplebilem repetere curiositatem, dicente Ecclesiaste, Oculus non impletur visu, nec auris auditu; audi enim hominem expertum qua loquimur.* Bonus es, inquit, Domine, sperantibus in te, anima quarenti te. Ab hoc bono si quis auertere sanctam illam animam conaretur, puto haud secus accepisset, quam si se de paradiso & ab ipso introitu gloria conspiceret deturbari. Audi adhuc & alium similem huic: *Tibi dixit cor meum, ait, exquisiuit te facies mea: faciem tuam Domine requiram.* Vnde & dicebat: *mihi autem adhaerere Deo bonum est.* Et item loquens ad animam suam, dicit: *Conuertere anima mea in requiem tuam, quia Dominus benefecit tibi.* Dico ergo vobis, nihil est quod intantum formidet, quisquis hoc beneficium semel accepit, quam ne à gratia derelictus necesse habeat denud egredi ad carnis consolationes, imò desolationes, rursumque carnalium sensuum sustinere tumultus. Terribilis proinde & nimis formidolosa comminatio: *Egredere & pasce hædos tuos.* Quod est, indignam te noueris illa tua familiari & suauiter rerum contemplatione caelestium, intelligibilem, diuinarum. Quamobrem egredere de sanctuario meo, corde tuo, ubi secretos sacrosque veritatis ac sapientiae sensus dulciter haurire solebas: & magis tanquam vna de secularibus, pascendis & oblectandis tuae carnis sensibus intricare. Hædos quippe, qui peccatum significant, & in iudicio collocandi sunt à sinistris, dicit vagos & petulantes corporis sensus, per quos peccatum tanquam mors per fenestras intrauit ad animam. Tum paucis interiectis, turpis mutatio studiorum, ut cui ante



In diuinis minus timenda familiaritas quàm in humanis. 61

studij fuerat peregrinantiem & exulem animam suam sacris meditationibus tanquam caelestibus pascere bonis, Dei beneplacitum & mysteria voluntatis eius inquirere, penetrare deuotione Caelos, & mente supernas circuire mansiones, salutare Patres atque Apostolos, & choros Prophetarum, Martyrumque admirari triumphos, ac stupere pulcherrimos ordines Angelorum; nunc omnibus his omisis, turpi se mancipet corporis seruituti ad obediendum carni, ad satisfaciendum ventri & gula, ad mendicandum in vniuersa terra, unde ex ea quæ præterit, mundi huius figura, suam semper famelicam curiositatem aliquatenus consoletur. Exitus aquarum deducant oculi mei super huiusmodi animam, quæ cum nutriretur in croceis, demum amplexatur stercora. Pascit enim iuxta beati viri sententiam, sterilem quæ non habebat filios, & vidua non benefacit.

Quæ postrema verba ex Iobo deprompta, sic accommodantur à S. Gregorio carni & animæ, ut dum dicitur pasci caro sterilis, simul dicatur non bene fieri animæ viduæ, quasi diceretur, dum nutritur caro, negligitur anima. Caro autem dicitur sterilis, dum anima est vidua; quia dum vacua & deserta est anima, nihil boni caro præstat. Denique vidua est anima, quando est Deo vacua, & tunc illi animæ viduæ non benè fit, quando ita deseritur anima, ut cum posses illam Deo replere, non tamen audeas. Iob. 24.

Ut verò quæ de humili cultu iungendo familiaritati cum Christo Domino dicta sunt, corroborentur firmitus: opportunum videtur exemplum Dauidis, coram Arca ludentis, saltantis, & sese cum interne, tum externe plurimum humiliantis.

*Ante Dominum qui elegit me, Ludam & vilior  
fiam plusquàm factus sum, & ero humilis in  
oculis meis. 2. Reg. 6.*

## VERITAS PRACTICA.

*De utroque necessario humilitatis actu.*

Vel neutro vel utroque simul oportet esse humilem.  
Quæ Sacramento debetur humilitas, velut ipsum Sacramentum sit indiuisa necesse est.



**RATIO EST**, Quia quæ Sacramento debetur humilitas, nos illi perfectè totos debet subicere.

Sed nisi esset in nobis indiuisa, non perfectè nos totos Sacramento subiceret.

Ergo sit indiuisa necesse est: Et neutro vel utroque simul humilitatis actu nos esse oportet humiles.

I. P V N C T V M.

**Q**UAM in multis luculenter Arca veteris testamenti, Figuram Augustissimæ præ se ferret Eucharistiæ, posset considerari attentius, & illud Mosis de Populo Christiano longè magis quàm de Iudaico pronuntiari: *En populus sapiens & intelligens, gens magna. Non est alia natio tam grandis, quæ habeat Deos appropinquantes sibi, sicut adest nobis Deus noster.* Verùm quo cultu sit à nobis celebranda hæc Noui Testamenti arca, quæ pietatis significatione prosequenda, his maxime solennioribus Feriis quæ totæ sunt illi cultui destinata, longè magis præstat expendere; seu potius intueri exemplo veteris illius populi qui tanta religione suam illam in arcam ferebatur, quanta describitur in eorum monumentis ad omnem posteritatis memoriam commendanda. Sicut autem inter illos dignitate Dauid eminebat, ita & isto pietatis genere præstitit, tantumque cultus ac religionis illi Sacro ligno quondam exhibuit, ut videatur non fuisse magnus Dauid, nisi ut se tum magis dimitteret, nec maior vnquam visus sit, quàm cum se ita demisit.

Habetur rei gestæ historia fusè descripta libro secundo Regum, capite sexto. Fusius autem à sancto Papa Gregorio, multas quidem ob illustres quæ in ea lucent virtutes, sed vnâ præsertim humilitatem.

Lib. 27.  
Mor. c. ult.  
simo.

*Intueri libet, inquit, quanta virtutum munera Dauid perceperat, atque in his omnibus quàm forti se humilitate seruabat. Quem enim non extolleret ora leonum frangere, urforum brachia dissipare, despectis prioribus fratribus eligi, reprobato rege ad Regni gubernacula ungi, timerendum cunctis vno lapide Goliath sternere, à rege proposita extinctis allophylis numerosa præputia reportare, promissum tandem regnum percipere, cunctumque Israëliticum populum sine ulla contradictione possidere?*



Et tamen cum arcam Dei in Hierusalem reuocat: quasi oblitus prælatus se omnibus, admixtus populis ante arcam saltat. Et quia coram arca saltare, ut creditur, vulgi mos fuerat: Rex se in diuino obsequio per saltum rotat. Ecce quem Dominus cunctis singulariter prætulit: sese sub Domino & exæquando minimis, & abiecta exhibendo contemnit. Non potestas regni ad memoriam reducitur: non subiectorum oculis saltando vilescere metuit, non se honore prælatus ceteris, ante eius arcam qui honorem dederat, recognoscit. Coram Deo egit vilia vel extrema: ut illa & humilitate solidaret, quæ coram hominibus gesserat fortia. Quid de eius factis ab aliis sentiat, ignoro: ego Dauid plus saltantem stupeo quam pugnantem. Pugnano quippe hostes subdidit: saltando autem coram Domino semetipsum vicit. Quem Michol filia Saül adhuc & timore regij generis insana, cum humiliatum despiceret, dicens: Quam gloriosus fuit hodie Rex Israël discooperiens se ante ancillas seruorum suorum, & nudatus est quasi si nudetur vnus de scurris, protinus audiuit: viuit Dominus, quia ludam ante Dominum qui elegit me potius quam patrem tuum. Ac paulò post ait: Et ludam & vilior fiam plusquam factus sum, eroque humilis in oculis meis. Ac si aperte dicat: vilescere coram hominibus affecto, quia seruare me coram Domino ingenuum per humilitatem quero. Sunt verò nonnulli qui de semetipsis humilia sentiunt, quia in honoribus positi nil se esse nisi puluerem fauillamque perpendunt, sed tamen coram hominibus despecti apparere refugiunt, & contra hoc quod de se interius cogitant, quasi rigida exterius venustate palliantur. Et sunt nonnulli qui viles videri ab hominibus appetunt, atque omne quod sunt, deiectos se exhibendo contemnunt, sed tamen apud se introrsus quasi ex ipso merito ostensa vilitatis intumescunt, & tanto magis in corde elati sunt, quanto amplius in specie elationem premunt. Quæ utraque vnius elationis bella, magna Dauid circumspectione deprehendit, mira virtute superauit. Quia enim de semetipso intus humilia sentiens, honorem exterius non querit, insinuat dicens: ludam & vilior fiam. Et quia per hoc quod vilem se exterius præbuit, nequaquam interius intumescit, adiungit: Eroque humilis in oculis meis. Ac si dicat, qualem me exterius despiciens exhibeo, talem me & interius attendo.

In quibus sancti Doctoris verbis, vtrum magis mireris, vide, an Dauidem sic humiliter de se sentientem, an Gregorium sic humiles Dauidis sensus exponentem. Ex utroque certe liquet, quam opportunè modo hæc Veritas perpendenda proponatur, Quod quæ debetur Sacramento humilitas, velut ipsum Sacramentum



*sit indiuisa*, hoc est, sit ita simul à nobis iungenda, vt nisi simul internum ac externum humilitatis iungamus actum, nulla sit prorsus humilitas, nullus Sacramenti cultus, nulla pietas, nulla deuotio.

Ratio quæ affertur non tantum est efficax ad Veritatis euidenti-  
tiam, sed ad pietatis sensum acuendum: Vt enim declaretur  
quanam Sacramento debeat humilitas, debet ea proferri hu-  
militas, quæ nos perfectè totos Sacramento subiciat; nec enim  
minor illi debetur: nam cum sit humilitati hoc proprium & na-  
tium, vt quantum cuique debetur, tantum illi quod quisque  
debet, totum subiciat: certè non minus à nobis Sacramento  
debetur, quàm quod toti sumus, ac proinde non minor esse po-  
test circa illud humilitas, quàm quæ nos illi totos plene & per-  
fectè subiciat, dicaturque nobis singulatim, *Humilia valde spiri-  
tum tuum.*

Iam verò vt apertiùs id agnoscamus, nonne inspectadi sunt titu-  
li, quibus iure suo sanctissimum Sacramentum nos sibi totos de-  
uincit? nonne autem in his inspectandis titulis pietas inflammari  
potest? Age ergo, quid est quamobrem toti sumus præsertim hu-  
ius Sacramenti? Proferri possent tot tituli quot in se Christus  
continet, quibus nos sibi totos habet deuinctos. Nam cum sit ipse  
Christus præsens Sacramento, præsentia, quam vocant, reali &  
personali; quid minus habet Sacramentum quàm quod Ipse  
Christus? Sed ne longius abeat oratio, septem duntaxat attinge-  
mus illos qui Christo simul & Sacramento magis conueniunt.

Primus est *Sacerdotis & sacrificij*. Quis dubitet Christum esse  
primarium sacerdotem, qui se ipsum toties immolat, quoties  
hæc ab aliis sacerdotibus sacra immolatur hostia? Nonne pro-  
pterea dictus *sacerdos in æternum secundum ordinem Melchisedech, &  
semper habere sacerdotium?* Potestne verò considerari Christus  
sic se totum in Sacramento immolans, & non inde inferri nos  
eius esse totos hoc titulo tam frequenter renouato, quàm se ipse  
frequenter immolat? Nonne sic *hostiam nos vt illi exhibeamus,*  
saepe admonemur?

Secundus est *Redemptoris*, sic enim passionis & mortis suæ me-  
ritum nobis applicat, vnde illi ab Ecclesia canitur, *Vt redemptionis  
tue fructum in nobis iugiter sentiamus.* Quid verò est esse redem-  
ptos, nisi totos eius esse, à quo redempti sumus? Nonne sic ar-  
gumentatur



gumentatur Apostolus? *Non estis vestri, empti enim estis pretio* 2. Cor. 6. *magno.*

Tertius est *Regis*. Sic enim regnat in tota vniuersim Ecclesia, quæ dicitur eius regnum, & particulatim in anima, quæ se illius subdit legibus. At quid est esse subditum illius legibus, nisi totum illius esse, cum prima regni lex ea sit, *regnum meum non est de hoc mundo*, Idest, vbiicumque regnauero, nihil caducum, nihil creatum, nihil mortale sese mihi opponat. Ioan. 18.

Quartus est *Pastoris*. Carne sua videlicet nos ipse pascit, quid clarius? at quid strictius ad nos illi totos astringendos? quid magis nostrum quàm cibus quo sustentamur, & quid minus nostrum, quam nos cibo illo sustentati, si nos in se cibus ille conuertat? *Qui manducat me*, inquit, *& ipse uiuet propter me.* Ioan. 6.

Quintus est *Sponsi*. Nam qui habet sponsam, sponsus est, & qui sponsus est, habet sponsam. Hic autem in Sacramento cum inter Christum & animam intercedat vnio quæ in terris potest esse strictissima, non potest alio quàm sponsæ nomine significantius exprimi: nec potest ambigi quin inde anima tota sit Sacramenti seu Christi, cum sponsa tota sit sponsi, relictis alijs omnibus. Ioan. 3.

Sextus est *Magistri*. Quo de titulo vide sequentem Feriam, & quali nos inde vinculo sibi totos constringat, expende quod ipse dixit, *Omnis ex vobis qui non renuntiat omnibus quæ possidet, non potest meus esse discipulus.* Luc. 14.

Septimus denique *Medici* qui sanat omnes infirmitates nostras, si velimus eas sanari: velle id autem quid est aliud, quàm nos ei totos subicere? Vnde ipse ab vnoquoque nostrum quarit, *Vis sanari?* vis te mihi sanandum permittere? ô quis nolit? & tamen cum vix vllus sanetur, mirare potius, ô quis velit? Videsne saltem quo iure quibusue titulis Sacramentum hoc exigat, vt illius toti simus, ac proinde humilitas quæ nos illi subicit, nos totos ei subiciat necesse est, aut ea non sit humilitas quæ tali debetur Sacramento. *Hic apparebunt humiles mei.* Iudith 16.

## II. P V N C T V M.

**S**ED nisi esset in nobis sic indiuisa humilitas, vt simul interna & externa esset, non perfecte nos totos subiceret Sacramento.

Cum enim constemus anima & corpore, nonne si horum defi-



cimus alterutro, non toti sumus? Nonne autem illorum deficiamus alterutro, si vel interna vel externa desit humilitas? Nonne ad corpus æquè spectat externa humilitas, atque ad animam interna penetrat? Nonne idcirco in Sacramentis & in vniuerso Dei cultu adhibentur ceremoniæ, ritus & formæ quædam, quibus suo modo exercetur corpus & impenditur in diuinum obsequium, sicut suis internis actibus anima? Nonne hoc est quod aiebat Dauid, *Cor meum & caro mea exultauere in Deum viuum*. Videri potest

Psal. 83.

1. 2. 9. 101.

2. 2.

S. Thomas loco annotato.

Ps. 43.

Licet verò etiam diceretur humilitate corporis animam, & humilitate animæ corpus humiliari iuxta illud Dauidicum, *Humiliata est in puluere anima nostra*, cum tamen aliter atque aliter internis & externis humilitatis actibus anima siue corpus sese subjiciant, quis non videat, quod si deessent alterutri eorum actus, simul deesset etiam ex illis partibus humilitas & subiectio; sicut si fide diuina non crederentur omnes articuli, nonne tot illis ex partibus fides deesset, nec intellectum Deo subiceret, quot deesset credendis articulis?

2. 10. Ep. 84.

Sic planè sentiunt de vera humilitate sancti patres. Sic expressè S. Ambrosius, *Vera humilitas est que inter quoslibet meritorum gradus, nunquam sui potest esse dissimilis. Nam & in officiorum vicissitudine, & in mansuetudinis lenitate, & in voluntaria paupertatis electione, inuenitur multa distantia, & alter altero in proposito sui deuotione aut maior aut minor est. IN VERA AUTEM HUMILITATE NIHIL DIVISVM, nihilque non solidum est, & ideo omnes participes suos vnum facit, quia inaequalitatem ipsa non recipit.*

Non est sensus, æqualem esse in omnibus humilitatis virtutem, aut æquales omnes in hac esse virtute; cum longè dispar eius possit esse ratio, sicut fidei, charitatis, & aliarum virtutum: sed quasi diceret S. Doctor, nihil est ita diuisum, ita mancum & deficiens in vera humilitate, vt non plenè subjiciat omnem hominem ex quauis ipsius parte quam exigit eius status vt se subjiciat; nam si alioquin aliqua pars deesset, non esset vera humilitas, manca esset & mutila, sicut mutilum esset corpus, cui totæ non adessent sanæ partes & integræ. O insignem humilitatis gloriam, quæ sic tota simul in se constat, vt vel nulla vel tota sit.



III. P V N C T V M.

**S**ICUT ergo David ex utroque humilitatis actu dicebat: Ante Dominum vilior fiam plusquam factus sum, & ero humilis in oculis meis: sic nos oportet esse humiles, tum internè simul & externè, coram Christo Domino: sic indiuisa debet esse humilitas quæ sanctissimo debetur Sacramento, velut ipsum quodammodo Sacramentum, idest, tota simul in vnaquaque sui parte. Sicut nempe corpus & sanguis Christi separatim consecrantur in altari, aut sicut corpus ipsum in partes diffecatur, cum tamen Christus totus remaneat sub vtraque specie & sub minima quauis parte; sic humilis animus, licet hunc aliquando internum separatim, aut hunc externum humilitatis actum exerceat, debet tamen vtrumque simul indiuisim exercere. Debet externum actum ex interno producere; & internum quem edit, debet externo profiteri, aut paratus esse ad quamcumque profitendi rationabilem occasionem. Sicut enim corpus ordinatur in Deum per animam, inquit S. Thomas, ita cultus exterior ordinatur ad interiorem, & interior ab exterioro perficitur, <sup>1. 2. q. 101. 4. 2.</sup> vnde nonnullis indiget sensibilibus signis quibus adiuuetur & compleatur, sicque homo perfectè Deo subjiciatur, idest, se toto, idest, animo & corpore, non vno separatim sed vtroque simul. Humiliemus illi animas nostras, seruientes illi: quocumque scilicet <sup>Iudith 3.</sup> externo cultu: sic sanctissima Iudith non vnum ab alio separans, sed vtrumque simul ita connectens, vt sicut ex corpore & anima fit vnum compositum, qui homo dicitur, & sicut ex Christi corpore & speciebus panis fit vnum Sacramentum quod per excellentiam Sacramentum nominatur, ita ex internis simul & externis humilitatis actibus fit illa virtus Humilitas, qua verè Christus colitur, & sine qua nullus est eius cultus. In vanum & sine causa me <sup>Isa. 29.</sup> colunt, inquit Dominus, nec prodest interior cultus, si quem debent exteriorem non adhibent, nec sufficere potest exterior, si alter desit; atque ita in vanum & sine causa me colunt, quando mihi tantum alterutro seruiunt & non vtroque simul. <sup>Marci 7.</sup>

Non potest quidem corpus sine anima, nec animus sine corpore quamdiu hic viuít, humilitatis aut religionis cultum vllum exhibere; sicque naturaliter à se inuicem illi actus interni & externi non magis separati sunt quam corpus & anima quæ simul



Isa. 29.

uniuntur. Si tamen accuratius inspectentur prout à multis exerceri solent, & morali sensu perpendantur, tanta illorum occurrer differentia, quanta est corporis & animæ dum à se disiunguntur. Solo corpore, solo externo cultu & actu, quasi essent exanimæ, illi Christum colunt & se illi subiciunt, qui flexis quidem adorant genibus, sed mente, ne dicam lingua & oculis, mente interna sic vagantur, ut vix vllum veræ pietatis sensum, vix vllum veræ humilitatis actum ex animo edant. *Appropinquat populus iste ore suo & labiis suis glorificat me, cor autem eius longè est à me.*

Ioan. 8.  
Iob. 35.

Atque utinam de leuiculis quibusdam animi motibus querela tantum esset, sed contineamus nos in nostra de humilitate materia, consideremus quo tempore se vir ille aut mulier ad templum conferunt adoraturi sanctissimum Sacramentum, seque illi toto prostraturi corpore, quasi viles & humiles serui; nihil tamen animo versare aliud quàm superba, quàm elata, quàm mundana, & vno verbo, Christianæ humilitati planè opposita. Quod enim pene omnes in templis, nisi diligenter caueant, cogitatione detinet & affectu, superba illa est vestium laxitas, & ambitiosa quædam spectandi sui cupiditas, quæ fit, ut vel oculos & mentes spectantium omnium ad nos attrahamus, vel ipsi nos è conuerso finamus in illos attrahi, ne quid forte nobis splendidius & illustrius præ se ferant, unde inuidiæ faces, arrogantia stimuli, & superbiæ flatus excitantur supra fidem exitiabiles, atque ita mentem penitus occupant, ut non sola horum cogitatio, quod satis quidem graue foret, sed affectus, sed desideria, sed prauæ cupiditates, totum sibi furentur hominem, nihil ut concupiscat animam vehementius, quàm quod corpore videtur abiecisse. Nonne vides ut corpore sese deprimat, sese abjiciat, & in pauperculum pronus se incuruet? At videsne ut simul se superbe erigat animo? vides ut intumescat, ut inuideat, ut se splendidiorem aliis gaudeat, vel minus illustrem doleat? Et vocabis externos illos humilitatis actus? Illum censebis humilem, qui dum se actu exteriori abjicit, se interiori attollit; dum Dauidem simulat, Saulem agit; & quo se putat cultu corporis Christum magis venerari, magis inhonorat & offendit. *Et vos inhonorastis me. IBI clamabunt & non exaudiet, propter superbiam.* Hæc vna maximè ratio cur preces nullæ, quia dum oras, superbis: & superbos Christus non audit.



Quando etiam superbum deponerent habitum, nisi simul animo verè sint humiles, sunt illæ similes cuidam mulieri quæ mutauit habitum vt Prophetam falleret. *Ingredere vxor Ieroboam : quare aliam te esse simulas?* 3. Reg. 14.

Sunt alij verò qui se intus animo variis exercebunt in actibus humilitatis, deuotionis & perfectioris cuiusque cultus, quasi sint omnium vilissimi & deterrimi, quos tamen si se obtulerit occasio vel in templis cedendi aliis, vel in compitis comitandi cum paucis sacram Hostiam ad Infirmos delatam, pudebit scilicet, erubescant, confundentur, declinabunt à semita; quod soli pauperes Christo faciunt, id negabunt diuites, quasi supra suam sortem sic Christo deseruirent, quasi quod Christo præstaretur obsequium, sua esset inferius dignitate. An istos credes humiles? an illa erit humilitas sic diuisa, quæ Sacramento debetur? Apparet certè quàm sit manca. Quamobrem caue omni modo fastum, & audi quod ait Dominus per Prophetam; *Non adicies exaltari amplius in monte sancto meo.* Sophon. 3.

Videri debet præsertim Feriâ 2. sequentis Hebdomadæ.

Atque vt nihil debitum Sacramento referuamus non plene datum, subjungatur præcedenti sequens, de triumpho Christi ad hæc Apostoli verba:

*Expolians principatus & potestates traduxit confidenter, palam triumphans illos in semetipso.*  
Coloss. 2.

## VERITAS PRACTICA.

Quæ hodiernum Christi triumphum res vna magis illustrare debuerat, hæc vna magis obscurat.

RATIO EST, Quia voluntas humana est quæ hodiernum Christi triumphum magis illustrare debuerat.

Sed illa ipsa voluntas hunc triumphum magis obscurat.

Ergo quod est valde deplorandum, & ne vitio nostro fiat, diligenter præcauendum, quæ hodiernum Christi triumphum res vna magis illustrare debuerat, hæc vna magis obscurat.



## I. P V N C T V M.

Sess. 13. c. 5.

**S**ANCTA Synodus Tridentina declarans piè, & religiosè admodum in Dei Ecclesiam inductum fuisse hunc morem, ut singulis annis peculiari quodam & festo Die præcelsum & venerabile Sacramentum singulari veneratione ac solennitate celebraretur, utque in processionibus reuerenter & honorificè illud per vias & loca publica circumferretur, hanc reddit rationem valde confiderandam: Aequissimum est enim sacros aliquos statutos esse dies, cum Christiani omnes singulari ac rara quadam significatione gratos & memores testentur animos erga communem Dominum & Redemptorem pro tam ineffabili & planè diuino beneficio, quo mortis eius victoria & triumphus representatur. Atque sic quidem oportuit victricem veritatem de mendacio & heresi triumphum agere, ut eius aduersarij in conspectu tanti splendoris & in tanta vniuersæ Ecclesiæ latitia positi, vel debilitati & fracti tabescant, vel pudore affecti & confusi aliquando resipiscant.

Hæc ad verbum sancta illa Synodus, vnde non modo patet hodiernam solennitatem esse quemdam Christi triumphum, sed hunc triumphum esse triplicem de quo citata possint Apostoli verba intelligi, *Expolians principatus & potestates traduxit confidenter, palam triumphans illos in semetipso.*

2. Cor. 15.

Primus triumphus est Crucis & mortis, cum Christus in cruce moriens, principes tenebrarum harum nempe dæmones vicit, & de his triumphauit, quia per mortem suam, quantum in Ipso est, animas eis sustulit, & æternæ damnationis sententiā contra homines latam, in sempiternam computauit beatitudinem. Hic autem triumphus hodie representatur, ipsos hodie secum dæmones Christus victos & ligatos quodammodo circumducit per urbem & vniuersum orbem, atque in exemplum profert quo discant omnes sic se victori Christo subicere. *Nam oportet illum regnare donec ponat omnes inimicos sub pedibus eius.*

Esther 6.

Secundus triumphus est Fidei seu Veritatis Catholicæ contra mendacium & hæresim, cuius Authores & fautores sunt ipsimet principatus seu principes tenebrarum de quibus triumphat hodie Christus, cum se tanto magis colendum & adorandum palam omnibus præbet, quantò illi magis eum deprimere contendebant, negantes Sacramenti veritatem. *Sic honorabitur quemcumque Rex voluerit honorare.*



Tertius denique est Virtutis seu Veritatis practicæ contra prauam & peruersam humanam voluntatem, quam sicut deprauant illi ipsi Tenebriones aduersarij qui peruertunt intellectum, ita de illis hodie triumpharet Christus, nisi eius retardaremus triumphum; Nec minus de hoc triumphi genere interpretari liceret Apostoli verba quàm de aliis; sicut apertè S. Bernardus de se aiebat, *Vtinam ego inueniar in his spoliis quibus spoliata sunt contraria potestates, traductus & ipse in possessionem Domini.*

Epist. 190.  
ad Innoc.  
Pont.

Sed prohi dolor, quæ hunc hodiernum triumphum res una magis illustrare deberet, illa una est quæ hunc magis obscurat. Hoc est de quo minus triumphat Christus, de quo tamen potissimum vellet triumphare. Humana nempe voluntas est, quam vnâ sibi præ omnibus aduersariis vellet esse subiectam, & illa una est quæ nunc illi etiam, nostro vicio, & nostra perfidia, magis resistit. Quamobrem id etiam atque etiam diligenter attendamus, & quantum hodiernæ Sacramenti gloriæ seu glorioso Christi triumpho deesse nolles, tantum vide ne modo desis considerandæ huic Veritati, quæ te doceat in quo sita sit illa triumphi gloria, quantumque possis illam aut illustriorem reddere vel obscurare deterius.

Ac primum illud quod expendendum venit de Diuina circa humanam voluntatem voluntate, certum est non tam multis ad intellectum egere verbis, quàm multo ad ponderandum intellectu, pro ipsa rei quam continet grauitate ac merito. Quid enim dignius quàm quod primum à nobis Deus postulat? Quid autem clarius quàm vnâ esse ex omnibus nostram voluntatem? Quid notius in scripturis quàm illa Patris amantissimi sollicitatio:

*Præbe fili mi cor tuum mihi?* Hoc est affectus omnes tuos quos dare vel negare solius est voluntatis? Aut si affectus inter omnes, amorem cordis præcipue desiderat, cuiusnam humanæ potentiæ est, hunc affectum impendere nisi rationalis illius quam vocant appetitiuæ facultatis, cuius idcirco solum obiectum est quod est bonum, vt quod solum est bonum norit diligere. *Et nunc Israël quid Dominus Deus petit à te, nisi vt timeas Dominum Deum tuum & ambules in viis eius, & diligas eum ac seruias Domino Deo tuo in toto corde tuo, & in tota anima tua?* Vim magnam facit Moses in paucis istis verbis, *Et nunc.* Quasi diceret, post tot tantaque tibi collata beneficia, post tam insignes suæ singularis beneuolentiæ thesau-

Prov. 23

Deut. 103



ros patefactos, quid sequitur, quid exigit, quid meretur, quid reddes? Quid te illi debere agnosces? quid aliud quam amorem reciprocum, cum amor amore solo compensetur? Hoc vnum si reddideris, licet abessent alia, satis sibi factum putat: Et hoc vnum nisi reddideris, licet adessent cætera, nihil te illi dedisse putes, nihil à te accepisse dicet.

O quam modò longè id aptius! *Et nunc* Christiane! nunc post ipsum datum in mortem pro te Filium! nunc pro ipso in cibum filio derelicto, nunc pro tot effusis per ipsum gratis! Et nunc quid Dominus Deus petit à te nisi vt ipsum ex toto te diligas? Et quid est ipsum ex te toto diligere, nisi voluntatem tuam omnem illi dare, dedere, consecrare?

Quòd si altius & attentius tanti Sacramenti causas & effectus rimari velles: cur sic in sacrificium simul & cibum, cur in panis & vini specie, cur tam crebrò frequenterque? cur tam familiariter & intestinè nobiscum agat? Intelligeres profectò intelligeres vnum hoc tandem spectare omnia, nostram vt sibi voluntatem demereatur ac deuinciat, vni demum seruire omnia voluntati vel purgandæ vel promouendæ vel vniendæ suo summo Bono. Nam tametsi ad cæteras animæ facultates Sacramenti se confert gratia, licet refranandæ cupiditati proffit, licet memoriam instruat & intellectum illustret; quia tamen horum est finis omnium nostræ cum diuina voluntatis vnio, cui prorsus perficiendæ nexum hunc Sacramentalem Christus instituit, nonne hanc vnā nostram expetere dicendus est præcipuè voluntatem?

Gen. 24.

*Queramus ipsius voluntatem*, dicebant de Rebecca parentes ad iungendas cum Isaac nuptias: O quid cogito, cum illud ipsum cogito pronuntiatum à Diuinis illis Personis quæ ad salutem animæ, Mysterium Incarnationis & Eucharistiæ decernebant? Quid quærebant in his mysteriis nisi salutem animæ? Quid quærebant in salute animæ nisi voluntatem ipsius? Quid dicebant si quid secum de Christo dicerent, & de anima, nisi hoc vnum, *Queramus ipsius voluntatem*. Purgari debet à peccatis anima, *Queramus ipsius voluntatem*: Expugnari debet suis vitiosis cupiditatibus, *Queramus ipsius voluntatem*: Illustrari debet virtutibus, *Queramus ipsius voluntatem*: Diuinis exornanda est dotibus, *Queramus ipsius voluntatem*. Hoc vnum tota petit Diuinitas, hoc vnum quidquid cum Deo Christus agit in anima, *Queramus ipsius voluntatem*. Hoc vnum



unum quærit qui non nostra sed nos quærit, ac proinde quis non videt, quàm hoc vno præsertim trophæo redderetur illustris eius triumphus, cum ad hunc unum præsertim deuincendum aduersarium, quicquid gestum est pugnae, quamdiu vixit Christus, propterea gesserit, & vitâ potius quàm pugna cesserit, vt de hoc triumpharet gloriosius inimico, quem faceret in triumpho amicum & triumphi socium.

Si qui dicuntur alij à Christo debellati hostes, Dæmon, Infernus, Caro, Mundus, & quidquid contra Deum obstitit; nec obstitit contra Deum, nec à Christo debellatur, nisi quia voluntatem subducit humanam & in se pertrahit; subiecta detur humana Christo voluntas, nullus iam restat qui se illi opponat, aut quem nolit oppositum inimicus. Non se opponet Mundus qui sola voluntate se opponit Christo. Non se opponet Caro quæ voluntate, cum Christi gratia regitur. Se opponet quidem Dæmon, sed Dæmonem sibi oppositum contemnit Christus, nec illum quærit sibi amicum aut aliter debellatum, quàm quod in hominis vincitur voluntate. Quamobrem hæc humana voluntas vnus est Christi aduersarius, de quo quàm gloriosè triumphat, tam illustrem agit triumphum; hoc est medium inimicorum Christi de quo Psaltes, *Dominare in medio inimicorum tuorum.*

*Ps. 109.*

## II. PUNCTVM.

**S**ED illa ipsa voluntas hunc triumphum magis obscurat.

Quia videlicet illa est, quæ cum magis deuicta, magis subjugata, magisque Christo subiecta esse deberet, minus tamen ex omnibus se illi subditam reddit. Quotquot enim aderunt in hodierna solennitate peccatores, quotquot in peccato voluntario comitabuntur hunc solennem Christi triumphum, tot tantisque modis aderit inimica Christo voluntas, non triumphata sed triumphans, non vieta sed vincens, non subacta sed subigens, rationem scilicet & gratiam, vnde inordinatio nascitur, vnde peccatum prodit, vnde rebellio contra Christum fouetur; vnde illa est denique triumphî obscuritas, cum qui capitalior est Christi hostis, Christum potius ducit subiectum quàm ab ipso ducatur. *Seruire me fecisti in peccatis tuis.* Hoc humanæ Christus ait voluntati, quæ Christo seruire noluit, quæ seruire Christum fecit in



ser. 2. peccato suo, cum à se Christum expulit, cum eius leges & imperium detrectauit, cum se sui Dominam fecit, non Christi legem & gratiam. *Confregisti iugum meum, rupisti vincula mea, & dixisti, non seruiam*, idest, non me tibi subiciam, sed tu mihi potius cedes & fines quod volo facere. Nonne hoc ipsum est quod alia iam Veritate supra exposita, declaratum fuit:

En 1. p. die 12. Ian. Nisi te subdas Deo, Deum tibi subdis?

Quis dubitat hunc animæ peccatricis damnosum esse statum, ut quamdiu manet in peccato, non sit ex parte voluntatis, subiecta Christo? Licet illi memoria, licet intellectu iungatur, licet pio quodam affectu sensibilibusque cordis aspiret motu: non est tamen, non est voluntate anima Christo subiecta, quia peccatum lethale quoduis est ipsa Christi & animæ voluntatum disiunctio.

Eccles. 21. *Quasi romphæa bis acuta, omnis iniquitas*: Bis maliciam suam exauit, & in Christum & in ipsam iniquam animam. *Iniquitates vestre diuiserunt inter vos & Deum vestrum*, quâ quæso diuisione, nisi voluntatum?

Quamobrem licet vel vnus tantum in celeberrimo qui futurus est, vel qui iam fuit, populi catu, peccator præsens adesset, satis esset ad obscurandum Christi triumphum, quia voluntas illius peccatoris non esset captiua Christi, non esset Christo subiecta, non de illa Christus triumpharet: quantò magis putatis obscurandum illum triumphum, cum tot penè peccatores adsint, quot aderunt triumphî comites, quot spectatores, quot ciues? Quis enim cogitat hodie de reuocanda in seruitutē Christi, sua voluntate? Quis de abjuranda sua perfidia? quis de suo sibi reconciliando Rege Christo? *Nullus est qui agat penitentiam super peccato suo dicens, quid feci? omnes conuersi sunt ad cursum suum, quasi equus impetu vadens ad prælium*, Quasi ex sola consuetudine, quasi sine vllō adhibito intellectu, sine vlla recta voluntate, sine vlla ratione, quasi nec adesset homo, nedum Christianus.

ser. 8.

### III. P V N C T V M.

**Q**UAE hodiernum igitur Christi triumphum res vna magis illustrare debuerat, hac vna magis obscurat; Nempe humana voluntas, quæ quidem quantò esset magis subiecta Christo, tantò



eius triumphum illustriorem redderet, & quanto etiam per peccatum magis erit disiuncta, tanto illum obscuriorem faciet, tantumque de solenni eius deducet gloria, quantum à præstantissimo belli Duce detraheretur, cum vel ei parta diriperetur præda, vel ne illam sibi pareret, auocaretur. *Mutauerunt gloriam incorruptibilis Dei in similitudinem imaginis corruptibilis hominis*: Quasi non esset ipse Christus, aut quasi Christus non esset Deus, quem hodie singulari gloria colendum ducimus. *Repletus es tu ipse ignominia pro gloria*, dicit Dominus, Id est, in te ipsum peccator conuertis quod Domino facis. Si de te Christus triumpharet, gloriosum triumphum ageret, & in gloriam tuam redundaret: quod si de te non triumphat, ignominiosus erit triumphus, & erit ignominia tua talis triumphus. Hoc enim ipso quo de te non triumphat Christus, triumphat diabolus: hoc ipso quod non vis dicere sicut Apostolus, *Deo gratias qui semper triumphat nos in Christo Iesu*, vis de te dici hoc ab eodem Apostolo: *resipiscant à diaboli laqueis à quo captivi tenentur ad ipsius voluntatem*, seu ex Græco, circumducuntur velut bello victi, vel ut fera reti captæ. Quid autem ignominiosius quàm sic à Christo transire ad dæmonem? Sic è captiuo Christi captiuum fieri dæmonis? Sic malle de se dæmonem quàm Christum triumphare? Sic denique quam Christo putas hodie conferre gloriam, hanc sibi dæmon iure quodam suo vendicet, quia te suum vendicat, te suum possidet. *Voluntarium seruum sibi diabolus auctionatur*, inquit S. Ambrosius, *neminem iugo seruitutis astrictum possidet, nisi se ei prius peccatorum ære vendiderit*; sic & nemo peccat quin se illi vendat in seruum. O dignum tali Domino seruum!

Hoc cène est solemnitatem Domini agere? Hoc cène est triumphum Christi celebrare?

Quid prodest vias mundare cum immunda incedas anima? Quid prodest faces accendere, cum in tenebris ambules? Quid prodest externum procedendi tenere ordinem, cum intus animo procedas inordinatus? Quid honoris causa corpus stipare Christi, cum ab eo per peccatum longè magis distes quam à terra coelum? Profunt illa quidem suo palam modo, nec sunt propter peccatores deserenda, sed priuatim ita infuscantur à peccato, ut quod illustrius esset in triumpho, si duceretur in gratia, fiat eius defectu tetrius. *Quomodo obscuratum est aurum, mutatus est color optimus, dispersum*



*persi sunt lapides sanctuarij in capite omnium platearum! Filij Sion inclyti & amicti auro primo, quomodo reputati sunt in vasa testea, opus manuum figuli?*

Hæc & alia quæ deplorat Ieremias externa damna, vastationes rerum sacrarum, iacturam bonorum omnium si pateremur, quis non indoleret? Quis non lamentaretur? At quia non apparent foris nostra dedecora, quia soli Deo patent, non hominibus; idcirco minora ducimus, & hoc vnum videmur agere, quod videtur; quod autem non videtur, nostra nil refert. O Christe quid tum animi tui? Quid interni sensus? Quid sacri pectoris? Quid diuinæ mentis? Nonne Tu ipse es qui curam internorum præ externis tantopere commendabas? Nonne tu ille ipse qui cecitatis & amentia condemnabas eos qui quod deforis esset, munda-bant, interna verò negligebant? An minus modo circa hæc animi quàm dum olim mortalem vitam ageres? An minus modo succensi pectoris quo in nos ardeas? Nonne tantò id magis nobis verendum quantò te minus verendum præbes? Nonne illud de te nobis pronunciatum: *Porro Triumphator in Israël non parcat, & penititudine non flectetur.* Tantine, peccator, erat vt peccatum hodie deponeres? Vt confessione mentem expiares: & paratior celebrando Christi triumpho accederes? Non legisti quod post insignem partam victoriam cum Dauid à suis Ierosolymam velut in triumphum duceretur, expressè dicitur, *Viri Iuda adhesere Regi suo.* Qui sunt viri Iuda, nisi viri confessionis? Hi nempe sunt qui adhærent regi suo Christo, licet locorum interuallo sint longiores. *Quamobrem præoccupemus faciem eius in confessione. SICUT fluit cera à facie ignis, sic pereant peccatores à facie Dei.*

Quæ Psalmi verba possent vrgeri vehementius, vel coniunctim cum præcedentibus vel separatim, hanc formando & declarando Veritatem Practicam:

Sicut ab igne cera, sic deberent hodie peccatores à Christi perire facie.

*RATIO EST, Quia quod Ignis in ceram agit, hoc Christus in peccatores, si Christo consentire vellent, & sic perirent.*

*Sed deberent Christo velle consentire.*

*Ergo & sic perire, non quidem homines, sed peccatores.*



QVASI enim duæ res sunt, homo & peccator, inquit S. Augustinus, peribunt peccatores ut saluentur homines, solis ipsorum peccatis pereuntibus. Sic idem ipse S. Doctor exponens verba Ionaæ Prophetæ. *Adhuc quadraginta dies & Ninive subvertetur.* EVERTVNTVR, inquit, peccatores duobus modis, aut sicut Sodomitæ, ut pro peccatis suis ipsi homines puniantur; aut sicut Ninivitæ, ut ipsa hominum peccata puniendo destruantur. Factum est quod prædixit Deus; eversa est Ninive quæ mala erat, & bona edificata est quæ non erat; stantibus enim manibus atque domibus eversa est ciuitas in perditis moribus.

Ad primam autem propositionem quid clarius, quam quod ex Deuteronomio clamat Apostolus, *Etenim Deus noster ignis consumens est!* Nonne & ipse Christus de se affirmabat: *Ignem veni mittere in terram, & quid volo nisi ut accendatur?* Licet verò per illum ignem posset omne bonum intelligi, quod Christus in mundum attulit, veriùs tamen illa significatur gratia, qua omne malum culpæ vellet absumere.

Non sic enim circa omne bonum, aut circa omnes homines de suo dicit igne, *Et quid volo nisi ut accendatur*, sicut circa omne malum & circa omnes. Non vult inquam omnibus omne bonum, *Cum in domo patris aterni mansiones multe sint*; Sed ab omnibus omne vellet excludi malum præsertim culpæ, *Nolens aliquos perire*, inquit S. Petrus, *sed omnes ad pœnitentiam reuerti.*

Cum autem semper, tum hac profecto die quam sibi singulariter caram & honorificam destinauit, dubitari non potest, quin vellet hunc ignem in illis accendi omnibus à quibus vellet honorari. Vellet, inquam, hoc illo suo igne tam ardentè illorum peccata consumere quam libenter hodiernum ab eis cultum & honorem acceptat. Nam cum *dona & honores iniquorum non probet altissimus*, ut ait Sapiens: nonne si quorum hodie dona probat & honores, nollet eos esse iniquos & impios? Nonne si laudem hodie sibi acceptam indicat ab ore hominum, nollet hos homines esse peccatores, cum sit expressè scriptum, *Non est speciosa laus in ore peccatoris*? Nonne sic Deus dicitur Abelis munera potius respexisse quam Caimi? Nonne sic amicos Iobi ad ipsum remisit Iobum, quo intercedente fierent eorum munera gratiora? Nonne sic illis denique omnibus quibus dicit *non est voluntas mea in vobis*; dicit, & *munus non suscipiam de manu vestra*? Quamobrem si munus hodie, si laudem, si honorem vult suscipere, nonne prius



Iac. 4.

suam velit in nobis esse voluntatem, id est, nos esse cum ipso in gratia, nos extra peccatum esse, nos illius igne consumi si velimus, *sicut cera fluit ab ignis facie. Emundate manus, peccatores: & purificate corda, duplices animo.*

Vide in I. parte de Purificatione Beatae Virginis, ubi de ferendis cereis.

*S E D Christo consentire deberent peccatores.*

Ad hanc secundam propositionem minus etiam restat dubij, cum id certe quod agunt hodie Christiani, hoc agere debeant, Id est, non fecte, non simulate, sed verè agere. Nonne sic olim in sacris præcipue clamabatur, *Age quod agis*, verè Deum honorato, quandoquidem illum honorare contendis. Nonne alioquin res est ficta & simulata, nisi quis plane consentiat in illud externum opus tam verè ex animo faciendum, quàm apparet foris esse factum? Quale est autem, peccator, quale est illud opus, quod paras hodie? Quid moliris? Quid contendis? Nonne est honor reddendus Christo? Nonne hoc suscipis? Nonne hoc vis? Nonne hoc velle debes ex animo, sic coniungi Christo sicut videris velle coram hominibus? Nonne verum illi & non simulatum vis deferre honorem? At cum verus non sit alius quam qui à Christo reputatur & quem ipse à te quarit, sicut audiisti, nonne cum illo simul conspirare debes, nonne in hoc ipsum illi consentire, illi adherere, illi cooperari, cum sine te nihil velit agere sicut sine illo nihil posses?

i. Par. 22.

*Cernitis*, inquiebat Dauid populo suo, *Quod Dominus Deus vester vobiscum sit, præbete igitur corda vestra & animas vestras*, Quasi diceret, quasi concluderet quod nobis est concludendum ex Veritate proposita, ne desitis Deo, sicut vobis non deest: finite vos ipsius igne accendi, quo peccata vestra consumantur, sicut fluit cera à facie ignis. Non minus ille vult hoc in vos agere quàm ignis agit in ceram: sic vos æquè id velitis, sic vos non magis quam cera resistatis. Liberum quidem vobis est consentire vel dissentire, sed libertatem præbere debetis gratiæ, cõsentiendo potius quàm dissentiendo. Nonne illi etiam liberum est hoc in vos agere quod ignis necessario seu naturaliter agit in ceram? At non minus quàm ignis certo ager, non minus quàm si necessario ageret, certo ager, quantumvis agat liberè. Quin potius, audi excessum



bonitatis Christi, pateretur potius ignem non agere, non ardere, non ceram liquefacere, non consumere, quam se non ardere desiderio, non inflammari voluntate consumendi tui peccati, quo te præsertim tempore cum aliis ad se honorandum conuocat. *Mundi sunt oculi eius, ne videat malum, & respicere ad iniquitatem non poterit.* Hab. 1. Quid est quod tu modo non idem sentias? Quid est quod libertatem in hoc ipsum non ita certò præbeas? Nonne tibi liberum est, vel adesse hodie vel abesse si velis, ab illo communi coetu, quo palam conuenitur ad Christo debitas referendas palmas? Tu tamen abesse nolles; tu tam debitum agnoscis pietatis officium, vt tibi quodammodo non putes esse liberum non adesse: nec cera magis fluit à facie ignis, quam quæcumque obstacula quæ te possent inde auocare, deficiunt & quasi liquefiunt aspectu tanti debiti. Solum remanere videtur libertas, vt id vnum agat quod debet. Cur non porro pergit vltius? Cur non cogitas te non minus debere sacris hodie interesse persoluendis, animo rectè composito, quam corpore, quandoquidem agitur de honorando Christo, qui animo magis quam corpore honoratur? Aut si non ignoras tale debitum, cur non reddis æquè ac aliud? Cur te non reddis illi gratiosum, quem dicis te velle pro debito tuo colere, quem tamen probè scis non posse debitè colere, nisi te illi gratiosum reddideris? Nonne hoc est præuicari? Nonne hoc est vna manu destruere quod altera construas? Nonne hoc est in duas partes claudicare? Nonne hoc est Arcam & Dagonem simul statuere?

*Mementote istud & confundamini: redite prauaricatores ad cor. re. 15. 46.* cordamini prioris sæculi, quoniam ego sum Deus. Quasi diceret, hæc cogitate quæ cogitari non possunt sine confusione, nec eorum sentiri potest confusio sine pio cordis affectu, quo tandem liquefacti pereatis qua parte peccatores estis. Quod si tali pietatis sensu non emollimini, reuocate in mentem quæ prioribus sæculis supplicia Deus sumpserit ab his qui Arcam aut res sacras profanè tractauerunt. Nam ille ipse est Deus qui olim & qui modò à vobis colitur; Ille ipse ignis qui ardore iustitiæ consumet eos in interitum, qui ardore bonitatis consumi noluerunt in salutem. O sancta Prophetæ vota, o antiqua sanctorum desideria, quò tandem spectabatis, cum è coelo in terras sic Dominum euocaretis: *Vinam dirumperes cælos & descenderes: à facie tua montes defluerent. 15. 64.*



*sicut exustio ignis tabescerent, aqua arderent igni. Ecce iam toties dirumpuntur cæli & descendit; nec dubium quin ab eius facie multi montes defluerint; Sed cur non omnes? cur tam multi adhuc indurati? Cur tam multi bonitate tanta magis etiam obfirmantur quàm emollescunt? Hoc est scilicet quia sicut ignis ceram liquefacit & obdurat lutum, sic lutosæ mentes illo diuino igne magis indurantur; aut qui certè sic indurantur, apparet eos esse lutosos & terrenos homines.*

Contra est illa Veritas quæ infra in hac parte declaratur, vbi de Cælesti Pane, *Quo qui viuunt, Cælestes fiunt: & sic in suis viuunt corporibus sicut Cælites in assumptis.* Vide Fer. 5. 6. & Sabbatum Hebdom. 13. Quò etiam multa huius & sequentis septimanæ referri possunt.



## FERIA SEXTA.

DE EVANGELICA DOCTRINA, A  
CHRISTO DOMINO TRADITA ET SUMMATIM  
CONTENTA IN SANCTISSIMO  
SACRAMENTO.

*Dabit vobis Dominus panem arctum, & non faciet auolare à te ultra doctorem tuum: & erunt oculi tui videntes præceptorem tuum, & aures tuæ audient verbum monentis: Hac est via, ambulate in ea. If. 30.*

## VERITAS PRACTICA.

Sacra Christi schola, Sacro-sanctum Sacramentum.  
Hic totum disces Euangelium, breui compendio,  
nullo impendio.

RATIO



RATIO EST, *Quia totius Euangelij quoad moralem doctrinam & practicas veritates, de quibus hic agitur, breue compendium his continetur Christi verbis: Si quis vult post me venire, abneget semetipsum, & tollat crucem suam quotidie, & sequatur me, Quorum proinde verborum vim & sensum si facile didiceris, disces breui compendio & nullo impendio totum Euangelium.* Luc. 9.

*Sed horum verborum vim & sensum facile disces ex Sacro-sancto Sacramento.*

*Ergo hic totum disces Euangelium, breui compendio, nullo autem impendio: quod quam sit fructuosum, satis patet.*

## I. P V N C T V M.

**M**ULTIFARIAM, inquit Apostolus, *multisque modis Deus olim loquens in Prophetis, nouissime diebus istis, nobis locutus est in filio.* Hebr. 1.

Cogita quàm potenter, quàm efficaciter loqueretur dum videret, *Erat enim docens sicut potestatem habens, & non sicut Scriba eorum & Pharisei, NVN QVAM locutus est homo, sicut hic homo.* Ioan. 7.

Et verò vt absolutam eorum omnium quæ ad formandos mores commendabat summam aliquam faceret, & breue quoddam compendium, sic identidem se sequentes admonebat, *si quis vult post me venire, abneget seipsum, & tollat crucem suam quotidie, & sequatur me;* Luc. 9. Quibus in verbis quidquid continetur, cum eminenter & excellenti quadam ratione contineatur in sanctissimo Sacramento, nonne *Sacra Christi Schola* dici potest? Nonne *hic totum disces Euangelium breui compendio, & nullo certe impendio,* cum hoc tantum postuletur, vt consideres quid hæc verba significant; & te his affici sinas cum gratia vt id libenter velis exequi quod faciendum didiceris.

Hoc itaque diligenter inuestigandum, quomodo tota moralis & Euangelica Christi doctrina compendiosè contineatur paucis illis Christi Domini verbis. Quod vt manifestius fiat expende quod sæpius alibi dictum est, vniuersam hanc nostram spiritua-



lem vitam, in his tribus consistere: Primo quidem ab inordinatis motibus concupiscentis appetitus circa bonum sensuale abstinetur: Deinde ut motus irascibilis circa malum sensibile sustineatur; Ac demum sua quisque in vocatione quod sibi agendum viderit, id tranquille agat in Domino.

Cum enim Voluntas humana naturaliter duos præcipuos habeat motus ad quos cæteri omnes referuntur; Vnum scilicet complacentiæ in bonum sibi connaturale: tum alterum displicentiæ naturalis à malo sibi contrario: hinc fit ut omnis inordinatio vitiorum ea sit, vel quod nimis & inordinate homo feratur in illud suum bonum, vel nimis auersetur malum; ac proinde tota virtutum ordinatio contra naturales illos motus in eo præcipue consistit ut abstineamus seu contineamus nos, in illo bono: & oppositum sustineamus malum. Nam sicut vita naturalis continuis duobus cordis motibus continetur, quos diastolem vocant & systolem, id est, dilatationem & contractionem, vnde est eius pulsus & agitatio: sic vita sensualis & animalis duabus illis motionibus, complacentia videlicet qua dilatatur ad bonum sensuale: & displicentia qua contrahitur ad malum sensibile: Vnde sequitur quod quemadmodum suffocatione, aut aliunde impeditis illis cordis motibus, humana vita tollitur: ita mortificatione seu virtutum exercitio repressis istis vitæ sensualis appetitionibus, intereat illa necesse est. Reprimuntur autem abstinendo & sustinendo, vnde ad perfectionem restabit tantum agere quidquid agendum occurrerit; in quo perfecte agendo nulla prorsus erit difficultas, cum nulla supersit naturæ repugnantia quæ sublata est per mortificationem vtriusque appetitus, ut dictum est.

IAM vero quàm sapienter Dominus illa tria suis comprehendit verbis, facile est advertere. Nam quod dicit *ABNEGET SEMETIPSUM*, perinde est ac si diceret, *abstineat à prava concupiscentia*. Tum quod pergit *ET TOLLAT CRUCEM SVAM*, hoc est, *sustineat* quod sibi graue est: Ac denique quod addit *ET SEQUATUR ME*, Id est *agat*, & operetur in sua vocatione, exemplo ipsius Christi qui sic vitam suam instituit, ut nos idem facto doceret quod verbo; Vnde illud est sancti Augustini: *Iubemur continere ipsa quæ dicuntur bona, & sustinere quæ abundant mala. Continentiæ est, felicitati mundi non credere: sustinentiæ, iniquitati mundi non cedere. Et ideo Christus Dominus omnia*



bona mundi contempsit, & mala sustinuit, ut nec in illis quaereretur felicitas, nec in istis timeretur infelicitas. Itemque alibi: Omnia <sup>1. de vera</sup> <sup>Relig. c. 16.</sup> que habere cupientes non recte vivebamus, carendo vitia fecit: Omnia que vitare cupientes a studio devinabamus veritatis, perpetiundo deiecit.

O quis prætexat ignorantiam vel rerum discendarum multitudinem cum tam paucis omnia comprehendantur! Quis verò difficultatem ausit objicere, cum suum videat ducem & magistrum non minus exemplo suos quam verbo edocentem! O quam recte dictum à Propheta: *Transibit rex eorum coram eis, & Dominus in capite eorum*: Vt scilicet eò primus eat quò se sequentes vocat. <sup>Mich. 3.</sup>

## II. P V N C T V M.

**S**ED hæc tria facillimè percipiuntur in Sacro-sancto Sacramento. Et quidem duobus præcipuè modis, objectivè, & subjectivè. Objectivè considerando statum eius Corporis seu modum Sacramentalem quo ibi existit. Talis enim est ut totus sit in his tribus, *ABSTINENDO, SVSTINENDO, ET AGENDO*; Primò quidem abstinet omni actu vitæ naturalis: licet enim habeat oculos, aures, linguam & alia corporis membra, non tamen ijs utitur, non ijs videt, nec audit, nec loquitur; Sed alio prorsus spiritali modo. Deinde quantum quidem pati iam potest, quibus non iniuriis & contumeliis subjacet, & quâ non patientiâ illas suffert? Ac denique perpetuò illic agit & operatur, conferens gratias omnibus, quotquot se ad eas dignè recipiendas obtulerint. *Pater meus usque modò operatur, & ego operor.* Sic itaque objectivè dicitur id docere, cum se facit objectum in quo per fidem discitur hoc ipsum ab eo fieri. Sic & propterea dicitur *Panis vita & intellectus*, quia dum vivit vitam intellectualem & spiritualem, facit nos etiam intelligere & capere quanam sit illa vita spiritalis, & in quo consistat, quasi nobis id diceret, *Quod me videritis facere, hoc facite. Si quis mihi ministrat, me sequatur.* <sup>Ioan. 5.</sup> <sup>Ecclesi. 19.</sup> <sup>Ind. 7.</sup> <sup>Ioan. 12.</sup>

Deinde verò subjectivè, id efficacius etiam promouet; Id est, hoc ipse in nobis efficit quod in se facit; Nempe nobis communicat hanc spiritualem vitam, ut, quod ait Tridentinum, *Vivamus vitâ illius qui dixit, qui manducat me, & ipse vivet propter me*: <sup>Sess. 12. c. 22.</sup>



Sicut enim anima nostra nos ita viuere facit vita naturali, ut ipsa in nobis uiuat, in nobis agat & operetur; Ita Christus dando nobis vitam supernaturalem uiuit in nobis, uiuit vita sua spiritali, vita Sacramentali, vita illa qua uiuit in Sacramento, & quam in nobis efficit. Quæ quidem vita cum tota sit, ut dictum est, in *abstinendo, sustinendo, & agendo*, quid sequitur nisi ut ipsi toti simus in his tribus, aut non simus in eius vita toti? Sicque euidenter fiat ut non tantum obiectiue in Sacramento percipiamus illam trium verborum vim in quibus summa est doctrinæ moralis Euangelicæ, sed in nobis etiam ex eodem Sacramento sentiamus vitalem eorum effectum, & efficacem virtutem, ut ij actu & re ipsa simus quales nos oportere esse intelligimus. *Sequor autem si quomodo comprehendam, in quo & comprehensus sum à Christo Iesu.* O verè nobis promissum & vere nobis datum *Doctorem iustitiæ*, qui simul omnia tam facile docet, ut tribus verbis omnia doceat: & quæ facienda docet, ipse in nobis efficiat!

Phil. 3.

Ioel. 2.

Ioan. 4.

Ibid. 12.

I. Ioan. 1.

*Ego sum qui loquor tecum*: aiebat quondam Samaritanæ: Nobis nunc verò particulatim, Ego sum qui tecum ambulo, qui tecum sedeo, tecum omnia facio, ut sic omnia mecum facias, verèque illud impleatur: *Vbi sum ego, illic & minister meus erit.* Accursum: *Qui dicit se in Ipso manere, debet sicut ille ambulauit, & ipse ambulare.*

## III. PUNCTVM

**S**IC ergo sacra est Christi schola, Sacro-sanctum Sacramentum, ubi totum discas Euangelium breui compendio, nullo impendio; Quia totum in his tribus consistit, *abstinendo, sustinendo, & agendo*, quæ in paucis Christi verbis continentur, quorum virtus & efficacia ita simul lucet & ardet in Sacramento, ut ex luce fidei videamus quemadmodum ibi uiuit Christus ut docuit, & ex ardore charitatis qua in nobis ipse uiuit, sentiamus quod eandem vitam in nobis operetur. *Et vos unctionem quam accepistis ab eo, maneat in vobis*, inquit dilectus Apostolus, *& non necesse habetis ut aliquis doceat vos: sed sicut unctio eius docet vos de omnibus, & verum est, & non est mendacium: & sicut docuit vos manete in eo.*

2. Ioan. 2.

I. 48.

*EGO EGO locutus sum, & vocaui eum, adduxi eum, & directus est via eius, accedite ad me & audite hoc. Hæc dicit Dominus redem-*



propter tuus sanctus Israel : Ego sum Dominus Deus tuus docens te utilia, gubernans te in via qua ambulas : utinam attendisses mandata mea.

Hoc est verbum consummans & abbrevians in equitate, quia verbum breuiatum faciet Dominus super terram, sicut prädixit Isaias, inquit Apostolus. Hic est preparatus mons domus Domini, de quo idem Propheta & de quo omnes dicent, venite ascendamus ad montem Domini, & ad domum Dei Iacob, & docebit nos vias suas, & ambulabimus in semitis eius.

Hæc est domus disciplina quò nos inuitat Sapiens : Appropiate ad me indocti, & congregate vos in domum disciplina; quid adhuc retardatis, & quid dicitis in his? Comparete vobis sine argento, & column vestrum subijcite iugo, & suscipiat anima vestra disciplinam : in proximo est enim inuenire eam. Quasi diceret quod expressis verbis saepe inculcat sanctus Chrysostomus : Non est hic impendium, non est hic labor, non est hic temporis exercitatio, sufficit velle, & totum factum est. Licet aliqua vero in praxi difficultas diceretur: qualis illa tandem pro rei de qua hic agitur dignitate! quàm longe alia libenter exhauritur pro cæteris rebus perituris! si à sola nostra voluntate cum gratia sic dependerent dignitates, pecunia, prædia, præsentisque vitæ reliqua commoda, quis illa nollet, aut quis nollet necessariam illis acquirendis difficultatem?

Vide in 2. parte, Feria 6. post Cineres ubi hæc opportuna declaratur Veritas.

Qui te à sanctitate acquirenda excusas, ex aliis acquisitis bonis te condemnas.



## SABBATO.

### DE MIRACVLIS CHRISTI DOMINI

RVRSVM EDITIS IN SANCTISSIMO

SACRAMENTO.

Memoriam fecit mirabilium suorum misericors & miserator Dominus, escam dedit timentibus se.

Pl. 110.



VERITAS PRACTICA.

Nisi Christo resisteres, sic te Christus in se, sicut panem consecratum, conuerteret.

*RATIO EST, Quia Sacramenta suum semper habent effectum nisi ponatur obex.*

*Sed effectus Sacramenti Eucharistiae singulariter inter alios commendatus hic est, ut te Christus in se conuertat, modo proportionato seu conuenienti, sicut panem in se conuertit.*

*Ergo nisi Christo resisteres, sic te Christus in se sicut panem consecratum conuerteret; Unde apparet & quàm illi resistas, & quàm illud sit graue.*

I. P V N C T V M.

**Q**UAE tria in miraculis Christi semper eminebāt, Potentia, Bonitas, & Sapientia; ea manifestè apparent in mirabilibus, quæ quotidie operatur circa sanctissimum Sacramentum. Quæ bonitas sic se omnibus communicare! Quæ Potentia tot vno momento miracula edere! substantiam Panis & Vini à speciebus separare! species illas sine vllò subiecto sustentare! totum suum Corpus in tam angusto spatio constituere! totum in tota Hostia & totum in singulis partibus collocare! Verè *videmus quotidie mirabilia & quia Propheta magnus surrexit in nobis, & quia Deus visitauit plebem suam.*

Luc. 7.

Quanam vero Sapientia, quamque admiranda, dum documenta tam variâ tamque salubria in illis includit miraculis! Quod enim pereunte panis substantia remanent accidentia, hoc indicat sic nos conuertendos intus in Christum licet extra ijdem quoad formam maneamus. Accidentia suo à subiecto separata significant motus nostros naturales sic posse à concupiscentia contineri. Effectus quos illa produciunt accidentia sine vllò subiecto representant operationes vitales animæ quæ citra vllum animi detrimentum produci possunt. Esse totum in qualibet parte, nec maiorem esse in maiori Hostia quam in minori, docet nos



*Nisi Christo resisteres, sic te Christus in se sicut panem, &c.* 87

sic perfectè omnia facere nulla vt in reuel exigua desimus sicut in præcipua. *Quis sapiens & custodiet hæc? Et intelliget misericordias Domini.* Ps. 106.

Consideranti vero attentius circumstantias quæ hæc miracula comitantur, tam singulares & stupenda apparent, vt is exclamet necesse est *memoriam fecit mirabilium suorum misericors & miserator Dominus*, Quod enim Christus aliquando, vel quod Petrus, Paulus, aut alij viri sancti miracula per Diuinam interdum virtutem ediderint, quid mirum, cum tales tãtque viri essent; sed ad vnã Sacerdotis vocem quotidie ac singulis pene momentis & vno simul tempore tot vbique locorum multiplicari miracula, quot Hostiæ consecrantur! hoc verè est admirandum.

Cum autem æque vellet Christus nos in se conuertere sicut conuertit panem in Corpus suum, & vinum in sanguinem, quid est quod non æque conuertimur? Nonne maiorem quàm cetera creaturæ Christo debemus obedientiam? Ita plane, nec vlla nos inde ratio iure auocare potest; Sed quia liberi sumus & libertate abutentes Christo resisimus, idcirco id in nobis non efficitur. Quod certè non minus pudendum est quàm damnosum. Quamobrem vt seriò prospiciatur, sic proponenda fuit Veritas, vt quod est in hac materia magis probrosum & stupendum, tanquam certum tibi persuadeas, *Quod nisi Christo resisteres, sic te Christus in se sicut panem consecratum conuerteret.*

Ratio quæ petitur ab effectus Sacramenti certitudine, tam certa est quàm ipsa effectus certitudo atque infallibilitas de qua sic Tridentinum: *Nemo pius de Dei misericordia, de Christi merito, de-  
que Sacramentorum virtute & efficacia dubitare debet.* Et alibi: *Si quis  
dixerit Sacramenta nouæ legis non continere gratiam quam significant;  
aut gratiam ipsam, non ponentibus obicem, non conferre, Anathema sit.*  
Rursumque consequenter: *Si quis dixerit non dari gratiam per hu-  
iusmodi Sacramenta semper & omnibus quantum est ex parte Dei, etiamsi  
earite suscipiant: sed aliquando, & aliquibus: Anathema sit.* Potest-  
ne certius aliquid definiri? Quod autem dicit de gratia, perinde  
est ac de effectû, cum effectus Sacramenti sit illa gratia quæ ad  
certos quosdam effectus datur. *Ille fidelis permanet, negare se ipsum  
non potest. NON dixeris, Per Deum abest.*

Sess. 6. c. 9.

Sess. 7.

Can. 6.

Can. 7.

2. Tim. 2.

Eccl. 15.



II. P V N C T V M.

**S**ED effectus Sacramenti Eucharistiæ singulariter inter alios commendatus, hic est, ut te Christus in se conuertat, sicut panem consecratum in suum corpus transmutat.

Non parî quidem modo, non substantiæ transmutatione, non separatis naturalibus à subiecto accidentibus: sed mutatione vitæ, sed participatione gratiæ, sed ineffabili quadam Diuinæ communicatione naturæ quam variis similitudinibus, & diuersis loquendi modis explicant sancti Patres. Sanctus quidem Chrysostomus de re ipsa comprobâda magis sollicitus quàm de modo, sic pluribus hunc singularem prædicabat effectum: *Semetipsum*, inquit, nobis commiscet, & non fide tantum, verum & ipsa re nos suum efficit corpus. Et paulo post: *Quod Angeli videntes horrescunt, neque liberè audent intueri propter emicantem inde splendorem, hoc nos pascimur, huic nos unimur, & facti sumus unum Christi corpus & una caro.* Et alibi: *Non tantum per Charitatem, verum etiam ipsa re in illam miscemur carnem: propterea semetipsum nobis immiscuit, & Corpus suum in nos contemperauit, ut unum quid simus tanquam corpus capiti coaptatum.* Itemque rursus; *Nos in vnâ cum illo massâ reducimur, effecti unum Christi corpus, & una caro.* Sanctus Gregorius Nyssenus, paulò explicatius: *Sicut parum fermenti sibi assimilât totam consersionem, ita Corpus Christi cum fuerit intra nostrum, totum ad se transmutat & transfert.* Sic sanctus Cyrillus Alexandrinus: *Sicut si quis liquefactæ ceræ aliam ceram infuderit, alteram cum altera per totum commisceat necesse est, sic qui carnem & sanguinem Domini recipit, cum ipso ita coniungitur ut Christus in ipso & ipse in Christo inueniatur.* Sanctus verò Cyrillus Ierosolymitanus, sic breuius nec minus efficaciter: *Concorporei, ut ita dicam, & Consanguinei Christi facti estis.* Et post pauca: *sic efficitur Christiferi hoc est Christum in corporibus nostris ferentes: sic secundum beatum Petrum diuinæ naturæ consortes reddimur.* Sanctus quoque Hilarius ex pluribus Christi verbis hoc idem fusè declarat. At Diuus Thomas id clarè explicat ex modo quo traditur hoc Sacramentum nempe per modum cibi & potus.

Sanctus denique Ioannes Damascenus hanc aptissimam affert similitudinem: *Quemadmodum illa que mediante igne aurum attingunt,*



Nisi Christo resisteres, sic te Christus in se sicut panem, &c. 89

gunt, deaurantur: sumptoque colore vel ferrum auri instar resplendescit; ita fideles qui dignè ad Sacramentum corporis Christi accedunt ac mediante igne Charitatis Carnem eius Sacratissimam contingunt, eidem uniuntur Christo, adeoque similes videntur vita & opere, & quadam ratione sunt. Quasi diceret, ferrum ignitum vel deauratum semper est ferrum, sed per ignem & aurum quibus coniungitur sic mutatur, ut ferrum quodammodo esse desinat, & per ignis atque auri proprietates quas induit, ignis & aurum esse videatur. Hic est effectus ignis & auri ut sic ferrum & quidlibet in se transmutent, sic plane de effectu sanctissimi Sacramenti sentiendum. Adstupesce vel tantæ Bonitati Diuinæ quæ id velit: vel tantæ malignitati humanæ quæ id nolit.

### III. PUNCTVM.

**H**INC igitur nisi Christo resisteres, te Christus in se sicut panem consecratum conuerteret: Quia hic est effectus Sacramenti non minus infallibilis ex parte Christi, quam effectus verborum ipsius Christi per quæ panis consecratur & transmutatur in Christi corpus. Vndenam credis ex prolatis verbis quæ dicuntur Sacramentalia, statim confici Sacramentum, nisi quia sic infallibiliter ordinatum & statutum est à Christo Domino? Atqui ab eodem sic ordinatum est ut Sacramenti effectus tam certo produceretur, nisi obex ponatur; Quid ergo est quod non in te producit nisi quia ponis obicem, nisi quia resistis? Sic omnino Sacramentum non fieret nisi sacerdos proferret verba omnia proferenda, nisi esset materia debita & nisi haberet intentionem conficiendi Sacramenti, quia sic poneret obicem, quo posito nihil prorsus efficitur, & quo sublato fit infallibiliter quod significatur fieri.

Quid hic hæres? quid dubitas? quid non clarum & apertum? Dices forte alios referri fructus & effectus Sacramenti; sed esto, dum hic inter alios sit æque certus effectus, manet probum tibi certo inferendum, te Sacramento resistere, nisi hunc referas fructum & effectum: sic autem certus est & determinatus, ut ad eum velut notioem & firmiorem alij omnes referantur. Sic sanctus Leo: *Non aliud agit participatio corporis & sanguinis Christi, quam ut in id quod sumimus, transeamus; Id est, eò cetera omnia refe-*

*Serm. 79.  
de pass.  
Dom.*



2. 7. Conf. runtur, hic est præcipuus finis & effectus Sacramenti. *Non me*  
 4. 10. *in te mutabis, sed tu mutaberis in me*, ait Dominus S. Augustino.

Iam vero vide quid sit Christo resistere in re tanti momenti! Quid times te in Christum conuerti? Quando aliquid de te detrahendum & perdendum esset, nonne id libenter profundendum esset pro eius cultu qui se tam miris modis deprimat & deperdit, si fas est ita loqui, ut bene de te mereatur? Sed quem teipsum facis? Putasne si conuertereris in Christum, deterius aliquid tibi adueniret? Quid dabis Christo quod non ille restituat & remuneret infinite quouis distant prætio? Dabis vitam tuam animale, & ille dabit suam diuinam; Compara simul vtraique vitam; neque id ita respicias quid forte des, quam quod recipias. Non est dare nec perdere quando quid vilius mutatur in pretiosius. Quando præter virgas & flagella Deus nihil daret, essent flagella dona, nec dona essent recusanda. Certe tanto minus excusaris cum nihil præter gratias tibi offert & negligis; cum nihil minus quam seipsum tibi tradit, & quasi major ipso esses tu munus aueraris!

Iob. 22. *Numquid Deo potest comparari homo?* An ignoras quid manna re-  
*Sabb. Hebd.* cusantibus, poenæ quondam contigerit? Hinc illa Veritas infra  
 13. explananda:

Qui diuinam expellit Sacramenti gratiam, non minus peccat quam qui olim manna repulerunt.







# DOMINICA

INFRA OCTAVAM CORPORIS CHRISTI,

QVÆ EST

SECUNDA POST PENTECOSTEN.

DE CONVIVIIS QUIBVS

CHRISTVS DOMINVS INTERESSE

VOLVIT, VT AD SVVM NOS

INVITARET.

*Homo quidam fecit Cœnam magnam, & vocavit multos. Luc. 14.*

CVM in his duabus Hebdomadis nostrum sit institutum celebriores Christi Domini actiones, diebus singulis proponere considerandas in sanctissimo Sacramento; Quæ nobis hodie proponitur eius actio, pars illa est Conuersationis humanæ quam tenuit in adeundis conuiuiis & hospitiiis, quod vocabatur. Mirum certè quod sic Christus vellet cum hominibus conuiuere & conuiuari: sed tamen decentissimum & finem quem sibi præstituerat conuenientissimum, vt expressè docet D. Thomas, tota quæstione quadragesima tertiæ partis.

Quamobrem considerari tantisper posset in illis variis quas frequentauit, mensis, vt modeste in omnibus, vt accomodate ad omnes, vt sapienter ad quæcumque occurrerent salubri documento condienda, & ad sacrum suum epulum quod destinabat



92 *Dominica infra Octauas Corporis Christi. Homo quidam, &c.*

*Joan. 2.* celebrandum nobiscum referenda. Vide illum in Cana Galilææ, ut inuitatus ad nuptias aquam in vinum mutat; Nonne hæc est manifesta nostri figura Sacramenti? Vide apud Mathæum recens conuersum, ut Publicanos & peccatores secum admittit, ut murmurantes propterea Pharizæos compescit, ut se medicum profitetur, quo non sit opus valentibus sed malè habentibus: quid expressius ad illam quam in altari nobis exhibet, indicandam benignitatem? Quoties verò tam sæpe obseruatur, num more Pharizæico manus lauet, dum cibum sumit, docetque potiore internæ status quàm externæ ducendam esse rationem: quid propius ad dignum & probatum Sacramenti vsum? Vbinam verò Zachæi aut Magdalenæ melioribus anteacta iacturam vitæ refarciunt consiliis, quàm in hoc Sacro conuiuio?

*Luc. 7. 19.* Ne porro longius diffundatur oratio, subsistamus in aperta nobis hodie cuiusdam principis Pharizæorum domo, vbi recumbens Dominus, insignem illam de Cœna magna parabolam cœpit enarrare, quâ certè nihil opportunius, siue ad frequentem, siue ad dignam Sacramenti participationem commendandam. Sicut enim à frequenti, sic à digno communionis vsu, multis suis auocantur domesticis rebus seu potius rerum cupiditatibus, aut aliis prætentis causis, quibus suo modo respondent inuitati Domino, rogo te, habe me excusatum. Quas tamen causas & excusationes omnino nullas esse prima hæc demonstrat

VERITAS PRACTICA.

Qui se excusat inuitatum, accusat inuitantem.

*RATIO EST, Quia qui se excusat inuitatum ad Cœnam seu ad frequentem communionem, prætendit iustam excusationis suæ causam.*

*Sed cum inuitat Dominus, non potest iusta prætendi excusationis causa, nisi simul accusetur inuitans.*

*Ergo qui se excusat inuitatum, accusat inuitantem. Quòd cum sit manifestè impium, cauenda talis excusatio, & audiendus Christus, quibus ille cumque modis nos ad Cœnam suam vocet.*



I. P V N C T V M.



VID est quod vocati ad vineam operarij cum essent otiosi, dixerunt se excusantes, *Nemo nos con-* Math. 20.  
duxit; vocati verò ad Coenam magnam non negarunt nec dissimularunt se vocatos, sed rogarunt se excusari, quasi non possent ire, quò vocabantur, suis implicati negotiis, & domesticis distenti curis?

Digna certè quæ primo in aditu consideretur observatio; nam aliud est, se excusare quod non sis inuitatus; & aliud, quòd inuitatus non possis ire commodè quò vocaris. Excusant se operarij quòd non sint vocati, nec arguuntur, quia reuera donec omnibus constet sua vocatio certum in vita statum, atque illum præcipuè qui vineæ nomine designatur, non possunt illum secure aggredi; neque is tam euidenter status omni constat ætati. Dicunt itaque qui nondum agnoscunt certam de se Dei voluntatem, *Quia nemo nos conduxit*: Sed qui vocantur ad Coenam, non id vsurpent, non id causentur, non id excusent, quia statim atque ipsa floret ætas, statim atque fides ætate discernit inter panem Sacrum & vulgarem, tam apertè patet Coenam esse in Ecclesia, quàm ipsa patet Ecclesia; Tam multi porrò sunt nuntij, qui nos ad illam clarè vocent Coenam, quàm multi sunt qui Coenam magnam de qua hodie memoratur parabola, Sacram interpretantur mensam. Quàm sint autem illi multi, quis non videat? Et quis illos hodie nos inuitantes non audiat? cum in id vniuersam conspirare simul Ecclesiam facile possit aduertere, quæ hodierna Dominica talem elegit Euangelij sui lectionem, meditationum nostrarum materiam, & Sacrarum Concionum argumentum? Cur enim hanc proponit parabolam, nisi vt Concionatores suos velut seruos & nuntios prouocet, qui nomine Domini denuntient omnibus, quod quàm verum est paratam ab eo Coenam esse, tam certum sit, Eum velle nos esse simul paratos ad illam frequentandam?

Illa est Sapientia quæ in sacris Prouerbiis, *edificauit sibi domum,* Prov. 2.  
*excidit columnas septem, immolauit victimas suas, miscuit vinum,*  
*& proposuit mensam suam, misit ancillas suas vt vocarent ad arcem.*  
*si quis est paruulus, veniat ad me, & insipientibus locuta est, venite,*



*comedite panem meum, & bibite vinum quod miscui vobis.* Ancillas vocat quos diximus seruos & nuntios, quia suauiter efficaces esse debent; & iubentur præcipue paruulos & insipientes adhortari vt veniant, quia de his dubitari posset, atque vt omnibus pateat, neminem nisi volentem arceri, nisi volentem in peccato persistere, nisi volentem se oblati priuare bonis.

Quamobrem nemo negare ausit se inuitatum, sed audent inuitati se multis excusare & rogare, vt ipsorum probentur excusationes, quasi non possint, quasi non deceat, quasi non debeant; At frustra, quin & impie; *Nam dum se inuitati excusant, accusant inuitantem.* Ita commodius videtur proponenda Veritas, tum ne actum agamus, multa illa congerentes, quæ à multis referuntur de frequenti communionis vsu; tum vt Euangelica propius inhaereamus parabola, in qua se inuitati excusant; tum vt quàm impie se excusent, apertius liqueat.

*Apud Molinã Carth. Tract. 7. & alios.*

Sic autem manifestè declaratur: nam quisquís se excusat prætendit iustam excusationis suæ causam & rationem: prætendit nempe se à culpa purgare vel à nota infamiae, vel ab aliquo probro, quod sibi fortè posset objici, nisi se purgaret & excusaret.

*Ierem. 2.* *Quid niteris bonam ostendere viam tuam? Dixisti enim absque peccato & innocens ego sum.* Hoc est videlicet, quod excusatione prætenditur, quod certè frustra contenderetur, nisi iusta proferretur ratio, vel apparenter iusta & probabilis aut adumbrata. Quid elarius? *Narra si quid habes vt iustificeris, ECCE ego iudicio contendam tecum, eo quod dixeris, non peccaui.* Id est, conuincam te mendacii & falsitatis; rationes tuas euertam, nullas esse ostendam, ac proinde nullam excusationem quæ illis innititur ruinosis structuris. *Adam ubi es? INTERROGAT,* inquit Eucherius, *Vt suis quisque responsionibus conuincatur, quia licet non ignoret quod sibi vult indicari, vult tamen delinquentem etiam responsionis testimonio reum statui; hoc est, ex ore proprio indicari.* Quod certè est expauescendum.

*Is. 43.*

*Ier. 2.*

*Gen. 3.*

## II. P V N C T V M.

**S**ED cum ad suam nos Dominus inuitat Cœnam, non potest iusta prætendi ratio, siue legitima excusationis causa, nisi simul accusetur inuitans.



Nam vel inuitans Dominus ignorabat talem causam, vel probè nouerat. Si dicas ignorasse, vide quid dicas, vide quali te impietate obuoluas, accusando Christum ignorantia. Nonne ad hanc vocem toto infremis corpore? Nonne iam statim cum Apostolorum Primo dices: *Domine tu omnia nosti*. Quod si probè nouerat te legitimam recusandæ rei quam à te postulat, habere causam, facis illum imprudentem & iniustum, qui à te petat quod dicis te illi non posse legitimè nec iuste reddere. Quantum enim est æquum & rationabile, vt quod petit, neges; tam iniquum erit & irrationabile, quod illud à te petat. Itane verò de Christo sentis? Aut si de Christo ita sentis, nonne illum accusas? Nonne condemnas? quid grauius quàm illum dicere vel ignarum vel imprudentem & iniquum? *Quid dicemus*, inquit Apostolus, *Numquid iniquitas apud Deum? absit*. Et tamen hoc est quod dicis, si cum te ad suam inuitat Cœnam, te legitimè dicis excusatum. Ioan. 11.  
Rom. 9.

### III. P V N C T V M.

**N**ONNE hinc igitur certa & euidentis est veritas, *Quod qui se excusat inuitatum à Christo ad Cœnam, accusat Christum inuitantem*? Et nonne satis est potens & valida consideratio ad reprimendas illas excusationes, atque ad debitum agnoscendum celebrandæ frequentius sacre mensæ? Nam si saltem in illa tua Communionis infrequentia, te infertix accusares, si tuum esse vitium agnosceres: aut si te saltem non excusares, quasi legitimè desis inuitanti, quasi non possis religiosè nec rationabiliter quod à te petitur; minus graue videretur quod peccas: sed accusare Christum! Accusare Christum inscitix, qui te non posse nesciat quod à te petit; vel imprudentiæ simul ac iniustitiæ, qui hoc à te petat quod non possis nec debeas! hoc certe crimen est inextinguibile. *Numquid condemnabis me vt tu iustificeris?* Quasi diceret Dominus, dum te iustificas, me condemnas; hoc est autem tam impium, velle Deum condemnare, vt ne hanc impietatem contrahas, te iustificare desinas. Iob. 40.

Quid hic hæres? Quid dubitas? Nonne agnoscis, vtrunque quod emergit nefas? Nonne agnoscis quam sit nefarium, sic Christum accusare, quamque sit euidentis te illum accusare, dum



96 Dominica infra Octavas Corporis Christi. Homo quidam, &c.

te excusas? Hoc postremum forte dissimulabis, hoc te negabis velle, negabis te hoc agnoscere. Sed audi rursus & responde, quid de illo sentias qui punit immerentes, qui poenas illis denuntiat quasi reis, qui se tamen reos negant. Nonne si rei non sunt, ille qui punit, iniustus est? Atqui hoc est quod de Christo affirmas, si te legitime dicis excusatum, hoc est quo illum manifeste dicis iniustum: nam ille est qui poenas his decernit qui se inuitatos excusant, ille est qui iam eos hac poena mulctat, *Nemo virorum illorum qui vocati sunt, gustabit Cœnam meam.* Nonne igitur aut illi rei sunt & inexcusabiles: aut si excusantur, ille iniustus est; & hoc ipso quo punitos excusas, tu accusas punientem? Licet enim dici posset nullam iniustitiæ Deo notam inuri posse, quantumvis innoxios puniat; nec inflictam à Deo poenam semper esse notam & signum patratae culpæ: hoc tamen dici non potest, cum aliquos Deus, nominatim ut nocentes & particularis noxæ reos punit. Sic autem inuitatos punit, sic illos ante peccasse iudicat, sic iudicatos condemnat. Aut certe si sunt innocentes, quomodo iuste tanquam nocentes iudicantur & condemnantur? O quam ille contra sapientius, qui sic Deo loquebatur; *Numquid perdes iustum cum impio? absit à te ut rem hanc facias, & occidas iustum cum impio, fiatque iustus sicut impius. Non est hoc tuum qui iudicas omnem terram, nequaquam facies iudicium hoc.* Itemque Sapiens: *cum sis iustus, iuste omnia disponis, ipsum quoque qui non debet puniri, condemnare, externum æstimas à tua virtute.*

Quamobrem Christus, ut dictum est, cum recusantes inuitatos tanquam reos puniat, non potest in illis puniendis dici iustus, si non essent rei; nec potest dubitari quin illum tanquam iniustum accuset, qui ab eo punitos excuset tanquam innocentes; ac proinde tandem agnosce quid sit se à Cœna vel Sacra mensa excusare. Non est tantum, non est se priuare fructu tam vberi, qualis inde colligitur, sed est crimen accersere, poenasque consequentes, quibus auertendis nulla prosit excusatio. Sunt illa scilicet ficus folia, quibus se primi nostri parentes obtegere voluerunt, cum eius fructu potius uti debuissent, ut recte obseruauit S. Ambrosius: *Posteaquam, inquit, primi parentes spoliatos se illa sinceritate & simplicitate viderunt integre incorrupteque natura, querere mundana & manufacta ceperunt, quibus nuda sua mentis operirent. Docet ergo me Adam quid sint folia, qui posteaquam peccauit, de foliis ficus, fecit sibi cin-*  
etorium

Abrah.  
Gen. 18.

Sap. 12.

Gen. 3.



*Etiorum, qui de fructibus magis eius gustare debuerit. Fructum iustus eligit, folia peccator. Voluit se operire quibusdam ficus foliis, fortasse quibusdam inanibus & umbratilibus sermonibus, quos compositis mendaciis assuens ad operiendam conscientiam suae mentis, factique velamen, peccator intexit, ut pudenda sua contegat. Iacit enim super se folia, qui culpam velare desiderans, aut diabolum delicti memorat auctorem, aut carnis pretendit illecebras, aut alium quempiam persuasorem prodit erroris.*

Vide in 4. parte, Feria 5. Hebdom. 18. ubi contra omnem excusationis speciem hæc declaratur Veritas:

Si non agis quod vult Deus, hoc vnum infame habes  
quod respondeas, *Nolo, non placet.*

QVIA verò non ad Cœnam tantum, sed ad Cœnam magnam vocamur, hinc alterius accipitur proponendæ Veritatis ansa, contra illos qui minus dignè quàm deberent, accedunt ad Sacram mensam: & minus fructuosè quàm possent, inde recedunt.

Sat frequens multis Cœna est, quibus magna Cœna est infrequens.

Quos à Cœna videlicet res humanæ non auocant, hos à Cœna magna sæpe impediunt.

RATIO Postremæ partis quæ priorem declarat, hæc est inter alias, quòd Cœna magna dicatur Communio integra & plenè fructuosa.

Sed à tali Communione res humanæ sæpe impediunt quos à Communione non auocant.

Ergo quos à Cœna res humanæ non auocant, hos à Cœna magna sæpe impediunt. Quod cum sit valde damnosum, in id præcipuè tibi est incumbendum, ut quantum impediri nolles humanis rebus à frequenti Communione, tantum prospicias, ne his ipsis impediaris ab integra & plenè fructuosa.



## I. P V N C T V M.

**A**GITATAM sæpe hanc quæstionem Authores memorant, *Quodnam esset in cunctis rebus maximum in minimo.* Sunt qui artificis illius opus esse dixerunt, vel quo apis nauim suis omnibus instructam armamentis tegebat alis suis: vel quo rotatum horologium in vnus annuli pala continebatur. Alij hominem esse affirmant, qui mole quantumuis exigua totam rerum vniuersitatem ita repræsentat, vt alter esse mundus dicatur. Alij de hominis oculo id verius posse asseri contenderunt: quid enim pupilla minus in qua cœli & terræ simul recipi posset visio? Cordi humano denique singulariter id conuenire visum est pluribus, quod innumera & propè infinita essent quorum capax est cor humanum, siue vt illa possidere desideret, siue vt amando possideat.

At quæ sunt artis & naturæ transeamus, vt quæ sunt gratiæ contemplemur. Vna vna est Cœna magna, de qua quod quæritur, verissimè dici potest; *maximum esse in minimo.* Da enim minimam, quæ dari potest, panis particulam, & in illa quod maximum dari possit, tibi offeretur, si accesseris animo rebus creatis vacuo; nam hoc vnum præsertim Cœnæ obstat magnæ, cum qui accedunt, humanarum rerum affectibus implicantur; Hoc vno vel maximè destruitur Cœnæ magnitudo. Non Cœna tollitur, sed magna Cœna; vel si Cœna semper in se est magna, certè non illis est, qui res humanas nimis stupent & magnificiunt.

Quamobrem vt illis animum facilius exuant, opportuna est Veritas qua monemur aliam, aliquo saltem modo, posse esse Cœnam; atque aliam, Cœnam magnam: & quos à Cœna res humane non auocant, hos à Cœna magna sæpe impediunt.

Ratio iam proximè manifestata est, quod sicut Cœnæ nomine Sacra intelligitur Communio, sic additamento *Cœna magna* designatur potissimum illa Communio quæ fieri potest plenior & fructuosior. Sunt enim aliis aliæ pleniores & perfectiores, vt mox explicabitur. Nec diffitemur etiam alias esse causas, quibus Cœna magna dici semper posset quæuis Communio; quia semper Ille est magnus qui hanc facit Cœnam; Semper illud est magnum quod in ea proponitur; Semper in toto quâ magnus &



vastus est, præstatur orbe! Semper in consequentibus sæculis ad extremam vsque temporum desitionem perdurabit, vnde ab Angelo dicitur *iuge sacrificium*. Sed præter hæc omnia singulariter Dan. 11. dicitur & reuera est Cœna magna propter magnos & ingentes fructus quos producit, quando est integra & plene fructuosa Communio, Id est, quando illa tota recipitur gratia quam Christus cuique destinatur, vt in se totus conuertatur: quia gratia quid maius dici potest? Cum enim potissima rerum denominatio desumatur à fine agentis vel ab effectu actionis designato; cumque is sit finis præcipuus quem prætendit, & is effectus singularis quem designat Christus, vt ad se accedentem cōuertat in seipsum, sicut Sabbato proxime præcedenti declaratum est; quis non videat hanc etiam singularem esse causam propter quam Cœna magna magno hoc & illustri nomine decoretur? Nonne sic magni dicuntur viri quī res magnas vel magna virtute præstiterunt, vel magna populo beneficia contulerunt? Nonne sic magna domus Dei dicitur à Propheta? *O Israel quàm magna est Domus Dei, & ingens locus possessionis eius*; quasi diceret quod princeps Apostolorum postea declarauit, *maxima & pretiosa promissa nobis ibi donantur*, non quia tantum magnus est spatio locus, sed præsertim quia tam magnum est quod in tali datur loco, vt quantumuis spatiosus & ingens sit locus, id tamen omnibus sufficiat, & nihil de sua perdat vnquam vel magnitudine vel pretio. Sic Beatissima Virgo Deipara, *Fecit in me magna qui potens est*. Quas scilicet voluit Luc. 1. gratias recepī totas & integras, vt digna Dei mater efficerer; maius est enim Dignā esse Dei matrem, quàm esse Dei matrem. Sic vniuersim cum dicitur, *Quam magna multitudo dulcedinis tue Domine, quam abscondisti timentibus te!* non tam dicitur magna multitudo propter numerum & varietatem dulcedinis, quàm propter ipsius dulcedinis magnitudinem: sed nec ipsa dulcedinis magnitudo tam mira est propter suam suauitatem, quàm propter affectum pietatis, aut veræ virtutis effectum inde profluentem: quid enim magnum esset in dulcedine, aut quid prodesset illa dulcedinis magnitudo, nisi magna inde proueniret pietas aut alia quauis virtus?

Sic planè de Cœna magna, sit quantumuis magnum quod sumitur; sit magnus, vbi sumitur, locus; sit magnum quo sumi potest tempus; Quid sumēti magna hæc sunt omnia, nisi fiat ipse,



*Matth. II.* qui sumit, magnus; magnus gratia, magnus merito, magnus sanctitate & gloria? Nam sunt illa sola quæ magna sunt, quia sunt illa sola quæ coram Deo magna sunt; sic sanctus Ioannes *inter natos mulierum dicitur maior*, Quia quod facit magnum, est Gratia seu Virtus infusa & acquisita, qua qui magis abundat, tam verè est maior, quàm verè sola est hæc magnitudo seu sola magnitudinis ratio, solum magnæ rei pondus & mensura.

*2. Cor. 4.* O quàm rectè Apostolus, *Mihi pro minimo est, ut a vobis iudicer aut ab humano die, sed neque meipsum iudico; qui autem iudicat me, Dominus est.* Quasi diceret, nihil verè est magnum, quàm quod tale Dominus iudicat, nihil autem tale iudicat, quàm quod conforme est suæ voluntati? vnde id tandem apertissimè sequitur quod sola, quam diximus plenam & perfectam Communionem, Coena est magna, quia sola illa est conformis ipsius iudicio & voluntati; sola illa est, quæ quam vult Christus conferre gratiam recipit, & ex qua recepta gratia noster corroboratur animus, ut se in cæteris rebus totum eidem Christi iudicio, diuinæque voluntati conformet.

## II. P V N C T V M.

**S**ED à tali Communionem res humanæ sæpe impediunt quos à Communionem non auocant.

Non res ipsæ quidem, ut sæpe ex S. Ioanne Chrysostomo dictum est, sed inordinati rerum affectus, qui cum lethales non sint, non ab omni prorsus Communionem arcant communicare volentes: neque ita etiam inordinati sunt, ut frequenter communicandi tollant voluntatem, aut omnem impediunt communionis fructum: Sed ne illa tota recipiatur gratia, quæ parata erat communicanti, si purior accessisset; & verò tales obstant affectus: quia cum per modum nutritionis sacra in nobis operetur Communionem, tantò magis aut minus operatur, quantò magis aut minus intererit aliquid medium inter humanam animam & Coelestem panem: sicut in ipsa nutritione corporali accidit, quando quæ dicuntur cacochyla, idest, prauis humores parum aut multum abundant in nutriendo corpore. Sunt autem illi affectus inordinati, velut infesti quidam humores, qui se animam inter & Christum interponunt, quo minus anima Christo nutria-



tur & saginetur. Vnde est illud D. Iacobi, *Dives in itineribus suis mar-  
cescet*, Id est, affectu diuitiarum aut alio quouis deprauatus, non  
nutrietur spiritali alimento licet illud accipiat. Quo sensu præ-  
clare S. Gregorius in illum versum Cantici Annæ matris Samue-  
lis: *Repleti prius pro panibus se locauerunt, & famelici saturati sunt.* 1. Reg. 2.  
NON saturantur, inquit, nisi famelici, qui à vitiis perfecte ieiun-  
nantes diuina Sacramenta percipiunt in plenitudine virtutis. Et quia  
sine peccato, electi etiam viri esse non possunt; quid restat, nisi vt à  
peccatis quibus eos humana fragilitas maculare non desinit, euacuare  
quotidie conentur? Nam qui quotidie non exhaurit quod delinquit, Et si  
minima sunt peccata que congerit, paulatim anima repletur atque ei  
merito auferunt fructum internæ saturitatis. Et post pauca. Qui ergo  
quotidie delinquimus, quotidie ad pœnitentiæ lamenta curramus: quia  
ipsa sola virtus est quæ euacuat quod in ventre animæ culpa coadunat.  
Et tunc verè famelici saturantur, quia quò studiosius mundamur la-  
mento pœnitentiæ, eò vberiore diuinæ gratiæ fructum recipimus in  
spiritali refectiōe. Sic S. Augustinus ad supra dicta Psalmi, Quam  
magna multitudo dulcedinis tuæ respondens quærenti vbi est ista  
multitudo dulcedinis: Quomodo, inquit, tibi ostendam multitudi-  
nem huius dulcedinis qui palatum de febre iniquitatis perdidisti.  
Mel si non nosses, quàm bene saperet, non clamares nisi gustasses. Pa-  
latum cordis non habes ad hæc bona gustanda, quid tibi faciam? Non  
est cui dicam, gustate & videte quoniam suavis est Dominus. Et in ps. 67.  
illum Psalmum, vbi dicuntur cœli distillare à facie Dei, &  
pluiuiam voluntariam segregaturum Deum hæreditati suæ, &  
hæc denique parata in dulcedine pauperi. Non abundanti, in-  
quit S. ille Doctor, sed pauperi Dominus hæc parauit, id est, vacuo  
mundanis affectibus & terrenis curis, quibus qui abundant, priuantur  
bonis quæ sunt parata in dulcedine & suauitate pauperi.

Adde quòd cum ex mera bonitate & munificentia maiores  
suas Deus profundat gratias, tantò in illos certè est profusior  
aut strictior qui ad Cœnam vocati accedunt, quantò hi libe-  
ralius aut strictius cum ipso agunt. Quid est autem magis aut  
minus cum Christo liberaliter agere, quàm de suo corde seu  
de prauis suis affectibus plura vel pauciora detrahere, quæ illi  
offerantur, vt tertiâ proxime feria dicitur fusiùs. Ex quibus  
planè intelligetur quod supra sanctus dixit Chrysostomus, Eos  
indignos esse Sacramentis qui minus dignè accederent, Id est indi-



gnos ea totali gratia quam recepissent si magis dignè accessissent.

Vide in 2. parte, Fer. 6. quartæ post Pascha Hebdomadæ, necnon quarti libri de Imitatione Christi capite 15. vbi hæc aptè de gratia quæ confertur in hoc Sacramento; *Tibi & peccatis tuis imputa, cum non datur, vel etiam occultè tollitur. Modicum quandoque est, quod gratiam impedit & abscondit, si tamen modicum & non potius grande dici debeat, quod tantum bonum prohibet. Et si hoc ipsum grande vel modicum amoueris & perfectè viceris, erit quod petisti.* Et post pauca. *Quisquis ergo se ab omni inordinato amore seu displicentia cuiuslibet rei create euacuauerit, aptissimus gratiæ percipiendæ ac dignus deuotionis munere erit. Dat enim Dominus ibi benedictionem suam, vbi vasa vacua inuenerit: & quanto perfectiùs infimis quis renuntiauerit, & magis sibi ipsi per contemptum sui moritur, tantò gratia celerius venit, copiosius intrat, & altius liberum cor eleuat.* Vel è contra certè, quanto quis etiam minùs terrenis renuntiauerit, tantò hunc magis terrena impediunt ab illa Communione integra & plenè fructuosa, quæ non plenum & totum fructum refert. O quid hîc magis mirer, an modicum illud quod impedit, an maximum illud quod impeditur!

### III. PUNCTVM.

*Tract. 17.  
in Ioan.*

*l. 7. Conf.  
c. 10.*

**S**IC igitur quos à Cœna res humane non auocant, hos à Cœna magna sæpe impediunt: Quia non est illis Cœna magna qui magnos illos fructus non referunt, quos referre potuissent, si rerum humanarum affectibus implicati non essent; aut certè tantò minùs ex hac parte magna est, quanto minùs ipsi magni sunt illa magnitudine animi quæ cuncta terrena despicit. Sicut enim de his Christi verbis, *Verba mea spiritus & vita sum*, ait sanctus Augustinus, *Intellexisti carnaliter? Etiam sic illa, spiritus & vita sunt, sed tibi non sunt:* Sic prorsus de Cœna magna dici debet; Accessisti animo inordinato? etiam sic illa est Cœna magna, sed non tibi. *Cibus sum grandium*, dicebat Dominus: At quomodo illi grandes & magni qui suis subiacent cupiditatibus? Non ita subiacent, dices, quin eas in multis premant, & ita reprimant, vt nollent his impediri à sacra mensa. In hoc certè laudandi, sed dicant cur nollent sic impediri? quia videlicet bonum illud,



bonam illam gratiam quæ Eucharistia dicitur, tanti ducunt & in praxi æstimant, vt nollent eam sibi deperire propter humana quadam terrena quæ inde auocant. Sana protectio ratio, sed inde arguuntur & suo ipsi ore iudicantur, quod non pergant ulterius in suis reprimendis concupiscentiis. Nam si eas ita domant, ne aliquo sacra mensæ fructu priuentur, cur non eo usque domant, vt nullo eius priuentur fructu? Si tanti faciunt modicam illam gratiam quam à Cœna recipiunt, vt, ne illa excidant, nollent non communicare frequenter, & nollent eos fouere affectus quibus ab illa frequenti Communionem retardarentur, cur non tanti faciunt maiorem illam gratiam, quæ à Cœna magna recipitur, vt, ne illa priuentur, aequè nolint eos affectus quibus impeditur?

Quando vel vnus esset gratiæ & Cœlestis gloriæ gradus, de cuius ageretur possessione vel iactura, an tu putas tam mediocre bonum esse, vt reclusas nescio quas terrenas & humanas quibus afficeris non iudices esse abiiciendas, ne te illo defraudes bono? Videsne qui diuitiis aut honoribus cumulandis inhiant, adeo non negligere quod se offert ditius & gloriosius, vt quidquid etiam se ad cupiditatis cumulum offerat, cupidiores semper existant, & plura magis desiderant. Tu verò cum commodè possis bene iuuante & inuitante Christo, plures ac plures in vna Communionem tibi donorum Cœlestium cumulare thesauros, an contemnes diuitias tantæ bonitatis? Si verò non aliter comparentur quam puritate animi, seu quam cauendo ne animus nimis implicetur rebus humanis, nonne ista cautela est adhibenda? Nonne quantum impediri nolles humanis rebus à Communionem, tantum cauere debes ne iis impediaris ab integra & plenè fructuosa, quæ tantum sæpe continet boni præ aliâ, quantum qui communicat, recipit gratiæ, quæ se priuat, qui non communicat? Vnde id mirum sequitur, quod si pro illa solum gratia, quæ communicanti datur, non dubites sæpe accedere ad Communionem; neque te vlla res, nullum negotium inde auertat; cur non pro illa maiori gratia perinde laborabis? cur non auertes aut cauebis quidquid illam impediat? cur non illud Sapientis diligentius obseruabis: *Non defrauderis à die bono, & particula boni* *Eccles 14.*  
*doni non te pretereat?*

Certè ad id inuitaris à Christo sicut ad ipsam Communionem:



*can. 5.**In 1. p. Sab-  
bat. infra**Hebd. 3. post**Epiph.*

*Comedite, inquit, amici & bibite, & inebriamini charissimi. Vide differentiam moderati potus & inebriationis, sicut iam ante videndam proposuimus. Amici bibunt, & charissimi inebriantur. Sicut enim plus est esse charissimum, quàm amicum, ita longè plus est in Communione inebriari & repleri diuinis gratiis, quàm solum bibere. Illi sunt amici qui sunt in statu gratiæ, qui sunt extra peccatum lethale; sed tamen nondum suis purgati affectibus, sicut charissimi. O quis nollit si posset ex his esse charissimis, quando hoc vnum esset sic esse Christo proximum! Tu id anime non vis, quamdiu quid ita charum habes vt illud inordinatè diligas! Nihil tibi charius Christo sit, & eris Christo charissimus. Caue tamen ne in alterutrum horum incidas extremorum, vel quo desperes te vnguam satis perfectè cupiditates repressurum: vel quo præsumas te id acturum meliùs, si abstinueris frequentiori Communionis vsu. Quod vtrumque quàm sit periculosum. Vide in 4. parte, Dominica decima nona, vbi de nuptiis regiis, quæ vitandæ non sunt, ne forsan sine veste nuptiali deprehendaris, sed potius quærenda vestis ne tales vitentur nuptiæ. Id est, Sacramenta non est deserenda propter prauos affectus, sed ipsi potius prauis affectus sunt deserendi propter Sacramentam. De his porrò prauis affectibus plura passim ex Indice. Non pauca etiam ex præcedenti vel sequenti Hebdomada, possent in hanc referri Dominicam, ac præcipuè videnda est Feria quarta de persecutionibus Domini.*



## FERIA SECVNDA.

### DE SINGVLARIBVS VIRTVTVM

EXEMPLIS, A CHRISTO DOMINO,

QVONDAM DATIS; ET IN

SANCTISSIMO SACRAMENTO

EXHIBITIS.

*Quàm dilecta tabernacula tua, Domine virtutum!*

*Altaria*



*Ad Sacramentum unde virtutes exeunt reuertuntur, &c. 105*

*Altaria tua, Domine virtutum; Rex meus, &  
Deus meus. Ps. 83.*

*Exemplum dedi vobis, ut quemadmodum ego feci,  
ita & vos faciatis. Ioan. 13.*

## VERITAS PRACTICA.

*Ad Sacramentum vnde virtutes exeunt, reuertuntur;  
ut iterum fluant.*

*SENSVS EST, Quod si virtutum quae à sanctissimo Sa-  
cramento profluunt, perennem & continuum velis haurire  
influxum, oportet quod ipsas virtutes in cultum & venera-  
tionem ipsius sanctissimi Sacramenti refundas: cessabit alio-  
quin & arescet influxus.*

*RATIO EST, Quia ex fidei vel infidei usu gratiarum  
dependet earum influxus & continuatio.*

*Sed fidelis aut infidelis usus virtutum seu gratiarum inde agnos-  
cetur si acceptas à Sacramento virtutes in ipsius cultum im-  
penderis.*

*Ergo ad Sacramentum unde virtutes exeunt reuertuntur, ut  
iterum fluant, aut nisi reuertantur, non iterum fluent.*

## I. PUNCTVM.

**S**ANCTISSIMA Domini Iesu vita, siue quam olim  
in terris gessit, siue quam modò in altari viuít, prope  
similis est vesti poderis quam habebat Sacerdos Mosai-  
cus in qua totus erat orbis terrarum, & parentum magnalia in qua-  
tuor ordinibus lapidum erant sculpta. Sic Dominus sibi totum quo-  
dammodo terrarum orbem imposuerat seu potius vniuersos ho-  
mines cuiuscumque essent vacationis & status, quos generatim  
& particulatim suo viuendi modo instrueret & efformaret ad

*Exodi 28.*

*Sap. 18.*



Num. 27.

omnem virtutum praxim. Hic nempe est de quo Moyses: *Provideat Dominus Deum spirituum omnis carnis, Hominem qui sit super multitudinem hanc: & possit exire & intrare ante eos, & educere eos vel introducere ne sit populus Domini sicut oves absque pastore.*

Luc. 10.

Ioan. 12. &amp;

I.

Iam quidem supra de Euangelica eius Doctrina summatim dictum est: sed hic distinctius de singulis eius virtutibus aut singularibus actionum exemplis Cōsideratio proponitur, ut quid cuique sit in particulari proprium & singulare dum quisque viderit, suos in usus depromat, quasi à Christo Domino illud audiret, *Hoc fac, & vives. Si quis mihi ministrat, me sequatur. Exemplum dedi vobis ut quemadmodum ego feci, ita & vos faciatis.*

Ioan. 8.

Luc. 23.

Contemplare itaque quàm vera, quàm luculenta, quàm perfecta essent virtutum exempla omnium, quæ dum viueret Christus, edidit. Qualis paupertas, patientia, mansuetudo, humilitas, obedientia, solitudo, charitas, deuotio, benignitas & temperantia; qualis denique tota eius vita qui suis inimicis quantumcumque inuidis & maleuolis facultatem sui arguendi dedit; *Quis ex vobis arguet me de peccato? VERE hic homo iustus erat.*

Hebr. 13.

Deinde verò, etiam atque etiam considera quàm miro illas ipsas virtutes modo nunc exhibet in salutari Hostia! qualis humilitas, mansuetudo, paupertas, beneficentia! Qualis deuotio seu religio quæ suum colit Patrem, dum se illi in perpetuum offert sacrificium! qualis patientia & Charitas sic se communicando palàm vniuersis & quibuscumque ad se accedentibus! qualis obedientia & regularis quædam disciplina dum certis quibusdam regulis & legibus quas ipse constituit ita vult se alligatum & constrictum, ut nunquam secum dispenset! Nunquam nisi statuta in materia consecratur & forma; nunquam inde absit, nunquam ibi desit, nunquam aliud in seipso statuatur quam prout illæ ferunt leges! O vere virtutum Dominum! ô vere Christum heri & hodie, & ipsum in sæcula, sui semper similem, semper eundem, semper iustum & sanctum!

Ecc. 1.

Et uero, quod hic præcipue perpendendum; tanta est harum virtutum Communicatio inter Christum & animam, ut quod dixit Ecclesiastes de fluuiis: *Ad locum unde exeunt, reuertuntur, ut iterum fluant*, hoc vere dici possit, de virtutibus, quæ à Sacramento profluunt: *Ad illud ipsum unde virtutes exeunt, refunduntur à Fidei anima, ut iterum inde ad ipsam fluant animam; sitque*



velut perennis & continuus inter ipsos virtutum influxus, & quotidiana reciprocatio : aut certe si desit anima quas haurit virtutes refundere in ipsum fontem, fons exarescat.

Ratio est vulgaris in hoc communi fundata dicto : *Quod cum* ps. 17.  
*bono bonus est Dominus, cum sancto Sanctus, cum innocente innocens,*  
*cum electo electus, & cum peruerso etiam peruertetur ;* Id est prout  
se fidelem aut infidelem quisque ostenderit in vsu gratiarum &  
virtutum infusarum actibus, talem se omnino præbebit Domi-  
nus in illis ipsis quotidie vel augendis vel minuendis. Hoc est sci-  
licet peruertere Dominum quando contra morem sibi proprium  
qui totus in conferendis gratiis est positus, inuertitur quodam-  
modo, vel denegando gratias, vel infligendo poenas : Quod in  
Leuitico pridem denuntiaturum fuerat : *Si ambulaueritis contra me,* Leuit. 26.  
*& ego incedam aduersus vos furore contrario.* Et Christus Dominus Luc. 19.  
in Euangelio : *Omni habenti dabitur & abundabit : ab eo autem qui* ibid. 8.  
*non habet, & quod habet auferetur ab eo.* ECCE venio cito, tene quod Matth. 13.  
*habes, ut nemo accipiat coronam tuam.* Sed nunquam tutius tenetur & 25.  
quod habetur, quam quando benè impenditur. Quotidiano vsu Marci. 4.  
terrena deficiunt ; at spiritalia & Diuina magis eo proficiunt. Apo. 3.

## II. P V N C T V M.

**S**ED fidelis aut infidelis vsus gratiarum & virtutum acceptarum  
ex sanctissimo Sacramento inde agnoscitur, prout illas ipsas virtutes  
in cultum & venerationem eiusdem Sacramenti rependetur.

Nam cum fidelitas maxime in opportunitate agendi dignos-  
catur, sitque vel maxime opportuna virtutum omnium aut certe  
plurimarum nobilium praxis in præsentia sanctissimi Sacramen-  
ti : profecto sicut se fidelem ostendet qui opportunitate vsus, illas  
virtutes exercebit, sic infidelis & peruersus iudicabitur qui hac  
neglecta bene agendi occasione, virtutis exercitium negliget,  
aut aliò transferet. *Hypocrita ! faciem cæli & terræ nostis probare, hoc* Luc. 12.  
*autem tempus quomodo non probatis ? quid autem & à vobis ipsis non in-*  
*dicatis quod iustum est.* Id est, Quare à vobis ipsis non discitis  
tempus exercendi virtutes ; vel quare suo tempore non eas exer-  
cetes, cum alia omnia tempore opportuno faciatis ? *Milvus in 1er. 8.*  
*cælo cognouit tempus suum : turtur, & hirundo, & Ciconia custodierunt*  
*tempus aduentus sui, populus autem meus non cognouit iudicium Domini !*



Quam verò sit opportuna & facilis plurimarum virtutum occasio, vel dum comunicas, vel dum Missam audis, vel dum quocumque sis in Ecclesia tempore coram sanctissimo Sacramento, quis non videt? Primò enim obiectum circa quod exerceri possunt est valde dignum. Deinde præsens est gratia, paratus quodammodo animus, corpus ipsum dispositum, & totum ad venerationem Christi compositum. Tertiò illa ipsæ virtutes quæ à nobis exerceantur patent in exemplari suo, præit nobis Christus in illis obeundis. *Inspice & fac secundum exemplar quod tibi monstratur*; Humilia te sicut se humiliat: religiosum exhibe Deo cultum & sacrificium, sicut ipse Patri exhibet; patere si quid est patiendum sicut ipse tuos patitur defectus. Charitatem in ipsum exerce & proximum, sicut ipse in te exercet. Sic in aliis perge virtutibus, quæ sicut à Christo profluunt, ita in ipsum refundi possunt.

Exod. 25.

Iean. 2.

Ps. 47.

Quarto denique si nullum est magis opportunum virtutis exercendæ tempus quam cum alioquin vitij oppositi periculum imminet; Nonne tunc multa & grauiâ committi possent vitia, nisi contrà per virtutem inuigilares? Nonne tepiditas? nonne languor animi? nonne irreligio, nonne curiositas? nonne sexcenta similia quæ in templis peccantur, tibi vides imminere, nisi prospicias? *Auferre ista hinc, & nolite facere domum patris mei domum negotiationis!* At quomodo auferes ista auferenda nisi virtute, nisi pietate, nisi humilitate, nisi patientiâ, nisi omni ea contentione animi quæ necessaria est ad puritatem mentis qua coli debet Deus? *Ponite corda vestra in virtute eius.*

## III. P V N C T V M.

Luc. 6.

Serm. 52.  
in Cant.

**A**D Sacramentum igitur unde virtutes exeunt, reuertuntur, ut iterum fluant. Neque enim dubitari potest de fidelitate Domini quin mensuram reddat *confertam & coagitatam & superefluentem*, ut ipse loquitur; sed timeri etiam debet de nostra infidelitate & ingratitude quod scripsit sanctus Bernardus: *Ingratitudo inimica est anima, exinanitio meritorum, virtutum dispersio, beneficiorum perditio, ventus vrens, sicans sibi fontem pietatis, rorem misericordie, fluentia gratie.* Tum vero maxime appareret ingratitude & infidelitas si virtutes infusæ non refunderentur in



fontem suum quia tūm maximē commoda virtutis exercendæ occurrit occasio, quæ fidelitatis & gratitudinis probatio iure merito dicitur. *Duc eos ad aquas, & ibi probabo eos.* DATIO Dēi <sup>Iud. 7.</sup> permanet iustis: ait Sapiens, & profectus illius successus habebit in <sup>Eccles. 11.</sup> æternum.

Atque ex his intelliges quod dicebat Dominus: *qui non colligit* <sup>Luc. 11.</sup> *meum, dispergit*; qui videlicet non colligit cum Christo quas ipse virtutes communicat, ipsas dispergit, dissipat, perdit, & in vitia se opposita projicit; quod certe satis diligenter cauere non potest. Quamobrem quando etiam nulla nostri ratio haberetur, certum atque indubitatum est quod virtutis practicæ quæ à Sacramento profluit prima praxis debetur ipsi sanctissimo Sacramento; quia prima est virtutis exercendæ & gratitudinis exhibenda commoditas, quæ si differtur aliò, dilatione perit. *Ne dicas amico, vade & reuertere, cras dabo tibi, cum statim possis dare.* <sup>Prov. 3.</sup>



## FERIA TERTIA.

### DE BENEFICIIS QUÆ OLIM MUNDO CHRISTVS DOMINVS: ET QUÆ MODO CONFERT IN SANCTISSIMO SACRAMENTO.

*Omnes male habentes curauit, ut adimpleretur quod dictum est per Isaiam Prophetam dicentem: ipse infirmitates nostras accepit, & agrotationes nostras portauit.* Matth. 8. 16. 53.

*Qui pertransiit benefaciendo, & sanando omnes oppressos à diabolo.* Act. 10.



VERITAS PRACTICA.

Si quando pretiosa quæque pro cibo corporis danda sunt; semper pro cibo animæ sunt donanda.

RATIO EST, Quia ideirco pretiosa quæque pro cibo corporis aliquando danda sunt, quod Vita corporis quæ sine illo cibo periret, sit pretiosior illis pretiosis quæ dantur.

Sed animæ vita quæ periret etiam sine Sacro cibo, est pretiosior illis pretiosis dandis pro ea.

Ergo si quando pretiosa quæque pro cibo corporis danda sunt: semper pro cibo animæ sunt donanda. Quod tamen vix unquam facis.

ALIA VERITAS INDE SEQVENS.

Ne forteingas te nihil habere pretiosum quod Christo dones, da quod est in te vilius, & Christo dabis quod est ipsi pretiosius.

RATIO EST, Quia nihil est in te vilius quàm concupiscentia quæ est radix malorum omnium.

Sed Christo nihil est pretiosius quàm donum ipsius concupiscentiæ, quo illam potes modo dare.

Ergo si Christo dederis quod est in te vilius, dabis illi quod reputat pretiosius; ac proinde iam nihil est quod excuses, nisi hoc dederis; multa vero sunt quæ te alioquin accusant.

I. P V N C T V M.



VOT quantisque beneficiis corporalibus & spiritualibus vniuersos Christus obstringeret qui ad se ventitabant, satis patet ex Euangelio, & sic breuiter sanctus Augustinus perstringit; Pertulit omnes infirmos eorum, Curauit omnes languis-



*Si quando pretiosa quæque pro cibo corporis danda sunt, &c. III*

dos eorum, predicavit regnum celorum, non tacuit vitia eorum ut ipsa potius eis displicerent, non medicus à quo sanabantur.

Quàm vero paribus animi bonis, præter iam dicta de virtutibus, nos omnes Dominus in suo sanctissimo Sacramento prosequatur & cumulet, sic paucis sanctus Bernardus: *Duo illud Sacramentum operatur in nobis, ut videlicet & sensum minuat in minimis, & in grauioribus peccatis tollat omnino consensum. Si quis vestrum non tam saepe modo acerbos sentit iracundie motus, inuidie, luxuria, aut caterorum huiusmodi, gratias agat Corpori & Sanguini Domini, quoniam virtus Sacramenti operatur in eo, & gaudeat quod pessimum vlcus accedat ad sanitatem.* Sic alij passim sancti Patres, ex quibus sanctus Ioannes Chrysostomus ait omnia dicenda comprehendere voce *Benedictionis* qua diuus Paulus vtitur vocando *Calicem benedictionis*, & voce *Eucharistie*, Quæ iam communis est Sacramenti nuncupatio, Cum inquit *Benedictionem dico, Eucharistiam dico; Et dicendo Eucharistiam, omnem benignitatis thesaurum aperio.* Serm. de Cæna Domini.

Non est autem ea vis solum huius vocis Eucharistiæ, ut significet bonam & copiosam gratiam quæ in hoc Sacramento recipitur, sed & gratiarum actionem quæ per illud Sacramentum pro beneficiis aliis redditur, vel quæ reddenda est à nobis pro tam singulari dono quod alia propè innumera comprehendit. *Quid retribuam Domino pro omnibus quæ retribuit mihi?* Certe id merito esset inquirendum, nihilque adeo pretiosum in te esse debet quod non libenter impendas siue in agnitionem tanti accepti beneficii, siue ad necessarium vsum tanti Sacramenti. ps. 115.

Hinc orta duplex Veritas quæ modo attentius expendatur; Prima est quòd *si quando pretiosa quæque pro cibo corporis danda sunt, semper pro cibo animæ omnia sunt donanda.* Quid est enim quod pro cibo corporis pretiosa quæque danda sunt nisi quia pretiosis illis pretiosior est vita corporis quæ sine cibo periret? Sic expressè Ieremias suis in Lamentationibus; *Omnis populus gemit & querens panem, dederunt pretiosa quæque pro cibo ad refocillandam animam.* Sic Ægyptij & Cananæi dum illa septēni fame quæ Iosephus prædixerat vrgerentur, sua quæque pretiosa pro cibo tradunt; *Primo quidem pecuniam, deinde pecora, tum terram omnem ac seipsos in seruitutem, ut quod superest pretiosius, nempe vita, restare possit.* *Non est enim census super censum salutis corporis,* in Thren. 2. Gen. 47. Eccl. 38.



quit Sapiens. Nonne sic vitam præfers cæteris omnibus? Nonne & interdum ipsi salutem animæ?

## I I. P V N C T V M.

**S**ED animæ vita quæ periret etiam sine sacro cibo, pretiosior est illis omnibus pretiosis quæ danda sunt pro illo cibo.

Tria complectitur hæc propositio. Primum est quod sanctissimum Sacramentum sit cibus animæ seu vitæ spiritualis nutritio & conseruatio. Secundum quod iste cibus sit tali vitæ necessarius. Tertium denique quod hæc spiritualis vita sit pretiosior cunctis dandis pretiosis.

*Ioan. 6.*

De primo nulla est difficultas, dicente Domino: *Caro mea verè est Cibus.*

*Ibid.*

De secundo, nullus etiam dubitet quo saltem sensu dicitur necessarium esse hoc Sacramentum ad salutem ex necessitate præcepti: *Nisi manducaueritis carnem Filij hominis non habebitis vitam in vobis.* Sed præterea dici potest cibus necessarius ad vitam spiritualem sustentandam, quatenus sine tali cibo vita deficeret

*sess. 13. c. 2.*

& tandem periret, vt diserte sanctus Cyprianus, *Mens deficit quem recepta Eucharistia non erigit & accendit*; Sicque vniuersum Concilium Tridentinum, postquam dixit voluisse Dominum sumi hoc Sacramentum tanquam spiritualem animarum cibum, addit, *quo alantur & confortentur viuentes vita illius qui dixit: qui manducat me, & ipse viuet propter me.* Tum vero, quod est etiam expressius subdit: *& tanquam antidotum quo liberemur à culpis quotidianis, & à peccatis mortalibus præseruemur.* Quod & postea repetens & confirmans, inde ad frequentiam Sacramenti fideles omnes adhortatur; *Panem, inquit, illum supersubstantialem frequenter suscipere possint, & is verè eis sit anima vita, & perpetua sanitas mentis, cuius vigore confortati ex huius misera peregrinationis itinere ad cælestem patriam peruenire valeant.*

*Cap. 8.*

*Prov. 3.*

*Ibid. 8.*

De tertio denique, quod hæc vita spiritualis & æterna sit pretiosior cunctis dandis pretiosis, quis ambigat, cum modicus gratiæ gradus sit omni omnium hominum vita pretiosior? Certe de Sapientia quæ pars est seu participatio quædam huius vitæ spiritualis sic aperte Scriptura: *Pretiosior est cunctis opibus, & omnia quæ desiderantur, huic non valent comparari.* Et rursum: *Melior*



*Si quando pretiosa quæque pro cibo corporis danda sunt, &c.* 113

*lior est sapientia cunctis pretiosissimis: Et omne desiderabile ei non potest comparari: Quo sensu affirmabat Apostolus: Non facio animam meam pretiosorem quam me.* Id est, vitam præsentem & quidquid ad vitam spectat, quidquid ad corporis & animæ dotes pertineat, quæcumque sit scientia, sapientia, peritia, & quidquid tale est apud homines in magno pretio, ego non sic pretiosum duco quin me, hoc est salutem meam, vitam meam spiritualem & æternam longè ducam pretiosorem. Itanè sentis? Itanè loqueris?

### III. P V N C T V M.

**S***I quando igitur pretiosa quæque pro cibo corporis danda sunt, semper pro cibo animæ sunt donanda: Quia si non dantur pretiosa pro cibo corporis nisi quod cibus est necessarius vitæ, & vita est magis præstans & necessaria quam illa pretiosa danda; Nonne hic etiam facer Cibus est necessarius animæ? Et nonne animæ vita magis est præstans & necessaria quàm quidquid pro illa dederis? Quam dabit homo commutationem pro anima sua?*

Dices forte, sacrum cibum, non semper esse necessarium quoties sumitur, ac proinde non semper danda pro illo pretiosa quæque sicut darentur pro cibo necessario vitæ corporalis. Responderi primò posset, sæpe esse necessarium quando non putatur: deinde verò, quando dicitur semper danda pretiosa pro cibo sacro, non intelligitur quidem cibus ille semper esse necessarius quoties sumitur; sed tamen supposito quod sumatur, verè dicitur, tum semper donanda pretiosa, quia nisi dentur non sumetur fructuosè, non æque saltem utiliter ac si data fuissent; peribit inde aliquid de gratia & de vita spiritali quod est pretiosius eo quovis pretioso quod dare debuisses. Quid est enim illud pretiosum quod esset dandum? Non pecunia, non terrena bona, non vita corporis; sed affectus quidam inordinati, ut iam supra dictum est, & dicetur inferius. At quanti sunt illi affectus pretij, si comparentur cum Gratia quæ propterea perit quod non dentur illi affectus?

Sed esto illud quod vis, demus ultro quod vrges; Concedamus non esse necessario danda pretiosa quæque pro cibo animæ nisi quando cibus ille est necessarius, & quando aliter rite sumi non potest nisi datis illis pretiosis: Putasne vero te in illa neces-



fitate daturum ea quæ debes, nisi semper ea dones? Putasne te in Paschali Communione quæ est ex præcepto necessaria, tuis te affectibus quantum decet, exuendum, nisi assueueris illos deponere; quoties communicas? Non sic, non sic inueterata deponuntur quando nimis inueterascunt. *Quod semel volueris rectè facere, sepe tentandum est, ut semel aliquando rectè facias.* Quod putas tibi aliquando præstandum ut fructuose communices, semper illud præsta quoties communicas; vix alioquin poteris, quando voles, nisi semper velis quando potes. *Ideo inter vos, ait Apostolus, multi infirmi & imbecilles, & dormiunt multi.* Id est deficiunt in dies, defectu probatæ communionis. *Conemur quantum possumus, adhuc leniter deficiemus in multis.* Et certe mirum est nos esse tam parcos & tenaces ubi Christus tam largus & profusus est! Mirum nos negare Christo quod à nobis petit, cum ipse sua quæque semper pretiosa donet, & quæ à nobis petit viliora in se sint, & in nobis deteriora: neque fiant vnquam pretiosa nisi quando ei dantur!

HÆC est altera Veritas quæ sic facile demonstratur. Nihil est in se aut in nobis vilius & deterius quam praua illa Cupiditas quæ ab Apostolo *radix omnium malorum* dicitur; & quam Petrus Reuennas sic describit; *Transgressionis mater, magistra nocendi, primipilaria iniquitatis, auriga malitiæ, sicaria virtutum, seditionis origo, fovea scandalorum.* Atqui hoc est, quod à nobis magis petit, hoc est quod pretiosius donū ducit, hoc est quod remunerat copiosius, *Prebe, fili mi, cor tuum mihi;* Id est, ut alibi explicatur, *Post concupiscentias tuas non eas, & à voluntate tua auertere;* Nihil est enim aliud concupiscentia, quàm cordis, seu appetitus naturalis qui in corde residet, praua inclinatio: & nihil est aliud cor suum præbere Deo, quam talem coercere inclinationem propter Deum: *Ne sequaris in fortitudine tua concupiscentiam cordis tui.*

Nonne ergo quod vilius in te est, Christus sibi ducit pretiosius: cum id vnum præcipue à te petat? Et nonne impium est, & barbarum, id illi denegare?

Spektata sunt aliquando vel audita quædam prodigia tenacitatis, ingratitudinis & avaritiæ; sed nullum vnquam vesanius, nullum horribilius, quàm si cum praua cupiditate communices aut ad Sacram accedas mensam. Propone tibi Nabalem illum de quo est satis longus sermo in primo Regum: Vel finge tibi

1. Cor. 11.

1. de Imit.  
Chr. c. 19.

1. Tim. 6.

Pron 23.  
Ecclesi. 18.

Ibid. 5.

1. Reg. 25.



duos homines quorum vnus alium sibi omni beneficiorum genere deuinctum & obstrictum habeat, ac tum forte hospitij causa in huius aedes diuertat; aedes sint satis laxae, satis patentes, satis commodae & honestae; nihilque ibi desit quod à quouis iure desiderari possit ad hospitalitatis gratiam. At vero Debitor qui & simul est hospes, Creditorem seu Benefactorem suum eximium nolit apud se recipere; aut si admittit, intrudat in vile aliquod tuguriolum nec aliis mensam instruat cibus quàm vilioribus, & ijs quidem paucis & parcis admodum: Rogetur ab illo suo Benefactore & Largitore quondam munifico, nunc vt vicem rependat, nunc vt concedat & largiatur aliquid de superfluis, inutilibus, & perituris quos habet cibus, & quos duplo compensabit. Recuset verò constanter hospes neque alia de causa recuset nisi quod nimis afficitur rebus illis suis, non satis fudit homini, mauult sua sibi perire quam illi deseruire. Quid censeret de illo homine? Num tibi parcus ille & tenax & sordidus videretur?

Talis autem tu ipse es si cum praua cupiditate communicas. Recipis domi tuae Benefactorem tuum munificentissimum, qui vt praedixit Propheta, *Quasi colonus futurus est in terra, & quasi* 1er. 14. *viator declinans ad manendum*: Cui cum posses stratum & omnia satis magnificè si velles exhibere, negas illi hanc hospitalitatis gratiam: cumque ab illo rogeris vt ipsi saltem concedas quod habes domi tuae vilius & deterius, hoc etiam peruicaciter negas: neque ob aliud recusas quàm quod, licet reuera sit vilius, tamen illud inordinate diligas. O prauitatem cordis humani, quae nos sic tenaces facit & sordidos! Quàm verè dictum est à Moysè: *Pec-* Dent. 32. *cauerunt ei in sordibus! Generatio praua atque peruersa! Haecine reddis Domino? Haecine redderes homini? Aut si haec ita redderes, nonne apud quosquis etiam barbaros & agrestes, habereris inhumanus, ingratus, sordidus? Cur non ita porro censearis, si circa Christum te ita geras? An quia res non ita sentitur? non ita Christus cernitur? non ita res salutis aestimantur? Sed vbi fides tua? vbi religio? An fortè non satis amplè de te Christus est meritis? An forte quod à te petit, est nimium & plusquam debeas aut possis dare? An quod re illa indigeas quam à te exigit? Vtere sane & serua eam tibi. Tua non quarit, sed te ipsum. Non eges affectu rei inordinato, sed potius nocua illa sunt & inutilia deside-* 1. Tim. 6. *ria quae mergunt homines in interitum & perditionem: atque idcirco*



tantum ne ijs demergaris & pereas, hæc à te petit. Neque verò ita gratis petit vt non rependat cumulati quod dederis: licet iam te suis præuenerit beneficiis, tamen ita etiam donum tuum prosequetur, vt tanquam nouum sibi collatum beneficium noua remuneret gratia. Idcirco displicet illi cor impurum, quia cum minus vacuum est creaturis, minus est capax gratiis & beneficiis recipiendis. O Iesu munificentissime, tuis hoc adde munus muneribus, vt quod à me velis Tu Ipse sumas, nec quantumuis sim liber, libere possim denegare quod petis. Fili, hoc ipsum mihi negas quod peto, si enim tibi est liberum mihi denegare, quod quaritur, vt simul etiam tibi sit liberum cum mea gratia mihi concedere, neque est aliud quod magis à te peto, quam quod sic libere potes cum mea gratia.



## FERIA QVARTA.

DE PERSECUTIONIBVS DOMINI,  
DVM VIVERET, QVAS ITERVM  
SVFFERT IN SANCTISSIMO  
SACRAMENTO.

*Ecce positus est hic in signum cui contradicetur. Luc 2.  
Parasti in conspectu meo mensam aduersus eos qui  
tribulant me. Ps. 22.*

### VERITAS PRACTICA.

Sicut tolerandis iniuriis mensa nobis parata est: sic tolerata Iniuriæ nos parant ad illam mensam.

RATIO quoad postremam partem, quæ sola potest habere difficultatem, hæc est inter alias, quod tunc cum gratia vel ma-



Sicut tolerandis iniuriis nobis mensa parata est, &c. 117

ximè paramur ad Sacram mensam, quando humanis affectibus purgati sumus.

Sed tolerata iniuria nos purgant humanis affectibus.

Ergo nos parant ad illam mensam, cui fructuosius frequentanda, magis ac magis semper parandi sumus.

## I. PUNCTVM.

**D**E his tantum persecutionibus hic agitur quas Christus sustulit ante mortem & passionem suam, dum inter Iudæos versaretur. Triplex autem hominum genus potest considerari molestum illi & graue olim fuisse. Primum eorum qui aperte palam eius doctrinæ & miraculis contradiciebant, vt Pharizæi, Scribæ & alij. Secundum, qui non quidem aperte contradicebant sed tamen non credebant. Tertium denique qui credebant quidem sed imperfectè admodum, & fidei suos mores non conformabant. *O generatio incredula, inquiebat, quandiu apud vos ero? quandiu vos patiar?* Marci. 9.

Sic plane modo à triplici hominum genere in sanctissimo Sacramento diuexatur; Sunt enim hæretici qui aperte contradicunt, & blasphemant contra Veritatem Catholicam. Sunt indifferentes & dubij qui vix credunt aut vix profitentur quod credunt. Sunt alij denique qui frequentant quidem Sacramentum sed parùm inde proficiunt, quod pluris Mundum faciant. *Dilexerunt enim gloriam hominum magis quam gloriam Dei.* 1. Ioan. 12. Nonne tu ex illis es? Certe si times Ignominiam aut alias persecutiones quas qui piè volunt viuere in Christo Iesu patiuntur, verendum tibi est ne ex illis sis qui vel Sacramentum non frequentant crebrius vel ex frequentatione non referunt quem possent fructum. Ad hoc enim potissimum vis & virtus Sacramenti confertur, vt roboretur animus contra quoslibet pietatis hostes & spiritualis profectus aduersarios. Vnde illud est Psalmi notissimum; *Parasti in conspectu meo mensam aduersus eos qui tribulant me.* Ps. 22. Nec minus olim vulgare ac vsitatum vt qui se pararent ad Martyrium, Sacra se communione munirent vt fortiores in agone persisterent. *Quos tutos contra aduersarium volumus,* inquit sanctus Cyprianus, *munito dominica saturitatis armamus.* Epist. 54. Neque minus verum est de



Ps. 101.

coelesti pane quam de terrestri, quod ait Dauid: *Percussus sum ut farinum & aruit cor meum quia oblitus sum comedere panem meum.*

Quamobrem si frequentas Sacramentum, quid times ab hominibus, tali confortatus praesidio? aut si forte nimis opprimeris, accede frequentius ut magis roboreris; nam & ista oppressio quam pateris, paratiorem te reddet & magis idoneum ad Sacramenti susceptionem. *Sicut enim tolerandis iniuriis mensa nobis parata est, ut vidisti: Sic tolerata iniuria nos parant ad illam mensam.* Quod quia minus forte est evidens, idcirco paulo fusius est declarandum: Sic autem apertè declaratur.

Exodi. 16.

1. Reg. 21.

3. Reg. 19.

Matth. 14.

Luc. 14.

Matth. 22.

1. Cor. 5.

Quantò magis purgamur terrenis & humanis affectibus, tantò paratiores seu aptiores cum diuina gratia reddimur ad participandam diuinam mensam, cuius figuræ tam veteris quam noui Testamenti nihil manifestius adumbrabant quàm plenam & perfectam hanc animi purgationem. Coeleste Manna non decideret nisi deficiente farina Ægyptiaca. Panes propositionis non nisi mundis & puris concedebantur. Panis subcinericius non est allatus ab angelo nisi Prophetæ omni humana ope destituto. Non sunt multiplicati panes nisi his qui sua omnia deseruerant: Neque ad coenam magnam vocantur nisi qui se suis expedirent impedimentis; Nec denique nuptiali conuiuio potuit interesse nisi qui veste nuptiali esset indutus. Quæ omnia quid aliud innuebant quam quod apertè clamat Apostolus: *Nescitis quia modicum fermentum totam massam corrumpit? Expurgate vetus fermentum ut sitis noua conspersio, sicut æstis azimi.* Etenim Pascha nostrum immolatus est Christus. Itaque epulemur non in fermento veteri, neque in fermento malitiæ, & nequitia: sed in azymis sinceritatis & veritatis. Nonne id æquum iudicas?

## II. PUNCTVM.

**S**ED tolerata iniuria nos valde purgant humanis affectibus.

Ecclesi. 22.

Primò quidem quod nos humilient, & quod humiliatione patienter tolerata sic animus ceteris exuitur & purgatur affectibus, sicut aurum in fornace, vnde est illud Ecclesiastici: *In humilitate tua patientiam habe, quoniam in igne probatur aurum & argentum: homines vero receptibiles in camino humiliationis.*

Deinde vero purgant, quod ex illatis iniuriis amarescat mun-



us, atque ipso sensu percipiatur quod dixit Ecclesiastes: *Vanitas* Ecclesi. 1.  
*vanitatum, & omnia vanitas. Vidi cuncta quæ sunt sub sole, & ecce*  
*uniuersa vanitas, & afflictio spiritus:* Vnde fit illa purgatio animi  
de qua idem sapiens in Prouerbiis: *Cor quod nouit amaritudinem* Pr. 14.  
*animæ suæ, in gaudio eius non miscebitur extraneus.* Id est, ex illa  
cordis amaritudine gaudium & ceteræ passionēs si fortè mouean-  
tur, non miscebuntur extraneis & mundanis rebus, puræ fient  
& defæcata.

Denique, sic diuino fit munere, vt qui patientiam suam pro-  
bat in illatis iniuriis, Deus illi suam probet Fidelitatem, qua  
promisit iis qui se in hoc pugnandi & patiendi genere vincerent,  
victores essent seu inuicti & insuperabiles in aliis animi pugnis  
& certaminibus. *Qui vicerit, sic vestiatur vestimentis albis.* 2VO. Apoc. 3.  
*NIAM seruasti verbum patientiæ meæ, & ego seruabo te ab hora tenta-*  
*tionis. QVI vicerit, faciam illum columnam in templo Dei mei, & fo-*  
*ras non egredietur amplius.* Nonne velles his promissis frui? At vide  
quibus fiant? pugnantibus, vincentibus, laureatis.

### III. P V N C T V M.

**S**ICVT ergo tolerandis iniuriis mensa nobis parata est, sic tolerata  
iniuriæ nos parant ad illam mensam, Quia nos nostris humanis  
purgant affectibus, quæ cordis purgatio & animi puritas quod est  
major, eò est præparatio certior & aptior ad percipiendas abun-  
dantiores sacræ mensæ delicias. *Vincenti dabo edere de ligno vitæ* Apoc. 2.  
*quod est in Paradiso Dei mei.* Itemque paulo post: *Scio tribulationem*  
*tuam & paupertatem tuam, sed diues es & blasphemaris ab his qui se*  
*dicunt Iudæos esse & non sunt, sed sunt Synagoga Satana: nihil horum*  
*timeas quæ passurus es. Esto fidelis vsque ad mortem, & dabo tibi coro-*  
*nam vitæ: Qui vicerit cum laedetur à morte secunda.* Ibidem sic alteri  
dicitur: *Vincenti dabo manna absconditum, & dabo illi calculum can-*  
*didum, & in calculo nomen nouum scriptum quod nemo scit nisi qui ac-*  
*cipit;* Quasi diceret, faciebo illi præ cæteris; sicut qui in ferendo  
suffragio fauere volunt, designant suum fauorem calculo seu la-  
pillo candido, & erit inquit, fauor tam suauis, tam constans  
& tam sublimis vt ille cui fauero, nomen Beati & Foelicis  
obtineat.

Sic probatum est alibi ex sancto Augustino, inimicos nostros



120 FERIA 5. Hebd. 2. post Oct. Pent. de Christi Passione, in SS. SS.

In 1. parte  
in Festo SS.  
Innocentii.

Gen. 50.

sape nobis plus prodesse odio, quam profuissent obsequio: quando videlicet odium & iniurias patienter toleramus, & ex illis toleratis iniuriis plus nobis accedit diuinæ gratiæ. Vos cogitastis de me malum, aiebat Ioseph fratribus suis, sed Deus vertit illud in bonum, ut exaltaret me. Itane sentis? Itane credis? Vndenam ergo tot murmura, tot quarimonia?

Iac. 5.

Patientes igitur estote fratres usque in aduentum Domini. Ecce agricola expectat pretiosum fructum terra, patienter ferens donec accipiat temporaneum & serotinum: Patientes igitur estote & vos, & confirmate corda vestra, quoniam ecce aduentus Domini appropinquauit. Nolite ingemiscere fratres in alterutrum, ut non iudicemini: Id est, videte ne calumniis & iniuriis pressi murmuretis, & iudicemini poena potius digni quam præmio.



FERIA QUINTA.  
DE CHRISTI DOMINI PASSIONE,  
MORTE, ET SEPULTURA,  
IN SANCTISSIMO  
SACRAMENTO.

Oblatus est quia ipse voluit, & non aperuit os suum;  
sicut ovis ad occisionem ducetur, & quasi agnus  
coram tundente se obmutescet, & non aperiet os  
suum. II. 53.

VERITAS PRACTICA.

Quotidie Morior I. Cor. 15.

Satius esset nullo die velle viuere, quàm non omni  
die, velle cum Christo mori.

RATIO



*Satius esset nullo die velle viuere, quam non omni die, &c. 121*  
RATIO EST, Quia satius esset nullo die velle viuere quam  
velle viuere secundum carnem.

*Sed non omni die velle cum Christo mori, est velle viuere secundum carnem.*

*Ergo satius esset nullo die velle viuere, quam non omni die velle cum Christo mori; sicque attente prospiciendum ut cum Christo & Apostolo possis dicere: Quotidie morior.*

### I. P V N C T V M.

**H**OC facite in meam commemorationem. Dicebat Christus Dominus instituens hoc adorandum Sacramentum; refertque diuus Apostolus, & sic declarat: *Quotiescumque manducabitis Panem hunc & Calicem Domini bibetis, mortem Domini annuntiabitis, donec veniat; Id est, memorabitis & repraesentabitis mortem eius sicut repraesentari vult donec veniat ad iudicium. Sic diuus Thomas de Christo Domino: Hoc Sacramentum instituit tanquam passionis suae memoriale perenne. Nomine autem passionis mors & sepultura comprehenduntur, & in Sacramento tria haec simul repraesentantur, quatenus ipse est Christus, qui ut ait S. Gregorius, Licet resurgens à mortuis iam non moritur & mors ei ultra non dominabitur, tamen in semetipso immortaliter atque incorruptibiliter viuens pro nobis iterum in hoc mysterio sacra oblationis immolatur. Ipse est qui peracti olim in cruce cruenti sacrificij memoriam incruento modo renouat, ac meritum unicuique particulatim applicat. Ipse est qui dum pateretur humanitate, manebat semper impassibilis diuinitate, sic in Sacramento dum species panis franguntur, illaesus permanet. Ipse est qui dum efflauit animam, desiit homo esse, & mortuus est; sic dum in Communionem recipitur, & consumptis in stomacho speciebus definit esse Sacramentaliter ubi ante erat, dici potest quodammodo mortuus, quatenus ea vita priuatus est quam habebat. Dum Caro etiam & sanguis separatim consecrantur & offeruntur, mors & passio quae in effusione sanguinis potissimum transacta fuit, manifestius exhibentur. Quid denique aptius cum sepultura quam ipsa Hostia ubi contegitur Christus; vel Tabernaculum ubi reconditur: vel pectus*



tuum ubi recipitur? O Sacrum conuiuium in quo Christus sumitur, recolitur memoria Passionis eius, mens impletur gratia, & futura gloria nobis pignus datur!

Ergo-ne putandum est toties ac toties pro me Christum mori! Quis mihi det ut pro te Christe sic moriar? Certe hoc conandum cum eius gratia, In id strenue laborandum ut possis quotidie facrum audiendo vel faciendo dicere: *Quotidie morior. NECESSE* est, inquit sanctus Gregorius, ut cum hac agimus, nosmetipsos Deo in cordis contritione mactemus: quia qui passionis dominice mysteria celebramus, debemus imitari quod agimus. Tunc ergo verè pro nobis Hostia erit Deo, cum nosmetipsos Hostiam fecerimus; Quæ sui mactandi necessitas ut melius exprimeretur, sic est propolita veritas: Expediret seu satius esset potius nullo die velle viuere, quam non omni die velle cum Christo mori.

Ratio quæ afferretur constat vno aut altero verbo, si bene intelligantur, nempe quid sit secundum carnem viuere. Quidquid enim sit tam capitale est & timendum ex Apostolo, ut qui hunc audierit minime dubitet, expedire potius nullo die velle viuere quam velle viuere secundum carnem: sic enim ille passim: Scio quia non habitat in me, hoc est in carne mea bonum. *QUI* secundum carnem sunt, quæ carnis sunt sapiunt; sapientia carnis inimica est Deo: legi enim Dei non est subiecta, nec enim potest: Qui autem in carne sunt, Deo placere non possunt. Ergo fratres debitores sumus non carni, ut secundum carnem viuamus: si enim secundum carnem vixeritis, moriemini: si autem spiritu facta carnis mortificaueritis, viuētis. *IN* carne ambulantes non secundum carnem militamus. *QVID* dicit Scriptura? Ecce ancillam & filium eius: Id est carnalem appetitum. *SPIRITV* ambulate & desideria carnis non perficietis, caro enim concupiscit aduersus Spiritum, Spiritus autem aduersus carnem: hæc enim sibi inuicem aduersantur: qui autem sunt Christi, carnem suam crucifixerunt cum vitiis & concupiscentiis.

Vellesne vel vno die, vel vna hora non esse Christi? Vellesne mori quā malā & infelici morte dicit Apostolus moriturum qui secundum carnem vixerit? Vnde manifeste vides quā vere potius expediret nullo die velle viuere quā velle viuere secundum carnem. Quid est enim vita tua? at quid est illa mors horrenda quæ sequitur vitam in carne transactam? O mors quam amara est memoria tua, homini pacem habenti in substantiis suis!

4. Dial. 59.

Rom. 7.

Ibid. 8.

2. Cor. 10.

Gal. 4.

Gen. 21.

Ecclesi. 41.



II. P V N C T V M.

**S**ED non omni die velle cum Christo mori, est velle secundum carnem viuere. Hæc enim sibi aduersantur, vt dictum est de carne & spiritu. Nam cum Christo velle mori nihil aliud est quam velle spiritu viuere, quam velle mori omnibus carnis aut naturæ corruptæ motibus; quàm nolle, vno verbo, secundum carnem viuere. *Induimini Dominum Iesum Christum, & carnis curam ne feceritis in desideriis.* Vnde à contrario manifestè patet quod qui nolit cum Christo mori, velit secundum carnem viuere. Non enim datur medium inter vitam & mortem: aut te oportet mortuum esse, aut viuere. *Ante hominem vita & mors, bonum & malum, quod placuerit illi dabitur illi.* Id est, alterutrum necessario ex his duobus eligendum, nec tertium, quod sit medium, in optione nostra est. Vnde & alibi; *Hæc dicit Dominus: Ecce ego do coram vobis viam vite, & viam mortis.* Sic Christus Dominus duas tantum vias memorat, vnâ spatiosam quæ ducit ad perditionem: & vnâ arduam quæ ducit ad vitam. Non est hic tertia quædam via excogitanda. *Omne quod agimus, omne quod loquimur, aut de lata aut de angusta via est,* inquit sanctus Hieronymus. Sicut autem vnum & idem est esse in spatiosa via & viuere secundum carnem: sic plane idem est in arcta esse via, & mori cum Christo: vnde sicut qui non omni die vellet in arcta esse via, vellet esse in lata & spatiosa; sic omnino qui non omni die velit cum Christo mori, velit secundum carnem viuere.

O voluntas humana & propria quàm de te verè sanctus Bernardus: *Cauemus à propria voluntate, tamquam à vipera pessima & nequissima, & quæ sola deinceps damnare possit animas nostras.*

III. P V N C T V M.

**S**IC ergo satius esset nullo die velle viuere, quàm non omni die velle cum Christo mori, Quia quo die nolles cum Christo mori, velles secundum carnem viuere: At longe expediret nolle in mundo viuere, quàm viuere secundum carnem. *Bonum erat ei si natus non fuisset homo ille.* Quo in sensu sapienter Sapiens laudauit magis mortuos quam viuentes.



Galat. 2.  
Rom. 7.  
Ibid. 8.

Cauenda hic vero sunt duo quaedam extrema: Vnum eorum qui putarent sic cum Christo moriendum, nullus ut sensus carnis aut naturæ deprauata moueretur, nulla ut contradictio sentiretur. Non est ita; non est ista mors insensibilitas, non sic ille qui Christo confixus erat cruci, & qui simul videbat aliam legem in membris suis repugnantem legi mentis suæ. Sed ut ille ipse ait, *Nihil damnationis est ijs qui sunt in Christo Iesu, qui non secundum carnem ambulant*, id est qui non sequuntur motus carnis quos sentiunt.

Ecclesi. 9.  
Ibid. 11.

Ecclesi. 3.

1. de Contin.  
c. 13.

Pf. 115.  
Cens. 8.

Alterum vero eorum est qui nihil hic timendum putant nisi si mortali manifestè consentiretur, quasi hoc idem esset viuere secundum carnem quod peccare grauiter; sed falluntur, neque enim derepente fit quisquam malus, sed, ut passim ait sanctus Gregorius, *Per leuia delicta deslectimus, & usu cuncta lenigante, nequaquam post committere grauiora timemus*; Quod maxime intelligendum de his qui nolunt mori cum Christo, id est qui suis affectibus sunt ita implicati ut nolint eos deponere; licet illi affectus non sint primo mortales, tamen suspecti sunt, periculosi sunt, damnandi sunt quando sic adhærent animo, ut animus nolit eos deponere. Sic enim fit quod ait Sapiens; *Concupiscentia quasi ignis exardescit*. Et rursum, *a scintilla una augetur ignis*. Quamobrem sicut nihil est aptius his continendis motibus quam velle quotidie cum Christo mori, sic nihil est procliuius illis laxandis & soluendis in lethale crimen, quam nolle mori; Hoc est enim amare ipsam concupiscentiam, hoc est fouere peccatum, hoc est amare periculum, hoc est viuere sub ruina. Nam qui amat periculum, in illo peribit. Quod egregiè, sanctus Augustinus & ad praxim appositè, in illud Apostoli, *Mortificate membra vestra quæ sunt super terram, fornicationem, immunditiam, &c.* QVOMODO, inquit, ista mortificantur opere continentie, nisi cum eis mente non consentitur, neque exhibentur eis arma, corporis membra, ET QVOD EST VIGILANTIA MAIORE CONTINENTIAE CVRANDVM, ipsa etiam nostra cogitatio, si eorum quadam suggestione & quasi susurratone tangatur, tamen ab eis ne oblectetur, auertitur. Hæc est pretiosa in conspectu Domini mors sanctorum eius. Hæc est fortis ut mors dilectio, & dura sicut infernus emulatio. Nempe quod mors agit in sensibus corporis, inquit S. Gregorius, hoc agit dilectio in cupiditalibus mentis. Sicut mors exteriores corporis sensus ab omni proprio & naturali appetitu interficit, sic dilectio in talibus viris omnia terrena desideria contemnere mentem



Gloriam Christi vertimus in ignominiam, si aliam, &c. 125

alias intentam compellit. Huiusmodi mortuis & viuis dicebat Apostolus: Mortui enim estis, & vita vestra abscondita est cum Christo in Deo. Hi proculdubio vitam suam abscondunt; qua dum omnia quæ videmus postponunt, in his quæ non videmus, in Beatitudine scilicet Christi, veraciter & secrete viuunt. Quia enim falsam vitam despiciunt quæ visibiliter apparet, in vera vita se abscondunt quot non nisi inuisibilibus oculis se manifestat. Nonne sic velles cum Christo viuere? cur non vis igitur sic cum ipso mori? Responde, aut certe pudeat respondere quia tu mauis secundum carnem viuere.



## FERIA SEXTA.

DE CHRISTI DOMINI RESVRGEN-  
TIS, ASCENDENTIS IN COELVM, ET IBIDEM  
REGNANTIS VITA GLORIOSA, QUÆ  
APPARET IN SANCTISSIMO  
SACRAMENTO.

*Videmus Iesum propter Passionem mortis, gloria  
& honore coronatum. Hebr. 2.*

*Dignus es Domine Deus noster accipere gloriam, &  
honorem, & virtutem. Apoc. 4.*

## VERITAS PRACTICA.

Gloriam Christi vertimus in ignominiam, si aliam à  
Christo quærimus gloriam.

RATIO EST, Quia si aliam à Christo seu à Christi gloria  
quærimus gloriam, signum est nos æstimare aliquid gloriosius  
ipsa Christi gloria.



126 FERIA 6. Hebd. 2. post Oct. Pent. de Christi Vita glor. in SS. SS.

Atqui hoc est Christo ignominiosum, hoc est eius gloriam vertere in ignominiam.

Ergo gloriam Christi vertimus in ignominiam, si aliam à Christi gloria quærimus gloriam. Quod quàm sit impium satis patet.

# I. P V N C T V M.

2. Reg. 6.  
Ps. 23.



Apoc. 1.

*Q*UAM gloriosus fuit hodie Rex Israël! *Q*UIS est iste Rex gloria? Dominus fortis & potens, Dominus potens in praelio; Attollite portas principes vestras, &c. Dominus virtutum ipse est Rex gloria. *P*RI MO GEN ITVS mortuorum & princeps regum terre, qui dilexit nos, & lauit nos à peccatis nostris in sanguine suo, Ipsi gloria & imperium in secula seculorum, amen.

Joan. 14.  
Rom. 8.

1. Cor. 15.  
1. Cor. 4.

His & similibus Canticis postquam glorificaueris Christum Dominum resurgentem, ascendentem in Coelum, & ibidem regnantem in statu glorioso: admirare quàm mirabiliter hic eius vitæ gloriolæ status appareat in sanctissimo Sacramento. Sic enim eius est incorruptibile & impassibile Corpus quale de sepulchro resurgens retulit, quale in coelum intulit, & quale in dextera Patris conseruat. Quod si dum eleuatus est in coelum nubes suscepit eum ab oculis discipulorum, nonne species Sacramentales instar nubis sic Eum contegunt? Si nobis in coelo parat locum, vt ipse aiebat; Si velut aduocatus interpellat pro nobis vt refert Apostolus; Si velut Rex & Dominus vniuersam regit Ecclesiam vt fides docet: Nonne hoc ipsum præsens ipse præstat in sanctissimo Sacramento? Vnde aptè S. Ambrosius;

*E*rgo tu audis, quod quotiescumque offertur sacrificium, mors Domini, Resurrectio Domini, Elenatio Domini significetur.

Quamobrem repete Cantica, resume Psalmos, & quidquid gloriosum in coelis Christo decantatur, totum illud refunde in salutarem Hostiam, *Quæ cæli pandit Ostium.*

Verùm nihil ira efficies ad gloriam Christi Domini in coelo & in terra triumphantis, quàm si propter illum, humanam omnem respuas gloriam; aut si quam fortè quæris, non aliam ab ipso quæras; Non aliam quam ipse quærit: non aliud denique gloriosum quam quod ipse reputat, putes & prædices: vt sicut Ille in te gloriatur, sic tu in eo solo glorieris; *Qui gloriatur, in Domino glo-*

2. Cor. 10.



rietur. Alioquin, Audi, quod quicumque audierint, tinniant ambæ aures 1. Reg. 3.  
eius: GLORIAM Christi conuertis in ignominiam si quam ab illo aliam tibi  
queritas gloriam. Sic enim indicas, sic profiteris te gloriosius ali-  
quid iudicare quam ipsam Christi gloriam. Non enim aliam  
quæreres si tibi sufficiens & satis digna videretur Christi gloria,  
cum maxime non ignores humanam gloriam cum inordinate  
appetitur sic pugnare cum diuina & Christiana sicut superbiam  
cum humilitate, sicut virtutum cum vitio. *Vae animæ audaci quæ  
sperauit se aliquid melius & gloriosius Christo inuenturam.*

II. P V N C T V M.

**A**T QVI æstimare aliquid gloriosius Christi gloria, nihil aliud est  
quam Christi gloriam conuertyere in ignominiam.

Nam vel ita reuera putas esse aliquid gloriosius Christi gloria,  
vel licet non ita sit, tu tamen mauis aliam gloriam. Si primum  
dicis, manifestam facis iniuriam diuinæ gloriæ, diuinoque iudi-  
cio, cuius est æstimare quid sit gloria, quid sit gloriosius, & quid  
cuique sit impertiendum. Quasi Christus id nesciret, vel quasi  
tu esses intelligentior, iudicium tibi arrogas de honore, de glo-  
ria, de rerum valore & pretio. Tu quis es qui hæc audeas? *Inter-*  
*rogabo te & responde mihi, ait Domini, Vbi eras, quando ponebam* Iob. 38.  
*fundamenta terra, indica mihi si habes intelligentiam, cum me lau-*  
*darent simul astra matutina, & iubilarent omnes filij Dei? Quasi di-*  
*ceret, Tu cum nihil esses quando ego rerum omnium fundamen-*  
*ta ponebam, nonne te pudet de rebus sic velle mecum disputare*  
*quasi tu me melius intelligas quid quæque res valeat. An putas*  
*me non intellexisse in quo laus esset & gloria quando cælum &*  
*terram condidi vt me laudarent & glorificarent? an me deceptum*  
*dices? an te peritiorem finges? an aliter de cælo, de astris, & de*  
*creaturis ordinasses? Responde & confundere.*

Quod si cum Sapiente respondeas, *Non est minuere, neque adij-*  
*cere, nec est inuestigare magnalia Dei;* si fatearis vt debes, nihil me-  
lius, nihil rectius, nihil verius & ordinatius quam quod ipse sta-  
tuit; quare ergo alibi quæris gloriam, quam vbi agnoscis ab illo  
positam: aut dum aliam quæris, quomodo non simul vides te il-  
lum contemnere, te illi probum & ignominiam, quantum qui-  
dem possis, inferre: vt qui licet bene & recte sentiat, negligatur à



Ps. 61.

te tamen in hoc ipso sensu quem rectum putas; Tu contra malis sentire & iudicare, quàm ipse iudicet: Tu cum mundo malis errare & falli quàm rectè cum Christo sentire! *O insanias verè falsas, ô vere mendaces filios hominum in stateris, ut decipiant ipsi de vanitate in idipsum!*

Quod perinde mihi videtur dictum à Psalte regio quasi diceret, tametsi omnes simul homines in vnâ essent lance positi, ipsam leuitatem & vanitatem in altera lance positam leuitate superarent; & tamen contra Deum præsumunt de rebus iudicare! Vel sic interpretare: Tanta est leuitas de falsitas humani iudicij, rebus in ipsis humanis æstimandis, vt quaecumque stateram homines & humanam regulam iudicandi afferant, adhuc errare possint, & errorem sibi mutuo communicare; & tamen non verebuntur de ipsis iudicandis rebus cum Christo & cum Deo contendere! O probum! ô infamem audaciam!

## III. PUNCTVM.

**S**IC ergo gloriam Christi vertimus in ignominiam, quando gloriam querimus, quæ à Christo non est, & quam ipse non probat: Nam sic iudicamus nos aliter sentire de gloria & de rebus humanis, quàm ille sentiat, nostrumque sensum tamquam probatiorem & æquiores diuino illius sensui præferimus: quandoquidem actu & re ipsa quærimus aliam gloriam in qua magis aquiescimus quàm in Euangelica & Christiana quam ipse professus est & quam nobis vnice commendauit. Quod certe non potest non esse illi valde ignominiosum; quia hoc est Illum manifestè arguere vel ignorantia vel malitia vel dolositatis, quasi nesciuerit aut quasi noluerit nos docere quid esset rectius & verius. Sicut qui alia in materia, vel circa Sacramenta, vel circa Christianas virtutes vellet corrigere & immutare quod à Christo vel ab Ecclesia constitutum est; Quid censeris de illo? Hoc ipsum de te sentiendum est, qui quod Christus statuit de honore & gloria, tu ausis improbare, tu inuertere, tu aliud contra opponere.

Gal. 1.

2. 4.

Miror, inquiebat Apostolus, quod sic tam citò transferimini ab eo qui vos vocauit in gratiam Christi! Sed licet nos aut Angelus de cælo euangelizet vobis, præterquam quod euangelizauimus vobis, anathema sit. Tum paulo post idem eisdem Galatis: Vellem esse apud vos modo,



modo, & mutare vocem meam, quoniam confundar in vobis: Quasi diceret, Non possum scripto exprimere quanto pudore animi & confusione vultus afficiar: oporteret me spectandum vobis exponere, oporteret me praesentem loqui, me à vobis audiri, me à vobis cerni; quia vos mei misereret, adeo sum stupefactus & confusus propter vestram illam audaciam qua contra Christi sensum praesumitis aliud nescio quid sentire & profiteri.

Idem tibi à Christo & ab Apostolo dictum puta: neque aliter verum est quod ait ipse Deus per Prophetam de superbis & vanis: *Gloriam eorum in ignominiam commutabo*, quàm quod suo testimo- Osee 4. nio reddit ignominiosum id in quo gloriantur. At nonne tu hoc ipsum facis contra Christum? Nonne probro vertis quod ille gloriosum duxit? Nonne hoc est igitur gloriam eius in ignominiam commutare?

Denique quod Scripturae passim contra Idololatrias dicunt, tibi aliter sentienti de gloria quam Christus sentit; tibi aliam quærenti gloriam quam quæ à Christo proponitur: tibi mundano & superbo ne dubites applicare: *Mutauerunt gloriam suam in similitudinem vituli comedentis fœnum*, *POPVLVS vero meus mutauit gloriam suam in Idolum!* *MVTAVERVNT gloriam incorruptibilis Dei in similitudinem imaginis corruptibilis hominis.* Nonne hoc ipsum est quod aperte Sapiens de superbia seu de vana gloria: *Initium superbiae hominis apostatare à Deo, quoniam ab eo qui fecit illum, recessit cor eius.* Nonne hoc denique quod ipse Dominus: *Quomodo vos potestis credere, qui gloriam ab inuicem accipitis, & gloriam quæ à solo Deo est non queritis?* Notanda valde verba, non enim omnem vetat gloriam, sed illam solum quæ ab hominibus accipitur tamquam vanam & nullam, cum vna sit vera gloria quæ à Deo est, à quo solo est gloria. Sed quod in primis hic virgendum, sic verba hæc Christi confirmant propositam veritatem vt qui aliam à Christo siue à Deo quærat gloriam prorsus infidelis & incredulus censeretur aut plane stultus. Primo enim aperte Christus affirmat illos non posse credere qui gloriam à se inuicem acciperent; Deinde vero cum euidenter asserat à solo esse Deo gloriam, interrogetur rursus qui aliam quærit quàm à Deo, an Christo credat, necne? Videtur certe non credere, nam illud quærit quid Christus negat esse. Non quæreret autem nisi hoc esse putaret quod quærit; nec putare potest id esse quod negat Christus.



130 *Sabbato Hebd. 2. post Oct. Pent. de iudiciaria Christi, &c.*

nisi quod Christo non credat. Quod si tamen id durius putet, nec se à Christo dissentire patiat, credat necesse est, quod Christus dixit nullum esse aliam à Deo gloriam; Quid est ergo quod aliam quærit? Nonne hoc est stultum, id quærere quod fide diuina credis nusquam esse? Aut vt ad primum redeatur, nonne cum id quæras quid Christus esse negat, manifeste significas te quod Christus ait non credere? Quid est autem esse incredulum & infidelem nisi hoc sit? Nam quod est extremum incredulitatis: vel non credes Christum esse Deum, vel non esse veracem Deum. Si enim Christo non credis, non aliunde est quam quia non id putas esse verum quod ille dixit. Si autem non est verum quod dixit, quomodo ille est Deus, aut quomodo verax est Deus?

*Rem. 10.  
15. 53.*

O quam vere Propheta! ô quam vere Apostolus, *Non omnes obediunt Euangelio; Isaias enim dicit, Domine, quis credidit auditui nostro?*

Vide in hac parte, Sabbato Hebdomadæ 12. Et in die Transfigurationis Domini.



## S A B B A T O.

### DE IUDICIARIA POTESTATE

QUAM CHRISTVS DOMINVS EXERCET

IN SANCTISSIMO SACRAMENTO.

*Ipse est qui constitutus est à Deo Iudex viuorum & mortuorum. Act. 10.*

*Abscondite nos à facie Sedentis super thronum, & ab ira Agni: quoniam venit dies magnus iræ ipsorum: & quis poterit stare? Apoc. 6.*

VERITAS PRACTICA.

Agni ¶el maxime formidanda ira.



**SENSVS** & ratio est, quod sicut dicitur agni esse ira, quando bonitas Christi contemnitur, sic tanto magis est formidanda ira, quanto maior est bonitas, aut quanto magis contemnitur. Sed in Sacramento, maxima est bonitas, maximeque contemnitur. Ergo hic agni vel maxime formidanda est ira, & precauenda.

**I. P V N C T V M.**

**M** O C de Christo Domino superest considerare, quod sit omnium Iudex, & quali hinc honore colendus sit, ac tremendus. Licet enim in hac vita tale iudicium non exercuerit, neque ut ille dicebat, *missus fuerit in mundum ut iudicet mundum*, sed ut saluetur mundus per ipsum: tamen ut ipse etiam affirmabat, *omne iudicium Pater dedit filio, ut omnes honorificent filium*, sicut honorificant Patrem. Sicut enim Pater habet vitam in semetipso, sic dedit & filio habere vitam in semetipso, & potestatem dedit ei iudicium facere quia filius hominis est. Quasi diceret, hæc etiam modo dum inter homines vivo, hæc in me dignitas agnoscenda est & colenda. Expende quanta dignitas & quam tremenda! *Omnes stabimus ante tribunal Christi: scriptum est enim: VIVO EGO, dicit Dominus, quoniam mihi flectetur omne genu: & omnis lingua confitebitur Deo*. Sic omnino, sic omnium planè hominum vita præsens eius Iudicio definitur, & futura decernitur.

*Quis non timebit te Domine? quoniam omnes gentes venient & adorabunt in conspectu tuo!*

Sed non minus nobis timendus est in sanctissimo Sacramento, quia non minus illic iudicat de nobis omnibus, siue frequentius siue infrequentius accedamus. Primo quidem de infrequentia iudicat, vnde nam tam rara quorundam Communio? Quid prætendat causæ? quid valoris & ponderis sit causa quam pretextunt? Cur non impedimenta Communioni deferunt potius quam ipsam Communione. Ille est qui hæc cuncta singillatim examinat; Ille de singulis & cognoscit & iudicat: *Iudicium Domini cum populo suo*.

Deinde in communicantibus, quanam sit eorum dispositio, quæ culpabilis, vel inculpabilis capacitas, quæ deuotio, quis fructus, quis vsus vel abusus Sacramenti, nonne hoc ipse examinat;



- nonne & iudicat, quandoquidem tam varios & diuerfos operatur in animis motus & effectus, quàm variam esse videt & iudicat esse communicantium dispositionem & capacitatem? *Vnumquemque iuxta vias suas iudicabo de vobis*, quod quidem Apostolus aptissima vocis expressit significatione cum dixit: *Qui manducat indigne, iudicium sibi manducat*: Id est condemnationem suam tam propriam & tam iuste adæquatam suæ indignitati recipit quàm proportionatè cibus manducatus manducanti adaptatur; & sicut quod manducatur conuertitur in propriam manducantis substantiam, ita ex indigna manducatione agni fiet quodammodò vt manducata condemnatio totam penetret & in se conuertat animam: si quid forte superesset boni, peruertitur, corrumpitur, & tota transit anima in damnationem & corruptionem: *Vt qui nocet, noceat adhuc, & qui in sordibus est sordescat adhuc. Vt impleant peccata sua semper; peruenit enim ira Dei super illos usque in finem.*
- Hæc est ira Regis irati contra eos qui vocati ad nuptias, neglexerunt vocantem. Hæc est ira Christi iudicis cuius iudicium incipit à domo Dei. Hæc est agni vel maxime formidanda ira, propter illam videlicet rationem quæ modo expendi debet ob quam agnus irascitur. Aut non irascitur agnus, aut non nisi formidolosè irascitur; Quanta est naturæ bonitas, tanta est neglectæ bonitatis ira; At cum maxima sit bonitas, maxima sit etiam ira necesse est. Quantum de suo bonus, tantum de nostro iustus; de suo habet vt sit agnus, de nostro vt sit iratus, & de vtroque vt sit vehementer iratus. Nisi esset bonus non esset agnus, nisi vt est bonus contemneretur à nobis, non irasceretur agnus; nisi denique simul esset bonus & simul contemptus non tam vehementer & formidolosè irasceretur. Facit bonitas ne de se irascatur, sed ipsa etiam facit vt à nobis commota non nisi vehementer irascatur. Sicut non est iudicium sine misericordia, sic neque misericordia si læsa fuerit sine iudicio est; & quanta fuerit misericordia seu misericordiæ læsio, tale futurum de illa iudicium. *Misericordiam & iudicium cantabo tibi Domine, NON dicit iudicium & misericordiam, inquit sanctus Augustinus, sed misericordiam & iudicium; quia præcedit misericordia, nec est iudicium nisi pro illa læsa. Pater misericordiarum est, & Deus ac Dominus ultionum. Pater quidem misericordiarum non modo, inquit sanctus Bernardus, quod pater**

Ex. 33.

1. Cor. 11.

Apoc. 22.

1. Thess. 2.

Matth. 22.

1. Pet. 4.

Tertull.

Ps. 100.

2. Cor. 1.

Ps. 93.



*videatur misereri potius quàm indignari sed quod miserendi causam & originem sumat ex proprio, iudicandi vel ulciscendi magis ex nostro.* Serm. 1. in Nativ. Dom.

Multum quidem in nobis inter se differum misericordia & ira, sed in Deo tam propè simul coniuncta sunt & unita, ut vnum & idem sint: Sic Sapiens: *Misericordia & ira*, inquit, *ab illo citò* Ecclesi. 5. *proximant: MISERICORDIA & ira est cum illo. Potens exoratio &* ibid. 16. *effundens iram: secundum misericordiam suam sic correptio illius: hominem secundum opera sua iudicabit, omnis misericordia faciet locum unicuique secundum meritum operum suorum.* Id est, cedit locum iustitiæ, preparabit locum iudicio, ut quanta fuerit misericordia tale sit futurum sequens iudicium. Sic locum misericordiæ replebit iustitia quando hæc illi commensurabitur.

Denique quid expressius quàm quod Apostolus: *An diuitias bonitatis eius & patientiæ & longanimitatis contemnis? thesaurizas tibi iram in die iræ*, Vide ut thesauros iræ opponit diuitiis bonitatis & patientiæ contemptis, quasi diceret, sicut ex diuitiis fiunt thesauri, sic fiunt ex diuitiis bonitatis iræ thesauri: & quantæ erant illæ diuitiæ bonitatis, tanti futuri sunt iræ thesauri. *Thesaurizas tibi*, ait sanctus Bernardus, *thesauros iræ pro prerogatis thesauris misericordiæ quos contemnis.* O qualis diuina Bonitas! ô qualis humana malitia! Rom. 2; Serm. de Tripl. Miseric.

## II. PUNCTVM.

**S**ED in sanctissimo Sacramento maxima est bonitas maximæque contemnitur, seu maximum subest eius contemnenda periculum, nisi caueatur.

Quid enim mansuetius, quid facilius, quid ad omne genus beneficij conferendum paratius, quid ad supernas profundendas gratias procliuius, cum nullum recuset, omnes inuitet, & unicuique quantum capere & referre potest indefinenter & certissime impertiatur! O fons amoris perpetui quid dicam de te? l. 3. De misericordia Ch. 6. 10. *Suauitatem huius Sacramenti*, Diuus inquit Thomas, *nullus digne exprimere sufficit per quod spiritualis dulcedo in suo fonte gustatur & recolitur memoria illius quam in sua passione Christus monstrauit excellentissima charitatis.* Denique quod ait sanctus Bernardus de duobus sponsi vberibus, ubinam apparet manifestius? Duo, inquit, Serm. 9. in Cant. *sponsi vbera, duo in ipso sunt ingenita mansuetudinis argumenta, quod*



Ps. 101.

*patienter expectat delinquentem, & clementer recipit penitentem: gemina, inquam, dulcedo suauitatis exuberat in pectore Domini Iesu; longanimitas videlicet in expectando, & in donando facilitas. Verè hic longaminis & multum misericors.*

Job. 21.

Et uerò periculum tantæ bonitatis contemnendæ non modo in illis est qui actu & re ipsa Sacramentum blasphemant aut in mortali recipiunt, sed in his etiam vel qui non satis frequentant ne obligentur ad arctiorem viuendi modum, vel qui frequentant crebrius sine cultu aut vlllo fructu qui dicunt Deo *recede à nobis, scientiam viarum tuarum nolumus.*

Mal. 1. &amp; 2.

Ier. 2.

Ioan. 8.

Non quod ita ore loquantur, sed quod ita reapse viuant & sic affecti sint vt nolint meliores & perfectiores euadere, licet Christus eos sapius inuitet ad communionem, aut communicantes excitet ad perfectiorem vitam. *Rogo te, inquit inuitatus ad Coenam, habe me excusatum.* Vix est vllus qui non prætexit aliquam excusationem contra quotidianas illas gratias quæ nos vel à nostris defectibus retrahunt, vel ad altiora prouehunt. Quia in excusatione triplex quidam reperitur Christi contemptus. Primo quod reuera repudiet gratiam. Secundo quod falso se excuset, & se excusando accuset inuitantem, vt supra dictum est. Tertio denique quod sic humana diuinis præferat, naturam gratiæ, & seipsum Christo. *Ad vos, ô Sacerdotes qui despicitis nomen meum. Ad vos mandatum hoc, ô Sacerdotes, vbi tot missarum fructus? vbi tot communionum effectus? vbi tot gratiarum prouentus? Nunquid non medicus non est ibi, quare igitur non est obducta cicatrix? EGO honorifico patrem meum & vos inhonorastis me.* Extende latius hæc Christi verba, multus in illis sensus est. Vide quantum honorificet Patrem cui se millies in die immolat, quoties videlicet celebratur Sacrum; quod fit in vniuerso terrarum orbe, per singula pene momenta temporum. Tu vero vix mediam illi colendo impendas horam!

## III. PUNCTVM.

**E**RGÓ hîc Agni vel maxime formidanda est ira. Hîc videlicet in sanctissimo Sacramento, vbi Christus sedet in throno misericordiæ simul & iustitiæ, vnde agni accenditur ira, & vnde accensa ira dicitur præcipuè formidanda, quia nempe vbi summa



est Christi bonitas sese pro nobis immolans, illic esse Christus dicitur velut agnus: ubi vero fuerit talis offensa bonitas, illic agni dicitur ira, & ira quidem tam vehemens quam ingens erat bonitas. Audi rursus sanctum Bernardum, de hac utraque simul Christi virtute sibi succedente: *sicut benignitas apparuit ultra omnem spem, ultra omnem estimationem: similem expectare possumus iudicii districtiorem. Noli ergo contemnere Dei misericordiam, si non sentire vis iustitiam, sed iram, sed indignationem, sed emulationem, sed furorem. Ut enim scires quanta districtio succedit, tanta illa mansuetudo praeuenit. Ex magnitudine indulgentiae, magnitudinem ultionis attende. Immensus est enim Deus, & infinitus in iustitia, sicut & in misericordia. Multus ad ignoscendum, multus ad ulciscendum. Sed misericordia quidem priora sibi vendicat, ut si voluerimus, districtio inueniri non possit in quem sauiat.*

Serm. 1.  
in Epiph.  
Doms.

Hac & alia plura quae sanctus Pater vniuersim de Christi Domini mysteriis prosequitur, cum singulariter & eminenter pateant in sanctissimo Sacramento, quid restat nisi ut agnoscamus quam sit illic cauendus tantae bonitatis contemptus, & quam formidanda quae inde commoueri posset ira: non ut quidem à Sacramento fugiamus, aut rarius accedamus: sed ut formidemus offensas nostras quae illam accendunt iram; & quae fieri poterit iustitiae innocentia & animae puritate, Accedamus, ut ait Apostolus, cum *Hebr. 10: vero corde, in plenitudine fidei, aspersi corda, à conscientia mala. Redditque paulo post rationem quae supra dicta omnia valde confirmat: Non enim accessistis ad tractabilem montem & accensibilem ignem ibid. 12. & turbinem & caliginem, & procellam, & tubae sonum, & vocem verborum quam qui audierunt, excusauerunt se ne eis fieret verbum. Non enim portabant quod dicebatur; Et si bestia tetigerit montem, lapidabitur. Et ita terribile erat quod videbatur; Moyses dixit, exterritus sum & tremebundus. Sed accessistis ad Sion montem & ciuitatem Dei viventis, Ierusalem caelestem, & multorum millium Angelorum frequentiam, & Ecclesiam primitiuorum qui conscripti sunt in caelis, & iudicem omnium Deum, & spiritus iustorum perfectorum, & Testamenti Noui Mediatorem Iesum, & sanguinis asperzionem melius loquentem quam Abel. Quasi diceret; Non sic nobiscum hic agit Christus sicut olim cum Iudaeis quando illis apparuit in monte Sinai. Sic enim illos sensibilibiter terruit ut non auderent propius accedere, quia nolebat etiam Deus eos esse propiores. Nos vero non ita sensibi-*



liter terret, quia vult nos ad se confidenter accedere: in Ecclesia quidem militanti per Sacramentum, & alios accedendi modos; in triumphanti vero per beatitudinem.

Nihil hic terrificum sensibus obijcitur, ne deterreamur: Sed potius cuncta suauia & allicientia: Ne tamen tali abutamur bonitate & suauitate, neue offendentes misericordiam, accendamus iram & Iustitiam, sic pergit sanctus Apostolus: *Videte ne recuseris loquentem. Si enim illi non effugerunt recusantes eum qui super terram loquebatur, multo magis nos qui de cælis loquentem nobis auertimus*; Et post pauca: *Itaque regnum immobile suscipientes, habemus gratiam per quam seruiamus, placentes Deo cum metu & reuerentia: Etenim Deus noster ignis consumens est. Quasi diceret, iam nobiscum non agitur in figuris mobilibus & transeuntibus sicut cum Antiquis agebatur: firma sunt & immobilia quæ tractantur nec putemus nos in illis ex nostro esse sensu & gustu regendos, sed potius ex ductu & directione Ecclesiæ, quæ est regnum Dei, in quo nihil nobis præcipitur aut consulitur quod non possimus cum gratia, quæ nobis confertur vt seruiamus Deo non seruili terrore, sed filiali & reuerentiali metu, qui accessum ad Deum non prohibet, nisi profanum & inconsultum qui solus iram accendit. Alioquin Accedite ad illum & illuminamini: & facies vestrae non confundentur.*

*Pf. 33.*

*In D. Pf.*

*ACCEDAMVS ad eum*, inquit sanctus Augustinus, *vt illuminemur, non quomodo ad eum accesserunt Iudæi vt tenebrarentur. Accesserunt enim illi ad illum vt crucifigerent: nos ad eum accedamus, vt corpus & sanguinem eius accipiamus. Illi de Crucifixo tenebrati sunt, nos manducando Crucifixum & bibendo, illuminamur. Et post pauca: Sed dicit aliquis, quomodo ad eum accedo? Tantis malis, tantis peccatis oneratus sum, tanta scelera clamant de Conscientia mea, quomodo audeo accedere ad eum? Quomodo? Si humilianeris te per pœnitentiam. Et quæ plura prosequitur ad hanc humilitatis partem commendandam quæ maxime requiritur in pœnitenti corde, & quæ modum affert immodicis cupiditatibus; quarum quanta fuerit moderatio, tanta erit ad sacram mensam dispositio. Verè namque Christus Dominus quod de se Dauid aiebat. *Superbo oculo & insatiabili corde cum hoc non adebam. Oculi mei ad fideles terra, vt sedeant mecum. Ambulans in via immaculata, hic mihi ministrabat. Sed quare non de præsentī; dicit, Ministrat? An quia non sic modò,**

*Pf. 100.*



*Qui sibi palpat quod non longe erret, periculosus saepe, &c. 137*

dò, sicut olim, immaculati ministrabant ei? An quia qui ministrare inceperat in via immaculata, paulatim deficit & dum immaculatus esse desinit, desinit etiam ipsi ministrare? An forte qui ministrabat, ministratur: quæ sensu dicebat Dominus de suis servis, *Quod præcinget se, & faciet illos discumbere; ut transiens ministrabit illis.* Ac rursus: *Ego in medio vestrum sum, sicut qui ministrat.* O dignitatem Ministrorum Christi, siue dum ministrant, siue dum ministrantur! O vitæ immaculatæ meritum quæ tantam conciliat dignitatem!



# DOMINICA

TERTIA POST PENTECOSTEN.

DE OVE PERDITA, QVÆSITA, ET  
INVENTA A PASTORE.

*Erant appropinquantibus ad Iesum Publicani & peccatores, ut audirent illum. Et murmurabant Pharisei & Scribae dicentes: Quia hic peccatores recipit & manducat cum illis. Et ait ad illos parabolam istam, dicens: Quis ex vobis homo qui habet centum oves. Et quæ sequitur parabola de ove perdita, quæ sita & à Pastore inventa, ut habetur. Luca 15.*

VIDERI possent quæ proximè præcedentibus Hebdomadis dicta sunt de facili accessu ad Dominum, & de illa confiden-

3. Pars.

S



138 Dominica 3. post Pent. De oue perditâ, quæsitâ & inuentâ.

Hebr. 4.

tia quæ nos ad ipsum adducit, excitanda potius, quam timore qui nos inde auocat, prout aperte Apostolus ex multis à se dictis concludit: *Adeamus ergo cum fiducia ad thronum Gratiæ, ut misericordiam consequamur.* Hinc illæ Veritates Practicæ:

Quibus amarum est conuersari cum Christo, delicias eius conuertunt in amaritudinem.

Qui cum fiducia non adeunt ad Gratiæ Christi thronum, & se à throni secludunt gratia, & Christum excludunt à throno Gratiæ.

Diuina licet magis timenda sint quàm humana; in diuinis tamen minus est timenda familiaritas quàm in humanis.

*Prima post Octauas Pentecostes Hebdomada, Feria 5. in Solemnitate sanctissimi Sacramenti.*

Cum autem in tres partes diuisa considerari possit Parabola, sic consequenter ad vnamquamque partem referentur Veritates Practicæ, vt primò quæ ad perditam, deinde quæ ad quæsitam; ac denique quæ ad inuentam ouem, seu animam peccatricem spectant, producantur.

*Quis ex vobis homo qui habet centum oues, & si perdiderit vnâ ex illis, nonne dimittit nonaginta nouem, &c.*

## VERITAS PRACTICA.

Qui sibi palpat quod non longe erret, periculosius sæpe is errat quàm qui aberrat longius.

*RATIO EST, Quia periculosius ille errat, qui minus reuertitur ad Pastorem quàm qui reuertitur.*

*Sed qui sibi palpat quod non longè erret, sæpe ad Pastorem minus reuertitur quàm qui aberrat longius.*



Qui sibi palpat quod non longe erret, periculosus sape, &c. 139

Ergo & is errat periculosus; quod sanè est diligenter precauendum cum Gratia.

I. P V N C T V M.



VM sint multi & varij status ac gradus eorum qui se à Pastore suo, Christo Domino miserè subtrahunt; videndum est unicuique quonam ex illis in gradu sit. Primi sunt illi qui per peccata vel affectus humanarum rerum vehementiores, tam arctè creaturis addiçi sunt, vt vnā sequantur concupiscentiam: *Va filij desertores, dicit Dominus, vt faceretis consilium & non ex me: 1s. 30. & ordiremini telam, & non per Spiritum meum: vt adderetis peccatum super peccatum, & os meum non interrogastis.*

Alij non ita forte se suis sinunt cupiditatibus, vt grauius peccare vellent, sed quid in suo vitæ genere potissimum velit Deus, non multum curant: *Huiusmodi Christo Domino nostro non seruiunt, Rom. 16. ait Apostolus, sed suo ventri: Sux item gloriæ, suæ rei domesticæ. Id est, hoc præcipue spectant & intendunt suis in quotidianis actibus; seruierunt creaturæ potius quàm Creatori.*

*Ibid. 20.*

Sunt alij denique qui suis in externis & temporalibus negotiis Deum satis frequenter consulunt, & ad eius ductum se suaque formant: sed in internis & spiritualibus, se solos audiunt; & sape fit vt aliter ac Deo visum esset, vel plus vel minus faciunt. *Quæ nolui, elegistis. Consilium Dei spreuerunt in semetipsos. Hic te ipsum nosce attentius: & quod monet Sapiens in vita tua tenta animam tuam. An te totum Christo velut ouem Pastori, regendum finis? An quid illo inconsulto aggredieris? An quod Ille de te tuisque statuit, vt sanctum colis & veneraris? An quid humanum est denique seu creatum, quod te ab illo vel tantillum dimoueat? Cæue tibi palpes; vel quod illud sit leue, vel quod si erras non longe abriperis, non abis in viam peccatorum, nec in vias ita prauas quæ ducant in interitum & perditionem. Nam præterquàm quod talis in errore progressus fieri potest, vt semper longius ac longius à Pastore discedas, esto tamen, non tam longè progrediaris quàm alij: non minus tamen distas à periculo: quin & sape accidit, quod tibi modo est acuratius perpendendum, sape inquam accidit, vt qui sibi palpat quod non longe erret, periculosus erret.*

*1s. 65.*

*Luc. 7.*

*Ecclesi. 37.*



quàm qui aberrat longius. Ratio est manifesta; Nam periisti, si non redieris. Hoc est enim perire, sic seiunctum esse à Pastore, ut numquam ei vnieris quia illi debes vnione coniungi ut ab eo dirigaris, & mouearis: sicque fiat ut numquam Pastoris vocem audias, sed tamquam pullus onagri te liberum natum putes. Sint alij velut prodigus in regione longinqua & remotiores à Patre quam tu forte sis; si tamen redeant, nonne periculum sic euitant? *Perierat & inuentus est!* At tu qui non procul quidem distas, distas tamen & non redis, certet unus vel maxime periclitaris, & omnino periisti si non omnino redis, quia siue multum siue parum discesseris; discessisse, periisse est. *Væ eis quoniam recesserunt à me, FILII subtractionis in perditionem*, ait Apostolus, quasi diceret, nemo se subtrahit quin se perdat, nemo est extra viam arctam quin sit in via lata & via perditionis. Non est tamen desperata salus, quia non est desperatus reditus; In solo reditu spes salutis reposita. In desperato reditu desperata est salus. *Et non redistis ad me?* Quinquies repetitur in hoc vno capite. Et sæpe aliàs, *Non sunt reuersi*, Nihil crebrius in Prophetis. Nec tam videtur queri Deus quod à se discesserint, quam quod ad se non redierint. *Et dixi, cum fecisset hæc omnia, ad me reuerrere, & non est reuersa. NUMQUID qui cadit non resurget, & qui auersus est non reuertetur? quare ergo auersus est populus iste auersione contentiosa? apprehenderunt mendacium, & noluerunt reuerti.* Quasi diceret, fingunt sibi aliquid quo se putant tutos & quo impediuntur à reditu, sed mentiuntur, & omnino peribunt nisi redeant. *Periisti popule chamos, quia comprehensi sunt filij tui & filia tua in captiuitatem.* Numquid si tu cum istis comprehenderis, & cum istis peribis?

## II. P V N C T V M.

**S**ED qui sibi palpat quod non longè erret, sæpe ad Pastorem minus reuertitur, quam qui aberrat longius.

Nam vel ex hac sola cogitatione quod non tam longè discesserit quàm alij, facile sibi persuadet non esse redeundum, aut se facile rediturum quando volet; Quod genus quoddam est præsumptionis de quo grauiter & verè inter alios Tertullianus: *Præsumptio, inuerecundia portio est, inflat petitem, despiciat datorem: Itaque decipit nonnumquam. Ante enim quàm debeatur, repromittit, quo*



*Qui sibi palpat quod non longe erret, periculosius saepe, &c.* 141

*semper is qui est praestaturus, offenditur. Itemque alibi: qui praesumit minus veretur, minus praecauet, plus periclitatur. Timor fundamentum salutis est, praesumptio impedimentum timoris.* <sup>1 de cultu fam.</sup>

Atque haec est ratio, ut alibi dictum est, cur Dominus magis optet frigidum quam tepidum: quia cum utrique sit redeundum ab illo statu in meliorem, facilius ille qui est frigidus reuertetur quam tepidus; quia facilius agnoscet sui status periculum, quod quidem periculum licet pro eo tempore quo uterque illorum in suo statu degit, sit maius in frigido quam in tepido, tamen pro futuro consequenti maius est in tepido quam in frigido, quia is tandem resipiscit, non alter. Sic glossa: *Non optat eum frigidum simpliciter, sed talem de quo spes major habeatur*: Talis est autem frigidus praeter tepido. Sic Publicanus à Phariseo exiit, ore Domini, iustificatus; sic Meretrices praecedunt in regno Dei Iudaeos. Quia videlicet illae licet remotiores magis tamen mouentur & redeunt. *Frequenter vidimus, inquit Cassianus, de frigidis atque carnalibus, id est de secularibus ac paganis ad spiritualem peruenire feruorem: de tepidis atque animalibus omnino non vidimus*; Quia videlicet non sibi timent, non sibi putant sicut aliis esse reuertendum. *Quia dicis quod diues sum; & nescis quia tu es miser & miserabilis! O triplicem & robustam in vno corde malitiam! Esse miserum, & nescire, & dicere quod sit diues.* <sup>Apo. 3. Luc. 13. Matth. 21. Col. 4. c. 19. Apo. 3.</sup>

### III. P V N C T V M.

**Q**VI sibi ergo palpat quod non longe erret, periculosius saepe errat quam qui aberrat longius. Nam licet non longe erret, errat tamen, & ab errore in viam illi est redeundum: *Reuertere, reuertere Sulamitis.* At non redibit quamdiu sibi palpat, non redibit tam facile quam qui se facile pereuntem videt, & qui dum vocantem pastorem audit, sibi facile dictum putat quod audit, & periculum videns euitat. Atque illa ipsa ratione quam non redit ille qui non longe distat, reuertitur iste qui errat longius: nempe ille videns alios remotiores, non sibi dictum applicat quod errantibus dicitur ut redeant; sunt enim, inquit, alij me remotiores quibus id magis conuenit. At vero iste remotior nihil habet simile quod contra dicat, nihil habet quo diuinum monitum detorqueat à se in alios. *Ego sum, inquit, qui peccaui, ego qui malum feci.* <sup>2 Reg. 24. 1. Par. 21.</sup>



142 Dominica 3. post Pent. De oue perditâ, quæsitâ & inuentâ.

Ac proinde alio remanente in errore, hic reuocatur & se suo Pastori reddit. Vos qui aliquando eratis longe, facti estis prope in sanguine Christi. ISAIAS audet & dicit: inuentus sum à non quærentibus me: palam apparui iis qui me non interrogabant. Ad Israel autem dicit: Tota die expandi manus meas ad populum non credentem, & contradicentem. Id est: sicut Gentes quæ ab ipso Deo remotiores erant quam Iudei, facilius tamen Christianam religionem susceperunt: ita ex Christianis si qui forte sint moribus deteriores, sæpe facilius cum Diuina gratia resipiscunt, quàm minùs deprauati qui se ab illâ moueri non sinent. Multi ab oriente & occidente venient: filij autem regni ejicientur.

Quamobrem hic te ipsum rursus inspicere: Nonne filius regni es? at nonne filius subtractionis? nonne subtractionis contentiosus, quæ contendit cum Gratia nolens reuerti, & contendens sibi non esse reuertendum! Ego scio contentionem tuam & ceruicem tuam durissimam. Adbuc viuente me & ingrediente vobiscum, semper contentiose egistis contra Dominum, quanto magis cum mortuus fuero? Numquid Pastor tuus hæc tibi posset dicere? numquid vero hæc audiens cor tuum obdurabis? Conuertere ad Dominum, & relinque peccata tua, precare ante faciem Domini, & minue offendicula. Reuertere ad Dominum, & auertere ab iniustitia tua, & nimis odito execrationem, & cognosce iustitias & iudicia Dei.

Hæc opportunè referri possent hæ Veritates Practicæ.

Ne dicas, sufficiens mihi sum.

In 1. parte, Fer. 4. Hebdom. 3. post Epiphan. & aliis duabus præcedentibus.

Qui se existimat stare, videat ne cadat.

In 2. parte, Feria 6. post Septuagesimam.

Melius est in via claudicare, quàm præter viam fortiter ambulare.

In 2. parte, Fer. 4. post Sexagesimam.

Erranti in dubiis & non oranti, nulla est erroris excusatio.

In 2. parte, Fer. 6. post Octauam Ascensionis Domini.

Verendum, ne quod tibi deest ad perfectionem, desit etiam ad salutem.



*Quanta est Christi querentis animam cura, tanta est, &c. 143*

*In 4. parte, Fer. 2. Hebdom. 17.*

Qui vel vni creaturæ nimis adhæret, duo mala facit,  
de quibus ipse Creator,  
*Me dereliquerunt fontem aquæ viuæ, &c.*

*In 4. parte, Sabbato Hebdom. 18.*

---

## DE OVE A PASTORE QVÆSITA.

*Nonne dimittit nonaginta nouem in deserto, & vadit ad illam quæ perierat, donec inueniat eam?*

## VERITAS PRACTICA.

Quanta est Christi quærentis animam cura, tanta est animæ Christum fugientis incuria.

*SENSVS ET RATIO EST, Quia fugientis Christum animæ tanta esse apparet incuria & negligentia suæ salutis, quàm magna tùm & præsens esse videtur obligatio non fugiendi, nec negligendæ salutis.*

*Sed quanta est Christi quærentis animam cura, tam magna tùm & præsens videtur esse obligatio non fugiendi, nec negligendæ salutis.*

*Ergo & tanta est eius incuria & negligentia, quæ profecto excitari debet cum gratia, conferendo talem incuriam cum tali cura.*

## I. P V N C T V M.

**V**NVS est quidem Diuinæ Bonitatis & Sapientiæ, quæ in hac lucent parabola, finis & scopus, errantem à se animam reuocare, sibi que reddere. Sed multa sunt & diuersa media, quibus ad hunc finem vtuntur: sic enim suauius



Sap. 12.

agunt & fortius, quod est maximè proprium Diuinæ Bonitatis & Sapientiae. Quod verò ex multis potentissimum esse solet, *pudor & verecundia* nobis modo proponitur, cum ex opposita nostri Pastoris cura manifestè apparet nostra incuria: quis enim non erubescat, qui se illi viderit oppositum & repugnantem, in cuius vna similitudine nostra est beatitudo? Quis tali porro rubore tactus non se à fuga illa contineat, in quam se turpiter abiicit, quoties se à Christo suo vocatum, & inquisitum & attractum sentit?

Gen. 42.

Ios. 18.

Matth. 25.

Ibid.

Prov. 19.

Sic ergo est, sic perpendendum est, sic erubescendum est, quòd *quanta est Christi querentis animam cura, tanta est animæ Christum fugientis in uria*, tanta vecordia, tantum probum & dedecus: Quid enim est vniuersim, quod insigniorem & magis pudendam designet incuriam, nisi cum maior adest obligatio curæ adhibendæ; cum id scilicet debitum exigit, cum facultas suppetit, cum facilitas & opportunitas obuiant, cum omnia denique simul conspirant, vt quod incumbit negotium procuretur? Quid est, quod Iacob sic suos arguit: *quare negligitis? audini quod frumentum venundetur in Aegypto*, nisi quod tum vrgeret necessitas, cui subleuandæ facultas aderat, nec erat praesens occasio negligenda. Nonne sic Iosue quibusdam desideribus Israelitis: *Vsquequo marceitis ignauia? & non intratis ad possidendam terram quam Dominus Deus patrum vestrorum dedit vobis?* Nempe illud erat tempus, quo erat terra possidenda vel perdenda. Sic pigrum Sapiens non alio carpit frequentius nomine, quàm quod illo potissimum otietur tempore, quò magis illi esset laborandum. Nonne sic ille malus & piger pronuntiatur seruus, qui cum austerum se putaret habere Dominum, qui meteret vbi non seminarat, non ei tamen acceptum, vt alij, duplicasset talentum. Nonne sic denique Virgines, quæ veniente sponso dormitarant, dicuntur fatuæ: nec cum aliis ad nuptias introducuntur, quia tum illis maximè vigilandum erat, quando se in somnum dederunt.

Sic prorsus animæ fugientis Christum tanta dici debet incuria, quàm magna tunc dici potest obligatio non fugiendi, nec negligendæ quæ sese offert, gratia. Vnde est illud egregium Sapientis dictum: *Qui custodit mandatum, custodit animam suam: qui autem negligit viam suam, mortificabitur.* Hoc est enim negligere viam suam, cum salutis via negligitur: tunc porro salutis via negligitur, cum eius procurandæ singularis opportunitas quæ se dabat,



dabat, deseritur. Et profecto mortificabitur quisquis se ita negligit, mortificabitur nota dedecorosa vecordia, mortificabitur priuatione boni quod negligit, mortificabitur detrimentis inde sequentibus.

## II. P V N C T V M.

**S**E D *quanta est Christi querentis animam cura, tam magna tunc & præsens videtur esse obligatio non fugiendi, nec negligenda salutis.*

Sic enim decet, & sic necesse est; Decet ex illa Bonitate Christi, cuius est tanta circa vnam animam cura & sollicitudo. Necesse verò est ex eiusdem Sapientia, vt dicetur, si primò Bonitatem illam expendimus. Vide & contemplare quid sit Pastorem Christum, perditam quærere animam. Potestne par in creatis & humanis reperiri Bonitas, cum nulla par inueniatur Majestas, quæ se ita in beneficentiam & charitatem demittat? Narratur quidem de Carolomanno Caroli Martelli filio, Rege Austrasiæ & Sueuiæ, Monacho Cassinensi, ouem claudicantem in humeros suscepisse, atque in caulam deportasse; sed Rex esse desierat; Cum enim Monachum induit, Regem exiit: At Pastor noster sic humanam suscepit naturam, vt diuinam nunquam deposuerit; sic homo est, qui quærat animam, vt Deus ipse sit, quem sua Bonitas excitat ad illam animæ curam. Potestne verò id audire, id credere anima, nec intelligere quanta sit inde non fugiendi, sed sui sistendi obligatio, quæ tantæ respondeat Bonitati? En offensus Deus cum pro suo in peccatum odio peccatricem in æternos ignes animam detrudere iam iam posset, se ipse continet, & quasi animam ipse offendisset, ipse offensus Deus animam se toties offendentem quærat, inclamat, excitat, vrget, stimulat, vt ad se redeat; Et tunc anima non intelligeret se tantum obligari ad reditum, quanta est illa Bonitas? Intelligeret certè si hoc vellet attendere; & hoc profecto attenderet, si vel quod decet cogitaret.

Quid Saule ferocior, cum in Dauidem fureret? Audiuit tamen ferox ille Saül sibi semel à Dauide sic paritum, vt cum vitam posset eripere, suæ duntaxat chlamydis oram præciderit. Tunc quis sensus Saülis in Dauidem? quæ ferocitatis in lenitatem commutatio? Scriptura multis explicat, quæ videre licet loco anno-

Anno Christi  
750.

1. Reg. 24.



tato. Numquid verò plus valet in animam Deus quàm Dauid in Saülem? Numquid plus Deo debet anima, quàm Dauidi Saül? Cur non id igitur magis deceret, cur non id magis intelligeret anima, quando sibi meliorem sentiret Deum quàm vlli vnquam hominum homo bonus extiterit.

Et verò id necesse est ex Diuina Sapiëntia, quæ in illa Pastoralis cura potiores partes tenet: necesse est, inquam, non fugere, quæ necessitate tenemur prouidere saluti per opportuna media. Sicut enim ad Diuinam spectat Sapiëntiam subministrare tempus, locum, modos seu gratias, & alia salutis animæ, quæ vocant, congruentia media; sic planè est animæ non illa respuere, non refugere, non differre tempus, non mutare locum, non variare gratias, nec ab vllò deflectere gubernationis tramite, quem coelestis Prouidentia constituerit; ne si Deum deserat viæ ducem, deseratur in via, tandemque pereat. *Metuentes Dominum sustinete misericordiam eius, & non deflectatis ab illo, ne cadatis.* Iam enim idcirco cecidit & errauit à Pastore anima, quod eius ductum non sit secuta: Nunc autem cum nouam hanc ei Pastor gratiam offerat, vt si velit, reuertatur; sic Pastorem debet sequi, non fugere, vt si fugiat, nec sequatur, non minus tum dicatur deflectere, quàm cum primò cecidit; imò & magis periculosè deflectat, quia grauius sæpe est in hanc nouam peccare gratiam quàm in antecedentes alias; vt sæpe alibi demonstratur, & ex subiectis infra veritatibus liquet. Sufficiat hic modo Prophetæ locus, vbì Dominus ad contemptibilem, vt vocat, animam: *Intempore, inquit, placito exaudiui te, & in die salutis auxiliatus sum tui;* Vnde Apostolus, *Adiuuantes autem exhortamur, ne in vacuum gratiam Dei recipiatis; ait enim, tempore accepto exaudiui te, & in die salutis adiuui te.* Ecce nunc tempus acceptabile, Ecce nunc dies salutis, Et quæ plura pergit, quæ nulli vnquam aptius quadrare possunt tempori, quàm quo perditam Christus vocat & quærit animam. Cur porrò dicitur tempus acceptum & acceptabile, nisi quia sic illud acceptare necesse est, vt nisi tum acceptetur, cum se offert, transeat, nec reuertatur, & qui quærebat animam Dominus, post quærat ab anima nec inueniatur, prout ipse dixit, *queretis me & non inuenietis.* Nonne hoc sponsæ contigit, quæ animam Diuinis reluctantem monitis repræsentat? nonne cum distulit surgere quando vocabatur, post verò cum surrexit & se vocantem conuenit,

*Ecclesi 2.*

*Isa. 49.*

*2. Cor. 6.*

*Ioa. 7.  
Cantic. 5.*



*Quanta est Christi querentis animam cura, tanta est, &c. 147*

non inuenit? nonne hinc eius lachrymæ, hinc gemitus: at ille declinauerat atque transierat: *quesiui & non inueni illum: vocaui & non respondit mihi!* Oportebat nempe tum venire & respondere, cum quarebat & vocabat, nam *ua qui spernis, nonne & sperneris, 1s. 30.* cum fatigatus desieris contemnere, contemneris.

### III. P V N C T V M.

**Q**UANTA est igitur Christi querentis animam cura, tanta est anima Christum fugientis incuria: Nam sicut illa quæ tum agit Christus magnam eius indicant curam, sic profecto quæ simul anima debebat agere, nec tamen agit, supinam eius produnt incuriam. Sic enim fit ex illa boni & mali opposita diuersitate, ut quanto bonum lucet apertius, tanto malum appareat grauius & probum ignominiosius. Tunc confunderis & erubescas, *Ierem. 22.* ait animæ Dominus, quando scilicet malitia tua meæ Bonitati, & incuria tua meæ curæ opponetur. Quamobrem ad hanc socordiam magis agnoscendam, atque inde ad salutarem excitandam confusionem, nihil habet ipse frequentius, quàm ut alterum alteri sic opponat, quemadmodum vel ex vno Propheta datur intelligi, *Locutus sum, inquit, ad vos mane consurgens, & loquens, & non audistis: 1bid. 7.* vocaui vos & non respondistis: Audite vocem meam & ero vobis Deus, & vos eritis mihi populus: & ambulate in omni via quam mandauimus vobis, ut bene sit vobis. Et non audierunt, nec inclinauerunt aurem suam, sed abierunt in voluntatibus, & in prauitate cordis sui mali, factique sunt retrorsum & non in ante. Et misi ad vos omnes seruos meos Prophetas, per diem consurgens diluculo & mittens. Et non audierunt me, nec inclinauerunt aurem suam, sed indurauerunt cervicem suam, & peius operati sunt quàm patres eorum. Et rursum, mane consurgens contestatus sum, & dixi, audite vocem meam, & non audierunt nec inclinauerunt aurem suam, sed abierunt unusquisque in prauitate cordis sui mali. Nec non iisdem præterea pene terminis: Ego autem locutus sum ad vos, de mane consurgens & loquens, & non obedistis mihi, misique ad vos omnes seruos meos Prophetas, consurgens diluculo, mittensque & dicens: conuertimini unusquisque à via sua pessima, & bona facite studia vestra; & non inclinastis aurem vestram, & non audistis me. Perpendi hæc certè debent toties ab eodem & eisdem repetita Verba: Mane consurgens & diluculo loquens. Vnde & tandem concluditur: *Idcirco*



*hac dicit Dominus : Ecce ego adducam super Iuda & super omnes habitatores Ierusalem, uniuersam afflictionem quam locutus sum aduersum illos: eo quod locutus sum ad illos & non audierunt: vocavi illos & non responderunt mihi : quasi diceret, hoc vno maxime punientur, quod tam parum de salute sua solliciti fuerint, quando illi tantam ego sollicitudinem propterea demonstrabam. Nimis enim hoc pudendum & castigandum in re tanta, qualis est salus animæ, sic animam oscitari, vt quo ipsa tempore Saluatorem deberet quærere, quæratur à Saluatore, & quærentem fugiat atque auerfetur.*

Prou. 18.

*Quid nempe potest causari si pereat, præter illam oscitantiam & incuriam in tam serio grauique negotio? Quid est aliud quam contemptum & salutis & Saluatoris præ se ferre? Quid ille verò portendit atque infert contemptus, præter iam dicta, nisi quod ait Sapiens: Impius cum in profundum venerit peccatorum, contemnit, sed sequitur eum ignominia & opprobrium. Plura quidem alia sequuntur damna, sed illud insigne est ad omnem æternitatis memoriam, quod ignominiosè pereat, qui tunc perit, cum saluari posset.*

Gen. 26.

*O te ter miserum, qui hac legis vel audis, nisi tu teipsum hinc agnoscas, nisi agnitione pudeat & pudore poeniteat! Nonne à perfecta quâ te Deus ducit via deuiasti? Nonne vt redires, tam crebrò es stimulatus, vt quia crebriores fuerunt stimuli, iam penè retusi sint & vix sentiantur? Numquid verò tibi propterea putas erubescendum & pudendum? Numquid aliquando reuertendum? Quandonam autem? An quando Saluatori, vel quando tibi placebit? Non times tibi Christus objiciat, quod rebellibus & infidis olim Isaacus dixit: Quid venistis ad me, hominem quem odistis & expulistis à vobis? Perge in hoc affectu, & plura si optas, vide his affines veritates.*

*Quò longius differs, difficultatem difficilius tolles.*

*In 1. parte, Fer. 2. Hebd. 4.*

*Si ordinatis ad salutem mediis non vteris, Mediatore Christo abuteris.*

*In 2. parte, Sabbato post Quinquagesimam.*

*Quantò teipsum negligis quasi non esses cum cæteris*



*Quod vnius conuersi peccatoris esse videtur, hoc est, &c. 149*  
periturus, tantò te Christus doluit præ cæteris  
perituris.

*In 2. parte, Fer. 5. Heb. 1. Quadragesima.*

Sedentem in cælo Christum, & inde nobis loquen-  
tem non audire, periculosius est, quàm dum in  
terris loqueretur.

Sic dignum est cælum nostris desideriis, vt nisi cæ-  
lum desideres, cælo sis indignus.

*In 2. parte, Fer. 5. & 6. Ascensionis Domini.*

Reuocanti hominem Deo ab errore viæ suæ, non ob-  
sequi, peius est quàm primò vocantem ne erraret,  
non sequi.

*In 2. parte in fine, vbi de statibus, considerat. 4. Et vide in die  
Pentecostes, de peccato in Spiritum sanctum.*

---

## DE OVE A PASTORE INVENTA SIVE DE ANIMAE CONVERSIONE.

*Et cum inuenerit eam, imponit in humeros suos gau-  
dens, & veniens domum conuocat amicos & vi-  
cinos dicens illis, congratulamini mihi, quia in-  
ueni ouem qua perierat.*

## VERITAS PRACTICA.

Quod vnius conuersi peccatoris esse videtur, hoc est  
totius vniuersi negotium.

RATIO EST, Quia hoc est totius vniuersi negotium, quod  
toti vniuerso benè vel malè vertitur.

Sed quod vnius conuersi peccatoris esse videtur negotium, toti  
vniuerso benè vel malè vertitur.



150 Dominica 3. post Pentecosten. De oue à Pastore inuenta.

Ergo & totius est vniuersi negotium; quæ sanè consideratio ponderosa est & frugifera, siue ut nobis cum gratia, siue ut aliis vacemus conuertendis.

I. P V N C T V M.

Ephes. 1.

**Q**UID est quod de Christo scripsit Apostolus, *Instaurata omnia quæ in cælis & quæ in terra sunt in ipso*? An pro aliis etiam creaturis Christus & non pro solo venit homine? An erat aliquid instaurandum in cæteris sicut in humana natura? Numquid cælo, numquid elementis quidquam Christus contulit, quod ante non haberent?

Lib. 31.

Mor. c. 35.

Responderi primo posset, per cælum, Angelos: & per terram, homines hic intelligi, quos inter, à Christo Domino sunt instaurata omnia, quia simul in vnam beatitudinem conueniunt, & ut ait S. Gregorius, *illuc humiliati homines redeunt, unde Apostata Angeli superbiendo ceciderunt*. Secundò, quidam interpretantur in Christo sic instaurata omnia, ut quæcumque in cælis & in terra sparsim creata sunt bona naturæ & gratiæ, simul in Christo collecta sint & velut recapitulata; sic enim D. Hieronymus ex Græca voce loquitur, quasi Christus esset compendium & summa quædam rerum omnium, quæ vel in cælis vel in terra spectantur, quæ vel in Angelis, in hominibus, & in cæteris creaturis insigniores apparent. Ille vnus Angelorum Intelligentiam, Patriarcharum hominum Sanctitatem, solis & astrorum splendorem, aëris suauitatem, aquarum abundantiam, & terræ fecunditatem nobiliori quodam modo complectitur. *Primogenitus omnis creature*, non solum qui sit primus & excellentissimus inter creaturas, sed qui omnium excellentiam primus ipse & præcipuus sic participet, *ut in ipso condita sint vniuersa in cælis & in terra, visibilia & inuisibilia, siue throni, siue dominationes, siue principatus, siue potestates, omnia per ipsum & in ipso creata sunt, & ipse est ante omnes, & omnia in ipso constant*. Sic idem fuit Apostolus.

Coloss. 1.

Ibid.

Tertiò denique, quod propositæ nobis Parabolæ practicæque Veritati videtur opportunius, sic alij explicant instaurata per Christum omnia, quæ in cælis & in terra sunt, quatenus scilicet beneficio Redemptoris Christi conuertuntur peccatores atque in



gratiam cum Deo redeunt; qua in conuersione, quoue in reditu tantum inest boni, tam longè lateque patet eius virtus ac momentum, vt in rerum omnium vniuersitatem redundet, sicque ad coelum & ad terram vniuersim spectet, quod conuertantur peccatores, atque illius vera conuersio *non sit tantum illius conuersi peccatoris negotium, sed totius vniuersi.*

Quod certè si perpenderent peccatores, & qui peccatoribus reuocandis impenduntur, intelligerent acrius, quale sit illud opus conuerti peccatorem, quod ad omnes qui coelum terramque incolunt spectare dicitur. Quamobrem in hac ponderanda Veritate non est transcursum legendum aut audiendum quod proponitur, sed alto quietoque animo sigillatim reuoluendum, quàm sit illud verum, quàm momentosum, & expellendo peccato efficax.

Ac primò quid clarius, quam quod prima propositione præmittitur, id esse totius vniuersi negotium, quod toti vniuerso bene vel malè vertitur, prout videlicet bonum vel malum exitum fortietur: prout verè vel falsò peccator conuertetur. Sic Adamo imperatum seu potius vetitum illud opus circa Scientiæ boni & mali arborem, opus erat & negotium totius humani generis, quia inde vt patuit, primogenius omnium hominum status pendebat: atque ex consequenti, Christi opus Saluatoris, opus & negotium vniuersale fuit. Quin & ipsa Virgo Deipara, sapienter à Diuo Bernardo prædicatur, *Negotium seculorum & terræ medium*, iuxta illud Prophætæ de Domino Iesu, *operatus est salutem in medio terræ.* Serm. 2. in die Pentec.  
*Ad illam enim*, inquit sanctus Abbas, *sicut ad medium, sicut ad arcam Dei, sicut ad rerum causam, sicut ad negotium seculorum respiciunt, & qui in cælo habitant, & qui in inferno, & qui nos præcesserunt, & nos qui sumus, & qui sequentur, & nati natorum & qui nascuntur ab illis. Illi qui sunt in cælo vt refarciantur, & qui in inferno vt eripiantur: qui præcesserunt, vt Prophætæ fideles inueniantur: qui sequuntur, vt glorificentur. Eò beatam te dicunt omnes generationes, genitrix Dei, Domina mundi, Regina cæli, omnes inquam, generationes quæ omnibus vitam & gloriam genuisti. In te enim Angeli letitiam, Iusti gratiam, peccatores veniam inuenerunt in æternum. Merito in te respiciunt oculi totius creaturæ quia in te & per te & de te benigna manus omnipotentis quicquid creauerat, recreauit.*

Quæ quidem sancti Patris dicta sic omnia referenda fuerunt, non modò quia nostram valde illustrant propositionem, sed quia



veritatis praxim & finem valde conciliant: Sic enim peccator intelliges, quantum illi debeas à qua Saluatorem habes, & ad quam Saluatore offenso confugas. Hæc est enim illa Mulier quæ tanta sedulitate perditam quærit drachmam, id est, animam, vt si Pastoris offensi opera non adesset, nunquam illa deesset: yt fusè alibi suis locis infra designatis.

## II. P V N C T V M.

**S**ED quod vnus conuersi peccatoris videtur esse negotium, sic toti vniuerso bene vel male vertitur, vt prout verè an fictè conuersus peccator fuerit, bene vel malè sit toti vniuerso.

Primò, licet Deus sit supra rerum omnium vniuersitatem, & ad eius declarandam sublimitatem expresse dicatur homini: *si peccaueris, quid ei nocebis? & si multiplicatae fuerint iniquitates tue, quid facies contra eum? Porro si iuste egeris, quid donabis ei? aut quid de manu tua accipiet? Homini qui similis tui est, nocebit impietas tua, & filium hominis adinuabit iustitia tua*: Tamen ita vniuersalis est & tam vera propositio, vt ipsum Deum comprehendat, vt ipsi Deo bene vel male sit à peccatore conuerso vel non conuerso, quantum dici fas est suo modo, bene vel male à creaturis esse Deo. Sic autem dici fas est, quatenus sua ipse lucra vel damna vult æstimare, quæ ab illis dantur obsequia vel negantur, vel quæ ab ipso Deo conferuntur hominibus aut recusantur beneficia.

Sic expresse sanctus Hieronymus, *Salus creature lucrum est Creatoris*. SVVM deputat quod nostrum est, inquit D. Augustinus. Contemplare paulò attentius quantum intersit discriminis inter animam Deo gratam vel infensam: inter sponsam Christi vel adulteram; inter beatam vel damnatam; inter charitatis seu gratiæ decus internum, vel peccati turpitudinem; inter æternas laudes à Beatis decantandas, vel sempiternas blasphemias à damnatis euomendas. Hoc est, quo non modo bonum vel malum Dei dignoscitur, sed quale quantumque sit bonum vel malum hoc, euidenter declaratur. Nonne propterea malum culpæ quantumuis leue sit, malo poenæ quantumcunque graui grauius esse decernitur, quia malum culpæ malum est Creatoris; malum autem poenæ malum est creaturæ? *Vidit Dominus & malum apparuit in oculis*



*oculis eius, & aporiatu est,* inquit Propheta. Quid quod etiam con-  
stanter asseritur Christo suam mortem non tam fuisse grauem  
quàm vel vnum peccatum, quia scilicet peccato Deus offenditur,  
quem cum pluris faceret Christus, quàm corpus suum, magis pro-  
inde dolebat eius offensa quàm sui corporis. *Pater maior me est.* Io. in. 14.  
Vide in Passione Domini.

Iam verò si quid de Christo consideremus separatim à solo  
Deo; si contemplemur salutis humanæ negotium, non solius esse  
Dei sed hominis Dei qui Christus dicitur, quis non agnoscat in  
vnus vera conuersione peccatoris quanta res Christi agatur, cum  
de illius agatur Sanguine, de illius meritis, de tota denique Christi  
vita, quæ in isto perit aut saluatur peccatore, prout verè aut falsò  
conuertitur. *Quæ utilitas in meo sanguine dum descendo in corruptio-* Ps. 29.  
*nem?* Nonne propterea bonus ille Pastor inuenta sua dicebat oue:  
*Congratulamini mihi:* Non oui, non ouili, non cuiquam prius quam  
mihi, vt obseruat sanctus Gregorius, quia videlicet illius ouis est, *Hom. 34.*  
Sicut illius erat iactura cum esset perditæ, sic illius est lucrum & *in Euang.*  
gaudium cum est inuenta.

Quod ipsum de sacra Virgine tam certò est asserendum quàm  
verè constat, illam esse Matrem quæ tot in Christo filios genuit,  
quot sunt Christi fratres: quæ suos ita diligit, vt pro illis seruandis  
in Christi filij mortem consenserit, quæ peccatorum denique pro-  
curandam conuersionem suum esse proprium munus intelligit,  
vnde illam idcirco *de presenti translata seculo* profitetur Ecclesia, *In secreta*  
*vt pro peccatis, inquit, apud Deum fiducialiter intercedat.* *Vigil. Af.*  
Quanti putas *sumps.*  
igitur hoc illius interesse, si peccatores conuertantur aut pereant?

De Angelis certè dubitari non potest, cum expressè in parabo-  
la memoretur eorum gaudium de peccatore conuerso, & tantam  
cum peccato pugnantiam omnes habent, vt sanctus Basilius asse-  
rat, *Quod quemadmodum sumus fugat apes, & fætor columbas, sic pec-* Homil. 20.  
*catum Angelos, quorum etiam custodiam reddit inefficacem.* *in Psal. 33.*

Res item agitur Animarum purgatorij, quibus peccatores aut  
omnino non suffragantur, aut minus valida sunt eorum suffra-  
gia, quæ peccati veneno sunt infecta. *Nō exaudiam,* dicit Dominus. Ps. 1.

Ad singulos præterea spectat homines vnus domus, vnus ci-  
uitatis, vnus regni, & vnus Ecclesiæ: sicut enim vnus aut alter  
innocens & probata vitæ Diuinam lenit iustitiam, ne ceteros  
puniat peccatores; sic vel vnus peccato sæpe fit, vt multi pereant,



Gen. 18. & eandem peccati temporalem luant poenam. Nonne si vel decem Sodomis fuissent iusti, reliquis Dominus pepercisset? *Recessit ab eis omne presidium*, dicebat Iosue de Amorrhæis, quod de vno Iobo quidam interpretantur, qui dum ibi viueret, suorum erat presidium; dum è vita excessit, tum recessit ab eis omne presidium. Nonne propter vnum Achan qui vel vnum peccauit, sexcentis millibus à Deo dicitur, *non ero ultra vobiscum, donec contratis eum qui huius sceleris reus est*. Nonne & propter peccantium multitudinem sæpe puniuntur peccatores, quibus esset condonatum, si pauciores fuissent? *sanguis sanguinem tetigit*, ait Propheeta, de peccatis simul iunctis, *propter hoc lugebit terra, & infirmabitur omnis qui habitat in ea*.

Numquid ad vniuersam verò spectat Ecclesiam quæ vnum corpus in Christo efficit, nullum vt sit membrum eius inutile, nullum onerosum, & nullum pestilens, qualis est peccator non conuersus? Numquid & hæreticis & infidelibus obstat, quo se minus Ecclesiæ Christoque aggregent, cum Christianos vident peccatores? *Per vos blasphematur nomen Dei inter gentes*. O religionis probrum & scandalum!

Quin & ipsis damnatis peius cedit à quouis peccatore, quibus in culpa & poena pares habere non est poenæ solatium, sed augmentum. Vnde ille sepultus in inferno sibi timens dicebat de fratribus, *ne & ipsi veniant in hunc locum tormentorum*.

Addo & rationis expertibus creaturis tantum conducere peccatoris conuersionem, quanti dicuntur gaudij vel gemitus sensum habere, quando scilicet probis aut improbis seruiunt; Quò refertur illud Apostoli: *Vanitati creatura subiecta est, non volens, sed propter eum qui subiecit eam in spe, quia & ipsa creatura liberabitur à seruitute corruptionis in libertatem gloriæ filiorum Dei: scimus enim quod omnis creatura ingemiscit & parturit adhuc*, Id est, perinde ac si dolores parturientis sentiret, sic foetum edit & fructum qui seruire debet his qui Deo minus seruiunt quàm ipsæ inanimæ creaturæ. Vnde & Sapiens de offenso à peccatis Deo, *armabit creaturam ad ultionem inimicorum & pugnabit cum illo orbis terrarum contra insensatos*.

Dici & posset de illis præcipuè creaturis quæ nutriendo seruiunt homini, transeuntque quodammodo in ipsius substantiam, quem nutriunt; quod ita felices aut infelices euadunt, prout ille homo beatus aut miser fuerit. Vnde quantum capaces natiui sunt appe-



titus, tantum profecto appeterent bonis ac beatis inferuire, refugerentque peccatores, sicut de manna dicitur, quod semper bonis esset lapidum, malis autem insipidum & nauseosum. *Creatura enim tibi factori deseruiens*, ait Salomon, aut quisquis est Sapientiae libri author, *exardescit in tormentum aduersus iniustos*, & Sap. 16. *lenior sit ad benefaciendum pro his qui in te confidunt*. Propter hoc & tunc in omnia transfigurata, *omnium nutrici gratiae tuae deseruiebat*, ad voluntatem eorum qui a te desiderabant: ut scirent filij tui quos dilexisti Domine, quoniam non natiuitatis fructus pascunt homines, sed sermo tuus hos qui in te crediderunt, conseruat.

Videsne creaturam in nutriendis hominibus non tam naturae quam gratiae quandam habuisse rationem, ut his potissimum sese profunderet quos non natura sed gratia commendaret; unde satis est euident, quanti suam referre indicet, quod vel homo non peccet, vel à peccato quam primum resipiscat.

*Intelligite haec qui obliuiscimini Deum, ne quando rapiat, & non sit qui eripiat*; quid enim pro peccatore staret, qui contra omnia peccando stetit?

### III. PUNCTVM.

**Q**UOD vnus igitur conuersi peccatoris esse videtur, hoc est totius vniuersi negotium. Res rerum omnium in eo agitur, res est Dei, res est Christi, res est Deiparae Virginis, res Angelorum, res animarum Purgatorij, res cunctorum viuentium, res vno verbo est vniuersae creaturae, quae bonitatem quamdam aut malitiam contrahit, prout bonis aut malis hominibus seruit. Sicut enim bonis bona sunt omnia, sic malis mala fiunt, non ex se, sed ex malo malorum hominum usu. *Quam multi de altari accipiunt*, inquit S. Augustinus, & moriuntur & accipiendo moriuntur? unde dicit Apostolus, *iudicium sibi manducat & bibit*. Nonne buccella Dominica venenum fuit Iudae? nempe illam cum accepit, inimicus in eum intrauit, non quia malum accepit, sed quia bonum male malus accepit, Quasi diceret, non res sed rei usus malus fuit: res quidem omnis bona est, sed rei malus fit usus ab utente. Quid autem rei bonae magis aduersum, quam ut in malum degeneret malo utentis usu?

Si buccella illa Dominica capax esset appetitus, nonne appeteret vel Iudam cui datur, esse conuersum: vel non illi peruerso



dari? Nonne negotium conuertendi Iudæ censeretur & illius buccellæ negotium, quo sensu dici posset huius appetitum, huius esse negotium? sic planè de cæteris vniuersi rebus circa quosuis peccatores, quantum illæ possent, appeterent, vel non seruire peccatori, vel non esse peccatorem cui seruirent, quia cùm sint bonæ, nollent esse malæ, nollent in malum verti vsum: atque hoc ne ipsis vnquam accidat, est earum negotium; & hoc est negotium quod agitur, cum de conuertendo agitur peccatore. *Nescierunt* ait Psaltes de peccatoribus, *neque intellexerunt, in tenebris ambulant, mouebuntur omnia fundamenta terræ.* Quicquid rerum vbique est ab imo terræ fundo, propterea mouebitur tanquam si res agatur sua, cùm peccator non mouetur de suo miserando statu.

Psal. 81.

Ecclesi. 16.

Quæ si dicta sunt de inanimi creatura, quantò magis de rationali, quantò magis de coelesti, quæ simul omnes conueniunt velut in rem suam, & rem communem omnibus, quando agitur de conuersione peccatoris. *Ecce calum & celi calorum*, his liceat vt scripturæ verbis, *abyssus & vniuersa terra, & quæ in eis sunt, in conspectu illius commouebuntur, montes simul & colles & fundamenta terræ cum conspexerit illa Deus, tremore concutientur, & in his omnibus insensatum est cor*, Nempe cor peccatoris qui non mouetur vt resipiscat, & cuius præcipue ac præcipua res agitur in illa resipiscencia. Hoc est certè mirum & stupendum!

1. Cor. 5.

Accidit aliquando Corinthi, vt vno peccante Christiano, cæteri non satis vehementer in illum exarserint, nec condigna peccatum mulctarint pæna: tum verò Apostolus: *Et vos inflati estis, & non magis luctum habuistis, vt tollatur de medio vestrum qui hoc opus fecit!* Voluisset totam in luctu esse ciuitatem propter vnum peccatorem, quia res erat omnium vt ille conuerteretur, & fauente Deo sic conuerti poterat, cùm videret omnes propter se commoueri. Quod & reuera sic euenit, nam in luctum conuersa ciuitate sic ille miser resipuit, & tam lugubres pœnitentis animi sensus induit, vt deinde ad eandem scribendum fuerit Apostolo ciuitatem, vt mærentem hominem solarentur & erigerent, *ne forte*, inquit, *abundantiori tristitia absorbeatur qui eiusmodi est: propter quod obsecro vos vt confirmetis in illum, charitatem.*

2. Cor. 2.

O felix illud sæculum quo perpauci peccabant & permulti sic lugebant perpetratum peccatum vt statim expiaretur. Nunc è contra multi peccant & pauci lugent, vnde & peccatum in dies



crescit. Eritne vel vnus hodie qui cælum latificare velit, qui se in cœlo prædicari appetat, & præclare de se ab omnibus sentiri Angelis? Quid gloriosius quàm suprema beatorum lætitiæ posse aliquid adjicere? vel quid felicius in terris posito quàm posse in cœlis sermone Angelorum celebrari? Quàm verendum ne id potius accadat quod scriptura refert, *Angeli pacis amare flebunt.* En. 15. 33. præsto Custodes nostri expectant quid sequatur ex hoc discursu; pendet à nobis illorum fletus vel gaudium. Quis tam vecors qui cum possit tutelarem suum latificare Angelum, malit eum contristare? An recusares petenti à te aliquid quod facile posses dare, quod illi datum etiam cederet in tuum commodum, an inquam recusares illi qui nullum officij genus in singulas pene horas recusat tibi conferre? Hoc est quod modò Angelis, hoc est quod ipsi recusas Christo, qui quod in te videt peccatum petit vt deponas, iam iam sine mora; nimis enim iam retardatum.

Quid hic dices? nullumne prorsus in te peccatum agnoscis? visne illud aliquando vel numquam deponere? quando autem opportunius quàm petente Christo, quàm spectantibus Angelis quid sis factururus? Nec dicas esse quid leuius quàm vt multum propterea mouearis, nam tantò est propterea facilius dare quod petitur, & tanto probrosius si negetur. Neque verò etiam deterrearis si quid est grauius, nam in dies ingrauescit, & magis inde semper deterreberis, tantoque periculosior est dilatio, quanto peccatum grauius.

Ac tandem vt cum Diuo Gregorio parabolam explanante concludamus: *Ecce, inquit, iam lapsi sumus, stare nequaquam valui-* Homil. 34.  
*mus, in prauis nostris desiderijs iacemus; sed qui nos condidit rectos, in Euang.* expectat adhuc & prouocat vt surgamus. Sinum suæ pietatis aperit, nosque ad se recipere per pœnitentiam querit; sed pœnitentiam agere dignam non possumus, nisi modum quoque eiusdem pœnitentiæ cognoscamus. Pœnitentiam quippe agere est & perpetrata mala plangere, & plangenda non perpetrare. Nam qui sic alia deplorat, vt tamen alia committat, adhuc pœnitentiam agere aut dissimulat aut ignorat. Quid enim prodest, si peccata quis luxuriæ desleat, & tamen adhuc auaritiæ aestibus anhelat? aut quid prodest si iræ culpas iam lugeat, & tamen adhuc inuidiæ facibus tabescat? Sed minus est valde quod dicimus, vt qui peccata deplorat, ploranda minimè committat, & qui plangit vitia perpetrare vitia timeat. Nam cogitandum summopere est, vt qui



158 Dominica 3. post Pentecosten. De oue à Pastore inuenta.

*se illicita meminit commisisse, à quibusdam etiam licitis studeat abstinerere, quatenus per hoc Conditori suo satisfaciatur, ut qui commisit prohibita, sibi metipsi abscindere debeat etiam concessa, & se reprehendat in minimis, qui se meminit in maximis deliquisse.*

Vide in 2. parte in Sexagesima.

Nisi verbum Dei te conuertat, tu peruerteres verbū Dei.

Et pro Beata Virgine de qua primis duobus punctis, Vide in Festo Annuntiationis.

Non tam sibi quàm nobis Christus elegit matrem.

Qui dicunt se non posse quod iubentur, non possunt id dicere sine iniuria Virginis Matris.

Ex quarta porro parte conformes aliæ petendæ sunt veritates.

Qua vna re potissimum à Dei cultu auocamur, eadem potius ad eum aduocandi sumus.

*Sabbato Hebdom. 15.*

Nisi ab omni cupiditate voluntas, sicut ab omni errore intellectus verè conuertatur, vix vlla est vera conuersio.

Siquis corripì noluerit, hoc ipso magis est corripendus.

*Feria 2. & 4. Hebdomada 16.*

In leui quidem cupiditate pars aliqua nostri cordis detrahitur, in graui verò totum cor Deo perit.

*Dominica 17.*

Nulla nisi primaria satis esse potest cura de peccatis euitandis.

*Dominica 18.*

Nunquam magis eris tuus, quam dum totus eris Christi.

*Feria 4. Hebdom. 24. ubi de hac rursus parabola consequenter ad historicam Euangelij seriem.*





AD SEQUENTES QVATVOR  
HEBDOMADAS.

SERMO ille Domini qui est in monte habitus exponetur, cuius Initium quæ octo Beatitudines faciunt, cum sint tot Veritates Practicæ quæ suam secum inuehant probationem, non aliis opus est verbis nec rationibus ad eas primò exponendas, quàm illis ipsis Euangelicis, quibus usus est Dominus.

FERIA SECUNDA.  
DE PRIMA BEATITVDINE,  
QVÆ EST PAUPERITAS SPIRITVS.

*Beati pauperes spiritu.* Matth. 5.

*Va vobis diuitibus.* Luc. 6.

RATIO EST, Quia beati sunt quorum est regnum cælorum.  
Sed regnum cælorum, est pauperum spiritu.

Ergo illi beati sunt : & miseri diuites qui iacturam illius regni faciunt : Ac proinde paupertas diuitiis præferenda, sicut Beatitudo miseriæ.

I. P V N C T V M.

**V**IDENS Iesus turbas, ascendit in montem, & cum sedisset, accesserunt ad eum Discipuli eius : & aperiens os suum, docebat eos, dicens : *Beati pauperes spiritu, quoniam ipsorum est regnum cælorum.*



Hinc formanda loci compositio & Christi docentis representatio quæ reliquis subseruiat meditationibus; Tum gratijs Domino persolutis, quod ipse ore proprio coelestem suam doctrinam nos docere voluerit, admirare quàm reuera sit coelestis illa doctrina, & supra humanos sensus euecta, quæ Beatitudinem ponit in paupertate, & miseriam in diuitijs. O cogitationes diuinas & humanas, quam dispares & diuersas! *Sicut exaltantur cæli à terra.*

ps. 55.

Quam porro ita sit, *Beatos esse pauperes*, sufficiebat ad fidem, quod Christus ita diceret: sed vt tanto magis afficeremur ad illam paupertatem, quanto clariùs videremus adiunctam illi esse Beatitudinem, subiecit hanc rationem; *quoniam ipsorum est regnum cælorum*; quasi diceret, certum est illos esse Beatos quorum est regnum cælorum: At regnum cælorum est pauperum spiritu. Ergo aperta & euidens est conclusio, quod illi sunt Beati, & quod amanda est paupertas sicut ipsa Beatitudo.

Isaia 64.  
2. Cor. 2.

ps. 83.

Barnab. 3.

Hoc itaque primò est non tam probandum quàm præsupponendum, & considerandum quam Beati sint illi, quorum est regnum cælorum. Expende quantum potes cum Gratia, quale illud sit regnum, quàm foelix, quàm diuturnum, quàm ex omni parte beatum. *Oculus non vidit, nec auris audiuit, nec in cor hominis ascendit quæ preparauit Deus.* Ibi sapientiam, ibi potentiam, ibi Bonitatem suam suis manifestat. Gaudium ipsius Dei est: ipsa est Dei beatitudo quam Beati participant. *Beati qui habitant in domo tua Domine, in secula seculorum laudabunt te.* Dicitur domus simul & regnum, quia sic regnum vniuersum participat vnusquisque Beatus, quasi sit sola eius domus: Neque tamen regni amplitudo impedit possessionem, neque possessio constringit amplitudinem. *O Israel quàm magna est domus Dei, & ingens locus possessionis eius! Magnus est & non habet finem! excelsus & immensus.* *QUAM dilecta tabernacula tua Domine virtutum, &c.* His & similibus ita afficere, vt firmum illud fixumque in mente maneat, vnicam nostram Beatitudinem in coelo esse positam.

## II. P V N C T V M.

**S**ED pauperum Spiritu est illud Regnum cælorum.

Pauperes Spiritu, id est, affectu & voluntate, siue id electione



ctione siue id necessitate contingat, siue id etiam in diuitiis fiat, temperando animum ab omni cupiditate. Sed ad mentem Christi expressius intelliguntur illi qui reuera renuntiant habendis facultatibus & humilem vitæ statum præligunt ac profitentur. Spirituali scilicet intentione, seu desiderio supernaturali propter solum beneplacitum Dei & animarum salutem, non vt antiqui illi Philosophi, sed vt primi Christiani, qui vt ait sanctus Leo, *uniuersis suis rebus possessionibusque distractis* Hom. de octo beatis, *per deuotissimam paupertatem, bonis ditabantur æternis, & ex Apostolica prædicatione gaudebant, nihil habere de mundo, & omnia possidere cum Christo.*

Horum autem est regnum cælorum, tum quia Christus sic compensat talem affectum; tum quia ex illo affectu peccata pene omnia excluduntur, & virtutes exercentur quibus tale regnum acquiritur. Denique quo id cumque modo fiat, tam certa Christi promissio est vt iam de præsentis regnum cœleste ad illos pertineat. *Vestrum est regnum Dei!* Exerce hic actus Luc. 6. fidei, spei & caritatis. Fidei quidem quod Christus dixerit, & verè dixerit; spei autem quod si paupertatem hanc colas, promissum regnum sis possessurus; ac denique caritatis ergo talem Dominum qui seruos suos ita compensat. *Quis ego sum, aut quæ est vita mea, aut cognatio patris mei in Israel, vt fiam gener Regis?* 1. Reg. 18. Non putabat Dauid satis sibi esse opum & nobilitatis vt in familiam Regis ascisceretur: At è contra vt hæres Dei fias, & cohæres Christi exquire num satis sis pauper & inops saltem affectu. Diuitiis terrena comparantur, sed paupertate Cœlestia. Dic tecum serio, quis ego sum? an ego satis pauper effectus vel affectus? aut quæ est vita mea, aut quæ domus & possessio? an quid superfluum apud me est? an quid redundans? an quid humanum adharet animo? an aliquid in tota suppellectile quo non libens carerem? Hoc est enim esse pauperem spiritu, nulla re affici, paucis esse contentum, & iis paucis quæ necessaria sunt sic sustentari quasi nihil possideas.

*Est quasi diues cum nihil habeat: & est quasi pauper cum in multis diuitiis sit.* Id est nihil habenti quædam sunt diuitiæ, & abundanti Prou. 13. rebus quædam est paupertas. Potes esse diues in paupertate, & pauper in diuitiis: & quod est magis mirum, potes vtrumque vel ex virtute vel ex vitio. Virtus erit si tua in paupertate contentus



Ps. 139.

uiuas, aut si qua re vteris, sine affectu inordinato, vtaris. Si vero in paupertate murmures aut in diuitiis plura desideres, virtutem vertis in vitium. Tanti refert in hac materia, rectum sibi facere spiritum, vt pro hac spiritus rectitudine sit paupertas Euangelica, & pro hac Euangelica paupertate sit præsens & futura participatio regni cœlestis. *Cognoui, quia faciet Dominus iudicium inopis*, Id est, non modo causam suscipiet inopum, sed causam examinabit inopiæ; discernet & diiudicabit inopem ab inope, neque nisi hoc præuius quemquam remunerabit, iudicio.

## III. P V N C T V M.

Serm. 28. de  
Verbis  
Apost.

**E**RGO Beati pauperes spiritu quoniam ipsorum est Regnum Cœlorum, quod verè Beatos facit, & extra quod nullus esse potest beatus. *Fœlicitas magna Christianorum*, inquit sanctus Augustinus, *quibus datum est vt paupertatem faciant pretium regni Cœlorum. Non tibi displiceat paupertas tua, nihil ea potest ditius inueniri: Vis nosse quam locuples sit, cœlum emit. Quibus thesauris conferri posset quod videmus paupertati indultum? Vt ad regnum cœlorum veniret diues, possessione sua obtinere non potest, nunc obtinet vt contempta perueniat.*

Ier. 12.

2. Pet. 3.

Serm. 1. in  
Festo omnium  
Sanct.

Sed cum omnes esse velint beati & nemo miser, vndenam fit vt nemo velit esse pauper & omnes diuites? Hoc certe est pauendum, nec aliunde prouenit quàm ex defectu fidei, eoque duplici; Nempe vix credunt esse aliam vitam, aut vix amant cœlestem præ ista temporali; nec credunt Christo affirmanti Beatos pauperes, seu miseros diuites: sensus repugnat & præualet: visibilia preponderant inuisibilibus; præsentia magis vrgent quàm futura: *Quia denique nullus est, qui recogitet corde, sic desolatione desolata est omnis terra.* Sed cogitanti tantiper futura, longe est alius sensus; & quantumcumque illa tardent aut distent tempora, satis est vt sint præsentia, si sint aliquando futura. *Vnus dies apud Dominum, ait sanctus Petrus, sicut mille anni, & mille anni sicut dies vnus.* Non tardat Dominus promissionem suam, sicut quidam existimant, sed patienter agit propter vos, nolens aliquos perire, sed omnes ad penitentiam reuerti. Quamobrem sic apte & præclare sanctus Bernardus: *Querat Paganus diuitias, qui sine Deo viuit: Querat Iudeus qui terrenas promissiones accepit; Sed qua fronte magis, aut qua mente Christia-*



nus diuitias querit, postquam Christus beatos esse pauperes predicauit? Filij alieni, quousque vanitatem loquetur os vestrum, ut beatum dicatis populum cui hæc sunt, hæc visibilia, hæc presentia, cum Filius Dei os suum aperiens, locutus sit veritatem, beatos esse pauperes, & vnde diuitibus?

Vide in 4. parte, totam Hebdomadam 17. vbi hæc inter plures alias opportuna iam dictis habetur Veritas:

Hoc amanti cœlum paupertas est, quod amanti terram, diuitiæ.



## FERIA TERTIA.

### DE SECUNDA BEATITVDINE, QUAE EST MANSVETVDO.

Beati mites. Matth. 5.

RATIO EST, Quia Beati sunt qui possidebunt terram.

Sed mites terram possidebunt.

Ergo Beati sunt; & colenda mansuetudo.

#### I. PUNCTVM.

**C**ONNEXIONEM huius Beatitudinis cum præcedenti declarans sanctus Bernardus: Sic oportebat, inquit, commendata paupertate, etiam mansuetudinem prædicari, quoniam relinquentibus omnia, prima solet esse tentatio de molestijs corporis, & afflictione carnis insolita. Quid vero paupertas proderit, si, quod absit, pauper in murmurationem deueniat factus exasperans & impatiens discipline? Optime quoque post regni promissionem minus aliud regnum velut in arrham datur, ut secundum scripturam, promissionem habeamus vitæ ætius quæ nunc est pariter & futura, & de exhibitione presentium firma sit expectatio futurorum. Sic sanctus Thomas docet ex sancto Au-

Serm. 1. in  
Festo Sancti  
omnium.

1. Tim. 4.

1. 2. q. 69.  
a. 2.



gustino, præmia beatitudinis promissa, tam spectare præsentem vitam quam futuram, quod & patebit in septem sequentibus.

Nunc vero duo sunt nobis in hoc primo puncto declaranda. Primum quanam sit illa terra quam qui possident beati sunt. Deinde quomodo sint beati qui terram illam possident. De primo nonnulli intelligunt cælum quæ est terra viventium, alij volunt esse homines qui nobiliorem terræ partem efficiunt, & quorum corda possident Mites iuxta illud Sapientis: *In mansuetudine opera tua perfice, & super hominum gloriam diligeris.* Alij denique quorum est communior & magis recepta sententia, terram interpretantur Corpus nostrum, *Quod nunc est terra mortuorum*, inquit sanctus Chrysostomus, *in gloria erit terra vivorum.*

Suum autem corpus qui possident quomodo sint Beati, quod erat alterum hîc explanandum, tripliciter cogitari potest. Primo quidem quod sicut graviore miseria mortalis huius vitæ miseri sunt qui possidentur à corpore seu carne, quando scilicet caro concupiscens aduersus spiritum, spiritum sibi subijcit: ita beati sunt qui liberantur illa miseria; liberantur autem qui corpus possident, id est qui carnem subdunt spiritui. Nam hæc est vera libertas hominis, inquit sanctus Leo, *quando & caro animo iudice regitur, & animus Deo præside gubernatur.* Rursumque alibi; *Cum caro concupiscens aduersus spiritum spiritali cupiditate superatur, tunc libera obtinetur sanitas, & sana libertas, ut & caro mentis iudicio, & mens Dei regatur auxilio.* Deinde quid beatius quam pax vera & solida? *Inter benedictionis Diuina species pax perfectissima esse videtur*, inquit sanctus Basilii. Qui vero possident corpus, & generose carnis domant concupiscentias tam vere pacem possident quam verum est bella & lites non aliunde in nobis esse, quam ex concupiscentijs quæ militant in membris nostris. Denique quis non beatos asserat eos qui modico pretio locupletari possint coram Deo, comparatis sibi virtutum & bonorum operum ingentibus meritis! Tales sunt autem qui possident suum corpus, Hæc est incorruptibilitas quieti & modesti spiritus qui est in conspectu Dei locuples, inquit sanctus Petrus. *Et verè dives est*, ait sanctus Ambrosius, *qui in conspectu Dei potest dives videri, in cuius conspectu terra exigua, mundus ipse angustus est.*

Ecc. 8.

Serm. 1. in  
Quadr.Serm. 4. de  
Ieiun. Pent.

In Ps. 28.

1. Pet. 3.



## II. P V N C T V M.

**S**ED Mites terram illam possidebunt, aut iam re ipsa possident.

Primo enim mites dicuntur non tantum qui repressa ira-  
cundia patientiam seruant, sed qui se vniuersim domant in suis  
prauis cupiditatibus. Sic aperte Clemens Alexandrinus: *Manfucti*  
*vel mites sunt qui insidam quæ est in anima pugnam sedauerunt, ira*  
*& cupiditatis, & eorum quæ sub eas cadunt.* Sic conformiter san-  
ctus Basilius: *Qui sedati sunt & compositis moribus, nempe ab omni af-*  
*fectu vitioso liberi, adeunt nullum in animabus suis perturbationi reli-*  
*querint locum, hi demum mansueti appellantur.* Quod & Scriptura  
videtur innuere cum viros vniuersim probos & virtute insignes,  
mansuetos terræ nominat: *Arguet in equitate pro mansuetis terræ.*  
**QVÆRITE** Dominum omnes mansueti terræ, qui iudicium eius estis  
operati. Qua in significatione tam clarum est quomodo mites  
terram possideant, vt vnum & idem sit, esse mitem & terram  
seu corpus suum possidere.

Deinde vero si strictius Mites dicantur ij qui surgentes iracun-  
diæ motus reprimunt, rectè etiam dicuntur terram seu corpus  
& corporis motus possidere, quia cum iracundia ferociore &  
turbulentiores corporis & animi motus excitet, profecto qui re-  
tinet iram, retinet corpus & animam, seque ipsum insigniter  
possidere duendus est: sic Sapiens in Prouerbijs: *Qui acquiescit in*  
*crepationibus, possessor est cordis,* id est, qui non irascitur, qui non  
commouetur, qui mitis est, seipsum possidet.

Adde quod cum ex illis omnibus causis quæ cæteras animi  
commotiones aut corporis iactationes prouocare solent, iracun-  
dia excitetur, hinc certe fit vt qui perfecte mitis est & iracundiæ  
domitor, suas alias cupiditates domet necesse est, aut iracundiam  
non domabit quæ ex indomitis cupiditatibus oritur; sic in Ethicis  
legitur quod *mansuetus perturbatione vacare solet, nulloque duci af-*  
*fectu, quousque ratio præscripserit.* Sit Christus Dominus dum ad  
perfectam sui & virtutum omnium Imitationem nos hortaretur,  
*Discite, inquit, à me, quia mitis sum & humilis corde,* quasi cæteras  
omnes virtutes his duabus complecteretur: & expressius ad rem  
nostram, *In patientia,* inquebat, *possidebitis animas vestras;* vbi  
Diuus Gregorius, *Dum nobis dominari discimus, hoc incipimus pos-*  
*sidere quod sumus.*



## III. PUNCTVM.

**E**RGŌ Beati mites, quoniam possidebunt terram, quam qui possident tam vere beati sunt quàm qui multa pace fruuntur: *Ps. 36.* Mansueti hereditabunt terram, & delectabuntur in multitudine pacis. MERITO, inquit sanctus Ambrosius, terram possident in quibus Deus ipse requiescit, sicut Diuino per Isaiam resultauit oraculo. Super quem requiescam nisi supra humilem & quietum & timentem verba mea? Et quia non vina non epulas, non diuitias, sed pacem Domini dilexerunt in corpore constituti, pro illa delectatione corporalium voluptatum quo se putarent esse fraudandos ut gratiam adipiscerentur eternam, delectabuntur in multitudine pacis quam Dominus noster Iesus in diebus suis, generi donauit humano. Sic sanctus Ioannes Chrysostomus: *Hom. 34. in Gen.* Nihil animam ita in tranquillitate & quiete esse facit ut mansuetudo & modestia. Hæc omni diademate se possidenti est utilior. Hæc omni claritudine & gloria conducibilior. Quid enim beatius quàm intestino liberari bello? sicut nihil miserabilius est aliqua in ciuitate, quæ licet prædiis & muris bene sit munita, intus tamen ciues foueat proditores. Sic denique rem totam planè confirmat & concludit sanctus Bernardus, pergens in eodem sermone quo supra. Hanc ego terram, corpus nostrum intelligo, quod si possidere vult anima, si regnare desiderat super membra sua, necesse est ut sit ipsa mitis, & superiori suo subiecta, quoniam tale inueniet inferius suum, qualem se exhibuerit superiori. Armatur enim Creatura ad ulciscendam sui injuriam Creatoris. Et ideo nouerit anima quæ rebellem sibi inuenit carnem suam se quoque minus quam oporteat superioribus potestatibus esse subiectam. Mansuescat ipsa & humilietur sub potenti manu Altissimi: subiecta sit Deo, & his pariter quibus vice eius habet obedire Prælati, & continuo inueniet corpus suum obediens & subiectum; Veritas enim est quæ loquitur, Beati mites quoniam ipsi possidebunt terram. Quam in rem *Eccles. 10.* & Sapiens aptissime quod expendas diutius; Fili in mansuetudine serua animam tuam, & da illi honorem secundum meritum suum: peccantem in animam suam quis iustificabit? & quis honorificabit exhonorentem animam suam? Quod sic alij vertunt clarius: Per mansuetudinem, gloriam animæ tuæ concilia; & eam honorem quem meretur affice, conseruando eam videlicet in ea dignitate & dominatione quam habet à Deo supra suum appetitum: sic beatus &



gloriosus eris; hæc est beatitudo & gloria tua, quæ sic tamen à te pendet vt nisi mansuetus sis, plane depereat; & tunc à beatitudine & gloria incidet in talem miseriam & ignominiam, vt nullus vnus te honoret cum te ipse exhonoraueris. Nam vere ille miser est & omni prorsus miseratione indignus, qui cum facile beatus esse posset, mauult esse miser. *Miserere anima tuæ placens Deo, Ecclesi. 30.*  
 & contine.

Vide in 1. parte, Vigilia Natalis Domini. In 2. Feria 3. Hebd. 2. in Quadragesima. Vbi hæc Veritas expenditur:

Quo quis est mitur, eò & generosior.



## FERIA QVARTA. DE TERTIA BEATITVDINE, QVÆ EST LVGENTIVM.

*Beati qui lugent.* Matth. 5.

*Va vobis qui ridetis nunc.* Luc. 6.

RATIO EST, *Quia Beati sunt qui consolabuntur.*

*Sed qui lugent, consolabuntur.*

*Ergo Beati qui lugent, Et pluris æstimandus luctus quàm risus.*

### I. P V N C T V M.

**S**I de futura Sanctorum foelicitate seu consolatione beatifica, hic tantum ageretur, facile esset intelligere quomodo qui hic lugent, beati sint, quoniam ipsi consolabuntur: *Absterget enim Deus omnem lachrymam ab oculis eorum, & mors ultra non erit, neque luctus, neque clamor, neque dolor erit ultra quia prima abierunt.* Sed quomodo ad hanc etiam vitam beatitudo

*Apoc. 21.*



l. 20. Cor.  
fess. c. 24.

illa referri possit, vnum est ex arcanis Euāgelicis plurima dignum consideratione. Ac primo illud pramittendum est quā vere beati sint qui vere gaudent & consolantur. Satis id autem planum est & apertum ex communi omnium sensu, sicque indubitanter affirmat S. Augustinus vnum & idem esse, beate velle viuere & gaudere velle. Si queratur, inquit, à duobus, utrum militare velint, fieri possit ut alter eorum velle se; alter nolle, respondeat. Si autem ab eis queratur utrum beati esse velint, uterque se statim sine vlla dubitatione dicat, optare: nec ob aliud velit ille militare, nec ob aliud iste nolit, nisi ut beati sint. Ita se omnes beatos esse velle, consonant quemadmodum consonarent si hoc interrogarentur se velle gaudere, atque ipsum gaudium, vitam beatam vocant. Quod etsi alius hinc, alius illinc assequitur, vnum est tamen quò peruenire omnes nituntur ut gaudeant. Quæ quoniam res est quam se expertum non esse nemo potest dicere, propterea reperta in memoria recognoscitur quando beatæ vitæ nomen auditur.

ibid. c. 22.

Tum vero docens non omni gaudio esse beatum quemquam, sed solo vero gaudio, & quale illud sit: sic pergit: Absit Domine, absit à corde serui tui qui confitetur tibi, absit ut quocumque gaudio gaudeam, beatum me putem. Est enim gaudium quod non datur impijs sed eis qui te gratis colunt quorum gaudium tu ipse es. Et ipsa est Beata vita gaudere ad te, de te, propter te; Ipsa est, & non altera. Qui autem aliam putant esse, aliud sectantur gaudium, neque ipsum verum.

osca 9.

Videsne quam sit vnum & idem, velle beatum esse, & velle gaudere seu consolari, dummodo scilicet vera sit consolatio verumque gaudium? Videsne vero quā multi errent, in vero quærendo gaudio? Videsne tandem te inter illos esse qui sic errent? Noli letari Israel, noli exultare sicut populi.

## II. PUNCTVM.

**S**ED qui lugent, ipsi consolabuntur: Ipsi gaudebunt vero gaudio. Paulò maior est difficultas in hac propositione: Non enim omnes qui lugent ipsi consolabuntur & gaudebunt: & sicut iam diximus non omne gaudium esse verum gaudium, sic profecto non omnis luctus, luctus est Euangelicus & beatus. Distingui debet triplex luctus seu triplex lugentium status.

Primus est eorum qui temporalia & terrena hæc tantum lugent affectu



affectu terreno & tristitia seculi quæ mortem operatur, ut ait Apostolus, & longe abest à beatitudine & consolatione quæ promittitur lugentibus ut docet sanctus Leo: *Luctus hic cui consolatio æterna promittitur non est cum mundi huius affectione communis: nec beatum quem-* Homil. de Beatitud.  
*quam faciunt ista lamenta, quæ totius humani generis deploratione funduntur: alia ratio est sanctorum gemituum, alia beatarum causa lachrymarum. Religiosa tristitia aut alienum peccatum luget aut proprium. Nec de hoc dolet quod diuina Iustitia agitur, sed de eo mæret, quod humana iniquitate committitur: ubi magis plangendus est faciens maligna quàm patiens: quia iniustum malitia sua demergit ad pœnam, iustum autem tolerantia ducit ad gloriam.*

Secundus itaque status Lugentium illi primo totus oppositus, eorum est qui spiritualia & æterna tantum lugent, quales ij sunt qui ex Compassione, Christo dolenti condolent: qui ex desiderio coelestis patriæ suum desunt exilium: qui ex amore Dei & proximi sua & aliena plorant peccata. *Exitus aquarum deduxerunt oculi mei, quia non custodierunt legem tuam.* Hi sunt qui verè lugent, & qui verè consolabuntur in luctu suo, *Quoniam sicut abundant passiones Christi in nobis, ita & per Christum abundat consolatio nostra.* Quod & patebit à fortiori ex aliis qui minus forsan perfecte lugent, & tamen ipsi consolantur. Ps. 118. 2. Cor. 1.

Tertius est Lugentium status qui potest ita dici mixtus & temperatus ex duobus primis ut temporalia simul lugeat & spiritualia, sed utraque spirituali & religioso luctu, non quia tantum temporalia sunt, non quia tantum in his plurima patiuntur detrimenta; sed quia simul vident Deum à se offensum vel ab aliis; quia vident se id suis commeritos esse culpis: quia timent ne inde ex impatientia murmurent vel aliquid grauius peccent; quia vident regnare iniustitiam, opprimi verò æquitatem: *In-* Ps. 78.  
*troeat in conspectu tuo gemitus compeditorum.* Ipse scilicet Deus his pijs mouetur lachrymis, siue ut eos liberet, siue ut eos consoletur: Talis eorum fletus qui suis in miseriis & iacturis temporalibus lugendo benedicunt & laudant Deum, Domini est & diuina quædam motio inhabitantis Spiritus sancti, *Qui sic pro nobis postulat* Rom. 8.  
*gemitibus inenarrabilibus:* Id est, qui nos orare & Deum colere facit cum illo gemitu quem exprimunt damna nostra spiritualia & temporalia: *Vbi autem est Spiritus Domini, ibi libertas, ibi pax, ibi* 2. Cor. 3.  
*gaudium, ibi consolatio, ibi domus illa luctus, quò ire melius est* Ecccl. 7.



quam ad domum conuiuij, vt ait ex Sapiente Diuus Bernardus; Ibi gratia quadam deuotionis, de spe veniæ, de propitiato peccato, de futura beatitudine, de Christi ac sanctorum similitudine, de Diuina reparata Iustitia, de Diuina voluntate facta; Ibi suauissima delectatio boni, & gustus Sapientia licet exiguus. Quibus interim benignus Dominus afflictam refrigerat animam. Verba sunt sancti Bernardi explicantis hanc tertiam Beatitudinem: Verba sunt Psalmistæ dicentis, *Auditui meo dabis gaudium & latitiam, & exultabunt ossa humiliata.* Verba sunt Apostoli exclamantis: *Repletus sum consolatione, superabundo gaudio in omni tribulatione nostra.* Verba sunt totius Scripturæ, quandoquidem, vt ipse idem ait, *Quaecumque scripta sunt, ad nostram doctrinam scripta sunt, vt per patientiam & consolationem scripturarum, spem habeamus.* Verba sunt denique Martyrum quibus cum diceretur à tyrannis, resipiscite miseri, & vos ipsos ab his cruciatibus eripite? Respondebant, *Numquam tam iucunde epulati sumus quàm hac libenter Iesu Christi causa perferimus.* Et certe cum ex Sapiente, *Secura mens sit quasi iuge conuiuium,* Numquam mens nostra potest esse magis secura quam in luctu, aut in poenis, si temperate tolerantur. Numquam magis secura de certa salutis via, de certa poenitentia, de statu gratiæ, de regno Dei quod est *Iustitia, pax, & gaudium in Spiritu sancto;* Ac proinde mens illa quasi iuge conuiuium est, iugis est consolatio & iuge gaudium. De ipso enim gaudet gaudio quo se gaudere sentit in poenis, quia hoc vnum verum est gaudium, hoc vnum est gaudium quod à Domino prouenit; cum alia quæuis gaudia, mundus, caro, & dæmon possit efficere, sicque is solus vere potest dicere, *Gaudens gaudebo in Domino.* Itane tu?

## III. PUNCTVM.

**E**RGO Beati qui lugent, quoniam ipsi consolabuntur. Et va vobis qui ridetis nunc, quia lugebitis & flebitis. Vide admirabilem horum texturam, & expende tria singillatim. Primum non hic fieri mentionem puri luctus, aut puræ consolationis; sed vtrumque simul à Domino iungi quod & ipse Sapiens dixerat, *Risus dolore miscebitur, & extrema gaudij luctus occupat.*

Secundum, ex his duobus alterutrum tibi necessario eligendum esse, aut vere lugere prout explicatum est, & vere simul



gaudere: aut vanè ridere, & lugere ac flere, quantum minatur Christus, Id est, vel in Inferno, vel in angore conscientiae, vel in poenis temporalibus sufferendis sine solatio, vel quocumque tandem modo fiat, certa est & indubitata vox Christi Domini comminantis illud infaustum *Va his qui rident*: serius ocyus lugebunt & flebunt. *Conuertam festiuitates vestras in luctum, & omnia Cantica vestra in planctum: Risus vester in luctum conuertetur, & gaudium in mœrorem.* Amos 8.  
Iac. 4.

Tertium denique, quanto satius sit, bene & Christiane lugere vt consolationem & gaudium Christi participes, quam vanè ridere vt in illos miserandos fletus & luctus incidas, quorum nulla vera consolatio, nullum meritum, nulla cessatio, nulla requies. Illos Dominus irridebit, & erunt post hæc decidentes sine honore, & in Sap. 4. contumelia inter mortuos in perpetuum, quoniam disrumpet illos inflatos sine voce, & commouebit illos à fundamentis, & vsque ad supremum desolabuntur: & erunt gementes, & memoria illorum peribit. Venient in cogitatione peccatorum suorum timidi, & traducent illos ex aduerso cogitationes ipsorum. O vere Sapiens, qui risum reputauit errorem, & gaudium dixit quid frustra deciperis. Eccl. 2. O vere stultus qui cum posset multum gaudere cum modico luctu, mauult multum lugere cum modico risu! Quasi tristis ille & semper gaudens: quasi gaudens iste & semper tristis. Magna est differentia, vt fuse ait in Psalmis sanctus Augustinus, inter ea quæ sunt quasi mala & verè bona, aut quæ sunt quasi bona & verè mala. Sic est noster luctus quasi luctus & quasi nullus esset præ gaudio quod illi adiungitur: è contra sic est risus tuus quasi non esset risus, quasi nullus esset præ mœrore qui risum sequitur. *Somniantis est addere QVASI*: quasi dicebam, quasi loquebar, quasi prandebar, totum quasi; quia cum euigilauerit non inuenit quod videbat. *Quasi thesaurum inueneram, dicit mendicus, si quasi non esset, mendicus non esset, sed quia quasi erat, mendicus est*: Itaque modò, qui ad letitias seculares oculos aperiunt & cor claudunt, transit quasi eorum & venit verum ipsorum: *Quasi ipsorum felicitas est sæculi, verum ipsorum pœna est.* Ac si diceret sanctus ille Pater de Beatis Euangelicis, quasi lugent & verè gaudent; de miseris vero secularibus, quasi gaudent & verè lugent. Iamne dubitabis, ex vtris esse debeas? *Multiplicate sunt aquæ, & eleuauerunt arcam in sublime à terra.* Gen. 7. *Ostendit Dominus Moysi, lignum quod cum misisset in aquas, in dulcedinem versa sunt.* Exodi. 15. *FLVMINIS impetus latificat* Ps. 45.



172 FERIA 5. Hebd. 3. post Oct. Pent. De quarta Beatitudine.

Pf. 125.

Ier. 31.

*civitatem Dei. QUI seminant in lachrymis, in exultatione metent. IN fletu venient, & in misericordia reducam eos: & adducam eos per torrentes aquarum in via recta, & non impingent in ea.*

His & similibus Scripturæ locis, posset non modò Veritas, sed & animus in praxi Veritatis confirmari. Vide etiam in 2. parte, Dominica Palmarum, & FERIA 4. Rogationum, vbi hæc proponuntur Veritates:

Lachryma, Passionis Christi Vicaria.

Lachrymarum descensus, ascensus est.



## FERIA QUINTA.

DE QUARTA BEATITUDINE,

QUAE EST ESURIENS ET  
SITIS IUSTITIÆ.

*Beati qui esuriunt & sitiunt Iustitiam. Matth. 5.*

RATIO EST, Quia beati sunt qui saturabuntur.

Sed qui esuriunt & sitiunt Iustitiam, saturabuntur.

Ergo illi Beati sunt, Et procuranda illa esuries, atque sitis Iustitiæ.

### I. PUNCTVM.

In Luc. 6.

**Q**UARTAM hanc Beatitudinem cum præcedenti coniungens sanctus Ambrosius: *Postquam, inquit, delicta defleui, esurire incipio & sitire Iustitiam, ager enim in gravi morbo esurit. Sanctus autem Hieronymus expendens hoc verbum, Esurire, NON esse satis, ait, velle iustitiam ut saluemur & beati simus; sed oportet eam esurire & sitire, Id est, tanta in eam ferri cupiditate animi, quanta qui esurit aut qui sitit, fertur in cibum & potum. Sicut enim nimis appetere terrena hæc & caduca, vitiosum est:*



ita non satis concupiscere spiritualia & cœlestia, probrosum est & diuinæ Sapientiæ quodammodo iniuriosum. *Initium enim illius*, Sap. 6. inquit Sapiens, *verissima est disciplina concupiscentia.*

At quomodo qui esuriunt & sitiunt iustitiam, Beati sunt, ex hac etiam vita? Hoc nobis modò est accuratius perpendendum ex Ratione quam affert Dominus, Quia ipsi videlicet saturabuntur. Quæ ut Ratio vim suam habeat, necessariò præmittendum est quod Beati sunt qui saturabuntur.

Tribus vero id modis explanari potest, primò sicut non potest melius concipi Beata & aterna illa vita quæ in cœlo possidetur quàm si dixeris satietatem esse animi qua Beatus ex viso & amato Deo ita conquiescit ut nihil ultra desideret: unde aiebat Dauid, *Satiabor cum apparuerit gloria tua*; Sic proportionè seruata, qui sic in hac vita saturatur ut nihil ultra desideret, plane beatus est quantum esse potest in hac vita; *Beatum dixerunt populum cui hæc sunt*: *beatus populus, cuius Dominus Deus eius*; quasi diceret, quibus abundant omnia, hi se beatos putant, quia se putant in illis suis bonis posse satiari; sed errant, non quia non sint beati qui satiati sunt, sed quia non satiabuntur bonis suis, In solo enim Deo satietas quærenda est, aut in ijs mediis quæ nos ad ipsum ducunt.

Secundo, de saturitate animi discurrendum est ad eum pene modum quo de saturitate corporis: atque ita sicut esuriens & sitiens postquam id quod esuriebat & sitiebat manducauit & bibit ad saturitatem, seu quantum voluit, dici potest ex hac parte quietus & contentus: sic plane si accadat animum nostrum suo modo repleti & satiari his quæ esuriebat & sitiebat: sic contentus, sic quietus, & quantum dici potest dicendus erit beatus. *Beatos vos dicent omnes gentes: eritis enim vos terra desiderabilis, dicit Dominus exercituum.* Id est, idcirco beatos vos dicent alij, quia vos videbunt habere quod desideratis seu quod est humanitus desiderabile.

Tertio denique, considerandum est quid sit esse miserum in hac vita: nam ex opposito constabit clarius, quid sit esse beatum. Iam visum est, non eos esse miseros recensendos qui in miseriis essent humanis, cum illos beatos Dominus asserat qui pauperem & moerentem ducunt vitam: Sed illi tum miseri sunt, siue sint in miseriis, siue in deliciis, qui se malè miseros putant & sentiunt, qui scilicet nolunt quod habent, & quod volunt non habent: qui sic dolent in ijs quæ sibi desunt & cupiunt, sicut si nihil posside-



rent; aut qui sic moerent in his quæ contra suam voluntatem sentiunt, quasi cæteris omnino rebus quas possident non uterentur. *Testis ille Aman qui cum tantis abundaret bonis quantis ullus à Rege in toto Persarum regno, tamen se nihil habere iudicabat quamdiu videret Mardocheum sibi non procidentem sicut alios Persas. Nonne is tibi miser videtur? Cur porro nisi quia non est satiatus suis rebus? aliquid aliud expetit quod non habet; vel se his expeditum vellet quæ male ipsum habent. Oppone vero illi hominem qui suo in vitæ statu sit contentus, qui nihil aliud ex humanis desideret, nihil metuat, nihil doleat, nihilve speret præter coelestia & diuina: Nonne is tibi beatus confendus erit? Nonne is est de quo Sapiens: *Felix qui non habuit animi sui tristitiam, & non exiit à spe sua*; Hoc est autem saturari, hoc est satiari & contentum esse; ac proinde hoc est beatum esse. O Beata saturitas qua non repletur corpus sed animus; & qua repletus animus, magis est vacuus, magisque capax capiendo Deo.*

Eccli. 14.

## II. PUNCTVM.

**S**ED illi qui esuriunt & sitiunt iustitiam, saturabuntur.

Ps. 4.

Tria hic sigillatim expendenda. Primum quid sit Iustitia, nempe cultus Dei & salutis animæ, quo quidem cultu nihil iustius, nihil æquius, nihil magis debitum. *Sacrificate Sacrificium Iustitiæ.*

Exod. 35.

Secundum, quid sit proprie esurire & sitire: Non est enim illa esuries aut sitis animi, sensibile aliquod desiderium, sed sufficit ut sit rationale & spiritale quo voluntas ultro & libenter, cum Dei Gratia, in illum Dei cultum feratur. *Mente promptissima atque deuota*; Hæc sunt in scripturis propensæ voluntatis insignia.

Ps. 55.

Hom. 5. in  
Luang.

Tertium denique, qui sic esuriunt & sitiunt saturabuntur, quia quod vnum maxime desiderant, illi habent si volunt: & quod non habent, non desiderant. Desiderant enim Deo seruire & placere, quantum cum Gratia possunt: Et hoc ipso quo id desiderant, sic seruiunt & placent Deo, ut nullus Deo sit acceptior cultus nulloque gratius obsequium, quam talis animus. *In me sunt, Deus, vota tua quæ reddam, laudationes tibi*: Ac si aperte Dauid dicat, inquit sanctus Gregorius: *Ergo exterius munera offerenda non habeo: intra memetipsum tamen inuenio quod in ara tua laudis impono: quia qui nostra datione non pascaris, oblatione cordis melius placaris. Nihil quippe*



offertur Deo ditius bona voluntate. Tum explicans fufius quæ fit illa bona voluntas, sic concludit, *Quid ergo isto holocausto locupletius, quando per hoc quod Deo immolat in ara cordis, anima semetipsam mactat.* Id est, non sibi parcat, quidquid potest, totum explet, & in eo saturatur atque expletur animus, quod ex vna quidem parte, velit quod possit, & quidquid velit ac possit, faciat: ex alia vero, quod licet illud totum quod potest & quod facit sit valde exiguum, tamen illo se contentum sibi que plene satisfactum Deus significat. *Quod habuit, hæc fecit.* Maci. 14.

Si quid sit autem quod non habent, quod certe multiplex & varium esse potest, non tamen illud aliter desiderant quam prout Deo placet. Cum enim vt supponimus, hoc vnum maxime velint, Deo seruire & placere; Neque melius illi seruiant & placeant quam si se conforment eius voluntati: certe siue res habeant siue non habeant, perinde illis est: quia quando vel eas habent non ita rebus gaudent quam Dei voluntate, qua fit vt illas habeant; vnde id sequitur, vt quando illas etiam non habent, non minus gaudeant, quam si haberent: quia non minus vident Dei voluntatem in priuatione rerum quam in earum vfu; sicque *velut Angeli nec benedictione nec maledictione mouentur*, Nonne hoc est saturari? Nonne hoc est expleri? Quid enim amplius & quid capacius potest velle voluntas quam quod velit Deus? Quid aptius explenda voluntati humanæ quam voluntas Diuina? Quonam alio Beati cibo vescuntur in coelis quam ipsa Dei voluntate? Quis denique alius Christi cibus, quam alia eius satietas, Quam vt *faciam*, inquit, *voluntatem eius qui misit me, vt perficiam opus eius?* Ioan. 4. Sic semper esuriebat hunc cibum vt semper eo saturaretur, quia semper faciebat eius voluntatem: & sic semper saturabatur hoc cibo vt magis ac magis eum esuriret; quia *hunc cibum qui comedunt, adhuc esuriunt*; & esuriendo saturantur, & se saturando esuriunt sicut Beati in coelo: *In quem desiderant prospicere.* Ecclesi. 24. Contemplare hæc attentius & ardentius. 1. Pet. 1.

## III. P V N C T V M.

**P**ATET ergo quàm verè Beati sint qui esuriunt & sitiunt Iustitiam, quia saturabuntur, quia quod volunt, habebunt; & quod habebunt vel non habebunt, id ita volent; quia quod vnice



Baruch 4.  
3. Reg. 10.  
1. Cor. 10.  
2. Macch. 1.

volunt est Dei cultus qui bona voluntate praesertim colitur; & quod habebunt vel non habebunt est Dei voluntas in qua vna con-  
quiescunt; sicque semper dum in Deo sunt contenti, & in ipsis  
Deus, quid superest ad Beatitudinem in hac vita possidendam?  
*Beati sumus Israel, quia quae Deo placent, manifesta sunt nobis.*  
**BEATI** viri tui, & beati serui tui, qui stant coram te semper! Nota  
illud semper quia in eo est Beatitudo coelestis & terrestis. Sicut  
enim Beatum in coelo facit quod semper Beatus Deo fruatur; Ita  
hic Beatitudo saturitatis Esurientium iustitiam, in eo est ut sem-  
per si velint saturantur, quia semper habent unde saturantur. Sem-  
per habent ubi iustitiam operentur, semper habent ubi Deum co-  
lant, semper habent praesentem Deum, semper habent opus praes-  
ens quo illi seruiant; Nam siue manducent, siue bibant, siue aliud  
quid faciant, omnia possunt in Gloriam Dei facere: possunt in  
omnibus Diuinam se conformare voluntati: possunt ubique & sem-  
per quod volunt, si ubique & semper velint quod debent velle.  
Nonne hoc ita vis? nonne hoc saltem velle concupiscis? *Det no-  
bis cor omnibus ut colamus eum, & faciamus eius voluntatem corde  
magno, & animo volenti. Adaperiat cor nostrum in lege sua & in  
praecipis suis, & faciat pacem.* Vide in 1. parte, FERIA 5. Hebdo-  
madae 4. in Aduentu.

Omnis copia quae Deus non est, egestas censenda est.



## FERIA SEXTA. DE QUINTA BEATITUDINE, QUAE EST MISERICORDIA.

*Beati misericordes.* Matthaei 5.

**RATIO EST,** Quia Beati sunt illi qui misericordiam  
consequentur.

*Sed misericordes misericordiam consequentur.*

*Ergo illi sunt Beati: Et nos esse oportet misericordes.*

I. PUNCTVM.



## I. P V N C T V M.

**Q**UID potest esse omnis iustitia nostra coram Deo, ait sanctus Bernardus. Nonne iuxta Prophetam, velut pannus menstruatus reputabitur: & si districtè iudicetur, iniustitia inuenietur omnis iustitia nostra, & minus habens? quid ergo de peccatis erit, quando ne ipsa quidem pro se poterit respondere iustitia? Propterea obnixè cum Propheta clamantes, Non intres in iudicium cum seruo tuo, Domine, tota humilitate ad misericordiam recurramus, quæ sola potest saluare animas nostras: & sollicitè pensemus quod sequitur: Beati misericordes, quoniam ipsi misericordiam consequentur.

Serm. I. in  
Festo omn.  
Sanct.

Primo quidem quàm sint Beati qui misericordiam consequentur, ita euidenter patet, vt indigni essent misericordia qui se beatos non crederent dum eam consequentur. Nam si beatitudo consideretur vt est opposita miseriæ, quid miseriùs quàm quod opponitur Diuinæ misericordiæ non obtentæ? ac proinde quid beatius obtentâ misericordiæ? Vide accuratè quid sit non obtinere à Deo misericordiam: Nempe esse in tali statu peccati, vt numquam inde emergas, sed in eo moriaris atque in inferno sepeliaris. Potestne cogitari par in mundo miseria? quando ipsum solum esset peccatum non remissum: quid peccato miseriùs? non paupertas, non infamia, non morbus, non ipsa mors, aut ipse etiam tormentorum locus, infernus, si absque peccato subsisteret: Abominatio desolationis est peccatum, & extremum malorum omnium, à quo cum liberentur qui misericordiam consequentur, nonne ipsi Beati, & omnium mortalium beatissimi, sunt censendi?

Math. 24.

Quid sentires de anima soluta corpore, aut quid ipsa de se sentiret, si ad inferos condemnata vel iam iam præcipitanda, reuocaretur in corpus & in hanc vitam, vt in Gratiam Dei rediret, & æternam sibi Beatitudinem compararet? Nonne se foelicem, nonne se beatam prædicaret? At nonne est æquale beneficium si quis peccato suo condemnandus misericordiâ consequitur, ne pereat, sed vt habeat vitam æternam? Nonne sic agnoscebat vir ille qui misericordiam à Domino erat consequutus: Confitebor tibi Domine Deus meus, in toto corde meo: & glorificabo nomen tuum in æternum: quia misericordia tua magna est super me, & eruisti animam meam ex Inferno inferiori.

Ps. 95.



Quàm multi alij Reges & Prophetæ misericordiam consequi voluerunt, & non sunt consequuti? *Orabat scelestus Antiochus Dominum, à quo non esset misericordiam consequuturus.* Et multis Prophetis dicitur à Domino: *Quia numquam noui vos, discedite à me, qui operamini iniquitatem.* Tibi autem tot iniquitatum reo, tibi peccatorum hominum pessimo, si quando post mortem dicatur, *veni dilecte mi, intra in gaudium Domini tui, quale putas illud Bonum? quale illud crederes esse Beneficium?* At numquam tibi dicitur nisi prius misericordiam consequaris: Illa vna Gratiam obtinet, & obtenta Gratia in æternam introducit Beatitudinem: vnde non minus certum est Beatos esse qui misericordiam, quàm qui regnum cœleste consequentur.

*Misericordias Domini in æternum cantabo. NISI quia Dominus adiuuit me, paulo minus habitasset in Inferno anima mea.*

## II. P V N C T V M.

**S**ED misericordes misericordiam consequentur.

Non est probatio certior quàm ab ipso misericordiarum Domino: Cum enim ipsi liberum sit præstare misericordiam vel negare cui voluerit; Cuinam potius concedat quam alteri, quis illo certius norit? At cum Ipse toties asserat in Scripturis se misericordi facturum misericordiam, quis dubitet nisi qui Christo non credat?

*Audi verò quàm id apertè & profusè dicat: Estote misericordes sicut & pater vester misericors est. Nolite iudicare, & non iudicabimini, nolite condemnare, & non condemnabimini: Dimittite & dimitemini. Date & dabitur vobis, mensuram bonam, & confertant & coagitatam & supereffluentem dabunt in sinum vestrum. Eadem quippe mensura qua mensi fueritis, remetietur vobis.* ORDO quodammodo, ait sanctus Gregorius Nyssenus, inuertitur, ut audeamus sperare futurum ut Deus nostra facta imitetur; ut dicas, quod ego feci, Domine fac: solui, solue: dimisi dimitte: Sed tamen quid clarius? quid expressius verbis Domini? Aut ne quid in his etiam difficultatis latere videatur, sic omnes ad vnum Patres ea interpretantur, ut quod sonant, hoc plane significant, nec quidquam aliud figuratum aut inuolutum sublit. *A nobis, inquit sanctus Chrysostomus, tota hæc res sumit exordium: futurum de nobis, in nostra est*



potestate iudicium, ipsum reum, Dominum Christus fecit esse sententia.

Sic sanctus Chrysologus: Humanam misericordiam Deus petit ut largiatur Diuinam. Est in cælis misericordia ad quam per terrenas misericordias peruenitur. Domine, inquit, in cælo misericordia tua. Dicturus causam in iudicio Dei, patronam tibi misericordiam per quam liberari possis, assume. Qui de patrocinio misericordiae certus est, de venia sit securus, de absolutione non dubitet. Misericordia non solum causam praeuenit, & anticipat cognitionem, sed etiam sententiam reuocat, absoluit addictos.

Sanctus denique Thomas qui res ad amissum exigit, sit instar omnium: sic autem ait actum misericordiae operari in Iustificatio-  
ne seu in Diuina consequenda misericordia, ut & precedat, comi-  
tetur, & sequatur ipsam iustificationem. Praecedit scilicet & comita-  
tur, per modum, inquit, preparationis, in quantum misericordes miseri-  
cordiam consequuntur: sequitur vero per modum satisfactionis, in quan-  
tum poena peccati post remissam remanens culpam per ipsum etiam miseri-  
cordiae actum dissoluitur; unde est illud Tobiae, eleemosyna ab omni pec-  
cato, & à morte liberat, & non patitur animam ire in tenebras. Satin-  
ne vides quomodo misericordes Diuinam consequantur miseri-  
cordiam?

### III. PUNCTVM.

**B**EATI sunt igitur misericordes: quoniam ipsi misericordiam consequuntur: & quoniam ipse est Dominus misericordiae qui hoc promittit & qui tam verax & certus est in promissis, ut de his nemo fidelis dubitare possit. In repromissione Dei non hesita-  
uit diffidentia, sed confortatus est fide, dans gloriam Deo, plenissime  
sciens, quia quaecumque promissit, potens est & facere. Sic de fidelium  
patre Abrahamo Apostolus, quem nos omnes imitemur in qui-  
buslibet diuinis verbis & promissis inconculsè credendis.

Sed quia non tam hîc agitur de veritate speculatiua quàm pra-  
ctica, inquirendum nobis potius est vtrum simus misericordes  
quàm vtrum misericordes misericordiam consequantur. Vide  
quid sit esse misericordem: vbi, quando, & quo modo virtus est  
exercenda; quid in hoc genere pecces: quid remedij: quid perfe-  
ctius fieri possit: quale motuum ut misericordiam consequaris,  
quanta sit tibi opus misericordia pro tot commissis delictis, pro  
tot debitis poenis, pro tot periculis euitandis.



Adde verò quod est maxime perpendendum in hoc materia, non modo misericordi promittitur misericordia, sed ita simul promissioni comminatio iungitur, ut nisi quis sit misericors, numquam speret misericordiam. *Si dimiseritis hominibus peccata eorum,* inquit Dominus, *dimittet & vobis pater celestis delicta vestra. Si autem non dimiseritis hominibus, nec pater vester dimittet vobis peccata vestra:* Vnde sanctus Augustinus; *Induxit nobiscum Deus pactum & placitum, firmiterque chirographum ut dicamus, sicut & nos. Qui vult dicere efficaciter, dimitte nobis debita nostra, oportet quod dicat veraciter, sicut & nos dimittimus.*

*l. contra ad-  
uers. legis  
& Proph.*

*Iac. 2.*

*Osee 6.*

*Matth. 25.*

Quod si dicas de re parua tecum agi, parum esse quod petitur aut quod negatur, respondet idem S. Augustinus, *Quia paruum est quod datur, magna impietate non datur. IVDICIUM sine misericordia illi qui non fecit misericordiam.* Non tremis ad hæc verba? Non spectatur quid feceris, sed quid non feceris. Non inquiritur quoties misericordiā feceris: sed quoties illam negaueris. Vix est vllus qui non aliquam aut qui non aliquoties faciat misericordiam, sed si recuset facere cum deberet; hoc est quod diuino & tremendo subiacet Iudicio. O quàm multis id dicitur: *Misericordia vestra quasi nubes matutina, & quasi ros manè pertransiens.* Prudentes virgines acceperunt oleum in vasis suis cum lampadibus; quibus vero vel ad horam defecit oleum, fatuæ dictæ sunt & reprobatae.

Vide infra in hac parte, Hebdomadæ 6. & Dominica 12. Necnon in 4. parte, Dominica 21. & postrema Hebdomada.



## SABBATO.

### DE SEXTA BEATITVDINE,

*QVÆ EST MVNDITIES CORDIS.*

*Beati mundo corde. Matth. 5.*

*RATIO EST, Quia Beati sunt qui Deum videbunt.  
Sed qui mundo sunt corde, Deum videbunt.  
Ergo illi beati: Et amanda est illa cordis mundities.*



## I. PUNCTVM.

**Q**UANTA esset facilitas explicandæ huius sextæ Beatitudinis de æterna felicitate : tanta forte est difficultas eiusdem declarandæ de hac præsentī vita , quod tamen huius considerationis est institutum declarare , sicut reuera est quod qui mundo sunt corde , iam ex hac vita , vident Deum præsentem quo videri potest modo præsens in suis Creaturis , & propterea sunt Beati.

Et quidem primo quam sint Beati qui sic vident Deum , tripliciter explicari potest , secundum triplicem animæ facultatem quam exercent in recolenda Dei præsentia. Prima est memoria seu cogitatio Dei præsentis , quando hoc solum esset quod cogitatur Deus præsens & quodammodo præsidens qualicumque creaturæ : mirum quantum latificet ; vnde in Psalmis Dauid , *Pronidebam Dominum in conspectu meo semper , quoniam à dextris est mihi ne commonear , propter quod letatum est cor meum , & exultauit lingua mea , in super & caro mea requiescet in spe.* Ps. 15.

Quidquid aliunde te angat , memor esto præsentis Dei , hunc angorem tuum permittentis : & statim interna quadam suauitate afficeris , *Renuit* , inquit idem , *consolari anima mea , memor fui Dei & delectatus sum.* Sic & de Machabæis : *Præsentia Dei magnificè delectati , prostrauerunt hostes suos ad multa millia.* Ps. 76.  
I. Macch.  
15.

Secunda facultas est Intellectus qui naturali seu supernaturali modo percipit quàm sapienter Deus & amanter , seu , vt ait Sapiens , *Quam fortiter attingat à fine vsque ad finem , & disponat omnia suauiter.* Licet enim nonnulla sint inscrutabilia & quorum ratio inuestigari non debeat , plurima tamen sunt quæ non modo in se comprehenduntur , sed ex ipsis alia longe à sensibus remotiora , quemadmodum ait Apostolus , *Inuisibilia ipsius à creatura mundi per ea quæ facta sunt , intellecta conspiciuntur ; sempiterna quoque eius virtus & diuinitas.* Rom. 1. Hæc est cognitio vespertina Angelorum de qua sanctus Augustinus in Genesim , cum sic in Creaturis videtur Deus , sicut est matutina cum in Deo videntur Creaturæ. Quàm fit verò suauis & iucunda illa cognitio vel ex eo facile colligi potest quod sit altissime contemplationis obiectum & causa , quæ ita mentem admiratione rapit & affixam Deo tenet , vt vix inde pos-



*Pf. 91.* sit auelli. *Quia delectasti me Domine in factura tua, & in operibus manuum tuarum exultabo: quam magnificata sunt opera tua Domine, nimis profunda facta sunt cogitationes tue: vir insipiens non cognoscet, & stultus non intelliget hac. VANI enim sunt omnes homines in quibus non subest scientia Dei: & de his quæ videntur bona, non potuerunt intelligere Eum qui est: neque operibus attendentes agnouerunt quis esset artifex.* *Lnc. 10.* Hæc est optima pars quam qui eligit non auferetur ab eo.

At cum Voluntatis quæ tertia est facultas, affectus iungitur intellectui, & in amorem cogniti Creatoris inardescit, suamque simul libertatem paternæ illius Prouidentia penitus abdicat: tum verè beatus ille quantum hic esse potest qui sic Deum videt & amat, quia nihil in humanis illum conturbat: non aduersus fortunæ casus, non iniuria temporis, non paupertas, non ægrotudo, non ipsa mors: quia nihil horum est sine Dei nutu, & quidquid à Deo est, præterquam quod non nisi sapienter & prouide est ordinatum, hoc solo tamen quod à Deo est, ita placet bonæ voluntati seu bene in Deum affectæ, vt nihil aliud sit in rebus quod illi placeat nisi quia sunt à Deo. *Quid mihi est in cælo? & à te quid volui super terram. TV fecisti priora, & illa post illa cogitasti, & hoc factum est, quod ipse voluisti: Sic sancta Iudith. Sic de Mose narratur quod fide reliquit Ægyptum non veritus animositatem Regis: Inuisibilem enim tanquam videns sustinuit, Expendenda valde verba, & affectus conformes excitandi.*

## II. P V N C T V M.

*S*ED mundi corde sic inter ceteros maxime apti sunt videre Deum. Cum enim sint illis affectibus inordinatis perpurgati qui suum duntaxat in Creaturis commodum aut delectamentum amant, facile penetrant ad Eum intus qui se illis communicat per Creaturas. Nam sicut ibi reuera est, sic ab eis adesse creditur adoratur, & quæritur: quid est ergo cur ab eis non inueniretur cum se maxime facilem præbeat se inquirentibus, nisi quid obftet: nihil autem in puro corde obftet, imo puritas ipsa eum alliciât? *Quod egregie confirmat Sapiens sub nomine Sapientia; Clara est, inquit, & quæ numquam marcescit Sapientia, & facile videtur ab his qui diligunt eam, & inuenitur ab his qui quærunt illam: præoccupat qui se concupiscunt vt illis se prior ostendat: qui de luce vigilauerit ad*



illam, non laborabit; asidentem enim illam foribus suis inueniet. Cogitare ergo de illa, sensus est consummatus, & qui vigilauerit propter illam, securus erit, quoniam dignos se ipsa circuit querens, & in viis ostendit se illis hilariter, & in omni Prouidentia occurrit illis. Initium enim illius verissima est disciplina concupiscentia. Cura ergo disciplina dilectio est & dilectio custodia legum illius est, custoditio autem legum, consummatio incorruptionis est, incorruptio autem facit esse proximum Deo.

Iam paulo ante dixerat Idem Sapiens de Impuris & profanis <sup>ibid. 2.</sup> hominibus qui nihil nisi in Creaturis suam quærebant voluptatem, Nescierunt sacramenta Dei, quasi diceret, sicut in Mysteriis & Sacramentis aliud videtur & aliud creditur quod non videtur; ita in Creaturis aliud est quod apparet & aliud quod intus latet; Impuri autem illud tantum spectant quod apparet, puri verò & mundi corde quod etiam latet.

Dominus est, inquit sanctus Ioannes; quando videlicet <sup>Ioan. 21.</sup> piscantes Discipuli ad vocem ignoti hominis, miserunt in dexteram nauigij rete, & iam non valebant illud trahere præ multitudinem piscium; dixit ergo Discipulus ille quem diligebat IESVS, Petro, Dominus est. Nempe ille præ cæteris in illa piscatione Dominum nouit qui præ cæteris mundo corde & corpore habebatur. Vide caput quartum secundi de Imitatione Christi, & tibi dictum puta.

### III. P V N C T V M.

**E**RGO ex hac etiam vita, Beati mundo corde, quoniam ipsi Deum videbunt, Videbunt quidem in fine, Facie ad faciem, inquit <sup>Serm. 1. in Festo omnium Sanctorum.</sup> sanctus Bernardus, Videbunt etiam nunc, sed per speculum in enigmate, & nunc cognoscent ex parte, perfecte postea cognituri. Sic & Diuus Thomas, In hac etiam vita, inquit, purgato oculo per donum intellectus, Deus quodammodo videri potest. Quod autem dicit per donum intellectus purgari oculum, id ex sancto Augustino mutuatur qui hoc intellectus donum refert ad hanc sextam Beatitudinem, siue quòd illo dono magis ac magis purificetur animus, siue quod per virtutem iam purificatus animus accipiat illud donum tamquam suæ virtutis præmium, quo in Creaturis facilius Deum legat, est enim intelligere quasi intus legere, vt ait idem sanctus Thomas. Vnde etiam apertius confirmatur Veritas, & <sup>ibid.</sup> quantum puritati vacare debeas hinc facile discas, quantum vide-



licet supra creaturas Creator est æstimandus, & quantum impu-  
ritati puritas præferenda. Nam sicut corde purus Deum in omni-  
bus videt, & videndo amat, atque amando ei totus inhæret ac  
purior redditur: ita impurus non nisi creaturis adhærescit, & qui  
*in sordibus est sordescit adhuc.* *APPROPIN QUATE* Deo, &  
*appropinquabit vobis. Emundate manus peccatores, & purificate corda,*  
*duplices animo. PLACEAT* necesse est facies, inquit sanctus Ber-  
nardus, *quæ in Dei claritatem intendere potest: neque enim id posset*  
*nisi clara ipsa quoque esset & pura, utique transformata in eandem*  
*quam conspicit claritatis imaginem, alioquin ipsa dissimilitudine resi-*  
*liret, insolito reuerberata fulgore.* Quia denique, vel ipso naturæ  
ductu, nomen ac notam impuritatis refugimus, vix se quisquam  
impurum & immundum fateatur, cum tamen contrà, vix quis-  
quam purus & mundus sit, diligenter illud Sapientis memo-  
randum: *Generatio quæ sibi munda videtur, & tamen non est lota à*  
*sordibus suis.*

Vide in 1. parte, Feria 6. Hebdom. 4. in Aduentu. In Festo  
S. Ioannis Euangelistæ. Feria 4. Hebdom. 2. post Epiphaniam;  
Et alibi passim, Verbo *Castitas.*



DOMI-





# DOMINICA

## QUARTA POST PENTECOSTEN.

*DE MIRA PETRI PISCATIONE,  
HVMILITATE ET AD CHRISTVM  
PERFECTA CONVERSIONE.*

IN quatuor partes diuidi posset Euangelium, siue illius Consideratio.

Prima continet prædicationem Domini factam in Petri nauicula.

*Et sedens docebat de nauicula turbas.*

Quò referri possunt hæ veritates.

Si quid nos reuocat à Doctrina Christi, vel ob id maxime recipienda est.

*In 1. parte, Feria 6. Hebdom. 2. post Epiphaniam.*

Quò tibi veritates Euangelicæ minus dignæ apparent quæ considerentur, hoc ipso magis sunt considerandæ.

*In eadem 1. parte, Dominica 6. post Epiphaniam.*

Nisi verbum Dei te conuertat, tu peruerter verbum Dei.

*In 2. parte, Dominica Sexagesima.*

Sedentem in cælo Christum & inde nobis loquen-



tem non audire periculosius est quàm dum in terris loqueretur.

*In eadem 2. parte, in Ascensione Domini.*

SECUNDA pars cui simul & tertia iungitur, proponit duplicem Petri laborem valde diuersum: primus quo multum laborauit, & nihil prorsus effecit: alter quo parum laboranti multum ei accessit.

*PRAECEPTO Rper totam noctem laborantes nihil cepimus, in uerbo autem tuo laxabo rete: Et cum hoc fecissent, concluderunt piscium multitudinem copiosam.* De quo duplici labore dictum est copiosè in 1. parte, Sabbato Hebdomadae 2. post Epiphaniam, & praesertim de primo qui stultus labor dicitur, & quo nisi diligenter aduertas consumeris. De altero autem qui sapientum est labor, quo laxatis ad verbum Christi retibus, id est, ex Christi ductu, obedientia, vel intuitu sua quæque faciunt, quod est facillimum factu ac fructu vberimum, posset hæc Sapientis pronuntiari sententia. *Vir obediens loquetur victoriam*, id est, obedienti cuncta obediunt. Qua de re fufius interpretes, atque in primis Cornelius à lapide Prouerbiorum vigesimo primo.

QUARTA & postrema pars, quæ hîc potissimùm expendenda relinquitur, piscatorum & maxime Petri stuporem, humilitatem & integram conuersionem complectitur, vbi certè mirum illud quod ait Petrus procidens ad genua Domini Iesu, *Exi à me quia homo peccator sum, Domine.* Quid est enim quod se tùm ita demittit, ita peccatorem confitetur, vt se indignum Christi consortio iudicet? Quid peccauit obediendo, cum vel maxime tantum obedientiae retulerit emolumentum? Non peccauit quidem dum obediuit, sed dum obedientiae tam prosperum retulit fructum, forsan peccasset, nisi se ita demisisset.

Quamobrem in prosperis hæc est admodum necessaria humilitas, ne alioquin prospera degenerent in aduersa, vnde hæc modò consideranda proponitur Veritas:

Nisi te humilies in prosperis, prospera te humiliabunt.

RATIO EST, *Quia nisi te humilies in prosperis, diuinam in te iram prouocas.*



*Nisi te humilies in prosperis, prospera te humiliabunt.* 187

*Sed ira Dei sic prouocata prouocantem humiliat.*

*Ergo nisi te humilies in prosperis, prospera te humiliabunt; seu quod idem est, erunt in causa, cur à Domino humilieris & confundaris.*

I. P V N C T V M.



*D* hunc Psalmi nonagesimi versum: *Cadent à latere tuo mille, & decem millia à dextris tuis*, Rectè ait S. Bernardus, *Non sine certi ratione Mysterij à sinistris multos, sed multò plures à dextris casuros hostes. Quod uidelicet abundantiori malignitate & velut copiosiore manu, dextris insistere partibus, dextrum latus appetere consueuissent.* Quenam sint autem illæ partes, dextræ vel sinistrae, quas sic impetunt aduersarij, trifariam explicatur.

Primò dicuntur esse perfecti & imperfecti, siue vt verbis sancti Bernardi utar, *Spirituales viri & carnales*, Quorum illi longe acrius impugnantur à Dæmone quàm isti, nempe *esca eius electa*.

Secundò non spirituales viros, sed bona spiritualia per dextram intelligi; nec carnales, sed carnalia per sinistram, refert idem sanctus Abbas, ac vehementius nos vrgeri ab hostibus animæ docet quàm corporis.

Tertiò denique Cassianus & alij prosperitatem spirituales & coll. 6. c. 10. temporalem in dextris, aduersitatem verò in sinistris agnoscunt, & vna omnes voce constanter affirmant multò plures prosperitate homines quàm aduersitate cadere, ac proinde saluberrimum esse monitum in prosperis, vt quò se ingerunt felicius, eò cautius & modestius admittantur. Nam profecto, *Nisi te in illis humilies, illa te humiliabunt & confundent.*

Cuius quidem veritatis cum plures afferantur rationes, tum multis hæc videtur solidior, quod nisi te humilies in prosperis, Diuinam in te concitas iram: Habent enim hoc prospera vt inflent animum nisi humilitate temperentur. Inflatus autem animus in quantis peccet quà loquendo quà cogitando, vix dici potest, vnde tandem grauissime offensus Deus, *Eleuauerunt cor suum*, Osea 13. inquit, *& obliti sunt mei.* Et rursus, *Insanisti in me, & superbia*, 4. Reg. 19.



2. Par. 32. tua ascendit in aures meas, Itemque sapius superbo, Elevationem est  
 cor eius, & facta est contra eum ira. Vnde illud Iob apte huc spe-  
 cit ex interpretatione sancti Gregorij: Si vidi solem cum fulgeret  
 Iob 31. & lunam incedentem clare, & latatum est in abscondito cor meum &  
 osculatus sum manum meam ore meo, quæ est iniquitas maxima & ne-  
 gatio contra Deum: Quasi diceret, si me nimis exaltaui, si nimis  
 exultaui in prosperis, fatuor me non parum in me irritasse Deum.  
 Nonne & tu idem fateberis?

## II. PUNCTVM.

**S**ED ira Dei sic prouocata prouocantem humiliat.

Cum enim ira Dei sit punitio irritantis Deum: cumque  
 Sap. 11. ordinarie poena sit proportionata culpæ, & per quæ peccat, quis  
 per hæc torqueatur, ut ait Sapiens: Hinc fit ut ordinaria superbi poena  
 Ier. 23. sit humiliatio. Dominus cogitauit hoc, inquit Propheta, ut detra-  
 heret superbiam omnis gloriæ, & ad ignominiam deduceret omnes in-  
 clytos terræ. Rursumque, Inebriate eum calice ira Domini quia contra  
 Ibid. 48. Dominum erectus est, Itemque ibidem. Ecce ego ad te superbe, dicit  
 Ibid. 50. Dominus, quia veniet dies tuus, tempus visitationis tuæ. Cadet superbus  
 & corruet, & non erit qui suscitet eum. Quod cum adolescens Ma-  
 chabæus superbo prædixisset Antiocho, tum postea quam id ve-  
 rum esset, expertus est, Tu autem ô sceleste, noli frustra extolli va-  
 nis spebus, nondum enim omnipotentis Dei & omnia inspicientis iudicium  
 2. Macch. 7. effugisti; Et post pauca: Tu vero iudicio Dei iustas superbiæ tuæ poenas  
 exolues. Nempe ita humiliatus est ut contigerit illum impetu euntem  
 Ibid. 9. de curru cadere, & graui corporis collisione membra vexari. Idque qui  
 sibi videbatur etiam fluctibus maris imperare, supra humanum modum.  
 superbia repletus, & montium altitudines in statera appendere, nunc hu-  
 miliatus ad terram in gestatorio portabatur, manifestam Dei virtutem in  
 semetipso contestans: itaut de corpore impij vermes scaturirent, ac viuen-  
 tis in doloribus carnes eius effluerent: Odore etiam illius & fætoe, exer-  
 citus grauaretur: & qui paulo ante sydera cæli contingere se arbitrabatur,  
 eum nemo poterat propter intolerantiam fætoris portare.

Nonne hoc est humiliari! Et ne putes id tantum cadere in gra-  
 uiores illos blasphemantes & impios, qualis erat Antiochus, Audi  
 Ecclesi. 6. quid te moneat Sapiens: Non te extollas in cogitatione animæ tuæ ve-  
 lut taurus, ne forte elidatur virtus tua per stultitiam, & folia tua come-



dat, & fructus tuos perdat, & relinquare velut lignum aridum in eremo. Expende singula, & primum illud præcipue quod ait, non te extollas in cogitatione animæ tuæ, quasi diceret, ad iram Dei provocandam, atque ad humiliationis poenam subeundam sufficit vna cordis elatio; Nam qui se ita extollit in aliquo foeliciori successu vt vel sibi nimis palpet, vel se aliis præferat, vel se paulo magnificentius prædicatum latetur, tum permittente Deo, refluabit oppositus ventus & sinistri aliquid accidet quo confundetur & humiliabitur. *Præquam humiliarer, ego deliqui.* Tunc illud saltem agnoscis? Ps. 118.

### III. P V N C T V M.

**N**ISI ergo te humilies in prosperis, prospera te humiliabunt: Prospera Deum irritabunt qui te confundet & humiliabit. *Conuersi sunt*, inquit, *ad irritandum me*, Ergo & ego faciam in furore. Ezech. 8. Non parcet oculus meus nec miserebor. Certe nihil ad confusionem & humiliationem acrius viro præsertim Religioso, vel Sacerdoti, vel spiritalem vitam profitenti, quàm peccatum illud quod ne nominari quidem vellet Apostolus: At vero illud est præcipue in quod elatos labi permittit Deus quos humiliat. *Multis*, inquit sanctus Gregorius, *sæpe superbia luxuriæ seminarium fuit, quia dum eos spiritus in altum erexit, caro in infimis mersit.* Hi enim prius se- Ephes. 5. creto eleuantur, sed postmodum publice corruunt, quia dum occultis intumescunt motibus cordis, apertis cadunt lapsibus corporis. Sic sic elati fuerant iusta retributione feriendi, vt quia superbiendo se hominibus præferunt: luxuriando vsque ad iumentorum similitudinem deuoluantur. Et post allatum eorum exemplum, quos vt refert Apostolus, *Tradidit Deus in desideria cordis sui, in immunditiam*, Sic pergit: Curandum itaque est, & omni custodia mens à superbia tumore seruanda: Non enim ante oculos Dei vacuæ transuolant cogitationes nostræ, & nulla momenta temporis per animum transeunt sine statu retributionis. Intus ergo videt Deus quod mentem eleuat, & idcirco permittit foris inualescere quod deponat. Intus prius extollitur, quod foris postmodum luxuriæ corruptione feriat. Occultam videlicet culpam sequitur, aperta percussio, vt malis exterioribus interiora puniantur, & cor publicè corruat quod latenter tumebat. Hinc quippe per Oseam contra Israelitas dicitur, *Spiritus fornicationis in medio eorum, & Dominum non cognouerunt: qui vt* Rom. 1.



ostenderet quod causa libidinis ex culpa prorumperet elationis, mox subdidit dicens, & respondebit arrogantia Israel in faciem eius: Ac si diceret, culpa quæ per elationem mentis in occulto latuit, per carnis luxuriam in aperto respondit.

Sic sanctus Augustinus apte ad rem nostram ubi multa de peccato Davidis. *Admonemur*, inquit, *tali exemplo, non se quemquam debere extollere in prosperis rebus. Multi res aduersas timent, res prosperas non timent. Periculosior est res prospera animo quam aduersa corpori: prius corrumpit prospera, ut inueniat quod frangat aduersa. Fratres mei aduersus felicitatem acrius vigilandum est, propterea videte quemadmodum eloquium Dei in nostra felicitate tollat nobis securitatem: seruite inquit Domino in timore, & exultate ei cum tremore. In exultatione ut gratias agamus, in tremore ne cadamus. Hoc peccatum non fecit David cum persecutorem Saulem pateretur, quando David sanctus Saulem inimicum patiebatur, quando illius persecutionibus agitabatur, quando per diuersa fugiebat ne in manus eius incideret, non concupiscebat alienam, non adulterata uxore occidit virum. Erat in infirmitate tribulationis sua tanto in Deum intentior quanto miserior videbatur. Quod* *Ps. 85.* *& alibi repetit ad hunc Psalmi versum, Iucundetur cor meum, ut timeat nomen tuum, D A N D O*, inquit, *timorem non nos faciat male exultare, & recedere de via. Quicquid prosperum venit; magis metuendum est. Quidquid etiam prosperum est secundum Christum, & germanam Charitatem Christi, exultatio illa non nos faciat securas, sed ita iocundetur cor nostrum ut timeat nomen Domini, ne aliunde iocundetur, aliunde feriat.*

*Ecclesi. 18.* Denique illud est quod ait Sapiens: *Memento ira in die consummationis, & tempus retributionis in conuersatione faciei. Memento paupertatis in tempore abundantia, & necessitatum paupertatis in die diuitiarum. A mane usque ad vespeream immutabitur tempus, & hæc omnia citata in oculis Dei. Id est à prosperitate ad aduersitatem, & ab elatione ad humiliationem, modicum interest temporis, statim vnum ex alio sequitur; si te in prosperis mane eleues, te ipsa prospera vespere deprimet: vnde & consequenter concludit: Homo sapiens in omnibus metuet, & in diebus delictorum attendet ab inertia. Hi sunt videlicet dies delictorum qui sunt prosperi nisi attendatur ab inertia, quia si fuerit iners animus, id est, sibi relictus, erigetur in superbiam & à superbia deprimetur. Elenatum est cor tuum in decore tuo: perdidisti Sapientiam tuam in decore tuo: in terram pro-* *Ezech. 28.*



*Nisi te humilies in prosperis, prospera te humiliabunt.* 191

*ieci te : producam ignem de medio tui qui comedit te, & dabo te in cinerem super terram in conspectu omnium videntium te. Certe si hæc non paues, stupendæ signum est superbia.*

Vide S. Gregorium, tertia parte Pastoralis, admonitione 27. Vide & in 1. parte, Dominica 4. post Epiphaniam, ubi navis Petri periclitatur; & ubi hæc Veritas exhibetur:

*Peregrinantis in corpore animæ majus est periculum, quam periclitantis in naui corporis.*

In 2. item parte, Dominica 2. Quadragesimæ: & Feria 2. Hebdomadæ 2. post Pascha.

*Sicut vinum novum, sic novus honor maxime temperandus.*

Necnon in 4. parte, tota Pent. Hebdom. 22. post Pentecosten. **DENIQUE** quod *relictis omnibus sequuntur Apostoli Dominum*, apte huc reuocari potest quæ in 1. parte, Feria 3. Hebdomadæ secundæ Veritas declaratur:

*Magis tenemur omnes, affectu nostra relinquere, quam effectu Apostoli.*



## FERIA SECUNDA. DE SEPTIMA BEATITVDINE, QUAE EST PACIFICATIO.

*Beati pacifici.* Matth. 5.

*RATIO EST, Quia Beati sunt illi qui filij Dei vocabuntur.*

*Sed pacifici vocabuntur filij Dei.*

*Ergo & illi Beati: ac talis in pace beatitudo summopere conquirenda.*



## I. P V N C T V M.

**A**D duas proxime præcedentes apte adiungitur hæc septima Beatitudo, quod videlicet non sit satis proximum sibi, aut se Deo reconciliare, quod sit per misericordiam & munditiem cordis: sed ad maiorem perfectionem oportet etiam alios & inter se, & cum Deo pacificare, quod est proprium huius septimæ Beatitudinis.

Tanta est autem eius excellentia & sublimitas, ut qui sunt pacifici, sint etiam singulari quodammodo vocandi filij Dei, id est tales futuri sint hoc ipso quo erunt pacifici, Nam vocari perinde est atque esse, cum apud Deum qui nouit omnia prout reuera sunt, non sit aliud esse & dici, sicut apud homines *qui dicunt malum bonum & bonum malum.*

Quomodo vero id fiat ut Pacifici reuera sint filij Dei, & quomodo inde Beati ex hac vita, hoc est modo attentius perscrutandum: ac primo illud quàm verè beati sint qui sunt singulariter filij Dei. Hoc enim perinde est ac singulariter spectare ad Deum, hoc est singulariter ab eo esse, ab eo diligì, ab eo enutriti, foueri promoueri & omnium denique beneficiorum fieri participem quæ à tali Patre redundant in filios. *Ipsam elegi mihi in filium, & ego ero ei in Patrem:* Dixit Deus Dauidi de Salomone filio, ut sic exprimeret quidquid dici & cogitari posset bonitatis & beneficentiæ Diuinitus effundendæ in Salomonem. Nam cum omne bonum sit vel honestum, vel utile vel delectabile, quid honestius aut nobilius: quid utilius & delectabilius quàm sic Deum diligere sicut filius diligit Patrem; aut sic à Deo diligì & foueri sicut à Patre Filius diligitur & fouetur? *Hic est filius meus dilectus in quo mihi bene complacui,* Dicebat Pater de vnigenito Filio suo, quod quidem filio tam gratum erat & gloriosum ut hoc vno gloria-retur & exultaret.

Sic certe sanctus Petrus ex his, ait, verbis Christum Dominum suam potissimum accepisse gloriam. *Accipiens,* inquit, à Deo Patre honorem & gloriam voce delapsa ad Eum huiusmodi à magnifica gloria: *hic est filius meus dilectus in quo mihi complacui, ipsum audite. Et hanc vocem nos audiimus de cælo allatam, cum essemus cum ipso in monte sancto.* Vnde si cuius hominum hæc cōmunicetur Gratia,



Gratia, vt singulari quodam modo dicatur filius Dei, nonne dicitur quidquid dici potest ad statuendam in terris beatitudinem magnificentius? O quam profusa Christi bonitas, quæ se in tam indignos effundit, vt nec ipsi velint eam accipere!

## II. P V N C T V M.

**S**ED pacifici vocabuntur filij Dei.

Triplex est horum genus; sunt enim qui secum pacem habent, sed non cum aliis: sunt qui sibi & aliis pacati sunt, sed non ultra progrediuntur: at vero sunt qui non modo secum & cum aliis pacem seruant, sed eam etiam ubicumque possunt procurant, dissidentes reconciliant, mutua componunt odia, lites dirimunt, auersos placant animos, nihil denique intentatum relinquunt ad communicandam ubique pacem.

Isti sunt verè pacifici quasi pacem facientes: & hi sunt præter alios filij Dei, primò quidem, quia vnigenitum Dei filium proximè imitantur, per quem omnia reconciliata sum cum Deo, & pacificata Coloss. 1. per sanguinem Crucis eius, siue qua in terris, siue qua in cælis sunt, inquit Apostolus. Et rursus: Ipse est pax nostra qui fecit vtraque Ephes. 2. vnum vt duos condant in semetipso in vnum nouum hominem, faciens pacem & reconcilians ambos in vno corpore, Deo per crucem, interficiens inimicitias in semetipso.

Deinde verò sunt filij Dei quia ad ipsam Dei similitudinem accedunt propius, Est enim Deus, Deus pacis & non dissensionis, PAX 1. Cor. 14. est Dei, Deus est ipsa pax; & pax est ipsa quodammodo Diuinitas, Phil. 4. quæ sicut in tribus Personis consistit, ita tres Personæ in pace & vnitæ subsistunt. Sic proinde pacifici qui omnes inter se homines & cum Deo vellent ita vnire vt quod orabat Christus Dominus, Vnum essent, sicut ipse vnum est cum Patre & Spiritu sancto; hi Ioan. 17. plane Deo similes sunt ac proinde præcipuè filij Dei. Sic disertè S. Gregorius Nazianzenus: Qui pacis bonum amplexantur, ad Deum Orat. 1. de diuinasque mentes accedunt. Pax amica meditatio mea, & decus meum, pace & 3. quam & Dei, & cuius Deum & quam Deum esse scriptura pronuntiat: velut in illo Apostoli loco, pax Dei, & Deus pacis, & ipse est pax nostra. 2. Cor. 13.

Tertio denique, si, vt ait Apostolus, Quicumque spiritu Dei aguntur, ij sunt filij Dei: Nonne pacifici præ cæteris diuino aguntur, Ephes. 2.



tur Spiritu qui tam arduum & sublime peragant opus quale est pacificare dissidentes, & quod est illi maxime proprium, qui inhabitare facit *unius moris in domo*? Itane tu morem geris huic diuino Spiritui, siue ut te pacificari velis, siue ut alios pacificare possis?

## III. PUNCTVM.

3. parte  
Pastor ad-  
monit. 24.

**B**EATI sunt ergo pacifici, quoniam filij Dei vocabuntur; Atque è diuerso, inquit sanctus Gregorius, si filij Dei vocantur qui pacem faciunt, procul dubio sunt filij satanae qui confundunt. Omnes autem qui per discordiam separantur à viriditate dilectionis, arescunt; qui etsi boni operis fructus in suis actionibus proferunt, profecto nulli sunt, quia non ex unitate Charitatis oriuntur. Quia autem nihil pretiosius est Deo virtute dilectionis, nihil est delectabilius diabolo extinctione Charitatis. Tum post pauca conuertens admonitionem ad pacificos, Admonendi sunt, inquit, ne tantæ actionis pondus leuigent, si inter quos fundare pacem debeant, ignorent. Nam sicut multum nocet si unitas desit bonis, ita valde est noxium si non desit malis. Si ergo peruersorum nequitia in pacem iungitur, profecto eorum malis actibus robur augetur, quia quo sibi in malitia congruunt, eò se robustius bonorum afflictionibus illidunt; Et quæ fufius prosequitur, ac tandem concludit; Admonendi itaque sunt qui faciendæ pacis studiis occupantur ut prauorum mentibus prius amorem debeant internæ pacis infundere, quatenus eis postmodum valeat exterior pax prodesse: ut dum eorum cor in illius cognitione suspenditur, nequaquam ad nequitiam ex huius perceptione rapiatur, dumque supernam prouident, terrenam nullo modo ad usum suæ deteriorationis inclinent.

Hic teipsum discute quam sis strenuus aut ignauus in hoc diuino negotio. Vide si quos noris dissidentes quibus eos modis reconciliare possis; Aude hic fortius quam soleas. Aptissima est etiam admonitio Authoris de Imitatione Christi, Tene te, inquit, primo in pace, & tunc poteris alios pacificare. Vide caput tertium libri secundi vnde illud imprimis obserua quod dicit, Habe primo Zelum super teipsum: & tunc Zelare poteris iuste etiam proximum tuum. Videri & infrà debet Hebdomada decima, præsertim FERIA 4. & Sabbato.





FERIA TERTIA.  
DE OCTAVA BEATITVDINE,  
QUAE EST TOLERANTIA PERSECUTIONVM  
PROPTER IUSTITIAM.

*Beati qui persecutionem patiuntur propter iustitiam.*  
Matth. 5.

RATIO EST, Quia Beati sunt illi quorum est Regnum Cae-  
lorum, etiam ex hac vita, quantum inchoari potest hoc re-  
gnum.

Sed tale Regnum illorum est qui persecutionem patiuntur.

Ergo & Beati; Et sic plane sentiendum de nobis cum persecutio-  
nem patimur.

I. P V N C T V M.

**Q**UAM per virtutes in septem Beatitudinibus comprehen-  
sas pia Sanctorum vita instituatur: Cumque omnes qui pie 2. Tim. 3.  
volunt vivere in Christo IESU persecutionem patiantur, recte  
octava haec Beatitudo caeteris additur, ut ad quaelibet toleranda  
parati potius simus quam a virtute deficere. Nihil horum timeas Apos. 7.  
qua passurus es propter virtutem, nam vel hoc solo nomine Beatus  
eris, quia tuum erit regnum coelorum: non illud tantum quod fu-  
turum speratur in aeterna sanctorum Beatitudine, sed quod iam in-  
choatur in anima de quo dicitur: Regnum Dei intra vos est: & Re- Luc. 17.  
gnum Dei iustitia & pax & gaudium in Spiritu sancto. Rom. 14.

Haec sunt quae modo attentius considerentur: atque illud im-  
primis vnde aliud deducatur quam vere Beati sint illi quorum est  
tale Regnum seu in quibus regnat Deus. Certe iam pridem dictum



est, & instar oraculi celebratum vniuersim, quod illa demum forent beata Regna in quibus vel Reges essent Sapientes, vel Sapientes essent Reges, quod nulli vniquam regno verius contigit quam interno Dei regno, ubi quæ regnat ipsa est Diuina Sapientia quæ quanta quanta est tota leges præscribit, mores componit, acta dirigit & cuncta regit. *Beati viri tui, & beati serui tui*, dicebat Salomoni Regina Saba: sed quanto verius Regi Regum, *Qui plusquam Salomon est*, Ne plura dicam quam ipse de se dixit.

3. Reg. 10.

Matth. 12.

Luc. 10.

Matth. 13.

Luc. 11.

*Beati oculi*, inquit ille, *qui vident quæ vos videtis & beate aures vestra quæ audiunt*. At cur non ita beatum pectus esset, cur non beata anima quæ illum ipsum habet secum loquentem, secum omnia operantem, & sibi dominantem? Denique quid hic hæremus cum dicenti cuidam, *Beatum ventrem qui illum portasset & vbera quæ suxisset*; *Quin immo*, inquit, *Beati sunt qui audiunt verbum Dei & custodiunt illud*: Quibus paucis verbis, & quid esset illud regnum, & quam beatum esset, satis indicauit; Sed an tu audias & custodias verbum illud in quo regnum Dei situm est, tu paulo attentius recogita.

## II. P V N C T V M.

**A**T QVI hoc Regnum, illorum est qui persecutionem patiuntur propter Iustitiam.

Hæc est illa scilicet vniuersalis Iustitia, quæ, vt iam dictum est, verbum Dei auditur & custoditur: quæ vii tus omnis exercetur: quæ leges illæ diuinæ seruantur quibus suos Christus regit. At vero cum quis propter talem Iustitiam iniuste patitur, signum est manifestum quod tam fidelis & constans est in illa seruanda Iustitia, vt malit male tractari & persecutionem pati, quàm vel vllam violare legem: vnde & illud sequitur quod in eo sit regnum Dei, aut quod is in regno Dei sit; quandoquidem istud regnum non aliter floret aut viget quam per virtutem & constantem diuinarum legum custodiam, in qua nullus magis excellit quam qui magis propterea patitur. *Parati sumus mori magis quàm patrias Dei leges præuincari*. E cælo ista possideo, Nempe linguam & manus, sed propter Dei leges, nunc hæc ipsa despicio. EGO sicut & fratres mei animam & corpus meum trado pro patriis & diuinis legibus. Sic Machabæi persecutionem patientes propter Iustitiam, facti sicut

2. Macch. 7.



regnum Dei: & illi fuerunt sancti de quibus Apostolus: *Sancti per fidem vicerunt regna, operati sunt Iustitiam, adepti sunt repromissiones,* & quæ fusè Apostolus prosequitur. Quid tu propterea pateris? aut quoties ne propterea patereris, maluisti legem infringere? *Vbi est literatus? Vbi legis verba ponderans? Vbi Doctor paruulorum?* O præclare dictum à Propheta! Hebr. II. 14. 33.

### III. P V N C T V M.

**E**RGO illi Beati sunt qui persecutionem patiuntur propter Iustitiam, quoniam ipsorum est Regnum Cælorum; seu regnum illud Dei quod ad cœleste perducit tam certo, quam certum est non regnare Deum in anima nisi per Iustitiam & per virtutes propter quas qui persecutionem patiuntur, ipsi sunt omnium aptissimi & dignissimi cœlo fruendo: Proptereaque dictum est in Apocalypsi: *Hic patientia sanctorum est qui custodiunt mandata Dei & fidem IESU.* Apoc. 14.

Et quidem hinc seruandæ patientiæ motiuum est efficax, sed quomodo seruari debeat, apte monet S. Gregorius. *Amonendi sunt,* inquit, *patientes ne in eo quod exterius portant, interius doleant, ne tanta virtutis sacrificium quod integrum foris immolant, intus malitiæ peste corrumpant, & cum ab hominibus non agnoscitur, sed tamen sub diuina examinatione peccatur, tanto deterior culpa doloris fiat, quanto sibi ante homines, virtutis speciem vendicat. Dicendum itaque est patientibus ut studeant diligere quos sibi necesse est tolerare, ne si patientiam dilectio non sequatur, in deteriorem culpam odij virtus ostensa vertatur.* 3. p. Pastor adm. 10.

Et post multa de hoc argumento, *Virtus itaque est, coram hominibus, aduersarios tolerare; sed virtus, coram Deo, diligere; quia hoc solum Deus sacrificium accipit quod quidem ante eius oculos in altari boni operis, flamma Charitatis incendit. Vide plura quæ pergit & illud præcipue caue quod monet euenire plerumque patientibus ut eo quidem tempore quo vel aduersa patiuntur vel contumelias audiunt nullo dolore pulsantur, sed cum post paululum hæc ipsa quæ pertulerunt ad memoriam reuocant, igne se doloris inflammant, argumenta ultionis inquirunt, & mansuetudinem quam tolerantes habuerunt retractantes, in malitiam vertunt, &c.* Nonne hoc tibi accidit aliquando? quis vero tum animus? an motum internum reprimis? an contines? Contine saltem linguam, & inuita etiam deprauata



198 FERIA 4. Hebd. 4. post Oct. Pent. De octava Beatitudine.

Iac. 5.

natura, Benedic Dominum, & beatum te prædica quod patiaris. Ecce beatificamus eos qui sustinuerunt, ait sanctus Iacobus: At cur non eos etiam modo qui sustinent? cur non te ipsum, quando est aliquid grauius sustinendum?

Videri debet in 2. parte, tota præsertim Hebdomada 2. Quadragesimæ, ubi hæc prostant Veritates:

Quò in cœlis corona gloriæ sumetur vultu, hoc in terris calix sumendus est.

Si propter Scripturas sunt aduersa toleranda, sunt libenter toleranda.

Necnon Hebd. Passionis, Vbi hæc inter alias per opportuna. Non quæsitæ cruces, sunt magis exquisitæ.



## FERIA QVARTA.

### DE EADEM OCTAVA BEATITVDINE, QUÆ SPECTAT MALEDICTIONES AVT BENEDICTIONES MVNDI.

*Beati estis cùm maledixerint vobis. Matth. 5.*

*Væ cùm benedixerint vobis homines. Luc. 6.*

RATIO EST, Quia illi Beati sunt, aut miseri, quibus benedicit, aut maledicit Deus.

Sed illis benedicit Deus, quibus maledicunt homines; & è contra illis maledicit quibus benedicunt.

Ergo Beati estis cum maledixerint vobis; Et Væ cùm benedixerint homines. Quod tam certa fide credendum est, quàm quoduis dictum ab Eo qui mentiri non potest.



## I. P V N C T V M.

**I**LLVSTRANDÆ apertius octauæ Beatitudinî quæ est vniuersalis tolerantia persecutionum omnium, adiungere voluit Dominus & hanc particulatim designare tolerantiam, cum nos maledictis & probris insequerentur homines, propter iustitiam & contra veritatem; quia tum maximè natura est fragilis & tum precipue roboranda. Iterum ergo propterea beatos dicit eos qui paterentur cum his tribus condicionibus. Prima est vt maledicta inferrentur propter iustitiam siue propter bonum ac pium aliquod opus. Secunda, vt essent falsa maledicta seu quod idem est, mentirentur maledicentes. Tertia denique vt libens ac lata esset eorum tolerantia. *Non enim ista perpeti fructuosum est* ait sanctus Augustinus, *sed ista pro Christi nomine, non solum* l. 1. de Per- bis Dom. in monte. c. 5. *æquo animo sed etiam cum exultatione tolerare.* Sanctus item Gregorius sapientissime monet, *Linguas detrahentium non debemus excitare ne pereant, sed excitatione æquanimiter tolerare vt nobis meritum* Hom. 9. in Exech. *crescat: aliquando tamen detractores debemus compescere ne Innocentium qui à nobis audire bona poterant, corda corrumpant, dum de nobis male disseminant.*

Et ratio quidem cur ita beati sint, & cur ita exultare debeant qui sic patiuntur, peti posset à futura mercede quam inde consequentur in coelis; sed hæc præterea quæ affertur pro præsentî vita, attente est cogitanda, nempe quod illi beati sint aut miseri quibus benedicit aut maledicit Deus. Nam vt paucis omnia complectamur, id solum de Deo verum est quod Rex Balac de Propheta Balaam iactitabat, *Novi quod benedictus sit cui benedixeris, & maledictus in quem maledicta congesseris;* Vnde & sacra scriptura vt vno verbo omnia bona vel mala comprehendat, non aliter quam his vocibus effert, *Benedictio Domini, vel maledictio.* *BENEDICTIO Domini super caput iusti.* Tum paulo post: *Benedictio Domini diuites facit, nec sociabitur eis afflictio.* Num. 22. Prov. 10. Ibid. Id est vere diuites & beatos facit. *Maledictus à Deo qui exasperat matrem.* *TESTES in-* Ecclesi. 3. Deut. 30. *uoco hodie cælum & terram, quod proposuerim vobis vitam & mortem, benedictionem & maledictionem.* Id est quidquid magis est in diuinis & humanis optandum vel timendum, siue pro præsentî siue pro futuro. Nonne ita sentis? Nonne ipsa vox maledictionis



*Matth. 25.* diuinæ terrorem incutit? Nonne hoc est quod ipsis damnandis grauissimum reſeruatur: *Discedite à me maledicti*; Aut quod ſaluandi ſuauius audient, *Venite Benedicti Patris mei*? O quis tùm animæ ſenſus!

## II. P V N C T V M.

**S**ED cùm maledicunt homines propter iuſtitiam & mentiuntur, tum benedic it Dominus; aut cùm benedicunt mentientes, tum ipſe maledicit.

Nam diuerſa plane ſunt iudicia Dei & mundi, ſeu illorum hominum qui non niſi ex deprauato concupiſcentiæ ſenſu de rebus iudicant; vnde id neceſſario ſequi debet vt cùm mundus maledicit, benedicat Dominus: aut è contra; Quia ratio cur maledicat mundus eſt iudicium quod de rebus pijs habet ſiue de hominibus pietatem ſectantibus, cui mundano iudicio cum Deus oppoſitum habeat, hinc etiam oppoſitam benedictionem vel maledictionem infert, eoque copioſiorem quo maledictus ab hominibus maledicta libentius patitur. *Maledicent illi & tu benedices,* dicebat Deo Dauid: Atque ipſe Deus: *Maledicam benedictionibus veſtris, & maledicam illis quia non poſuiſtis ſuper cor.* Vtrum ex his duobus iudicium verius cenſes? Expende accuratè; hinc enim tota viſ Concluſionis.

## III. P V N C T V M.

**E**RGO Beati eſtis cùm maledixerint vobis; & vbi cùm benedixerint vobis homines. Nam cùm ex benedictione vel maledictione Dei totam beatitudinem vel miſeriam veſtram metiri debeatis, ſi cùm vobis maledicunt homines, Dominus benedicat, aut cum benedicunt, Ipſe maledicit, Nonne beati eſtis cum maledixerint homines, aut miſeri cum benedixerint? *Vbi eſt ergo beatitudo veſtra,* dicebat Galatis ſanctus Apoſtolus, niſi videlicet in diuino ſit conſtituta iudicio? Quod vt maniſeſtius pateat, atque vt inde etiam vehementius excitemur ad patientiam, cogitandum eſt quod illo ipſo momento quo magis vituperaris ab hominibus, magis à Deo commendaris & laudaris; At nonne hoc longe eſt præferendum? Nonne magis laudabile ſic laudari à laudato



à laudato quam ab illaudato? Quid porro est laudibilius Deo? Confer Deum cum mundo, conter vtriusque iudicium, confer laudem & vituperium quæ ab eorum alterutro inferuntur. Nonne est quod præligas iudicium & laudem Dei? Et tamen nonne sapius mauis laudes & benedictiones hominum quam ipsius Dei? O probrum! ô iniuriam Deo factam! *Cui assimilastis me, & adæquastis, & comparastis me, & fecistis similem?* Hæc aggeratio tot nominum idem significantium, grauitatem rei denotat supra quàm credi possit. *Popule meus*, ait Propheta, *qui te beatum dicunt, ipsi te decipiunt, & viam gressuum tuorum dissipant.* Stat ad iudicandum Dominus, stat ad iudicandos populos. Tum paulo post: *Et dixit Dominus: pro eo quod eleuate sunt filie Sion, & ambulauerunt extento collo, & composito gradu incedebant; decaluabit Dominus verticem filiarum Sion, & Dominus crinem earum nudabit. Et erit pro suauis odore fætor, & pro crispanti crine caluitium.* Quasi diceret, Domini est beatum dicere & facere, sicut Domini est iudicare de rebus: cum autem de his iudicat, plane aliud est eius iudicium ab humano iudicio, nam quod homines statuunt, ille euertit: & quod euertunt, ille statuit. Huc etiam reuoca quod iam supra dixit sanctus Augustinus; *Qui laudari vult Domine de tuo dono, & non querit in illo tuam gloriam sed suam, hic licet laudetur ab hominibus, à te tamen vituperatur: qui autem ab hominibus laudatur vituperante Te, non defenditur ab hominibus iudicante Te, nec liberabitur condemnante Te.*

Vide in 1. parte, Fer. 3. Hebdomadæ 2. in Aduentu. Die 19. Ianuarij. Fer. 4. Hebdomadæ 6. post Epiph. vbi hæc satis apta proponitur Veritas:

Qui nimis humana timet iudicia, non satis reueretur diuina.

Et alibi passim in singulis partibus, nominatim vero in 4. parte, Feria 3. Hebdom. 16.





## FERIA QVINTA.

### DE CVRA PROPRIÆ PERFECTIONIS

ET PROXIMORVM, SECVNDVM TRIPLICEM

VIRTVTIS, SEV VIÆ PERFECTÆ

GRADVM, IN HIS TRIBVS

CHRISTI DOMINI VERBIS

CONTENTVM.

*Vos estis sal terra.*

*Vos estis lux mundi.*

*Non potest Ciuitas abscondi supra montem posita.*

*Matth. 5.*

### VERITAS PRACTICA.

Qui non gradatim procedit in via virtutis, non in  
via virtutis incedit, sed vitij.

RATIO EST, Quia qui non gradatim procedit, precipita-  
tione totus agitur.

*Sed precipitatio, vitium est.*

*Ergo non in via virtutis incedit sed vitij. Quod sane est di-  
ligenter precauendum.*

### I. P V N C T V M.

**T**OTVS hic sermo quem Christus Dominus in monte  
habuit, perfectionis est seu perfectæ vitæ viam demon-  
strat, & consilia sublimiora suggerit omnibus, in quo-  
cumque vitæ statu degentibus. Antequam verò ad singula parti-



*Qui non gradatim procedit in via virtutis, non in via, &c. 203*

culatim descendat, suos monet, & eos præcipue qui dirigendis aliis præfunt, vt gradatim ad virtutem & perfectionem ipsi conscendant, & sic alios promoueat. Sunt autem hi tres præcipui gradus seu status incedentium in via perfectionis acquirendæ, vt refert sanctus Thomas & alij. Primus eorum qui incipiunt per purgatiuam viam quæ est in recessu à vitiis. Secundus eorum qui proficiunt per illuminatiuam quæ est in exercitatione virtutum. Tertius denique qui perfecti sunt per vnitiuam quæ est in studio inhærendi ac fruendi Deo.

Atque hi tres procedendi gradus designantur à Christo Domino per tria symbola suprâ dictis verbis contenta. Primus nomine falis, *vos estis sal terra*: nam falis natura, vt ait Plinius, est mordens, adurens, repurgans, extenuans, & exsiccans, quæ omnia satis aptè conueniunt viæ purgatiuæ seu primo Incipientium statui. Secundus gradus est in nomine lucis, vnde & illuminatiua via dicitur & qui in ea sunt, Proficientes nuncupantur quo sensu, ait Sapiens, *Iustorum semita quasi lux splendens procedit & crescit, usque ad perfectam diem*. Tertius nomine Ciuitatis exprimitur, quæ, vt ait Philosophus, est multitudo Ciuium per se sufficiens ad viuendum, sic Perfecti dum vni Deo inhærent & eo perfruuntur, sibi & aliis abundè sufficiunt ad perfectam vitam. *Vita sibi sufficientis Operarij condulcabitur, & in ea inuenies thesaurum*.

Quod vero præcipue circa hos gradus obserues, siue tecum siue cum aliis, proposita Veritate continetur: Nempe vt gradatim ab vno in alium promouearis & promou eas tibi commissos, cum alioquin, *non in via Virtutis incederes sed vitiij*; Quod sic facillimum est declarare.

Hæc est enim præcipitatio, quæ, vt expresse habet sanctus Thomas, *In actibus anima metaphorice dicitur secundum similitudinem corporali motu acceptam, dicitur autem præcipitari secundum corporalem motum quod à superiori in ima peruenit secundum impetum quendam proprii motus, vel alicuius impellentis, non ordinatè descendendo per gradus*. Ipsissima sunt sancti Doctoris verba, qui pergens ostendit gradus ordinatos in omni negotio sapienter dirigendo: tum inferit, *Si quis autem feratur ad agendum per impetum voluntatis vel passionis, pertransitis, seu non transitis huiusmodi gradibus, erit præcipitatio*.

Quæ si vera sunt de quouis negotio seu actione vbi aliqui forte gradus reperiantur per quos oportet procedere; quanto magis



Cant. 2.

certa & rata erunt de processu perfectionis qui totus est in gradibus ordinate constitutis, de quibus sponsa: *Ordinavit in me Charitatem?* Sit ergo aliquis qui non gradatim, seu quod idem est, qui non per illos gradus ordinatos incedat, quid quam præceptus dicendus est? & quid aliud ille incessus quam præcipitatio? Hoc qui non videt in tenebris ambulat, *Et hæc est via impiorum tenebrosa*, de qua Sapiens, *qui nesciunt ubi corruant*. Velle ne ita periclitari?

Prov. 4.

## II. PUNCTVM.

**S**ED ipsa insuper præcipitatio, vitium est.

Ecclesi. 2.

supra.

Is. 14.

Matth. 11.

Quid est enim vitium nisi mentis inordinatio? nisi ordinis ad æterna lege constituti violatio? Quid vero præcipitatio nisi talis inordinatio, cum aliter præcipitatio non fiat, ut dictum est, quam quia graduum constitutus ordo non servatur? *Vae his qui dereliquerunt vias rectas, & diuerterunt in vias pravas?* Et quidem in negotiis quibuscumque peragendis vitium est, inquit sanctus Thomas, sub imprudentia contentum quo quis per impetum voluntatis vel passionis, gradibus prudentiæ contemptis in ruinam labitur; at in nostra materia vitium est eò longe grauius & damnosius quò materia sese diffundit latius & spirituale bonum animæ propius tangit. Est enim temeritatis imprudentissimæ & presumptionis intolerandæ, velle aliter esse perfectum quam prout ordinavit Deus. Nonne hæc est illius Superbia qui contrà quàm sibi erat ordinatum, *Ascendam*, dixit, *super altitudinem montium: similis ero Altissimo: veruntamen ad infernum detraheris, in profundum lacu. Et tu Capharnaum*, inquebat Dominus: *Numquid usque in cælum exaltaberis? Usque in Infernum descendes*. Non expauescis ad hæc verba?

## III. PUNCTVM.

Pr. 19.

Gal. 1.

**Q**UI non ergo gradatim procedit in via virtutis, non in via virtutis incedit sed vitij. Nempe præcipitationis & exitij apertissimi consequentis. Nam *qui festinus est pedibus, offendet*, inquit Sapiens. Sunt quidem aliquando viæ quædam extraordinariæ quibus in momento nonnullos ad perfectionem Deus vocat, ut Apostolum Paulum qui *continuo non acquieuit carni & sanguini*. Sed hæc raræ sunt & singulares viæ de quibus iudicare spectat ad discre-



tionem spirituum; At prout ordinarie Diuina procedit Prouidentia, sic pro certo habet non aliter te ad supremos Caritatis aut virtutum gradus peruenturum, nisi prius in inferioribus diu multumque te continueris. Sic præclare sanctus Gregorius, ad hæc Ezechielis verba: *Et ascendit per gradus eius.* Quid enim sunt gradus huius portæ nisi merita virtutum? Siue in cognitione mediatoris Dei Ezech. 40. Hom. 15. & hominum hominis Iesu Christi, seu in scientia Diuini eloquij, seu in ipsa fide quam de illo accepimus, quibusdam gradibus ad altiora incrementa peruenimus. Nemo enim repente fit summus, sed in bona conuersatione à minimis quisque inchoat ut ad magna perueniat. De his gradibus per Psalmistam dicitur: *Deus in gradibus eius dignoscetur, dum suscipiet eam.* De his quoque gradibus beatus Iob loquitur dicens, *per singulos gradus meos pronuntiabo illum.* Si quidam gradus in cordis ascensione non essent, Psalmista non diceret: *ambulabunt de virtute in virtutem.* Nec mirum si de virtute in virtutem gradus sunt, quando unaquæque virtus quasi quibusdam gradibus agitur, & sic per incrementa meritorum, ad summa perducitur. Alia namque sunt virtutis exordia, 22. Mor. c. 14. & l. 28. c. 6. aliud profectus, aliud perfectio. Quæ quidem ibi fusius prosequitur, atque in librum Iob notatis locis.

Sanctus item Bernardus aptissime, ubi de triplici osculo, pedis, 1. Cant. Serm. 3. & 4. manus, & oris Domini: *Nolo, inquit, repente fieri summus; paulatim proficere volo.* Quantum displicet Deo impudentia peccatoris, tantum penitentis verecundia placet. Citius placas eum si mensuram tuam seruaues, & altiora te non quæseris. Longus saltus & arduus est de pede ad os, sed nec accessus conueniens. Quid enim, recenti adhuc respersus puluere, ora sacra continges? Heri de luto tractus, hodie vultui gloria præsentaris? Per manum tibi transitus sit, illa prius te tergat, illa te erigat. Et post nonnulla: *Hæc via, hic ordo: primo ad pedes procidimus, & ploramus coram Domino qui fecit nos, ea quæ fecimus nos.* Secundo, manum querimus subleuantis & roborantis genua dissoluta. Postremo cum ista multis lachrymis obtinemus tum domum audemus forsitan ad ipsum os gloriæ, caput attollere; pauens ac tremens dico, non solum speculandum, sed etiam osculandum: quia spiritus ante faciem nostram Christus Dominus, cui adherentes in osculo sancto, vnus spiritus, ipsius dignatione efficiamur.

Iam vero tu qui hæc audis, an sic gradatim pergis in via Domini? Numquid summum sine medio, vel medium sine primo gradu affectas? Audeſne eò temere ascendere quò sancti verentur



206 FERIA 6. Hebd. 4. post Oct. Pent. Sic luceat lux vestra, &c.

accedere? Satisne sunt purgati omnes affectus tui quantum requirit Diuina Charitas? Cur non haeres diutius fundendis lachrymis ad pedes Domini & peccatis eluendis? Aut cur his immoraris longius, nec te ulterius promoueri, & altius erigi finis à Gratia? O quam pie, quam prudenter dictum à Propheta: *Vtinam dirigantur viae meae ad custodiendas iustificationes tuas. Tunc non confundar cum perspexero in omnibus mandatis tuis. Confitebor tibi in directione cordis, in eo quod didici iudicia iustitiae tuae.*

Ps. 118.

Vide in 1. parte, tota Hebdomada 3. post Epiph. ubi de recurſu ad Directorem agitur.



## FERIA SEXTA.

DE BONO EXEMPLO CUNCTIS  
DANDO, AD DEI GLORIAM.

*Sic luceat lux vestra coram hominibus ut videant opera vestra bona, & glorificent Patrem vestrum qui in caelis est. Matth. 5.*

### VERITAS PRACTICA.

Sicut humanae aspectu gloriae non est opus ponendum, ita nec eius despectu deponendum.

RATIO EST, Quia idcirco humanae aspectu gloriae non est ullum opus ponendum, ne quid diuinae gloriae quae in operibus nostris spectanda est, detrahatur.

Sed si humanae despectu gloriae opus inchoatum deponeretur, diuinae aliquid etiam gloriae posset detrahi.

Ergo sicut humanae aspectu gloriae non est ponendum opus, ita nec eius despectu deponendum.



I. P V N C T V M.

**G**ENERALE hoc etiam est sicut precedens, Euangelica legis documentum, ad nostram simul & aliorum perfectionem spectans, ut bono exemplo præluceamus omnibus, non ad humanam & propriam, sed diuinam duntaxat gloriam. Neque enim nisi vera virtute aliis lucere possumus; neque esset vera virtus si humanam & non diuinam spectaret gloriam. Quando autem sic est ordinata virtus, vix dici potest quantum valeat ad permouendos eorum animos quibus datur in exemplum. *Vt qui non credunt verbo*, inquit sanctus Petrus, *per conuersationem sine verbo lucrifiant, considerantes in timore castam conuersationem vestram.* Vnde & idem paulo post, *vnusquisque sicut accepit gratiam, in alterutrum illam administrantes sicut boni dispensatores multiformis gratia Dei.* Cui conformiter sanctus Paulus: *Quæ pacis sunt sectemur: & quæ adificationis sunt, in inuicem custodiamus.* Et paulo post: *Vnusquisque vestrum proximo suo placeat in bonum, ad adificationem.* Id est, ad promouendum verum eius bonum; quod dum ita peragitur, tunc edificari dicitur.

Verum quia in hoc facile potest subrepere appetitus propriae gloriae, sic ab eo cauendum monet proposita Veritas, ut tamen bono numquam desis Exemplo: *Non est quidem humana aspectu gloriae bonum opus ponendum, sed nec eius despectu deponendum aut desistendum à capitis.* Expende fideliter. Cur enim nolles propriam gloriam? Nempe ne quid diuinæ detraderetur gloriae, quæ in omnibus operibus nostris maxime spectanda est & colenda. Sic aperte Christus Dominus, *ut glorificent patrem vestrum.* Hic finis exempli dandi, & omnium agendorum; Vnde & Apostolus: *Omnia in gloriam Dei facite. Sine offensione estote Iudeis & gentibus & Ecclesiae Dei, sicut & ego per omnia omnibus placeo, non querens quod mihi utile est, sed quod multis, ut salui fiant.* Glorificatur autem Deus bono exemplo quatenus boni Author Deus agnoscitur, sicque totius operis laus Illi refertur & gloria. *Non enim potest homo accipere quicquam nisi fuerit ei datum de cælo.*

Deinde, quod notum fiat omnibus, quinam illius sint serui, quid sit ei seruire, quid eum colere, quid ille amet, quid oderit, in quo non minima est Diuinæ perfectionis cognitio & glorifica-



Exech. 36. tio. *Vt sciant Gentes me, cum sanctificatus fuero in te, in oculis eorum.*  
Denique alij auertuntur à malo & excitantur ad bonum, sicut illi  
Seraphim qui se alis suis prouocabant ad Diuinas laudes: vnde  
Ibid. 3. sanctus Gregorius: *Alia sua me percutit qui exemplo sanctitatis pro-*  
I. 24. Mor. *pria, me ad melius accendit. Ala mea vicinum ferio, si quod imite-*  
C. II. *tur ostendo.* Itane inflammas? Itane inflammaris? Itane pure pro-  
pter Deum? At certe agnosce quantum hinc Diuine obstares glo-  
riae si tuam quæres.

## II. PUNCTVM.

**S**ED si humane despectu gloriae, bonum opus deponeres: si metu laudis à bono desisteres, Diuine aliquid etiam gloriae posset detrahi.

Detractio nempe opere in quo erat Diuina gloria, nonne ipsam  
Num. 20. detrahis gloriam? *Quia non credidistis mihi vt sanctificaretis me, coram filiis Israel, non introducetis hos populos in terram quam dabo eis.*  
Stupenda certe verba in Moysem & in Aaron dicta qui quantum omiserant facere in quo Deus sanctificatus & glorificatus fuisset, tantum subtraxerant Diuinae gloriae. Deinde fieri posset vt prætermittendo bonum opus, male ageres aut male ædificares, & scandalum aliis pareres: Tum verò numquid contra Charitatem peccares & Dei Gloriam? Nam vt alias forte audiuiſti, vel boni sunt qui te peccantem intuebuntur vel mali; si quidem boni sunt, dolebunt, murmurabunt quod bonum illud prætermittas aut malum committas; si vero mali sint, ad idem committendum  
Matth. 18. incendentur, tuo se exemplo protegent: & *va homini illi per quem scandalum venit.* Neque tibi proderit quod bono fine mouearis fugienda videlicet vanæ gloriae. Nam alia via est eius fugienda sine vlllo preiudicio Charitatis & ædificationis vt dicitur. Atque vniuersim Apostolus, *Ne ponatis, inquit, offendiculum fratri vel scandalum. OMNIA sustinemus ne quod offendiculum demus Euangelio Christi.*

Atque vt euidentius videas non minus sæpe offendi Deum & proximum, quando quid boni omittitur quouis bono prætextu, ac si malum committeretur, *Va mihi est,* ait ibidem Idem Apostolus, *si non Euangelizauero.* Sicut ante Propheta dixerat: *Va mihi quia tacui.* Quod argumentum fusè prosequitur Diuus Gregorius tertia parte pastoralis in ea admonitione quæ fit Prædicatoribus qui



*Sicut humana aspectu gloria non est opus ponendum, &c. 209*

qui præ nimia humilitate formidant apparere: *Quo reatu*, inquit, *Adm. 26.*  
*constringantur aspiciant, qui dum peccantibus fratribus verbum predica-*  
*tionis subtrahunt, morientibus mentibus vitæ remedia abscondunt.* Non-  
ne illa est impij Regis simulata pietas qui cum moneretur petere  
signum à Domino, *Non petam*, inquit, *& non tentabo Dominum. 1s. 9.*  
Numquid illa Prophetæ inconsulta humilitas, qui cum iussus esset  
à Domino pergere Niuinem, *Surrexit ut fugeret in Tharsis à facie* *Ion. 1.*  
*Domini?* Nonne hæc denique malī serui mala timiditas qui ta- *Matth. 23.*  
lentum suum exercere noluit ne forte humana tangeretur glo-  
ria, sicque maluit nihil Deo & nihil sibi & proximo laborare,  
quàm de labore gloriari? Væ nobis si sic humiles & timidos ha-  
buissimus Apostolos!

### III. P V N C T V M.

**S**ICUT ergo humana aspectu gloria non est ullum opus ponendum:  
*Sita nec eius despectu deponendum:* Quia quod times in aspectu,  
non minus est timendum in despectu, si non minus in isto Diuinæ  
quid subtrahatur Gloriæ quàm in illo. *Laudē meā infrenabo te, ne* *1s. 48.*  
*intereas.* Id est, si vere inchoas opus tuum ad laudem & Gloriam  
Dei, bene spera, & perge in hoc Diuino opere, nam Deus te illa  
laudis suæ intentione reget & gubernabit sicut freno reguntur  
equi. Et licet aliquo gloriolæ sensu pungaris, non interibis pro-  
pterea, *Liberabo te à sagitta volante in die & reuocabo te ad vnam* *Ps. 90.*  
*meam gloriam intendendam.* Sic sancto Bernardo accidit qui  
cum dicendo adrepentem & blandientem sentiret gloriam: non  
propter te inquit capī, nec propter te desinam: *Quasi iactato se-*  
*mine germinandi radices subtrahit qui opus quod imitandum est non*  
*ostendit.* Sic præclare sanctus Gregorius in eadem tertia parte Pa-  
storalis, admonitione postrema. Vbi hæc duo Domini apte con-  
ciliat dicta quæ sibi repugnare videntur, *Videant opera vestra, &* *Adm. 35.*  
*glorificent patrem vestrum qui in cælis est: Et attendite ne iustitiam fa-*  
*ciatis coram hominibus ut videamini ab eis.* *QUALITER*, inquit,  
*videnda essent, vel qualiter non videnda ex sententiarum sine monstrauit,*  
*quatenus operantis mens opus suum & propter se videri non quereret, &*  
*tamen hoc propter cælestis Patris gloriam non celaret.* Quidquid autem  
contrà sentiat, non nocet sensus ubi non est consensus. Non  
est autem consensus nisi aduertat ad sensum & tibi in eo volun-



210 Sabbato Hebd. 4. post Oct. Pent. Nolite putare, &c.

Pf. 72.

Pf. 38.

Mich. 7.

Pf. 118.

Ioan. 8.

Pf. 113.

Gal. 6.

2. Cor. 10.

tarie complaceas; Est verò facile cum Dei Gratia complacentiam illam excutere vel negatiue cogitationem abducendo, vel positiue renouando intentionem his aut similibus corde vel ore prolatis versiculis: *Quid mihi est in cælo, & à te quid volui super terram! Deus cordis mei & pars mea, Deus in æternum. ET nunc, quæ est expectatio mea, nonne Dominus? EGO autem ad Dominum aspiciam. AVERTE oculos meos ne videant vanitatem. SI quero gloriam meam, gloria mea nihil est. NON nobis Domine, non nobis sed nomini tuo da gloriam. MIHI absit gloriari nisi in cruce Domini nostri. QUI gloriatur, in Domino gloriatur.*



## SABBATO.

### DE CVRA RERVM MINIMARVM IN CVLTV DEI: AD HÆC CHRISTI DOMINI VERBA:

*Nolite putare, quoniam veni soluere legem, aut Prophetas: non veni soluere, sed adimplere. Amen quippe dico vobis, donec transeat cælum & terra, Iota unum aut unus apex, non præteribit à lege, donec omnia fiant. Matth. 5.*

### VERITAS PRACTICA.

Cura rerum minimarum rem procurat omnium maximam.

*RATIO EST, Quia res omnium maxima est pura Caritas quâ diligimus Deum, & qua diligimur à Deo.*

*Sed cura rerum minimarum hanc procurat Caritatem.*



*Cura rerum minimarum rem procurat omnium maximum. 211*

Ergo rem procurat omnium maximam: Ac proinde ut diligentius illa cura foueatur, hæc alia Veritas additur; Sæpe in minimis non est minima culpa. Ratio post exponetur.

## I. P V N C T V M.

**A**VDIENDVS ante omnia sanctus Augustinus circa hæc Christi Domini verba quæ rerum minimarum commendant obseruantiam. *Iota*, inquit, *minima est literarum, apex vero eius particula in summo: significat ergo minima quæque ad effectum perducenda.* Quam perfecte autem minima quæque Christus Dominus adimplerit & quàm certa sit nota fidelis serui, sic adimplere omnia, iam supra declaratum est in prima parte. Nunc vero cum res maximi sit momenti, rursus hîc & infra etiam amplius, de eadem materia proponuntur Veritates tanto quidam breuius quanto sunt per se claræ & apertæ. Prima ostendit bonum quod in cura rerum minarum continetur. Secunda manifestat malum quod ex earum incuria prouenit, ut utroque motiuo boni & mali simul exhibito, magis ad finem propositum cum Gratia moueamur.

Prima sic habet & declaratur: *Cura rerum minimarum rem procurat omnium maximam.* Quid enim maius Caritate tum qua nos Deum pure diligimus, tum qua nos à Deo diligimur? *Aemulami autem Charismata meliora*, inquit Apostolus: *Et adhuc excellentiorem viam vobis demonstro*, Quasi diceret, quantumcumque vehemens sit æmulatio, & quantumcumque bona sint quæ vobis æmulemini & concupiscatis: Supereminet tamen & præcellit illis omnibus quod iam vobis demonstraturus sum bonum, nempe Caritas de qua toto sequenti capite differit, & quod ita concludit, *Nunc autem manent fides, spes, Caritas, tria hæc; major autem horum est Caritas*, Id est major & maxima rerum omnium. Denique *Charitas, Deus est*, ait dilectus Discipulus, *& qui manet in Charitate, in Deo manet, & Deus in eo.* Potestne aliquid dici maius cum præfertim de pura Caritate sit sermo, id est, *de corde puro & conscientia bona, & fide non ficta?*

*Feria sexta  
Dom. sexta  
post Epiph.*

*1. Cor. 12.*

*Ibid. 13.*

*1. Ioan. 4.*

*1. Tim. 1.*



## II. P V N C T V M.

**S**ED cura rerum minimarum hanc procurat Charitatem.

*Ham. 30 in  
Evang.*

*1. Ioan. 3.*

*21. Collat.  
c. 13.*

Primò quidem de Caritate quâ Deum diligimus, sic aperte patet, quia numquam est certior Caritas quam in effectu, id est quàm in agendo vel patiando, vnde est illud frequentissimum sancti Gregorij: *Probatio dilectionis, exhibitio est operis*. Quantò verò etiam minùs de proprio, seu minùs de nostro commodo vel incommodo permiscetur in illo exhibendo opere, tantò certe opus exhibitum, maior est probatio dilectionis, Quia dilectio tum erit purior & sincerior. Hoc est autem opus quod inducit & procurat Cura rerum minimarum; non diligit lingua & sermone qui curat minima, *Sed opere & Veritate*: Cura minimorum est opus & opus pene continuum, pene singulis continuatum momentis prout occurrunt frequentissimè. Opus vero est puræ dilectionis si quod est aliud, neque enim hîc spectatur magnum præmium sicut in arduis illis & heroicis virtutum actibus; neque grauis timetur poena sicut in grauibz culpis. Timor ille sanctus & castus & perfectus est quem, vt ait Cassianus, *non pœnarum terror nec cupido præmiorum sed amoris generat magnitudo quo vel filius indulgentissimum Patrem, vel fratrem frater, vel amicum amicus, vel coniugem coniunx sollicito reueretur affectu dum eius non verbera, neque conuicia, sed vel* **TENEM AMORIS FORMIDAT OFFENSAM,** *atque in omnibus non solum actibus, verum etiam verbis attonita semper pietate distenditur, ne erga se quantulumcumque feruor dilectionis illius intepescat.*

*Prov. 8.*

*17. 66.*

Iam verò quod is à Deo diligatur qui sic Deum diligit, quis dubitet nisi qui de Bonitate aut fidelitate illius dubitet, qui dixit, *Ego diligentes me diligo; & qui mane vigilant ad me, inuenient me*. Id est qui non expectant interdiu quid operentur, sed ipso statim lucis exordio simul ac vigilant, vigilant ad me, mihi laborant, mihi operantur, quidquid tandem agant & operentur: mihi viuunt, Illi sunt præ cæteris qui me inuenient, nempe ista cura & vigilantia me totum allicit vt me totum illis communicem, me præsentem & præidentem singulis eorum operibus exhibeam, me cognitorem bonorum omnium quæ faciunt, & compensatorem eximium. *Ecce ego declinabo super eum quasi fluium pacis: ad*



*opera portabimini; & super genua blandientur vobis. O quis Eum non diligit à quo sic diligitur!*

III. P V N C T V M.

**C**URA ergo rerum minimarum rem procurat omnium maximam; Nempe Charitatem, quæ nihil est maius, & quæ non magis pure exhibetur quam dum in minimis non propter res ipsas mandatas, sed propter Mandantem talis adhibetur cura & vigilantia nihil vt omnino committatur vetitum, nihil iussum omitatur, quantumcumque exiguum. *Exge serue bone & fidelis, quia super pauca fuisti fidelis, super multa te constituam.*

*Matth. 25.*

Hic est verus Dei timor de quo dicitur, *Qui timet Deum, nihil negligit*, & de quo vere etiam dici potest, qui nihil negligit, is est qui timet Deum, is est qui se pure & sincere Deum timere indicat.

*Eccles. 7.*

*Cuius timoris magnificentiam*, vt Cassiani verbis vtar, *Isaias vnus Prophetarum eleganter expressit: Diuitia, inquiens, salutis sapientia,*

*Coll. II. c. 13.*

*& scientia; timor Domini, ipse thesaurus eius*: quasi diceret sicut ex multis diuitiis conflatur thesaurus, ita multæ salutis diuitiæ ex multis bonis operibus: & multa bona opera ex casto timore Domini, qui bene in omnibus operari facit.

*Is. 33.*

*In portis nostris omnia poma, noua & vetera, dilecte mi, seruaui tibi.* Sponsa est sic Sponso loquens: sed mirum quod sic de pomis cum illo agat! quid vilius quam pomum vbi præcipue tam multa sunt vt in portis & in obuiis quibusque locis patefiant? At sponso sic grata sunt & accepta illa poma, id est, minima quæque & obuia quæ amore sponsæ ipsi offeruntur, vt hoc vno maximè delectetur. O foelix anima quæ sic in minimis Christo suo placere nouit! Quia tamen minima sunt, nec tanti videntur ab omnibus pretij & ponderis, vt inde vel Christo magnus honor aut offensa redundent; Idcirco sequens adiungi debuit Veritas: *idile*

*Cant. 7.*

Sæpe in minimis non est minima culpa.

RATIO EST, Quia non est minima culpa cum interuenit aliquis Dei vel Diuini mandati contemptus: quod quidem per se patet. Sed in minimis non seruatis, sæpe interuenit aliquis Dei vel diuini mandati contemptus: nempe quia sunt minima negliguntur, & in illo neglectu nonnullus inuoluitur præcepti & Præ-



J. 2. Ep. 20.  
ad Celant.

Tract de  
praecepto  
& dispensa-  
tione. c. 14.

cupientis contemptus: Sic luculente sanctus Hieronymus, Neque verò, inquit, eorum te seducat error qui ex arbitrio suo eligunt quae potissimum mandata faciant, quaeque quasi vilia ac parua despiciant: nec metuunt ne secundum diuinam sententiam, minima contemnendo paulatim decidant. Stoicorum quidem est, peccatorum tollere differentiam & delicta omnia paria iudicare, nec ullum inter scelus & erratum discrimen facere; Nos vero etsi multum inter peccata distare credimus, quia & legimus: tamen satis prodesse ad cautionem dicimus, etiam minima pro maximis cauere. Tanto enim facilius abstinemus à quocumque delicto, quanto illud magis metuemus, nec citò ad maiora progreditur qui etiam parua formidat. Et sanè nescio, an possimus leue aliquod peccatum dicere quod in Dei contemptum admittitur. Estque ille prudentissimus qui non tam considerat quid iussum sit, quàm illum qui iusserit, nec quantitatem imperij, sed Imperantis cogitat dignitatem. Sanctus quoque Bernardus sic piè & folide de hoc argumento differit; Cum per contemptum vertuntur in usum & consuetudinem, tunc non peccati species, sed peccantis intentio pensatur. Elatio quippe contemnens, atque impœnitentis obstinatio, IN MINIMIS QVOQVE MANDATIS, CVLPAM FACIT NON MINIMAM, & conuertit in crimen grauis rebellionis, nauium satis leuem simplicis transgressionis. Denique in quo inobedientia crimen absque dubio sit, apud Samuelem aduertite: Quasi, inquit, peccatum ariolandi est, & quasi scelus idololatriæ, nolle acquiescere. Non ait, non acquiescere, sed nolle acquiescere, ut non iussione simplex ipsa transgressio, sed voluntatis superba contemptio scelus idololatriæ reputetur. Non est enim id ipsum nolle obedire & non obedire. Hoc quippe interdum erroris est, nonnumquam & infirmitatis, illud vero aut odiosa pertinacia, aut contumacia non ferenda. Quod & ipsum repugnare est & resistere Spiritui sancto, & si ad mortem usque perdurauerit, blasphemia est non remittenda siue in hoc seculo, siue in futuro.

In Conuers.  
S. Pauli  
Serm. 1.

Itemque alibi; Discite fratres iustum Iudicem Deum; non modo quid fiat sed & quo animo fiat, considerate: & cauete deinceps ne quis parua reputet quantumlibet parua si scienter delinquere conuincatur. Nemo dicat in corde suo, leuia sunt ista, non curo corrigere, non est magnum si in his maneam venialibus minimisque peccatis. Hæc est enim, dilectissimi, impœnitentia, hæc blasphemia in Spiritum sanctum, blasphemia irremissibilis.

Nonne ergo in minimis non est minima culpa? Quid tibi vide-



tur de illo Dei contemptu, de illa peruitacitate & malitia, de illa impoenitentia & blasphemia? Nonne tibi satis graues videntur culpæ? Sed dices forte, nihil has ad te spectare, nihil te in tuis quotidianis culpis cogitare de tot nefandis criminibus, longe tibi aliam esse mentem, te prorsus detestari quidquid grauius Deum offendit. Esto id dicas, esto id sentias, esto id ita sit in aliquibus culpis. Sed an putas ita esse in omnibus? an putas tibi de te sentienti credendum? Quis blasphemus non iuraret se nolle Deum offendere, sibi non cogitanti excidere blasphemiam, se ne quidem de peccato cogitare! An putas verò quod semper excusetur? Non est necesse ad incurrendum crimen expressa vt vocant mente cogitare de crimine: satis est non ignorare esse crimen quod committis; satis est posse latere aliquid in objecto capitalius quam quod apparet; satis est te posse agnoscere tali te obnoxium esse vitio quod licet primò leue sit, possit tamen ingrauescere & augeri nisi aduertas.

At vero nonne est quod ita de te sentias? Nonne quæ minima peccas, idcirco peccas quia sic peccare vis, quia non curas emendari, quia non putas esse grauiā? Nonne in his emendandis sæpe monita, sæpe lumina, sæpe gratias accepisti, quæ tamen omnia negligis? Quid hoc est autem nisi quod aiebat sanctus Bernardus, *contumacem esse, impenitentem esse, & Spiritui sancto resistere*? Si fragilitate duntaxat peccares, peccatum eleuare & excusare posset materiæ leuitas; sed peccare ex praua consuetudine quam non curas deponere, vel ex naturali propensione quam non vis cohibere, hoc est peccare grauiter, licet in leuibus & minimis culpis; hoc est peccare aduertenter, ex malitia, ex contemptu atque ex obstinata mente, quandoquidem neque te horum poenitet, neque putas tibi vniquam ab istis esse resipiscendum. Hæc est peccati *Hebr. 3.* fallacia, qua ne obduremur tantopere cauet Apostolus, sic enim fallit prætentā quadam leuitatis specie, sub qua grauitas & malitia maior obtegitur quàm tibi forte appareat. Atque idcirco quod toties audiuiisti, *Ab omni specie mala te contine. Noli iudicare secundum faciem. Minue offendiculum, & nimis odito execrationem.* *1. Thess. 5. Ecclesi. 17.*

Vide in 2. parte, Hebd. 1. & 3. post Pascha, necnon Dominica 4. vbi hæc proponitur Veritas:

Inordinata quæuis affectio, licet parum sit mala, non est tamen paruum malum.





# DOMINICA

## QVINTA POST PENTECOSTEN.

### DE IRA REPRIMENDA.

*Ego autem dico vobis, quia omnis qui irascitur fratri suo, reus erit Iudicio. Matth. 5.*

### VERITAS PRACTICA.

Hæc est iræ nostræ iniquitas, quòd in aliis semper iniusta, semper in nobis iusta videatur.

*Vel sic:*

Hoc ipso ira est iniustior, quod nulli vñquam irascenti, sua ira videtur iniusta.

*RATIO EST, Quia hoc ipso aliquid est iniustius, quòd & pluribus, & quòd maiorem infert iniuriam.*

*Sed ira, hoc ipso pluribus & maiorem infert injuriam, quòd minus irascenti videtur iniusta.*

*Ergo & est iniustior, & proinde magis cauenda: siue, ne excitetur, siue ne excusetur.*

I. PVNCTVM.



I. P V N C T V M.



VOD occurrit hodie Euangelium, ipsa sunt sermonis in monte habiti verba quæ consequenter occurrunt considerata. Sic enim post antecedentia considerata pergit Dominus : *Dico autem vobis quia nisi abundauerit Iustitia vestra plusquam Scribarum & Phariseorum, non intrabitis in regnum cælorum. Audistis, quia dictum est antiquis : non occides, qui autem occiderit, reus erit Iudicio. Ego autem dico vobis, quia omnes qui irascitur fratri suo, reus erit iudicio. Qui autem dixerit fratri suo, raca, reus erit concilio, qui autem dixerit, fatue, reus erit geliennæ ignis. Si ergo offers munus tuum ad altare; Et quæ sequuntur.*

Ex quibus primum illud liquet quàm longe perfectius sit Euangelium lege Mosæica, & quàm supra religiosiores illos antiquos quales erant Pharizæi, nos religiosissimi & perfectissimi esse debeamus, cum illis tantum expresse vetaretur homicidium; nobis autem ipsa ira, seu ipsa prima causa vnde est homicidium, ad quod ex iracundia venit per quosdam gradus quæ exprimuntur; Nempe si quis iratus dixerit, raca, id est, si ex commotione aliquid iniuriosum protulerit, licet nihil in particulari significet. Tum vero id erit acerbius, quando fatuum pronuntiaverit, quæ est iniuria certæ & notæ significationis, vnde tandem procedunt rixæ, contentiones, & homicidia.

Vt igitur ad radicem securis ponatur; de ira reprimenda serio est cogitandum; Et quia, ut ait sanctus Augustinus, *Nulli irascenti ira sua videtur iniusta; hoc ipso, ait proposita Veritas, est ira iniustior & hoc ipso magis cauenda.*

Ratio autem quæ affertur est euidens, quoad primam saltem partem qua declaratur quid sit iniustum & quid iniustius. Nempe hoc est ex communi sensu iniustum quod est iniuriosum seu quod iniuriam affert alteri; vnde quo quid graviores iniurias affert, & quod pluribus inferet, erit illud certe iniustius, nonne hoc patet? Nonne idcirco poena gravior denunciata est dicenti raca quam irascenti? & dicenti fatue, quam dicenti raca? Quia videlicet in his postremis iniuria maior est, & est iniustior ille qui sic aperte infamat fratrem suum quàm qui leuius afficit. Numquamne id



Prov. 25.

tibi accidit? Numquamne iniuriam hanc intulisti? & quomodo reparasti? O quam provide Sapiens: *Quæ viderunt oculi tui, ne proferas in iurgio cito: ne postea emendare non possis, cum dehonestaveris amicum tuum.*

## II. P V N C T V M.

**S**ED ira hoc ipso pluribus & maiorem infert iniuriam quò minus irascenti videtur iniusta.

L. I. de or-  
dine.  
Iob. 40.

Nam sic iratus credet se habere causam irascendi, & causam illam refundat necesse est, non modo in proximos quibus irascitur, sed & in ipsum Deum qui permittit occasiones quas iratus vocat causas iræ suæ. Quàm vero id sit iniuriosum & Deo, & proximo, & ipsi irascenti, paulo attentius considera. Deo quidem, quia facit Deum authorem sui peccati, *Qua impietate nihil detestabilius, esse putat sanctus Augustinus. Numquid irritum facies Dei iudicium ut tu iustificeris?* Et quidem Deus author est seu Causa permittens aut etiam effectrix illius incommodi quod sentire homo potest & vnde succenditur: sed cur ita succendatur & exardescat, solius hominis culpa est qui tale incommodum sic volente Deo, patienter ferre deberet. *Quid timent contra Deum spiritus tuus, ut proferas de ore tuo huiusmodi sermones? Numquid iniquitas apud Deum? absit.*

Iob. 15.  
Rom. 9.

Deinde vero si in eos à quibus se læsum iratus credit, causam iracundiæ suæ referat, mirum quantis illos probris laceffat, quàm multis se purgando verbis utatur, & quàm multò pluribus ad insultandos alios atque in invidiam adducendos abutatur, quæ omnia quantam secum invehant iniuriam quis non videt. *Vir enim iracundus provocat rixas. Et rursus: Ira non habet misericordiam nec erumpens furor: & impetum concitati ferre quis poterit?*

Prov. 15.  
Ibid. 27.

Ac denique sic sibi iniuriosus est ipse iratus, cum vel negat se posse continere, vel cum numquam aut seriùs peccatum agnoscit cuius causam à se excludit; atque ita vix umquam Deo, vix proximo & vix sibi placatus miserrimam vivit vitam, & in sempiternum ruit interitum, vnde Sapiens, *Iracundia animositatis illius, subversio illius est, & apud Iobum, quid perdis animam tuam in furore tuo?*

Ecclesi. 1.  
Iob. 18.



III. P V N C T V M.

**H**OC ipso est igitur ira iniustior quò nulli irascenti sua ira videtur iniusta; Nam sic pluribus nocet & grauiorem infert iniuriam, quo vno verbo omnem dixeris iniustitiam. Sic de Caino dicitur, *Quod à Sapiencia recessit iniustus in ira sua*: quia videlicet <sup>Sap. 10.</sup> prætendebat causas iræ suæ.

His iracundis apte sanctus Gregorius in suis admonitionibus, Nonnumquam vero, inquit, quod est grauius, ira sua stimulum, in- <sup>3. pars</sup> stitia zelum putant; & cum vitium virtus creditur, sine metu culpa <sup>Past. adm. 17.</sup> cumulatur. Et post pauca: Admonendi sunt iracundi, ut emulationi quam se habere existimant, mansuetudinem subiungant. Idcirco namque Spiritus sanctus in columba & in igne monstratur, quia videlicet omnes quos implet & columba simplicitate mansuetos, & igne zeli ar- dentes exhibet. Nequaquam ergo Spiritu sancto plenus est qui aut in tranquillitate mansuetudinis, feruorem emulationis deserit; aut rursus in emulationis ardore, virtutem mansuetudinis amittit.

Itemque in alia admonitione: Sape vero, inquit, dum quosdam <sup>Adm. 23.</sup> maior scientia erigit, à caterorum societate disiungit, & quasi quo plus sapiunt, eò à concordia virtute desipiunt. Hi itaque audiant quid per semetipsam Veritas dicat, Habete Sal in vobis, & pacem habete inter vos. Sal quippe sine pace non virtutis est Donum, sed damnationis argumen- tum. Quo enim quisque melius sapit, eo deterius delinquit, & idcirco inexcusabiliter & multo maius merebitur supplicium quia prudenter, si voluisset, potuit euitare peccatum. Quibus quoque recte per Iacobum di- <sup>Iac. 3.</sup> citur, quod si zelum amarum habetis inter vos, & contentiones sunt in corde vestro, nolite gloriari, & mendaces esse aduersus veritatem, non est ista sapientia descendens deorsum, sed terrena, animalis, Diabolica: qua autem deorsum est Sapiencia, primum quidem pudica est, deinde pa- cifica. Pudica videlicet quia caste intelligit; pacifica autem quia per elationem se minime à proximorum societate disiungit.

Admonendi sunt dissidentes ut nouerint quod tam diu nullum boni operis Deo sacrificium immolant, quàm diu à proximorum Charitate discordant, scriptum namque est, si offers munus tuum ad altare, &c. Ex qua praeceptione pensandum est quorum hostia repellitur, quam in- tolerabilis culpa monstratur.

Diceresne tuam illam culpam quàm tam facile commoueris in



alios, & tam difficile reconciliari, culpam esse intolerabilem: cum vix eam esse culpam agnoscas? O quantum nostris palpatum vitiis! ô quantum nocet ista palpatio!

Plura ex aliis partibus passim occurrunt quæ huc facile reuocari possint, siue de ferendis & condonandis iniuriis; siue de ipsa comprimenda ira, siue de mansuetudine, siue de reconciliandis animis; Præsertim verò hæc opportuniore designantur loca.

In 1. parte, In Vigilia natalis Domini. Die 16. Ianuarij. Dominica 5. post Epiphaniam.

In 2. parte, Feria 3. post Sexag. Feria 3. post Dom. 2. Quadrag.

Tota Hebdomada 3. Quadragesimæ, & Feria 2. quartæ Hebdomadæ. Dominica Palmarum. Feria 3. Hebdomadæ 3. post Pascha, ubi referuntur decem iniuriæ quæ per iracundiam inordinatam Christo inferuntur.

In hac 3. parte: Feria 3. Hebdomadæ 3. Feria 4. Hebdom. 4. Tota hac pene sequenti quinta Hebdomada, præsertim Feria 2. 5. & 6. Feria 4. & 6. sextæ Hebdomadæ. Feria 3. Hebdom. 9. Feria 5. Hebd. 10. Feria 3. Hebd. 14.

In 4. parte, Feria 4. & 5. Hebdomadæ 16. Dominica 21. Vbi hæc non filenda declaratur Veritas:

Quidquid profers ne parcas aliis, contra te profers, ne parcat tibi Deus.



## FERIA SECVNDA.

### DE EXCELLENTI CASTITATE

QVAM A SVIS EXIGIT CHRISTVS  
DOMINVS, HIS VERBIS:

*Quod si oculus tuus dexter scandalizat te, erue eum,  
& projice abs te. Et si dextra manus tua scandalizat te, abscinde eam. Matth. 5.  
Et si pes tuus te scandalizat, amputa illum. Marci 9.*



*Qui non seruat consilia quia non sunt praecepta, nec ipsa, &c. 221*

## VERITAS PRACTICA.

Qui non seruat consilia quia non sunt praecepta : nec ipsa etiam praecepta seruabit.

*RATIO EST, Quia quando quaedam inter se sunt ita connexa, ut vnum ex alio pendeat, qui vnum deserit, deseretur ab alio.*

*Sed ea quae sunt consilij & praecepti, in hac praecipue materia Castitatis, sunt ita inter se connexa ut vnum ex alio pendeat.*

*Ergo si vnum deseris, & aliud te deseret; si consilia non seruas, nec seruabis praecepta; seu potius, ut praecepta serues, serua consilia.*

## I. P V N C T V M.

**C**VM praecepta quaedam Decalogi Christus Dominus in illo suo sermone suscepisset declaranda: *Audistis, inquit, quia dictum est antiquis, non mœchaberis? Ego autem dico vobis, quia qui viderit mulierem ad concupiscendum eam, iam mœchatus est eam in corde suo. Quod si oculus tuus dexter scandalizat te, Et cætera. Vbi tria refert Dominus: Primò ipsum praeceptum de non mœchando, quod approbat & confirmat; Deinde explicationem praecepti quæ comprehendit etiam concupiscentiam internam, adeout qui viderit & concupierit mulierem, iam peccarit. Tertium denique, ut ipsum aspectum contineas, ne concupiscas. Hoc est enim sibi eruere oculum, dum eius vsus continetur. Ex occasione autem oculi eruendi, etiam manus abscindenda meminit: & aliàs, pedis amputandi. Quæ tria membra corporis, tria significant ad excellentiam Castitatis multum conducentia. Primum quidem per oculum, ne omnino conjiciatur in mulierem. Secundum quod per manum designatur, ne vllò modo tangatur mulier, aut familiarior cum ea conuersatio habeatur. Tertium in pede adumbratum, ut ipsa etiam euagationes per urbem, circuitus & concursus, quàm cautè fieri poterit euitentur.*

*Atque hæc tria sic expressa, non sunt ita certe imperata sicut*



mœchari & concupiscere, sunt enim tantum monita & consilia: Sed ne putes propterea minus esse obseruanda: Nam hæc est certa Veritas, *Quod qui non seruat consilia quia non sunt præcepta, vix aut ne vix omnino ipsa præcepta seruabit.* Ratio quæ affertur vniuersalis est, atque in eo fundatur quod de mutua aliquorum inter se connexionem dicitur, quæ quando tam arcta est & constricta, vt vnum ab alio naturali quadam consecutione pendeat, sic etiam naturaliter & quasi necessario fit vt vno posito vel sublato, ponatur aliud vel tollatur. Hoc videre est in naturalibus, in artificialibus, in ciuilibus, in moralibus & Diuinis. Tolle radicem ab arbore, an erit fructus? Si nullum est ædificij fundamentum, aut si fundamentum in arena ponitur: qualenam erit ædificium? Si nulla fides sit inter homines, si nulla in ciuitate iusticia, si nullius in mundo ius seruetur, & æquum bonum: an erit pacata Ciuitas? Sint inordinati omnes cuiusquam motus, nihil in eo cum Ratione fiat; an erit in illo Virtus homine? Si denique Diuinam tollis Gratiâ, nonne tollis æternam Gloriam? Quia videlicet tanta est connexio inter illa naturalia vel artificialia, ciuilia, moralia, & Diuina, vt qui vnum ex alia detrahât, vtrumque subtrahat. O quanta inde in animum tuum perniciēs cum diuina deseris vnde æterna pendent? Aut cum humana non satis curas quibus Diuina connectuntur! *Quæ in iuuentute tua non congregasti, quomodo in senectute tua inuenies?*

Ecclesi. 25.

## II. PUNCTVM.

**S**ED ea quæ sunt consilij & præcepti in hac præcipue materia Castitatis, sunt ita inter se connexa, vt vnum ex alio pendeat.

Nemp̃ ex visu aut conuersatione familiari sic excitatur Concupiscentia, & alij lethales motus, vt propterea Sapiens sapientissime & fusissime monuerit: *Ne respicias mulierem multiuolam, ne forte incidās in laqueos illius. Cum saltatrice ne assiduus sis, nec audias illam ne forte pereas in efficacia illius. Virginem ne conspicias, ne forte scandalizeris in decore illius. Noli circumspicere in vicis ciuitatis, nec aberraueris in plateis illius. Auerte faciem tuam à muliere compta, & ne circumspicias speciem alienam. Propter speciem mulieris multi perierunt, & ex hoc Concupiscentia quasi ignis exardescit: speciem mulieris aliena multi admirati reprobī facti sunt, colloquium enim illius quasi ignis*

Ecclesi. 9.



*Qui non seruat consilia quia non sunt praecepta, nec ipsa, &c. 223*

exardescit. Cum aliena muliere ne sedeas omnino ne forte declinet cor tuum in illam, & sanguine tuo labaris in perditionem. Quid clarius quid expressius? Itemque in eodem libro; *Omni homini noli intendere in specie; & in medio mulierum noli commorari: de vestimentis enim procedit tinea, & à muliere iniquitas viri: melior est enim iniquitas viri quam mulier benefaciens, & mulier confundens in opprobrium.* Quasi dicat, minus periculosum est Castitati conuersari cum malo homine, quàm cum bona muliere quæ facile inducit hominem in peccatum & in confusionem.

Sic conformiter sancti omnes loquuntur Patres, imprimisque Diuus Gregorius ad hæc Iobi verba; *Pepigi fœdus cum oculis meis ut ne cogitarem quidem de Virgine: VT enim cogitationes cordis caste seruare potuisset, fœdus cum oculis pepigit, ne prius incaute aspiceret quod postmodum inuitus amaret.* Valde namque est graue quod caro deorsum trahit, & semel species forma, cordi per oculos illigata vix magni luctaminis manu soluitur. Ne ergo quadam lubrica in cogitatione versemus, prouidendum nobis est quia intueri non decet quod non licet concupisci. *Vt enim munda mens in cogitatione seruetur à lasciuia voluptatis sue, deprimendi sunt oculi quasi quidam RAPTORES AD CVLPAM.* Et ibidem explicans illa Ieremiæ Verba: *Ascendit mors per fenestras nostras. Quisquis per has corporis fenestras incaute exterius respicit, plerumque in delectationem peccati etiam nolens cadit, atque obligatus desideriis, incipit velle quod noluit.*

Nonne hoc ipsum est quod habet propositio? Nonne est illa connexio quam dicimus inter consilium, *ne aspicias*: & praeceptum, *ne concupiscas*? cum ab vno tam facile itur ad aliud, vt etiam quasi nolens & quasi inuitus, eò pertraharis. O quàm nimis vere dictum, *Oculus meus deprædatus est animam meam.*

### III. P V N C T V M.

**Q**VI non seruat ergo consilia quia non sunt praecepta: nec ipsa etiam praecepta seruabit; Quia praeceptum ita pendet à consilio, ita se inuicem ytraque ligant & sociant, vt dissoluto vno, soluatur & aliud. *Despexistis omne consilium meum: Ego quoque in interitu vestro ridebo, & subsannabo, cum vobis id quod timebatis, acciderit.* Vnde iterum sapienter Sapiens: *Fili sine consilio nihil facias, & post factum non pœnitebit. In via ruina non eas, & non offendes*



224 FERIA 2. Hebd. 5. post Pent. Si oculus tuus scandalizat te.

10. Confess.  
34. in lapides; nec credas te via laboriosa, ne ponas anima tua scandalum. RESISTO seductionibus oculorum, dicebat sanctus Augustinus, ne implicentur pedes mei quibus ingredior viam tuam: & erigo ad te inuisibiles oculos ut tu euellas de laqueo pedes meos.

Quando ipse actu & de facto eruiendus esset oculus, ad euitandum vel vnum peccatum, Expediret, inquit Dominus, ut vnum membrorum deperiret quam ut totum corpus periret: Quotò magis cum sit tantum temperandus aspectus? Quod certe ipsi Ethnici docuerunt & fecerunt; sancti vero viri qui non fecerunt, sancti esse desierunt. Disce aliorum exemplo sapere; disce & tuo qui nimis forsan expertus es quantum ab oculo, à manu, & à pede inesset damni & detrimenti. Nec sanctior Davide, nec Samsone fortior, nec Salomone potes esse sapientior. Memento semper quod Paradysi colonum de possessione sua mulier eiecerit. Sic apte sanctus Hieronymus.

Ep. 1. ad  
Nepor.

Vide in 1. parte, FERIA 6. Hebdomadæ 4. in Aduentu, vbi demonstratur:

Securior est Castitatis victoria fugièdo, quàm pugnàdo.



FERIA TERTIA.  
DE TRIPLICI HOMINVM GENERE  
QVI HIS TRIBVS NOMINIBVS EXPRIMVNTVR,  
OCVLO, MANV, ET PEDE;  
QVIQVE VT NOBIS SCANDALO ESSE  
POSSVNT, ITA DEBENT A NOBIS  
AMPVTARI SEV CAVERI.

Quod si oculus tuus dexter scandalizat te, erue eum  
& projice abs te.

Et si dextra manus tua; Et si pes tuus te scandalizat,  
amputa illum.

Matth. 5. & 18.  
Marci 9.

VERITAS



*Solum pietatis genus est in re saluti aduersa, suis esse crudelem. 225*

## VERITAS PRACTICA.

*Solum pietatis genus est in re saluti aduersa, suis esse crudelem.*

*RATIO EST, Quia quando agitur salus animæ, quicumque illi sint quibuscum agitur, solum pietatis genus est, esse efficacem.*

*Sed in tali occurſu, esse efficacem cum suis, perinde est ac illis esse crudelem.*

*Ergo solum pietatis genus est in re saluti aduersa suis esse crudelem. Quod certe attenta est consideratione dignum.*

## I. P V N C T V M.

**S**ANCTORVM Patrum is est communis sensus, vt his nominibus, *oculo, manu, & pede*, Parentes vniuersim, Propinqui, affines & amici intelligentur. *Non de membris corporalibus loquitur sed de amicis*, inquit sanctus Chrysostomus. *In dextro oculo & manu, propinquorum affectus intelligitur*, ait sanctus Hieronymus: rursusque, *omnis truncatur affectus & vniuersa propinquitas amputatur, ne per occasionem pietatis, unusquisque credentium scandalis pateat.*

Quia vero hi possunt esse in triplici genere vt sint superiores, æquales, vel inferiores, sic apte exprimuntur his tribus membris; nempe *Oculo*, Superiores, vt Pater, Dominus, Magister: *Manu*, Equales vt frater, cognati, focij, amici: *Pede* Inferiores vt filij, serui, discipuli.

Sunt autem nobis scandalo, quando sunt causa peccati, quando vel nimio affectu, cultu, respectu, & eorum denique consideratione omittimus bona quæ alioquin videmus agenda; vel committimus mala quæ alioquin non auderemus. Quid tum igitur factum est opus? erue oculum & projice abs te, abscinde manum, & pedem amputa, id est, discede ab illis aut ab eorum cultu: ne villo eorum affectu propterea pecces: nullo plane, & potius illis



*Ecclesiast. 42.* renunties : sicut iam pridem monuit Sapiens : *Ne pro his omnibus confundaris : & ne accipias personam ut delinquas.* Quod si tibi durum, impium & crudele videtur, audi Diuum Hieronymum : *Solum pietatis genus est in hac re, esse crudelem.* Nempe ubi agitur animæ salus solum pietatis genus est esse efficacem, id est, totum illud adhibere quod est necessarium. Nonne id meretur salus animæ ? *Quam dabit homo commutationem pro anima sua ?* Cur aliquin dixisset Sapiens : *Agonizare pro anima tua, & usque ad mortem certa pro iustitia ?*

*Ep. 1. ad Heliodor.* *QUANTUM* laborat homo, ait sanctus Augustinus, quando mors imminet, fugiendo, latendo, quidquid habet dando, & se redimendo, laborando, cruciatus molestiasque sustinendo, medicos adhibendo, & quidquid aliud homo potest ? si ergo labore tanto, tanto conatu, tantis impendiis, tanta instantia, tanta vigilantia, tanta cura agitur ut aliquantò plus viuatur : quomodo agendum est ut semper viuatur ? Et, si prudentes dicuntur qui omnibus modis agunt ut differant mortem, & uiuant paucos dies, ne perdant paucos dies ; quàm stulti sunt qui sic uiuunt ut perdant diem æternum ? Velle ne ex his esse stultis ?

## II. PUNCTVM.

**S**ED in tali occurſu esse efficacem cum suis, perinde est ac illis esse crudelem.

Primò est magis explicandū, quinam sit ille occurſus seu casus in quo agatur cum aliis de salute tua. Quādo videlicet talis est affectus erga quodlibet horum hominum genus de quibus dictum est, ut propterea pecces, vel nimis eos amando vel ex nimio eorum amore, cultu, timore & aliis affectibus, nonnulli acquiescendo & consentiendo prauitati. Tunc manifeste salus animæ agitur, non modo quia peccas, sed quia tale peccatum nisi mature prouideas ita est connaturale & proprium, ut vix agnoscas, vix resipiscas & conuertaris, ac tandem pereas. Nam præterquam quod tegitur pio quodam respectu, nec forte malum apparet; tanta est naturæ corruptæ in hac materia deceptio & fallacia, ut quò magis animus inueteretur in vitio, eo minus illud sentiat & doleat.

*Mich. 7.* *Nolite credere amico, & nolite confidere in duce; ab ea que dormit in sinu tuo, custodi claustra oris tui : quia filius contumeliam facit Patri, & filia consurgit aduersus matrem suam, nurus aduersus socrum suam, & inimici hominis domestici eius.* Hæc Propheta, tum Christus



*Solum pietatis genus est in re salutis aduersa, suis esse crudelem. 227*

Dominus; unde apparet, quale vtrunque damnum imminet siue à filiis, Patri: siue à patre, filiis. Vnde & aries bellicus dicitur à sancto Hieronymo quod ex vtraque parte vicissim impetat & vim faciat. Sic itaque agitur animæ salutis & illius qui scandalizat & qui scandalizatur & qui est causa peccati & qui causam in se admittit; *Scandalizabuntur & inuicem tradent.*

*Matth. 24.*

At quale tandem remedium, vt sit opportunum & efficax? Nepe vt pater à filio, & filius à patre, vt dilectus à dilecto, amicus ab amico, frater à fratre, discipulus à magistro separentur, diuellantur, discindantur, seu reipsa commercio & contubernio: seu consuetudine seu affectu, quouis denique fiat modo, ita fiat vt iam affectui nihil prorsus indulgeatur, hoc est vnicum & singulare remedium, sed nonne hoc crudele? Nonne hoc ipsum quod Christus Dominus affirmabat, *Nolite arbitrari quod venerim pacem mittere in terram, non veni pacem mittere sed gladium, veni enim separare hominem aduersus patrem suum & filiam aduersus matrem suam, &c.* Quidquid contra reclamet natura, quidquid sanguis opponat, quidquid affectus, pietas, & totus mundus obiiciat. *Non dixit prælum, inquit Diuus Chrysostomus sed quod difficilius, gladium, asperitate Verborum excitans. Admirare tam aspera in tam miti IESU.*

*Matth. 10.*

### III. PUNCTVM.

*SOLVM ergo pietatis genus est in hoc esse crudelem negotio.*

Oportet nempe esse efficacem; nonne in id consensisti, vbi agitur animæ salutis? At nonne efficacitas in hoc vno vertitur vt nullo modo affectui contra salutem indulgeatur? Ad hoc quid dicis, quid opponis nisi quia nimis hoc durum, nimis crudele? Fatendum est, crudele esse; sed non nimis, nec ita durum quin emolliri possit alio præstantiori pietatis affectu, nempe Christi & salutis animæ. Nam, vt ait idem sanctus Hieronymus, *Facile rumpit hæc vincula amor Christi & gehenna timor. Facile pectus obdurat mundo & emollit Christo, qui Christum loquentem audit, Qui amat patrem aut matrem plusquam me non est me dignus. Et qui non accipit crucem suam & sequitur me non est me dignus. Qui inuenit animam suam perdet illam, & qui perdiderit animam suam propter me, inueniet eam:* Vbi rursum sanctus Hieronymus: *Amandi parentes &*

*Matth. 10*



228 FERIA 4. Hebd. 5. post Pent. Si oculus tuus scandalizat te.

filij post Deum; quod si uterque amor seruari non possit, odium in suos, pietas in Deum est.

Deut. 33.

Eccles. 32.

ib. 33.

Dicitur odium sicut & crudelitas ratione videlicet efficacitatis, quæ talis est in effectu quasi si odium & crudelitas in affectu esset, cum tamen non desit Pietas & mansuetudo, sed tale genus est pietatis ut sit odium & crudelitas. Qui dixit patri suo, & matri suæ, Nescio vos, & fratribus suis ignoro vos, & nescierunt filios suos. Magna crudelitas! At vide pietatem: Hi custodierunt eloquium tuum & pactum tuum seruauerunt: Iudicia tua, ô Iacob, & legem tuam, ô Israel. HÆC amulare, in his esto; Audi Sapientem: A filiis tuis caue & à domesticis tuis attende. Audite me Magnates, & omnes populi, & Rectores Ecclesiæ auribus percipite. Filio & mulieri, fratri & amico non des potestatem super te in vita tua, & non dederis alij possessionem tuam ne forte pœniteat te. In omnibus operibus tuis præcellens esto; ne dederis maculam in gloria tua. Quam mundus vocat Ciuitatem & splendorem, diuina Scriptura vocat maculam. Vtri magis credes?



FERIA QVARTA.  
DE PERFECTA MORTIFICATIONE  
TRIPLICIS CONCVPISCENTIAE, IN HIS  
ETIAM CHRISTI DOMINI VERBIS  
COMPREHENSÆ.

*Si oculus tuus dexter scandalizat te, erue eum & proiice abs te.*

*Et si dextra manus tua; Et si pes tuus te scandalizat, amputa illum.*

Matth. 5. & 18.  
Marci 9.

VERITAS PRACTICA.  
Quò minus Concupiscentiæ mortificabis, eò magis à Concupiscentia mortificaberis.



Quò minus Concupiscentiæ mortificabis, eò magis, &c. 229

RATIO EST, Quia quò minus Concupiscentiæ per mortificationem refecabis, eò plus semper supererit immortificatum & refecandum.

Sed quò plus supererit Concupiscentiæ refecandum, eò major erit in ea mortificanda labor & molestia: quod est magis à concupiscentia mortificari.

Ergo & quò minus Concupiscentiæ mortificabis, eò magis à Concupiscentia mortificaberis: Ac proinde cùm à perfecta mortificatione nihil te magis deterreat quam labor, disce minorem esse laborem in perfecta quam in imperfecta; sicque excitare potius ad illam perfectam, quàm ab ea retraharis quod sit perfectior.

#### I. PUNCTVM.

**T**RIPLEX concupiscentia quæ hîc etiam designatur oculo, manu & pede, Concupiscentia carnis est, & concupiscentia oculorum, & superbia vitæ de qua sanctus Ioannes in Epistola sua. Concupiscentia carnis per *manum* exprimitur quæ est symbolum sensualitatis prout communiter intelligitur illud Sapientis, *Mannus in manu non erit innocens*; Et de impudica, *expressit Alius, Vincula sunt manus illius*. Concupiscentia oculorum ipso aperte oculo declaratur de quo sic Ecclesiastes, *Non saturatur oculus visu*, id est cupiditas habendi numquam expletur. 1. Ioan. 2.  
Prov. 11.  
Eccles. 7.  
Eccl. 1.

Denique superbia vitæ per *pedem* adumbratur, de quo Psaltes: *Non veniat mihi pes superbie*, id est motus seu affectus. Quod si *pes* ille venerit, si te manus si oculus scandalizauerint, si quivno verbo triplicis huius Concupiscentiæ motus insurgant: statim reprimendi, & tam perfecte atque integre mortificandi sunt, velut si ipse oculus erueretur, si pedes aut si manus amputarentur. *Mortificate membra vestra quæ sunt super terram, fornicationem, immunditiam, libidinem.* CONCVPISCENTIAM malam hæc est securis ad radicem ponenda, nam *radix omnium malorum est Cupiditas*. Hæc est arbor bona facienda & fructus eius bonus, id est, ab ipsa radice progrediendum, aut arbor mala facienda & fructus eius malus: alioquin nihil fiet. Ps. 35.  
Coloss. 3.  
1. Tim. 6.  
Matth. 12.



Et quia difficultatis horror, ab illa perfecta mortificatione te plerumque solet auertere; Audi & expende Veritatem propositam; *Quo minus Concupiscentia mortificabis, tanto magis à Concupiscentia mortificaberis*: Non diminues laborem & mortificationem, sed augebis: tantum abest ut parcendo mortificandis integre Concupiscentiis, tibi & labori parcas, quin potius in te mortificando longe magis laborabis, quia videlicet quò minus refecabis eò plus semper restabit in te refecandum. Sunt enim in vnoquoque nostrum certi gradus vitiosæ cuiuspiam qualitatis, ex quibus quanto pauciores demas, certum est quod eò plures remanent; ut in aqua calida ubi fuerint octo gradus caloris, si vno tantum aut altero refrigescat, nonne alij septem aut sex gradus remanebunt? Sic de superbia in animo, de voluptate, de auaritia, & de omni praua concupiscentia quæ habet suos naturales & acquisitos gradus, quibus crescit aut decrescit, ea proportionem qua similes vel contrarij motus exercentur. Sic dicitur in Scripturis Deus punire à facie malitiæ nequitiam, id est, à grauitate nequitia quæ per plures malitiæ gradus multiplicata cernitur. Sic Sapiens de quodam nequissimo: *Septem nequitia sunt in corde illius*. Id est, vel multæ numero nequitia, vel vnius & eiusdem nequitia multi gradus. Nostine quanti sint in te? Si te ignoras, periculosum est: si tuam nosti malitiam, nec emendas, etuerò id perniciosissimum.

Osæ 10.

Prou. 25.

## II. PUNCTVM.

**S**ED quò plus supererit Concupiscentia refecandum, eò plus semper laboris & molestia tibi restabit in ea mortificanda. Quod est ab ipsa Concupiscentia magis mortificari, & affligi.

Is. 30.

Nam tota quam pateris difficultas in exercitio virtutum non aliunde nascitur quàm ab immortificata Concupiscentia. Si labor est in te humiliando, superbia est quæ huic humiliationi repugnat, & quanta est superbia, tantus est labor. Nonne id iam audiisti ex Propheta: *Superbia tantum est, quiesce*: quiesce ab aliis inquirendis causis tuæ difficultatis: superbia sola in causa est. Quiesce à superbia, non laborabis in humilitate exercenda. Quiesce, seu quietem tuam præpone vanitati, ambitioni, & aliis Concupiscentiis; præstat enim quiescere sine mundana gloria, quàm in ea comparanda semper laborare sine vlla quiete. Nonne si Israelitæ



non possident pacificè terram promissam, hostes sunt Amorrhæi; Iebusæi & alij quos non ad internecionem vsque deleuerunt? Et quanti supersunt hostes robore & numero, tot tantæque sunt illis difficultates ne tranquille viuant: sic plane tecum. *Si nolueritis interficere habitatores Terræ: qui remanserint, erunt vobis quasi clauis in oculis, & lancea in lateribus, & aduersabuntur vobis in terra habitatio- nis vestra.* TVNE es ille qui conturbas Israel? Dicebat Achab Eliæ: cui Propheta respondens, Non ego, inquit, conturbo Israel, sed tu & domus patris tui, qui reliquistis mandata Domini. Non est Religio, non est Virtus, non est Humilitas, non Superior, non regula non quidquam aliud præter te præter tuam prauam Concupiscentiam, quod te conturbet & laborem præbeat. Tolle cupidinem & inuenies requiem, dimitte omnia & inuenies omnia; Lege caput integrum, & mirare tuam ignauiam si veritati credis: aut stupiditatem si non credis.

### III. P V N C T V M.

**Q**UO minus igitur Concupiscentiæ mortificabis, eò magis à Concupiscentia mortificaberis: eò magis in te mortificando laborabis: quia causa laboris & molestiæ quæ est immortificata cupiditas, tanto magis erit immortificata, & tanto erit maior causa, seu tantò maioris molestiæ causa, quantò minus erit mortificata cupiditas.

*Qui timent pruinam, irruet super eos nix, quæ certe grauior est quam pruinæ. Propter frigus, piger arare noluit, mendicabit ergo æstate, & non dabitur ei.* Nonne id grauius quam arare? *Omnis piger semper in egestate est,* ait Idem ad excitandam scilicet diligentiam, in qua si labor est, longe est maior in egestate toleranda. Sic Apostolus: *Qui parcet seminari, parce & metet: & qui seminat in benedictionibus, de benedictionibus & metet:* Id est, qui se parcet mortificat, modicum suæ mortificationis fructum feret: qui vero plenè & perfectè, atque adeo se totum suis purgat cupiditatibus; aut non laborabit, aut labor erit gratus, qualis est eorum qui messem colligunt. *Qui cupiditates tollit, & metus sustulit,* inquit sanctus Cyprianus, *nam ex cupiditatibus metus veniunt; qui cupiditates vincit, de peccato triumphat; qui cupiditates vincit, malum generis humani sub pedibus suis iacere ostendit; qui cupiditates vicit, pacem sibi perpetuam dedit; qui cupiditates vicit, libertatem sibi quod est etiam in-*



232 FERIA 5. Hebd. 5. post Oct. Pent. Si quis te percusserit, &c.

*l. i. de Virg.* *genuis difficillimum reddidit. Qui dominari verò nescit cupiditatibus*  
ait sanctus Ambrosius, *is quasi equus raptatur indomitus, voluitur,*  
*obteritur, laniatur, affligitur.*

*Eccle. 10.* Labor est certe in vincendis cupiditatibus: sed nonne est major  
in illis subeundis damnis quæ à non victis cupiditatibus enascun-  
tur? Vnde iterum atque iterum vide quod si fugis laborem do-  
mandæ cupiditatis, quare non illum potius fugis qui ab indomi-  
tis manet subeundus? Responde & confundere. Nec dicas, plus  
fore meriti, quando labor augebitur; Nam labor qui ex defectu  
virtutis provenit, non auget meritum sed minuit; Talis est autem  
labor immortificatæ concupiscentiæ; defectus virtutis est, ac  
proinde etiam defectus est meriti: *Labor est stultorum qui affliget*  
*eos, ut ait Sapiens.*

Vide in prima parte, Sabbato Hebdomadæ secundæ post Epi-  
phaniam: Et vide *ut semper mortificationem IESV in corpore & in*  
*animo tuo circumferas: ut doctrina & vita IESV ubique in te mani-*  
*festetur.*



FERIA QUINTA.  
DE SVBLIMI PERFECTIONE  
EVANGELICA QVAM CHRISTVS  
DOMINVS PROPONIT  
HIS VEBIS.

*Audistis, quia dictum est: oculum pro oculo, &*  
*dentem pro dente? Ego autem dico vobis, non re-*  
*sistere malo: sed si quis te percusserit in dexteram*  
*maxillam tuam, præbe illi & alteram. Et ei qui*  
*vult tecum iudicio contendere, & tunicam tuam*  
*tollere, dimitte ei & pallium: & quicumque te*  
*angarianerit*



*Si quid videtur difficile quod dixit Christus, hoc ipso, &c. 233*  
*angariauerit mille passus, Vade cum illo, & alia*  
*duo. Qui petit à te, da ei, & volenti mutuari à*  
*te, ne auertaris. Matth. 5. Luc. 6.*

## VERITAS PRACTICA.

*Si quid videtur difficile quod dixit Christus, hoc ipso*  
*facile redditur quod Christus dixit.*

*RATIO EST, Quia quidquid sit difficile, facile redditur,*  
*quando voluntas permouetur ad illud libenter acceptandum.*

*Sed si quid difficile videatur, quod Christus dixit, hoc ipso quod*  
*Christus dixit, voluntas permouetur ad illud libenter ac-*  
*ceptandum.*

*Ergo & hoc ipso facile redditur. Quod certe Consideranti valde*  
*est opportunum.*

## I. P V N C T V M.

**R**ECTE obseruant Interpretes, quæ hic dicuntur à Do-  
mino, posse esse præcepta, vel consilia tantum, vel nec  
præcepta nec consilia. Præcepta sunt primo negatiua vt  
euitetur omne peccatum si quod in tali materia possit contingere  
vt vindictæ appetitus, scandalum religionis, & si quid simile.  
Deinde præcepta sunt etiam affirmatiua, vt si quando se daret oc-  
casio multum illustrandæ Diuinæ Gloriæ, vel iuuandi proximum  
& salutis eius promouendæ: tunc quod iubetur, obseruemus oportet:  
atque interim ita simus affecti & parati ad hanc obseruan-  
tiam, vt potius nobis perire omnia, & vitam ipsam tolli velle-  
mus quam vel Deum offendi, vel scandalizari proximum, vel  
Religioni probum vllum nostrâ inferri culpâ.

Consilia tantum sunt, quoties non talis vrgeret necessitas, sed  
vel utilitas aliqua proximi solum permoueret, vel maius nostrum  
spirituale bonum, vel ad propitiandum Diuinum numen, impe-  
trandumque aliquod sibi vel proximo, donum cœleste.



ps. 118. Næc præcepta vero sunt nec consilia, quando hinc publica læderetur Iustitia, quando daretur impiis impunita licentia, quando denique rectæ rationi & prudentiæ, non carnali non politica, sed Christianæ aduersarentur. *Cognoui Domine quia æquitas iudicia tua: æquitas testimonia tua: omnia mandata tua æquitas.*

Verum quia procliue est homini sese in his palpare, & fingere sæpe esse Rationem & prudentiam ubi sola est naturalis repugnantia & difficultas, Idcirco diligenter contra obfirmandus est animus, & attente consideranda Veritas, *Quod si quid difficile & arduum dixit Christus, hoc ipso facile redditur consideranti quod dixit Christus.*

Ratio est euidens ipso naturæ lumine, & quotidiana experientia quæ docemur quod quidquid difficile nobis proponatur, si simul voluntati proponitur aliquid quo permouetur ad illud libenter acceptandum, tunc facile redditur & iucundum: quia Volenti nihil difficile. Atque hinc, ut ait Sapiens, *Pecunia obediunt omnia;* Quia voluntas hominis sic facile allicitur & permouetur: quando autem est allecta & permota voluntas in aliquid, sibi ad illud assequendum substernit omnia quantumcumque sint ardua & difficilia.

Eccl. 10. Hinc & illud eiusdem Sapiensis in Prouerbiis, *Anima saturata calcabit fauum: & anima esuriens etiam amarum pro dulci sumet;* Id est, quantumcumque res ad agendum propositæ, sint suauæ, vel asperæ, si se tamen voluntas aliter persuaderi permiserit, & suauitatem aspernabitur, & asperitatem amplectetur.

Numquid forte propterea dictum est ab alio Sapiente: *Non quia difficilia sunt, non audemus: sed quia non audemus, difficilia sunt.* Expende quàm sit id verum & probrosum.

Sen. Ep.  
104.

## II. PUNCTVM.

**S**ED si quid videatur difficile quod Christus dixit: hoc ipso quod Christus dixit, voluntas permouetur ad illud libenter acceptandum.

Nempe imprimis Christus ad id exequendum quod dixit, confert Gratiam, quæ vel sola si permouetur voluntas, tam libenter tunc acceptat quod proponitur, quàm potenter permouetur à Gratia. *Sufficit tibi Gratia mea.*

2. Cor. 12.

Deinde, supposita fide & Gratia, quidquid ad inflectendam



nostram voluntatem potest esse in persona efficax, nonne id totum in Christo loquente sic reperitur, ut potius neges Christum dixisse aliquid, quam te neges velle quod dixit? Nonne est ipse Rex tuus? Pastor & legifer tuus? Redemptor & singularis Benefactor tuus? Mediator & Pontifex tuus? Tuus denique de coelo datus Doctor & præceptor? At nonne ista nomina in humanis rebus voluntatem nostram inflectunt? Cur non in Divinis? *Domine, ad quem ibimus, verba vite aeterna habes.*

*Ioan. 6.*

Denique si aliquo insigni bono sibi apte representato voluntas trahitur; aut si malo denuntiato deterretur, quid melius quam quod promittit Christus? Quid damnosius quam quod minatur? Quid honestius aut utilius aut lucundius quam proxime sequi Christum? Quid infelicius quam ab eo vel latum vnguem discedere? *Mihi vivere Christus est, & mori lucrum.* Nonne hoc libenter diceret?

*Phil. 3.*

### III. P V N C T V M.

**S**i quid ergo videtur difficile quod dixit Christus; hoc ipso facile redditur quod Christus dixit: Quia quod voluntas libenter acceptat, sibi facile reddit: libenter autem acceptat quod dixit Christus, persuasa quod ille dixit, persuasa quod nec dicendo fallit nec fallitur; persuasa quod nihil verius doctrina Christi, nihil melius bono quod suadet. *A iudiciis tuis non declinavi quia tu legem posuisti mihi. Quam dulcia faucibus meis eloquia tua, super mel ori meo?* Aduerte quam rationem reddat cur & mandata faciat & cur omnia facienda dulcissima reperiat, quia inquit, *Tu legem posuisti mei*, Quasi diceret, licet aspera lex & mandata essent difficilia, quia tamen considero Deum esse qui talem mihi posuit legem, quod forte non facerem aut nonnisi repugnanter propter rei difficultatem, libenter tamen & facile facio propter Te Domine qui suavis & mitis cum sis, facis omnia suavia. Quod & alibi distinctius exprimit, *Propter verba labiorum tuorum, Ego custodiui vias duras: Duras ex se, sed in Te suaves, & propterea custodiui tanquam mihi caras & pretiosas.* Non quid præcipiatur cogito, sed Quis præcipiat; & tum si quæ esset asperitas in præcepto, statim emollitur dum Præipientem cogito.

*Ps. 118.*

*Ps. 119.*



Serm. 15. in  
Cant.

Nonne hoc ipsum posses tanto magis cogitare & dicere, quanto est aliquid in Domino IESU quod suavius afficiat & potentius alliciat? Certe id tam suaue erat sancto Bernardo ut nihil tibi sapidum & suaue sentiret nisi IESUM sonaret; Tibi vero nisi prospicias, nihil asperius insonabit quam ubi IESVS apertius loquitur, & praesens adest, in his scilicet verbis & factis ubi summam suae legis Evangelicae posuit gratiam. Audi ad confusionem & instructionem tuam sanctum illum Christi IESU cultorem. *Quid aequae mentem cogitantis impingat, quid ita exercitatos reparat sensus, Virtutes corroborat, vegetat mores bonos atque honestos, castas fouet affectiones? Aridus est omnis anima cibus si non oleo isto infunditur: Inspidus est si non hoc sale conditur. Si scribas non sapit mihi, nisi legero ibi IESUM. Si disputes aut conseras, non sapit mihi nisi sonuerit ibi IESVS. IESVS mel in ore, in aure melos, in corde iubilus. Est post pauca, sic ad rem nostram propius, Nihil ita irae impetum cohibet, superbia tumorem sedat, sanat linoris vulnus, restringit luxuria fluxum, extinguit libidinis flammam, sitim temperat auaritia, ac totius indecoris fugat pruriginem. Si quidem cum nomino IESUM, HOMINEM MIHI PROPONO MITEM ET HUMILEM CORDE, benignum, sobrium, castum, misericordem, & omni denique honestate ac sanctitate conspicuum: Eundemque ipsum Deum omnipotentem qui suo me & exemplo sanat & ROBORET ADIVTORIO: Hac omnia simul mihi sonant cum insonuerit IESVS. Sumo itaque mihi exempla de homine, & exemplum à potente. Semper tibi insinuat, semper in manu: Pone me, inquit, signaculum in corde tuo; signaculum in brachio tuo. Tu rarius de illo cogitas; Aduerte, & vide in 1. parte, FERIA 4. primae Hebdomadae in Aduentu hac explanatur Veritas:*

Nulla in re frequentius Spiritui sancto resistitur, quam quod infrequentius de Christo cogitatur.





## FERIA SEXTA. DE DILIGENDIS INIMICIS.

*Ego autem dico vobis, diligite inimicos vestros.*  
Matth. 5.

### VERITAS PRACTICA.

Si naturæ humanæ durum est obedire Christi præcepto, longe est durius Gratiae, naturam humanam non obedire Christo.

*RATIO EST, Quia id cuique rei durius censendum est quod rationabilius ei repugnat.*

*Sed rationabilius repugnat Gratiae, naturam humanam non obedire Christo præcipienti dilectionem inimicorum, quàm natura repugnet obedire.*

*Ergo & id Gratiae est durius, ac proinde magis obediendum.*

### I. PUNCTVM.

**C**ONSIDERANDA sunt verba Christi Domini quibus non modo præceptum sed & modus diligendi inimicos continetur. *Audistis, inquit, quia dictum est, diliges proximum tuum, & odio habebis inimicum tuum. Ego autem dico vobis, diligite inimicos vestros, benefacite his qui oderunt vos, & orate pro persecutibus & calumniantibus vos, ut sitis filij Patris vestri qui in cælis est, qui solem suum oriri facit super bonos & malos.*

Ex quibus colliges primò ad hoc præceptum tria requiri, corde, ore, & opere exequenda. Corde, ut diligamus Inimicos;



ore, ut oremus pro ipsis; opere, ut eis beneficiamus. Deinde præcepti dignitas & excellentia demonstratur, cum dicitur *ut sitis filij Patris vestri*. Ac denique apparet eius necessitas cum vix alioquin ulla sit Charitas proximi; nam addit, *si enim diligitis eos qui vos diligunt, quam mercedem habebitis? Nonne & publicani hoc faciunt? Et si salutaueritis fratres vestros tantum, quid amplius facitis? Nonne & Ethnici hoc faciunt?* Quod si natura humana durum est, huic obedire præcepto: quam longe durius Gratia, naturam humanam non obedire Christo? Quod ut accuratius expendatur, præmitti debet, quod unicuique rei censendum est id esse durius quod rationabilius ei repugnat. Non est videlicet durum nisi quia repugnat, & quo magis repugnat, eò durius censeretur debet. Est vero duplex repugnantia; una sensus seu naturæ corruptæ; & altera Rationis. Ac quidem de repugnantia sensus non est questio, nec umquam esse potest in re spirituali & diuina, cum ubi talis repugnantia reperitur, sit semper Rationi seu Gratia subijcienda. *Debitorum enim sumus non carni ut secundum carnem viuamus, si enim secundum carnem vixeritis, moriemini; si autem spiritu facta carnis mortificaueritis, uiuetis.* In hoc vno tota sistit vita spiritualis & virtus.

Rom. 8.

Repugnantia vero rationis duplex item considerari posset, nempe rationis Inferioris & Superioris, sed indistincte hic pro eadem accipitur, intelligendo Rationem recte ordinatam, cui quidquid magis repugnat, aut quidquid secundum eam, cuiusque rei magis est repugnans, id omnino debet dici esse durius & molestius. *Inique & dure agis mecum, quare ita egisti*, dicebat Laban Iacob; Imo tu quam iniquius mecum & durius, respondit Iacob, tum vero probat dictum ex repugnantia cum æquitate & Ratione.

Gen. 31.

1. Pet. 3.

*Parati semper ad satisfactionem omni poscenti vos rationem non modo de ea que in vobis est spe, ut exigebat sanctus Petrus: sed de omni prorsus actione, ut sanctus Thomas respondit rogatus aliquid memrandum quod postremum diceret iam iam moriturus: Nihil,* inquit, *agite cuius non possitis probatam rationem reddere.*

## II. PUNCTVM.

**S**ED rationabilius, sed iustius, sed secundum illam Rationem recte ordinatam longe magis repugnat Gratia, naturam humanam



non obedire Christo praeipienti dilectionem Inimicorum, quam repugnet ipsi naturae obedire tali praecepto.

Etenim quænam est illa naturæ humanæ repugnantia? Nonne est tota sensualis aut rationis illius inferioris quæ secundum considerationes terrenas & caducas de rebus differit & iudicat? Cur enim non diligas inimicum? Responde & responsionem examina, num sapiat carnem aut spiritum, terram aut cælum, Dæmonem aut Dominum IESVM? *Vade post me satana, scandalum es mihi, quia non sapis ea quæ Dei sunt, sed ea quæ hominum.* Sic Christus repellendam docuit carnis prudentiam. Matth. 16.

At vero quod humana natura non obediat præipienti Christo, repugnantia est Gratia seu Diuini Spiritus secundum Rationem recte ordinatam. Sicut enim Ratio fide illustrata cunctis aperte clamat omnem Creaturam & præcipuè rationalem esse Christo subiectam, sic prorsus infert sibi repugnare si non illi obediat. *Omnia subiecit sub pedibus eius, & ipsum dedit Caput supra omnem Ecclesiam, quæ est corpus eius & plenitudo eius, qui omnia in omnibus adimpletur.* Et alibi: *In eo enim quod omnia ei subiecit, nihil dimisit non subiectum ei.* Decebat Eum propter quem omnia, & per quem omnia, qui multos filios in gloriam adduxerat, auctorem salutis eorum per passionem, consummare. Id est sic perfecte gloriosum eum facere ut nihil deesset ad eius gloriam: deesset vero aliquid si quid non esset ei plenè subiectum. Eph. 1.

Et quidem varij sunt Tituli quibus id Christus promeruit, de quibus iam supra in prima parte nonnihil dictum est. Primus est Excellentia personæ qua Deus homo, vnde si *Regi quasi præcelsi*, subiiciendi sumus, quanto magis Christo cuius ministri sunt Angeli? Secundus, Filiatio, seu quia filius Dei est, hoc enim vel solo nomine Pater filium constituit heredem vniuersorum, per quem fecit & sacula. Tercius est, Humilitas & subiectio quâ semetipsum exinaniuit formam serui accipiens, & humiliavit semetipsum, factus obediens, usque ad mortem, mortem autem crucis. Propter quod & Deus exaltauit illum, & dedit illi nomen quod est super omne nomen, ut in nomine IESV omne genu flectatur, Cælestium, terrestrium, & Infernorum. Id est, omnes vbique locorum ei subiiciantur. Sed & quartus est Titulus in eius morte qua factus Redemptor omnium, hoc ipso etiam omnium factus est Dominus; *In hoc enim Christus mortuus est & resurrexit, ut & mortuorum & viuorum dominetur.* I. Pet. 2.  
Hebr. 12.  
Phil. 2.  
Rom. 14.



Ibid.

ocys, Omnes stabimus ante tribunal Christi, scriptum est enim, viuo ego, dicit Dominus, quoniam mihi flectetur omne genu. Quintus est donatio Patris, quando iam non esset tot Titulis meritis, tamen Bonitate sua Pater hoc illi dedisset quod Filius agnoscebat sibi datum, dicens patri: *Dedisti ei potestatem omnis carnis*. Et rursum: *Data est mihi omnis potestas, in caelo & in terra*. Sextus est, perpetua Gratiarum communicatio quam influit in totum Ecclesiae corpus & in membra singula, quae certe non minorem ei debent subiectionem quam membra Capiti. Septimus denique ut plures omit- tam alios, est ipsa eius electio quae fit à cunctis fidelibus per Ba- ptismum in quo esse velut pactum & Chirographum sancti Patres affirmant quo nos Christo totos dedimus & consecramus.

Ps. 115.

O Domine quia ego seruus tuus, ego seruus tuus; Non sufficit semel profiteri, quia tam multa sunt nomina quibus eius Dominio toti astringimur, ut quantum illa iam Rationi humanae nota sunt, tantum reclamet Ratio si non ipsa natura humana se totam illi subdat.

## III. P V N C T V M.

Ioan. 5.

Deut. 18.

**E**RGO si natura humana durum est obedire Christi praecepto; longe est durius Gratia, naturam humanam non obedire Christo, Cui tot Titulis & nominibus est deuincta, ut ne ipse Christus possit quem- quam eximere à debito seruitutis & obseruantiae. Nam in hoc ipse Christus obedit Patri qui vult omnes nos ipsi esse subiectos, ac proinde etiam non potest non id velle Filius qui nunquam dis- sentit à Patre; *Ut omnes, inquit, honorificent Filium, sicut honorifi- cant Patrem. Qui non honorificat Filium, non honorificat Patrem*. At certe qui non obedit Filio non illum honorificat, & Pater se ulto- rem futurum talis inobedientiae iam pridem testatus est: *Ponam, inquit, verba mea in ore eius, loqueturque ad eos omnia quae praecepero illi: qui autem verba eius quae loquetur in nomine meo, audire noluerit, Ego ultor existam*. Quasi diceret, quando in re ab illo imperata vel vetita nihil aliud esset quam quod imperauit & vetuit: si quis ei non paruerit, hoc ipso punietur. Et tamen rationes possent fin- gi contra id quod iubetur, nulla tamen nec dici nec fingi potest contra iussionem ab illo factam, quam omnino ratam fixam- que volo.

Atque



Atque hoc praecipue spectandum est in hoc praecepto, quidquid sit de re ipsa quae praecipitur, quidquid contra opponas, Christus est Dominus qui praecipit, *Contra quem non est Ratio non est Pr. 21.* *Sapientia, non est prudentia, non est consilium. A DOMINO egres-* *Gen. 24.* *sus est sermo: Non possumus extra placitum eius quidquam aliud loqui.* *EGO Dominus, non oderis fratrem tuum in corde tuo. EGO Domi-* *Levit. 19.* *nus, leges meas custodite.* Quem emphaticum loquendi modum videtur vlturpasse Dominus cum hic dicit, *Ego autem dico vobis: diligite inimicos vestros.* Quasi diceret, quidquid mundus, quidquid natura humana, quidquid Ratio, quidquid legis antiquae dicant Interpretes, EGO qui superemineo istis omnibus, *Dico vobis,* lubeo, praecipio, & mihi praecipienti obedire debetis.

At rursum dices, haec quidem esse vera in speculatione ut dicitur, sed in praxi semper dura & aspera. Esto id quidem ut dicis, quid porro inde? Numquid propterea non obediendum? Numquid non subiicienda natura Gratiae quia nonnihil laborat in illa subiectione? Nimirum *interroga iumenta & docebunt te: & volatilia caeli & indicabunt tibi. Loquere terrae, loquere caelo, & respondebit tibi, & narrabunt pisces maris.* *Iob. 12.* Intuere solem, numquid naturale illi est & proprium moveri motu continuo? At iubetur stare in gratiam hominis, Et ecce stat contra naturam, *Obediente* *Ios. 10.* *Domino voci hominis.* Numquid natura est ignis comburere quidquid tangit; aut aquae vehementis absorbere quidquid attingit? Vtrumque tamen elementum sese continet, & Deo iubente, homines intactos servat. Numquid Leoni, numquid serpenti aut aliis belluis naturale est, ut homines deuorent & enecent? Non deuorant tamen Deo vetante. Quid Coruo voracius? & tamen Eliae panem portat illaesus. Quid in mari ferocius quam immane illud Cete quod Ionam accepit in vtero & inde viuum reddidit? Quid morbis, quid morte, quid Daemone dirius aut implacabilius? Cedunt tamen Christo iubenti, & vno verbo, vix vlla est Creatura, quae non iussa fuerit contra naturalem inclinationem homini deseruire; iussisque statim paruit. Itane homo, homo ille supra Creaturas ratione praeditus ut Dominum suum cognoscat & imperanti lubens volensque pareat, non parebit! O quam verè dictum, *Pugnabit cum illo orbis terrarum contra Insensatos.* *Sup. 5.* Iam enim ratione pugnarunt & vicerunt irrationabilia rationabilem. Certè non iam homo, *comparandus iumentis insipientibus.*



242 Sabbato Hebd. 5. post Oct. Pent. Attendite ne iustitiam, &c.  
tibus aut similis illis effectus, sed longe infra omnes à seipso de-  
Eccles. 28. generat! Memento nouissimorum, & desine inimicari. Id est, sicut  
Cant. 8. in instanti morte sic modo deponendum omne odium, Quia for-  
tis ut mors dilectio.

Vide in 2. parte, Sabbato Hebdomadæ 3. Dominica Palma-  
rum, & Feria 2. Hebdomadæ 3. post Octauas Pascha, vbi hæc ha-  
betur Veritas:

Charitas non quærendo sua, melius inuenit, quam  
si quæreret.



## S A B B A T O.

### DE RESPECTIBVS HVMANIS F V G I E N D I S.

*Attendite, ne iustitiam vestram faciatis coram ho-  
minibus, ut videamini ab eis; alioquin non ha-  
bebitis mercedem apud Patrem vestrum. Matth. 6.*

#### VERITAS PRACTICA.

Qui suam Iustitiam facit ut videatur, maximam quæ  
fieri possit, iniustitiam videtur facere.

RATIO EST, Quia maxima iniustitia est usurpare quod  
Dei est, ipso Deo inuito & vetante.

Sed qui iustitiam suam facit ut videatur, sibi usurpat quod  
Dei est, ipso inuito & vetante.

Ergo maximam quæ fieri potest Iniustitiam videtur facere: seu  
potius, ne faciat, attendat quod Christus Dominus monet.



I. P V N C T V M.

**R**EGIE sanctus Ioannes Chrysostomus primo de <sup>I. de comp.</sup>  
Compunctione libro, postquam enunerauit multitudi-  
nem vitiorum quibus inuoluimur: Si quis, inquit, po-  
tuerit ab istis se nexibus exuere, cautiusque & attentius quæ mandata  
sunt, adimplere, malum ingens superbia continuo obrepat in qua est  
grauior lapsus. Cui conformiter sanctus Augustinus, Nisi humi- <sup>Ep. 504</sup>  
litas omnia quæcumque bene facimus & præcesserit, & comitetur, &  
consecuta fuerit, & proposita quam intueamur, & apposita cui adherea-  
mus, & imposita quæ reprimamur, iam nobis de aliquo bono facto gau-  
dentibus, totum extorquet de manu superbia: Vitia quippe cetera in pec-  
catis, superbia vero etiam in recte factis timenda est, ne illa quæ lau-  
dabiliter facta sunt, ipsius laudis cupiditate amittantur. Quamobrem  
opportune Christus Dominus, Attendite, inquit, ne Iustitiam ve-  
stram faciatis coram hominibus ut videamini ab eis. Nomine autem  
Iustitiæ intelliguntur omnia bona opera quorum tres sunt præci-  
pua species de quibus ipse consequenter agit toto capite sexto  
sancti Matthæi, nempe Eleemosyna, Ieiunium, & Oratio; quæ  
tria distincte spectant Deum, proximum, & nosipsum.

Atque ut in eorum actibus exercendis hoc attendamus quod  
monet Dominus, attente consideranda est Veritas quæ hic doce-  
mur, Quod si nostram Iustitiam fecerimus coram hominibus, ut videa-  
mur ab eis, videbimur maximam quæ fieri possit, Iniustitiam facere.  
Quia videlicet maxima illa censenda est iniustitia, quando quod  
Dei est maxime proprium, ipso nolente & prohibente Deo, sibi  
quis usurpat. Cum enim omnis usurpatio rei alienæ inuito ra-  
tionabiliter Domino, sit iniustitia, certè quod res usurpata magis  
est propria & cara Domino suo, quod Dominus à quo subripitur  
est altior seu quod altiori & superiori iure rem possidet, quod deni-  
que magis rationabiliter est inuitus, tunc omnium iudicio illa rei  
alienæ usurpatio dicenda est maior iniustitia, seu magis iniusta &  
grauis in suo genere, ut pote quæ in se magis comprehendat quæ-  
cumque faciunt ad grauitatem iniustitiæ.

At verò quid potest esse aut cuiam potest esse magis pro-  
prium, quàm quod Dei est, Deo, qui à se vno habet quod habet,  
& à quo pendent creata omnia? Quis vero est altior Dominus



- Pf. 96. quam qui est *Altissimus super omnem terram* : Et qui tali iure sua possidet vt nec Ipse suo se iure possit exuere. Si autem sua nolit communicare, nisi quantum permittit libertati hominum qui ab eo nolente & inuito, sibi quæ Dei sunt non verentur vsurpare, quis cogitari possit magis rationabiliter inuitus & nolens quàm qui suprema est Ratio rerum omnium, & prima quarumlibet regula rationum? Numquid *via mea non est aqua, & non magis via vestre prauæ sunt*; dicit Dominus? Vnde aperte patet quanta sit illa iniustitia, quàm grauis & extrema, si quis quod Dei est maxime proprium, sibi vsurpet, Deo nolente & vetante? *Iniuste iniquitatem fecerunt in me*. Nonne id agnoscis.
- Ezech. 18.
- Pf. 118.

## II. P V N C T V M.

**S**ED qui iustitiam suam facit vt videatur ab hominibus, vsurpat sibi quod Dei est, ipso Deo inuito & nolente.

- Vsurpat enim gloriam illius iustitiæ quam facit vt videatur, vt æstimetur, vt lauderetur, & glorificetur. Quæ quidem Gloria sic proprium Dei bonum est vt singulariter Deus dicatur in Scripturis, *Rex & Dominus Glorie*, quasi diceretur, neminẽ sibi posse illam prætereundum nisi quantum ipsi Deus voluerit communicare, aut nisi qui talem præterit gloriam se reum faciat vsurpatæ rei Diuinæ contra vel præter Diuinam voluntatem. Neque id gratis dicitur, sed firma est constansque ratio fundata in duobus Diuinis titulis seu attributis quæ sunt ita Diuinitati propria vt non possit esse Deus quin sit Principium & Finis omnis iustitiæ, totiusque boni operis à quocumque hominum facti: ac proinde quin omnis Gloria quæ ex tali permanat bono, sit Deo maxime propria. Propter me, propter me faciam, vt non blasphemem: & gloriam meam alteri non dabo. Ego ipse, Ego primus, & Ego Nouissimus. Quasi diceret, sicut Ego sum primum principium à quo quidquid sit, oritur: ita Ego sum Finis ad quem debet referri omne opus, & omnis operis gloria. Quod sic declarat apertius: Numquid gloriabitur securis contra eum qui secatur in ea? Aut exaltabitur serra contra eum à quo trahitur? quomodo si eleuetur virga contra elevantem se, & exaltetur baculus qui utique lignum est: Perinde ac si diceretur, sicut rei bene gestæ non datur gloria Instrumento, sed Agenti per Instrumentum; sic plane Deo qui primarius est Agens omnium bo-
- Pf. 23.  
1. Cor. 2.
- Is. 48.
- Ibid. 10.



norum operum debet referri Gloria : *Omnia opera nostra operatus* Ibid. 26.  
*es nobis, Domine Deus noster.*

Agunt quidem cum Deo & cooperantur ad bonum opus homines, aliter ac instrumentum inanime, unde & merentur suis bonis operibus mercedem sibi promissam : Sed nihil propterea deperit Deo, nihil quod Dei est, potest idcirco detrahi : nihil propterea Gloriam sibi potest homo usurpare. Primò quidem quia homo cum non sit suiipsius principium neque finis, non potest propter se ita operari ut finis quem sibi proponit destruat finem Dei ; destrueret autem finem Dei si propriam quæreretur gloriam, & non Diuinam : Neque enim hic est finis Dei agentis cum homine, ut homo suam quærat gloriam : ac proinde nec potest esse finis agentis cum Deo hominis, *Noli propter escam, Noli propter* Rom. 14.  
*tuam gloriam, destruere opus Dei.*

Deinde si quæ merces promissa est operanti homini, bene operanti promissa est, seu bonis eius operibus. At non possunt illius bona esse opera qui in suis operibus velit videri ab hominibus ut laudetur, hæc est vanitas quæ pœnam potius meretur quam præmium ; *Va qui trahitis iniquitatem in funiculis vanitatis : Et expresse* 1s. 4.  
*dictum à Domino ; Alioquin mercedem non habebitis apud Patrem vestrum.*

Denique si operanti bonum precatur Apostolus *Gloriam & honorem & pacem*, opportune quidem, sed an propterea qui operatur bonum possit illam ambire & sibi usurpare non dixit Apostolus, imo cum Christo vetuit, *Non gloriatur omnis caro in conspectu eius.* 1. Cor. 13.  
*NON efficiamur inanis gloriæ cupidi. NIHIL per contentionem, Gal. 5.*  
*neque per inanem gloriam. GLORIA in confusione ipsorum qui terrena sapiunt. NON querimus ab hominibus gloriam : neque à vobis, Phil. 2.*  
*neque ab aliis. SOLI Deo Honor & Gloria. Poteratne loqui expresse* Ibid. 3.  
*ius contra quærentes suam Gloriam ?* 1. Thess. 2; 1. Tim. 1.

### III. P V N C T V M.

**Q**UI suam ergo Iustitiam facit ut videatur ab hominibus, maximam quæ fieri possit iniustitiam videtur facere : Quia quod Dei est maxime proprium, ipso inuito & nolente sibi usurpat. Unde apte sanctus Bernardus, *Gloriam meam, Dominus ait, alteri non dabo : Et superbus, Ego, inquit, mihi eam licet non dederis, usur-* Serm. 4. de Natiuit. Dom.



pabo. Potestne aliquid iniuriosius & iniustius cogitari? Cogita duos homines in eodem opere laborantes, quorum vnus alio longe minus de suo conferat, longè minus laboret, & tamen totum quod ex labore colligitur emolumentum sibi omnino atrahat, defraudetque socium operis, sua debita parte, licet reclamantem & contradicentem. Numquid tibi videtur illa esse merces defraudata, quæ à sancto Iacobo clamare dicitur, *Et clamorem eius in aures Domini Sabbath introire?* Velle sine tam crudelem in homines exercere iniustitiam? Hæc est vero, hæc est iniustitia quam contra Deum meditaris quando iustitiam tuam facis vt videaris & lauderis. Laboras cum Deo in opere, sed profecto longe minus quàm ipse Deus: Et tamen totum laboris pretium, totumque operis emolumentum tibi assumis, nihil prorsus Deo referuans, qui sibi solam gloriam referuatam volebat!

Iac. 5.

Mat. 2.

Mich. 6.

Act. 12.

Pf. 30.

Ecclesi. 35.

*Vae ei qui multiplicat non sua! vsquequo & aggrauat contra se densum lutum?* Vsquequo in suam perniciem accumulât terrenam gloriam, quæ velut lutum erat calcanda & quam tamen in dies sibi multiplicat & condensat, quia nihil familiarius nihil vsitatius nihil copiosius ista vanitate quæ quæritur in iis quæ apparent coram hominibus; & hanc vnâ referet ex cunctis suis operibus, vanitatem! O lutum verè densum quo vana inficietur anima & cuius pondere demergetur ad infima, nisi sibi prospiciat! *Numquid iustificabo stateram impiam, & saccelli pondera dolosa?* Numquid possum approbare, & non punire illum qui tam iniuste & fraudulenter agit cum proximo, & cum Deo, vt nonnisi subtrahatis eorum bonis ditescat? Nonne percussit Herodem Angelus, *Eò quod non dedisset honorem Deo, & consumptus à vermibus, expirauit?* Non omnes vani & superbi sic forte superbiunt & peccant sicut iste Herodes; sed quantumcumque minus superbiant, magis tamen peccant quàm putent: & grauius punientur quam timeant: Nam verè Deo Dauid confitebatur: *Odisti obseruantes vanitates, superuacue.* Quamobrem deinceps ex Consilio Sapientis: *Bono animo gloriam redde Deo: Et dic sæpe cum Domino, si ego gloriosifico meipsum, gloria mea nihil est.*

Vide in 1. parte, Feria 2. Hebdomada 2. in Aduentu, vbi hæc statuitur Veritas:

Nulla re homo quantumuis gloriosa gloriari potest.

Et alibi passim, Verbo, *Gloria, Humilitas, Intentio,*



*Non quod times, timendum est, ne desit tibi Deus, &c. 247*



# DOMINICA

SEXTA POST PENTECOSTEN.

DE MVLTA TVRBA, EX PAVCIS

PISCICVLIS ET PANIBVS

DOMINO SATVRATA.

*Cum turba multa esset cum Iesu nec haberent quod manducarent, conuocatis Discipulis, ait illis : misereor super turbam, quia ecce iam triduo sustinent me, nec habent quod manducent, &c. Marci 8.*

VERITAS PRACTICA.

*Non quod times, timendum est, ne desit tibi Deus, sed ne tu desis Deo.*

*RATIO EST, Quia non est timendum nisi malum quod à te pendet ut caueas, & cui præcauendo timor est opportunus. Sed quod times ne desit tibi Deus, non est ita malum, quod à te pendet ut caueas, sicut ne tu desis Deo.*

*Non illud igitur quod times timendum est, sed aliud quod minus times, & unde ad Diuinam prouidentiam pluris refert.*



## I. P V N C T V M.



AT quidem notum est omnibus miraculum illud quod hodie nobis proponitur, sed non est satis consideratum. Tria vero sunt præcipue quæ attentius expendas & admireris.

Heb. 12.

Primum est quam multæ turbæ sequerentur Dominum, quanta vis & virtus Domini qui tam multos ad se alliceret, & tamen nos illi Domino toties resistimus! O quam prudenter Apostolus. *Videte ne recusetis loquentem.*

Ecclesi. 2.

Secundum, quanta deuotio, quantus feruor & quale studium vniuersi huius populi qui ad deficientem vsque vitam Dominum sequebatur! Ecce iam triduo perseverant ieiunî, nec cogitant aut loquuntur de cibis; non exhibunt à Domino, nisi iussi discedere, si vero dimittantur, non peruenient domum; *Deficient in via*, inquit ipse Dominus: & præsto ac parati omnes deficere prorsus ac mori pro eo; Nos vero vix ad horam illum possumus sustinere! *Va his qui perdiderunt sustentiam.*

Ps. 13.

Tertium denique, quàm pie, quàm paterne Dominus misertus fuerit omnium, & sic extremæ prouiderit eorum necessitati, vt saturatis omnibus qui aderant, multa cibaria superfuerint alendis aliis. Non est, homo timide, non est timendum ne quid tibi vnquam depereat pro Christi cultu, non est timendum ne nobis Ille desit qui ne minimæ deest creaturæ. Et tamen quantæ curæ tuæ & quantæ sollicitudines pro futuris euentibus: quanti metus & tremores ne quid nobis deficiat? *Illic trepidauerunt timore vbi non erat timor.* Nō arguit Psalter Regius quod trepidauerint, sed quod trepidauerint timore vbi non erat timor: Id est, quod nimis timuerint vbi erat minus timendum: & minus timuerint, vbi erat magis timendum. Quod cum sit valde arguendum, tum valde frequenter etiam id nobis accidit, quoties videlicet nimis diffidimus Diuinæ prouidentiae. Tunc enim, *non quid times, timendum est; ne tibi desit Deus, sed ne tu desis Deo.*

Ratio est plurimum consideranda, & in plures alios derivanda vsus: Non est videlicet, non est timendum, nisi malum illud quod à te pendet cum diuina ope, vt caueas, & cui præcauendo timor est opportune adhibendus.

Hic



Hic enim agitur de timore non subitaneo non naturali non prout est pura cordis passio, sed de illo timore qui aduertenti animo & plane libero sic concipitur ut sit actus rationis deliberatus & sit ipse actus rationabilis & virtutis. Nam aliud est esse actum rationis & actum rationabilem. Rationis actus est ille omnis qui aduertenter efficitur, licet sit malus & inordinatus: at ille solus est rationabilis qui ex ratione subiecta Legi æternæ profluit, dicique debet virtus & æternum mereri præmium.

De hoc itaque solum timore sermo est cum dicitur: Non est timendum nisi malum quod à te pendet ut caueas, quasi diceretur si prudenter si rationabiliter est timendum, non est timendum nisi malum illud quod à te cauere potest & cui præcauendo timor est opportunus siue accommodatus & necessarius, quis enim timor qui sine causa est nisi timor inanis & vanus & irrationabilis & noxius? At quæ potest esse probata timoris causa nisi sit eius quædam necessitas & utilitas ad malum præcauendum? Quanam porro potest esse utilitas ad hunc finem, quando tale est malum ut sit extra hominis potestatem illud cauere, quantumcumque timeat & expauescat? Nonne his diceretur, *Quid timidi estis modicæ fidei? Videte ne turbemini. Non turbetur cor vestrum, neque formidet.* *Math. 8.  
Ibid. 24.  
Ioan. 14.*

Sicut enim ab illa tristitia nos dehortatur Sapiens in qua nulla est utilitas, sic plane à timore cuius finis & fructus est nullus. Quod fuscè argumentum prosequitur sanctus Ioannes Chrysostomus: *Remedia, inquit, medicinalia propter illos tantum morbos facta sunt quos tollere possunt, non propter illos quos nihil adiungere possunt: puta medicamentum oculos lippientes tantum inuare valens, nullum vero alium morbum, propter oculorum agritudinem tantum factum esse dicere quis posset; non propter stomachum, non propter manus, non propter vllum aliud membrum.* Quasi diceret: non recte, non rationabiliter asfumeretur ad alterius morbi quàm oculorum vsum, quia hic vnus est eius vsum, hæc vna eius utilitas ut oculos non alias corporis fanet partes. *Ecclesi. 30.  
Homil. 5.  
ad Pop.*

Sic de tristitia, sic de timore pergit dicere, *Percurramus, inquit, ingruentium nobis malorum quodque, & tristitiam superadducamus, & videamus quid ex hac fiat utilitatis? Multatus est quispiam pecuniis? Tristatus est, multam non emendauit; Filium amisit? Doluit, mortuum non resuscitauit. Flagellatus est quis, alapis casus, contumeliis affectus?*



250 Dominica 6. post Pent. De multa turba ex paucis, &c.

*Doluit, non renouauit contumeliam. In morbum quis incidit & agitudinem grauissimam? Doluit, agitudinem non sustulit sed & difficiliorrem reddidit. Vides horum nulli prodesse tristitiam. Peccauit quis? Tristatus est? peccatum deleuit & dissoluit debitum.*

At de his infra commodius; nunc id sufficiat, quod sicut non est tristandum de malo cuius à tristitia nullum est remedium, sic plane nec timendum illud malum cui timor prodesse nequit, cum alioquin timor non modo esset inutilis sed & malignus & prope illi similis quem Iudæis olim minatus est Dominus: *Non quiesces neque erit requies vestigio pedis tui. Dabit enim tibi Dominus cor pauidum, & deficientes oculos, & animam consumptam marore, & erit vita tua quasi pendens ante te. Timebis nocte & die & non credes vita tua. Mane dices, quis mihi det vespere? Et vespere, quis mihi det mane? Propter cordis tui formidinem qua terreberis & propter ea qua tuis videbis oculis.*

Potestne hoc miserando timore miserius aliquid cogitari?

## II. P V N C T V M.

**S**ED quod times, ne desit tibi Deus, non est malum quod à te pendeat & cui precauendo timor sit opportunus, sicut malum illud ne desis Deo.

Quid est enim quod times, ne desit tibi Deus? Dupliciter posset intelligi; Primo ne desit tibi suis gratiis ad euitandum malum, & bonum bene agendum, quod certè malum esset; sed non est illud quod times nec est profecto quod timeas sicut in prima parte declaratur ad illa Sapientis verba: *Non dixeris, per Deum abest.*

Dom. 3. post  
Epiph.  
Eccles. 17.

Secundò quod magistimes, hoc est, ne tibi ex humanis illis rebus quas appetis, vel quas tibi credis esse necessarias Deus desit subministrare & prouidere, vnde harum defectu minùs commode vel delectabiliter, vel honorificè tibi sit in hac vita. Nonne hoc est quod magis times quando agitur de danda Eleemosyna, de longiore tempore pietati concedendo, de remittendis debitis & de piis eiusmodi persoluentis operibus? *Vanus est, inquit similes tui, vanus est qui seruit Deo: & quod emolumentum quia custodiimus praecepta eius?* Hoc est, hoc est quod timetur, emolumentum periculum & iactura.

Mal. 3.

Verum quale sit illud malum & an à te pendeat, sicut aliud,



*ne desis Deo*, nunc perpendendum. Certe negari non potest, esse aliquod malum, malum naturæ, malum vitæ temporalis, malum huius mundi, malum coram hominibus, malum ita vulgo iudicatum: Sed an putas illud malum, esse vere malum & non potius bonum si bene acceptetur? Adeone hospes & peregrinus es in Euangelica disciplina, vt nescias, malum illud esse illud bonum & beatitudinem qua Christus suos donat? An ignoras beatos esse <sup>Matth. 5.</sup> pauperes, beatos illos qui lugent, beatos qui persecutionem innocentem patientur & qui vno verbo subiacent illis quæ tu vocas malis? *Nonne Deus elegit pauperes in hoc mundo diuites in fide* & <sup>Luc. 6.</sup> *heredes regni quod repromisit Deus diligentibus se?* Nonne illis abundarunt malis Apostoli? Nonne Christo propinquiores? Nonne ipse Christus in illis totam exegit vitam? Nonne *idcirco bona mundi contempsit omnia, & mala quæuis sustinuit, vt nec in illis quaereretur felicitas, nec in istis timeretur infelicitas?* Nonne hac pridem ex sancto accepisti Augustino?

Sed esto, sint illa mala, prout vulgo sentiuntur; an si tu illa times, aut mala esse desinent, aut tibi non euenient? Times ægrorum sterilitatem? An illam timor tuus impedit? Mortem reformidas? An propterea non aliquando morieris? Aduersa quæcunque metuis? An idcirco nullis vrgebere? *Foris vastabit eos gladius* <sup>Deut. 32.</sup> *& intus pavor*, Id est, quantumcumque mala paueant, non desinent esse mala. Tantum abest, vt pauore mitigentur, quin potius augeantur; Quod foris gladius infert, hoc intus suffert pavor.

AT verò, *si Deo desis*, hoc est videlicet, hoc est vere malum, hoc est malum quod à te totum pendet, hoc est malum cui præcauendo timor est opportunum remedium.

Quid est enim Deo deesse nisi quod tuum erat præstandum, illi negare: nisi quem debebas cultum, non tradere: nisi quam exigebat in se confidentiam, diffiteri: nisi, vno verbo, peccare? At nonne hoc est verè malum, nonne hoc est duplex malum de quo expressè dicitur: *De malo ad malum egressi sunt: & me non* <sup>1er. 9.</sup> *cognouerunt, dicit Dominus*. Id est, à malo peccati ad malum impenitentiae seu indurati animi transeunt; vel à malo relictæ Creatoris ad malum requirendæ creaturæ se conuertunt: Quæ sunt illa duo mala propter quæ coeli debeant *Obstupescere & eorum porte* <sup>Ibid. 20.</sup> *desolari vehementer*. Nam quanto infinite Creator excedit crea-



turam, tantò malum culpæ quod Creatoris malum est, malum est grauius malo poenæ quod creaturæ solum est malum.

Quàm sit porro à te illud malum, tam apertè liquet quam illud malum, esse peccatum: quàm illud esse voluntarium: quàm illud esse puniendum. *Quid enim punit aut odit Deus quam propriam voluntatem*, qua scilicet peccatum perpetratur, & qua vna sublata infernus non erit; quia non erit peccatum? *Scito & vide quia malum & amarum est, reliquisse te Dominum Deum tuum & non esse timorem mei apud te, Dicit Dominus Deus exercituum, Quia scilicet*, quod erat postremum hîc à nobis demonstrandum, si fuisset timor, non fuisset illud malum; Nam vt testantur omnes Scripturæ, *Per timorem Domini declinat omnis à malo.*

*Prou. 15. 16.*

### III. PUNCTVM.

**N**ON quod times igitur, timendum est, ne desit tibi Deus: sed ne tu desis Deo. Nam, præterquam quod nihil deest timentibus Deum, Et verè omnis sicut Dauid potest affirmare, *Dominus regit me & nihil mihi deerit*: Licet etiam concederemus deesse aliquid, quid tandem illud? Nam quod timendum est timore rationabili de quo hic agitur, malum esse debet quod à nobis sic pendeat vt timore caueatur: quorsum enim alioquin timor? Non est autem tale illud malum *ne desit tibi Deus*: quale profecto est, *ne tu desis Deo*. Quis nempe non illud videat tam procul à te esse, quam istud totum tuum? Quis non illud intelligat quod dicebat Dominus, non esse in quouis sollicito potestatem *Faciendi capillum suum nigrum vel album, neque ad staturam suam posse quidquam cogitando adijcere*? Sunt hæc vni Deo propria, sunt hæc Diuina eius opera; Tibi autem quod tuum esset, præscripsit: Cur quæ sunt Dei, præsumis attingere: & quæ sunt tua, negligis? Nunquamne admonentem audiuiisti Sapientem: *Altiora te ne quesieris, & fortiora te ne scrutatus fueris, sed quæ præcepit tibi Deus, illa cogita semper: & in pluribus operibus eius ne fueris curiosus.*

*Matth. 5. 6.*

*Ecclesi. 4.*

Addo, quod est valde considerandum, quoties de timore malorum agitur: non tam illud esse timendum malum quod vix continget, quam quod frequenter euenit: Malum autem quod times, *Ne desit tibi Deus*, præterquam quod exile malum est, vix etiam accadat; *Non est quippe inopia timentibus Deum.*

*Pf. 33.*



*Qui nimis timet ne ipsi desit Deus, non satis timet, &c. 253*

Qua de re infra fufius : At contra , *Ne desis Deo* , malum non modo perniciosissimum est , sed tam frequens & prope quotidianum , vt si paulo attentius quid in eo pecces attendas , totum te in illo viuere , totum te in illo esse malo perspicias.

Quamobrem Cum sancto Chrysostomo concludamus , & illud fixum maneat , Quid sit dolendum , quid timendum : Non quod extra nos malum accidit , sed quod in nobis à nobis efficitur : *Ne igitur* , inquit , propter mortem tristeris ; natura enim est : Tristare propter peccatum , voluntatis enim est culpa . Si quis mortem minetur , Dic ipsi : *Institutus sum à Christo non illos timere qui corpus interimunt , animam* Homil 6. ad Pop. *vero occidere nequeunt . Si rei familiaris publicationem minetur , responde , nudus exiui de utero matris meae , nudus & reuertar illuc : Nihil in hunc mundum intulimus , manifestum est quod nec exportare quidquam poterimus . Et si tu non abstuleris , mors superueniens auferet , & si tu non ingulaueris , natura lex finem afferet . Nihil igitur eorum timeamus quae nobis naturâ afferuntur , sed illa quae ex mala nobis proueniunt voluntate .*

Vide in hac 3. parte, Dominic. 14. & in 4. Fer. 2. Hebdomad. 21. vbi hac Veritas exhibetur :

Si quod creditur necessarium , petenti desit : credendum potius est non illud esse necessarium , quàm quod petenti desit.

ALITER etiam quæ supra est declarata Veritas , ad maiorem perspicuitatem sic proponi & illustrari posset :

Qui nimis timet ne ipsi desit Deus , non satis timet quod est magis timendum , ne ipse Deo desit.

RATIO EST , Quia qui non satis confidit Deo , non satis timet ne Deo desit.

Sed qui nimis timet ne ipsi desit Deus , non satis confidit Deo.

Ergo is etiam non satis timet ne ipse Deo desit , quod tamen longe magis est timendum & cauendum.



## I. P V N C T V M.

**P**RIMA propositio sic breuiter expeditur. Est enim Deo deesse, non accipere media quibus nos vti vult Deus ad coagendum & collaborandum cum ipso. Medium verò frequentius & opportunius quod ad vsum nobis proponit, est Confidentia, de qua iam saepe supra, & de qua semper supersunt dicenda ex Scripturis, quæ hoc medium ita commendant siue ad spiritualia, siue ad temporalia bona obtinenda, vel auertenda mala, vt in eo totum ponant quod petitur: *Reuela Domino viam tuam, & spera in eo, & ipse faciet.* Id est, propone illi quidquid voveris, & dum speres in eo, dum confidas in eius bonitate & prouidentia, certus esto quod de re proposita statuet & ordinabit quidquid erit conuenientius. *Et adiunabit eos Dominus, & liberabit eos, & eruet eos à peccatoribus, & saluabit eos, QVIA SPERAVERTUNT IN EO.* *Dulcis causa,* inquit sanctus Bernardus, *Attamen efficax, attamen irrefragabilis. De quacumque tribulatione clamauerint ad me, exaudiam eos. Ecce numeræ tribulationes, secundum multitudinem earum, consolationes eius lætificabunt animam tuam, dummodo ad alium non conuertaris, dummodo clames ad eum, dummodo speres in eum, nec humile aliquod vel terrenum, sed altissimum ponas refugium tuum.*

Ps. 36.

Ibid.

In Ps. 90.

O suauitatem Diuinæ Prouidentiae quæ se in re tam facili, tam profuse communicat! quid facilius quam in eo sperare qui potest omnia & qui promittit omnia in se sperantibus? Et tamen quàm pauci sunt qui vere sperent in Domino.

## II. P V N C T V M.

**S**ED qui nimis timet ne ipsi desit Deus, non satis confidit Deo.

In hoc enim est præcipue Confidentia, vt quidquid accidat, non defectu auxiliij, non defectu Potentiæ vel Bonitatis Diuinæ id credatur accidere, sed alia ex causa quam iuste permittit Deus ad malum nostrum bonum. *Ipse enim dixit; Non te deseram neque derelinquam,* ait Apostolus, *ita ut confidenter dicamus: Dominus mihi adiutor, non timebo quid faciat mihi homo.* At certe cum id dixit Deus, non sic intellexit aut intelligendum voluit quasi

Iosue 1.

Hebr. 13.



nihil mali accideret illis quos protegeret: fuerunt enim ex his multi submersi aquis, igne consumpti, & aliis obnoxij calamitatibus, licet expresse dixerit: *Cum transferis per aquas tecum ero; Is. 43. & cum ambulaueris in igne, non combureris.* Vere tamen dixit Deus non defuturum, nec reuera defuit sicut dixit: Quia dum comburerentur, illis adfuit; & tùm ipsos comburi cum adesset Deus, & cùm sic fieri vellet, erat illis melius quam si combusti non essent.

Ex quibus illud patet quod dicitur, in hoc præcipue defectum Confidentia verti, *Si quis nimis timet ne ipsi desit Deus: Vt sicut propriè Confidentia tùm esse dicitur quando firme speratur numquam defuturum Deum sicut promissit; sic diffidentia aut defectus Confidentia tùm esse agnoscatur quando dubitatur vel quando nimis anxie pertimescitur nùm forte desit, quasi non posset, aut quasi nollet adesse.* Quod quidem accidit Moyse percutienti petram & Aaroni fratri eius, vnde & ipsi percussi sunt hac animaduersione vt terram promissionis propterea non sint ingressi. *Quia Num. 20. non credidistis mihi vt sanctificaretis me coram filiis Israel, non introducetis hos populos in Terram quam dabo illis.*

O pauendum supplicium deficientis Confidentia! ô tremendum Exemplum Diuinæ seueritatis in eos qui sic deficiunt!

### III. P V N C T V M.

**Q**VI nimis igitur timet ne ipsi desit Deus, non satis timet quod est magis timendum, ne ipse Deo desit: Quia non satis confidit Deo, quod est Deo deesse, & non satis Deo confidere sic indicat quod nimis timeat in suis necessitatibus ne sibi desit aliquid; aut si forte, Deo sic permittente desit aliquid, ne tùm desit Diuina Prouidentia, ne tùm desit eius Potentia vel Bonitas, quod certe est impium cogitare, & quod valde timendum est ne tacite cogitet quisquis non confidit & quisquis nimis timet. *Quid timidi estis, Matth. 8. modicæ fidei?* Cur nimis timent nisi quia non satis confidunt Deo? Aut cur non satis confidunt Deo nisi quia non satis bene cogitant & sentiunt de illius Potentia vel Bonitate? Nisi quia nimis timent ne forte nolit: ne forte non sit satis beneuolus? Nam si certò sibi persuaderent illum affuturum, aut illum æque bonum ac potentem vt adsit & confortet, quid timerent? Hoc autem ti-



mere, hoc sentire, hoc cogitare ne non satis bonus sit aut beneuolus Dominus, certe est ita sentienti timendum & tremendum, siue quod valde offendat Deum, siue quod ita offensus grauiter puniat offendentem. *Timidis & incredulis pars illorum erit in stagno ardenti igne & sulphure quod est mors secunda.*

*Apoc. 21.* *Ephes. 5.* Nemo vos seducat inanibus verbis: propter hæc enim, venit ira Dei in filios diffidentia. Vide quanam sint illa inania verba, & quam damnosè te seducant. Vide quid mundus contra Veritatem propositam obiciat, quid Caro, quid amor proprius unde est ille tuus nimius timor. Quare sic times cum nihil accadat nisi volente aut permittente Deo? Reuolue hîc iterum quæ supra dicta sunt: Times paupertatem, times opprobrium, times morbos, times mortem, times aliquid simile: *Inania verba sunt, timores nocturni sunt*; non euenient hæc forte mala: Sed esto veniant, Nonne est moriendum? Nonne est aliquid patiendum in hac vita? Putasne malum esse, pati? Putasne paupertatem esse miseriam? *Inania verba sunt*, sic vrge pluribus: & perge tibi proponere quantum seducant; nempe alios sensus de bonis & malis inducunt quàm Christus in Euangelio docuerit: alios de Bonitate Dei motus quàm vera pietas excitet, admovent; Quasi hoc sit tantum Deo esse bonum & beneuolum si nos ab omni temporali malo liberet, & quidquid caducum petierimus, indulgeat, atque in concupiscentiis nostris nos foueat. O seductionem pessimam! O formidandam Bonitatem! *Corripe me Domine, verumtamen in iudicio, & non in furore tuo, ne forte ad nihilum redigas me.*

*Ier. 10.* Numquam disiungas Confidentiam à timore, nec timorem à Confidentia. Time ne nimis timeas quod non est timendum: & non satis timeas quod est verè tremendum. Sicut times Deum sic illi prorsus confide quia sic timetur, sic colitur Deus per fidem & confidentiam. Sic aperte Sapiens: *Metuentes Dominum sustinete misericordiam eius, & non desectatis ab illo, ne cadatis; Qui timetis Dominum, credite illi, & non euacuetur merces vestra. Qui timetis Dominum, sperate in illum, & in oblectationem veniet vobis misericordia.*

Videri possunt quæ de fiducia frequenter alibi proponuntur. Vera fiducia confidenti numquam infida.

*In 2. parte, Feria 3, Hebdom. 4. post Octauas Pasche.*

Non



*Ars omnium artium quaestuosissima, est eleemosyna.* 257

Non certius in spem itur quam contra spem.

*In 3. parte, Feria 3. Hebdom. 7.*

Ad hæc autem verba de acceptis & multiplicatis panibus:

*Et accipiens septem panes gratias agens fregit & dabat discipulis suis, ut apponerent, & apposuerunt turba, & manducauerunt & saturati sunt, & sustulerunt quod superauerat de fragmentis septem sportas. Marci 8.*

Opportunæ forent hæc Veritates Practicæ.

Si vis quod non habes, da quod habes.

*In 1. parte, Dominic. 2. post Epiphaniam.*

Numquam melius homo sibi prospicit, quam si minus sibi prospiciens totum se in Deum suaque omnia projicit.

*In 1. parte sexto Decembris, paulo aliter expressis terminis.*

Non tam spectatur quid dones in Diuinis, quam quid non dones.

*In 3. parte, Feria 6. Hebdom. 8.*

Quod præsertim spectat Christus, non est quid ad se afferas sed quid à te auferas.

*In 3. parte, Fer. 3. Hebdom. 13.*

Ars omnium artium quaestuosissima, est eleemosyna.

CELEBERRIMUM est sancti Ioannis Chrysostomi Di-Homil. 33.  
ctum, quod ut apertius appareat cum propositis Euangelij ver-ad Pop.  
bis conuenire, præmitti debet illorum Patrum sententia qui hanc



*l. 50. Hom.  
39.  
l. 2. in Ioan.  
c. 18.*

*Serm. 1. de  
Ieiun. deci-  
mi mensis,  
& collectis.  
Serm. 10.  
de Quadr.*

panum multiplicationem sensu quodam morali referunt ad eleemosynæ compensationem & commendationem. *Saturata sunt tanta millia*, inquit sanctus Augustinus, *& nihil minoratum est, & creuit eis cibus, dum impenditur victus, sic & eleemosyna si indigentibus erogetur.* Sanctus item Cyrillus Alexandrinus: *Liberalitas nobis hoc miraculo commendatur, & quasi magna voce dicitur, quanto plura Dabis liberaliter ac misericorditer, tanto tibi plura largius confluent.* Nam, & ait sanctus Leo: *Ille qui in suis pascitur, quæ potuit augere dando, potest multiplicare sumendo.* Et rursum: *In omni hoc opere, illa interuenit manus quæ panem frangendo auget, & erogando multiplicat.*

Cum hæc autem eleemosynæ virtus & efficacia variis exprimi posset verbis & sensibus, tum quæ aureo illo ex ore profluxit Veritas de arte omnium quæstiosissima, conuenientissimè proponitur, & ex eodem facillimè declaratur: *Si enim*, inquit, *artis est, ad aliquam utilitatem peruenire: Eleemosyna verò nihil est utilius: clarum est profecto quod & ars, & omnium artium est optima.*

Talis autem ratio cinatio sic procedet planius, & in suas partes distribuetur æqualius:

*Illæ est omnium artium quæstuosissima quæ minori sumptu maiorem facit prouentum.*

*Sed Eleemosyna minori sumptu maiorem facit prouentum.*

*Ergo est ars omnium quæstuosissima. Nec proinde timendum ne quid inde rei domesticæ deteratur.*

*Serm. 1. de  
Collectis.*

Quod sane motiuum adiunctum aliis plurimum valet ad exercitium bonorum operum, estque illud primum quod sic proponit sanctus Leo: *Multis diuinarum scripturarum testimoniis edocemur, quantum eleemosynarum meritum, & quanta sit virtus. Certum est enim unumquemque nostrum anima sua benefacere quoties misericordia sua inopia succurrit aliena. Prompta ergo & facilis, dilectissimi apud nos largitas esse debet, si credimus sibi unumquemque id præstare quod indigentibus tribuit.* Quasi diceret, Tametsi suppetunt ex scripturis multa & eximia quibus ad beneficentiam permouemur, quia tamen inani iacturæ metu hinc retardamur, tollendus est iste metus, ut simul tollatur tarditas in largiendo. Tunc enim nihil erit quo minus prompta & facilis eius euadat largitas, qui firme semel sit persuasus nihil adeo sibi largitate sua deperire, ut potius multum accrescat.



Cum autem in prima propositione nihil possit esse dubij, hoc vnum ex secunda superest demonstrare, quod inter omnes artes eleemosyna minori sumptu maiorem facit prouentum. Tres autem modi sunt quibus id patet: Primus est, cum eleemosynæ tam certo promittitur regnum cœlorum, quàm crebro repetitæ habentur in scripturis hæ promissiones: *Eleemosyna facit inuenire vitam æternam: DA pauperibus & habebis thesaurum in cœlo; FACITE vobis amicos de mammona iniquitatis, ut cum defeceritis recipiant vos in æterna tabernacula. DIVITIBVS huius sæculi præcipe, facile tribuere, communicare thesaurisare, sibi fundamentum bonum in futurum ut apprehendant veram vitam.* Tob. 12. Math. 19. Luc. 16. 1. Tim. 6.

Qualis enim ille est, Deus immortalis, qualis ille prouentus, qui promittitur eleemosynæ, quæ quando ex tota rerum vniuersitate conflaretur, quid tandem illa est rerum vniuersitas præ cœlo potiundo, præ vita consequenda æterna, præ regno beatorum possidendo? *Tanquam momentum statera, inquit Deo Sapiens, sic est ante te orbis terrarum, & tanquam gutta roris antelucani quæ descendit in terram;* At certè non exigitur totus terrarum orbis, ut cœlum promittatur & detur, non centesima, non millesima, non definita quælibet eius portio petitur, sed qualis illa cumque fuerit particula, vel vnus frigida potus aquæ, quale quantumque est regnum cœlorum, huic tantillæ sitientibus data aquæ totum promittitur, totum traditur, totum in æterna relinquitur sæcula possidendum!

*O mira prouidentia & bonitas Creatoris, exclamat sanctus Leo, ut vno facto duobus vellet esse succursum: Viro scilicet miserando & miserenti. Nec reticendum quod ait sanctus Petrus Chrysologus: Manus pauperis, Abrahæ sinus est ubi quidquid pauper accepit, mox reponit. Thesaurus cœli est manus pauperis, quod suscipit ne in terra pereat reponit in cœlum, thesaurisate, inquit, vobis thesauros in cœlo; Manus pauperis est gazophylacium Christi, quidquid pauper accipit, Christus acceptat. Da ergo homo pauperi terram ut accipias cœlum. Da nummum ut accipias regnum, da micam ut accipias totum. Da pauperi ut des tibi, quia quidquid pauperi dederis, tu habebis: quod pauperi non dederis, habebit alter. Notanda certe sententia.* Serm. 1. de collectis. Serm. 2.

Secundo, quia forte dici posset non eleemosynæ sed aliis simul infusis & acquisitis virtutibus, aut gratiis & Sacramentis concedi beatitudinem, age videamus in peccatore vel infideli desti-



tuto prorsus omni alio promerendæ beatitudinis titulo, quin potius multis iam nominibus sit inferorum reus; videamus inquam quid possit eleemosyna: Videamus quidquid est vsquequaque necessarium ad miserandum damnandi statum cum beato permutandum, illud posse ac reipsa efficere. Quid illud tandem est? Enumera gradatim omnes quæ requirantur ad infidelem animam vel peccatricem, gratias & virtutes siue quibus præueniatur ad fidem, siue quibus adiuetur ad resipiscentiam, quibus confortetur ad perseverantiam, quibus excitetur ad diuinarum actus virtutum, & qualibet Christianæ mentis officia, quibus contra cunctos roboretur hostes: videbis figillatim omnia vel vniuersim in Scripturis ita promitti & dari eleemosynæ, nihil prorsus illi vt negetur quod vel desiderari possit, vel concedi ad perfectè beateque viuendum.

Job. 4.

*Noli auertere faciem tuam ab ullo paupere, sic enim fiet vt nec à te auertatur facies Domini: quomodo potueris, ita esto misericors: si multum fuerit, abundanter tribue: si exiguum tibi fuerit, etiam exiguum libenter impartiri stude. Præmium enim bonum tibi thesaurifas in die necessitatis, quoniam eleemosyna ab omni peccato & à morte liberat, & non patietur animam ire in tenebras. Fiducia magna erit coram summo Deo, eleemosyna omnibus facientibus eam.*

Ecclef. 3.

*Ignem ardentem extinguit aqua, & eleemosyna resistit peccatis: & Deus prospector est eius qui reddit gratiam: meminit eius in posterum, & in tempore casus sui inueniet firmamentum.*

Ib. 7.

*Pauperi porrige manū tuam vt perficiatur propitiatio & benedictio tua.*

Ib. 17.

*Eleemosyna viri quasi signaculum cum ipso, & gratiam hominis quasi pupillam conseruabit. Quasi sigillum esset, vel quasi syngrapha. sigillo Dei ob signata, vt statò tempore, mercedem ei rependat.*

Ib. 29.

*Quod & consequenter confirmans. Conclude, inquit, eleemosynam in corde pauperis, & hæc pro te exorabit ab omni malo. Super scutum potentis, & super lanceam aduersus inimicum tuum pugnabit.*

Serm. 50. de  
Temp.

*ET alia multa sunt, inquit sanctus Augustinus, Diuini eloquij documenta quibus ostenditur multum valere eleemosynam ad extinguenda & delenda peccata; proinde illis quos damnaturus est, imo plus illis quos Coronaturus, solas eleemosynas imputabit tanquam dicens, difficile est vt si examinem vos, & appendam vos & scruter diligentissime facta vestra, non inueniam vnde vos damnem: Sed ite in regnum: Esurini enim, & dedistis mihi manducare. Non ergo itis in re-*



gnum quia non peccastis, sed quia vestra peccata eleemosynis redemistis. Non certe magnis eleemosynis, cum de cibo & potu ac similibus cuilibet obuiis expressa fiat mentio; magna vero & multa redimantur peccata cum alioquin nisi factis eleemosynis redempta essent, sempiternis fuissent in inferno luenda suppliciiis.

Tertio denique quod supradictis additum, valde illustrat propositam quaestionem, non coelestium modo rerum eleemosyna prouentum facit maximum ex minimis quas largitur rebus, quod certe multum est; sed ipsorum etiam temporalium tantam aduenit copiam commodorum, quantam nulla possit ars alia suo comparare artifice. Quod quia vix credi posset, idcirco pluribus & Scripturae & Patres in eo firmiter decernendo, insistant.

Nec mirum quidem esset si veteres tantum scripturae quae carnali populo carnalia & temporalia magis proponebant, istud adstruerent & identidem inclamarent: *Quoniam Dominus retribuens est & septies tantum reddet tibi*: Hoc est multoties quam dederis: sed quis non miretur coelestium & temporalium assertorem Dominum de his etiam temporalibus loqui sic abundanter, *Date & dabitur vobis, mensuram bonam & confertam & coagitatam* Luc. 6. *& supereffluentem dabunt in sinum vestrum*: eadem quippe mensura qua mensi fueritis, remetietur vobis. Quod & egregia similitudine representabat Apostolus, *Qui parce seminat parce & metet, & qui seminat in benedictionibus de benedictionibus & metet*. Tum paulo post: *qui autem administrat semen seminanti, & panem ad manducandum praestabit, & multiplicabit semen vestrum & augebit incrementa frugum iustitiae vestrae*. 2. Cor. 9.

SEMEN est eleemosyna, Dicitur autem Chrysostomus, quia non est sumptus sed redditus. Sic & sanctus Augustinus: *Fecundus est ager pauperum, cito reddit donantibus fructum. Si vis esse mercator optimus, fenerator egregius, da quod non potes retinere*. Sanctus etiam Leo: *Constans esto Christiane largitor; da quod accipias, sere quod metas, sparge quod colligas, noli metueri dispendium, noli de dubio suspirare prouentu. Substantia tua cum bene erogatur augetur. Quamuis enim non habeas nisi quod acceperis, non potes tamen non habere quod dederis. Qui ergo pecunias amat, & multiplicare opes suas immodicis optat augmentis, hoc potius sanctum faenus exerceat, & hac usurarum arte detestetur*. Sermon. 75. de Verb. Dom. Sermon. 6. de Ieiunio.

Quae plura de his videri possent, quia sunt obuia, praetermit-



Homil. 33.  
ad Pop.

tuntur, satisque patet ex dictis quod erat demonstrandum, talem inter omnes artes esse eleemosynam quæ minori ex impensa maiorem fructum referat, ac proinde magis esse quaestuosam. Quod & plurimum confirmatur ex his quæ affert declarando suo dicto Diuus Chrysostomus; *Et artium quidem secularium*, inquit, *unaquaque suum habet quod accepit meritum*, verbi gratia, agricultura pascit, textoria vestit, imo vero nec hoc ulla potest à semetipsa vobis conferre. Et si libet, agriculturam examina primam, nam nisi ligonem habuerit & vomerem, falcem, securim & alia plura mutuetur: & carpentariam ut aratrum pangat, & iugum paret & plaustrum, ut spicas excutiat: & coriariam ut & lorum faciat: & edificatoriam ut & arantibus tauris stabulum edificet & ferentibus agricolis domum: & succisariam ut ligna secentur: & pistariam: post hæc omnia nusquam apparebit. Similiter & textoria, cum aliquid faciat, multas secum artes conuocat ut proposita secum expediant: quod si non acceperint, & manum porrexerint, hæc quoque similiter ut illa remanebit inops. Et artium quæque alterius indiget artis: Cum autem oporteat misereri, nihil aliud nobis opus est sed sola voluntas est necessaria.

Luc. 21.

Quod si dicas quod pecuniis opus est & habitationibus, & vestimentis & calceamentis: illa lege Christi verba quæ de vidua dixit, & ab angustia desiste: licet valde sis pauper, & mendicantibus pauperior, si duo minuta contuleris, totum explesti: etsi des panem cum habens solum, ad perfectionem artis venisti. Hanc itaque suscipiamus artem & scientiam, & obeamus, melius est enim hanc scire quam esse regem & diademate coronari: Non enim est hæc sola eius præcellentia quod aliarum non indiget, verum & diuersarum rerum est expeditoria & multarum quidem & omnigenarum. Domos enim edificat in cælis semper mansuras, & qui se consecuti fuerint docet quemadmodum immortalem fugiant mortem & tibi thesauros donat qui nunquam assumuntur, sed omne damnum effugiunt tam à latronibus quam à vermibus & tempore. Si quis circa frumentorum conseruationem hoc solum te docuisset, quid non reddidisses ut inabsumptum multos annos posses conseruare frumentum? Ecce autem hæc non in frumento tantum, verum & in omnibus docet & quomodo parta, & anima & corpus indiminuta conseruentur ostendit.

Et quid opus est omnia particulatim dicere huius artis merita? hæc namque te docet quomodo possis similis Deo fieri, quod est omnium summa bonorum. Vides quomodo non unum huius est opus sed multa?



Non alterius indigens artis domos adificat, texit vestes, inabsumptos parat thesauros, facit ut mors superetur, diabolus cohibet, Deo reddit similes. Quid igitur hac arte fuerit utilius? Nam alia quidem cum dictis & cum presentis solvuntur vita, & morbo laborantibus artificibus nusquam apparent, & earum opera durare non possunt, & laboris indigent & laboris multi, & aliorum mille: Hæc autem cum mundus præterierit maxime tunc apparet, cum fuerimus mortui maxime tunc coruscet & opera monstrat à se gesta, nec laboris indiget nec alterius huiusmodi cuiuspiam operationis: verum & agrotante te fructum affert & annis confecto & ad futuram tecum vitam emigrat, nec unquam te deserit. Hæc & Sophistis & Oratoribus potentior te efficit. Nam illi quidem in suis præcellentes artibus multos habent amulos: Hæc autem pollentes, infinitos habent pro se orantes: & illi quidem hominum assistunt tribunalibus, iniuriam patientibus exhibentes patrocinium, at & frequenter iniuriam facientibus: hæc autem Christi adstat tribunali, non tantum patrocinans, verum & ipsi persuadens Iudici ut reo patrocinium præstet, & pro eo sententiam ferat: & licet millies peccaverit, coronat & victorem promulgat. Ait enim Deus, date eleemosynam, & omnia erunt munda.

Et post multa, Hæc qui hic erogas, illic sunt, repetitur mutuum, fœnus, & debitum. Nam Chirographa tibi Deus fecit, ait enim qui miseretur inopis fœnerat Deo. Arrhabonem tibi dedit & vades, & hoc cum Deus sit. Quem arrhabonem? Presentis vite sensibilia, spiritualia futurorum primordia; quid itaque differs & torpes, cum iam tanta receperis & hæc expectes?

Quò etiam illud eiusdem referas, Hic erudiamur ut magna in Hom. 34. in Genes. dandis eleemosynis largitate utamur, quò datis parvis adipiscamur magna. Quomodo enim paria sunt, dic obsecro dare parum argenti & obtinere peccatorum remissionem? Pascere esurientem, & in die illa horribili fiduciam assequi & audire verba nulli regno conferenda, esurivi & dedistis mihi quod comederem. Et nonnullis interiectis: talia inquit, animaduertentes, ita respiciamus pauperes quasi operarios qui occasiones salutis dare nobis possunt & eis largiter hilarique promptitudine cum eis communicemus.

Sanctus denique Prosper ubi agit de promissionibus Dei & præ- Parte 2. c. 7. fertim de ista Christi quæ habetur Lucæ undecimo: Verumtamen quod superest, date eleemosynam: & ecce omnia munda sunt vobis: sic accommodatè concludit, O quam breue compendiosumque sacrificium



quod intrinsecus atque extrinsecus totumque hominem mundat; Tum inter varia quæ conglobat eleemosynæ commoda, hæc, inquit, fænerat Deum, hæc continet regnum cælorum, hæc est quæ discernit agnos ab hædis: hæc est quæ ad dexteram collocat iudicis: hæc angelis sociat: hæc ex seruis filios Dei fieri præstat. Concurrите omni ex genere peccatores, concurrите omnes ex vitii erroribusque leprosi: Concurrите omnes quolibet flagitio maculati atque immundi pœnitentes: concurrите ad tam magnum compendiosum, utileque sacrificium cum omni letitia offerentes. Hilarem enim datorem diligit Deus. Prout quisque quod offerat habuerit; hoc offerat munus. Quod ita noster princeps sacerdotum instituit, acceptumque præ omnibus esse mandauit, ut usque ad duo minuta calicemque aquæ frigida mensuras huius perduxerit sacrificij: pacem promittens, & si hæc desunt, hominibus bona voluntatis.

Licet porro hæc ita sint & quantumcumque suis affecto rebus multum valere possint ad persuadendam in pauperes largitatem, quia tamen ad hanc persuasionem diuina est opus fide quæ in multis est valde modica; idcirco qui nimio rerum suarum tenentur affectu, vix se persuaderi patientur: vnde & quibus Christus panem & pisces multiplicauit, ij erant, qui suis ita renuntiauerant ut omnium obliti de vno sequendo Christo vel de sua vna salute negotianda mouerentur; Quamobrem hæc opportuna etiam videretur Veritas Practica:

Nisi pauper affectu sis, vix satis affectus eris in pauperes.

RATIO EST, Quia vix satis affectus eris in pauperes si ex parte tantum necessitatibus eorum prospicis; & qua etiam parte prospicis, multum deficias.

Sed nisi pauper affectu sis, ex parte tantum necessitatibus pauperum prospicies: & qua etiam parte prospicies, multum in illa deficies.

Ergo & vix satis affectus eris in pauperes; nec quod debes exolues, nec te omisse misericordie tantum fructu priuabis, sed te culpæ reum & pœnæ consequentis constitues.

PRIMA



*Nisi pauper affectu sis, vix satis affectus eris in pauperes. 265*

PRIMA propositio probe intellecta, probe probata est; atque etiam vt apertius intelligatur, non est longiori opus discursu. Quis enim illum satis affectum erga Iustitiam & suos Creditores credat, quibus cum debeat centum quæ possit commodè reddere, reddat tantum quinquaginta quæ non sint etiam satis probati pretij? Quis illum satis affectum ad pietatem & obedientiam pronuntiare ausit, qui cum totam posset & deberet quadragesimam ieiunare, mediam tantum obseruet, & laxius quam ieiunij leges ferant. Nonne propterea condemnatus est Saul quod ex duobus quæ à Samuele mandatis acceperat, vnum<sup>1. Reg. 13.</sup> penitus non præstitit: & aliud ex parte tantum expleuit? Nonne hoc erat eorum vitium quibus Dominus per Prophetam: *Ecce in die ieiunij vestri inuenitur voluntas vestra.* Et quibus per seipsum:<sup>Is. 58.</sup> *Va qui decimatis mentham & anethum & cymimum, & reliquistis quæ grauiora sum legis, iudicium, & misericordiam & fidem. Hæc oportuit facere, & illa non omittere.*<sup>Math. 23.</sup>

Sic planè cum ex multis, vtpost dicitur, partibus, necessitati pauperum sit à nobis prospiciendum: quis credat suo satis muneri facere, si cum posset & teneretur omnes explere partes, vnam tantum attingat; in qua etiam obeunda, multum deficiat? Vos non intratis, nec introeuntes finitis intrare. Quasi diceret Dominus:<sup>Math. 23.</sup> cum vtrumque præstandum esset, neutrum facitis. Et licet in introducendis aliis videamini vestram conferre indusuriam: vos tamen in hac parte ita deficitis, vt nihil restet quod præstetis. Quod illud spectat: *Omni habenti dabitur & abundabit: ei autem qui non habet, & quod videtur habere, auferetur ab eo:* Vnde sequitur: *& inutilem seruum eijcite in tenebras exteriores.* Nempe inutilis seruus qui quod debet non facit: & qui quod etiam facit, non bene facit.<sup>Ibid. 29.</sup>

## II. P V N C T V M.

**S**ED nisi pauper affectu sis, ex parte tantum necessitatibus pauperum prospicis: & qua etiam parte prospicis, multum deficies.

Pauperem affectu esse, perinde est, ac non affectum esse diuitiis. Sicut enim diues in Scripturis dicitur non is tantum qui diuitias possidet, sed qui vel cum affectu possidet vel possidere desiderat, vel non possidere metuit: sic pauper spiritu & affectu qui



Prou. 13. siue careat, siue abundet diuitiis, nullo earum affectu tenetur. Vnde est illud Sapientis: *Est quasi diues cum nihil habeat: & est quasi pauper cum in multis diuitiis sit.* Nisi tu autem sis ita pauper & nullo plane inordinato affectu circa diuitias mouearis, ex parte tantum necessitatibus pauperum prouidebis: Nam illa inordinata cordis affectio, si te omnino non impediat à largiendo aliquid, obstat tamen quò minùs tantum largiaris, quantum necesse est, seu quantum pauperis exigit præsens necessitas.

Vel enim simulabis te nescire, vel non posse, vel esse alios qui commodius possint: aut denique, te non teneri, licet esse possit præceptum quando videlicet satis apparet pauperum extrema indigentia. Tunc enim illud diuinum valet præceptum: *Ego precipio tibi ut aperiās manum fratri tuo egeno & pauperi qui tecum versatur in terra.* Id est, quem nosti pauperem. Alioquin, *si non paupersisti, occidisti*, ait sanctus Ambrosius, refertque Diuus Thomas, ubi de his expresse agit. Iam verò quid est quod tùm à dando te auocet nisi affectus deprauatus? Cum enim, ut supponimus, non ignores extremam illam pauperis necessitatem, cum probe possis illi succurrere, cum satis scias quanta inde lucra vel detrimenta importentur, prout debitum persolueris vel neglexeris, quid est quod illud negligas, nisi quia nolis? aut quid est quamobrem nolis nisi quia nimis illud amas quod esset dandum? Recte enim Diuus Augustinus: *Cum superflua terrena diliguntur, arctius adepta quam concupiscia constringunt: aliud est enim nolle incorporare quæ desunt, aliud iam incorporata diuellere.* Quod si dicas te nescire vnam extremam egeni necessitatem, vide quid dicas, & hinc vide fallaciam quam Dominus vocat diuitiarum: sic enim diuitiæ fallunt se amantes, sic inducunt illos in eam mentem ut sibi fingant se nescire quod sciunt, vel quod scire possunt, & quod nescire peccatum est. Quod apte Sapiens sic expressit: *Anima dolose errant in peccatis: Iusti autem misericordes sunt, & misereantur*, id est, qui non sincere ambulant, sibi fingunt non id esse peccatum quod appetunt: qui autem iusti sunt & sinceri nihil tale fingunt, sed quando exercenda est misericordia, tunc illam vere colunt & exercent.

Quod si etiam dicas te non semper posse, te tuas habere necessitates quibus prouideas, vide hic iterum quam sint fallaces tuæ diuitiæ seu diuitiarum cupiditates; Vide an quas dicis necessitates,



*Nisi pauper affectu sis, vix satis affectus eris in pauperes. 267*

sint meræ vanitates, & profusi sumptus; Vide nùm tibi quadret illud Prophetæ, quamque sit expauescendum: *In alis tuis inuentus* Ier. 2.  
*est sanguis pauperum & innocentum*; Id est, in laxis illis vestibus quæ ne deessent, illud pecuniarum exhaustum est quod multis alendis pauperibus sufficiebat & cuius defectu perierunt.

Aut si forte mauis in futuros & impendentes aduersos casus quod non largiris referuare, ac dum interim fame pauperes enecantur, tu vanas tuas sollicitudines quas mentito nomine vocas necessitates nutrias ac sustentas, an te tuo putabis solutum debito? Caue id putes, nam vel hoc solo nomine quo sunt superflua quæ tu referuas non sunt tua sed pauperum, quo sensu dixit sanctus Basiliius, & refert etiam Diuus Thomas loco suprà memorato: *Panis est famelici quem tu tenes: nudi tunica quam in conclauis conseruas: discalceati calceus qui penes te marcescit: indigentis argentum quod possides inhumatum.* Et horum radix malorum sola est cupiditas non repressa, solum illud quod non sis affectu pauper.

ATQVE vt etiam liberalius tecum agam, quam tu agas cum egenis: non immorabor diutius in his quæ à te omittuntur; nec vltra quæram an satis sit quod largiris, sed quali animo largiaris videamus: & quod est alterum propositionis caput, *quam multum in hac etiam parte deficias quam obire videris*, expendamus.

Nonne quod in largiendo præcipue commendatur, est, hilaris ac promptus animus, qui quod agit, libenter agat? Nonne sic expresse Scriptura; *Bono animo gloriam redde Deo: In omni dato hilarem fac vultum tuum. Qui miseretur, in hilaritate.* Ecclesi. 32. Rom. 12. 2. Cor. 9. *NON ex tristitia, aut ex necessitate, hilarem enim datorem diligit Deus.* Nonne quibus illa deest in tribuendo hilaritas multum illis deest in hoc ipso quod tribuunt? At responde quibus illa deest hilaritas nisi quibus ipsa deest de qua nobis hîc quaestio, *paupertas spiritus & affectus*? Nonne quanta est rei dandæ cupiditas, tanta est data tristitia; & quanta est ista maior tristitia, tanto est illa minor hilaritas quæ summa esse debuerat?

O quam verè sanctus Augustinus; *Plerumque fit à tristibus & à murmurantibus vt careant tadjo interpellantis, non vt reficiant discera indigentis. Si panem dederis tristis, & panem & meritum perdidisti.* In Ps. 42.  
O pauendam sententiam.



## III. PUNCTVM.

**H**INC igitur euidenter patet quod nisi pauper affectu fueris, vix satis affectus eris in pauperes: Vix satisfacies debito succurrendi pauperibus in extrema illorum necessitate: Vix illud fateberis debitum; Vix illam agnosces necessitatem, aut si quam forte agnoscis, dolebis te id scire quod ignorare non potes, & quidquid in illo dolore dones, donum ita detererur vt fructu suo careat. Hinc apte Sapiens: *Qui amat diuitias, fructum non capiet ex eis*, Nam vel amore, sibi eas reseruabit: vel amorem earum reseruans non nisi tristis dabit quidquid dederit: Quod vtrumque perinde est infructuosum. Vnde & Alius etiam opportune: *Nihil est iniquius*, inquit, *quam amare pecuniam, hic enim animam suam venalem habet, quoniam in vita sua projecit intima sua*. Quasi diceret, mauult pecuniam quam animæ salutem: pecuniā illā quam sibi seruat, sibi suam vendit & perdit animam, dum magis prospicit conseruandæ pecuniæ quàm seruandæ animæ. Qua profecto in re videtur omnem exuisse humanitatem & sine vllis misericordiæ visceribus crudelem vitam ducere.

Quod & Propheta, more suo, sic insigniter obuelauit: *Et dixit Ephraim; Diues effectus sum, inueni idolum mihi*: Nempe diuitias seu diuitiarum affectum quem vt idolum colit qui non est pauper affectu & velut quidam idololatra, quæ sunt Diuini cultus & salutis animæ, pene videtur abjicere.

Quamobrem, *Diuitie si affluant, nolite cor apponere*, si cor non apposueris, facile fluent è tuis manibus in manus pauperum; si vero consideraueris quam inaniter aliunde fluant, non minus facile persuadeberis cor illis tuum non apponere, ne tu cum illis effluas & pereas. Sic illa duo simul inter se conueniunt, *cor non apponere diuitiis, & diuitias libenter elargiri*, vt vtrumque sibi vicissim seruiat, & obsecundet. Non est videlicet diuitiis cor apponendum vt illas libenter largiaris: Si vero etiam libenter largitus fueris, sic discas cor non apponere: Quemadmodum dilectio facit precepta seruare, vt ait sanctus Augustinus, & precepta seruata faciunt dilectionem: sic de contemptu pecuniarum ad eleemosynas, & de eleemosynis ad contemptum pecuniarum sanctus Ioannes Chrysostomus: *Dans, inquit, eleemosynam sicut oportet dare, discit*

Eccles. 5.

Eccles. 10.

Osæ 12.

Ps. 61.

Tract. 82.  
In Ioan.



Nisi pauper affectu sis, vix satis affectus eris in pauperes. 269  
asperrari diuitias: Qui pecunias didicit aspernari, malorum radicem  
excidit: itaque non minus accipit quam præstat beneficium, non eo so- Hom. 36.  
lum quod debitum & retributio sit eleemosyna reposita, verum & quod ad Pop.  
anima sapiens & alta fiat & diues. Qui dat eleemosynam discit non  
admirari pecunias, neque aurum. Hac autem instructus mente maxi-  
mum in cælum ascendendi principium accepit, & innumeras conten-  
tionis & litis & inuidia & tristitia sustulit occasiones; Atque in  
vnum multa contrahens: Cum velit pauper fieri, sua purgat oculum  
anima. Quasi diceret, quod purgatus animæ oculus contulit ac-  
quirendæ paupertati: hoc acquisita paupertas refert oculo animæ  
magis ac magis semper purgando.

De his vide plura, Verbo *Eleemosyna*, in hac & sequenti parte.



H A C Hebdomada, quæ supersunt considerata  
ex Sermone Domini, referuntur ad septem Petitiones  
Orationis Dominicæ, ibidem expressas, quibus quia  
singula vitia quæ dicuntur Capitalia opponuntur:  
ex hac potissimum oppositione Veritates Practicæ  
deducentur.

FERIA SECUNDA.  
DE PRIMA PETITIONE  
ORATIONIS DOMINICÆ,  
CUI SUPERBIA  
OPPONITVR.

*Sanctificetur Nomen tuum.* Matth. 6. & Luc. 13.

VERITAS PRACTICA.

Primæ petitioni prima se opponit Superbia; Quod  
illa petit, hoc ista impetit.



270 FERIA 2. Hebd. 6. post Pent. Sanctificetur nomen tuum.

RATIO EST, Quia quod prima petitio petit, est, ut ante omnia Diuinum celebretur Nomen.

Atqui hoc prima impetit & expugnat superbia.

Ergo primæ petitioni prima se opponit: & quod illa recte petit, ista directe impetit. Unde profecto est ut quam sit damno-  
sa superbia, manifestius agnoscatur.

## I. PUNCTVM.

LUC. 13.

PROV. 26.

**I**N duobus Euangelij locis ac diuersis, ut putatur, tem-  
poribus, pronuntiata est hæc cœlestis & Diuina Oratio,  
quæ Domini seu Dominica nuncupatur. Primo quidem  
hic continuans suum sermonem Dominus, tùm vero post in-  
terrogatus de orandi modo, sic vbique nos idem edocet, *Cum  
oratis dicite, Pater noster qui es in cœlis, Sanctificetur nomen tuum.*  
Hæc est prima petitio de qua prius quam mediteris, Agnosce hic  
& venerare in Christo Domino tria illa notissima Diuinitatis at-  
tributa, quorum primum est Bonitas quæ in eo apparet quod ita  
particulatim & distincte nos docere voluerit quid esset orandum.  
Secundum est Sapientia quæ relucet in admirabili structura hu-  
ius orationis in qua & precatio bonorum, & deprecatio malorum  
tali ordine connectuntur, ut quæ sunt potiora, præcedant; & sic  
paucis omnia verbis comprehendantur, nihil ut desit petendum,  
quod non in aliqua petitionum includatur. Tertium est Potentia  
quam manifestè declarat, promittendo certum huic orationi ef-  
fectum, dummodo sincere, ex animo, & non fecte pronuntietur.  
Non enim omnes sincere orant, non omnes ex animo volunt  
quod ore postulant, aliud ore petunt, & aliud corde appetunt.  
*Septem nequitie sunt in corde viri*, ut ait Sapiens, id est septem  
capitalia vitia quæ septem petitionibus huius orationis Domi-  
nicæ sic opponuntur ut vel non sit pronuntianda oratio, vel de-  
ponendum vitium. O foelicem necessitatem deponendi vitij cum  
quo nec ipsa legitime possit oratio Dominica pronuntiari!

Ac primæ quidem petitioni primum sese opponit vitium, nem-  
pe superbia quæ hoc ipsum plane expugnat & impetit quod illa  
petit. Quid est enim quod prima petit petitio, quid est dicere,



quid est à Deo petere cum illi dicitur: *Sanctificetur nomen tuum*. Expende accurate, & disce illud esse quod primum est ex omnibus desiderandis optandum & petendum: nempe ut agnoscat Deus ab omnibus, ut ante omnia Diuinum celebretur nomen, ut de Deo omnes magnifice sentiant & loquantur: ut quàm sit sanctus, quàm bonus, quàm colendus omnibus innotescat, & reuera Eum omnes ita colant, & prædicent, *Tremiscant & paueant omnes Deum Danielis*, *Ipse est enim Deus viuens & æternus in sæcula.* Dan. 6.

Sic dicitur sanctificari nomen Dei, ut interpretatur sanctus Augustinus, quatenus Dei notitia talis habeatur ut non nisi sanctus prædicetur & nihil de illo nisi sanctum cogitetur & dicatur. Nihil denique sanctum in vnaquaque creatura putetur, nisi ab illo sanctitatem deriuat: ac proinde omnis omnium Sanctorum gloria in illum referatur. Addit vero Diuus Chrysostomus, sic perfecte sanctificari nomen Dei, si per sanctam nostram vitam agnoscat esse sanctus, si nos ita sancte viuimus, ut ex sanctitate vitæ nostræ agnoscant omnes gentes sanctum esse Deum nostrum, & eum vnum colendum. Sic fusiùs orabat Sapiens: *Sicut in conspectu eorum sanctificatus es in nobis, sic in conspectu nostro magnificaberis in eis, ut cognoscant te, sicut & nos cognouimus, quoniam non est Deus præter te Domine.* Ecclesi. 36. Hoc autem dicitur primum esse optandum & petendum, quia hic est finis noster, ut Deum reuerreamur & colamus: hæc eius gloria propter quam nos condidit: *Et omnem, inquit, qui inuocat nomen meum, in gloriam meam creauit eum, formauit eum, & feci eum.* Is. 43. Finis autem ante omnia primum est quod in mente & intentione habendum est ut ad illum cætera referantur. Nam ut ait sanctus Thomas, *Causarum adinuicem ordinatarum si prima subtrahatur, necesse est alias subtrahi. Prima autem est causa finalis:* Vnde & illud vulgare in Ethicis, *Finis cognitio, vitæ humane est ordinatio:* Sicut sagittarij, quem spectemus scopum habeamus. Cùm itaque sit ille scopus quò nos omniaque nostra dirigere cum Diuina Gratia debeamus: quid aptius quàm hoc primum petere, quam hoc primum exoptare, quam hoc primum & postremum cum Christo dicere; *Pater, clarifica Nomen tuum.* Ioan. 12.



## II. P V N C T V M.

**A**T QVI hoc prima impetit & expugnat superbia.  
 Primò quidem vt est, *Initium omnis peccati*, quemadmo-  
 dum dicit Sapiens, & sicut interpretatur Diuus Thomas in hoc  
 sensu quod in omni peccato peccator prætendat aliquam excel-  
 lentiam ex qua vel ad quam mouetur in peccatum. Est autem ta-  
 lis excellentiæ prætentio maxime propria superbiæ quæ proinde  
 dicitur causa & radix omnis peccati ex parte auersionis à Deo;  
 sicut cupiditas ex parte conuersionis ad Creaturas. Cum itaque  
 omnia in genere peccata, & vnumquodque in particulari obstat  
 quo minus sanctificetur nomen Domini quo à nobis modo sancti-  
 ficari debet; idcirco recte dicitur huic petitioni primam sese op-  
 ponere superbiæ quæ prima est in omni peccato, vnde & Tobias  
 filio: *Superbiam nunquam in tuo sensu aut in tuo verbo dominari per-*  
*mittas, in ipsa enim initium sumpsit omnis perditio.*

Deinde vero strictius considerata superbia vt est speciale pec-  
 catum, expugnat & impetit quod dictum est, de sanctificando  
 Dei nomine: quia cum sit inordinatus propriæ excellentiæ ap-  
 petitus, sic mouet hominem ad sui nominis celebrationem &  
 commendationem, vt primum id sit quod superbus desideret,  
 quod prætendat, quod pro fine habeat, & quod primum à Deo pe-  
 teret, si auderet: *Celebremus nomen nostrum: FACIAMVS nobis*  
*nomen. IN cælum conscendam: ascendam super altitudinem nubium,*  
*similis ero Altissimo.* Hi sunt proprii motus superbiæ qui nulla ha-  
 bita ratione sanctificandi Diuini nominis, vnum superbi quem  
 mouent hominis nomen & existimationem prætendunt euehere  
 & celebrare. Quod quidem non modo non est sanctificare & præ-  
 dicare nomen Domini, quod primum petebatur in oratione Do-  
 minica, sed è contra manifeste est sese opponere illi Diuino no-  
 mini prædicando, quatenus inordinate id prætenditur vel tan-  
 quam finis operum, vel in modo ardentiori expetendæ propriæ  
 gloriæ, vel ex alia denique circumstantia quæ ordinarie comitatur  
 hunc inordinatum propriæ excellentiæ appetitum: vnde præcla-  
 re Sapiens, *Initium superbiæ est, apostatare à Deo*, Id est, vt expli-  
 cat sanctus Thomas, hæc est prima superbiæ pars, deficere à Deo,  
 seu quod idem est, reuocare hominem à Deo celebrando & co-  
 lendo,

Ecclesi. 10.  
1. 2. q. 84.  
2.  
2. 2. q. 162.  
3. 7.

Tob. 4.

Gen. 11.  
1. Macch. 5.  
Is. 14.

Ecclesi. 10.  
2. 2. q. 162.  
3. 7.



Iendo, ad se potius celebrandum & colendum. O detestandam superbiam propter quam homini à Deo dicitur, *Cum sis homo, & exch. 28. non Deus, dedisti cor tuum quasi cor Dei!* Expende verba & expauesce.

### III. P V N C T V M.

**P** R I M A E ergo petitioni prima se opponit superbia, & quod illa petit, hoc ista impetit, Quatenus illa Diuinum ante omnia & in omnibus petit celebrari nomen, atque illi vni referri quæ debetur gloria: Contrà verò superbia de solo superbientis nomine & celebratione cogitet, moueatur, & omnia idcirco moueat. *Iuxta pascua sua adimpleti sunt & saturati sunt, & leuauerunt cor suum & obliui sunt mei.* Id est, Cum ego pascere eos, cum eis benefacerem, non Pastorem aut Benefactorem respexerunt, sed pascua, sed sua bona & dona quæ magis dilexerunt quam donantem, & suis naturalibus donis & bonis sic repleti & saturati sunt vt nihil aliud præter se commendandos & celebrandos cogitarint. *Frustra inflatus sensu carnis suæ, & non tenens caput ex quo totum corpus,* coloss. 2. Vide locum Apostoli & compungere quod non modo in indifferentibus & obuiis quibusque objectis se superbus respiciat & respiciendum velit magis quam Deum, sed in sanctioribus illis obseruantis & piis exercitationibus, quales sunt Oratio, Eleemosynæ, & Ieiunia; tùm vbi maxime Deus esset spectandus, minus sæpe attenditur, & vbi animus magis esset deprimendus, tùm magis exaltatur.

Vnde in antecedenti & consequenti sermonis texru Dominus, *Nesciat, inquit, sinistra tua quid faciat dextera tua. Cum oraueris, intra in cubiculum tuum, & clauso ostio ora Patrem tuum in abscondito. Cum ieiunas, unge caput tuum, & faciem tuam laua, ne videaris hominibus ieiunans, sed Patri tuo.* Quasi diceret, vnum Deum cura cui placeas, & humanam illam complacentiam quæ sese contrà ingerit prorsus abjicias. *Non quasi hominibus placentes, sed Deo qui* 1. Thess. 2. *probat corda nostra.*

Neque id tantùm initio operis præcauendum, sed in medio & extremo fine, Nam vt ait sanctus Gregorius, *Opera nostra, tribus modis, antiquus hostis insequitur, vt videlicet hoc quod rectum coram* 1. Mor. 38. *hominibus agitur, in interni Iudicis conspectu vitietur. Aliquando nam-*



274 FERIA 3. Hebd. 6. post Pent. *Adueniat regnum tuum.*

*que intentionem polluit; aliquando in ipsa actione se quasi in itinere opponit, ut cum per propositum mentis securior quisque egreditur, subjun-  
cto latenter vitio quasi ex insidiis perimatur. Aliquando vero nec inten-  
tionem vitiat, nec in itinere supplantat, sed opus bonum in fine illa-  
queat, quantoque vel à domo cordis, vel ab itinere operis longius recef-  
sisse se simulat, tanto ad decipiendum bonæ actionis terminum astutius  
expectat.*

Certe quando abessent cætera quæ tam multa sunt ad coercen-  
dam superbiam; ista consideratio plurimum valere debet, quod  
sic impetat & euertat illud primum omnium nobis à Christo pro-  
positum quod desideremus, quod petamus, quod impetremus;  
sicque fiat ut nihil petas, nihil profit oratio, & forte id tibi possit  
objici quod Apostolis: *Vsque modo non peristi quidquam in nomine*  
*Domini. N E nomini meo ascribatur victoria: Habeto illud Ioab fre-*  
*quens & familiare, ac vide in 2. parte Dominicam 5. post Pascha.*

Ioan. 16.

2. Reg. 11.



FERIA TERTIA.  
DE SECUNDA PETITIONE  
ORATIONIS DOMINICÆ,  
CUI AVARITIA  
OPPONITVR.

*Adueniat Regnum tuum. Matth. 6.*

VERITAS PRACTICA.

Qui terrena nimis desiderat, timet potius quàm re-  
uera desideret, ut adueniat regnum Dei.

SENSVS EST, Non tantum de desideriis rerum habenda-  
rum, sed vel maximè de affectu rei habitæ & possessæ qui



*Qui terrena nimis desiderat, timet potius quàm reuera, &c. 275*

*quanto est uehementior, tanto magis timere facit quàm optare aduentum illius regni quod petendum proponitur.*

**RATIO EST,** *Quia quisquis ex deprauatione affectus valde timet mortem, timet potius ne adueniat Regnum Dei, quàm reuera illud desideret.*

*Sed qui terrena nimis desiderat, aut qui suis nimis afficitur, valde timet mortem ex deprauatione sui affectus.*

*Ergo & magis timet ne adueniat Regnum Dei, quàm vere illud desideret; Quod quia valde est inordinatum, cauendum istud vitium unde est tanta inordinatio.*

#### I. P V N C T V M.

**T**RIPLEX hîc regnum intelligi posset; primum illud de quo dicitur, *Regnum Dei intra vos est.* Secundum de quo Luc. 17. passim Scripturæ; *Domini est regnum, & ipse dominabitur* Ps. 21. *Gentium;* Nempe vt vbique regnet pro sua voluntate & pro eo ac meretur. Tertium denique quò alia duo nos ducunt, est regnum cœleste & æternum quo in Beatis tam perfecte regnat quàm vult ipse regnare. *Possidete paratum vobis regnum:* Hoc est propriè Regnum quod petimus, *Vt adueniat.* Nempe vt eò aliquando perueniamus cum ipsi placuerit: Vel indicamus nos iam esse paratos, nos nihil in terris remorari, nos vnum Cœlum & cœlestia cogitare & concupiscere, *Expectantes beatam spem & aduentum gloria magni Dei & saluatoris nostri IESU Christi.* Sic enim ipse nos semper esse paratos voluit, velut seruos expectantes Dominum, quacumque hora veniret aut vocaret. *Et hoc gratissimi serui est,* inquit sanctus Chrysostomus, *Neque inharere presentibus, neque* Rom. 20. *magnum aliquid que videntur putare; sed ad Patrem semper urgeri, semperque in futura gestire: quod certe de optima oritur Conscientia, & mente terrenis omnibus exuta.*

Quæ postrema sancti Doctoris verba sunt valde notanda; sicut enim facile est nihil desideranti vel inordinate amanti in terris, desiderare quæ sursum sunt; sic valde difficile & rarum est vt qui terrena nimis amat, velit cœlestia. Atque hînc est quod huic petitioni directe opponitur illud vitium quod Auaritia seu nimius &



Serm. 196.  
de Temp.

inordinatus terrenorum affectus dicitur. Nam ut ait S. Augustinus: *Non solum auarus est qui rapit aliena, sed etiam qui cupide seruat sua*; Siue ergo plura desideret, siue sua nimis amet, Is certe timet potius ne adueniat illud regnum Dei quam verè illud desideret; quod cum sit tam alienum ab ea mente quam conformare debemus secundæ huic petitioni, profecto hinc patebit luculenter quam sit damnosus ille terrenorum affectus.

Ut autem liqueat manifestius quod asseritur, *Reformidari potius, quam desiderari regnum cœleste*, ab Auaro aut à quouis qui terrenis inordinate afficitur, sic procedit Ratio: Qui ex deprauatione affectus nimis timet mortem, timet potius quam desideret illud regnum. Nam cum morti necessariò subeundæ coniunctum sit illud regnum, neque aliter euenire possit tale regnum quam per mortem & per iacturam rei quam nimis amat: Certe qui nimis timet mortem ex illo prauo affectu, timet simul & illud regnum. Si naturalis tantum esset amor vitæ ex quo timeret mortem, dici forte posset non timeri propterea regni illius aduentum nisi ex quadam concomitantia & consecutione quæ non esset vitiosa: sed quando timor est ex deprauato rei terrenæ affectu, timor ille mortis includit simul quodammodo timorem regni, quia quandam habet repugnantiam cum illo regno, peribit illa res quæ amatur, si adueniat regnum: & quia non vult sibi rem talem perire, idcirco non vult etiam tale regnum & talem viuendi statum in quo re amata priuetur.

Sap. 2.

*Et nescierunt Sacramento Dei*, ait Sapiens, *neque mercedem sperauerunt Iustitiæ, nec iudicauerunt honorem animarum sanctarum*, Id est, non cogitauerunt, non expenderunt quale esset illud regnum cœlorum, quali honore & gaudio beatificarentur animæ sanctæ: qui deprauatis sunt affectibus, hæc non cogitant, hæc non curant, hæc negligunt quodammodo præ suis amoribus, & malent priuari cœlestibus, ne terrenis priuarentur. *Euerterunt sensum suum, & declinauerunt oculos suos, ut non viderent cælum neque recordarentur iudiciorum iustorum*. Ne sic de aliis hæc cogites, quia tibi bonam eorum partem applies.

Dan. 13.

## II. P V N C T V M.

**S**ED qui terrena nimis desiderat, aut qui suis nimis afficitur, valde timet mortem ex deprauatione sui affectus, Id est, præter natu-



*Qui terrena nimis desiderat, timet potius quam reuera, &c. 277.*

ralem quem habere posset timorem mortis ex naturali affectu vitæ; sic timet mortem ex illo deprauato affectu, vt licet eam naturaliter ex amore vitæ non timeret, timeret tamen ex amore rei quam inordinate amat. Nam hæc est inordinati affectus poena vt quantum quis aliquid inordinate amat, tantum timeat illo priuari; & quia mors est priuatio rei illius amata, idcirco singulariter hoc respectu mors ab eo timetur: *O mors quam amara est memoria tua hominī pacem habenti in substantiis suis!* Aptè hic enim quod supra sanctus Augustinus: *Arctius adepta quam concupita constringunt: aliud est nolle incorporare quæ desunt, aliud iam incorporata diuellere.* Notanda certe verba quibus & conformia sunt quæ in libro Iob referuntur, *Diuitias quas deuorauit, euomet: & de ventre illius extrahet eas Deus.* Id est; quantus est dolor corporis quando per vim & violentiam extrahuntur de ventre quæ sumpta sunt alimenta: sic plane dolet animus, sic horret, sic formidat quando quod sibi incorporauit, extrahendum est ab inuito & renitente. *Deos meos quos mihi feci, tulistis; & dicitis, quid mihi est!* Expende singula & contremisce.

*Ecclesi. 41.*

*Ep. 43.*

*Iob. 20.*

*Iud. 18.*

### III. PUNCTVM.

**Q**VI terrena igitur nimis desiderat, timet potius quam reuera desideret vt adueniat regnum Dei. Timet enim priuationem rei desideratæ vel possessæ, quæ cum repugnet regno cœlorum possidendo, timet simul ne adueniat illud regnum; Et vel omit-tenda est hæc secunda petitio, vel fallacia committenda, vel certe deprauatus affectus corrigendus. *Emundate manus, peccatores: & purificate Corda, duplices animo.*

*Iac. 4.*

Hinc opportune in consequenti sermonis textu Dominus, *Nolite, inquit, thesaurizare vobis thesauros in terra, vbi arugo & tineæ domolitur, & vbi fures effodiunt & furantur. Thesaurizate autem vobis thesauros in cœlo, vbi nec arugo nec tineæ domolitur, & vbi fures nec effodiunt nec furantur. Vbi enim est thesaurus tuus, ibi est & cor tuum.*

*Matth. 6.*

Expende singula ex quibus varia purificandi affectus à terrenis motiua & media desumunt sancti Patres. Vnus modo sufficiat sanctus Augustinus, *Non est, inquit, cor mundum, quod in terra volutatur, sordescit enim quod inferiori miscetur naturæ.* Et alibi, *Fru-*



278 FERIA 4. Hebd. 6. post Pent. Fiat Voluntas tua sicut, &c.

mentum tuum times ponere in terra, & cor tuum perdis in terra? Lena cor  
tuum in caelum ne putrescat in terra. Atque in eundem sensum ex-  
plicat illum Psalmi sexagesimi secundi versiculum: *Introibunt in*  
*inferiora terrae: tradentur in manus gladij.* Rursumque in alium  
*An. Ps. 103.* Psalmum, ut ostendat quanto sint in periculo qui terrena sa-  
piunt, illud affert ex Genesi dictum serpenti, *Terram comedes*  
*cunctis diebus vite tuae,* Et subdit: *Vbi dictum est Draconi, terram*  
*manducabis, dictum est prauaricatori, terra es, & in terram ibis. Cibus*  
*serpentis esse non vis, noli esse terra. Corpus quod geris terra est, sed tu*  
*noli esse terra: si non sapis terrena, non es terra, si non es terra, non*  
*manducaris à serpente cui cibus datus est terra.*

Quomodo denique sit talis corrigendus affectus, Audi Eundem  
admonentem: *sic ista terrena diligitis, ut subiecta diligite, ut famu-*  
*lantia diligite, ut munera Amici, ut beneficia Domini, ut arrham Sponsi.*

*Es. 44.*

*2. Pet. 2.*

Alioquin vere quod Propheta dixit, *Amantissima eorum non pro-*  
*derunt eis.* Imo & multum nocebunt: *Cor exercitatum auaritia ha-*  
*bentes, maledictionis filij, derelinquentes rectam viam, errauerunt.*

Vide in 2. parte, FERIA 4. Cinerum.



## FERIA QVARTA.

### DE TERTIA PETITIONE ORATIONIS DOMINICAE: ET DE IRA QVAE EST ILLI OPPOSITA.

*Fiat Voluntas tua, sicut in caelo, & in terra. Matth. 6.*

#### VERITAS PRACTICA.

Nihil Iracundi minus volunt, quàm quod magis pa-  
ter Deum velle.



Nil iracundi minus volunt, quàm quod magis patet, &c. 279

RATIO EST, Quia nihil iracundi minus volunt quàm quod sentiunt sine remedio malum.

Sed nihil magis patet Deum velle quàm quod est sine remedio malum.

Ergo nihil iracundi minus volunt quàm quod magis patet Deum velle : unde manifeste patebit quam sit ira opposita huic tertie petitioni, & quàm prepterea diligenter sit reprimenda, ne nobis orantibus contradicamus.

### L. P V N C T V M.

**P**RIA hîc apte simul conueniunt consideratione digna. Primum est petitionis huius cum præcedenti connexio; Quid enim aptius ad regnum cœleste promerendum quàm si fiat Dei voluntas? Nam qui fecerit voluntatem Patris mei qui in cœlis est, ait Dominus, ipse intrabit in regnum cœ-  
lorum. Matth. 7.

Secundum est ipsa in se considerata petitio, quid iustius quàm ut à nobis Diuina fiat voluntas? Nam præterquàm quod est regula nostræ voluntatis, nonne seruorum & filiorum est Domini seu Patris sui voluntatem adimplere? Omnia quacumque præceperit Dominus noster rex, libenter exequemur serui tui. OMNIA quacumque præcepisti mihi, faciam, pater. Sic serui loquuntur Domino, sic Filius Patri. 2. Reg. 15.  
Tobie 5.

Tertium denique est, præscriptus ille modus faciendæ in terra Dei voluntatis, Sicut in cœlo fit, Cur enim minus à nobis fieret quam à Beatis? An quia liberi sumus qua libertate possumus illi contradicere? Absit ut libertatem sic demus in occasionem carnis: Quin potius, quasi liberi & non quasi velamen habentes malitiæ, libertatem, Sed sicut serui Dei. ET sicut fuerit voluntas in cœlo, sic fiat. Sic semper sentiendum & dicendum esset cum Iuda Macchabæo. Gal. 5.  
1. Pet. 2.  
1. Macch. 3

Sed contra obstat Iracundia. Nihil enim æque pugnat cum Diuina voluntate quam hoc vitium, sicut nihil æque pugnat cum ira quam Diuina voluntas. Hæc sibi aduersantur secumque pugnant, non ut contrarium contrario, quemadmodum cetera vitia contraria sunt Diuinæ voluntati, sed ut contradictorium contra-



280 FERIA 4. Hebd. 6. post Pent. Fiat voluntas tua sicut, &c.

dictorio vel vt negatiuum positiuo : Quæ sunt oppositionis genera grauiora.

Hinc nata Veritas modo expendenda, *Quod nihil Iracundi minus volunt quam quod magis patet Deum velle.* Et ratio in promptu est quia nihil illi minus volunt quàm quod sentiunt sine remedio malum. Malum quidem nolunt vnde irascuntur, sed si malo esset remedium, forte adhiberent & sic minus irascerentur, aut facilius sedarentur. At cum se in aduersis ita oppressos vident vt nullus sit remedio locus, cum iactura est irreparabilis, cum insanabilis plaga, cum morbus desperatus, cum denique nullum effugium; tum illos videas efferari, tum excandescere tum indicare nihil sibi minus gratum & volitum quam tale genus aduersitatis! *Vtinam mortui essemus in Aegypto: Vtinam pereamus: vtinam periissemus inter fratres nostros.* Nonne sic sapius commoueris.

Nam 14.  
& 20.

## II. PUNCTVM.

**S**ED nihil magis patet Deum velle quàm quod est sine remedio malum.

Ecclesi. 11.

Deut. 3.

Ecclesi. 38.

1862.

Nullum quidem est poenæ malum quod non Diuina fiat voluntate. *Bona & mala, inquit Sapiens, vita & mors, paupertas & honestas à Deo sunt:* sed tamen illud malum quod est sine remedio, magis asseueranter Diuina fieri voluntate dicendum est, quia sic & absolute, & firmiter est ordinatum, vt aliter fieri nequeat. *Sufficit tibi: nequaquam ultra loquaris de hac re, ad me.* Sic Deus loquitur de suis absolutis dec etis, quæ tùm dicuntur absoluta, vbi de malis agitur, quando nullum restat remedium. Nam si adhibendo remedio via esset: non ita dici posset esse absoluta voluntas de tali malo, quantum scilicet ad eius durationem: Imo forte vellet Deus vt quod superest remedium non negligas, sicut expresse ait Sapiens: *Fili in tua infirmitate non despicias teipsum, sed ora Dominum, & ipse curabit te. Da locum Medico: etenim illum Dominus creauit, & non discedat à te quia opera eius sunt necessaria.*

De solo itaque illo malo quod curari & euitari non potest dici debet, magis patere quod Deus illud velit, quia non potest aliter fieri: non potest cogitari quod aliter velit Deus: frustra & temerè vires humanæ contenderent Diuinum peruertere ordinem. Vnde Idem Sapiens eodem quo supra capite, postquam dixit tan-

tisper



*Nil iracundi minus volunt, quàm quod magis patet, &c. 281*

trisper lugendum esse mortuum, sic sapienter monet non esse propterea producendam tristitiam: *Neque enim, inquit, est conuersio, & huic nihil proderis, & teipsum pessimabis*: Quasi diceret, ratum fixumque est de mortuo, non reuocabitur tuis ad vitam lachrymis, frustra illum, diutius ploras, nihil illum iuuant isti flebiles luctus, tibi autem obsunt, quatenus absolutæ Dei voluntati videris contraire. *Quid adhuc queritur? voluntati enim eius quis resistit? O homo tu qui es qui respondeas Deo?* *Rom. 9.*

### III. P V N C T V M.

**N** I H I L igitur Iracundi minus volunt quàm quod magis patet Deum velle, Cum nihil illi minus velint quàm illud quod sentiunt sine remedio malum, & quo ita irascuntur vt iræ suæ modum non teneant. Et tamen illud est malum quod maxime & indubitanter Diuina voluntate factum est, & infectum esse nequit. *Nolite rebelles esse contra Dominum*; sic contra rebellant Iracundi, sic contra Dominum, sic contra eius voluntatem, sic contra seipsos commouentur. Quà certe commotione nihil stultius, nihil iniquius. Quid enim stultius quam velle quod fieri nullo modo potest, aut quam nolle quod ipse petas? Tu petis vt fiat Dei voluntas, & contra irasceris quia fit aut quia facta est? Quid est hoc nisi petere ne fiat, quod ipse petis? Auderesne Deo dicere, auderesne Deum orare ne fiat eius Voluntas? Cur ergo audes irasci quando magis innotescit tibi eius Voluntas?

Quid porro iniquius quàm in absoluta Dei decreta insurgere? Quam in Sapientiam & Iustitiam eius contendere? Quàm ratum & fixum eius regendi mundi ordinem velle immutare? *Numquid Iob. 39. qui contendit cum Deo, tam facile conquiescit? Vtique qui arguit Deum, debet respondere ei.* Sic Deus fuisse apud Iobum sibi contradicentibus.

Cum vero huius contradicentis iræ multa sint & grauissima detrimenta, tum etiam apta remedia referuntur à Domino in consequenti Sermonis discursu, ab his Verbis: *Lucerna corporis tui est oculus tuus*, ad hæc vsque, *Nemo potest duobus Dominis seruire, aut enim vnum odio habebit, & alterum diligit: aut vnum sustinebit & alterum contemnet*: sic enim Deo irasci & contendere nihil aliud est quàm se ab eius dominio subtrahere.



*I. Reg. 12.* Habes & illustre exemplum in Dauide qui cum agrotantem puerum valde lugeret, lugere destitit mortuum, quia videlicet mortuo non erat remedium quod sperabat agrotanti. Sed nihil illustrius & potentius in hac materia quam quod Christus Dominus dixit & fecit prout declarat sanctus Augustinus: Pater, inquit, *In Ps. 32.* si fieri potest, transeat à me calix iste, HAEC humana voluntas erat, proprium aliquid & tanquam priuatum volens. Sed quia recto corde voluit esse hominem, ut quidquid in illo aliquantum curuum esset, ad illum dirigeret qui semper est rectus: Verum non quod ego volo, ait, sed quod tu Pater. Sed quid possit mali velle Christus? Quid aliud posset velle quam Pater? Quorum una est diuinitas non potest esse dispar voluntas. Sed ex persona hominis transfigurans in se suos quos in se transfigurauit cum ait: esurini & dedistis mihi manducare: ostendit quandam hominis propriam voluntatem, ostendit & correxit te. Ecce vide te, inquit, in me, quia potes aliquid proprium velle, ut aliud Deus velit. Conceditur hoc humana fragilitati, conceditur humana infirmitati, aliquid proprium velle; Difficile est ut non tibi contingat, sed statim cogita qui sit supra te: Illum supra te, te infra illum: Illum Creatorem, te creaturam: Illum Dominum, te seruum: Illum omnipotentem, te infirmum; corrigens te, subjugansque voluntati eius ac dicens, verum non quod ego volo, sed quod tu vis Pater.

Vide plura passim de Ira, & de conformanda nostra voluntate cum diuina.



## FERIA QUINTA.

### DE QUARTA PETITIONE ORATIONIS DOMINICAE, ET DE VITIO INTEMPERANTIAE ILLI OPPOSITO.

Panem nostrum quotidianum da nobis hodie.  
Luc. II. Matth. 6.



*Ipsa Intemperantis oratio qua panem orat, intemperans est, &c. 283*

## VERITAS PRACTICA.

*Ipsa Intemperantis oratio qua panem orat, intemperans est & temeraria.*

*RATIO EST, Quia illa oratio dicitur suo modo intemperans & temeraria quæ plura malo fine petit, quàm petenda proponantur à Domino.*

*Sed talis est Intemperantis oratio qua panem orat.*

*Ergo & ipsa est suo modo intemperans & temeraria, proindeque Intemperanti vel non orandum, vel potius serio cogitandum de Intemperantia corrigenda.*

### I. PUNCTVM.

**T**AMETSI non desunt Interpretes qui per panem hic alimenta spiritualia intelligant, quale est vel sanctissimum Sacramentum, vel orationis donum, aut verbi Dei pabulum, lectionis sacre nutrimentum & similia; tamen communior & verior sententia est, temporalia seu corporalia peti quantum necessitas humanæ vitæ potest illa exigere. Petuntur autem à Deo ut intelligamus & ab eo omnia provenire & ad eum omnia referenda esse. Nec enim *nobis vivimus nec manducamus, sed Deo*, inquit Apostolus. Solius verò panis fit mentio ut sciamus non ad voluptatem sed ad meram necessitatem, corporalia esse petenda; Et hic panis dicitur quotidianus, idest vulgaris & obuius, atque in vnum duntaxat hodiernum diem expectitur, quasi non ultra diem victuri essemus; neque de hac vita plures ad dies extendenda cogitaremus.

Super substantialis porro ab vno Evangelista nuncupatur, quod super substantiam nostram adueniat & adiciatur; vel quod superet reliquas corporeas substantias, hac in re, quod vitam conferuat humanam; vel certe quod quidquid corporale sumimus velut aliquid supernaturale & spiritale sit sumendum: cum aliter corpus nostrum non sit nutriendum quàm ut seruiat spiritui.

Nn ij.



ad Dei cultum & aeternam animæ salutem. O præclaram temperantiæ seruandæ formam siue in substantia siue in modo siue in fine! Vnde apte sanctus Chrysostomus Christum Dominum ait velle, *Nos undique accinctos esse, ac quibusdam veluti pennis fidei instructos, semper ad cælestia subuolare, nec amplius indulgere naturæ quàm quod nobis ipse necessitatis vsus exposcit.*

Sed quàm longe ab hac mente Intemperans! Quàm longe alius à Christi Domini fine ac intentione viuit, non modo dum ventri seruit, sed dum etiam Deum orat! Nam ipsa eius oratio quæ panem petit, tota est intemperans & plane temeraria. Quod quidem facile demonstrat Ratio quæ primo dicitur illam esse orationem intemperantem & temerariam quæ plura petit & malo fine quàm quæ petenda proponuntur à Christo Domino. Sicut enim proprie dicitur homo Intemperans qui violatis temperantiæ legibus excedit in cibo vel potu: Sic proportionem quadam, oratio quæ illum excessum cibi & potus petit, dici posset intemperans quia materiam intemperantiæ continet: nec alio fine funditur quam vt intemperanter vsurpetur quod petitur. Sic superba diceretur oratio vel alio infecta vitio cuius materiam complecteretur & praxim exercendam. Sic oratio Adoniæ filij Dauidis qua Sunamitidem à patre derelictam rogauit sibi in uxorem, iudicata est à Salomone fratre, ambitiosa & fraudulenta; quia sic reipsa regnum Israeliticum ambiebat. Sic oratio Balaami Prophetæ impudica simul & auara & impia dicitur, quia his erat implicita vitii quæ vel ipse orans patrabat vel ab Israelitis patranda consulebat. Cur non pari modo intemperans illa erit oratio quæ intemperantiæ vitium redolebit? An non talis eorum fuit precatio qui neglecto manna quo vescabantur in deserto petierunt sibi carnes ad vescendum? Nonne porro talis oratio temeraria & scelestæ dicenda est quæ vel à Deo non petenda petit, vel non aliter petit quam vt ipse Deus offendatur? Nonne est ille impius qui à Scriptura dicitur, *accedere ad Dominum duplici corde, velut hypocrita & malignus cuius cor plenum est dolo & fallacia?*

3. Reg. 2.

Num. 31.

2. Pet. 2.

Apo. 2.

Num. 11.

Eccles. 2.

## II. PUNCTVM.

**S**ED talis est Intemperantis oratio quæ panem orat.

**C**um enim Intemperans non sit contentus iis quæ sub no-



*Ipsa Intemperantis oratio qua panem orat, intemperans est, &c. 285*

mine panis petenda Dominus voluit, sed alia multò plura sibi velit indulgeri quibus intemperanter viuit: interrogandus est, an dùm orat panem, comprehendat hæc superflua quibus vitur, vel non comprehendat. Si primum ait, manifeste reddit orationem suam intemperantem prout supra descripta est; nam orando comprehendit suæ Intemperantiæ materiam, & eo fine comprehendit atque orat, vt vitio seruiat. Quid amplius desiderari possit ad vitium orationi suæ inducendum? *Canes impudentissimi, 1p. 56. nescierunt saturitatem!*

Quod si secundum respondet, si se ait non comprehendere orando, quæ manducando absumet, vrgendus est & inquirendus vndenam illa expectet & à quo habeat quæ à Deo non petit nec expectat? An putat esse aliquid ad vitæ vsum quod à Deo non sit, quod à Deo non sit petendum & expectandum? Dicet forte, iam id sibi esse à Deo datum, iam concessis vti, iam sibi subministrata omnia quibus perfruatur. At verè nonne etiam tibi panis erat datus? Cur panem petis quem habes, aut cur non alia simul petis esculenta quæ non minus abundant quàm ipse panis? An existimas, à Deo quidem panem & alia quædam leuiora esse petenda: non autem exquisita illa quibus naturæ indulgetur? An ignoras idcirco peti panem non quod tibi desit, sed vt agnoscas à Deo esse quem habes: ac similiter quæcumque possides sic à Deo petenda esse vel cognoscenda sic à Deo prouenire? *E cælo ista possideo. 2. Macch. OMNE Datum optimum descendens à patre luminum. Quid habes 7. Iac. 1. quod non accepisti? Sic loquuntur, sic scribunt, sic sentiunt Sancti 1. Cor. 4. quique.*

Quod si datis & acceptis tibi licere putas ad arbitrium, & ad libidinem vti, non ad rationis & virtutis præscriptum, vide quantis te implices impietatum nodis! Vide sic excusari rerum omnium creaturarum abusum: vide sic vitia vniuersa purgari à vitio & crimine: sic Diuina mandata eludi: sic condemnari Diuinam iustitiam; sic pares cælis inferos facere: sic nullum fore peccatorem, nullum superbum, nullum avarum, nullum intemperantem. Nam hi vtuntur rebus suis, vtuntur creaturis, vtuntur Donis Dei, sic sese prouocant ad eorum vsum quia sic sibi data putant; *Venite, inquit, & fruamur bonis quæ sunt, & utamur creatura sap. 27. tanquam in iuuentute celeriter. Vino pretioso & unguentis nos impleamus; Multaque alia in hunc sensum multiplicant apud Sapien-*



tem, quæ si tu probas, certe impius es. Probas verò si creatis vtendum pro arbitrio putas; ac denique illud putas, si orando panem, aliud oras quam quod nomine panis debet intelligi, vel si non credis orandum quidquid aliud intelligas.

## III. P V N C T V M.

**I**PSA ergo Intemperantis oratio quæ panem orat, intemperans est & temeraria & vitiosa & blasphemica & execrabilis. Nam vel orat Intemperans illa omnia quibus intemperanter vtetur, vel aliqua tantum orat & non omnia quibus abutetur. Quod vt umque quam sit impium & capitale quis non videt? Oratio eius fiat in peccatum, fiant dies eius pauci. NE quis profanus vt Esau qui propter unam escam, vendidit primitiua sua. OPTIMUM est Gratia stabilire eor, non escis, quæ non profuerunt ambulanti in eis.

Ps. 108.

Hebr. 12.

Ibid. 13.

Dan. 5.

Cum in sacris vasis Rex Baltazar & alij Babylonij largius biberent & epularentur liberius, In eadem hora, inquit Scriptura, apparuerunt digiti quasi manus scribentis, Mane, Thecel, Pharez. Nimirum abuti sacris ad Intemperantiam suam, id valde iniuriosum est Deo, & perniciosum. Quid autem sacratius quàm ipsa ore Dominico consecrata oratio? Et quis abusus manifestior, quam sic illam proferre ad vitium? Quorum Deus venter est, & gloria in confusione ipsorum qui terrena sapiunt.

Phil. 3.

Cum verò multa contra hoc vitium passim in Scripturis & Patribus: tum quæ consequenter in Sermone suo Dominus habet, reuolui possunt, ab his Eius Verbis: Ideo dico vobis, ne solliciti sitis animæ vestre quid manducetis: Et quæ reliquo continentur capite; Ex quibus tria præcipue ad Veritatis praxim referes.

Luc. 21.

Primum quod non omnis quidem sollicitudo de cibis vetatur, sed ea tantum quæ nimia est & inordinata: Attendite vobis, ne forte grauentur corda vestra in crapula & ebrietate, & curis huius vite.

Ps. 43.

Thren. 5.

Secundum quod nimia tunc censetur sollicitudo quando nos implicat, quando nos distrahit ab oratione, quando magis applicat animum ad illa bona corporalia postulanda, quàm ad cœlestia, aut quàm ad debitum & temperatum eorum vsum. Conglutinatus est in terra venter noster. AEGYPTO dedimus manum & Assyriis vt saturaremur pane.



*Sicut pauci dimittunt suis debitoribus, ita & paucis, &c.* 287

Tertium denique, Non sufficit hîc dicere, te nihil cogitare de his & sentire, dum oras: nam si te nosti deditum gulæ nec illi studeas temperandæ, non oras panem quo animo est orandus, nempe animo paucis contento; animo probe instituto in omnibus: animo ad omnia æque parato: animo denique perquam *Scienti & abundare & satiari, & esurire, & penuriam pati.*

*Phil. 4.*

*Vtere quasi homo frugi his quæ tibi apponuntur, ne cum manducas multum, odio habearis. Cessa prior, causâ disciplinæ, & noli nimis esse ne forte offendas. Tortura viro infrunito.* Id est, dolor corporis & animi viro intemperanti, viro nescienti vel nolenti scire modum temperandæ vitæ. Vix aliud est quod magis ignorent homines, quàm temperate vivere, quod tamen præcipue sciendum esset siue ad corporis siue ad animi valetudinem. Hinc illud Leuitici, *Vt sciatis quid comedere & quid respuere debeatis.* Itaque sancti Petri, *Curam omnem subinferentes, ministrare in virtutis scientiam, In scientia autem abstinentiam.*

*Ecclesi. 31.*

*Leuit. 11.*

*Obsecro te piissime Deus meus, præserua me à curis huius vitæ, ne nimis implicer: à multis necessitatibus corporis, ne voluptate capiar.* Sic perge orare fusius cum Authore libri de Imitatione Christi. Et vide in 1. parte, Dominica 4. Aduentus, vbi hæc Veritas exhibetur:

*1. 3. c. 28.*

*Sibi, non Domino viuit, qui temperatè non viuit.*



## FERIA SEXTA.

### DE QVINTA PETITIONE

ORATIONIS DOMINICAE: CVI

OPPONITVR INVIDIA, ODIVM,

ET SIMILIA VITIA.

*Et dimitte nobis debita nostra, sicut & nos dimittimus debitoribus nostris.* Matth. 6.



## VERITAS PRACTICA.

Sicut pauci dimittunt suis debitoribus, ita & paucis  
sua dimittuntur debita.

*RATIO* Consequentis est manifesta, cum aliter nulli dimittantur  
debita nisi qui dimiserit suis debitoribus. Quam pauci vero  
sint qui dimittant suis, hæc demonstrat ratiocinatio.

*NISI* dimittant sicut Deus ipsis dimittit, non dimittunt.

Sed pauci sunt qui sic dimittant sicut Deus ipsis dimittit.

Ergo nec dimittunt: Ergo nec ipsis etiam post dimittetur. Quod  
cum sit damnosissimum, hæc accuratè discenda est dimittendi  
forma quam Deus servat & servandam præscribit.

## I. P V N C T V M.

**Q**UÆ præcesserunt quatuor Petitiones, totæ sunt in exo-  
randis bonis: Quæ tres verò sequuntur, in deprecandis ma-  
lis sunt positæ: cumque inter omnia mala præcipue nu-  
merentur peccata, idcirco ante omnia petimus iis liberari. Di-  
cuntur autem debita quod peccando debitores simus Divinæ Iu-  
stitiæ, à qua si absolui & dimitti volumus, dimittenda sunt etiam  
quæ nobis ab aliis deberentur. Hanc singulariter adiecit condi-  
tionem Dominus: sicut & nos dimittimus debitoribus nostris, quam  
& paulo post repetens sic declarat apertius. Si enim dimiseritis ho-  
minibus peccata eorum, dimittet à vobis Pater vester cælestis delicta  
vestra. Si autem non dimiseritis hominibus, nec Pater vester dimittet  
vobis peccata vestra. Quod certe Bonitatis Divinæ insigne est ar-  
gumentum; sic enim in nostra potestate futurum de nobis iudicium  
ponit, ut ait sanctus Ioannes Chrysostomus: Quid amabilius? Sic  
suaviter & fortiter obligat atque adstringit homines ad mutuam  
inter se reconciliationem ineundam; Quid desiderabilius? Sic  
multiplicis in proximos exercendæ misericordiæ materiam nobis  
exhibet, vnde & parisi meriti seges amplissima nobis in æternum  
comparetur; Quid gloriosius?

Et



Et tamen miseri Conditionem non admittimus ! malumus nobis nostra non dimitti debita quàm Debitoribus nostris dimittere ! aut vellemus potius Diuinam Iustitiam nihil iuris in nos exigere, quàm nos erga proximum de prætento iure nostro vel tantillum decedere ! Tanta est odij, Inuidiæ, raucoris, & similium contra Caritatem vitiorum in animis nostris obstinatio, vt propterea, *Pauci sint admodum quibus sua dimittuntur debita, quia pauci sunt & valde rari qui suis dimittant debitoribus.*

Quæ certe Consideratio præ multis quæ in hac materia possent institui, videtur efficacissima, quia damnum inde emergens sic euidenter proponit, vt remedium malo suggerat eadem prorsus ratione quâ malum detegit. Hæc est autem Ratio qua demonstratur paucos & raros esse qui vere parcant & suas remittant iniurias. Nam nisi remittant sicut sibi remitti volunt à Deo, & sicut reipsa Deus nobis remittit, non sunt dicendi remittere, non sunt existimandi condonare. Nimis aperta vox est Domini quàm vt in dubium reuocetur : *Nonne oportuit & te misereri conserui tui, sicut* *Matth. 18. 3.*  
*& ego tui misertus sum ?* Neque enim Illud sicut similitudinis est quemadmodum dicitur, *Estote vos perfecti, SICVT, & pater* *ibid. 5.*  
*vester celestis perfectus est :* sed est æqualitatis vt ad eum prorsus modum quo nobis peccata dimittit sic dimittamus aliis, quantum in nobis erit. Nam hoc est expresse & signanter quod illi seruo nequam exprobrat, hoc est quod ait *oportuit*, Id est, necessarium fuit, ad hoc ipsum te obligauit cum tui misertus sum.

Et hoc quidem ex ipsa rei natura tam manifestum est vt etiam si nihil expresse dixisset Dominus, tamen ipsa exhibita misericordia similem exhibendam imperaret. Quæ est enim comparatio serui ad Dominum, & conserui ad conseruum ? Quæ comparatio centum denariorum ad decem millia talenta ? Vnde si seruo dimissa sunt hæc ingentia debita, quanto magis seruus dimittere debuit sua socio leuissima ? Quod & modus loquendi valde confirmat : *Nonne oportuit*, quasi diceret, nonne id clarum & apertum est inde sequi obligationem paris misericordiæ faciendæ ? Atque vt etiam omnis tolleretur loquendi ambiguitas, verba factis probauit, & reipsa seruum puniuit quod non eandem reddidisset gratiam Debitori quam à Creditore receperat. Quod certe diuina Iustitia non exigeret nisi hoc peccatum esset, neque peccatum hoc esset nisi esset obligatio reddendæ similis gratiæ.



Sed quā illum poenā puniuit? neque enim genus poenæ vacat mysterio, nempe eodem se plane modo gerit erga Immisericordem seruum quo ipse in conseruum se gesserat. Seruus imitari Dominum noluit in misericordia: Seruum imitabitur Dominus in immisericordia, in iudicio & in Iustitia. Et licet seruo iam condonata essent debita, licet Deus dimissa semel peccata non reuocet: tamen non misereri aliis sicut Deus nostri miseretur, tale est peccatum, vt qui hoc peccet, perinde puniatur ac si præterita eius peccata non fuissent dimissa, non tantum propter Ingratitudinem quæ committitur post acceptum beneficium; sed propter formam præstiti beneficij, vt ait expresse sanctus Thomas: Cum enim forma beneficij accepti sit condonatio peccati, hæc forma seu ratio dati beneficij ita obligat ad similem gratiam conferendam vt qui desit isti obligationi, supra modum sit ingratus, & talis ingratitude reatum virtualiter vt aiunt, contineat ante dimissi peccati.

Potestne aliquid dici aut fieri grauius & manifestius ad indicandam Propositionem, quam & Apostolus disertis semel ac iterum verbis comprobatur; *Donantes inuicem sicut & Deus in Christo donauit vobis. DONANTES vobismetipsis si quis aduersus aliquem habet querelam: sicut & Dominus donauit vobis, ita & vos. O SICUT DONAVIT VOBIS*, Expende.

## II. P V N C T V M.

**S**ED pauci sunt qui sic dimittant sicut ipsis Deus dimittit. Primo enim Deus statim atque rogatur parcit: *Conuertimini ad me, & conuertar ad vos. IMPIETAS impij non nocebit ei, in quacumque die conuersus fuerit.* Sed & præuenit rogantem suis gratiis quibus ad rogandam veniam excitat. *Ecce ego, ecce ego ad gentem quæ non inuocabat nomen meum. Expandi manus meas tota die ad populum incredulum qui graditur in via non bona post cogitationes suas. ET dixi cum fecisset hæc omnia, Ad me reuertere.* Sic nos oporteret statim misereri, sic statim iræ dandus locus esset vt discederet, sic omni modo cauendum, ne sol occidat super iracundiam nostram. At verò quàm rari & quàm pauci sic mitescunt! quam multi contra perpetes inimicitias gerunt! *Quid agemus nos in die Iudicij,* ait sanctus Hieronymus, *super quorum iram non vnus diei, sed tantorum annorum sol testis occubuit!*



Deinde quoties ex animo rogatur Deus, semper dimittit, & numquam verè poenitenti negat veniam: *Misericordia & veritas tua semper susceperunt me. DIVES in omnes qui invocant eum.* Quod præcipue verum est in dimittendis culpis, cum alia quæ petuntur bona, sæpe ob iustas causas vel differat vel non concedat, sed verè poenitentem numquam à se repellit, etiamsi decies, centies aut millies iam ipsi alia condonarit: *In æternum misericordia eius.* Atque hoc ipsum similiter ut præstaremus nonne aperte Christus, cum quærentem Petrum quoties in se peccanti fratri parceret? an usque septies? sic commonuit, *Non dico tibi usque septies, sed usque septuagies septies.* Id est, quoties omnino in te peccabit.

Itane verò solent homines? Itane tu vel quinquies aut rarius etiam in te peccanti dimittis? Nonne hoc vnum omnes vel maxime sibi opponunt ne parcant, quia non semel sed multoties in idem recidit? Quis est hic & laudabimus eum qui decies se offendentem tam benigne recipiat quam ipse à Deo receptus est post centenam culpam?

Tertio denique, quando se nobis rogantibus reconciliat Deus, sic plene omnem ex animo dimittit offensionem, ut perinde novis ac continuis paratus sit nos prosequi & cumulare beneficiis, velut si à nobis offensus numquam esset; quin sæpe *abyssus abyssum* invocat; *abyssus miseriæ abyssum misericordiæ: & ubi abundavit delictum, ibi superabundet gratia.* Quod ut proxime imitemur, tot Scripturæ nos admonent quot passim clamant, *Vincendum esse in*

At quotus quisque est qui sic ex animo parcat? qui sic iniurias benefactis remuneret? Nonne id omnibus satis superque videtur si offendentem non oderint, si male illi nolint, si malum malo non reddant? Nonne hoc sæpe allegas; non teneor illi loqui, non benefacere, nisi fortè in extrema necessitate, non illum admittere in meum consortium, non in primam denique gratiam reuocare? Nonne addis quod omnes sic sentiunt, quod sic omnes loquuntur & ipsi quoque religiosi sic vivunt! O quàm vere quàm tremende Sapiens: *Abcondunt odium labia mendacia*, sic dicunt se non odisse proximum, & sic sæpe mentiuntur & in peiori vivunt periculo quàm si aperte odissent; nam saltem peccatum non absconderent, saltem se nossent, & sui forte puderet status: sed quando absconditum est peccatum, *Manet vulnus in pectore*, inquit



292 FERIA 6. Hebd. 6. post Pent. Et dimitte nobis debita nostra, &c.

sanctus Chrysostomus, & curando vulnere subtrahitur manus. Vellesne sic Deum tibi non loqui, tibi non beneficiare? tibi non aliter reconciliari?

### III. PUNCTVM.

**S**IC ergo pauci suis dimittunt debitoribus, ac proinde sic paucis sua dimittuntur debita, Quia rata est & irrevocabilis sententia Domini; Sic Pater meus cælestis faciet vobis, si non remiseritis unusquisque fratri suo de cordibus vestris, Sicut videlicet remittit unicuique Deus. Quod & in sequenti textu Sermonis in monte habiti tam fuisse graviterque inculcat, nihil ut luculentius & efficacius videatur exprimere. Nolite, inquit, iudicare & non iudicabimini: nolite condemnare & non condemnabimini; Dimittite & dimittimini. In quo enim Iudicio iudicaveritis, iudicabimini: & in qua mensura mensuraveritis, remetietur vobis. Siue enim consideretur quid iam nobiscum fecerit Deus, condonando nobis nostra delicta; siue quid facturus sit nobis quotidie peccantibus, perinde valet ad Veritatis proposita declarationem, cum ex utraque differentia temporis siue præteriti siue futuri, hoc unum & idem intelligatur quod est in praxi servandum, non alium esse modum remittendi debita Debitoribus nostris, quam illum qui à Deo servatur in remittendis nostris debitis. Cumque supersint adhuc multa nobis à Deo remittenda debita, servemus tam diligenter illum miserendi proximo modum quam studiose volumus nobiscum misericorditer à Deo agi. Caueamus ab iis vitiis quæ nos ab illo servando modo reuocant. Non spectemus quid alij dicant aut faciant, quia revera pauci sunt qui recte in hac materia sentiant, & rari sunt qui non sibi blandius palpent & naturæ corruptæ assentiantur quam oporteret pro suæ salutis cura.

Cogitemus potius quid Christus Dominus, quid Apostoli, quid sancti Patres, de hac re dixerint & fecerint. Expendamus non strictim non perfunctorie, sed religiose sed Christianè sed sincere, Illud appositum à Christo Domino, sicut, quod est tantiponderis & valoris ut non aliter omnino putemus nos posse remittere aliis debita quam sicut iam nostra dimisit Deus: Nec spectemus aliter nobis ea quæ quotidie contrahimus esse dimittenda quam sicut dimiserimus. Hoc est pactum nobis cum Deo initum, nec



*Sicut pauci dimittunt suis debitoribus, ita & paucis, &c.* 293

ulla alia sententia, inquit sanctus Augustinus, sic oramus ut pacif- De Sermo,  
Dom. in  
monte.  
camur cum Domino: in qua petitione si mentimur, orationis totius nul-  
lus erit fructus, nulla delictorum venia, nulla remissio. Hoc ipsum est  
quod petimus, nobis ut non aliter parcat Deus quam sicut parci-  
mus. Vnde si, ut par est, non parcis, si non ex animo, si non om-  
nino; sic tibi ne parcat Deus, à Deo petis dum oras; *Dimitte nobis* A Sermone  
67. ad  
Serm. 72.  
*sicut dimittimus. Qui sic petit*, inquit sanctus Chrysologus, & de-  
bita non relaxat, iste se etiam per quod orat, accusat. Tantum sibi do-  
nari postulat & remitti quantum ipse donat & remittit: Deum taliter  
inuitat ad pactum. Sic dicendo, homo, indulgentia modum mensuram-  
que venia tu tibi dedisti, qui à Domino tantum tibi petis dimitti, quan-  
tum dimiseris ipse conseruo. Homo, penes te est potestas venia, in te est  
indulgentia ius, tu tibi remissionis auctor es constitutus. Gratis petis ve-  
niam qui tibi in alio indulgere contemnis! De supplicantis pectore, ve-  
nia fons emanat, & ad veniam refluit quidquid pietatis exuberat, &  
effundit in alterum quando indulget sibi tantum, quantum alteri con-  
donauerit.

Atque hæc ad Verbum sanctus ille Pater, variis sermonibus  
in orationem Dominicam, quæ ad Veritatem elucidandam de  
modo dimittendi præcipue faciunt; tum vero ex Eodem pauca  
hæc habe quæ ad eius Praxim plurimum mouent. Homo, si sine Serm. 67.  
peccato esse non potes & vis semper dimitti tibi totum, dimitte semper:  
quantum vis dimitti tibi, dimitte tantum: quoties vis dimitti tibi, toties  
tu demitte: Imo quia vis totum dimitti tibi, totum dimitte. Homo intel-  
lige quia remittendo aliis, tu tibi veniam dedisti.

Vide in 1. parte, die 16. Ianuarij. In 2. parte, tota Hebdomada 3.  
Quadragesimæ. In 3. parte. Feria 6. Hebdom. 3. post Pentec. In 4.  
parte. Feria 5. Hebdom. 16. & Dominica 21.



DE SEXTA PETITIONE  
ORATIONIS DOMINICAE; CUI  
REPUGNAT IMPUDICITIA.

*Et ne nos inducas in tentationem.* Matth. 6.



VERITAS PRACTICA.

Hanc ad cæteras impudentiam Impudicus adjicit, vt Deum orando irrideat.

*RATIO EST, Quia is Deum orando irridet qui hoc ipsum libens volensque facit quod ne à Deo fiat, Deum orat. Sed Impudicus dum se inducit in tentationem, hoc ipsum libens volensque facit, quod ne à Deo fiat, Deum orat. Ergo is Deum orando irridet. Quod quàm sit impudens & cauendum, satis patet.*

I. P V N C T V M.



**S**IC de veteribus & præteritis eluendis culpis satagendum est, vt nouæ ne contrahantur non minus diligenter sit curandum. Quamobrem aptè post præcedentem, hæc sequitur Petitio, quâ ne inducamur in tentationem, id est ne in peccatum incidamus, Deum precamur. Nec enim possumus sine Dei auxilio peccatum euitare, quod vt intelligamus, petimus illud auxilium: & sub nomine tentationis declinandæ petimus, quia ordinarie loquendo, non statim & derepente peccatum committitur, sed pedelentim & progressu quodam qui dicitur tentatio seu sollicitatio in malum morale: quod est peccatum. Cui proinde tentationi resistendum cum Gratia sicut ipsi peccato; Nam nisi resistas, induceris in tentationem, induci autem est consentire & peccare.

*Serm. 60.* Dicitur verò Deus nos inducere in tentationem, cum permittit nos ei consentire, denegando eas gratias quas si habuissimus, forte restitissimus. *Tentare dicitur*, inquit sanctus Chrysologus; *cum contumaciter euntes ad tentationem, laqueos derelinquit: sic Adam tentatoris incurrit insidias, dum sui præcepta deserit Conditoris: Sicque intelligendus est Dñus Iacobus, dum ait: Nemo cum tentatur dicat, quoniam à Deo tentatur, Deus enim intentator malorum est, Id est, per se posituè neminem inducit in laqueum & in tentationem.*



*Vnusquisque autem tentatur à propria Concupiscentia, deinde Concupiscentia cum conceperit, parit peccatum, peccatum autem generat mortem.*

Quod licet de omni Concupiscentia seu de quolibet peccato dici possit, tamen id verius est & frequentius usurpatur de Impudicitia cui maxime proprium est tentari & tentationi succumbere prout infra declaratur. Quamobrem hoc vitium inter alia, sextæ huic Petitioni repugnat, & Impudicus vel non orandum, vel orantes, *hanc ad ceteras impudentiam adjicient ut orando Deum irrideant.* Quæ sane Consideratio multum valere potest ad pudorem conciliandum. Quæ verò affertur Ratio ad propositam Veritatem declarandam, tam plana est & aperta ut suis solis constet & probetur loquendi terminis. Quis enim dubitet quin is Deum orando irrideat qui hoc ipsum libens volensque facit quod ne à Deo fiat, Deum orat? Vel enim orando credit Deum non latere quid habeat in animo, quid velit facere, quidue sit reuera factururus; vel hoc ipsum latere. Si primum, Nonne aperta est irrisio? Nonne aperta est simulatio siue orationis contradictio quæ se idem nolle simul indicat & idem velle? Nolle scilicet quod orat non fieri, velle tamen hoc ipsum, quia hoc idem actu & re ipsa vult facere? *Va duplici corde & labiis scelestis!* Hoc in oculis Dei cogitare! Hoc in eius conspectu efficere, nec reuereri vultum eius, nec Majestatem pauere; nec Iustitiam reformidare! O Impudentiam.

Quod si alterum dicat, si latere Deum putet quod maligno gerit animo, & tamen oret quasi scientem & probe noscentem omnia, nonne & aliud genus est Irrisionis non minus execrandum? Quasi si orando palpet, quasi si eius oratio sit Dei assentatio, quasi si fingenda laus sit ut Deum laudet! *Ego ego sum, ego vidi, dicit Dominus.* *Ecclesi. 2.*

## II. PUNCTVM.

**S**ED Impudicus dum se inducit in tentationem, hoc ipsum libens volensque facit, quod ne à Deo fiat, Deum orat.

Dicitur Impudicus præ ceteris se inducere in tentationem, tribus de causis. Prima, qui hoc vitium præcipue tentatione peragitur, id est progressu quodam & gradatim ab vno ad aliud: nam cum sit aperte peccatum & valde foedum, repugnat ipsa ra-



296 Sabbato Hebdomadae 6. post Pentecostem. Et ne nos inducas in tentationem.

tio, quapropter non ita subito Tentator repraesentat ipsam vitij foeditatem, nec prius ad prauum actum sollicitat quin ante cogitationem impuram praeferat, ac primo quidem leuem & subitanee, tum diuturniorem & firmiorem; deinde à cogitatione ad auditum procedit, ab auditu ad visum, à visu ad colloquium, à colloquio ad tactum, ceteraque infanda quibus ille vecors irretitur qui à Sapiente describitur, *Quasi bos ductus ad victimam, & quasi agnus lasciuens, & ignorans quod ad vincula stultus trahatur, donec transfigat sagitta iecur eius, velut si avis festinet ad laqueum, & nescit quod de periculo animae illius agitur.*

Prou. 7.

L. 1. de Cain  
& Abel.  
c. 5.

Deinde, sic impudice tentari & sollicitari, frequentissimum est inter omnia vitia, vnde aptè sanctus Ambrosius: *Senus criminum stimulus libido est, quae numquam manere quietum patitur affectum, nocte feruet, die anhelat, de somno excitat, à negotio abducit, à ratione reuocat; Et quae plura prosequitur.*

Prou. 6.

Denique proclive est admodum, tentationi cedere, & dum ignem Impudici suo sinu fouent, ab igne comburi & consumi. Sic enim Sapiens: *Numquid potest homo abscondere ignem in sinu suo, ut vestimenta illius non ardeant? aut ambulare super prunas, ut non comburantur plantae eius?*

Ecclesi. 2.

Quamobrem euidentissimum est quàm facile Impudicus praeteris sese ipse inducat in tentationem, vnde & aliud non minus aperte patet, quod illum ipsum libens volensque facit quod ne à Deo fiat; Deum orat. Quid enim orat dum Deum orat ne se inducat in tentationem? Nonne hoc ipsum est quod ille facit dum impuros legit libros, dum arridet obscenis verbis, dum assuescit profanis congressibus, Dum omnia denique quae desiderant oculi eius non negat eis, nec prohibet cor suum quin omni voluptate fruatur, & oblectet se in his quae preparauerit? Nonne sunt illa quae inducunt in tentationem? Nonne sunt illa de quibus dicitur,

3. Reg. 11. Certissime auertent corda vestra?

### III. P V N C T V M.

**H**A NC igitur ad ceteras, impudentiam impudicus adjicit, ut Deum orando irrideat, Quandoquidem in illam ipsam tentationem sese ultro inducit, in quam ne à Deo induceretur, Deum orabat; Quod non minus irridere ac tentare Deum est quàm



quàm si quis temerè sese præcipitem aut in aquas aut in ignem projiceret, rogaretque Deum se vt ab aquis & igne liberaret. Quid diceret de hoc infano homine nisi quia insanit & mente captus est? At vero si sit sanæ mentis, si sui probè compos, nec tamen desistat à crimine, criminique suam adiungat orationem qua liberari petat à præcipitio in quod se inducit, quid nisi execrandam dicas & blasphemam huiusmodi orationem? *Non tentabis Dominum Deum tuum: Aut si tentare audes, audes & irridere, audes & prouocare eius patientiam, Vt qui spernit spernatur, & qui* Deut. 6. Math. 4. 1s. 30. *contemnit contemnatur.*

Sic expresse Apostolus Impudicis: *Nolite errare, Deus non irridetur. Quæ enim seminauerit homo, hæc & metet, quoniam qui seminat in carne sua, de carne & metet corruptionem.* Quasi diceret: Nolite errare vel in apparenti bono quod putatis facere, dum oratis: vel in vanis excusationibus quibus vosmetipfos fallitis: sic enim quantum in vobis est, Deum irridetis, Deum impudenter contemnitis. Sed non ita Deus irridetur, non sic se finet contemni; quin potius illi præcipue Illusores illudentur, & quæ in carne inceperint, in carne perficientur, ex illis ipsis concupiscentiis quibus indulserunt, flagellum fiet quo cadantur, *Erunt quasi clauis in oculis, & lancea in lateribus, illi hostes interni quos edomare neglexerunt.* Gal. 6. Num. 23.

Sic & grauiter sanctus Petrus Chrysologus in hanc sextam petitionem: *Hoc petere, inquit, miles multis modis cogitur, ne fragilitas plus ausa & de se tumore præsumens, nec virium suarum modum colligens in conflictu male cauta succumbat, deinde offensus Deus tradat tentationibus quos relinquit.* Vide itaque ne hic erres, vide ne dicas te nihil horum cogitare dum oras, vide ne tibi persuadeas serio & vere te orare ne inducaris in tentationem, nisi tu ipse simul velis abduci ab his quæ te in eam inducunt. *Auferes malum de medio tui.* Deut. 13. 1s. 57. *DECLINATE de semita, Auferte offendicula de via populi mei.* *Dissolue colligationes impietatis, solue fasciculos deprimentes. QVIS miserabitur Incantatori à serpente percusso, & omnibus qui appropriant bestiis? Et sic qui comitatur cum viro iniquo, & obuolutus est in peccatis eius.* ibid. 58. Ecclesi. 12.

Vide in 1. parte, Fer. 6. Hebdom. 4. Aduentus, vbi hæc habetur Veritas:



298 *Sabbato Hebd. 6. post Pent. Et ne nos inducas in tentationem.*

Securior est Castitatis victoria fugiendo, quàm pugando.

Et Sabbato Hebdom. 6. post Epiphaniam.

Hæc sponsæ fides est, vt sicut neminem præter Sponsum velit diligere, ita velit à nullo diligi.

Item in hac 3. parte, tota pene Hebdomada 5. Et alibi passim, vbi de tentationibus, & de Castitate. Ac præsertim in 2. parte, Dominica 1. Quadragesimæ.

Si Tentatorem permiseris ingredi, non se permittet egredi.

Facilius ejicitur quàm excluditur.







# DOMINICA

## SEPTIMA POST PENTECOSTEN.

DE SEPTIMA PETITIONE  
ORATIONIS DOMINICAE, CUI  
ACEDIA SEU PIGRITIA  
OPPOSITUR.

*Sed libera nos à malo. Matth. 6.*

ET DE EVANGELICA LECTIONE:

*Non potest arbor mala bonos fructus facere, omnis  
arbor quæ non facit fructum bonum, excidetur.  
Matth. 7.*

VERITAS PRACTICA.

*Vult & non vult Piger. Prov. 13.*

SENSVS EST, tam de malo à quo petimus in Oratione Dominica liberari, quam de bono ad quod in Evangelica lectione prouocamur. Sic enim vtrumque vult & non vult piger, vt tamen absolute & simpliciter nolle potius quam velle liberari à malo, aut facere bene dicendus sit: vnde patet manifestè quam sit directe oppositum septimæ petitioni & Euangelio septimum hoc vitium quod Acedia seu pigritia & negligentia dicitur.



300 Dominica 7. post Pent. Non potest arbor malas, &c.

RATIO autem cur volens & non volens piger dicatur potius absolute nolle quam velle, hæc est inter alias, quod qui non adhibet media necessaria quæ posset adhibere ad finem aliquem obtinendum, non vult simpliciter & absolute illum finem, licet dicatur & videatur velle.

Sed piger siue acediosus & negligens non adhibet media necessaria quæ posset adhibere ut liberetur à malo, & faciat bonum ad quod tenetur.

Ergo simpliciter & absolute potius nolle dicendus est quam velle, licet perinde dicatur velle ac non velle; Quod certe quam dammandum sit Acediæ vitium euidenter declarabit.

#### I. PUNCTVM.



1. Tim. 2.

NON est distinctè & apertè malum explicatum à quo in postrema petitione Orationis Dominicæ liberari petimus, ut facilius intelligamus sub hoc generali nomine *Mali*, omne malum contineri quod aduersatur salutis animæ, perfectioni status, & tranquillitati vitæ, quale est quodcumque peccatum committendum, quæcumque aduersitas aut prosperitas eò nos inducens, quicumque tandem hostium vel visibilibus vel invisibilibus metus, unde damnum aliquod & nocumentum possimus accipere, ut auertat illud Deus & ab eo nos liberet, hoc est quod paucis hîc Verbis petimus; & quod abundantius orandum suadet Apostolus, dum ait, *Obsecro igitur primum omnium fieri obsecrationes, orationes, postulationes, gratiarum actiones pro omnibus hominibus, pro Regibus, & omnibus qui in sublimitate sunt, ut quietam & tranquillam vitam agamus, in omni pietate & castitate.* Sic dum in hodierno Euangelio commendatur Bonum faciendum, non aliter determinatur illud bonum quàm nomine *fructus arboris*, ut intelligatur illud esse omne bonum quod unicuique faciendum est in suo statu. Sicut enim alius est fructus cerasi & alius pruni, pomi & pyri, cæterarumque terræ arborum; sic plane aliud est bonum ab Ecclesiastico, seu Religioso; & aliud à laico & seculari faciendum; sicut longe di-



uerfa est eorum Condicio. Aliud diues, aliud pauper tenetur facere. Sanis & ægrotis sua sunt diuerfa bona facienda. Senili aliud & aliud iuuenili ætati competit. *Vnicuique*, ait Apostolus, sicut 1. Cor. 7. *diuisit Dominus: Vnumquemque sicut vocauit Dominus, ita ambulet & sicut in omnibus Ecclesiis doceo, vnusquisque in qua vocatione vocatus est, in ea permaneat. Vnusquisque in quo vocatus est, in hoc permaneat apud Deum*, Id est, in hoc sit assiduus, in hoc se constanter exerceat, in hoc præcipue Deo seruiat, hoc vnum agat quod est proprium suæ vocationi;

Hi sunt enim fructus à quibus quisque cognoscitur, nùm bona vel mala sit arbor. Hæc est Diuina voluntas quæ in regnum cælorum introducit, dicente hîc Domino: *Non omnis qui dicit mihi, Domine, Domine, intrabit in regnum cælorum; sed qui facit voluntatem Patris mei qui in cælis est, ipse intrabit in regnum cælorum.* Matth. 7.

Verùm hæc est Acediæ seu pigritiæ propria quædam & specialis malitia vt quem inuaserit & occupet, non sinat eum velle aut liberari à malo quo premitur, aut facere bonum quod debet in suo statu. *Vult & non vult piger*, inquit Sapiens, videtur velle quia sic orat sic statuit sic loquitur, sed absolute non vult.

Ratio fusiori consideratione perpendenda est, quàm fermone exponenda, tum quia satis est euident, tum quia proponitur alia Veritas ex hodierno Euangelio pluribus enarranda. Sic itaque paucis declaratur quod licet hic piger & acediosus dicatur velle sicut non velle, dicendus tamen est proprie & reipsa non velle: nam Voluntas quæ dicitur efficax & quæ sola proprie est voluntas, in hoc talis esse agnoscitur, & ab ea voluntate distinguitur quæ non est proprie voluntas sed velleitas tantum & complacentia quædam, vt expresse ait sanctus Thomas, in hoc inquam distinguitur quod operi necessario non parcat, quod nihil agendum negligat, quod denique omnia illa quæ sunt ad finem intentum necessaria & possibilia media tam verè adhibeat quam vere vult illum finem. Vnde hæc vsitatissima in Scholis effata: *Volitio finis, volitio est mediorum ad finem: & nolitio mediorum, nolitio est finis.* 1. p. q. 19. a. 6. 1. 2. q. 8. a. 2.

*Vis sanus fieri?* Aiebat Christus Dominus paralytico, *Surge tolle grabatum tuum, & ambula*; Quasi diceret, Apparebit, vtrum reuera velis, si surgas & tollas grabatum tuum, nam hæc sunt media quæ tibi ordino & præscribo ad sanitatem recuperandam: Sicque reipsa surgens indicauit se velle & sic sanatus est. E con-



tra vero Illi qui vocati fuerant ad nuptias licet fingerent se velle  
*Marth. 22.* ire nisi occuparentur, dicuntur omnino noluisse: *Et nolebant,*  
 inquit; *venire:* Quia non adhibebant media ordinata. O quam  
*2. Tim. 2.* multi tales, quam multi sic seipsos decipiunt dum se putant velle  
 quod reuera nolunt, aut etiam nolle quod volunt. *Cognovit Do-*  
*minus qui sunt eius.* Vide infra in hac parte, Feria 2. Hebdomadæ  
 12. Et in 4. parte, Feria 5. Hebdom. 28. & Feria 2. Hebdom. 27.

## II. P V N C T V M.

**S**ED piger siue acediosus & negligens non adhibet media necessaria  
 quæ posset adhibere, ut liberetur à malo, & faciat bonum ad quod  
 tenetur.

In hoc enim est proprie acedia & pigritia ut quod est officij  
 particularis, & debiti persoluendi non expleat; timet laborem,  
 tadio rei afficitur, alia omnia facit, mira causatur & excusat,  
 rem in dies procrastinat, fingit impossibilitatem, aut nimiam  
*Prov. 22.* difficultatem: *Dicit piger: leo est foris, in medio platearum occidendus*  
*Ibid. 26.* *sum.* Et rursus idem Sapiens, *Dicit piger: leo est in via & leena*  
*in itineribus: sicut ostium vertitur in cardine suo, ita piger in lectulo suo.*  
 Quasi diceret de omni pigro quod de eo dicit qui stertens in lecto  
 suo, non surgit; non adhibet media sine quibus res non confici-  
 tur: & in eo cognoscitur esse piger quod non omnem adhibeat  
 operam quæ est opportuna & necessaria fini quem videtur præ-  
 tendere.

Quod & ibidem variis inculcat loquendi modis: *Abscondit piger*  
*Ibid. 19.* *manum suam sub ascella, nec ad os suum applicat eam.* PROPTER frigus  
*Ibid. 20.* *piger arare nolit, PER agrum hominis pigri transiit, & ecce totum*  
*Ib. 24.* *repleuerant vrtice.* Quibus diuersis locutionibus hoc vnum intendit  
 exprimere, in quo quis agnoscat esse piger & negligens, nem-  
 pe in defectu laboris necessarij adhibendi. Nonne ex hac nota te  
 cognosces? Nonne ex hoc defectu tuam inspicias negligentiam?  
*Ibid. 6.* Nonne labori parcis & operæ? *Vsquequò piger dormies? Quando*  
*consurges è somno tuo?*

## III. P V N C T V M.

**S**IC ergo vult, & non vult piger, ut simpliciter & absolute nolit aut  
 liberari à malo, sicut videtur petere, aut facere bonum sicut se simu-



lat velle: Quia hoc ipso quò piger est non adhibet mediâ opportuna ad vtrumque necessaria. De nostro enim, ait sanctus Hilarius, beata illa aternitas promerenda, præstandumque est aliquid ex proprio, ut bonum velimus, malum omne vitemus, totoque affectu præceptis cælestibus obtemperemus, ac talibus officiis cogniti Deo simus. Notanda hæc postrema verba, quasi diceret, sic reuera cognoscemur velle. Nam hoc est cognosci à Deo quod tale reuera est & non fictæ, sic ergo cognoscemur à Deo velle, cum reipsa volemus; & tùm reipsa volemus cum id præstabimus quod ex parte nostra præstandum est. Vt è contra qui hoc non agunt, non cognoscuntur à Deo velle, quidquid petant quidquid orent; quia coram Deo & reipsa non est velle aliquid quando non id facis sine quo illud non potes assequi.

Sic apte sanctus Hieronymus: *Delectant premia cum pollicentur, In Prono-  
deterrent certamina cum iubentur: sic volunt & nolunt; finem appe-  
tunt, non tamen amplectuntur media.* Sic varia quæ habetur lectio  
horum Sapientis verborum, *Vult & non vult piger*, Rem plane  
confirmat. Septuaginta namque legunt, *In desideriis est omnis pi-  
ger, seu otiosus aut non operans*, Nam Græcè est *ἄργος*, & senius *Esius in  
Pron. 13.*  
est, qui non operatur quantum debet operari non est dicendus  
in vera esse voluntate, sed in quibusdam desideriis quæ videntur  
voluntas & non sunt. Quod & Hebræa sic enuntiant, *Concupif-  
cens & non, anima pigri.* Id est concupiscit & non consequitur ani-  
ma pigri quod desiderauit, quia fugit laborem sine quo desidera-  
ta non habentur. Denique se ipse Sapiens sic explanat: *Desideria  
occidunt pigrum: noluerunt enim quidquam manus eius operari: tota die  
concupiscit & desiderat.* Quasi dicat, suis ipse piger desideriis obrui-  
tur, tam multa quotidie profert ut vel ipsa enecetur multitudine;  
vel potius, cum ipse solis desideriis inefficacibus sit contentus,  
hinc certe perit & occiditur, quia non illa sufficiunt ad vitam  
spiritualem sustentandam & æternam promerendam; Vel de-  
nique, cum piger totus sit in suis illis voluendis ac reuoluendis  
desideriis, neque quidquam actu efficiat, videtur esse quasi sine  
anima, videtur quasi non viuere, videtur quasi occisus, quia sine  
vlla est vera voluntate. Quantum ad id spectat quod concu-  
piscit, videtur velle quia concupiscit, sed non vult quia nolue-  
runt manus eius operari, quod est proprie nolle: sic autem nolle  
quid aliud est quam voluntatem & animam & vitam sibi eripere.



Ezech. 15.

O numquam satis deplorandam Inertiam! Quæ spes salutis Inerti & desidioſo cum nec ipsam salutem velit! *Fili hominis quid fiet de ligno vitis?* Quando scilicet est præcisum & aridum? Ecce igni datum est in escam, utramque partem eius consumpsit ignis, & medietas eius redacta est in favillam; Numquid utile erit ad opus? Etiam cum esset integrum, non erat aptum ad opus, quanto magis cum illud ignis deuorauerit & combusserit, nihil ex eo fiet operis? Hæc est arbor quæ non facit fructum bonum, quæ propterea excidetur, & in ignem mittetur.

Et ne tibi palpes, quasi nihil tibi hinc sit timendum, quasi non illa sis arbor excidenda, perge in sequenti Consideratione te melius nosse.

*Alia Veritas Practica, ex eodem hodierno  
Euangelio.*

Quà ratione fit ut plures dici possint malæ quam bonæ arbores; eadem prorsus fiet, ni caueas, ut mala potius quam bona sis arbor.

*RATIO EST, Quòd idcirco plures dici possint malæ quam bonæ arbores quia cum bonum sit ex integra causa, malum autem ex quouis defectu, facilius est in pluribus reperiri defectum quàm integram causam.*

*Sed in te hæc ratio valet, in te facilius reperitur defectus ex quo est malum, quàm integra causa quæ est necessaria ut bonum esse possit.*

*Ergo quà ratione fit ut plures dici possint malæ quàm bonæ arbores: eadem prorsus fiet, in caueas, ut mala potius quàm bona sis arbor. Quamobrem in id diligenter inuigilandum.*

*I. P V N C T V M.*

**N**AM pridem ab Antiquis illis Philosophis dictum erat, hominem esse velut inuersam arborem, cuius radix sursum erecta esset ac velut in cœlo fixa, quod inde suam traheret originem, atque inde producendis operum fructibus aptum



aptum & conuenientem hauriret succum. Et vero sicut steriles & infrugiferae sunt quædam arbores, quædam vero fecundæ & vberes, ita plane ex hominibus, sic alij boni & alij mali sunt ut vnusquisque in particulari bona vel mala dici possit arbor. *Aut facite arborem bonam, & fructum eius bonum, dicebat Dominus; aut facite arborem malam, & fructum eius malum: siquidem ex fructu arbor cognoscitur.* *HOC præceptum est, inquit sanctus Augustinus, ut simus arbores bonæ; Illud vero facite arborem malam, monitio est ut caueamus; nec putemus si mali simus, bona opera habere: prius enim est mutandus homo ut opera mutantur.* *Matth. 12.*

Quàm sit autem malæ timendum arbori, Id est, homini non ferenti fructum bonum satis patet, satisque fateberis: sed an tibi sit timendum quasi malæ arbori, non sic forte agnoscis. At certe saltem non debes præsumere te tam certo esse bonam arborem, aut sic semper fore, ut sine vlllo timore sis, cum nemo hominum id certo sciat: meritoque sit vnicuique timendum in illa ignorantia & incertitudine: Vnde apte Apostolus cuidam te sanctiori; *Noli altum sapere sed time. Si enim naturalibus ramis, Id est* *Rom. 11.* *Iudæis, non pepercit, ne forte nec tibi parcat. Vide ergo Bonitatem & seueritatem Dei. In eos quidem qui ceciderunt seueritatem: in te autem bonitatem Dei, si permanseris in bonitate, alioquin & tu excideris.* Quamobrem licet etiam certus esses de præsentî te bonam esse arborem, tibi tamen esset timendum quia incertus esses de futuro: semperque cauendum esset ne forte excideres à bonitate tua & excidereris à bonitate & seueritate Diuina. Iam vero cum neque de præsentî certus sis; Imo cum ex certa ratione sit euidentius quod nisi diligenter & solícite caueas, tu mala potius quam bona sis arbor, nonne erit quod illam diligentem adhibeas cautelam & solícitudinem: primò quidem in indagandâ illa ratione, ac deinde in praxi frequentanda quam secum infert cognita Veritas?

Sic autem commodè Ratio indagari poterit si attente perscruteris quid sit quod malam faciat arborem: & quid, quod plures malæ sint quam bonæ arbores; nam si hæc eadem ratio in te locum habeat, profecto mala sis arbor necesse est. Hoc est porro quod malam facit arborem, nempe si nullos fructus ferat, aut pauciores quàm ferre deberet, aut omnino malos: sic plane homo malus dicendus est si vel nulla, vel pauciora bona faciat vel



denique si plura mala quam bona edat opera. Ex operibus namque velut e fructu arbor cognoscitur. *Ex fructibus eorum cognoscetis eos.*

Sed unde agnoscetur fructus? Unde opus esse bonum vel malum discernetur. Ex hac nimirum regula quam post Diuum Dionysium tradunt omnes Theologi: *Bonum ex integra causa: malum ex quouis defectu.* Sic expresse Sanctus Thomas: *Non est actio bona simpliciter nisi omnes bonitates concurrant: quia quilibet singularis defectus causat malum, bonum autem ex integra causa.* Unde & illud est Sapientis, *Qui in vno peccauerit, multa bona perdet*; Siue ut habent Septuaginta, *Bonitatem perdet*, Quia ex vno defectu deficit Bonum quod non constat sine suis causis.

Causa vero sine quibus non est bonum, referri possunt ad has vulgares quatuor quæ dicuntur, Materia, Forma, Efficiens, & Finis. Debet esse materia seu obiectum bonum vel saltem indifferens & non malum. Nam si quid ex obiecto suo malum est ut mendacium, vel ex accidenti, ut res vetita vel non ordinata, licet alia fuerint causæ, tota peribit actio. Sic de cæteris ratum est causis: Tamen si materia, finis, & efficiens adsint, solaque desit forma, totum deest. *Iuste quod iustum est prosequeris.* Efficiens dicitur homo liber & in gratia. Nam si peccator est, vel non liber, nihil agit ad æternæ vitæ præmium, quidquid bonum & bene agat. *Charitatem autem non habeam, nihil mihi prodest.* Denique Finis est tam necessarius ut propterea Dominus dixerit: *Si oculus tuus fuerit nequam, totum corpus tuum tenebrosum erit: OCULUM hinc accipere debemus ipsam intentionem*, inquit sanctus Augustinus de qua ipse fuit, & sanctus Gregorius in Moralibus.

Ex his vero patet quod hic præcipue spectandum est, longe plures esse malos quam bonos, quia longe facilius est in homine, siue in humanis actionibus reperiri vnum defectum seu vnam deficientem causam, quam totas simul col ligatas? *Non est qui faciat bonum.* Dominus de cælo prospexit super filios hominum ut videat si est intelligens aut requirens Deum. Omnes declinauerunt, simul inutiles facti sunt. *Non est qui faciat bonum, non est usque ad vnum.* Id est tam pauci sunt qui coram Deo & absolute bonum faciant, ut vix vnus e multis reperiatur. Non desunt quidem qui multa bona faciant, sed illa quæ videntur hominibus bona, non sic videntur Deo, quia non constant suis causis, *Seminauerunt triticum,*

l. de Div  
Nom. c. 4.

1. 2. q. 18.  
a. 4. ad 3.

Eccl. 9.

Deut. 16.

1. Cor. 13.

Luc. 11.

28. Mor.  
c. 13.

Ps. 13.

Bellarmin.

Ier. 12.



& spinas messuerunt; hereditatem acceperunt, & non eis proderit, confundemini à fructibus vestris. Hoc est certe pauendum.

## II. PUNCTVM.

**S**ED in te, hæc ratio valet, in te facilius reperitur defectus ex quo est malum, quàm integra causa quæ est necessaria ut bonum esse possit.

Tu quis es qui hæc legis? Nonne homo? Nonne vanitati similis? Nonne venundatus sub peccato? Nonne is cui malum adheret? Nonne is qui videt aliam legem in membris suis repugnantem legi mentis suæ, & captiuantem se in lege peccati quæ est in membris suis? Nonne hæc in te inuenis, nonne hæc in te vides & sentis? At vero illa sunt propter quæ facilius in vnoquoque reperitur defectus quàm integra boni causa. Illa sunt quæ nisi omnino reprimantur, causæ sunt defectuum omnium: aut si ex aliqua parte reprimantur, tantorum sunt causa defectuum quanta pars superest reprimenda. Claudicauerunt à semitis suis. Nonne hic est defectus animi sicut & corporis, Claudicare? *VSQVE QVO claudicatis in duas partes?*

*Ps. 143.*

*Rom. 7.*

*Ps. 17.*

*3. Reg. 18.*

Aut itaque est omnino comprimendum quod in te deficit, aut aliquid semper deficient: Aut comprimenda est vanitas seu illa propensio quæ te ad vanam tui consecrandam famam trahit, aut deerit finis in cunctis tuis operibus. Ah quoties defuit! Aut coercenda libido illa quæ te ad opus ex genio, & non ex ordine, non ex intuitu Diuinæ voluntatis attrahit, aut deerit operi sua materia, suaue forma; Non erit illud opus quod vellet Deus, non erit illa forma quam adhiberi vellet. Si in die Ieiunij tui inuenitur voluntas tua, non est Ieiunium quod elegit Dominus, Cum veniretis in conspectum meum, quis quasiuit hæc de manibus vestris? Quasi diceret, licet ea sacrificia quæ immolatis, sint à me ordinata, & materiam contineant boni operis, quia tamen non ea facitis qua religione & pietate vellem, non sunt mihi grata, quia deest illis sua forma, sua virtus, suum decus, & proinde facta sunt mihi potius molesta, laboranti sustinens.

*S. Bern. ex*

*Is. 58.*

*Ibid. 2.*

Sic plane tecum reputa de his tuis operibus quæ vel ex amore proprio, vel ex incuria & negligentia facis. Nonne vides quantum illis desit eius perfectionis & excellentiæ quæ à te requirere.



tur? Tantum puta illis deesse suæ formalis & efficientis causæ. Nam quæ forte sufficerent, à laico vel à nouitio facta, multum deficiunt in te spectata, si plus quam à laico vel à nouitio, requirat à te Deus. Hinc nempe eruuntur causarum Differentiæ, diuersusque valor. Spectatur ætas Agentis, Condicio, Status, Vocationis tempus, Gratiarum numerus, Talentorum qualitas, cæteraque spiritus Diuisiones. Vnde tu quantum atate prouectus es in Diuino cultu, si atati opera tua non respondent, tantum deficiunt ab integritate & plenitudine quam ex illa tot annorum persona religiosa deriuare debuerant, dicereturque tibi: *Appensus es in statera, & inuentus es minus habens. Quid respondebis?*

## III. P V N C T V M.

**Q**UA igitur ratione fit ut plures dici possint mala quam bona arbores: eadem prorsus fiet, si caueas, ut mala potius quam bona sis arbor. Nam non erit in te fructus bonus, non erit in te bonum, non erit ex integra causa, non erit conforme statui, non respondens ætati & Gratiæ, non adimplens eam Iustitiam quam ex accepto talento debes operari. *Ventus vrens siccauit fructum eius: maruerunt & arefactæ sunt virgæ roboris eius.* Quis ille ventus vrens, unde tanta siccitas & ariditas, nisi vana ipsa Gloria qua fit ut aliud quam velit Deus opereris, vel alio modo vel fine; sicque defint operibus tuis suæ causæ: & defint esse bona & probata opera? *Iniquitates vestrae declinauerunt hæc; & peccata vestra prohibuerunt bonum à vobis:* Id est impediuerunt quo minus illud censeretur bonum quæ vos bene facere putabatis.

Hoc est verò quod te non aduertentem decipit, cum sit aliquid partim boni partim mali quod agis, Tu parte boni respecta, malum non intueris quæ cum inficiat totum opus, nihil ex opere tuo superest præter inanem illam quam de illo habes opinionem.

*Num. 19. Quidquid tetigerit immundus, immundum faciet.*

Nec mireris id esse in morali statu, quod frequentissimum est in naturali. Vides sæpe in formis remissis plurimum esse admixtum contrarij, nec repugnare aliquid esse calidum quod multum habeat frigiditatis; Ita plane in virtutibus & bonis operibus tuis tam multa sunt admixta mala ut non virtutes sed vitia potius dicenda sint. Blandiris tibi forsan de deuotione, de obedientia, de



humilitate aut de aliqua demum virtute quam exerces : at non vides quot quantosque simul Indeuotionis, Inobedientiae & superbiae committas actus : vereque de bonis tuis spiritualibus dici possit quod Propheta de terrenis Iudaeorum, *Olineta vestra & ficeta vestra comedit eruca.* Totum absument vanitas vel negligentia. Amos 4.

Atque hinc pauenda illa expositulatio quae saepe alias tum vero hic opportunè à Domino : *Scio opera tua quia nomen habes quod viuas & mortuus es. Esto vigilans & confirma cetera quae moritura erant.* Apoc. 3. *Non enim inuenio opera tua plena coram Deo meo. In mente ergo habere qualiter acceperis & audieris, & serua & poenitentiam age. Si ergo non vigilaueris, veniam ad te tanquam fur, & nescies qua hora veniam ad te.* Quid autem veniens, de sterili arbore Colono sit dicturus iam ipse dixit : *Succide illam, ut quid etiam terram occupat?* Luc. 13.

Videri multa possunt in singulis partibus quae huic seruiant Veritati, praesertim vero in 1. parte, Die 3. & 4. Ianuarij. Feria 5. Hebdomada 3. post Epiph. In 2. parte, Dominica Septuagesimae Feria 2. Hebdomada 2. in Quadragesima. Feria 5. Hebdom. Passionis. Feria 4. Hebdom. 4. post Pascha. Die 1. Maij ubi haec in primis opportuna Veritas :

Si tempus respicis comparandae tibi virtutis, vix ullam tibi comparatam respicies.

In 3. parte Feria 2. Hebdom. 1. Sabbato Hebdom. 5. Feria 5. Hebdom. 8. Fer. 2. Hebdom. 9. Die 6. Augusti. In fine ubi de votis religiosi, unde haec commode depromi possint.

Religiosus aut quiuis alius infra vel supora regulam aut sortem viuens, ficus est ficum non ferens.

Quod te imparatum magis reddit ad ferendum fructum, hoc te paratiorem deberet reddere.

Quanto minus puniri timet infructuosus, tanto iam magis punitus est.

In 4. etiam parte Sabbato Hebdom. 19. Feria 3. Hebdom. 21. tota pene Hebdomada 23. Feria 5. Hebdom. 27.



CVM sint autem Euangelij plures aliæ diuersæque partes  
vide ad singulas, quid referri possit aliunde depromptum.

*Attendite à falsis Prophetis qui veniunt ad vos in  
vestimentis ovium.*

Hæc sunt apostolatus & perfectioris vitæ duo signa  
certiora, velle abstinere libenter ab omnibus bo-  
nis, & omnia mala sustinere.

*In 1. parte, Die 2. Decembris.*

Sæpe videtur esse Charitas, & est magis carnalitas.

*In 2. parte, Feria 4. Hebdom. 1. post Octauas Pasche.*

Loquendo de diuinis, quantò magis lucet quàm ar-  
des, tantò minùs in te diuina lucet charitas.

*In 2. parte, Fer. 6. Hebdom. 2. post Octauas Pasch.*

Qui eminentior est in illa quæ dicitur eminens scien-  
tia, minùs inter homines eminere cupit.

*In 2. parte, Fer. 3. Hebdom. Pentecostes.*

Amori potius ab amore timendum est, quàm à timore.

*Sabbato Hebdom. Pentecostes.*

Optabilius bonum bellum, quam mala pax.

*In 3. parte, Sabbato Hebdom. decim. quæ tota est de missionibus, de  
modo ac materia concionandi.*

*A fructibus eorum cognoscetis eos.*

Affectum probat effectus.

*In 3. parte, Fer. 2. Hebdom. 9.*

*Numquid colligunt de spinis vnas, aut de tribulis  
ficus?*

Malæ vitæ mors bona, rara est.

*In 4. parte, tota Fer. Hebdom. 28.*



*Qua ratione fit ut plures mala quàm bonæ sint, &c.* 311

Sicut prima & puerilis ætas index est secuturæ vitæ præsentis, ita hæc vita præsens indicium est futuræ post æternitatis.

*In 3. parte, Die 24. Iunij.*

*Omnis arbor bona, bonos fructus facit.*

Salutis animæ nulla est certior certitudo, quàm in certo vocationis gradu attingendo.

*In 1. parte, tota pene Hebdom. 5. post Epiphan. ubi de vocatione cuiusque status quæ tanto est perfectior, quanto magis suæ respondet arbori seu perfectioni specifica.*

In parvis major est serui Dei fidelitas.

*In 1. parte, Fer. 6. Hebdom. 6. post Epiph.*

*Omnis arbor quæ non facit fructum bonum, excidetur & in ignem mittetur.*

Ad memoratas supra veritates de modico cuiusque fructu nec non de pœna consequente, possent hæc adjungi.

Qui se existimat stare, videat ne cadat.

*In 2. parte, Sabbato Septuagesimæ.*

Nimia firmitas, infirmitas.

*In 2. parte, Feria 2. Sexagesimæ.*

Verbum Dei non redit vacuum: aut prosit necesse est accipienti: vel oblit.

*In 3. parte, Fer. 2. Hebdom. 8.*

*Vide & in 4. parte, Fer. 6. Hebdom. 24. ubi de diuite Epulone.*

*Non omnis qui dicit mihi Domine, Domine, intrabit in regnum cælorum.*

Discedat ab iniquitate omnis qui nominat nomen Domini. 2. Tim. 2.

*In 1. parte, Die 1. Ianuarij.*

Frustra multiplicas medicaminâ, sanitas non erit tibi:



312 *Dominica 7. post Pent. Non potest arbor mala, &c.*

Quod grauius in te est malum, hoc minus vis sanari.

*In 1. parte, Fer. 5. Hebdom. 6. post Epiph.*

Quæ causa est cur pauci salui sint, hæc in te causa est cur ex illis forte non sis.

*In 2. parte, Dominica Septuag.*

Si ordinatis ad salutem mediis non vteris, Mediatore Christo abuteris.

*Sabbato post Quinquag.*

Qui sibi non contradicit in suis malis desideriis, sibi contradicit in bonis.

*In 2. parte, Dominica 5. post Pascha.*

Qui cum affectu incomposito Deum consulit, non Deum sed Deo consulit. Non à Deo consilium petere, sed Deo dare velle videtur.

*In 2. parte, Fer. 4. Hebdom. Pentecostes.*

Nisi diligenter aduertas, quod petis à Deo iustius, hoc est quod petis iniustius.

*In 3. parte, Sabbato Hebdom. 7. post Pentecost.*

Quò sæpe vehementius Deum oras, ore quidem illi adstas propius, sed corde distas longius.

*In 3. parte, Fer. 4. Hebdom. 14.*

Ore facta Confessio, sæpe factis à te negatur.

*In 4. parte, Fer. 2. Hebdom. 15. post Pentecost.*

*Sed qui facit voluntatem Patris mei qui in cælis est ipse intrabit in regnum cælorum.*

Multa de hac Diuina voluntate adimplenda vide in indicibus, verbo *voluntas*. Multa item de regno cælorum desiderando & inquirendo vide in 2. præsertim parte, tota Hebdomada 5. post Pascha, & in 3. parte tota Hebdomada 3. post Octauas Pentecost. ac demùm in 4. parte, Die 1. Nouembris.

HAC



*Majoris est animi se Diuinæ fidei supponere, quàm se illi, &c. 313*



H A C Hebdomada , quidquid post Sermonem Domini proximè dictum vel factum refertur ab Evangelistis, ita consideratur, vt ad septem præcipuas Virtutes referatur : quarum aliæ sunt tres Theologicæ; aliæ quatuor Cardinales. Omittitur tamen historia Leprosi mundati quia de eo per integram Hebdomadam actum est in prima parte, Dominica & Hebdomada tertia post Epiphaniam.

## FERIA SECUNDA.

DE FIDE CENTVRIONIS A  
CHRISTO DOMINO COMMENDATA.

*Amen dico vobis, non Inueni tantam fidem in Is-  
rael. Matth. 8.*

### VERITAS PRACTICA.

Majoris est animi se Diuinæ fidei supponere, quàm se illi opponere.

RATIO EST, Quia maioris est animi seipsum vincere quàm à seipso vinci.

Sed qui se Diuinæ supponit fidei, seipsum vincit : qui se vero illi opponit, à seipso vincitur.

Ergo maioris est animi se Diuinæ fidei supponere, quàm se illi opponere. Quod tamen pauci putant.



## I. P V N C T V M.

Luc. 7.

**C**VM introisset Capharnaum Dominus, accessit ad eum Centurio qui in ea ciuitate praesidio Romanorum praeerat, ac proinde Gentilis erat, sed credens in Deum & in Christum. Accessit autem primo per seniores Iudaeorum. Deinde per amicos suos: ut est apud sanctum Lucam: Ac tertio per semetipsum cum Christus iam vicinior esset domui ut interpretatur sanctus Chrysostomus. Tum vero conueniens Dominum, his eum rogabat Verbis, *Domine, puer meus iacet in domo paralyticus, & male torquetur*: Cui statim Dominus: *Ego veniam & curabo eum*. At ille, *Domine, non sum dignus ut intres sub tectum meum; sed tantum dic verbo, & sanabitur puer meus*. Nam & ego homo sum sub potestate constitutus, habens sub me milites, & dico huic, *vade & vadit*; & alij, *veni, & venit*: & seruo meo, *fac hoc & facit*: Quasi diceret, ut interpretatur sanctus Augustinus, Ego sub potestate Tribuni mei & Caesaris constitutus, & merus homo, si quid subditis meis impero, mox obtineo: quanto magis Tu qui sub nullius potestate, & praes omnibus Creaturis, ut pote filius Dei, poteris imperio tuo quidquid volueris. Id autem audiens IESVS, *miratus est*, seu mirantium more se habuit, & ita locutus est ut astantes idem admirari atque imitari doceret: *Amen dico vobis, non Inueni tantam fidem in Israel*: Non inueni, qui tam pie, tam facile, tamque certo crederet.

Alio quidem & diuerso sensu poterant Ethnici & politici homines mirari hanc Centurionis facilitatem in credendo, quod vir nempe militaris & generosus, nimis se videretur abjicere, nimisque de magnitudine animi detrahere, sese summittendo dictis huius hominis. Sic enim selecta illa Ingenia quae dicuntur fortia, sic tantum de fortitudine Ingenij detractum putant, quantum facile est in credendo Ingenium. At contra Dominus sic miratur & admirandam praebet Centurionis fideus ut Centurionem propterea maxime laudet ab animi praestantia & fortitudine, tantumque absit ut aliquid de generositate sua credendo detraxerit, quin potius, sic se praestantem Ingenio, & animo fortem ostenderit, atque ita promeruerit sanitatem seruo suo: *Vade & sicut credidisti, fiat tibi*. Et sanatus est puer in illa hora. Hinc ergo nata Veritas modo expendenda & numquam ex animo deponenda. Quod, quidquid



*Majoris est animi se Diuinæ fidei supponere, quàm se illi, &c. 315*

dicant sui adulescentes & adoratores Ingenij, longe majoris est animi Diuinæ se fidei supponere quàm se illi opponere.

Ratio est ita euidentis ut mirum sit non videri ab his qui se perspicaciones autumant, nisi forte illi sint de quibus Dominus: *In Iudicium Ego in hunc mundum veni, ut qui non vident, videant; & qui vident, cæci fiant.* Sic autem breuiter & dilucidè procedit Ratio: Longe majoris est animi seipsum vincere, quàm à seipso vinci: In hoc enim sita est ipsa virtus quæ dicitur animi fortitudo. Reuera, inquit sanctus Ambrosius, *iure ea fortitudo vocatur, quando unusquisque seipsum vincit.* Et Clemens Alexandrinus: *Magni animi virtus non solum in ferendis casibus, sed etiam in eo quod resistat voluptati & cupiditati, dolorique & iræ, & in summa cuius rei quæ nos vel vi vel fraude aliqua illicit.* Sic sanctus Papa Gregorius: *Quid fortius quàm omnes animi sui motus rationi subigere, omnia carnis desideria, spiritus virtute frenare, proprias voluntates abjicere, contemptis visibilibus, ea quæ non videntur, amare?* Vnde & Salomon ait: *Melior est patiens viro forti, & qui dominatur animo suo, expugnatore urbium.*

Lactantius denique fuisse id prosequutus: Ille, inquit, *solus vir fortis debet indicari qui temperans est, moderatus, & iustus.* Et post multa de Herculis laboribus, opera sunt ista fortis viri, hominis tamen. Illa enim quæ vicit fragilia & mortalia fuerunt. Nulla est enim, ut ait Orator, tanta vis quæ non ferro ac viribus debilitari frangique possit. At animum vincere, iracundiam cohibere, fortissimi est, quæ ille nec fecit umquam nec potuit. Hæc qui faciat non modo ego eum cum summis viris comparo, sed simillimum Deo iudico. Vellem adiecisset de libidine, luxuria, cupiditate, insolentia, ut virtutem eius impleret quem similem Deo indicabat. Non enim fortior indicandus est qui leonem quàm qui violentiam in seipso inclusam feram, superat iracundiam: aut qui rapacissimas volucres dejicit, quàm qui cupiditates auarissimas coercet. Et quæ plura pergit ex quibus ita patet fortis & magni hoc esse animi, seipsum vincere, ut si à seipso vincaris, minime magnus nec fortis umquam haberi possis. Abierunt absque fortitudine ante faciem subsequētis.

## II. PUNCTVM.

**S**ED qui se Diuinæ supponit fidei, seipsum vincit: qui se vero illi opponit, à seipso vincitur.

R r ij



2. Cor. 10.

Hoc est enim seipsum vincere, cum quidquid in nobis contra Deum, rectamque rationem insurgit, refranamus & subijcimus Deo: sicut è contra Ille à seipso vincitur qui rectæ Rationi oppositis motibus cedit, siue illi sint animi siue corporis motus: nam hæc est ordinata consensio partium hominis vt quemadmodum rationi appetitus, ita & Deo subordinetur Ratio: vnde id tandem fit vt sicut appetitus naturalis aut ratio quæ dicitur inferior, multa suggerunt contra Diuinam fidem; sic plane is se vincat qui appetitum & humanam rationem Diuinæ subijciat Fidei; vel à seipso vincatur qui Diuinam fidem humanæ subijcit rationi. *In carne enim ambulantes*, inquit Apostolus, *non secundum carnem militamus: nam arma militiæ nostræ non carnalia sunt sed potentia Deo ad destructionem munitio-um, consilia destru-entes: & omnem altitudinem extollentem se aduersus scientiam Dei, & in captiuitatem redigentes omnem intellectum, in obsequium Christi.* Quasi diceret, vbi agitur de fide, non spectamus quid caro vel humanum ingenium suadeat: Imo si quid forte suadet quod repugnet fidei, habemus arma parata quibus id expugnemus: & hæc arma non sunt humanæ artes, non politicae formæ loquendi vel agendi, non Sophismata Philosophica, non aliud denique quo solent vti homines huius sæculi peritiores: sed arma sunt longe his potentiora, potentiam quippe Diuinam continent, arma sunt ipsa Fides, ipsa Diuina authoritas cui fides innititur, & quæ qui armantur tam potentes sunt ad expugnanda cuncta quæ sese contra opponunt vt nihil sit tam astutum & munitum quod non deiciant; nihil tam altum & eminens quod non subijciant fidei. Atque ita intellectus ipse humanus ne quid forte humanum ratiocinari præsumat, quasi constrictus & captius teneatur, vt obsequatur Christo, sicque fit tandem vt dum quisque fidelis sic se supponet fidei, seipsum vincet: & sic de vnoquoque fidei Christus triumphabit. *Hæc est victoria quæ vincit mundum fides nostra.* Et hæc ipsa fides, armatura est qua certamen initur & qua comparatur victoria. *In omnibus sumentes scutum fidei. IN DV TI lorica-m fidei.*

1. Ioan. 5.

Eph. 6.

1. Thess. 5.

## III. P V N C T V M.

**M**AIORIS est igitur animi Diuinæ se fidei supponere, quam se illi opponere, Nam sic se animus vincit dum se continet



*Majoris est animi se Diuina fidei supponere, quàm se illi, &c.* 317

ne quid contra fidem opponat; Dùm se verò vincit animus, fit seipso major, & quo se magis vincit, eo se maiorem facit. *Ma-* Serm. 2. de  
*gnarum hic vigor est mentium,* inquit sanctus Leo, & *valde fidelium* Asc. Dom.  
*lumen est animarum, incunctanter credere quæ corporeo non videntur*  
*intuitu; & ibi figere desiderium quò nequeas inferre conspectum:* Sic  
apte S. Hieronymus: *vis scire quantus sit ardor bene credentium?* Ep. 61. ad  
*di Apostolum: Et si nos, aut Angelus de cælo aliter Euangelizauerit* Pamma.  
*nobis, anathema sit. Id est, in eo maxime apparet vis animi & vigor eo-*  
*rum qui credunt, quando sic credunt vt quidquid contra fidem apparet,*  
*quantumcumque appareat credibile, statim execrentur.*

Nihil certe debilius Ingenio quod nihil potest credere nisi quod intelligat. Primo enim ignorat quid sit fides; Deinde ita de se præsumet vt putet posse intelligere quæ credenda proponuntur. Ac tertio denique se vniuersa Ecclesia cui promisit Deus infallibilitatem fidei, prudentiorem, peritiorem & perspicacitatem fingit, quàm infania quid insanius fingi potest. Vnde illud egregium Diui Augustini. *Disputare contra id quod vniuersa Ecclesia sentit, in-* Ep. 118.  
*solentissima est Insania.*

Eant nunc & se iactitent fortiora Ingenia, debilitatem nostram irrideant, suam vnā deprædicent fortitudinem. Ecce Illius Viri Iudicio qui omnium consensu Ingenij fuit excellentissimi, non alij quàm insolentissime insani sunt iudicandi. Itane verò qui sint dementes, sint mentis & animi fortioris? Audiant verò Prophetam, si quid supersit bonæ mentis: *Cum fueritis velut quercus def-*  
*fluentibus foliis, & velut hortus absque aqua: Erit fortitudo vestra vt*  
*faucilla stuppa, & opus vestrum quasi scintilla, & succendetur utrumque,*  
*& non erit qui extinguat.* Id est, ocyus tardius præclarum illud ve- Is. 1.  
strum Ingenium apparebit quam fuerit aridum & inane; apparebit fortitudo illa prætentata & præsumpta quàm fuerit stuppea, straminea, fictitia & omnino nulla. Apparebit ex alijs vestris operibus quam imbecillus esset animus, cum nihil forte, nihil solidum, nihil diuturnum, nihil permanens & sibi constans efficiatis; sed vestra omnia scintillant solum & luceſcunt ad momentum, tum statim euanescent.

Sic plane, nihil imbecillius in agendo & patiando quam qui se animo iactant ita fortes vt nihil credant nisi quod animo placuerit: nutant in omnibus, palpant in meridie, Duces cæci, *Semeti-* Iudas.  
*ipsos pascentes, nubes sine aqua quæ à ventis circumferuntur, arbores au-*



tumnales, infructuosa, bis mortua, eradicata, fluctus feri maris, despu-  
mantes suas confusiones, sidera errantia quibus procella tenebrarum ser-  
uata est in eternum. Id est, præter inanem sonitum & effusam ia-  
ctantiam nihil in eis est.

Hebr. 11.

Rom. 4.

Ibid.

A. 1.

At vero verè Credentibus nihil est fortius, nihil generosius non  
modo in eo quod credentes seipso vincunt, sed quod ubi semel  
seipso sic vicerunt, inde ad alia quantumvis ardua sic se fortes  
præbent, vt manifeste appareat nihil esse Fide ac Fideli maius &  
fortius. Lege Apostolum ubi Fortiores quosque veteris testamenti  
nominatim compellat, & à fide omnes suæ fortitudinis com-  
mendationem habere testatur. Intuere vnum Abrahamum qui  
Pater omnium Credentium dicitur, quantæ opus fortitudinis est  
aggressus cum Isaacum filium immolauit. Nonne à fide hac  
eius fortitudo profecta est? At quanta quanta fuerit eius fides non-  
ne in eo præcipue excelluit quod supra omnem intelligentiam  
crederet, quod seipsum prius credendo mactaret quam filium:  
atque in seipso sic mactando, sic vincendo, sic fidelis, sic fortis,  
sic iustus & sanctus est habitus vt esset cæteris documento, mayo-  
ris esse animi sic se Diuinæ fidei supponere quam se illi opponere.  
Non est enim scriptum tantum propter ipsum, inquit Apostolus, sed &  
propter nos quibus reputabitur credentibus in Eum qui suscitauit IESVM  
Christum D. N. à mortuis.

Increduli & subuersores sunt tecum. Attende diligenter. Et Vide  
quæ multa passim de Fide proponuntur.



## FERIA TERTIA.

### DE SVSCITATO VIDVÆ FILIO IN CIVITATE NAIM.

Et de spe retinenda in deploratis rebus.

Noli flere. Luc. 7.



## VERITAS PRACTICA.

Non certius in spem itur, quàm contra spem.

RATIO EST, Quia tunc magis & melius speratur in Di-  
uinis, cum spes est purior, seu cum in Diuinis solum speratur.

Sed quando humana defunt subsidia, tunc spes esse potest purior.

Ergo & major & certior; Ergo & eò melius speratur, & eò magis  
sperandum est in Diuinis quo humana defunt subsidia. Ergo &  
non certius in spem itur quàm contra spem, exemplo Abrahami  
qui ut scribit Apostolus, contra spem in spem credidit. Contra Rom. 4.  
id scilicet quod naturaliter fieri poterat, credidit & sperauit  
diuinitus euenturum.

## I. PUNCTVM.

**E**T factum est, inquit sanctus Lucas, post sanatum Centu-  
rionis seruum, Deinceps ibat (Iesus) in ciuitatem quæ voca-  
tur Naim: & ibant cum eo Discipuli eius, & turba copiosa.  
Cum autem appropinquaret portæ Ciuitatis, ecce defunctus efferebatur fi-  
lius unicus matris suæ, & hæc vidua erat, & turba ciuitatis multa cum  
illa. Quam cum vidisset Dominus, misericordia motus super eam, dixit  
illi: Noli flere. Et accessit, & tetigit loculum. Hi autem qui portabant,  
steterunt, Et ait: Adolescens tibi dico, surge. Et resedit qui erat mor-  
tuus, & cepit loqui. Et dedit illum matri suæ. Accepit autem omnes ti-  
mor, & magnificabant Deum dicentes: quia Propheta magnus surrexit  
in nobis, & quia Deus visitauit plebem suam.

Nihil hic difficile quoad intelligentiam: multa verò sunt quæ  
voluntatem cum Dei Gratia in spirituales & Diuinos affectus ex-  
citant, de quibus in quarta parte, Dominica decima quinta, cuius  
est hoc Euangelium. Nunc quoniam ad virtutem Spei refertur  
Consideratio: Contemplare tantisper quàm deplorata res essent  
huius Viduæ quæ filium suum Unigenitum deflebat mortuum: Et  
tamen illi tunc ait Dominus: Noli, flere, Bene spera, resurget fi-  
lius. Sic plane nobiscum agit per Scripturas suas: sic moerentes



consolatur, sic ne desperemus in ipsis desperatis rebus adhortatur, sic ut magis tum speremus prouocat, quia *numquam certius in spem itur quam contra spem*, Numquam securius sperandum in Diuinis subsidiis quam cum humana defunt. Quæ certe Veritas si semel persuaderi possit, multum valere poterit ad corroborandam nostram confidentiam, quia omnem prorsus tollit diffidentiam, cum concludat eo vel maxime sperandum esse tempore quo solemus magis diffidere de Diuinis subsidiis.

Sic autem facile suaderi potest: Nam tunc vel maxime spes est certa & secura, quando est pura & sincera; quando purè & solum speratur in Deo, & nulla simul in creatura. Multum enim deducit de ea spe quam in se haberi vult Deus, quando simul speratur in re humana aliqua, vnde licet ipse Dominus vtatur creaturis ad subsidium suum nobis conferendum, vehementer tamen cauet ne in ipsis confidamus, & potius illas subtrahet, & subministrabit media quædam minus apta & idonea fini quem prætendit, ut agnoscamus euidentius totum à Deo provenire opus. *Multus tecum*  
*est populus*, ait Dominus Gedeoni, *nec tradetur Madian in manus eius, ne gloriatur contra me Israel, & dicat, meis viribus liberatus sum*. Itaque ex triginta duobus millibus qui aderant, primo quidem viginti duo millia recefferunt; tum verò ex decem millibus Trecenti tantum selecti sunt qui pugnarent in aduersarios: & modus pugnandi sic determinatus fuit, ut loco gladiorum, lagenas vacuas simul ac lampades manu gestarent, easque inter se comploderent & confringerent; neque aliter hostes aggredierentur. Cur ita porro? Ut spes militum scilicet esset purior, ut purius in vno Deo sperarent: non in suis armis & viribus quæ nullam ad certandum & vincendum habebant aptitudinem. Sic, *quæ stulta sunt mundi, elegit Deus ut confundat Sapientes: & infirma mundi elegit Deus ut confundat fortia: & ignobilia mundi & contemptibilia elegit Deus: & ea quæ non sunt ut ea quæ sunt destrueret, ut non gloriatur omnis caro in conspectu eius*: Atque ut qui sperant in eo vere possint dicere,  
*Exaudi vocem eorum qui nullam aliam spem habent, & libera nos de manu iniquorum, & erue me à timore meo*. Itane verè posses orare?

## II. P V N C T V M.

**S**ED quando humana defunt subsidia; sic spes in vno Deo purius figi potest.

Non



Non est quidem expectanda extrema necessitas vt recurratur ad Deum, cum in ipsarum vsu facultatum plus in Deo semper quàm in rebus sit sperandum: sed nescio qua infidelitate animi fit vt dum adsunt facultates & media comparandis rebus quas volumus, longe magis in ipsis confidamus mediis quàm in ordinatione Diuina quæ his vult vt. Quod ex eo vel euidenter apparet, quod quando subtrahuntur illa media, tum plane toti diffidimus, quasi Deo sublata esset potestas nos adiuuandi, vel quali tota vis & potestas sperati adiutorij esset posita in illis mediis, & non in Deo. Numquid manus Domini inualida est! Et male locuti sunt de Deo: Num. 11. dixerunt, numquid poterit Deus parare mensam in deserto? Numquid & Ps. 77. panem poterit dare, aut parare mensam populo suo. Ideo audiuit Dominus & distulit, & ignis accensus est in Iacob, & ira ascendit in Israel, quia non crediderunt in Deo, nec sperauerunt in salutare eius.

Desint ergo oportet illa humana subsidia, simulque in arcto positi sicut Rex Iosaphat & qui cum eo erant, vt possimus in vno Deo pure sperare & dicere: *In nobis quidem non est tanta fortitudo* 2. Par. 10. *vt possimus huic multitudini resistere quæ irruit super nos: sed cum ignoremus quid agere debeamus, hoc solum habemus residui, vt oculos nostros dirigamus ad te.* Tum verè huius Regis pura & sincera spes erat quia non erat aliud in quo speraret. Quod ex eo plurimum confirmatur quod cum paulo post fecisset foedus cum Ochozia Rege Samariæ vt si redirent hostes, ab eo iuuaretur, minus spei retinuit & confidentiæ, minus pure & sincere in vno sperauit Deo. Vnde & illi dictum à Domino: *Quia habuisti fœdus cum Ochozia,* 1. Reg. 22. *Percussit Dominus opera tua, contritæque sunt naues, nec potuerunt ire in Tharsis.* Ac propterea forte dictus est ambulasse in via patris sui Asa, Qui Rex alioquin probus, religiosus & confidens Deo, tamen aliquando minus purè illi vni confisus est: vnde & à Propheta quodam sic est argutus: *Quia habuisti fiduciam in Rege Syria, & non in* 2. Par. 18. *Domino Deo tuo, idcirco euasit Syria Regis exercitus, de manu tua. Nonne Aethiopes & Lybics multo plures erant quadrigis & equitibus & multitudine nimia, quos cum Domino credidisses, tradidit in manu tua? Oculi enim Domini contemplantur vniuersam terram, & præbent fortitudinem his qui corde perfecto credunt in eum. Stultè igitur egisti, & propter hoc ex presenti tempore aduersum te bella consurgent.*

Nota illud *perfecto corde*, Quasi diceret, qui pure & sincere credunt aut sperant. Neque enim iste Rex omnino non sperauit in.



Ibid.

Deo, sed non perfecte non purè quia videlicet simul fidebat in humanis aliis subsidiis quorum si fiduciam abiiecisset, puriori & perfectiori corde sperasset in Domino. Quod & rursum illi eidem Regi obiectum est cum ægrotaret, multisque medicis abundaret, *Magis in eorum arte confisus est quam in Domino*, Et idcirco tam parum in Deo sperasse dicitur ut *nec cum in sua infirmitate quasiuisse dicatur*; Non quod forte omnino non quasiuerit, sed non spe illa pura qua quærendus & implorandus erat, & qua eum quasiuisset, si tot medicos non habuisset.

Tobie 2.

O quàm verò dictum de probatis & fidelibus Dei seruis, quod *fidem siue spem suam numquam mutant ab eo*; Siue illis adsint siue desint humana præsidia, nam qui minus sperant quando desunt humana quam quando adsunt, isti spem suam mutant.

## III. P V N C T V M.

Deut. 32.

**E**RGÓ non certius in spem itur quàm contra spem; Non certius & securius speratur in Diuinis, quam cum desunt humana in quibus simul speretur: quia non certius speratur in Domino, quam dum in eo vno purè speratur: Numquam vero purius in eo vno speratur quam cum alia desunt in quæ spes diuidatur & corrumpatur. *Videte quod Ego sim solus, & non sit alius Deus præter me. Ego occidam, & ego viuere faciam: percutiam & ego sanabo; & non est qui de manu mea possit eruere.* Quasi dicat, possunt quidem in subsidium vocari creaturæ prout à me sunt ordinatæ in talem finem: sed sic semper spectanda est illa Diuina ordinatio, ut numquam subsidium creaturæ separetur à subsidio Creatoris, quasi aliud esset quod à creatura, & aliud quod à Creatore recipitur, nam vnus est Deus à quo & ipsa creatura recipit quidquid confert subsidij, & sine quo nihil potest. Vnus est proprie Deus qui rem omnem conficit, Ille est qui mortificat & viuificat, qui percutit & qui sanat. Creaturæ sunt velut Instrumentum quibus ad nutum vtitur, & sine quibus æquæ posset solus quidquid cum illis facit.

Vel sic interpretare: *Ego occidam, & ego viuere faciam: percutiam & ego sanabo*: Quasi diceret, Tunc maxime adero laturus opem inuocantibus me, quando dejecta erunt omnia, si tum in me sperent; occidam idcirco & percutiam ut de occiso & de percusso



speretur, & tum eos viuere faciam & sanabo. Quia tum spes erit purior, spes erit certior, & sic in me sperantem numquam expectatione sua defraudabo. Sic Psaltes Regius: Cum occideret eos querebant eum, & reuertebantur, & diluculo veniebant ad eum. Et rememorati sunt quia Deus adiutor est eorum: & Deus excelsus, redemptor eorum est. Ac rursum: Et humiliatum est in laboribus cor eorum, infirmati sunt, nec fuit qui adiuuaret: & clamauerunt ad Dominum cum tribularentur, & de necessitatibus eorum liberauit eos. Ps. 77. Ps. 106.

Sic vnusquisque vt speret in desperatis rebus, apte Propheta: Qui ambulauit in tenebris, & non est lumen ei, speret in nomine Domini, & innitatur super Deum suum. Quò etiam Illud Iobi transferri potest: Lignum habet spem: si præcisum fuerit, rursum virefcit, & rami eius pullulant: Id est, quò res magis accisæ sunt & diminutæ, eò spes humana minor est, sed Diuina maior esse debet; quantum humana deficit, tantum Diuina sufficit. TVMVLVS HVMANÆ CONFIDENTIÆ SVNT INCVNABVLA DIVINÆ SPEI, Etiam si occiderit me, in ipso sperabo, tum vel maxime spem puram & certam in eum figam. Hæc est spei confessio, quam vocat Apostolus, indeclinabilem, id est, firmam & constanter retinendam. Tibi hoc præcipue dictum puta, quia in hoc præcipue defciscis. Et prope illi similis es de quo apud Iobum dicitur, Non credit quod reueri possit de tenebris ad lucem, circumspcctans vndique gladium. Ibid. 13. Hebr. 10. Iob. 13.

Vide alibi passim vbi de Confidentia.



## FERIA QVARTA.

### DE MVLIERE PECCATRICE

#### QVÆ DILEXIT MVLTVM.

Et de Charitate in Deum.

Remittuntur ei peccata multa, quoniam dilexit multum. Luc. 7.



VERITAS PRACTICA.

Quæ Charitas dicitur vniuersa delicta operire, ea prius dicenda est vniuersim aperire.

*RATIO EST, Quia Charitas non operit delicta nostra nisi quatenus ipsa delicta remittuntur.*

*Sed non remittuntur nisi aperiantur.*

*Ergo quæ Charitas delicta operit, ea prius aperit; & quanto planius aperit, tanto plenius operit.*

I. P V N C T V M.

**C**IRCA hoc tempus, & in Ciuitate quadam Galilææ, vbi tùm morabatur Dominus, contigit quod de Muliere peccatrice conuersa, quæ putatur esse Maria Magdalena, narrat sanctus Lucas, post Sermonem quendam à Christo habitum cum Discipulis sancti Ioannis Baptistæ, de quibus aliàs. Rogabat, inquit, Dominum quidam de Pharizæis vt manducaret cum illo. Et ingressus domum Phariſæi, discubuit. Et ecce mulier quæ erat in Ciuitate peccatrix vt cognouit quod accubisset in domo Phariſæi, attulit alabastrum Vnguenti, & stans retro secus pedes eius, lachrymis cœpit rigare pedes eius, & capillis capitis sui tergebat, & osculabatur pedes eius, & vnguento ungebat.

Videri possunt apud Euangelistam reliqua, & imprimis expendi quæ Dominus ipse testatur de multa eius Charitate qua factum est vt ei remissa fuerint peccata multa. Hæc est enim Charitas de qua dicitur à Sapiente in Prouerbiis, *quod vniuersa delicta operit*, siue vt referunt sancti Petrus & Iacobus, *Charitas operit multitudinem peccatorum*. Quæ quidem de Charitate proximi deque eius delictis ab ea sufferendis intelligi possent: Sed nos hîc ad Charitatem Dei referimus, & ad propria nostra delicta quæ per illam Charitatem qua Deum diligimus sic operiuntur, vt ea prius aperiantur; Neque enim aliter Charitas operit quin ante aperiat; & tanto illud plenius, quanto istud planius.

Pro. 10.  
1. Petr. 4.  
Iac. 5.



Quod cum sit ad praxim vberimum, tum præcipue modo est expendendum, vt discamus quàm clare quàm distincte quam plane cuncta sint in Confessione detegenda, si volumus ea plene tegi & operiri. Et ratio quæ affertur, exemplo Magdalenæ plurimum illustratur, sicut & huius exemplum ex allata ratione magis declaratur. Quid est enim quod in illa muliere & in nobis Charitas vniuersa delicta operiat nisi quod ipsa delicta remittat, vel quod idem est, nisi quod per illam Charitatem remittantur, siue, vt vocant dispositiue, siue formaliter, siue meritorie, nihil ad rem nostram refert, cum hoc certum sit & indubitatum, quocumque id fiat modo, sic Charitate operiri & tegi peccata, vt vel ea semper Charitas remittat operiendo; vel nū remittat, numquam operiat neque tegat.

Quodcumque horum Verborum adjungatur in Scriptura cum voce peccatum significante, non alium efficit sensum quam remissionem peccati. *Beati quorum remissa sunt iniquitates, & quorum* Ps. 103.  
*tecta sunt peccata*, id est remissa, sic enim de more Hebræorum pars vna versus, explanat aliam. Sic cum Idem dicit, *operuisti omnia peccata eorum*; Idem prorsus est ac primum quod immediate dixerat, *remisisti iniquitatem plebis tue*. Sic ne operias iniquitatem eorum, Ps. 84.  
& peccatum eorum coram facie tua non deleatur, Id est, non remittas saltem quoad pœnam sed semper eorum peccatum vindica. 2. Esdr. 4.

Quid enim aliud esse posset, operiri & tegi peccatum coram Deo nisi esset remitti? An posset esse peccatum in homine, & sic tegi vt non videret illud Deus? Quo tandem velo tegetetur, quo tegumento posset operiri! Non certe Charitatis quæ tam fidelis est Deo suo vt ipsa etiam peccatum videre non possit quin oderit, & odiendo tollat. *Qui diligitis Dominum, odite malum*; Id est, Ps. 96.  
ostendite vos vere illum diligere, odiendo malum.

## II. P V N C T V M.

**S**ED non remittuntur peccata nisi aperiantur:  
De venialibus quidem non est necesse omnia sic aperiri vt non possint omitti aliqua, quia nec necesse est omnia simul remitti vt aliqua remittantur, & sunt præterea plures alij modi quibus aliter remitti possint quàm confessione. De mortalibus itaque sola est quæstio, quæ tamen ita est euident vt nulla de his



Prou. 13.

superesse possit dubitatio, quin omnes omnia teneantur aperire quantum quidem meminisse possunt, & quin omnes in hac parte sua satisfaciant Conscientiæ. Verum vt alias est obseruatum, nimis verum est & nimis viget illud Sapientis Prouerbum, *Anima dolosa errant in peccatis*. Sunt quædam scilicet sibi dolosæ animæ, quæ dolo malo sua sibi tegunt peccata ne cogantur ea confiteri & deponere, aut si prorsus ea sibi non possint ita tegere quin appareant, fingunt sibi tamen non esse adeo grauiæ vt sint mortalia, nam mortale quidem sibi videntur detestari; nollent aliena furripere, sed tamen sibi seruare aliqua, quæ sciunt non esse sua, non verentur. Nollent actum fornicationis aut adulterij committere, sed tamen affectus in corde prauos fouere & congressus liberos habere non reformidant; nec aperiunt ea in Confessione, aut tam leuiter, quasi nihil esset, quia non putant esse mortalia; nollent enim mortale vt sibi fingunt, & cum præterea nolint ea deponere, nimio enim rerum aut personarum affectu detinentur, non possunt de his conteri vel atteri; ac proinde nolunt de his confiteri.

Et quidem rectè hi nolunt confiteri de quibus nolunt conteri, sed malè quod nolint ea deponere; sed malè quod nolint de illis conteri; sed male quod non putent ea esse mortalia, quia non sunt grauiora in illo genere quæ committi possunt. In hoc nempe sunt animæ sibi dolosæ & quæ errant in peccatis; nam sic sibi palpant & fingunt, vt eò peccent liberius quo se fingunt peccare leuius. Error sane frequentissimus & perniciosissimus; affectata est ignorantia quæ non excusat; satis possent agnoscere grauitatem peccati si vellent, & velle tenentur quia res est tanti momenti vt inde salus eorum pendeat, inde nulla Confessio, inde nulla remissio. *Hanc culpam*, inquit sanctus Ambrosius, *sacerdotes non auferunt, neque peccatum eius qui in dolo se offert*.

Ep. 4.

Job. 11.

Ib. 34.

Hæc erant videlicet operienda, sicut & alia quæuis mortalia vt remitterentur; nec excusat quod ignores aut quod non putes ita esse, quia sic tibi dolo malo palpas, sic Conscientiam obtundis, sic veram animæ scientiam vis ignorare, & ex his esse qui dixerunt Deo, vt est in libro Iob, *Recede à nobis, scientiam viarum tuarum nolimus*; Quod & paulo post ibidem sic declaratur, *De Industria recesserunt à Deo, & vias eius intelligere noluerunt*.



*Quæ Charitas dicitur vniuersa delicta operire, ea prius, &c.* 327

Quidquid dicat qui talis est, quidquid ad sui defensionem excuset, *Verba oris eius iniquitas & dolus; noluit intelligere, ut bene ageret.* ps. 35.  
Quod vnum proferunt est, quia non putant esse mortale; Sed quod contra respondetur est, nolunt putare, nolunt scire, & nolle scire perinde est ac nolle facere, licet scias; nam fraudulentè nolunt scire ne scilicet teneantur facere quod nolunt, si scirent esse faciendum: quasi minus esset, nolle scire quid facias, quam nolle quod scias, facere. Sic miseri clamant in suis æternis pœnis: *Iustitia lumen non luxit nobis: & sel intelligentia non est* sap. 5.  
*ortus nobis:* Nec tamen eorum clamor auditur ut exaudiat, quia eorum culpa est quod non intellexerint quæ scire poterant & quæ debebant discere. Nonne hoc expauescendum?

### III. P V N C T V M.

**S**IC ergo est de his delictis quæ non putantur aperienda quasi non sint lethifera, sic prorsus est de his delictis velut de cæteris mortalibus, Quod *quæ Charitas dicitur vniuersa delicta operire, ea prius dicenda est vniuersim & particulatim aperiire*, Cum alioquin non remittantur, sicut nec alia non aperta, neque excuset ignorantia quia est voluntaria, quia est dolosa & maligna, *Latet enim eos, hoc volentes*, inquit sanctus Petrus. Et certe hoc est 2. Pet. 3.  
quo præcipue Mulier illa peccatrix commendatur, hoc est quo præcipue pœnitentiam suam indicauit, hoc est quo præcipue veniam meruit, quando scilicet sic vniuersim se peccatricem detexit & aperuit, ut non minus se fateretur peccasse in his quæ putantur leuia quàm quæ grauiora censentur. Idcirco enim in oculos & in capillos suos piè defauit ut quod in illis peccauerat, quantumcumque minus esset & leuius, non minus tamen confiteretur & plangeret quam quod peccasse posset grauius.

Sic præclare de illa sanctus Gregorius, *Oculis terrena concupierat, sed hos iam per pœnitentiam conterens flebat. Capillos ad compositionem vultus exhibuerat, sed iam capillis lachrymas tergebat. Ore superba dixerat, sed pedes Domini osculans, hoc in Redemptoris sui vestigia figebat. Quot ergo in se habuit oblectamenta, tot de se inuenit holocausta. Conuertit ad virtutum numerum, numerum criminum, ut totum seruiret Deo in pœnitentia, quidquid ex se Deum contempserat in culpa.* Vnde post multa concludit; *Ad vos ergo fratres, ad vos* Hom. 33. in Euang.



oculos mentis reducite, & pœnitentem peccatricem mulierem in exemplum vobis imitationis anteferte. Quacumque vos in adolescentia, quacumque in Iuuentute deliquisse meministis, deslete, morum operumque maculas lachrymis tergite. Quasi diceret, cum Iuniores & liberiores in peccando essetis, non putabatis esse lethalia & confitenda quæ iam in cultu Dei prouecti agnoscitis non fuisse pratermittenda: Quamobrem illa vobis in mentem & confessionem reuocate, quantisque modo digna fletibus esse perspicitis, tantum ea flete, & sic omnes culpas diluite.

Sic sanctus Ambrosius, ubi de Lazaro fratre Mariæ Magdalenæ; *IESVS compatitur Dilectæ suæ & dicit defuncto Lazaro, veni foras: hoc est, quid iaces in tenebris Conscientiæ, & delictorum tuorum sordibus, quodam reorum carcere? Exi foras, delictum tuum prode, ut iustificeris: Ore confessio fit ad salutem. Obserua. vocari tenebras Conscientiæ & quendam reorum carcerem; Ut designet ibi esse aliquid quod ignoretur & quod tamen ignoratum non excuset, quia crimen est, hoc ignorare: & huius criminis rei detinentur in quodam veluti carcere Conscientiæ, quia captiui & cruciati tenentur à sua cupiditate quæ dum impedit ne se cognoscant & aperiant, valde angitur, & damnosus planè status de quo cogitare & apud alios dicere non semel aut aliquoties sed crebro necesse est. Vide quæ his affinia tranſtantur in 1. parte, tota Hebdomada 3. post Epiphaniam.*

Plures aliæ Veritates de Charitate & Contritione possent hinc exponi, quas satis erit proponere.

Amantis lachrymæ eò suauiores, quò amariiores.

*15. 38. RATIO EST, Quia tales lachrymæ tantò sunt suauiores, quanto sunt magis satisfactoriæ. Sed quò sunt amariiores, tanto sunt magis satisfactoriæ. Ergo & suauiores. Ecce in pace amaritudo mea amarissima. VADE in pace. SCIVNT, inquit sanctus Ioannes Chrysostomus, qui eius quod dico, fecerunt periculum, quantam lætitiā habeant hi fontes lachrymarum. Vide in 2. parte, Dominica in albis. Haurietis aquas in gaudio, de fontibus Saluatoris.*

*15. 12.*

Alia vero Veritas sic inuerso modo posset formari.

Amori nihil est amarius, quàm quod sentitur suauius.

RATIO EST, Quia quod sentitur suauius est ipse amoris seu dilectionis actus.

Sed



Sed amorì nihil est amariùs ipso dilectionis actu. Siue propter peccata quibus aliquando dilectum offendit vel quibus adhuc offenditur : siue quod non satis amet quem agnoscit tot modis diligendum : siue quod se videat ab eo separaturn cui se vnitum vellet ardentissime, siue ob alias causas : certum est quod sit amara quædam mors & dura sicut Infernus emulatio, qua de re inter alios, Cant. 8. Richardus à sancto victore de quatuor gradibus huius quam vocat *violente Charitatis* : quam dicunt *suauem quandam esse tyrannidem, piam sauitiam, & optandam crudelitatem.*

Alia his conformis Veritas :

Nihil est ad amorem augendum magis præsens, magis opportunum, magisque appositum, quam quod amorì fuit aliquando magis oppositum.

RATIO EST, Quia nihil amorì fuit aliquando magis oppositum quàm peccatum & quæ peccati sunt causæ, vel effectus, vt sunt vanitates sæculi, mundi illecebræ, & vitæ mollioris deliciæ.

Sed animæ conuersæ à peccato, & amanti Deum suum nihil est ad amorem suum augendũ magis præsens, magisque appositum, quàm sui peccati quondam admissi consideratio & detestatio; Sic enim mirum quantum Dauid Magdalena, Petrus, Augustinus, & alij peccatores in Amorem Diuinam excreuerunt cogitantes se illum offendisse quem cognoscunt tantopere diligendum. *Peccatum meum contra me est semper. DILIGENTIBVS Deum omnia Rom. 8. cooperantur in bonum,* Etiam ipsa peccata, vt diserte ait sanctus Augustinus, *Quid ergo? peccabimus vt magis Deum amemus? Absit, l. de Con-* sed potius quia iam nimis in eum peccauimus, sic peccata deflea- *cept. & Grati. c. 1.* mus, vt nostris fletibus in amorem eius emolliamur & toti colliquescamus.

Amanti Deum animæ magis mirum est, quòd non à mundo sic ametur & colatur Deus, quàm sit mirum Mundo non amanti, quòd ab Amante sic ametur.

RATIO EST, Quia vbi est potior ratio cur aliquid fiat, magis mirum est si non fiat, quàm aliud cuius efficiendi non est par ratio,



Sed longe est potior ratio cur Deus à mundo sic ametur & colatur, ut ab amante colitur, quam ut non ametur sicut à mundo non amatur. Ergo id magis mirum. Et tamen ita stupet mundus ad aspectum vnus amantis Deum, & tam illi mirum videtur quod ita Deum amet: ut quia mirum sic videtur, paucorum id esse videatur, & non cuiusvis animæ quæ tamen tota facta est ad amandum Deum suum!

Si scires quid sit offendisse Deum, non minus forte fleres, quam hæc peccatrix mulier. At vero non excusaris quod illud nescias.

RATIO huius postremæ partis quæ sola videtur probanda, hæc est quod non excuseris si illa nescias quæ potes & teneris scire. Sed potes & teneris scire quid sit offendisse Deum. Ergo non excusaris quod nescias. Et tamen hoc vno videris duritiam cordis tui probare.

Amor Dei mors est sui.

RATIO EST, Quia verus amor sic amantem in amatum transmutat, ut amantis anima sit potius ubi amet quam ubi animet. Sed talis transmutatio mors est sui. Ergo & amor Dei qui verus est amor, mors est sui, aut non est verus amor, unde tam certum est paucos verè amare Deum quàm certò liquet paucos sibi esse mortuos. Vide infra in Festo S. Mariæ Magdalenæ, Die 22. Iulij.



## FERIA QUINTA.

### DE FUGATO DÆMONIO

CÆCO ET MUTO;

*Atque de nostra per Christum Fortitudine contra Inimicos.*

*Cum fortis armatus custodit atrium suum, in pace sunt ea quæ possidet, si autem fortior eo superue-*



*Qua facilitate vincimur, eadem vincere possumus. 331*  
*niens vicerit eum, uniuersa arma eius auferet,*  
*in quibus confidebat, & spolia eius distribuet.*  
Luc. 11.

## VERITAS PRACTICA.

*Qua facilitate vincimur, eadem vincere possumus.*

*RATIO EST, Quia idcirco vincimur, quòd nolimus decer-*  
*tare & vincere.*

*Sed eadem facilitate possumus velle quod nolumus.*

*Ergo & eadem vincere qua vincimur, adiuuante scilicet Christo*  
*Domino qui dat velle & posse.*

### I. P V N C T V M.

**Q**UOD sancti Matthæus & Lucas non nisi post alia multa *Matth. 12.*  
referunt de Dæmonio per Christum eiecto, id sanctus *Luc. 11.*  
Marcus ad hanc nostram historiæ seriem consequenter *Marci. 3.*  
videtur attexere. Sic porro res habet. Cum oblatus esset Domino  
quidam Dæmonium habens, cæcus & mutus, statim ita curauit  
eum vt rectè loqueretur & videret. Quod dum admirantur turbæ,  
Pharizæi calumniantur & audent blasphemando dicere, *hic non*  
*ejicit Dæmones nisi in Beezebuth principe Dæmoniorum*: Tùm verò  
IESVS calumniam multis refutat ac de sua in Dæmonem pote-  
state fufius differit, quæ videri possunt, & ita considerari vt mireris  
& inquiras apud te vnde tandem fieri potest quod ita Dæmon con-  
tra nos adhuc præualeat, qui victus, spoliatus, & exarmatus à  
Christo est. Non aliunde profecto accidit nili quod sponte cedi-  
mus Inimico; Nolumus contrà obsistere, contrà decertare & vin-  
cere; Nam si vellemus, possumus: *Et qua facilitate vincimur, ea-*  
*dem plane cum Christo vinceremus.*

Dignissima certe Veritas quæ attente perpendatur: Ac primum  
illud indubitatum est quod idcirco tantum vincimur quod noli-  
mus decertare. Neque enim vt præclare sanctus Ioannes Chry-



fortissimus, sua fortitudine fortes sunt Inimici nostri, sed nostram ignavia; Nam quantumlibet importune, acriter & moleste nobiscum pugnent, si tamen nolimus peccato consentire, nihil efficient; Nam de hoc nostro consensu eliciendo totum est quod inter nos agitur negotium & certamen; Vnde fit ut sicut non vincimur nisi quia consentimus, ita non consentimus nisi quia nolumus contra resistere & decertare, malumus cedere quam pugnare & vincere.

In Ps. 91.

*Aures tue, inquit sanctus Augustinus, posita sunt inter monentem Deum, & suggerentem serpentem, quare huc flectuntur, hinc auertuntur? Non cessat Satanas suadere malum, sed nec Deus cessat admonere bonum. Satanas autem non cogit inuitum, In tua potestate est consentire aut non consentire. Si aliquid persuadente Satana mali feceris, dimitte*

Serm. 197.  
de Temp.

*Satanam, accusa te. Et alibi. Alligatus est tamquam innexus canis catenis & neminem potest mordere nisi eum qui se illi mortifera securitate conuinxerit. Iam videte, fratres, quam stultus est homo ille quem canis in catena positus mordet. Et quae plura ibi habet, partimque iam supra sunt commemorata. Sic egregie sanctus Gregorius Nazian-*

In Sent.

Tetrast. 52.

*zenus: Quid nos omnibus in rebus miserum hostem, nempe Diabolum accusamus, eique noxas omnes nostras ascribimus, cum ipsi scelerata nostra viuendi ratione potestatem demus? Tibi ipsi vel soli potissimum succense. Ignis enim noster est, flamma autem aduersi spiritus. Adde his*

Exhort. ad  
Cast.

*Tertullianum: Princeps generis & delicti Adam voluit quod deliquit, & post pauca: Diaboli opus unum est tentare quod in te est, an velis: At ubi voluisti, sequitur ut te tibi subigat, non operatus in te voluntatem,*

In Hema-  
rig.

*sed nactus possessionem voluntatis. Quod & versibus non contemnendis scite Prudentius cecinit.*

*Ille quidem fomes nostrorum & causa malorum est.*

*Sed tantum turbare potest, aut fallere, quantum*

*Nos volumus, qui decrepito suggesta leoni*

*Armamenta damus.*

O nos profecto miseros, sed non miserandos, qui scientes volentes sic in nostram perniciem facile ruimus, ut non aliter ab hoste vincamur quam quia nolumus vincere.

## II. PUNCTVM.

**S**ED eadem facilitate qua nolumus, possemus cum Christo & velle & vincere.



Ipsū velle, inquit sanctus Augustinus, si volumus est; si nolumus <sup>l. 5. de Civit</sup> non est. Non enim vellemus, si nollemus. Itemque alibi, peccatum <sup>c. 10.</sup> esse tam liberum & voluntarium scribit, ut hoc à Pastoribus cantetur in montibus: à poetis in theatris: ab indoctis in circulis: à doctis in biblio- <sup>l. de Duab.</sup> thecis: à magistris in Scholis: à Pontificibus in templis: à genere humano <sup>anim. c. 11.</sup> in orbe terrarum. Sic apte ad rem nostram Sanctus Gregorius Nazianzenus: Arbitrij libertas parem in utramque partem, motum habet. Id est, æque potest cum gratia velle, ac potest nolle. Hæc sola est <sup>In Apolo-</sup> differentia, quod ex se possit velle malum & nolle bonum: non <sup>getico.</sup> possit autem velle bonum sine gratia; sed ut præclare ait sanctus Augustinus: Liberum arbitrium non ideo tollitur quia iuuatur: <sup>Ep. 89.</sup> sed ideo iuuatur quia non tollitur.

Quantam autem facilitatem ad volendum & vincendum à Divino recipiamus auxilio, sic luculente sanctus Hieronymus ad Eustochium: Si Demonum, inquit, te multitudo turbaverit, & ad sin- <sup>Ep. 22. de</sup> gula incitamenta vitiorum cœperis æstare, & dixerit tibi cogitatio tua, <sup>Cust. Virg.</sup> quid faciemus? Respondebit tibi Elizeus, noli metueri quia plures nobiscum sunt quàm cum illis; & orabit & dicet, Domine apcri oculos puella tuæ ut videat: & aperitis oculis videbis igneum currum qui te ad exemplum Eliæ in astra sustollat, & tunc lata cantabis: Anima nostra sicut passer erepta est de laqueo venantium. Quo de argumento fusissimè Cassianus tota Collatione septima & octava. Sed hîc modo sufficiat expendere quod inde documentum proponit sanctus Augustinus, ad afficiendam voluntatem, sicut ante ad instruendum intellectum: Sic enim non minus pie quàm breviter: Suadere Diabolus & sollicitare potest: cogere omnino non potest: & ideo <sup>Hom. 12. in 3.</sup> cum per Dei adiutorium in tua potestate sit, utrum consentias Diabolo; <sup>ser 50.</sup> quare non magis Deo quàm ipsi obtemperare deliberas?

### III. P V N C T V M.

**S**IC ergo non modò manifeste patet quod quâ facilitate vincimur, eadem possumus vincere: Sed etiam euidenter admonemur, ut quanti nostra refert in hac pugna vinci vel vincere, tantum studij & vigilantia deinceps adhibeamus: ut quod æque cum Christo possumus, vincamus potius quàm vincamur. Subditi ergo esto- <sup>Iac. 4.</sup> te Deo, inquit sanctus Iacobus: resistite autem Diabolo & fugiet à vobis: Quasi diceret: Alterutri horum duorum vos esse oportet subditos: vel Deo vel Diabolo: Videte vero simul conjunctim



quanta sit utriusque distantia: Et cum in vestra positum sit libertate, utri vos eorum subdatis; videte num sit satius, Deo subdī quam Diabolo. Neque vero difficultatem pugnae vel victoriae causemini, nam hoc vnum à vobis desideratur, ut *resistatis Diabolo*, ut cont. à steteris, ut ne illi assensum detis, & hoc sufficit, sic enim statim fugiet. Quid est autem facilius quam negare assensum? Licet enim ad illum eliciendum multas proponat hostis illecebras; plus tamen valet Gratia siue ad retundenda Inimici tela, siue ad acuendos pugnantium animos, quàm possint vlli contra nos aduersarij. *Major est qui in vobis est, quam qui in mundo*, inquit alius Apostolus.

1. Ioan. 4

1. Pet. 3.

Serm 85 in Cant.

l. de Parad. c. 2.

Ep. 1.

Nabum 2.

At vero Princeps Apostolorum. *Et quis est qui vobis noceat, si boni emulatores fueritis?* Cui coharens sanctus Bernardus, hæc apte ad nostrum propositum: *Si Diabolo suggerente vel seculo suadente quod non oportet, assensum tuum tenueris, & non dederis membra arma iniquitati, nec permiseris regnare peccatum in tuo mortali corpore: bonum te emulatorem probasti, cui malitia omnino nil nocuit, vide ne magis profuerit.* Et nonnullis interjectis, ut ostendat quanta id facilitate possis cum Christo: *Quidni omnia possibilia sunt innitenti super eum qui omnia potest? Quanta fiducia vox, omnia possum in eo qui me confortat! Nil omnipotentiam Verbi clariorem reddit, quàm quod omnipotentes facit omnes qui in se sperant.* Ingentis etiam audaciæ vox illa sancti Ambrosij, *Non metuemus Diabolum qui eoque infirmus est, ut & ipse casurus sit in terram. Accepit quidem tentandi licentiam, sed non accepit copiam subruendi, nisi sua sponte labatur infirmus affectus qui sibi auxilium non norit accersere.*

Denique rem totam videtur conficere peramica illa quæ est Pici Mirandulani adhortatio ad pugnam: *Vocatur ad coronam qui vocatur ad pugnam, atque ad eam præsertim in qua nemo vinci potest inuitus: neque aliis nobis ut vincamus viribus opus est, quam ut vincere ipsi velimus.* Magna Christiani felicitas, quoniam & in eius arbitrio posita est victoria, & omnis vincentis voto, omni que expectatione *maiora sunt futura præmia.* CONTEMPLARE viam, conforta lumbos, robora virtutem valde.

Vide in 1. parte, & in aliis, ubi de fortitudine; nominatim verò In die S. Stephani qui plenus gratia & fortitudine sic nos certare fortiter docuit, ut iniuriam inferat Gratia maximam qui sic non certat fortiter. Et in 4. parte, Fer. 4. Hebdom. 21.



*Quæ est regula temperantiæ in edendo, eadem est in loquendo. 335*



## FERIA SEXTA.

### DE VERBIS OTIOSIS IN DIE IUDICII CONDEMNANDIS.

*Et de Usu Temperantiæ in continenda lingua.*

*Dico autem vobis, quoniam omne verbum otiosum quod loquuti fuerint homines, reddent rationem de eo in die Iudicij. Ex verbis enim tuis iustificaberis, & ex verbis tuis condemnaberis. Matth. 12.*

### VERITAS PRACTICA.

*Quæ est Regula Temperantiæ in edendo, eadem est in loquendo.*

*RATIO EST, Quia regula Temperantiæ in edendo, est necessitas.*

*Sed hæc eadem est in loquendo regula.*

*Ergo quæ est regula Temperantiæ in edendo, eadem est in loquendo.*

*Vnde ex opposito hæc alia Veritas sic formari potest:*

*Eadem est oris intemperantia in loquendo, quæ est in edendo.*

*RATIO EST, Quia ubi est eadem regula Temperantiæ contra quam peccetur, ibi est eadem oris Intemperantia.*

*Sed eadem est regula Temperantiæ in loquendo quæ est in edendo.*

*Ergo & eadem utrobique dicenda est oris Intemperantia, & ex æquo detestanda simul ac fugienda.*



## I. P V N C T V M.

**C**VM Christus Dominus Pharisaorum sermonem impietatis & blasphemiae condemnasset, tunc de pernicioso linguae abusu ac de loquendi vitiis multa disseruit, quae non modo praesentes qui aderant, sed & absentes quosque spectabant ut inde proficerent. *Progenies viperarum*, inquit, *quomodo potestis bona loqui, cum sitis mali! Ex abundantia enim cordis os loquitur. Bonus homo de bono thesauro profert bona, & malus homo de malo thesauro profert mala. Dico autem vobis, quoniam omne verbum otiosum quod locuti fuerint homines, reddent rationem in die iudicii. Ex verbis enim tuis iustificaberis, & ex verbis tuis condemnaberis.* Formidanda certe sententia, & ad continendam linguam valde opportuna.

Sed quia quid sit verbum otiosum aut quale sit malum, vix nouimus; ex notiori aliquo vitio deducenda est notitia, & audienda Veritas quae refertur, *Vel Eandem esse regulam Temperantiae, vel Eandem esse oris Intemperantiam in loquendo, quae est in edendo.* Quid notius & quid probrosius quam haec ciborum incontinentia? *Inter omnia vitia humana, vitium intemperantiae maxime exprobabile est*, inquit sanctus Thomas: Vnde si hoc vitium tale sit in loquendo quale est in edendo, profecto erit etiam quod intemperate loquentem non minus pudefaciat quam intemperate comedentem. Iam vero videamus quanta sit paritas in utroque: Quid est enim & vnde cognoscitur oris intemperantia in comedendo? Quando videlicet inordinate supra quam necesse est aut quam decet, cibi sumuntur: Nam sicut Regula Temperantiae sumitur secundum necessitatem praesentis vitae: Ita Intemperantia quae est illi opposita dignoscitur prout has necessitatis excedit regulas. Expressus est & egregius hac de re sancti Thomae articulus ubi concludit, *Omnia delectabilia quae in usum hominis veniunt, ordinari ad aliquam huius vitae necessitatem sicut ad finem.* Et ideo Temperantia, inquit, accipit necessitatem huius vitae sicut regulam delectabilium quibus utitur, ut scilicet tantum eis utatur, quantum necessitas huius vitae requirit: Affertque illud celebre sancti Augustini dictum: *Habet vir temperans in rebus huius vitae regulam utroque testamento firmatam, ut eorum nihil diligat, nihil per se appetendum putet, sed ad vitae huius atque officiorum necessitatem, quantum satis est usurpet, utentis modestia, non amantis affectu.*

Cum



*Quæ est regula temperantiæ in edendo, eadem est in loquendo.* 337

Cum quis ergo rerum earum quæ delectabiles sentiuntur, plusquam satis est aut supra quod sufficiat immodesto & inordinato usurpat appetitu, ea vniuersim intemperantia dicitur, & particulatim oris intemperantia, cum circa cibum & potum talis versatur inordinatio. Multi quidem à sanctis Patribus afferuntur modi quibus pro variis circumstantiis peccari possit in hac materia: sed quod præcipuum est caput, spectat excessum quo temperantiæ regula quæ honesta, & rationabilis necessitatis formata est legibus, violatur. *Manducauerunt, & saturati sunt nimis. VAE vobis qui saturati estis. CARNIS curam ne feceritis in desideriis. Quæ fieri in desiderio prohibetur, ait sanctus Gregorius, in necessitate conceditur. Sed sæpe dum incautè necessitati condescendimus, desideriis deseruimus. Quamobrem qui temperantiæ student quasi quidam rectissimi arbitri inter necessitatem voluptatemque constituti, hanc consolando subleuant, illam premendo frænant, sic Idem alibi fusiùs. Nonne id tibi videtur æquum? Nonne vel nomen crapulæ detestaris?*

Cassian. Coll. 5. c. 11. S. Greg. 30. Mor. 27. Ps. 77. Luc. 6. Rom. 13. l. 30. Mor. c. 28. 20 Mor. 15.

## II. PUNCTVM.

**S**ED hæc eadem est in loquendo regula: sic ad temperatæ per rectam rationem necessitatis & vtilitatis leges moderanda est lingua.

Sic enim temperanda est lingua vt per eam omnino non peccetur, cum omne prorsus peccatum sit euitandum. At vero non potest intelligi quomodo aliter peccatum loquendo euitetur, nisi loquela his necessitatis vel vtilitatis legibus temperetur. Nam cum verbum otiosum arguatur à Domino tamquam malum, de quo fit reddenda ratio, seu de quo poena fit exigenda in die Iudicij: nihilque aliud sit verbum otiosum vt sancti Patres affirmant, imprimisque S. Gregorius, *Quàm quod ratione iuste necessitatis, aut intentione pie vtilitatis caret*, Nonne euidenter infertur, loquendi regulam esse necessitatem vel vtilitatem? Cum alioquin nisi esset necessitas, peccaretur loquendo, nec aliter peccaretur quàm quod regula temperantiæ hîc seruandæ & quæ necessitatis lege constringitur non seruaretur.

Basl. in Reg. br. 7. 23. 3 p. Pastor. adm. 15. S. Bern. infra.

Hinc illud Sapientis valde aptum; *Adolescens, loquere in causa tua vix: si bis interrogatus fueris, habeat caput responsum tuum*; Quasi diceret: ne loquaris nisi in magna necessitate, cumque etiam necessitas loquendi te vrgebit, vt accidit in causa nostra, caue



Pr. 10.

Ib. 20.

Ecclesi. 23.

Matth. 5.

multiplices sermonem, sed quàm breuiter expedi & sermonem contrahe. Quod & ipsum multis & variis loquendi modis vniuersa Scriptura exprimit, vt cum ait: *In multiloquio non deerit peccatum.* *Qui multis verbis utitur, laedet animam suam.* IN DISCIPLINATAE loquelæ non assuescat os tuum, est enim in illa verbum peccati. *SIT sermo vester, Est est, Non non; quod autem his abundantius est, à malo est.* Quid clarius? Quid expressius? Siue vt vitium in se, siue vt in te cognoscas?

## III. PUNCTVM.

**E**ADEM est igitur regula Temperantia, ac proinde eadem prorsus est oris intemperantia in loquendo atque in comedendo. Vtrumque enim ad Temperantiam refertur, cuius est proprie moderari affectum & vsum circa delectabilia: & ita moderari vt intra leges & terminos honestæ necessitatis vel utilitatis contineantur: vnde si comedendo Temperantia propter violatas necessitatis leges & regulas violatur, cur non in loquendo? Cur dicetur intemperans qui necessitatem aut modum comedendi non seruat; aut cur eodem nomine non infamabitur cæteris paribus qui supra quàm necesse est aut quam minus decet, libere loquitur? An quia non tale est Iudicium hominum? An quia non sic de vtroque sentimus? Non sic apparet inordinate loquentis vitium sicut comedentis? Verum ô homo tu quis es? Si Deus contra sentit, si Iudex ipse qui nec falli nec fallere potest ita condemnat loquentem vt de verbo otioso futurum sit iudicium & ex verbis suis homo sit condemnandus, quis leue putet vel leuiter loqui? An frustra putas Scripturam loqui? Certe numquam magis verbosa, si fas ita loqui, quam cum de verbis temperandis loquitur; Quorsum verò tot verba, tot Sententiæ, tot multiplicatæ rationes de hoc argumento nisi vt id grauius & momentosius quàm cogitari vulgò solèt cogitemus?

Ecclesi. 6.

Et certe sic videtur Sapiens vtrumque simul complexus cum dixit: *Omnis labor hominis in ore eius:* Cuius dicti duplex hic sensus est: Primus, idcirco laborandum est hominibus vt comedant, vt huic necessitati seruiant. Secundus, In hoc præcipue laborandum est omnibus vt os suum siue linguam suam custodiant; In quem sensum monebat Ecclesiasticus: *Ori tuo facito ostia &*

Ecclesi. 28.



seras: aurum tuum & argentum tuum conflagra, & verbis tuis facito statueram, & frenos ori tuo rectos: & attende ne forte labaris in lingua. Id est, impende in hunc finem quidquid habes pretiosius, nulli labori, nulli prorsus impensæ propterea parcas, nulla in re putes tibi magis laborandum. Vnde & Idem: Quis dabit ori meo custodiam & super labia mea signaculum certum ut non cadam ab ipsis, & lingua mea perdat me? Hinc illa Iobi tremenda confessio: Qui leuiter locutus sum, respondere quid possum? Manum meam ponam super os meum. Vnum locutus sum quod utinam non dixissem, & alterum, quibus ultra non addam: Vbi hæc egregie sanctus Gregorius: Sancti viri ante Dei oculos student culpas lingue tegere meritis vite, student bonorum operum pondere premere immoderata Verborum, unde in sancta Ecclesia manus super os ponitur, dum in electis eius quotidie, otiosa locutionis vitium, bonæ actionis virtute operitur. Itane cogitas de expiandis otiosis verbis tuis? Mirum quantos in fletus propterea erumpat sanctus Augustinus ut videre est in his quæ de se ipse confitetur.

Sed si otiosa verba tantum requirunt studij & laboris vel ut eui- tentur vel ut lapsa purgentur, quid alia grauiora? Quid scurri- lia? Quid detrahentia? Quid impudica? Quod si de omni vel otio- so verbo, quodcumque locuti fuerint homines, inquit sanctus Bernar- dus, Deo sint reddituri rationem in die iudicij: quanto distitius de verbo mendaci, mordaci & iniurioso? De elato vel lasciuo, de adula- torio aut detractorio indicabuntur? Quam vera sententia, fratres, in multiloquio non effugiendum peccatum? Ut enim præteream cetera, si propterea est otiosum verbum quod nullam rationabilem causam habeat, quam rationem de eo reddere poterimus quod est præter rationem? Nemo vestrum, fratres, parui aestimet tempus quod in verbis consumitur otiosis: si quidem tempus acceptabile est & dies salutis. Volat verbum irrenoca- bile: volat tempus irrenocabile, nec aduertit insipiens quid amittat. Li- bet fabulari, aiunt, donec hora prætereat. O donec prætereat hora! ô donec pertranseat tempus! Et post pauca: Utinam tamen vel solum tempus vita amitteretur in verbis, sed multi in his etiam vitam amittere comprobantur, sed adimere quoque, & hoc fratribus suis? Et nonnul- lis interjectis: lingua modicum membrum est, sed nisi caueas, magnum malum. Tenuis est & lata, aptissimum vacuandis cordibus instrumentum, sicut multorum mihi inter vos conscientias arbitror attestari: nisi forte omnes tam perfecti simus, ut numquam nobis post longas confabulatio- nes inuenta sit mens quodammodo vacua, meditatio minus deuota, sicca



340 Sabbato Hebd. 7. post Oct. Pent. De iniusta petitione, &c.

*magis affectio, & holocaustum orationis non adeo pingue, propter verba  
sive quæ diximus, sive etiam quæ audimus, Verba tamen, facile enim  
lingua labitur, nec minus facile illabatur cordi, ita ut multis inter loquen-  
dum minus profuerit quod propriam cohibuerint, dum non cauerint  
alienam.*

Vide in 1. parte, Die 14. Ianuarij:

Nemo securè apparet nisi qui libenter latet.

Nemo securè loquitur nisi qui libenter tacet.



## S A B B A T O.

### DE INIVSTA PETITIONE

SIGNI COELESTIS QVOD IVDÆI

QVÆSIERVNT A DOMINO:

*Et de iusta eiusdem negatione.*

*Generatio mala & adultera signum querit, & si-  
gnum non dabitur ei nisi signum Iona Propheta.  
Matth. 12.*

### VERITAS PRACTICA.

Nisi diligenter aduertas: Quod petis à Deo iustius, hoc  
est quod petis iniustius.

RATIO EST, Quia tanto quid iniustius petitur, quanto  
magis appetitur obtineri non seruatis seruandis.

Sed quod petis à Deo iustius, hoc est quod maxime appetis ob-  
tinere, non seruatis seruandis.

Ergo & illud est quod petis iniustius. Quod certe patet quàm sit  
corrigenndum.



I. P V N C T V M.

**A**DDVNT Iudæi ad suas blasphemias, hanc etiam impietatem & audaciam ut non contenti miraculis, quæ tam multa coram ipsis patrabat Dominus, petant pro suo libito signum quoddam cœleste: vel ut ignis in morem Eliæ de cœlo decidat, vel sicut accidit tempore Samuelis, sine vlla naturali causa, tonitrua mugiant, coruscant fulgura, imbres ruant. Et alij tentantes, inquit Euangelista, *Signum de cœlo querebant ab eo*; ostendat videlicet se in cœlo aliquid posse, quasi vellent illi leges præscribere; sic enim apud sanctum Marthæum, audent loqui, *Volumus à te signum videre*. O Impudentiam non ferendam! Tum verò Dominus, *Generatio mala & adultera signum querit & signum non dabitur ei, nisi signum Ionæ Prophete, sicut enim fuit Ionas in ventre ceti tribus diebus & tribus noctibus, sic erit filius hominis in corde terre. Viri Ninivite & Regina Austri surgent in Iudicio cum generatione ista & condemnabunt eam*. Quibus in Verbis aduerte non modo iuste negari à Domino quod iniuste petebant Iudæi, sed hos præterea castigari testimonio Infidelium qui maiorem fidem & pietatem minori de causa demonstrarunt. O quam multis Sacerdotibus, Religiosis & alij Ingenio seu Gratia præstantioribus idipsum exprobrari posset! quàm multi laici & inferioris notæ homines illis pietate præstant!

Sed quod attentius considerandum est: Nonne id nobis occidit quod Iudæis, ut neglectis ordinariis mediis ad salutem & perfectionem nostram, insolita quædam & extraordinaria requiramus! Nonne signum è cœlo petimus, nonne maiores pietatis sensus quàm sentimus? Nonne clariora fidei Christianæ argumenta, & vehementiora quædam perfectionis incentina? Quàm iniusta hæc & iniqua sint omnia postulata quis non videt? Aut certe si quid iustius tibi videtur & æquius petendum à Domino, si quod donum cœleste, si quæ virtus, si quæ Gratia, Vide quo illam modo, vide quam iuste aut iniuste petas. *Nam nisi diligenter advertas, quod petis iustus à Domino, hoc est quod petis iniustus*. Mirum certe & prope contradictorium; sed tamen verum & satis evidens attente consideranti Rationem quæ proponitur, & quæ in eo præcipue fundatur, quod tanto quid iniustius petitur, quanto illud



magis appetitur obtineri non seruatis seruandis, Id est, non seruata iustitia, non obseruato rerum ordine quem statuit Deus in obtinendis rebus.

Sicut cum mater filiorum Zebedæi petiit à Domino filiis suis vt primas apud ipsum obtinerent sedes, iniusta valde fuit petitio, quia non sic illæ sedes primariæ conceduntur cognationi & parentelæ prout sibi concedi Mulier appetebat: sed alia erant statuta quædam media quibus eò gradatim erat deueniendum. Bibendus erat Calix Domini, & baptismo quodam baptisandi erant, cuius nondum erant capaces: nec proinde illarum digni sedium quas cum matre filij ambiebant.

*Sap. 8.*

*Ibid. 11.*

*Pf. 24.*

*Joan. 2.*

*Ibid. 6.*

*Pf. 100.*

Sic Diuina Sapientia seu Prouidentia, qua Deus res administrat, dicitur in Scripturis, *attingere à sine vsque ad finem fortiter, & dispo-  
nere omnia suauiter*; seu vt ibidem habetur, *omnia in mensura, &  
numero & pondere disponere*. Quod Psalter Regius sic pie decanta-  
bat: *Vniuersa via Domini misericordia & Veritas requirentibus testa-  
mentum eius & testimonia eius*. Id est, modus procedendi quem ser-  
uat Deus cum ijs qui à se petunt aliquid, hic est vt misericorditer  
& beneuole illos recipiat, illos etiam præueniat & excitet ad se  
conueniendum & orandum; tùm vero ab illis requirit aliquid  
quod de suo conferant, & cum ipso collaborent. Sicut cum vi-  
num dedit in nuptiis, antè petiit aquam; Et antequam saturaret  
illam hominum multitudinem quæ ipsum sequebatur in deserto,  
petiit sibi dari panes & pisciculos quos habebant. Sic vniuersim in  
omnibus agit nobiscum, sic Misericordia & Veritas seu Iustitia  
præclare inter se conueniunt, vt misericordia nos præueniat, tum  
vero Iustitia sequatur. Id est, de nostro conferamus quod exigit  
ad alia obtinenda quæ volumus. Vis cælum obtinere? Serua man-  
data. Vis gratiam consequi ad illa obseruanda? Ora, Ieiuna, &  
confer tu ipse gratiam tuis inimicis. Hæc sunt videlicet quæ di-  
cuntur seruanda, & quibus non seruatis qui petit aliquid, iniuste  
petit, & tanto illud petit iniustius, quanto illud magis optat ob-  
tinere non seruatis seruandis. Nonne id euident & manifestum?  
Quid æquius quàm quod ordinauit Deus? Quid iniquius quàm  
hunc velle destruere diuinum ordinem? *Misericordiam & Iudicium  
cantabo tibi Domine: psallam & intelligam in via immaculata, quando  
venies ad me*. Tu vero solam velles cautare misericordiam! Et  
ubi Iudicium? Ubi Iustitia?



II. P V N C T V M.

**S**ED quod petis à Deo iustus, hoc est quod magis appetis obtinere non seruatis seruandis.

Quid enim petis iustus quam Virtutes sine quibus iuste non potes viuere, nec salutem consequi? Atque inter virtutes, quam petis iustus nisi qua magis indiges? Nempe humilitatem aut patientiam aut mansuetudinem aut Caritatem, aut similem aliam? Iam vero vide vtrum seruanda serues ad eas obtinendas. En tibi ad humilitatem humiliatio tam necessario est obseruanda vt si refugias viam humiliationis, virtutem fugias humilitatis. Hæc sunt enim certa & ab omnibus recepta sancti Bernardi verba: *Humiliatio via est ad humilitatem, sicut patientia ad pacem; sicut lectio ad scientiam. Si virtutem appetis humilitatis, viam non refugias humiliationis. Nam si non poteris humiliari, non poteris ad humilitatem prouehi.* Nonne hæc iam & similia multoties audiisti? Et tamen quantopere fugis humiliationem? Quantum id times ne eueniat? Quantum doles quando id accidit?

Sic de Patientia, de Mansuetudine, Deuotione, Caritate, Paupertate & aliis; placent quidem virtutes & eas expetis, etiam atque etiam petis; sed media quæ ad eas ducunt & sine quibus exerceri nullo modo possunt, an ita cupis? Expende diligenter, & videbis te velle Caritatem sine patientia, patientiam sine vlllo doloris sensu, mansuetudinem sine vlla contradictione proximi, paupertatem sine vlllo defectu rei temporalis, & sic de aliis, quod est velle virtutes sine seruatis obseruandis & sine mediis quibus nec obtinentur nec exercentur. *Non sic impij non sic, sed tanquam pulvis quem projicit ventus à facie terræ:* Nam sicut ait S. Gregorius, *qui sine humilitate virtutes congregat, quasi in ventum, puluerem portat.* Ita plane qui humilitatem sine humiliatione, Caritatem sine patientia, aut patientiam sine dolore.

III. P V N C T V M.

**Q**UOD ergo petis iustus, hoc est quod petis iniustus, Cum nihil petas iustus & sanctius quam virtutes: nihil vero iniustus quam quo illas modo petis non seruatis seruandis. Nam



quidquid opponitur Iustitiæ, sit iniustum necesse est, & quod Iustitia est sanctior qualis est Diuina quæ illa obseruanda constituit & ordinauit, eò certe est iniustius quidquid ei opponitur. Vnde tu cum te illi opponas Iustitiæ, petendo quod petis, licet iustum & sanctum sit, nonne iniustus es? Itane verò sentiebas? Itane vero deinceps post hanc acceptam veritatis notitiam? *Iuste quod iustum est, persequeris*, ait Moyses; *ut uiuas & possideas terram quam Dominus Deus tuus dedit tibi*. Et apte Sapiens; *Qui enim custodierint iusta iuste, iustificabuntur, & qui didicerint ista, inuenient quid respondeant. Concupiscite ergo sermones meos, diligite illos, & habebitis Disciplinam*. Denique & illud Prophetæ opportunissimum: *Si queritis, querite; conuertimini, venite*. Quæris virtutes? Quære in veritate prout inueniri & exerceri possunt, sed conuerrere à natura praua; tum occasione data; veni, humiliare sub potenti manu Dei, *Omne quod tibi applicitum fuerit accipe, & in dolore sustine, & in humilitate tua patientiam habe*. Sic vniuersim de omni virtute, aut de omni ad virtutem incessu ac praesidio: *Patientia vobis necessaria est, ut voluntatem Dei facientes, reportetis promissionem*. Hæc est condicio quâ promittit Deus, quam qui non feruat qui promissa petit, iniuste petit, nec meretur accipere. Vide in 1. parte, Dominica 2. post Epiphan.

Dent. 16.

Sap. 6.

Is. 21.

Eccles. 2.

Hebr. 10.



DOMI





# DOMINICA

OCTAVA POST PENTECOSTEN.

DE PRUDENTI VILLICO

INIQUITATIS.

*Filij huius sæculi prudentiores filiis lucis in generatione sua sunt. Luc. 16.*

VERITAS PRACTICA.

Indigni sunt sua luce, lucis filij, qui minus clarè vident in suis, quàm filij huius sæculi.

RATIO esse posset quod illi sua luce sunt indigni qui ea non utuntur.

*Sed filij lucis, qui minus clarè vident minusque prudentes sunt in rebus suæ salutis quàm filij huius sæculi suis in negotiis, non utuntur sua luce.*

*Ergo illa sunt indigni.*

Quia tamen sæpe de hac lucis privatione dictum est, & *In 1. parte, In Vigil. Epiphaniæ.* tota Ratiocinatio satis per se patet, sic videtur modò aptius per comparationem prudentiæ filiorum lucis, cum prudentia filiorum huius sæculi declarari posse Veritas.



*Qui ad majus & præstantius aliquod opus vocantur, majorique gratia præstant ad illud efficiendum quàm qui ad minus aliquod applicantur, tunc manifeste apparent indigni & priuandi sua Gratia, si minùs suum illud opus præstent quàm alij suum.*

*Sed Filij lucis ad majus & præstantius opus Vocati sunt quàm filij huius sæculi, majorique gratia & prudentia præstant ad illud efficiendum quàm illi ad suum.*

*Ergo si minùs id præstent, si minus prudentes sint in suo gerendo munere, quàm alij in suo, tunc manifeste apparent indigni & priuandi sua luce, sua Gratia, suisque donis. Quod certe est diligenter expendendum & cauendum.*

## I. P V N C T V M.

**O**PPORTVNE occurrit hodiernum Euangelium ad suggerendam materiam de virtute Prudentiæ quæ vna superest ex quatuor Cardinalibus consideranda, prout erat statutum superiori Hebdomada. Proponitur autem Parabola Villici in quo quid possit ac valeat prudentia huius sæculi aperte declaratur, vt inde magis excitemur ad id omne diligenter efficiendum quod prudentia lucis siue spiritalis & Diuina dicat esse agendum pro Dei cultu propriaque salute: Aut certe si desimus, tanto magis appareat defectus noster, tantòque magis arguendi & castigandi simus, quanto negotium illud salutis æternæ comparandæ majus est quouis negotio sæculari, quantoque prudentia lucis major & præstantior est ad æternum illud negotium conficiendum quàm prudentia sæcularis ad sua digerenda. Neque aliter Dominus laudat Eum qui ex mala fraude prudenter sibi prouidit quàm vt sic nobis indicet se longe magis probaturum qui sic in negotio animæ, spiritalique profectu sapienter ac prouidè sibi prospexit, vel si forsan in eo negligens fuerit, se in eum producturum exempla eorum qui rebus in caducis & nihili, tam strenui sunt & prudentes. Sic etiam vt ait sanctus Augustinus de Iudice



*Indigni sunt sua luce, lucis filij, qui minus clarè vident, &c.* 347

Iniquitatis qui interpellabatur à vidua, *Comparisonem duxit ad* <sup>l. 2. quæ-</sup>  
*Indicem Deum cui nulla ex parte Index iniquus conferendus est.* <sup>stionum</sup>

Ac primo quidem lecta & considerata tantisper narratione Pa- <sup>Enang. 9.</sup>  
rabolica quæ refertur, expendi posset quod sancti Patres pluri- <sup>34.</sup>  
bus docent nos hic esse velut villicos Dei; *Nobis villici humilitas*  
*& modestia assumenda est*, inquit sanctus Ioannes Chrysostomus,  
*nihil enim est nostrum, sed omnia Datoris Dei.* Sic & sanctus Chry-  
sologus, putandum nobis esse ait *prorogationis temporaria ministe-* <sup>Serm. 126.</sup>  
*rium suscepisse: non inuenisse ius possidendi: cauendum ne ad patrem* <sup>de villico.</sup>  
*familias fama versa substantia nos precedat iuxta illud Apostoli, quo-*  
*rundam peccata manifesta sunt precedentia ad iudicium, quosdam au-*  
*tem & subsequuntur.*

Sic autem omnia naturæ & gratiæ dona accepimus vt om-  
nium sit planè reddenda ratio, respondendumque Illi qui ab  
vnoquoque id exigit; *Redde rationem Villicationis tue.* Audi & me-  
ditare serio, nùm illam paratam habeas? An saltem de ea pa-  
randa cogites? An tibi certo & citius quam putes morituro ac  
iudicando prospicias? Hoc vere est esse prudentem, sic sibi pro-  
spicere in futurum. Sed Hoc est in quo etiam filij lucis deficiunt,  
hoc est in quo superantur à filiis huius sæculi, qui in generatione  
sua, id est, in suis temporalibus negotiis magis prudentes sunt vt se  
suis difficultatibus expediant, componantque res suas securius.  
Hoc est denique vnde illis grauissima hæc intatur Comminatio,  
quod indigni sint & priuandi sua luce lucis filij qui minus clare  
vident aut qui minus prudentes sunt suo in negotio spiritali  
quam filij huius sæculi suis in perituris rebus.

Ratio quæ hîc accuratius est euoluenda satis manifestè liquet,  
quoad primam præcipue partem qua dicitur quod quando ex  
diuersis qui ad diuersa destinantur opera, quicumque ad nobilius  
applicantur, majorique valent arte, potentia, viribus & gratia  
vt illud plene & cumulate efficiant, quàm qui ad minus addicun-  
tur, tum euidenter apparere quam sint indigni & quam merito  
priuandi sint sua Gratia si minus laudabiliter suum illud expleant  
opus quam alij suum. Sicut enim duo illa simul iuncta, nempe  
objecti seu finis dignitas, & mediorum ad finem valor magnam ha-  
bent vim ad excitandam & fouendam industriam, ita certe si  
qui his desint, non parum sibi desunt, nec parua sunt animaduer-  
sione plectendi: cum præcipue illis alij opponuntur qui talibus



desistuti præsidiis & motius ad suum peragendum opus, non defuerunt tamen operi, nec quidquam ab eis est desideratum, cum ipsi multa potuissent desiderare quibus carebant adiuumenta. *Inimici nostri sunt Iudices*: aiebat quondam Moses, Quasi diceret, cum Inimici nostri non habeant propositum sibi finem pugnandi tam nobilem & excelsum quam nos qui pro Deo nostro pugnamus: neque illi tam potentes sint viribus quam nos adiuti à Deo nostro: & tamen nobis praualeant, ardentiusque pugnent, aut tenacius adhæreant suis superstitionibus quam nos in vera religione, nonne nos iudicabunt & condemnabunt?

Sic Christus Dominus de filiis Iudæorum, *Ipsi Iudices vestri erunt*. Sic Apostolus Luctatores & in stadio decertantes aut currentes proponit qui *ab omnibus se abstinent, ut corruptam coronam accipiant, nos autem ut incorruptam accipiamus*, Pro qua non ita nobis moleste laborandum est sicut illis; & pro qua maiores nobis à Deo subministrantur vires, non tamen ita contendimus, non ita currimus & laboramus; Certe hoc probrosum, hoc pudendum!

## II. P V N C T V M.

**S**ED filij lucis ad maius & præstantius opus vocati sunt quam filij huius sæculi: maioriq; gratia & prudentia præstant ad illud efficiendum quam illi ad suum.

Et quidem de præstantia seu excellentia operis, nulla potest esse comparatio, nisi velis terram comparare cœlo, tempus æternitati, & sæculares ærumnas æternæ Beatitudini. Velle ne aliquam inter hæc mouere contentionem dignitatis & excellentiæ? *Quam dabit homo commutationem pro anima sua?* Neque vero etiam dubitari potest quin Prudentia filiorum lucis sit excellentior quam prudentia filiorum huius sæculi; cum illa supernaturalis & infusa, solisque filiis communicata, id est solis in gratia sanctificante constitutis; alia vero sit tantum naturalis quæ peccatoribus magis conueniat quam iustis & sanctis: aut certe quæ sit indifferens, ut in alterutris reperiatur.

Sed quod quæri posset, hoc tantum est, utrum prudentia lucis sit potentior ex se gratia seu medium aptius ad id omne efficiendum quod filiis lucis faciendum erit suo in negotio spirituali, quam sit prudentia huius sæculi ad sæcularia pertractanda ne-



*Indigni sunt sua luce, lucis filij, qui minus clarè vident, &c.* 349

gotia? Atque hoc ipsum æque certum & indubitatum est ac aliud: cum sit sola illa vera prudentia, verum scilicet lumen in intellectu quod representet voluntati verum bonum consecretandum; Alia vero prudentia non nisi apparenti vero & falso bono innitatur, unde proprie non est prudentia, sed astutia & calliditas, aut prudentia secundum carnem quæ mors est & stultitia apud Deum: *Nam prudentia carnis*, inquit Apostolus, *mors est, prudentia autem spiritus vita & pax; quoniam sapientia carnis inimica est Deo.* Et sanctus Thomas. *Prudentia*, inquit, *vera & perfecta est quæ ad bonum finem totius vitæ rectè consiliatur, iudicat & præcipit.* Et hæc sola dicitur prudentia simpliciter quæ in peccatoribus esse non potest; ac propterea non dicitur simpliciter quod sint prudentes sed in generatione sua. Hæc ad verbum sanctus Doctor, unde aperte patet quod quantum vera & perfecta virtus est potentior ad agendum quam falsa aut imperfecta, tantò prudentia lucis quæ sola est vera prudentia, ex se potentior est Gratia quam alia carnalis & sæcularis.

Adde, quod cum illi supernaturali prudentiæ adiuncta sint semper quæ appellantur Dona Spiritus sancti, atque illud imprimis quod dicitur Consilium quo maxime dono prudentia mirum in modum adiuuatur & perficitur, vt ait Idem sanctus Thomas, Quis non videat quantis hæc cœlestis prudentia partibus superet aliam vt potenter promoueat filios suos ad agendum? Numquid Deo quidquam est difficile? *NVM QUID Deo comparari potest homo, etiam cum perfectæ fuerit scientiæ? QVANDO misi vos sine sacculo & pera, & calceamentis, numquid aliquid defuit vobis?*

### III. P V N C T V M.

**I**NDIGNI sunt igitur & priuandi sua luce, lucis filij, qui cum vocati sint ad opus præstantissimum, habeantque convenientem operi perficiendo prudentiam cæteraque media proportionata: nec tamen illud opus suum ita perficiant sicut filij huius sæculi, qui nec opus, nec finem, nec media tam opportuna sunt nacti. *Mouebo candelabrum tuum de loco suo. OCCIDET sol in meridie & tenebrescere faciam terram in die luminis.* Nimis aperte deficiunt illi lucis filij. Nimis aperte peccant in hoc suo defectu. Et quidem tripliciter, primò quod non responderint illi Gratiæ quam ita



Ier. 2.

potentem habebant ad agendum. Secundò quod se excusent quasi non possint melius : quæ est injuria valde probrosa Gratia. Tertiò denique quod blasphemare faciant quodammodo inimicos Dei cum videlicet potentiores in generatione sua seu in suis quibusque peragendis videant sæculares quàm religiosos, carnales quàm spirituales, impios & scelestos quàm qui putantur pii & deuoti. Nonne hoc injuriosum cœlo, & blasphemum, quod longè magis Mundus colatur à mundanis, quàm Christus à Christianis ! Propterea adhuc iudicio contendam vobiscum, ait Dominus, & cum filiis vestris disceptabo. Transite ad Insulas Cethim, & videte : & in Cedar mittite & considerate vehementer : & videte si factum est huiusmodi, si mutauit Gens Deos suos : & certe ipsi non sunt Dij : populus vero meus mutauit gloriam suam in idolum.

Anno Christi  
sibi circiter  
450.

Huc aptè referas historiam Nonni Episcopi qui cum Antiochiæ vidisset Pelagiam superbo indutam cultu, continere lachrymas non potuit, & inquirentibus causam, hæc inquit Iudex mea, hæc accusatio & condemnatio mea negligentia, ut qui minus Deo seruiam quàm illa mundo. Væ mihi peccatori. Sic identidem ingemiscebat ad Deum, Illa sibi promisit placere hominibus & fecit ; & ego tibi promisi placere, & mentitus sum, propter pigritiam meam. Numquid tu idem possis gemere ?

### *Alia Veritas contra Prudentes sæculi.*

Filij huius sæculi quò prudentiores in generatione sua sunt, eò sibi maiorem ingenerant imprudentiam.

RATIO EST, Quia quò illi prudentiores in generatione sua sunt, eo sunt magis addicti & affixi suis negotiis secularibus, tantòque minus vacant suæ saluti.

Sed quanto illi minus vacant suæ saluti, tanto sibi maiorem ingenerant imprudentiam.

Ergo & quo illi prudentiores in generatione sua sunt, tanto magis imprudentes, iuxta illud Moysi Dictum : Gens absque



*Filij huius sæculi quod prudentiores in generatione sua, &c. 351*

consilio est & sine prudentia. Utinam saperent & *Deut. 32.*  
intelligerent, ac nouissima prouiderent.

## I. PUNCTVM.

**P** R I M A propositio duas habet partes, & vtraque est eu-  
dens: Idcirco enim dicuntur filij huius sæculi quasi tales  
sint rerum sæcularium amatores sicut filij suorum paren-  
tum: aut sicut filij toti sunt parentum, totique pendent ab eo-  
rum nutu & potestate, ita Illi à negotiis sæcularibus. Quod vel  
ex eo confirmatur quod dicuntur etiam prudentes in genera-  
tione sua, id est, præ ceteris ita intelligentes, & in his omni-  
bus quæ spectant hoc sæculum ita periti quasi qui diutius huic se  
studio applicarint & in eo multum profecerint, seu quasi qui suis  
in rebus domesticis vel augendis vel conseruandis valde sagaces,  
fortunatique sint & beati ab omnibus prædicentur. *Quorum filij* *Pf. 143.*  
*sicut nouella plantationes in iuuentute sua. Filie eorum compositæ, cir-*  
*cumornatæ ut similitudo templi: promptuaria eorum plena, eructantia*  
*ex hoc in illud: oves eorum fætosæ, abundantes in egressibus suis, bo-*  
*ues eorum crasse. Non est ruina macerie, neque transitus, neque cla-*  
*mor in plateis eorum. Beatum dixerunt populum cui hæc sunt. Ita*  
*Psaltes Regius. Ita & Iob egregie: Subleuati sunt confortatique di-* *Iob. 21.*  
*uitijs. Semen eorum permanet coram eis: propinquorum turba & nepo-*  
*tum in conspectu eorum. Domus eorum securæ sunt & pacatæ. Et non*  
*est virga Dei super illos. Et quæ plura ibi habet, vnde & conclu-*  
*dit pro altera propositionis parte: Qui dixerunt Deo, recede à no-*  
*bis, & scientiam viarum tuarum nolumus. Quis est omnipotens ut ser-*  
*uiamus ei? Et quid nobis prodest si orauerimus illum? Sic enim patet*  
*quam parum vacent salutis qui tam multum vacant sæculo; Quod*  
*& Christus Dominus aperte dixit: Non potestis Deo seruire & mam-* *Matth. 6.*  
*monæ. Hi sunt qui verbum audiunt, & arumna sæculi, & deceptio di-* *Marci 4.*  
*uitiarum, & circa reliqua concupiscentiæ introeuntes suffocant verbum,*  
*& sine fructu efficitur.*

Caue tamen putes id tantum esse intelligendum de his qui  
abundant opibus aut qui sunt prouectiores in sæculo: nam &  
qui illis inuident, qui illos æmulantur, qui radicem denique  
malorum omnium concupiscentiam consecretantes, *Volunt diuites* *1. Tim. 6.*  
*fieri, sicut ait Apostolus, inciduntque in tentationem & in laqueum*



diaboli & desideria multa inutilia & nocua quæ mergunt homines in interitum & perditionem: Hi sunt etiam filij huius sæculi, hi sunt vel prudentes in generatione sua vel illius prudentiæ studiosi quam in aliis demirantur & concupiscunt. Hi sunt qui terrena sapiunt, qui solliciti sunt quæ sunt mundi, & diuisi sunt: qui suis denique implicati negotiis non possunt venire ad coenam magnam, aut ad nuptias ad quas inuitantur, *Rogo te*, inquit vnusquisque illorum, *habe me excusatum*. Ita multum curant sua, vt se negligant; ita de temporalibus cogitant, vt æternis considerandis nihil supersit animi; ita presentibus toti adhærent, vt futurorum cogitatio non eos moueat. Oculi eorum, *oculi stultorum in finibus terre*.

1. Cor. 7.

Matth 22.

Luc. 14.

Prov. 17.

## II. P V N C T V M.

**H**ÆC est secunda Propositio, mere stulti sunt, verè imprudentes sunt, & eo sibi maiorem ingenerant imprudentiam, quo minus salutis suæ vacant. Nam si prudentia est, suis vacare negotiis, nonne quo negotia maioris sunt momenti, prudentia ipsius est maiorem in his curam adhibere? Quod si è contra minora præferantur maioribus, atque ita præferantur, vt præ cura minorum, quæ sunt maiora & præcipua prorsus negligantur, nonne tanto erit imprudentia, quanto fuisset prudentia res aliter suas administrare? Sic apte Sapiens; *Sapientia callidi est intelligere viam suam: & imprudentia stultorum errans*. Id est, sicut in hoc vel maxime agnoscitur Sapiencia viri sensati & bene rerum intelligentis, si nouerit quomodo suis in rebus sit sibi cautè incedendum, quam cuique debeat vel præferre vel postponere, quantumque pluris vni aut alteri negotio sit dandum curæ: ita ex opposito manifestatur imprudentia male consultorum hominum qui nihil horum spectant, errantque in limine, dum aberrant ab hoc faciendo negotiorum delectu.

Prov. 14.

Iam vero quantis partibus & circumstantiis negotium salutis nostræ superet omne aliud, imo simul omnia vitæ presentis negotia, si forte nescis: inquire quæ sint partes & circumstantiæ quibus vnum negotium præ alio vere dici possit maioris esse momenti: neque longè abieris vt quod quæres inuenias; nam in Euangelico Negotiatore seu Viltico, ita simul omnes illæ partes præsentantur,



præsentantur, vt propterea videatur nobis propositus in quo eas liceat intueri & omnes rei grauissimæ circumstantes casus.

Primum quod spectatur est rei Qualitas, quando res scilicet de qua agitur, ex se est grauis & momentosa, quando de omnibus vel de magna bonorum parte, quando de honore, de familia vel de vita ipsa forte ageretur, tum certe res esset ponderis & momenti. *Magnitudo periculi summo timore, hominem afficit*, aiebat Romanus Orator, *quod vno iudicio de fortunis omnibus decernit.* Ac. pro Quintio. Sic noster Villicus suo in negotio videbat agi de sua fama, de suis bonis omnibus, de sua libertate, nam erat *diffamatus quasi bona dissipasset.* *Quid hoc audio de te?*

Secundum est, rei Difficultas, *Quid faciam*, Ait Villicus in ius vocatus: quando scilicet difficile est se purgare à crimine, quando res objecta ita patet vt non possit dissimulari, non possit tegi, quando præcipue quod

Tertium est valde consideratum in quouis negotio, quando inquam pars aduersa potens est opibus, & autoritate, nec non ardenti commota Zelo ad rem promouendam. Sic dicitur, *Homo diues esse qui erat Villici Dominus*, & pars eius aduersa cui se longe nouit imparem & cum quo minime possit contendere.

Quartum vero quod maxime curam acuit & sollicitudinem, est incertitudo euentus, suspensio quædam animi dubitantis quid sit futurum, & quò se vertat, atque in illo dubio æstuantis & sese torquentis; *Fodere non valeo, mendicare erubesco.*

Sed quintum rei Caput sollicitudinem magis auget quando ita incertus est animus de euentu, vt nisi obuiam eatur iuri dicendo, vel aliis contra se oppositis testimoniis, actum de se esse videat, iamque patent præjudicia, iam pene sententiam contra se latam audit, vix vlla euadendi spes allucet, conclamata est causa: *Quia Dominus meus aufert à me villicationem.*

Sextum ac denique septimum quod accedens ad alia, rem supra modum facit anxiam & formidandam, Personalitas est quam vocant negotij, & breuitas temporis quo se ipsa persona debet sistere vel imparata vel impotens & omni destituta præsidio. *Redde rationem villicationis tue.* Iam iam, acturum, sine mora, *Iam enim non poteris villicare.*

Quamobrem cum tot tantisque premeretur angustiis miser iste villicus, merito laborabat, merito angebatur, merito secum



quarebat *Quid faciam*. Nam hoc erat vere negotium graue & ponderosum. Hæ profecto erant veræ circumstantiæ quæ grauitatem negotij si quod est tale in sæculo, demonstrabant.

VERVM, qualecumque hoc fuerit opus aut quale vnumquam esse possit in hac vita, nullum vnum est in quo hæ septem enumeratæ partes & circumstantiæ, tam longè lateque pateant quam in nostræ salutis negotio. Reuolue singulas & confer singillatim quid in vnaquaque simile vel dissimile proferatur.

Prima erat, rei qualitas. Quæ porro est in nostro salutis negotio? Qua de re agitur? Nempe de Cœli vel Inferni Æternitate. Expende si potes, quale hoc sit, vel in Cœlo beatum esse, vel in Inferno damnatum ad omnem Æternitatem! Neque aliud disiunctum ab alio ita consideres, quasi de vno tantum ageretur, nam duo hæc simul sic concurrunt vt si cœlo excidas, non tantum priueris summo illo Bono; sed in summum cadas malum: atque in hoc etiam subeundo malo ne prætermittas cogitare, quod potissima mali pars sit, excidisse illo summo bono, sua culpâ, sua malitia. *In malignitate nostra consumpti sumus*. Estne verò par aliquid in sæculo quod huic æternitati bonorum vel malorum possit conferri? *Transferunt illa omnia tamquam umbra*. Vide & lege attentius Caput illud quintum Sapientiæ, in quo gemunt damnati præteritæ leuitatem vitæ.

Sep. 5.

Secunda Condicio seu circumstantia quæ est rei difficultas sic expendi debet, vt nemo quidem sine Gratia saluus esse possit, possit autem cum Gratia cuius etiam subsidio multum de difficultate rerum agendarum diminuatur: at nihilominus negotium hoc quod vocamus salutis tale est vt deprauata hominis considerata natura, perpensisque obstaculis quæ vndequaque occurrunt, dici verè possit opus tam difficile vt ipse Dominus cui nihil esse mirum poterat, admiretur tamen quàm sit difficile quamque arduum, vel vnum Diuitem esse saluum; additque *facilius posse camelum intrare per foramen acus quàm Diuitem in regnum cœlorum*; Neque eum solummodo intelligit diuitem qui abundet diuitiis, sed qui in his confidat, qui his nimis adhæreat, vel acquirendis vel conseruandis plus nimio vacet, siue abundant siue desint, totum ex affectu pendet qui nisi temperetur, perdit tam vere animam quam verum est quod iam audiuius ex Apostolo, *Qui volunt diuites fieri, & cætera quæ supra commemorata sunt*. At

Matth. 19.

I. Tim. 6.



nonne hoc difficile sic temperare animum ab hoc inordinato affectu?

Adde difficultates à Carne & à Mundo de quibus infra seorsim: Oportet enim *in carne non secundum carnem ambulare*. Oportet in mundo & non de mundo esse. Oportet pro humilitatis custodia sapere celare quæ sunt speciosa & magnifica, & tamen oportet ita omnia exercere talenta ut si vni deis, forte audias, *serue male & piger*; *ligatis manibus ac pedibus mitte eum in tenebras exteriores*. Oportet *inimicos diligere*; Oportet *odisse patrem & matrem & quoscunque saluti oppositos*. Oportet *eruere sibi oculum, abscindere manum, & pedem amputare*, quo sensu præcipiuntur in Euangelio. Oportet *Infantem esse*, tametsi proæctus ætate sis. Oportet ita debitoribus remittere sua debita *sicut tibi à Deo vis remitti*. Oportet semper militare, semper *sibi vim facere*; Numquam in Scriptura reperies Cælum memoratum quin simul adjunctum inuenias verbum quod significet difficultatem & pœnam subeundam. Regnum est, sed *vim patitur, & violenti rapiunt illud*. Domus est, sed cuius *angusta porta*. Cœna est magna; regales sunt nuptiæ: sed omnia sunt deserenda ut eò accedas, & habenda vestis nuptialis, Id est, vitæ puritas ne inde ejiciaris. Brauium est, sed *currendum in stadio & illud apprehendendum*. Corona est Iustitiæ, sed *bonum certamen certantibus reposita*. Sic omnes, omnes omnino Sancti visi sunt in cœlo suas habere palmas quas retulerunt de pugna & de victoria, nam non est satis pugnare, oportet vincere, & postquam multoties viceris, si vel semel victus es, sufficit ad interitum sempiternum.

Denique repræsenta tibi hominem in decliui & lubrico existentem loco, valde Infirmum, & externa vi quadam velut præcipientem actum in perniciem & ruinam. Quid eo statu periculosius? Quid tali vitæ genere difficilius? At nonne hic est pene vniversus hominum status? Nonne in mundo vnusquisque versatur velut in lubrico? Nonne in carne velut in infirmitate positus, vix tutò gradum mouet? Nonne à Dæmone in ruinam & perniciem singulis pene momentis agitur? Nonne idcirco dictum est, *via illorum tenebra & lubricum & Angelus Domini persequens eos*?

Atque hinc quod erat tertium de Parte aduersa & opposita liquet quàm sit multiplex, quàm potens, & quàm sollicita in nostram perditionem. Quid enim potentius Dæmone, quid auda-



Feb. 41. cius, quid obstinatius cum nihil timeat, non cicuretur, non fatigetur, non quiescat, *non sit denique super terram potestas qua comparetur ei, qui factus est ut nullum timeret?* Quid carne fragilius? Quid sensibili appetitu & humana concupiscentia validius ad nos rapiendos quocumque trahunt, cum & Scriptura vniuersim affirmet, *unumquemque tentari à sua concupiscentia?* Quantis vero quamque diuersis objectis in peccatum alliciamur, ex ipsa mundi vniuersitate patet, ubi quotquot sunt Creaturæ, *velut in odium facta sunt, & in tentationem animabus hominum, & in muscipulam pedibus insipientium?*

Math. 10. Quid quod *Inimici hominis sunt domestici eius*, sunt affines & cognati, sunt parentes in filios & filij in parentes, aut quia se nimis diligunt aut se ita oderunt ut affectui potius in quamcumque se vertant partem magis indulgeant quam Diuinis præceptis aut consiliis. *Magis honorasti filios tuos quam me.* Quin & ipse Christus, ipse Iudex noster, ipse est aduersarius, ipse tam nobis oppositus quam & nos ipsi resistimus & eius Euangelio contradicimus, de quo expresse dicitur, *Esto consentiens aduersario tuo cito dum es in via cum eo.*

Quod ad quartum spectat de Incertitudine, quænam potest esse major quam quæ ex ipsa fide provenit qua tenemur credere quod scriptum est, *Nescit homo utrum amore an odio dignus sit, sed omnia in futurum seruantur incerta?* Quod si non est desperandum, nec certe est præsumendum, cum tam multa sint quæ timorem nobis incutiant quam quæ spem faciunt.

Sunt autem illa quæ dicuntur Præiudicia & quæ quinto considerantur loco ad dignoscendam negotij grauitatem; nam cum sint anticipata quadam Iudicia & velut quædam sententiæ Iudicis, latæ in simili causa, profecto qui hæc attente perspexerit aut præsumat necesse est aut valde timeat. Primò enim vox Christi est, *Paucos esse qui saluentur*: Deinde illos esse solos qui sunt *in arcta via*, Id est, qui sibi vim faciunt, qui virtuti student & perfectioni sui status, qui humilitatem exercent & patientiam; An tu ex illis es? *Qui non est mecum*, inquit, *contra me est*, An tu cum illo es, prout intelligit, conformem vitam agendo? Math. 18. *Nisi conuersi fueritis & efficiamini sicut paruuli non intrabitis in regnum cælorum.* Itane tu conuersus & effectus paruulus? *Quod hominibus altum est, abominatio est ante Deum.* Nonne tu quantum



potes illud altum insectaris? Omnis ex vobis qui non renuntiat omnibus quæ possidet, non potest meus esse Discipulus. An tu ita omnibus renuntiasti? An parum tibi est quod non sis eius Discipulus? Vtinam frigidus esses aut calidus, sed quia tepidus es, incipiam te euomere ex ore meo. Auderesne te calidum & feruentem affirmare? Non timebis vero te frigidum esse aut tepidum? Non timebis te priuandum illis gratiis quibus abuteris aut certe quibus non vteris? An putatis quod hi præ omnibus peccatores fuerint, quia talia passi sunt. Non, dico vobis, sed nisi pœnitentiam habueritis, omnes simul peribitis. Recogitasne quid sit habere pœnitentiam, quid sit conteri? Quid sit emendare delictum? Quid sit mutare vitam in melius? Nonne tu semper Idem, semper superbus, semper impatiens, & humanæ laudis magis appetens quàm veræ solidæque virtutis? Putasne te exceptum ab hac Sententia, Nullus est qui agat pœnitentiam super peccato suo dicens, quid feci! Omnes conuersi sunt ad cursum suum, quasi equus impetu vadens ad prælium?

Quod postremum est denique de personali vt vocant negotio & de breuitate temporis, nihil apertius dici potest quàm quod, Vnusquisque nostrum pro se rationem reddet Deo, Rationem scilicet villicationis suæ: rationem vniuscuiusque doni accepti seu naturalis seu supernaturalis, quem in vsum, quem in finem, quem in modum res vnaquæque fuerit vsurpata. Standum est unicuique propterea serius ocyus ante tribunal Christi. Nec quantumuis extrema dies differatur, potest dici longa dilatio, cum ubique & semper omni die, singulisque momentis teneatur vnusquisque sic paratus esse ad exitum vt nisi paratus sit, male pereat, improuisa rapiatur morte: Nempe, inquit ipse Iudex, In die qua non sperat, & hora qua ignorat, Velut ab hoste interceptus rapiatur, iudicetur, condemnetur. Videtne tandem quàm simul concurrant omnia quæ hoc salutis negotium supra quoduis sæculare & humanum, demonstrent esse ponderis & momenti?

### III. P V N C T V M.

**F**ILII huius seculi quo prudentiores ergo sunt in generatione sua, eo sibi maiorem ingenerant imprudentiam, Cum illi prudentiores sæculi sint, qui magis vacant suis sæcularibus negotiis quàm salutis: qua in prudentia suam manifestant imprudentiam, quod longe



3. Reg. 17. minus negotium majori præferant. Atque ut de Achitophelē dicitur, quod disposita domo sua suspendio interiit, sic illi dum lucrantur mundum, se perdunt; dum prudenter rebus suis terrenis prospiciunt, suam imprudenter animam negligunt; dum ad modicum corruptilis vitæ tempus sapiunt, ad æternitatem desipiunt. *Vae qui Sapientes estis in oculis vestris, & coram vobismetipsis prudentes! Sicut deuorat stipulam lingua ignis, & calor flamma exurit, sic radix eorum quasi fauilla erit, & germen eorum ut puluis ascendet. STVLTE! hac nocte animam tuam repetunt à te: quæ autem parasti, cuius erunt? Sic est qui sibi thesaurizat, & non est in Deum Dives. CONTENDITE intrare per angustam portam. MAGIS satagite ut per bona opera certam vestram vocationem & electionem faciatis. CVM metu & tremore vestram salutem operamini. Phil. 2. NESCITIS quod ij qui in stadio currunt, &c. Ego igitur sic curro, non quasi in incertum: sic pugno non quasi aërem verberans: sed castigo corpus meum, & in seruitutem redigo, ne fortè cum aliis predicauerim ipse reprobus efficiar.*

Sic Christus, sic Apostoli, quæ verbo, quæ exemplo nos ad salutis vrgent negotium, Tu vero quasi securus & quasi re confecta, non moueberis? *Arrogantia tua decepit te, & superbia cordis tui.*

*Redde rationem villicationis tuæ.*

## VERITAS PRACTICA.

Qui ne terreatur, non cogitat reddendam rationem, magis terrendus est quia non illam cogitat.

RATIO EST, Quia magis ille terrendus est qui minus prospicit imminenti periculo.

Sed qui non cogitat reddendam rationem, minus prospicit imminenti periculo.

Ergo magis terrendus est, Ergo magis cogitare debet hanc reddendam aliquando rationem, sicque sibi prospicere.



I. P V N C T V M.

**C**OGITANTI attentius verba illa: *Redde rationem villicationis tue*: tam pauenda sunt & terrifica, vt quia tam pauenda sunt, vix cogitentur. *Vocem tuam audiui & timui* Gen. 3. *eo quod nudus essem.* Sic Adamus, sic omnis penè homo qui de reddenda vitæ ratione non potest cogitare sine horrendo metu & qui vix potest viuere cum tali metu. Quamobrem vt se illo liberet, cogitationem futuri iudicij abjicit. *Nullus est qui recogitet corde.* Ier. 12. *VIRI mali non cogitant iudicium*, inquit expresse Sapiens, quia Pro. 28. scilicet cogitando terrentur quod omnino nolunt.

At contra tanto magis terrendi sunt & tantò magis cogitare debent illam aliquando reddendam rationem, quantò minus illam hætenus cogitarunt. Nihil in toto iudicij processu tam horrendum & terribile quàm non illud cogitasse iudicium, seu quod idem est, *Qui non illud cogitat, ne terreatur, magis terreri debet quia non illud cogitat.*

Ratio est manifesta, quid est enim quod magis terribile, tremendumque iudicium facit? Nonne est Sententia Iudicis condemnantis animam peccatricem? Nonne est periculum subeundæ illius condemnationis? Nonne est animæ iustus pavor, ne forte sit illa peccatrix anima de qua dicatur, *Quantum glorificauit se, & in deliciis fuit, tantum date illi tormentum & luctum.* Apoc. 18. Totus in periculo futuri huius euentus consistit tremor. Tolle illud periculum, tolle hunc euentum, tollis omnem tremorem ac proinde illud certissime sequitur, quod quanto quis minùs prospicit illi periculo, tanto magis terrendus est, quia totum vt dixi, terribile versatur in illo damnationis periculo, quod qui euadit, securus est, & nil sentit quod ita terreat. Neque enim ipsa suppliciorum æternitas ita timetur, sicut ipsius adeundæ periculum. Nam quantumcumque sit in se terribilis, nullis tamen terrorem facit nisi qui se intelligant in eius viuere seu mori periculo, *tunc videntes turbantur timore horribili.* Sap. 5. *TERRIBILIS expectatio iudicij, & ignis* Heb. 10. *amulatio quæ consumptura est aduersarios.*

II. P V N C T V M.

**S**ED qui non cogitat reddendam rationem, minus prospicit imminenti periculo.



Iob. 34.

l. 25. Mor.  
6. 6.

Quid sit cogitare, & non cogitare reddendam rationem, quidue magis aut minus prospicere imminenti periculo, non potest melius explicari quam verbis sancti Gregorii explanantis istud libri Iob, *Neque enim ultra in hominis potestate est ut veniat ad Deum in iudicium. VERSVS* iste tanto, inquit, maiore disputatione indiget, quanto hoc quod dicit, si negligitur, acrius dolet. Hic nimirum non illud iudicium designatur quod per aeternam retributionem punit, sed quod mente conceptum per conversionem diluit. Ad illud quippe venire non desiderat, quisquis se per illud damnari formidat. Dum ergo dicitur: neque enim ultra in hominis potestate est, ut veniat ad Deum in iudicium, profecto ostenditur esse quoddam iudicium quod quandoque etiam à damnatis ac reprobis desideretur. Et quod est illud nisi hoc de quo Paulus Apostolus dicit: si nosmetipsos diiudicaremus, non utique iudicaremur. & de quo per Prophetam dicitur: non est iudicium in gressibus eorum: Et de quo David ait: Honor regis iudicium diligit, ut videlicet qui iam Deum honorat ex fide, sollicitè indicet quid ei debeat in operatione. Vnde rursum scriptum est: Iudicare coram Domino, & expecta eum: Coram Domino scilicet iudicatur, qui corde Dominum conspicit, & actus suos sub eius presentia, sollicita inquisitione discernit. Quem tanto quis securius expectat, quanto quotidie vitam suam suspectus examinat. Qui enim ad extremum eius iudicium venit, non iam coram illo, sed ab illo iudicatur.

De hoc quoque mentis iudicio obliuiscenti animæ per Prophetam Dominus dicit, Reduc me in memoriam, ut iudicemur simul. Narra si quid habes ut iustificeris. Debet enim vniuscuiusque mens & causas suas apud Dominum, & causas Domini contra se sollicita inquisitione discutere. Debet caute pensare vel quæ ab eo bona perceperit, vel quæ mala bonis illius peruerse viuendo responderit. Quod electi quidem quotidie facere omnino non cessant, Vnde bene Salomon ait, cogitationes iustorum iudicia, accedunt enim ad secretarium iudicis intra sinum cordis, considerant quam districtè quandoque feriat, qui diu patienter expectat; metuntur in his quæ se egisse meminerunt, & puniunt flendo quod perpetrasse se intelligunt: timent subtilia diuina iudicia, etiam de his quæ in semetipsis intelligere fortasse non possunt. **VIDENT ENIM VIDERI DIVINITVS, QVOD IPSI IN SE PER HVMANITATEM NON VIDENT;** Conspiciunt districtum Iudicem, qui quo tardius venit, eo seuerius percutit. Sanctorum etiam Patrum residere conuentum cum eo pariter contemplantur eorumque



que vel exempla vel dicta se contempsisse reprehendunt, atque in hoc secreto interioris iudicii ipsa mentis suae executione constricti poenitendo faciunt, quod superbiendo commiserunt.

Ibi namque aduersum se quicquid se impugnat, enumerant, ibi ante oculos suos omne quot defleant coacervant: ibi quidquid per iram districti Iudicis decerni possit, intuentur; ibi ea patiuntur supplicia; quot patitiment; nec deest in hoc iudicio mente concepto omne ministerium quod punire reos suos plenius debeat. Nam conscientia accusat, ratio iudicat, timor ligat, dolor excruciat: quod iudicium eò certius punit, quo interiorius sentit, quia videlicet ab exterioribus non accedit. Vnusquisque enim cum causam huius examinis contra se aggredi cæperit, Ipse est actor qui exhibet, ipse reus qui exhibetur, odit se, qualem fuisse se meminit, & ipse qui est, per semetipsum insequitur illum qui fuit, atque ab ipso homine aduersus semetipsum fit quædam rixa in animo, parturiens pacem cum Deo.

Hanc cordis rixam Dominus requirebat, cum per Prophetam diceret, attendi & auscultavi, nemo quod bonum est sequitur, nullus est qui agat poenitentiam super peccato suo, dicens; quid feci? Ista cordis humani rixa placata est, cum Propheta suo, de Achab rege semetipsum reprehendente loqueretur, dicens: vidiſti Achab humiliatum coram me? Quia igitur humiliatus est mei causa, non inducam malum in diebus eius.

Quia ergo nunc in potestate est, internum mentis nostra contra nos subire iudicium, recognoscendo accusemus nosmetipsos, & quales fuimus poenitendo torqueamus. Non cessemus, dum licet, iudicare quod fecimus; Audiamus cautè quod dicetur, Neque enim ultra in hominis potestate est, ut veniat ad Deum in iudicium. Reproborum namque esse proprium solet, semper praua agere & nunquam quæ egerint retractare; omne enim quod faciunt, cæca mente pertranscunt, factumque suum, nisi cum puniti fuerint, non agnoscunt. Nonne hoc est imminenti periculo minus prospicere?

### III. PUNCTVM.

**Q**VI non ergo sic cogitat reddendam aliquando rationem, ne forte minus terreatur, magis terrendus est quod illam non cogitet: Quia scilicet sibi terribilius facit iudicium, se manifestius exponit periculo quod imminet Villico dissipanti bona sua, nec rationes suas parato reddere: se vnum ex illis facit quibus dicatur, *Discedite* Matth. 25.



362 Dominica 8. post Pent. Redde rationem villicationis tue.

Iob. 26.

à me maledicti in ignem aeternum qui paratus est Diabolo & Angelis eius. Potestne quidquam aliud audiri grauius: Cum vix paruam stillam sermonis eius audierimus, ait beatus Iob, quis poterit tonitruum magnitudinis eius intueri? Quamobrem apte Idem qui supra & eodem loco sanctus Gregorius. Nunc, ergo, inquit, dum possumus à conspectu aeterni Iudicis, & male cogitata & peius perpetrata deleamus, renocemus ante oculos cordis quidquid peruerse egimus per nequitiam presumptionis, nihil sibi nostra blandiatur infirmitas, atque in his quæ recolit, semetipsam delicate non palpet, sed quanto sibi mali sit conscia, tanto in se benignius sit seuera. Proponat contra se futurum iudicium, & quaque in se sentit districte ferienda per sententiam iudicis, hæc in se pie feriat per pœnitentiam conuersionis.

Modus autem proponendi iudicij varius & multiformis esse potest pro varietate personarum qui de illo cogitant, vel loquuntur, aut audiunt. Figuram quandam refert sanctus Ioannes in Apocalypsis capite primo quæ multa distinctè continet. Breuiorem formam ex hodierno Euangelio mutuari licet, dum ex triplici capite demonstrabitur, quam sic districtum & formidandum illud iudicium.

Iob. 9.

Primum caput est, à persona Iudicis qui est sapientissimus, nihil vt illum lateat: Integerrimus, nihil vt non punitum omittat; Optimus Maximus, nihil vt obliuiscatur bonorum quæ contulit in suum vnum à nobis impendenda cultum; Potentissimus denique nihil vt velit quod non possit. Si fortitudo queritur, robustissimus est, si æquitas iudicij, nemo audet pro me testimonium dicere.

Luc. 12.

Dan. 5.

Secundum caput est, quid veniat in iudicium, quæ sit illa villicatio cuius est reddenda ratio, quid sit vnde iudicemur, nempe tota ipsa quam egimus vita. Tota vitæ facta, dicta, cogitata: si respondeant donis acceptis: si virtutum statui propriarum mensura & pondere fuerint appensa omnia: si quantum quisque debuit, fuerit humilis, patiens, pius in Deum & proximum: si dignos arbor tulerit fructus, si talentum multiplicatum, si præcincti lumbi, & lucernæ ardentes in manibus, ac similes seruis expectantibus Dominum suum, vt cum venerit & pulsauerit confestim aperiant ei. Sic expresse præscriptum à Iudice: Sic expressa iudicij refertur forma, Mane, Thecel, Pharez Numerauit Deus regnum tuum, & compleuit illud, Id est vita, atque tempus.



*Qui ne terreatur, non cogitat reddendam rationem, &c.* 363

*Appensus es in statera, & inuentus es minus habens. Diuisum est regnum tuum; Et datum terræ corpus, anima vero dæmoni; Vide Locum Scripturæ, & expende accurate.*

Tertium caput, ipse est homo iudicandus, qui præterquàm multis peccatis onustus est, & paucis ornatus bonis, tam parùm sibi prospicit, quo ipso tempore datur ei facultas bene gerendæ rei; vt *Matth. 25* vel hanc vnā ob incuriam & acediam merito sic condemnat. *Luc. 19.* *Indico: sciebas me austum, &c. Inutilem seruum ejicite in tenebras exteriores, illic erit fletus & stridor dentium. FUGITE ergo à facie gladij, quoniam ultor iniquitatum gladius est, & scitote esse iudicium.* *Iob. 19.*

---

*Appendix ad præcedentem, aut separatim proponi posset in hæc Sapientis verba:*

*Ante Iudicium interroga teipsum, & in conspectu Dei inuenies propitiationem. Ecclesi. 18.*

## VERITAS PRACTICA.

*Qui se interrogat ante Iudicium, interrogatus in Iudicio, facilius respondebit.*

*RATIO EST, Quia is securius respondebit in Iudicio qui se hîc accusauerit & iudicarit.*

*Sed qui se interrogat ante Iudicium, se hîc accusat & iudicat. Ergo & interrogatus in Iudicio, securius respondebit. Ac proinde audiendus Sapiens, Interroga teipsum: Cum vel maximè Dominus ad id nos prouocet; Redde rationem villicationis tuæ.*



## I. P V N C T V M.

**C**VM securius respondere in Iudicio, sit idem ac liberari, non iudicari, non condemnari: plane liquet quod quise hic accusarit & iudicarit, securius respondebit, quia non iudicabitur, sic affirmante Apostolo, *Quod si nosmetipsos diiudicaremus, non utique iudicemur.* Quam in sententiam sic præclare sanctus Augustinus: *Peccata siue parua, siue magna, impunita esse non possunt, quia aut homine pœnitente, aut in Iudicio, Deo iudicante plectuntur. Cessat autem vindicta Diuina si conuersio præcurrat humana. Amat enim Deus consistentibus parcere, & eos qui semetipsos iudicant non iudicare.* Quid optabilius? Hoc ipsum Idem habet Tractatu 12. in Ioannem, ad hæc Verba: *Dilexerunt magis tenebras quam lucem. Inde incipiunt, inquit, bona opera tua, quia accusas mala opera tua. Initium operum bonorum, confessio est operum malorum.* Quid expeditius? Ac fufius etiam in Psalmos vbi hoc eius dictum satis frequenter obuim: *Si homo se cognoscit, Deus ignoscit.*

I. Cor. II.

In Sent.  
Sent. 210.

In Ps. 31.

## II. P V N C T V M.

**S**ED qui se interrogat ante Iudicium, sese hic accusat & iudicat. Quadruplex quæstio seu Interrogatio sibi ab vnoquoque facienda discitur ex Euangelica Parabola, vnde facile est se accusare & iudicare.

Prima est: si quis homo bona sua tibi credidisset, aut apud te deposuisset cum hac mente & obligatione vt facta recta conseruares: velleſne ita tibi ea vsurpare vt non posses Creditori repetenti restituere, ac propterea in ius vocareris, malæ fidei accusareris, carceri perpetuo mancipareris, atque aliis dedecorosis pœnis afficereris? Velleſne eò te adducere? Omnino nolles, bene memineris.

Secunda quæstio; At si forte quod Deus auertat, ex aduersa aliqua fortuna tale quid tibi contigisset, iam iamque traheris ad Iudicium, de bonis tuis decerneretur: nec pecunia, nec amicis, nec consilio, nec vlla re posses te iuuare & te periculo eripere, nonne esset quod tremeres & angereris? Responde.

Tertia quæstio. Tum verò si quis amicus opportunè occur-



reret & amicè confuleret aliquid quod saluo honore & bonis omnibus tete præsenti periculo erueret, nonne illud audires consilium? Aut si non audires, nonne duplici pœna dignus esses, tum ob dissipata bona, tum ob neglectum remedium? Responde hîc etiam.

Atqui hoc est negotium tuum, hic status tuus; Hæc est quarta interrogatio tibi facienda, quæ multas alias complectitur & quæ tibi Parabolam aptissime applicat. Nonne tu bona accepisti à Domino? *Quid enim habes quod non accepisti?* Siue in temporalibus, siue in naturalibus, in corpore & in animo, siue denique in spiritualibus, cum sis Christianus Catholicus & multis præuentus gratiis. Nonne hæc à Deo sunt vniuersa? Responde & fatere hoc ipsum quod quî dicebat: *E cælo ista possideo.* 1 Cor. 4.  
2 Macch. 7.

At verò, quomodo hæc impendisti? An bona fide prout tibi Dominus ordinarat? Nihil erat quod non ad Dei Gloriam, vel tuam salutem referre debuisses; Itane verò retulisti? Responde. Quid ergo ex his effecisti, quem in vsum conuertisti; redde rationem villicationis tuæ. Quid de accepto lumine fidei? Quid de cognitione & timore Dei? Quid ex omnibus auditis ad salutem? Quæ virtus, quis profectus, quîs prouentus? Possesne aliquid ex tuis omnibus laboribus, ex curis omnibus, ex tot solitudinibus, tot angustiis, tot itineribus & susceptis negotiis, vel vnum producere quod ad Dei honorem & salutem tuam direxeris? Nonne omnia terram spectarunt, nonne omnia ad hanc solam præsentem vitam, quasi vni terræ natus esses, & non coelo, sicut ipsæ belluæ animantes ad pastum incuruatæ? *Homo ps. 48. cum in honore esset, non intellexit, comparatus est Iumentis insipientibus, &c.* Si à iumento aut à famulo tuo non accepisses plus seruitij quàm Deus à te accepit, quid diceres, quid cogitares?

Sed si etiam loco seruitij, tua tibi famulus subripuisset, si injuriam nomini, si corpori plagas, si familiæ damnum intulisset! Hoc est scilicet quod tu Deo retribuisti, non contentus bona eius dissipare, ac nihil illi seruitij reddere, tu insuper eum offendisti iuramentis, murmure, detractione, libidine. *Hæcine Dcut. 32. reddis Domino, popule stulte & insipiens!* Nonne hæc omnia nouit Deus? Nonne ex his in iudicium te adducet? Nonne putas omnium exactissimam rationem esse reddendam? Nonne est ergo



quod formides & paueas? An habes quod respondeas dinumeranti omnes gressus tuos?

Hæc & similia si pie & serio cogitentur, inducent profecto cum Diuina Gratia Cogitantem ad dicendum cum Villico: *Quid faciam?* Tum occurret, faciendam esse accuratam totius vitæ Confessionem, ac deinde formandam efficacem resipiscendi voluntatem. *Dixi, confitebor aduersum me, in iustitiam meam. Dixi, nunc capi.*

Pf. 31.  
Pf. 76.

### III. P V N C T V M.

**S**IC Diuina igitur fauente Gratia, qui se interrogat ante Iudicium, interrogatus in Iudicio securius respondebit, facilius absoluetur, & ampliore inueniet gratiam, Quia sic præoccupat faciem Dei in confessione, sic præuenit eius iudicium sese accusando & iudicando, sic prospicit futuris poenis eas auertendo per seriam emendationem; sic denique se componit quemadmodum exigunt sacre Scripturæ ac sancti Patres ut quam promittit Deus gratiam & misericordiam, consequatur. *Ante mortem confitere,* inquit Idem qui supra Sapiens, *à mortuo, quasi nihil perit confessio. Confiteberis uiuens, uiuus & sanus confiteberis, & laudabis Deum, & glorificaberis in miserationibus illius.* Quasi diceret, ne expectes confiteri post mortem, tunc enim nulla prodest confessio. Vel sic: Ne differas confessionem usque ad proximam mortem, quo extremo vitæ tempore vix quidquam libere & valide possis: sed dum sanus es, id totum effice cum Gratia, quod instante morte velles esse factum; sicque fiet securius.

Ecclesi. 17.

Ad Viral.  
Et in Plagan. Grand.  
In Ps. 106.

Ep. 4.

*Hæc Christi mei lex, ait sanctus Gregorius Nazianzenus qui fuisse de hoc argumento. Et alibi; Magni vitij medicina est Confessio & peccati fuga. Sanctus item Chrysostomus: Ripe tu quisquis es peccator remedia. Confessio asserat salutem: Viue remediis qui moriturus fueras aliquando peccatis. Quid horres fateri quod commisisti?* Sic apte sanctus Hieronymus de Dauide: *Tantum profecit ut dudum peccator & penitens transferit in Magistrum, & dicat: docebo iniquos vias tuas, & impij ad te conuertantur. Confessio enim & pulchritudo coram eo ut qui sua confessus fuerit peccata, & dixerit, putruerunt & corrupte sunt cicatrices mee, feditatem vulnerum in sanitatis decorem commutet. Vere itaque sanctus Bernardus: In animam suam*



Qui se interrogat ante Iudicium, interrogatus in Iudicio, &c. 367

peccat qui se excusat repellens à se indulgentiæ medicinam; quam sibi <sup>Serm. 26. in Cant.</sup> videlicet accersit qui se accusat. Sic & sanctus Augustinus in illud Psal. 31. Quoniam tacui inueterauerunt ossa mea; quoniam die ac nocte grauata est super me manus tua. Noluit humiliari confessione iniquitatis sue, humiliatus est pondere manus Dei. Tum pergens cum Dauid: Conuersus sum in erumna mea, dum configitur spina. Ex ipsa aggravatione manus tue, ex ipsa humiliatione conuersus sum in erumna mea; factus sum miser, confixa est mihi spina, compuncta est conscientia mea. Quid factum est, dum configeretur spina? Datus est ei sensus doloris, inuenit infirmitatem suam: & ille qui tacuerat confessionem peccati sui, modo quid fecit confixa spina? DELICTVM meum cognitum tibi feci, & iniustitiam meam non abscondi. Dixi, confitebor, seu pronuntiabo aduersum me iniustitiam meam Domino & tu remisisti impietatem peccati mei. NON iam pronuntiat sed pronuntiat se pronuntiaturum: & Ille iam dimittit. Eo ipso quo dixit pronuntiabo, ostendit quia nondum ore sed corde pronuntiauerat: Hoc ipsum dicere, pronuntiabo, pronuntiare est; ideo, & tu remisisti iniquitatem peccati mei. Confessio vero mea ad os nondum venerat: Dixeram enim pronuntiabo aduersum me: Verumtamen Deus audiuit vocem cordis mei. Vox mea in ore nondum erat, sed auris Dei iam in corde erat.

O Diuinæ facilitatem auris, ad humani cordis mollitiem! ô nimis dura peccatorum corda si non emollescant ad tantam Dei bonitatem!

De iudicio extremo seu generali, seu particulari, vide in singulis partibus, verbo *iudicium*, & nominatim in hac 3. parte, Hebdomada decima ubi de Missionibus.

---

*Et ego dico vobis, facite vobis amicos de mammona iniquitatis, ut cum defeceritis, recipiant vos in eterna tabernacula. Luc. 16.*

## VERITAS PRACTICA.

Importuni, opportuni.



368 Dominica 8. post Pent. Facite vobis amicos, &c.

*SENSVS EST, Quod illi ipsi quos modo habes magis importunos in petendo, possunt esse aliquando tibi magis opportuni amici, si quod petunt, obtineant.*

*RATIO EST, Quia illi censendi sunt magis opportuni amici qui magis opportune valeant tibi adesse.*

*Sed quos modo habes magis importunos in petendo, magis opportune valent aliquando tibi adesse.*

*Ergo illi magis opportuni Amici: & magis, magisque colendi sunt.*

I. P V N C T V M.

**E**VANGELICÆ Summa Parabola tribus his constat partibus. Prima est vt intelligamus nos non tam esse rerum temporalium Dominos, quam dispensatores qui earum omnium rationem reddere debent vero Domino Deo. Secunda est, quod si iam exigeretur à multis, illa bonorum acceptorum ratio, vix eam possent reddere. Tertia denique quod nisi omnino desipiant, prouideant mature oportet suis rebus exemplo huius Villici qui si probatus est à suo Domino quod sapienter fecisset, licet fraudulenter egisset, quanto magis à Deo illi laudabuntur, qui sibi de suis illis bonis quæ superflunt, amicos faciant à quibus opportune iuuari possint, quando de aliis quæ male impenderunt, vocabuntur in ius diuinamque iustitiam. Quamobrem hæc est extrema clausula: *Et ego dico vobis, facite vobis amicos de mammona iniquitatis*, Id est, de diuitiis quæ dicuntur iniquæ, non ex se, sed ex earum vsu qui plerumque iniquus est, siue in illis comparandis siue in possidendis siue in consumendis. Fiunt autem ex illis amici qui nos deficientes recipiant in æterna tabernacula, quando ex illis fiunt eleemosynæ quarum intuitu, & pauperum orationibus exoratus Dominus concedat felicem exitum quibus alioquin non nisi miserandus contigisset.

Quia vero iam sic importuni videntur Pauperes vt eorum penè fastidium quosque subeat: diligenter id cauendum, & quos habes modo *importunos* sic considerandi sunt tanquam futuri aliquando *magis opportuni amici*, si eorum importunitatem benigne toleraris & inopiam subleues.

Ratio



Ratio est plurimum expendenda, quod illi sine dubio sint censendi magis opportuni amici, qui magis opportune, Id est, in grauiori necessitate valeant tibi adesse, tibi patrocinari, & te omni ope, si quo labores periculo, liberare; Nonne sic Sacri profanique Authores veros à falsis amicos denotant? *Est enim amicus* Eccles. 6. *secundum tempus suum*, inquit Sapiens, & non permanebit in die tribulationis. *Est autem amicus socius mensa*, & non permanebit in die necessitatis. *Amicus si permanserit fixus*, erit tibi quasi coequalis, id est, æqualem tecum fortietur sortem: in hoc erit vere amicus, si quæ tua sunt ærumnosa velit ex æquo participare, ac illa quæ fuerint beneficia, seu foelicia: tuque illi parem rependes vicem.

O non minus rara quam vera fidelis amici nota.

## II. PUNCTVM.

**S**ED quos habes modo magis importunos in petendo, magis opportune valent aliquando tibi adesse.

Quò enim sunt magis importuni, major est patientia, maiorque charitas dum illis subuenitur, atque ita magis certò amici comparantur, quo supra dictum est modo, licet id nesciant Pauperes nec aduertant. *Iustitia eius manet in sæculum sæculi*, Nempe *psal. m.* *eius qui dispersit, dedit pauperibus*, & qui miseretur & commodat *disponet sermones suos in iudicio*, id est, habebit quod respondeat, & quo se accusatus defendat, ne iudicetur nec condemnetur.

Quod egregia quidem Parabola sanctus Ioannes Damascenus in historia Barlaam & Iosaphat representauit, sed eam liceat paulo liberius sic ad rem nostram explanare:

Homo quidam singulari quatuor amicorum consortio conui-ctusque gaudebat, licet eorum vnum quem quartum dicimus, non ita coleret ac tres alios. Incidit vero ille in tam operosum negotium, vt nisi ab amicis iuuaretur, par conficiendo numquam esset negotio; Quamobrem primum illorum adit conquirendi præsidiij gratia. Sed ô perfidum amici pectus! statim ac hominem vidit, aduertens quod erat, operis, è conspectu sese proripuit, nec se ultra spectandum dedit.

Secundus itaque conuenitur amicus qui paulo quidem attentius moerentem audit, sed moeroris aliud se habere leuamen negat quam vt telæ lineæ cuius erat factor aut venditor, partem



aliquam impertiret; quod profecto perexile tanto negotio leuamen erat.

Quamobrem tertius ex amicis adeundus fuit, qui ut erat in pietatem pronus, grauissimè funestum hominis tulit casum: neque modo auditis ingemuit calamitatibus, sed ut damnum inde impendens auerteret, ultro se obtulit aditurum Patronos, Iudices atque alios quibuscum esset causa conferenda: Iamque videbatur eorum domum cum calamitoso Cliente pergere: sed quæ est humanæ fragilitas amicitiae, cum ad fores domus peruentum est, non ultra pedem porrexit, neque domum ingressus, neque cum Iudice causam egit, sed quâ prius venerat via regressus est nec deinceps comparuit.

Quid hic agat infortunatissimus hominum, quem sic omnes amici deserunt, & qui solus nihil possit agere? Superest vnus è quatuor quos dilexit, sed tam parum cultus, aut tam prope neglectus ut vix eum ausit compellare de amicitia, nec quid opis ab eo postulare. Facit extrema tamen rei capitalis angustia ut quantumcumque parum de amico meritis, non vereatur negatam ab aliis gratiam ex ipso emendicare; Nec frustra, nam Is statim persuasus adit Eum à quo vno summa rei pendeat, causamque amici tam genèrose prosequitur, ut quod erat optandum obtineretur.

O qui tum animi motus ab homine liberato concitati! quid de infidis illis tribus amicis sentire crederes? Quid de hoc vnico prædicare, gratulari, congaudere? Possent ista tractari pensculatius, nisi quod te magis spectat, quò spectet illa Parabola, malis explorare.

Tu nempe, Lector, si nescis, tu ille homo es cui capitale incumbit negotium peragendum: cui quatuor singulares ita esse amici dicuntur, ut tres ex illis quidem præcipue foueas, quartum vero parui ducas. Tuum, Lector, negotium, æterna salus est animæ. Statutum est *hominibus semel mori: post hoc autem iudicium*. Stabis ante tribunal Christi de vniuersa vita causam dicturus; Ante satis paratum & instructum ab omnibus putas ut nullius subsidio tum te indigere arbitreris? Vnde illa porrò tibi comparabis subsidia? Numquid ex tribus illis quos tam carè foues amicis? Experire, compella singulos, vnumquemque tibi iam aduoca, quasi iam de negotio disceptaretur.

Primus quem maxime colis, est voluptatis sensus. Quid tan-



dem conferet animæ tuæ sistenti coram supremo iudice? Nonne is statim auolat, atque anima corpore soluitur?

Secundus est pecuniarum amor: Quid vero ex pecuniis referes, nisi Linteolum quo mortuum corpus inuoluatur?

Tertius est mundi qui vocatur respectus aut affectus; at quæso te quid mundus iste aliud possit quàm vt te morientem deploret, te mortuum lugeat, & te quidem ad sepulchrum, ad illam *aternitatis domum* ducat, sed non vltra, non interno eripiat, non liberet condemnandum. Eccle. 12.

Videsne quàm infidi, quàm inualidi, quàm impotentes sint illi tres amici tui? Quartus vero quem præfers quidem velle diligere, sed quem ita tamen negligis vt nisi animo pene inuito & poenitenti quidquam in eius edas gratiam; Cultus est bonorum operum quæ dicuntur misericordiæ seu pietatis in pauperes & egenos. Nonne hunc diligis? Diligisne vero sicut pecuniam, sicut naturæ commoda, sicut mundi honorem? Et tamen ille est, ille vnus amicus est qui te ad Iudicem tuum constanter comitetur, qui causam dicat & obtineat, neque te vnquam deferat, donec omni metu soluto te in æterna recipiat tabernacula. *Tanta vis est eleemosynæ*, inquit sanctus Ioannes Chrysostomus, *cum multa fiducia* Homil. 36. ad Pop. suos introducit alumnos, est enim cæli nota ianitoribus, sponsalis thalami fores obsecrantibus. Ac rursus alibi, pennata est & leuis, *super* Homil. 32. autem solium regale consistit. Quando iudicamur repente subuenit, & in Epist. ad Hebr. nos à suppliciis liberat imminentibus: alis suis nos contegens. Nonne hoc est opportune nobis adesse? Nonne hoc est summopere nobis optandum?

### III. PUNCTVM.

**Q**VOS igitur modo habes magis importunos in petendo, magis esse possunt aliquando tibi opportuni: Cum in summo illo beatitudinis æternæ negotio te, cunctis aliis deferentibus bonis & amicis, soli pauperes quibus bene feceris, sola illa bona quæ in illos contuleris, tibi patrocinari possint & adesse. *Premium enim bonum tibi thesaurifas in die necessitatis*, quoniam eleemosyna ab omni peccato & à morte liberat & non patietur animam ire in tenebras. *Fiducia magna erit coram summo Deo, eleemosyna omnibus facientibus eam.* Tob. 4.



Is. 1.

Ibid. 58.

Serm 10. de  
Quadrage.Homil. 35.  
ad Pop.  
& Serm. de  
Miseric.

Et licet alia valere possint etiam bona opera, licet oratio & ieiunium magni sint apud Deum meriti, maioris esse tamen eleemosynam vel ex eo manifeste patet, quod cum Iudæi multum ieiunarent, atque etiam crebras funderent preces, non se tamen illis placaturum affirmat Deus, nisi sua pauperibus largiantur. *Cum multiplicaueritis orationes vestras, non exaudiam. Subuenite oppresso, iudicate pupillo, defendite viduam: & venite & arguite me dicit Dominus.* Et rursum: *Nonne hoc est magis ieiunium quod elegi: dissolue colligationes impietatis, solue fasciculos deprimentes; dimitte eos qui confracti sunt, liberos: & omne onus disrump.* *Frangere esurienti panem tuum, & egenos vagosque induc in domum tuam: cum videris nudum, operi eum, & carnem tuam ne despexeris: tunc erumpet quasi mane lumen tuum & sanitas tua citius orietur, & anteibit faciem tuam iustitia tua, & gloria Domini colliget te.*

Quibus sacris sermonibus conformiter sanctus Leo: *Nulla, inquit, deuotione fidelium magis Dominus delectatur, quam ista quæ pauperibus eius impenditur: & ubi curam misericordia inuenit, ibi imaginem suæ pietatis agnoscit.*

Quamobrem quod ad propositæ Veritatis praxim accedit proprius, videndum ne contra importunos pauperes accendamus ut fieri solet vehementius: sed potius hinc emollescamus & excitemur ad promptiorem beneficentiam. Quò illud egregium spectat S. Chrysostomi; *Amabile sanctorum omne genus, charissimi, proptereaque Paulus dicebat: induite vos sicut electi Dei sancti & dilecti, viscera misericordiæ benignitatem, humilitatem.* Vides verbi virtutem & quomodo nos semper vult esse misericordes? *Non enim dixit, misere-mini simpliciter, sed induite vos, ut sicut vestimentum semper nobiscum est, sic & eleemosyna: nec simpliciter dixit, misericordiam, sed viscera misericordiæ, ut naturalem imitemur amorem.* At nos contraria facimus, & si quis unum quidem petens obolum accedat, contumeliis & conuiciis insectamur, ac impostorem vocamus: *Non horres homo & erubescis impostorem propter panem vocans? Si vero talis & imposturam facit, propterea cui misericordia tribuatur dignus est, quod ita fame premitur ut talem subeat personam.* Quin hoc & nostræ crudelitatis est redargutio: *Nam quoniam facile dare non sustinemus, innumeras coguntur artes excogitare, ut inhumanitatem nostram fallere possint & emolliere sentitiam.*

Similia quadam habet & ad praxim valde apta sanctus Gre-



gorius ad hac Iobi verba: Si despexi pratercuntem, eo quod non habuerit indumentum & absque operimento pauperem, si non benedixerunt mihi latera eius, & de vellerebus ouium mearum calefactus est. 1. 21. Mor. c. 13. & 14.

QVO D pauperem non despexit, ait sanctus Doctor, virtutem humilitatis exhibuit: quod autem operuit, pietatis. Duæ quippe ista virtutes ita sibi met esse connexæ debent, ut vicario semper opere fulciantur, quatenus nec humilitas cum veneratur proximum, largitatis gratiam deserat; nec pietas cum largitur intumescat. Erga indigentiam itaque proximi humilitatem pietas fulciat, humilitas pietatem, ut cum indigentem rebus necessariis natura tuæ consortem videris, nec per impietatem desinas tegere, nec per superbiam negligas venerari quem tegis. Nam sunt nonnulli qui mox ut ab egenis fratribus fuerint necessario postulati, post dona largituri, in eos prius contumeliosa verba iaculantur: qui etsi rebus ministerium pietatis perficiunt, verbis tamen gratiam humilitatis perdunt, ita ut plerumque videatur, quia illata iam iniuria satisfactionem solvunt, cum post contumelias dona largiuntur. Nec magni est operis quod postulata tribuunt, quia ipso donationis suæ munere vix eundem excessum sermonis tegunt. Quibus bene per Ecclesiasticum librum dicitur: Omni dato non des tristitiam verbi mali. Et rursum, ADDE verbum super datum bonum, & utraque cum homine iustificato, videlicet ut datum exhiberi debeat per pietatem, & bonum verbum tribui per humilitatem.

At contra alij egenos fratres, non student rebus fulcire cum possint, sed blandis tantum sermonibus fouere quos vehementer Iacobi prædicatione sancta reprehendit dicens, si autem frater aut soror nudi sunt & indigent victu quotidiano, dicat autem aliquis ex vobis: ite in pace calefacimini & saturamini, non dederit autem eis quæ necessaria sunt corpori: quid vobis proderit? Quos Ioannes quoque Apostolus admonet, dicens FILIO LI mei non diligamus verbo nec lingua, sed opere & veritate. Dilectio namque nostra semper exhibenda est & veneratione sermonis & ministerio largitatis.

Multum vero ad edomandam dantis superbiam valet, si cum terrena tribuit, Verba sollicitè Magistri cælestis penset qui ait: FACITE vobis amicos de mammona iniquitatis, ut cum defeceritis recipiant vos in æterna tabernacula. Si enim eorum amicitias æterna tabernacula acquirimus, dantes proculdubio pensare debemus, quia Patronis potius munera offerimus quam egenis dona largimur. Hinc per Paulum dicitur: VESTRA abundantia illorum inopiam suppleat, ut & illorum



374 FERIA 2. Hebd. 8. post Pent. Parabola seminis seminati, &c.

*abundantia vestra inopia sit supplementum. Ut videlicet sollicite perpendamus, quia eos quos nunc inopes cernimus, abundantes quandoque videbimus: & qui abundantes aspicimur, si largiri negligimus, quandoque inopes erimus. Qui itaque nunc temporale subsidium pauperi tribuit, ab eo postmodum perpetua recepturus, ut ita dicam, quasi ad frugem, terram excolit quæ quod acceperit uberius reddit. Restat ergo ut numquam elatio surgat ex munere, quando videlicet diues ex eo quod pauperi tribuit, agit ut in perpetuum pauper non sit.*

Vide in 4. parte, Hebdom. 17. FERIA 5. ubi apte contra dissipantes bona sua, vel non bene aut bono fine usurpantes; hæc duplex habetur Veritas:

Nisi diues diuitias faciat bonas: diuitiæ malum faciant diuitem.

Aut cœlum perit diuitiis, aut emitur.



HAC Hebdomada, sex illæ nobiles Parabolæ quæ occurrunt in Euangelica historia considerandæ, conformes Practicas Veritates suggerent, quæ ad profectum in via spirituali, atque ad vniuscuiusque perfectionem in suo statu comparandam vel conseruandam, plurimum valere poterunt.

## FERIA SECVNDA.

### PARABOLA SEMINIS SEMINATI

IN TERRAM, TRIPLICI EX PARTE

IN FOLICEM.

*Exiit qui seminat, seminare suum. Luc. 8.*



## VERITAS PRACTICA.

Verbum Dei non redit vacuum; aut profit necesse est recipienti vel obsit.

RATIO EST, Quia si verbum Dei non profit recipienti, recipientis est resistentia quæ non erit impunita.

Atqui hæc est ordinariè pœna qua talis punitur resistentia, ut quod prodesse poterat, contrà obsit & noceat.

Ergo verbum Dei non redit vacuum, ut est apud Prophetam: 15. 55. aut profit necesse est recipienti vel obsit: quamobrem longe satius est sic attentum esse verbo Dei recipiendo, ut magis profit quàm obsit.

### I. PUNCTVM.

**H**EC potest Parabola de qua iam supra dictum est in secunda Parte, Dominica Sexagesimæ, Vbi plures proponuntur ex illa Veritates.

Debet vero considerari paulo attentius eius Interpretatio quæ sic à Christo Domino traditur: *Semen est verbum Dei. Qui autem secus viam, hi sunt qui audiunt, deinde venit Diabolus, & tollit verbum de corde eorum, ne credentes salui fiant. Nam qui supra petram, qui cum audierint, cum gaudio suscipiunt verbum, & hi radices non habent, qui ad tempus credunt, & in tempore tentationis recedunt. Quod autem in spinas cecidit, hi sunt qui audierunt, & à sollicitudinibus & diuitiis & voluptatibus vite euntes suffocantur, & non referunt fructum. Quod autem in bonam terram, hi sunt qui in corde bono & optimo audientes verbum retinent & fructum afferunt in patientia.*

Iam vero Vide vtra ex illis quatuor terra sis. An hæc bona quæ refert fructum ex meditationibus, ex libris, ex Concionibus, aut quacumque tandem ratione recipiatur cœlestis illa sementis? An inde proficis? An inde à te deficis? Nam hic verus profectus. Quod si nullum aduertis aut modicum fructum, quid obstat?



Ier. 22.

Quod genus terræ ex illa infausta triplici quæ commemoratur, tibi magis conuenit? An illa patens & omnibus obuia? An quæ petris & saxis induruit? Aut quæ forte spinis & tribulis est confita? Contemplare attentius, & audi Prophetam idcirco ter ingeminantem: *Terra, terra, terra, Audi sermonem Domini.* Audi saltem paulo attentius modò, vt discas sic deinceps audire. Audi propositam Veritatem quæ duo continet ad permouendos animos efficaciora incitamenta, *premium & pœnam.* Sic enim res habet ex ipsis Dei verbis apud Isaiam, *Verbum Dei non redit vacuum, aut profit necesse est recipienti vel obsit.* Nonne hoc satis magnum parui laboris proemium vt ex quocumque tandem verbo Dei audito nihil tibi si velis pereat, nihil tibi non multum profit? Aut certe si te tua commoda spiritualia parum mouent, moueant saltem detrimenta, & disce quod si non profit, oberit.

Zach. 7.

Ratio est satis quidem obuia & familiaris, sed valde utilis ac sape in alios vitæ spiritualis vsus reuoluenda. Hoc est enim commune omnibus Gratiarum Instrumentis vt si non vsurpentur, vel si non ita digne & fideliter recipiantur, vt profint recipienti, recipientis semper est culpa & resistentia: Quia cum illa ex se aut ex sua Institutione sint Diuina & Diuinam contineant Gratiâ, quæ adjunctum semper effectum habet nisi impediatur; impediri autem ordinarie non possit nisi defectu recipientis; Certe quoties non habebunt illum suum effectum, dicendus est toties sese illi Recipiens opponere & resistere: siue id directe & positivè fiat, nolendo expresse consentire verbo Veritatis: siue indirecte & negativè fiat, volendo alia quæ cum Diuino verbo coherere non possent. *Noluerunt attendere, & auerterunt scapulam recedentem.*

Job. 25.

S. Greg.

12. Mor. 21.

Quod autem talis resistentia non sit impunita, & facile est conijcere ex grauitate culpæ, & ex grauibz quæ illi intentantur, vbique Scripturarum, minis. Culpa est certe grauis, & culpæ reus prope illi est similis de quo dicitur, *Tetendit aduersus Deum manum suam, & contra omnipotentem roboratus est. Cucurrit aduersus eum erecto collo, & pingui ceruice armatus est.* Quid est enim aliud resistere verbo Diuino, quam ipsi Deo? Quid est autem Deo resistere, nisi contrà impudenter & erecta quodammodo fronte sese roborare, quasi nihil Eum cures, nihil eius verba, nihil promissa, nihil minas? *Videte, inquit Apostolus, ne recusatis loquentem:*

Hebr. 12.



*Verbum Dei non redit vacuum, aut profit necesse est, &c.* 377

*loquentem : si enim illi non effugerunt recusantes eum qui super terram loquebatur: multo magis nos qui de cælis loquentem nobis auertimus. Id est, si Iudæi non effugerunt poenas suæ resistantiæ, multo minus putetis vos eas posse fugere. Tanto grauius quisque punietur quanto certius cognouerit verbum quod audit, & negligit esse Verbum Dei.*

Vide in 2. parte, In die Ascensionis Domini.

## II. P V N C T V M.

**A**T QVI hæc est ordinariæ pœna quâ talis punitur resistantia, ut quod prodesse poterat, contra obstat, & noceat.

Hoc ipso scilicet Diuino verbo quo poterant illuminari & accendi ad omnem pietatem, magis obscurantur, magis frigescunt, & magis inde ab omni pietate auertuntur. *Deprauant enim Scripturas*, inquit sanctus Petrus, *ad suam ipsorum perditionem*, quod alius Apostolus sic declarat; *quæcumque quidem ignorant, blasphemant: quæcumque autem naturaliter tamquam muta animalia norunt, in his corrumpuntur.* Id est, quidquid ex Deo audiunt, in alium prorsus detorquent sensum, & tantum abest ut inde resipiscant quin potius in deteriores abeant, nam vel id omnino non credunt esse à Deo, & infideles fiunt; vel si credunt, ad libitum interpretantur & illis ipsis Scripturæ verbis quibus condemnantur, se absolutos fingunt. *Si opertum est Euangelium nostrum, in iis qui pereunt est opertum: in quibus Deus huius sæculi excæcauit mentes infidelium, ut non fulgeat illis illuminatio Euangelij gloriæ Christi:* Quasi diceret Apostolus, in his cæcutiunt quæ nobis apertiora sunt, quia sic puniuntur ut post reuera non videant quæ prius videre noluerunt. Neque in eo pœna tantum est ut non videant, priuenturque lumine & gratia quam habuissent ex audito & credito Dei verbo: sed præterea, quod est longe peius, sic puniuntur, ut in sua cæcitate & peruerfitate per illud ipsum Verbum quo poterant illuminari & emolliri, magis indurentur ut dictum est. *Verbum enim Crucis pereuntibus quidem stultitia est, iis autem qui salui fiunt, Dei virtus est.* Nempe illo ipso verbo quod de Christo vel de eius Cruce productum est & quo alij incensi sunt ad poenitentiam & vitæ austeritatem, isti laxantur ad liberioris vitæ licentiam, quasi difficiliora essent quæ iubentur, quasi solis relictæ perfectis, vnde



*Ephes. 4.* propter cecitatem cordis ipsorum, desperantes semetipsos tradiderunt impudicitia. Desperantes scilicet se posse umquam illa perfectiora contingere, ne quidem student superandis difficultatibus, sed quasi essent insuperabiles, illis cedunt, & se tunc tutos putant quod se non putent posse quæ nolunt facere. Nonne hoc est obesse quod prodesse poterat?

*Rom. 7.* Adde quod, ut fuisse prosequitur Apostolus, Concupiscentia nisi verbo & legi Dei obtemperet, magis irretitur & ferociat, ut quæ semper nitatur in vetitum, unde aut cedat verbo necesse est: aut verbo resistens augeatur; & quidem augmento duplici, nempe naturali & morali. Naturali augmento crescit Concupiscentia cum in actum reducitur: tum vero in actum reducitur cum resistit verbo Dei, & quo resistit vehementius, eo est actus intensior, & augmentum maius. Morali verò crescit augmento concupiscentia, cum magis est voluntaria: magis est, porro voluntaria cum ab humana voluntate magis probatur; magis autem à Voluntate probatur, cum ipsa voluntas pro ea pugnat; pugnat denique pro concupiscentia voluntas quando quis libere & aduertenter resistit verbo Dei, ne verbum Dei resistat concupiscentia; ficque tandem aperte fit, ut illo ipso verbo quo quis melior esse poterat, fiat deterior. O vere positum verbum *in ruinam & in resurrectionem multorum*: atque in signum cui contradicetur.

*Luc. 2.*

### III. PUNCTVM.

**V**ERBUM Dei ergo non redit vacuum: aut profit necesse est recipienti, vel obsit: Profit quidem produciens fructum, *Alind centesimum, aliud sexagesimum, aliud trigessimum*, pro vario videlicet recipientium statu & diuerso viuendi genere: obsit vero dum rebellis non tantum nullo gaudet fructu, sed in deteriore quendam euadit statum sicut illa ficus Euangelica, quæ cum nullum haberet fructum maledicta fuit à Domino, & statim ab ipsa radice aruit nec ferendo deinceps fructui capax fuit. Sic aperte Apostolus: *Terra sepe venientem super se bibens imbrem, & generans herbam, opportunam illis à quibus colitur, accipit benedictionem à Deo: proferens autem spinas ac tribulos, reproba est & maledicto proxima, cuius consummatio in combustionem.*

*Math. 21.*

*Marc. 11.*

*Hebr. 6.*

Satisne illa grauia & pauenda, ut nobis caueamus? Parumne



*Verbum Dei non redit vacuum, aut profit necesse est, &c.* 379

nobis censendum est sic à Deo benedici vel maledici? Quis profectus tuus ex verbo Dei? Quo accedis animo ad Conciones? Quam mente libros qui dicuntur spirituales, euoluis? Nonne plus curiositatis affers quam pietatis? Certe ad audiendum Dei verbum aequè parandus esset animus atque ad ipsum Christum recipiendum. Quemadmodum enim ore Christus in Sacramento, ita aure sicut accepistis Iesum Christum Dominum, in ipso ambulate. Et alibi, *Coloss. 2. Det vobis Christum habitare per fidem in cordibus vestris. At fides ex Ephes. 3. Rom. 10. auditu, auditus autem per Verbum Christi.*

Sic sanctus Augustinus vnum confert cum alio: Interrogo vos, fratres, dicite mihi quid plus vobis videtur, Corpus Christi aut Verbum Dei Verbum quam Christi Corpus, & ideo quanta sollicitudine observamus quando Christi Corpus ministratur, ut nihil ex ipso de manibus nostris in terram cadat; tanta sollicitudine observemus, ne Verbum Domini quod nobis erogatur, dum aliud cogitamus aut loquimur, de corde puro pereat, quia non minus erit reus qui Verbum Dei negligenter audierit, quam qui Corpus Christi sua negligentia in terram cadere permiserit.

Quæ sancti Patris Verba quocumque sensu mitigentur, valere semper plurimum debent ad restringendum animum laxiorem in audiendo Dei Verbo. *Quare loquelam meam non cognoscitis?* *Ioan. 8.*

*Possent & hac urgeri*

## VERITAS PRACTICA.

Vt sunt contra Christi Verbum omnes habitus vitiosi: sic contra vitiosos omnes habitus, Verbum Christi habitet in nobis abundanter.

SENSVS ET RATIO EST, Quod sicut Christi Verbo sese opponunt maxime habitus vitiosi, quia regnant in animo sicque excludunt aut impediunt Verbi effectus: sic contra vitiosos quousvis habitus nihil efficacius quam quod monet Apostolus: *Verbum Christi habitet in vobis abundanter*: Quia sic regnum illud vitiosorum habituum destruetur, & paulatim Virtus astringetur: *Ponite hæc Verba in cordibus vestris, & suspendite ea pro signo in manibus, & inter oculos vestros collocare.* *Quod olim Moses, hoc Deus. 12.*



380 FERIA 3. Hebd. 8. post Oct. Pent. Parabola zizaniorum.

Exc. 9.  
lb. 2.

ipsum Christus Dominus; *Ponite vos in cordibus vestris sermones istos. Sic Maria conseruabat omnia verba hæc conferens in corde suo.*

Vide in 1. parte, Fer. 6. Hebdom. 2. post Epiph. & Dominica 6.



## FERIA TERTIA.

### PARABOLA ZIZANIORVM.

*Cum dormirent homines, venit Inimicus & superseminauit Zizania in medio tritici. Matth. 13.*

#### VERITAS PRACTICA.

Ne putes te bene semper excusatum, cum dicis: Non putabam.

RATIO EST, Quia nulla est excusatio si æque peccas non putando vel cogitando, ac si cogitares.

Sed sæpe id accidit ut æque pecces, dum non putas aut cogitas, ac si cogitares.

Ergo ne putes te bene semper excusatum dicens non putabam. Quod tamen est frequens multis, & valde damnosum.

#### I. P V N C T V M.

Dominica  
5. post  
Epiph. in  
prima par-  
te.



ÆC Parabola iam est nobis exhibita, & prout eam interpretatus est Christus Dominus de hominibus malis qui inter bonos viuunt, fuisse alibi declarata. Nunc vero de nostris actionibus quæ multæ malæ sunt & inter paucas quasdam bonas permixtæ, liceat eam interpretari: atque illud potissimum expendere quod dicitur, *Cum dormirent homines superseminata esse*



*Ne putes te bene semper excusatum cum dicis, Non putabam. 381*

*Zizania*, Id est, dum indormimus nobis, dum non aduertimus ad id quod agimus, sæpe illud male agimus, & quod peius est hinc sæpe nos excusamus dicentes, *Non putabam; Non cogitabam*, quasi propterea Innocij & sine culpa essemus. Certe aliquando ita euenire potest vt simus Innocentes, quando scilicet subrepat improvifum aliquid quod vsum seu aduertentiam rationis ita prauertit vt sic quique prudens intercipi potuerit. Verum id etiam sapius gratis dicitur: & siue cogitemus siue non cogitemus, nulla tunc profecto est talis excusatio, si æque peccamus non cogitantes ac cogitantes. Hæc primum expende diligenter, nam cum ad solam iustificationem sese excusantis afferatur hoc excusatio, tunc certè nulla esse patebit si nihil ad Iustificationem valeat; non valebit autem si is qui se excusat non minus sit in culpa quàm si non se excusaret; cum vnum & idem sit in eadem materia, esse in culpa, & nullam habere excusationem seu nullum habere ius quo te à probro & defectu possis eximere. Nam si haberes excusationem legitimam, non esses in culpa: aut si in culpa es, plane non habes quod excuses.

Sic Deus, quod est planè mirabile, sic ipse Deus antequam homines iudicet & condemnet, ab ipsis inquit, num habeant quid excusent? *Reduc me*, inquit, *in memoriam, & iudicemur si- 15. 43.*  
*mul: narra si quid habes vt iustificeris.* Quando vero producant aliquid quod est infirmius, vt se possint eo tueri & excusare: Vide quàm blandè quàm amanter simul & quàm potenter nullam esse excusationem ostendat, quòdque sint in manifesta culpa, & in flagranti delicto: *Quid vultis mecum iudicio contendere? Omnes de- 1er. 2.*  
*reliquistis me, dicit Dominus.* Et paulo post: *Quid niteris bonam ostendere viam tuam ad querendam dilectionem? Quæ insuper & malitias tuas docuisti vias tuas: & in alis tuis inuentus est sanguis animarum pauperum & Innocentum.* Et dixisti, *absque peccato & innocens ego sum: & propterea auertatur furor tuus à me.* Ecce ego iudicio contendam tecum, eo quod dixeris, *non peccaui.* Quam vilis facta es nimis, iterans vias tuas. Quasi diceret; apparet nullam esse tuam excusationem, cum appareat culpa tua. Vnde verissima esse constat propositio, qua dicitur, quod si æque peccas non cogitando ac si cogitares, nulla est excusatio dicentis, non cogitabam, non putabam. *Arguet te malitia tua.* *Ibid.*



## II. PUNCTVM.

**S**ED ita sepe accidit vt non cogitans nec aduertens, aequè pecces ac si aduerteres.

Illud aequè non infert talem peccati æqualitatem vt tam grauius pecces non attendens ad peccatum, quàm si actu & expresse attenderes. Certum est enim tum grauius & ex singulari quadam peccari malitia, quando sic attentior fit reflexio in peccatum quod committitur. Sed sensus propositionis est, quod licet in aliquo actu vitioso non ita expresse attendas & aduerteras ad omnia quæ circumstant peccatum, non desinas tamen peccare, nec iste defectus maioris aduertentiæ aut cognitionis, te semper excuset à peccato.

Nam primo quidem cum talis attentio ad peccatum actionis, possit esse maior aut minor, non est necesse vt tanta sit quanta esse potest: satis enim est vt sit moralis, vt sit humana, vt sit sufficiens ad discernendū quid agas, ad cognoscendū aliquo modo te male agere, licet non omni modo, licet non explicito & expresse id cognoscas. Pauci sunt qui sic in peccando expressam habeant peccati cognitionem; multi vero & pene omnes vix actu de peccato cogitant, sed de sua tantum explenda libidine, quam quia non ignorant esse vitiosam aut vitiatam, satis est vt reuera dicantur peccare. Satis enim habent libertatis & aduertentiæ vt actum humanum faciant, nam de illo hic agimus; satis etiam, vt supponimus, habent scientiæ & cognitionis vt sciant illum esse malum. Quod autem non satis habeant, vt actu cogitent esse malum & quale malum aut quale inde damnum sit futurum; hoc est quod dicimus non esse necesse cogitent, vt dicantur peccare. Propterea enim omnis peccans dicitur esse ignorans, & errare, & in tenebris esse, & *velut irrationabilia pecora naturaliter in capti-*  
2. Pet. 2.
*nem & in perniciem trahi:* Quia scilicet si Rationis lumen & Diuinæ ductum Gratiæ sequerentur, non peccarent, & idcirco peccant quia rationem non sequuntur. Non ita tamen rationis expertes sunt quin eorum actus sint liberi & humani, ac proinde virtutis capaces aut vitij.

Deinde vero, esto ignorent illi omnino aliquid quod si sciuisent, forte non peccassent: an putas omnem ignorantiam excu-



*Ne putes te bene semper excusatum cum dicis, Non putabam. 383*

fare à peccato? Nonne iam audiuiſſi eſſe quandam affectatam ignorantiam quando quis negligit ea ſcire quæ debet & quæ po-  
teſt, ex qua ignorantia qui peccauerit non magis excuſatur quam  
qui peccare voluerit? Nam ignorare voluit quæ non debebat igno-  
rare, & in illa voluntate ignorantia, ſeu in illa voluntaria igno-  
rantia incluſum eſt omne peccatum quod inde ſequetur in om-  
nem vitam. Sic expreſſe ſanctus Thomas, aſſerque illud Apoſtoli, *1. 2. q. 76.*  
*Si quis ignorat, ignorabitur.* *4. 2.*  
*1. Cor. 14.*

Denique quid maniſeſtius quam quæ ſcribit Idem ſanctus Do-  
ctor de vitiis prudentia oppoſitis, quæ ſunt Imprudentia, Incon-  
ſideratio, Præcipitatio & ſimilia quæ non ſunt vitia & peccata niſi  
quia ſunt defectus Rationis & aduertentia in agendo vel loquen-  
do? Vnde tam euidenter patet non cogitantem nec aduertenten-  
tem poſſe peccare, quàm euidens eſt inconfideratum & præci-  
pitum reuera ſæpe peccare & in Scripturis argui. *Qui inconfide-* *Pro. 13.*  
*ratus eſt in loquedo, ſentiet mala. Et qui feſtiuus eſt pedibus, offendet.* *Ibid. 19.*  
Cum autem illa Inconfideratio ſeu Rationis deficientia ex alio  
ſæpe vitio proueniat, inde etiam tamquam effectus à cauſa ma-  
lignitatem ſuam contrahit, quæ certè grauior & damnoſior eſſe  
poſteſt quàm putetur. *Inſipientes ſunt & vecordes,* ait Propheta. *Ier. 4.*  
Sed vnde illa vecordia? An ab ebrietate, aut à laſciuiâ? Certe à  
quocumque vitio profluat, vitij colorem induit; Et hoc proſectò  
pauendum.

### III. P V N C T V M.

**N**E te igitur putes bene ſemper excuſatum cum dicis, *Non puta-*  
*bam.* Nam ſi tunc pecces, non excuſaris, fieri autem ſæpe  
poſteſt vt non minus pecces non aduertendo quàm ſi aduerteres;  
Nam ſatis aduertis quantum eſt ſatis ad peccatum; aut ſi non ſatis  
aduertis, tua eſt culpa, tuum peccatum; Nec prodeſt dicere, non  
putabam. Sic apte ſanctus Chryſoſtomus: *Nefciebam quid dicerem,* *Hom. 29. ad*  
*& quare nefciebas? Cum ſis homo rationalis, irrationabilium opera fa-* *Pop. ant.*  
*cis! hæc excuſatio accuſatione digna. Iræ ſunt verba, non mea; quo-*  
*modo illius? Vires iræ non habet niſi ſumat abſ te: vt ſi diceres, ma-*  
*nus ſunt non mea vulnera.* Sic ſanctus Auguſtinus contra huiusmo-  
di excuſationes: *Non ſciebam quia peccatum eſt;* ſuſe in Pſalmum *in Pſ. 35.*  
trigeſimum quintum ad hos verſus: *quoniam doſe egit in conſpectu*  
*eius, &c.*



Certe sicut Homini rationali nihil magis est proprium & honorificum quam è ratione viuere, sic nihil magis oppositum & alienum quam vbi aliquid contra rationem egeris, hoc ipsum excuses quòd ratione non vtereris, quasi hoc excusare posset hominem quod est in homine magis probrosum. *Est o vir*, dicebat Dauid moriens, Salomoni filio, & *intellige vniuersa quæ agis & quocumque te verteris*. Hoc est scilicet esse Virum, vt iam alibi dictum est, *sic intelligere vniuersa quæ agas & dicas*. Quamobrem ipse Salomon Proverbialem librum bene longum scripsisse se ait, *ut detur paruulis astutia*, Id est dexteritas, Industria & attentio ad bene agenda omnia, vt sanctus Basilus interpretatur vocem *Παρογογίας* quæ vtuntur Septuaginta, & quam ipse Sapiens sic declarat: *Oculi tui recta videant, & palpebræ tuæ præcedant gressus tuos, dirige semitam pedibus tuis, & omnes viæ tuæ stabiliuntur*. Sic Ecclesiasticus: *Ante omnia opera, verbum verax præcedat te: & ante omnem actum consilium stabile*. Sic Christus Dominus tam sæpe in Euangelio vt nihil sapius repetitum inuenias, *Videte, vigilate, & orate, quod vobis dico, omnibus dico, vigilate*.

Quorsum enim Gratia & Diuina subsidia nisi simul aduigiles in illis recipiendis & in actum reducendis? Non si totum cœlum tibi adesset, quidquam prodesset si tibi defueris; neque si totus in te ruat Infernus, tibi oberit si cum Gratia vigilaueris. Esto vigilantior præsertim in congressu cum aliis, cito enim abripitur animus tuus.

Vide in 1. parte, Communem SS. Confessoribus non Pontificibus, Vbi hæc declaratur Veritas:

Quantum cuique est vigilantia, tantum virtutis & meriti.



## FERIA QVARTA.

### PARABOLA SEMINIS PAVLATIM

#### GERMINANTIS ET INCRESCENTIS.

Sic



*Quæ ad progressum spiritualem sollicitudo valet, sit quæta, &c. 385*  
*Sic est regnum Dei, quemadmodum si homo iaciat*  
*sementem in terram, & dormiat, & exurgat*  
*nocte & die, & semen germinet & increseat,*  
*dum nescit ille. Marci 4.*

## VERITAS PRACTICA.

Neque quies nisi sollicita; neque sollicitudo nisi quæta.

SENSVS EST DE PROGRESSV SPIRITVALLI, In quo  
faciendo sic concilianda sunt quies & sollicitudo, ut sicut non  
alia quies est admittenda nisi quæ sit sollicita de virtutibus ac-  
quirendis & exercendis: ita sollicitudo non alia impendatur  
nisi sit quæta. Quod postremum hæc præsertim urgetur, ac  
propterea sic Veritas Practica planius proponi posset.

Quæ ad progressum spiritualem sollicitudo valet, sit  
quæta, vel non valet.

RATIO EST, Quia idcirco ad spiritualem progressum sollicitudo  
valet, ut quæ à nobis pendent recte & discretè curemus;  
Atqui ad hanc rectam & discretam curam, sollicitudo debet esse  
quæta.

Ergo ad progressum spiritualem sit quæta necesse est; aut non om-  
nino valet.

## I. P V N C T V M.

**R**EVIS hæc quidem Parabola verbis est, sed satis lon-  
ga & fecunda sensu. Proponitur nobis in persona semi-  
nantis Agricolæ quam sollicitudinem gerere debeamus  
circa præsentem animæ nostræ statum & profectum. In qua qui-  
dem sollicitudine sicut errari potest defectu, ita & excessu. Defi-  
ceret qui non satis esset sollicitus: sed in ea excederet qui nimis



anxiè & inquietè se teneret sollicitum. Imitandus est igitur hic Parabolicus Agri-cultor qui sic laborem suum cum quiete temperat vt quantum necesse est agro & semini seminato, laboret; de cætero autem dormiat & quiescat; Nam, vt ait Dominus, *semen germinat & increfcit dum nescit ille. Vltro enim terra fructificat, primum herbam, deinde spicam, deinde plenum frumentum in spica, & cum produxerit fructus, statim mittit falcem, quoniam adest messis.* Quali diceret, facit tantum Agricola circa semen quod sibi faciendum videt; agrum colit, seminat & merit suo tempore, dum interim sine illius cura & sollicitudine frumentum crescit. Sic plane nobiscum est agendum; nam sicut in illo naturali frumenti vel seminis incremento progressus spiritualis designatur, sic in illa temperata sollicitudine Agricultoris, exprimitur quæta nostra sollicitudo quæ ad talem progressum valet. Ita porro valere dicitur, *vt nisi sit quæta, omnino non valeat.*

Ratio est multum expendenda, quod scilicet ad hoc præcipue sollicitudo sit necessaria, vt quæ pendent à nobis rectè & discretè curemus. Sunt enim alia in hoc nostro progressu quæ à nobis libere pendent cum Gratia; & alia quæ prorsus non dependent, sed à solo Deo. Liberum est tibi modo legere, orare, meditari, filere & similia; sed non ita in potestate est, contemplari, affici, gustare Diuina, intimos pietatis sensus habere, & quæ sunt huiusmodi, quæcumque in materia; Vnde illud tandem sequitur vt si quæ sollicitudo adhibenda sit circa profectum animæ, in eo potissimum versari debeat, vt distinguamus illa libera à non liberis, & in vtrisque tam diuerse nos geramus quam diuersa sunt in agendo; Id est, in iis quæ sunt libera non negligamus quod nostrum est, nulli parcamus labori, nulli curæ ac vigilantia quantum quidem id exigit rei necessitas: At verò in aliis quæ non sunt libera quæ sunt veluti extra nos seu extra nostram potestatem, minime prorsus à nobis insudetur & laboretur. Quorsum enim ille labor in re quam adipisci nullo modo possis? Nonne idcirco dictum: *Noli resistere contra faciem Potentis, nec coneris contra ictum fluuij.* Ac rursum: *Quis vestrum cogitando potest adicere ad staturam suam cubitum vnum? Si ergo neque quod minimum est potestis, quid de cætero solliciti estis?*

Ecclesi. 4.  
Luc. 12.

Et quod forte est alias commemoratum, hinc apte Apostolus, *Vt quemadmodum promptus est animus voluntatis, ita sit & perficiendi,*



*Quæ ad progressum spirituales sollicitudo valet, sit quæta, &c. 387*

*ex eo quod habetis. Notanda verba. Si enim voluntas prompta est, 2. Cor. 8. secundum id quod habet accepta est, non secundum id quod non habet. Nec enim minus hallucinari est & aberrare, si quod non possis, indiscrete velis & cures, quam si nullo modo cures quod possis & debeas. Nonne in hoc sæpe erras? Et nonne grauis est error?*

## II. P V N C T V M.

**A***T QVI ad hanc rectam & discretam curam sollicitudo debet esse quæta. Id est, vt rectè discernas libera à non liberis, atque vt discrete in vtrisque te geras, agendo cum agendum est, & patiendi cum est patiendum, oportet habere animum valde quietum & tranquillum, cum alioquin si perturbatus sit, non illa rectè diiudicet & discernat, ac proinde ibi desudet vbi esset quiescendum, & ibi quiescat vbi esset laborandum.*

*Hæc est enim humana infirmitas nisi quis diligenter aduertat, vt dum solícite aliquid volumus promouere, statim angamur & cruciemur animo, vnde duo illa incommoda ex æquo grauiamant; alterum quo agenda deserimus; alterum quo non agenda tentamus; quod enim est in potestate nostra pene semper negligimus, & quasi nostra in manu positum, vix curamus: Quod vero extra est & longius dissitum, id porro auidius consecretur. Cui vtrique incommodo remedium aliud non est opportunius quam si sollicitudo sit quæta, id est, suis se contineat finibus, id vnum curet quod curam exigit. Martha Martha solícita es Luc. 10. & turbaris erga plurima; porro vnum est necessarium, Sollicitudo non reprehenditur, sed sollicitudo turbata & inquieta. Non affligas Eccles. 30. temetipsum in consilio tuo. Nonne id æquum vides & rationabile?*

## III. P V N C T V M.

**Q***VAECVMQVE est igitur ad profectum spirituales necessaria sollicitudo, tam sit quæta necesse est, quam illa est necessaria; Quia nisi quæta sit, erit anxia: si autem anxia, nihil aget: nihil eorum quæ agenda sunt, volet: nihil eorum quæ agenda volet, poterit, sicque solum permanebit cassa illa sollicitudo & afflictio spiritus de qua Sapiens quæ adeo nihil promouet spirituales profectum vt illum valde retardet. Quid prodest ei quod laborauit in ventum? Eccles. 5.*



Fuci multum strepunt sed non mellificant: Apes verò mel suum, sine vllò strepitu conficiunt. Quamobrem sic sollicitè laborandum in liberis, vt in aliis planè quiescas. Sic ipsi etiam quies labori permiscenda est & quieti labor; vt quietus sit labor, id est, dum laboras hoc tantum velis quod possis cum Gratia; & quies non sit otiosa, Id est, dum nihil operari potes in non liberis, non cesses interius operari volendo nihil posse aliud: quandoquidem sic ordinauit Deus; *Omnem reliquam sollicitudinem projicientes in eum, quoniam ipsi cura est de nobis.* Sic Sapientia illa quæ cuncta cum Deo fecit & elaborauit se in omnibus requiem quesuisse ait, & sic in hereditate Domini moraturam. Hæc est videlicet hæreditas Domini in medio hostium; hæc est in pace amaritudo: hoc centuplum cum persecutionibus: hoc in omni tribulatione gaudium, de quo Scripturæ.

1. Pet. 5.

Eccli. 24.

Is. 38.

Marci 10.

2. Cor. 1.

Sic Beatissima virgo Deipara simul vtrumque tanta fidelitate iungebat vt quod ait sanctus Bernardus, in ea esset & *Martha negotium, & Maria non otiosum otium.* Sanctus vero Anselmus: *Circa plurima, inquit, vt Martha occupabatur: circa unum, vt Maria, delectabatur.*

Serm. 2. de

Assumpt.

B. Virg.

1. P. Hist.

Soc. IESV,

l. 13. n. 18.

Eccli. 11.

Sic Beati illi spiritus qui animarum custodiam susceperunt, ita suis sollicitè inuigilant vt semper quieti, semper beati sint: Vnde Illud est quod de sancto Ignatio Societatis IESV Fundatore legitur, qui cum angore immodico vbi res minus esset sententia caderet, Vnum è suis cruciari sciret, admonuit eum id quod sæpe habebat in ore, *Angelos vt imitari studeret, qui in animarum sibi commissarum custodia omnem quidem diligentiam præstant, sed euentus quicumque sit, nihil de tranquillitate, nihil de beatitudine sua deperdunt. Confide in Deo, & mane in loco tuo,* inquit Sapiens id est, in eo animi statu te contine quem statuit Dominus; adeout nihil vltra velis quam quod ipse velit, licet id parum tibi videatur; sic enim pro certo & constanti habere debes te in illo modico plus profecturum quàm in magno, quia sic tecum Deus aderit. Sic namque pergit Sapiens: *Facile est enim in oculis Dei subito honestare pauperem. Benedictio Dei in mercedem Iusti festinat, & in hora veloci processus illius fructificat.* Vide quid in te hîc nimium & quid resecandum. Nec pietatem excuses, aut quid aliud prætendas. Iam enim supra in 2. parte, declaratum est:

Ter. 2. Heb.

dom. San-

ctæ.



Impietatis genus esse pietatis Cultoribus nimis commune; plura quàm possint velle facere: & quæ possint, non facere.



## FERIA QVINTA.

### PARABOLA GRANI SINAPIS, ET FERMENTI FERMENTATI.

*Simile est regnum cælorum grano sinapis quod minimum est omnibus seminibus, cum autem creuerit, majus est omnibus oleribus.*

*Simile est regnum cælorum fermento quod acceptum mulier abscondit in farinae satis tribus, donec fermentatum est totum. Matth. 13.*

### VERITAS PRACTICA.

Nec magna bene, si parua malè.

*SENSVS ET RATIO PROPOSITIONIS EST, Quod magna non bene fiant, si ex sola consideratione eorum magnitudinis bene fiant.*

*Sed si parua male fiant, signum est magna benè fieri tantum ex considerata eorum magnitudine.*

*Ergo neque magna benè si parua male fiant, sicque nihil prorsus efficies, nisi tam paruis quam magnis bene gerendis ex æquo studeas.*



## I. P V N C T V M.

**P**AROLATA hinc duplex Parabola quæ iam alibi declarata est, eundem habet finem qui est Humilitatis commendatio, vel rerum minimarum cura diligentior quam haberi soleat. Videri potest accuratius in textu Evangelico & expendi. Tum vero ad propositum finem de minimis non negligendis attente consideranda est Veritas quæ dicitur, *Nec magna bene si parua male fiant.*

Atque hæc ratio quæ inter alias hinc offertur non est vulgaris quod scilicet non bene magna fient si quis ex sola eorum magnitudine, seu magnitudinis consideratione moueatur, ad ea perfecte accuranda. Sic autem declaratur: Cum quauis magnitudo rei ordinariè spectetur potius secundum Iudicium hominum quam Dei; si quis in agendo sic respiciat illam magnitudinem ut hoc respectu præcipue moueatur ad agendum, is certe mouebitur propter respectum hominum, potius quam Dei. Qui sic autem mouebitur ad agendum, non potest dici coram Deo bene quod agit agere; Nam agere aliquid propter respectum humanum non est illud bene agere, quantumcumque ex alia parte opus perficias, deest illi pars potior quæ in puro fine ac recta intentione est posita. *Omnia opera sua faciunt ut videantur ab hominibus*, aiebat Dominus de Pharizæis; & idcirco quidquid boni agerent non bene ab eis agi pronuntiabat, quia ex fine ac intentione operantis, bonitas operis sic est deducenda ut si bonus non sit finis, quantumcumque speciosa sint alia partes, bonum omnino non sit opus. Oculi ille est operis, *qui si tenebrosus sit, totum operis corpus tenebrosum erit*, ut sæpe alibi dictum est. Imo & quanto rei seu actionis alia partes apparent eminentiores & laude digniores, tanto foedius ex impuro fine tota res, totaque actio deturpatur, cum in pulchro corpore sit facies turpior, aut in pulchra facie turpior nauus magis offendat.

Et certe id longe est magis deplorandum, rem alioquin magnam & probatam defraudari suo fine, & sua Deum priuari gloria quæ inde redundasset, si pure in Illum actio directa fuisset. *Non me inuocasti Iacob, nec laborasti in me Israël.* Id est, satis quidem in multis laborasti sed non in me, non propter me; & id-



circo frustra laborasti, nihil etiam ex me referes, nihili duco labores tuos. Vel quasi diceret, si me voluisses spectare in tuis operibus, si mihi vni placere & vacare studuisses, non laborasses sicut laboras volendo placere hominibus; neque enim qui his placere volunt semper placent; multum propterea & saepe frustra laborant: At vero nullus mihi placere voluerit quin placeat, nullus hic labor, nullum impendium; *Placere Deo voluisse, placere est;* & tamen ista facilitate non permoueris, non me inuocas, non me cogitas, non mihi vacas, quasi id laboriosius esset in opere tuo, quod est facilius.

Probrosa certe expostulatio, & argumentum euident non parui defectus operum quæ ad Deum non diriguntur. Quid enim cetera conferant si nihil à Deo referunt? Quis nisi vanus & stultus se putet rectè concionatum esse, si nullam apud Deum in tota concione gratiam, sed popularem duntaxat auram fuerit assequutus? *Amen dico vobis, receperunt mercedem suam.* O dignum labore premium: *Ventum seminarunt & turbinem messuerunt.* *Manh. 6. Osee 8.*

## II. P V N C T V M.

**S**ED si parua male fiunt, signum est magna bene fieri tantum ex considerata eorum magnitudine.

Cur enim illa male, & hæc bene: nisi quia illa parua sunt, & hæc magna? Nam si magna bene fierent quia sic debent bene fieri, cur non etiam parua bene, cum æque suo bene modo fieri debeant? Non exigitur forte tanta cura in paruis quanta in magnis, sed tamen quanta est necessaria cura ut bene fiant, tanta exigitur, quia ut dixi non minus debent bene fieri quam magna; Nonne in illis Deus colitur sicut in magnis? Nonne ad illa peragenda opus est gratia? Nonne ad hanc habendam gratiam opus fuit Christi sanguine & meritis? Nonne merces cælo reposita, *Manh. 10.* vel danti potum aquæ frigidæ? Nonne verbo etiam otioso pœna indicta? Nonne de paruo quouis opere debet illud ex Scripturis timeri, *Maledictus qui facit opus Domini fraudulentè?* *Ier. 48.*

Et certe si perfecti esse debemus sicut Pater noster cœlestis perfectus est: Id est, ut cuncta perfecte nostro modo sicut Ille suo faciamus: Quid est tam paruum & minutum in creatis quod non sit perfectum in suo genere? *Vidit nempe cuncta quæ fecerat, & erant* *Manh. 5. Gen. 1.*



*Eccl. 3.* valde bona. *CUNCTA* fecit bona in tempore suo. *OMNIA* opera  
*Eccl. 39.* Domini bona, & omne opus hora sua subministrabit. Non est dicere,  
 hoc illo nequius est: omnia enim in tempore suo comprobabuntur.

*Matth. 5.* Denique donec transeat cælum & terra, iota unum aut unus apex  
 non præteribit à lege donec omnia fiant. Qui ergo soluerit unum de man-  
 datis istis minimis, & docuerit sic homines, minimus vocabitur in regno  
 calorum. Id est, despectissimus erit, & quasi nullus, quia qui ne-  
 gligit negligetur; Qui autem minima non curat, idcirco non  
 curat quia minima sunt & quia illa negligit: Vnde & illud se-  
 quitur quod erat declarandum, Nempe ex hoc minimorum ne-  
 glectu facile colligi quod si magna diligentius & accuratius fiant,  
 non alio motivo & respectu ita fiant quàm quia magna & ma-  
 gnifica sunt, quàm quia speciosa & splendida sunt coram homi-  
 nibus, *Species* decepit te. *SIVE* masculinum siue fæminam obtulerit, im-  
*Dan. 13.* maculata erunt omnia.  
*Leuit. 3.*

## III. PUNCTVM.

**N**EQUE ipsa ergo quæ dicuntur magna, bene fient, si parua male:  
 Nam fient bene tantum propter eorum magnitudinem, &  
 nullo modo propter Deum, neque ex aliis motiuis supernatu-  
 ralibus, quorum defectu deficient ea parte quæ est magis neces-  
 saria ad moralem bonitatem operis, nempe fine ac Intentione  
 Operantis; ac proinde non magis perfecta erunt moraliter, quam  
 perfectum non esset opus aliquod naturaliter sine sua forma;  
 Nam quod est forma in Physicis, hoc est Finis in moralibus.  
 Vide, contemplare corpus sine anima, quale est illud naturali-  
 ter, quàm foedum & horrendum, quia videlicet deest illi sua for-  
 ma. Sic plane est moraliter & coram Deo quivis homo sine suo  
 fine, sic est quodlibet hominis opus destitutum fine suo, cor-  
*Matth. 23.* pus est exanime, *Sepulchrum dealbatum, foris apparet hominibus*  
*speciosum, intus autem plenum ossibus mortuorum, & omni spurcitia:*  
*Eccl. 12.* Vnde est illud Sapientis: Deum time & mandata eius observa: hoc  
 est enim omnis homo: Nempe moraliter, quia hic est finis hominis  
 ut Deum timeat & reuereatur, ad hoc creatus est & redemptus,  
 sicut Physicè & naturaliter homo est animal rationabile seu ex  
 anima rationali & corpore compositum; & sicut Physicè desine-  
 ret esse homo quando desineret esse talis forma ut dictum est; sic  
 desinet esse homo moraliter, quando desinet talis finis in quo  
 est



est omnis homo. *Aspexit terram & ecce vacua erat & nihili*, ait Propheta, *intuitus sum & non erat homo*, quia videlicet ante dixerat, *bene facere nescierunt*. Non desinebant esse homines physice & naturaliter, sed desinebant moraliter quia deerat illis suus finis qui est bene agere. Quod si ibidem etiam Propheta refert se non vidisse coelos aut alias mundi partes: Idcirco refert, quia tamen si subsisterent sicut & homines, quia tamen ipsi homines tunc erant quasi non essent, sic neque alia Creatura quæ sunt tantum propter ipsos homines.

Atque hinc etiam quando de vanitate in Scripturis agitur, intelliguntur hoc præsertim nomine, magna hæc & speciosa de quibus hic agimus, & quæ dicuntur vana seu vanitas quia vacua sunt & suo fine destituta. Vnde nam autem & à quo destituuntur suo fine nisi ab homine qui dum illis utitur, respicit potius eorum magnitudinem & speciositatem quàm Dei gloriam, seu quid aliud supernaturale & diuinum; unde & ipse homo dicitur *vanitas vanitatum*, quia ipse est causa vanitatis quæ inest in aliis creaturis: Ipse est qui eas vanas facit, dum illas euacuat suo debito fine, sicque seipsum etiam priuat suo merito suaque vera & æterna utilitate quam deriuaret ex creaturis si bene illis uteretur, id est, si earum usum in bonum finem conuerteret. *Nolite recedere à tergo Domini, sed seruite Domino in omni corde vestro. Et nolite declinare post vana quæ non proderunt vobis, neque eruent vos, quia vana sunt.* Quasi diceret, nolite tantum spectare magna illa & speciosa præ quibus parua negligitis: nam sic fieret ut nullum bonum opus in æternam vestram salutem efficeretis; quandoquidem ipsa quæ putaretis bona opera non essent nisi vana, & quibus periretis potius quàm saluaremini.

*Omnia vestra in Charitate fiant*, inquit Apostolus: Siue magna siue parua sint, *omnia in Charitate*, excellenter, & perfecte. *Omne quodcumque facitis in verbo aut in opere: omnia in nomine D. N. IESU Christi.* *SIVE manducatis siue bibitis siue aliud quid facitis: omnia in gloriam Dei facite.* Si magna facitis, non quia magna sunt facite, sed quia magnus & gloriosus Dominus propter quem illa faciatis: quod si parua occurrunt facienda, sic facite ut magna propter ipsum Deum qui non minus in parvis magnificatur quam in magnis: aut si non in parvis, nec in magnis. *Qui in modico iniquus est, & in maiori iniquus est.*



394 FERIA 6. Hebd. 8. post Oct. Pent. Parabola thesauri absconditi.

Vide in 1. parte, Dom. 6. post Epiphan. Sabbatum eiusdem Hebdom. 6. Et in hac 3. parte, Sabbatum Hebdomadae quartæ.



## FERIA SEXTA.

### PARABOLA THESAURI ABSCONDITI ET INVENTI IN AGRO.

*Simile est regnum Cœlorum thesauro abscondito in agro quem qui inuenit homo abscondit, & præ gaudio illius vadit, & vendit vniuersa quæ habet, & emit agrum illum. Matth. 13.*

#### VERITAS PRACTICA.

Non tam spectatur quid dones pro Diuinis, quàm quid non dones.

RATIO EST, Quia quod vnum spectatur in istis, est, vt teipsum totum dones.

Sed si quid reserues, si quid non dones, non teipsum totum donas.

Ergo nihil reseruandum: Nec tam spectatur quid dones quàm quid non dones, nihil vt omnino reserues dandum.

#### I. P V N C T V M.

**I**NSIGNIS est quæ hîc Parabola proponitur ad cognoscendum pretium quo res Diuinas & cœlestes præ temporalibus aestimare debemus. *Thesaurus est absconditus*, non modo cœlestis Beatitudo, sed & Perfectio quæ ad eam ducit, & Virtus qualibet quæ pars quædam est perfectionis, pro



*Non tam spectatur quid dones pro Diuinis, quàm quid, &c. 393*  
qua comparanda sic alia quæuis donanda sunt, vt non tam spectes quid dones quam vt vniuersim omnia dones & nihil prorsus referes.

Hæc est vtilissima Veritas modò diligenter expendenda; atque illud imprimis quod in declaratione habetur, tamquam vniuersale principium & fundamentum totius ædificij spiritualis ac negotiationis Euangelicæ: Nempe id spectari vel maxime, vt teipsū totum dones, vt se tibi etiam totū Deus donet; Non tua sed te petit Dominus, quemadmodum Corinthiis dicebat Apostolus: *Non quero quæ vestra sunt, sed vos.* Sic apte sanctus Augustinus: *2. Cor. 12. Si hoc solum, inquit, nobis promitteret Deus quod dixi modo, quibus Sermon. 64. de Verbis Domini, potius verbis descripsi ac commendavi, quanti erat emendum si venale esset? Quantum dandum erat vt emeretur? Sufficeretne quidquid haberes etiamsi totum mundum possideres? Et tamen venale est, emere si vis, non multum exactus de re magna propter pretij magnitudinem: Tantum valet quantum habes. Noli querere quid habeas, sed qualis sis. Res ista tanti valet quantum es tu. Te da & habebis illam.*

In quibus sancti Augustini postremis verbis duplex quædam ratio, cur ita nos ipsi vniuersim donandi simus continetur. Prima est quod res spiritualis & cœlestis quam nobis comparare volumus tanti valet quantum ipsi sumus. Pluris quidem valet cum Deus ipse possideatur Charitate, & Beatitudine; sed quia nihil supra nos pretiosius ducimus, hoc idcirco pretio æstimatur. Secunda & valde notanda ratio, quia hoc ipso quo quis seipsum totum donauit, perfectionem attigit, neque etiam aliter eam attingere potest quam sic seipsum totum dando. Vnde fit vt nullum pretium sit perfectioni & beatitudini magis adæquatum quàm hæc perfecta sui donatio. Sicut nulla res plenè beatum hominem potest facere quam totus possessus Deus: ita plane nihil æque ad beatitudinem disponit ipsum hominem, quàm plena & perfecta sui traditio.

Sunt quidem huius donationis varij gradus sicut & ipsius beatitudinis ac perfectionis, pro diuersa hominum condicione & vacatione: sed cuiuscumque vacationis sis, si vis eius perfectum gradum attingere, tam necesse est te, tuo modo, totum dare Deo, quàm cuius alteri perfectioris status se totum tradere. *Aemulor vos 2. Cor. 12. Dei emulatione, aiebat Apostolus nuptis & innuptis, despondi enim vos uni viro Virginem castam exhibere Christo.* Id est, volo vos om-



nes in vestro statu sic totos & integros esse Christi & Dei, sicut in suo virginitatis statu, virgo se sponsam & se totam tradit Christo. Est enim quædam virginitas mentis sicut & corporis. Illa autem virginitas in eo consistit ut quantum quis potest sincero, integro & plene puro affectu se totum Christo donet, sicut ipsum totum sibi æmulatur Christus. Itane nos Christus? Nos sibi Christus ita æmuletur! Nos verò hanc Christi æmulationem repudiemus & dedignemur!

## II. P V N C T V M.

**S**ED si quid reserves quod non dones, non teipsum totum donas. Sumus quidem Dei omnes quidquid sumus, neque ei quidquam donari potest quod non sit totum eius; sed quia nos ab Eo per inordinatos rerum humanarum affectus retrahimus, tunc nos ipsos ei totos damus quando illos affectus ita moderamur & abdicamus, nulla ut plane re mundi ab eius amore & servitio abducamur. Siue ergo rem possideas ut secularis, siue reliqueris omnia ut Religiosus, si vis totus esse Dei, sic totum à rebus affectum retrahere debes ut quanto magis aut minus retraxeris, tanto magis aut minus sis Dei. Et sicut non est necesse seculari suis se exuere facultatibus, dummodo suis se exuat affectibus; sic non sufficit Religioso sua relinquere omnia nisi suorum omnium deponat affectum. In hoc vno vel maxime tota nostri donatio sita est, ut vel effectum simul & affectum, aut certe solo affectu res omnes præter Deum abdicemus, unde tandem id Religiosus videt quod si quid rei propriæ etiam sine affectu retineat, aut si quid affectus erga rem sine re sibi reseruaret, non se totum daret; ita & secularis agnoscat quod si quid inordinati affectus cum re servata reseruatur, seipsum totum minimè donat. Nam *Totum* hoc in affectu præcipue temperando consistit; Quapropter sanctus Bernardus ad hæc Petri verba: *Ecce nos reliquimus omnia: OMNIA* sane dixerim, inquit, non tantum possessiones sed etiam cupiditates & eas maxime. Plus enim concupiscentia mundi quam substantia nocet. Et hæc fugiendarum causa diuitiarum præcipua est, quod aut vix, aut numquam sine amore valeant possideri. Age ergo qui relinquere universa disponis, te quoque inter relinquenda numerare memento, imo verò maxime & principaliter abnega teipsum, si desideras sequi eum qui exina-



Non tam spectatur quid dones pro Diuinis, quàm quid, &c. 397  
nuit propter te semetipsum. Et paulo post de propria voluntate di-  
stinctius agens, fuge sanguisugam hanc & omnia reliquisti. Hæc enim  
omnia trahit ad se.

Tum post multa declarans eos qui non percipiunt promissam  
Centupli gratiam, non se totos, non omnia sua dedisse sed sibi  
reseruasse aliquid, sic præclare & apte ad rem nostram; Sunt enim  
loculi non modo pecuniæ, sed propria voluntatis. Scrutetur proinde vias  
suas & studia sua qui promissam centupli gratiam sibi deesse causatur: nec  
dubium quin inueniat angulum & diuersorium, reclinatoriumque non  
quidem filij hominis, sed aut foneam vulpis, aut volucris nidum. Ma-  
gis autem perfectus, obsecro, relinquat omnia, & solum sequatur Chri-  
stum, iactans cogitatum suum in Deo, enutriendus ab eo, & centuplum  
sine dubio percepturus. Neque enim potest solui Scriptura, nihil sibi re-  
tineat, nihil suis, ne modicum fermentum totam massam corrumpat. Sed  
enim qui sibi retinent aliquid, & in ipsis quoque sanctorum collegiis  
proprio aut desiderio aut fortasse consilio importunius adherentes, scio-  
los sese faciunt, & de se aliquid sibi retinentes quos penitus abnegasse &  
Diuinæ Providentiæ ac obedientiæ Patrum, consiliis quoque spiritualium  
Virorum debuerant commisisse.

Ex quibus & aliis quæ sanctus Pater fuscè prosequitur, duo hæc  
patent: alterum, quid sit sibi seruare aliquid neque omnia sua  
dare: nempe cum voluntatem propriam propriumque consilium  
retinemus, non acquiescentes facile iis quibus nos regendos dedi-  
mus: Alterum vero quod si partes illas nostri reseruamus, num-  
quam nos plenè totos tradimus, nec capaces sumus earum pro-  
missionum quas Christus fecit ijs qui sua omnia seque totos relin-  
querent. O damnosa voluntas: ô perniciosum consilium, quod  
sibi qui reseruat, tam malè sibi consulit, quàm qui vnum pro  
centuplo dare nolle.

### III. P V N C T V M.

**N**ON tam ergo spectatur quid dones pro Diuinis quàm quid non  
dones, quidue tibi reserues. Nam cum hoc vnum spectetur  
maxime vt te totum dones, si quid reseruas, quantumcumque sit  
exiguum præ illo quod dedisti, tamen ita nocet vt nihil pro Di-  
uinis te dedisse putandus sis coram Deo, quia non dedisti quod erat  
dandum, non dedisti teipsum totum. Esto dederis ingentem pe-



cuniae vim, multa reliqueris prædia, & domum Dei tuis muneribus ditaueris, sed reseruasti tibi vnum aut duos loculos, reseruasti eorum quæ dederis vel quæ cum facultate possides nimis tenacem affectum: reseruasti in multis propria ductum voluntatis, & consilij quandam proprietatem: Non ita considerantur illa multa & magna quæ dederis, quàm ista exigua & pauca quæ tu tibi seruas. Non ita consideratur Saul quod sex dies expectarit Samuelem quàm quod non vno die vel vna quæ supererat hora, eum expectarit. Non ita considerantur, quàm multa Idolorum genera variasque species demoliti sint multi Reges Iuda, quàm quod lucos omnino non exciderint in quibus Iudæi sacrificia faciebant. Non ita denique considerantur quam puræ essent illæ quinque virgines quæ cum lampadibus suis expectarant Sponsum, aut quandiu quantoque cum affectu expectassent, quàm quod non sibi suisque lampadibus inuigilassent, vt qua hora veniret sponsus essent paratæ. Neque enim magnum aut multum aliquid censeretur debet, quod pro Deo, pro Coelo, pro Perfectione vitæ spiritualis dederis quantumcumque illud magnum & multum sit, cum Deus & quæ confert dona spiritualia longe præponderent quibuscumque illis magnis & multis temporalibus datis: Sed negare aliquid propterea! sed non omnia sua dare propterea! tantus est donorum celestium contemptus, vt nihili fiant quæcumque alia data sint quandiu deest aliquid dandum. Sic enim vt dictum est, totum deest: quia sic totum petitur vt nisi totum detur, nihil detur.

Quod vel ex eo valde confirmatur, quod licet pauca & exigua quidam dederint, si tamen tota sua dederint, longe plus dederunt quàm qui multa & pretiosa, non tamen omnia sua largiti fuerint. Quod præclare admodum prosequitur sanctus Gregorius vbi de duobus primis Apostolis qui relictis omnibus sequuti sunt vocantem Dominum, & de tota hac materia quod superest pluribus dicere ad Intellectus & Voluntatis affectum, sic ait. *Fortasse aliquis tacitis sibi cogitationibus dicat: Ad vocem Dominicam uterque iste Piscator, quid aut quantum dimisit, qui penè nihil habuit? Sed in hac re, fratres carissimi, affectum debemus potius pensare quàm censum. Multum reliquit qui sibi nihil retinuit: multum reliquit qui quantumlibet paruum, totum deseruit. Multum dimisit qui cum re possessa, etiam concupiscentiis renuntiavit. A sequentibus ergo tanta dimissa sunt, quanta à non sequentibus concupisci potuerunt. Nemo igitur etiam cum quos-*

1. Reg. 13.

3. &amp; 4. Reg.

Math. 25.

Hom. 5. in  
Euang.



Non tam spectatur quid dones pro Diuinis, quàm quid, &c. 399

dam conspicit multa reliquisse, apud semetipsum dicat, Imitari huius mundi contemptores volo, sed quod relinquam, non habeo. Multa fratres relinquitis si desideris terrenis renuntiatis. Exteriora etenim nostra Domino quamlibet parua sufficiunt: cor namque & non substantiam pensat: nec perpendit quantum in eius sacrificia sed ex quanto profertur: nam si exteriorem substantiam perpendamus, ecce sancti Negotiatores nostri perpetuam Angelorum vitam datis retibus & navi, mercati sunt. Aestimationem quippe pretij rete non habet; sed tamen regnum Dei, tantum valet, quantum habes. Valuit namque Zacchæo dimidium substantiæ: quia dimidium aliud ad hoc quod iniuste abstulit, restituendum in quadruplum reseruauit. Valuit Petro & Andrea dimissis retibus & navi. Valuit Viduæ duobus minutis. Valuit alteri calice aquæ frigida. Regnum itaque Dei, ut diximus, tantum valet, quantum habes. Pensate itaque fratres, quid vilius cum emitur, quid carius cum possidetur? Sed fortasse nec calix aquæ frigida suppetit qui indigenti prebeatur, etiam tunc securitatem nobis promittit sermo Diuinus. Redemptore etenim nato, Cæli Ciues ostensi sunt, qui clamarent, Gloria in excelsis Deo, & in terra pax hominibus bonæ voluntatis. Ante Dei namque oculos nunquam est vacua manus à munere, si fuerit arca cordis repleta bonæ voluntate. Et quæ plura pergit de hac bonâ voluntate quæ suprà relata sunt.

Vide quid tibi desit quo minus omnia dederis. *Scrutabor Ieru-* Soph. 1.  
*salem in lucernis: & visitabo super viros defixos in fecibus suis.*

Videri potest in 1. parte, Feria 3. Hebdom. 2. post Epiph.  
In 3. parte, Feria 3. Hebdom. 13. In 4. parte, Dominica 17.



## SABBATO.

### PARABOLA PRETIOSÆ

#### MARGARITÆ.

Iterum simile est regnum Cælorum homini Negotiatori querenti bonas Margaritas, inuenta autem una pretiosa Margarita, abiit, & vendidit omnia quæ habuit, & emit eam. *Matth. 13.*



VERITAS PRACTICA.


Quantum peritus & prudens est Euangelicæ Margaritæ Negotiator, Tu tantum imperitus es & imprudens, nisi prospicias.

*RATIO EST, Quia quantum ille Negotiator peritus & prudens in Euangelicæ Margaritæ negotiatione, tantum alter est imperitus & imprudens qui in eadem negotiatione se opposito gerit modo.*

*Sed tu, nisi prospicias, te in eadem negotiatione, opposito geris modo.*

*Ergo quantum ille peritus & prudens est, tu tantum es imperitus & imprudens: Quod cum non possit non esse damnosissimum, sane est quod prospicias.*

I. P V N C T V M.

 **V**ENAM sit illa pretiosa Margarita, quis Negotiator qui omnia sua vendidit ut illam emeret, quamnam sint illa omnia quæ propterea vendidit, & quam denique fuerit peritus & prudens in illa sua negotiatione, dicetur opportunius in ipso propositæ Veritatis expositiuo discursu, ut manifestius videas quam sis imperitus & imprudens qui cum in eadem Margaritæ negotiatione veriseris qua Ille negotiator, te opposito plane modo geras, nisi diligenter prospicias. Hic est itaque totius Considerationis fructus ut cum videris te in ea præcipue parte illi esse oppositum in qua est peritus & prudens, agnoscas te imperitum & imprudentem, & quantum fieri potest, respicias.

Ac primo quidem ut euidentius & certius res tota procederet, præmittenda fuit hæc vniuersalis Propositio, quod quantum Ille Negotiator Euangelicus peritum & prudentem se in sua negotiatione ostendit, tam imperitum & imprudentem se quiuis alius manifestet



*Quantum peritus & prudens est Evangelica margarita, &c. 401*

manifestet si in eadem negotiatione versetur & se opposito gerat modo? Nonne hoc euidens & manifestum? Nonne oppositorum est eadem scientia in ratione suæ oppositionis? Nonne bonus & malus: iustus & iniustus, prudens & imprudens sunt inter se oppositi qua ipsa ratione bonitas & malitia: iustitia & iniustitia: prudentia & imprudentia inter se opponuntur? Quamobrem sicut est ratio quædam propter quam Negotiator Evangelicus maximè prudens & peritus habetur; profecto si opposita & contraria ratio reperiatur in alio quouis negotiatore circa eandem specie negotiationem, iure is merito imprudens & imperitus habebitur. Si prudens est Abigail quæ Dauidi victum subministravit, Impru- 1. Reg. 25.  
dens fuit Nabal qui eundem negauerat. Si prudens ille est qui mo- Prov. 17.  
deratur sermones suos, Ille imprudens est qui nullo eos modo moderatur. Si prudens ille est qui inuenta vna pretiosa Margarita vendit sua omnia vt illam sibi emat, profecto alter eiusdem negotiationis & studij qui diu cum alio margaritam quæsiuit & reperit, nec tamen sibi eam cum possit comparat, imprudens est, si præsertim margaritæ nouit pretium & valorem. O quis nouit Euangelicam margaritam, & non cognouit eius pretium?

## II. P V N C T V M.

**S**ED Tu nisi prospicias, te in eadem negotiatione opposito geris modo. Tria hic distincte consideranda sunt. Primum, quanam sit illa Margarita. Secundum, quinam Negotiator qui sua omnia pro illa comparanda prudenter vendit. Tertium, quàm sis illi oppositus. De primo cum multæ afferri possint Interpretationes, tum illa modò est conuenientissima quæ hoc Margaritæ nomen & virtutem transfert ad eam Humilitatis partem quæ mundi con- Hom. II. in  
temptum amplectitur. Sic sanctus Papa Gregorius, *in eius*, inquit, Euangelio.  
*comparatione vilescunt omnia; nihil in terrenis libet, deforme conspi-*  
*citur quidquid de terrene rei placebat specie.*

Sanctus quoque Chrysostomus, *Delitescit margarita tantisper dum in conchyli fuerit, simul vero ac perfractum fuerit, tum in gloria re-*  
*lucet, sic & nos*, Et alia quæ pergit fufius. Sic & aptissime liber l. 3. c. 32.  
de Imitatione IESU; *Dixi, viliora tibi emenda pro pretiosis & al-*  
*tis, in rebus humanis. Nam valde vilis & parua ac pene obliuioni*  
*tradita videtur vera cælestis sapientia; Non sapiens alta de se, nec*



*magnificari quarens in terra, quam multi ore tenuis pradicant, sed vita longè dissentiunt: IPSA TAMEN EST PRETIOSA MARGARITA à multis abscondita.*

Serm. 7. in  
Epiph.  
Dom.

De secundo, nemini dubium est quin primarius huius Margaritæ Negotiator fuerit Christus Dominus, qui, vt ait sanctus Leo, *Voluntariam humilitatem ab utero matris, usque ad supplicium crucis pro omni fortitudine & elegit & docuit.* Quomodo vero propterea sua omnia dederit non erit difficile aut obscurum intelligere si reuocemus in mentem quæ bona Christus habere poterat, vt magnifice & gloriose appareret coram hominibus in vniuerso mundo, quibus tamen bonis abstinuit & sese priuauit ne sic mundo gloriose appareret, sed pro gloria potius ignominiam reciperet. Hoc est enim Christum dare omnia sua pro hac pretiosa Margarita seu pro mundi contemptu quando sic suis omnibus bonis se abstinet, vt inde mundo contemptibilis potius quam gloriosus appareat, & à mundo reuera potius contemnatur quàm honoretur. Sicut Moyse dicitur dedisse regnum Egypti pro Christi opprobrio, quando recusauit illud regnum sibi oblatum tamquam filio adoptiuo & hæredi, quando scilicet, vt ait Apostolus, *Negauit se esse filium filia Pharaonis, magis eligens affligi cum populo Dei, quàm temporalis peccati habere iucunditatem, maiores diuitias æstimans thesauro Aegyptiorum, improprium Christi.* Sic Christus Dominus cum propositum sibi gaudium, Id est, vitam refertam bonis omnibus recusarit vt sustineret crucem confusione contempta, iure dicendus est bona illa omnia hoc ipso tradidisse quò ea potuit accipere, neque tamen accepit aut vsurpauit. Nunc autem vide attentius quænam illa essent eius bona: & ne multitudine obruaris, Distingue omnia in tres illas ordinarias Bonorum classes, quarum prima continet bona quæ dicuntur fortunæ seu temporalia, & corporalia. Secunda quæ naturales animi vel supernaturales complectitur dotes, quæ dicuntur bona spiritualia, vel etiam honesta & honorifica. Tertia denique quæ vitam ipsam, bonorum omnium summum, comprehendit.

Hebr. 11.

Ibid. 12.

De bonis itaque temporalibus, intueri quantam eorum copiam sibi comparare poterat qui Dominus vniuersorum erat, cui Dauid acceptum referens quidquid possidebat, *Tua est Domine, inquit, magnificencia, & potentia & gloria, cuncta quæ in celo sunt*

2. Par. 29.



*& in terra, tua sunt. Tuum Domine regnum & tu es super omnes Principes. Tuae diuitiae & tua est gloria. In manu tua magnitudo & imperium omnium. Domine Deus noster, omnis hac copia quam parauimus ut edificaretur domus Nomini sancto tuo, de manu tua est, & tua sunt omnia. MEVM est argentum, & meum est aurum, dicebat* Agg. 1.  
ipse Dominus. *Per me Reges regnant, per me principes imperant,* Prov. 8.  
*Mecum sunt diuitiae & gloria, opes superbae & iustitia, ut ditem Diligentes me, & thesauros eorum repleam.* Quid ex his ergo non poterat sibi assumere? Quas non construere domos & palatia fabricare? Qualem comitatum & familiam ex omni hominum & Angelorum coetu non potuisset sibi sociare? Fuitne Crasus ditior, fuitne Salomon gloriosior, fuitne alius cuius potentior, quam is esse poterat qui habet in vestimento & in femore suo scriptum, *Rex regum & Dominus Dominantium?* Si splendere gloria, si fulgere imperio, si dominatione regnare; Quae gens, quae regna, quae imperia, qui principes & qui Reges non se illi subiecissent & ex suis coronis omnibus vnam formassent soli eius Nomini & Capiti imponendam? Sed nihil horum voluit, non regnum, non prouinciam, non ciuitatem, non postremo domum, nec in ipso diuersorio locum vllum sibi parat, sed in angustissimo terrae loco *Luc. 23* recipitur, in stabulo nascitur, in praesepio reclinatur Infans, & *Math. 8* Vir factus non habebit ubi caput reclinet. Potuitne is egentius nasci & viuere qui poterat splendidius? Cur porro tanta egestas in tam opulento Viro? Cur tanta obscuritas in tam Illustri? Cur tanta demissio in tam Excelso? Nonne ut his suis datis bonis pretiosam illam emeret Margaritam? Nonne ut sic mundum contemneret, & à mundo contemneretur?

Sic percurre celebrando singulares eius corporis Dotes, quanta esset eius venustas, quanta pulchritudo, quanta maiestas, quanta omni ex parte perfecta species, vno verbo, *Speciosus erat praef. 44* filiis hominum; & qualis aliquando resplenduit in monte sancto, cum transfigureretur coram suis tribus Apostolis, semper fulgere poterat, sic semper radiare; sed non sic sperni potuisset, non sic contemni. Contemnendum se volebat & deridendum, quid faciat in tanta corporis claritate? Adstupescant omnes tanto splendori, tantam mirabuntur vultus gratiam, nullus eum auersabitur, nullus contemnet. Non ita, inquit, splendorem potius reprimam, quam mei contemptus affectum. Infirmabor, palle-



1s. 50.

Ibid. 53.

cam, fatigabor, esuriam; Corpus meum dabo percutientibus, & genas meas vellentibus: faciem meam non aueriam ab increpantibus & insipientibus in me. Non erit mihi species neque decor; & non erit aspectus. Quamobrem vero ita? Vt qui me videbunt tamquam despectum & nouissimum virorum, virum dolorum & scientem infirmitatem me contemnant & dicant, quasi absconditus vultus eius & despectus, unde nec reputauimus eum, aut certe putauimus eum quasi leprosum & percussum à Deo, & humiliatum. O vere pretiosam margaritam quæ tali pretio æstimatur!

Coloss. 2.

Iuan. 1.

3. Reg. 4.

SECUNDA bonorum series complectitur eas animi partes & vitæ status qualitates quæ commendationem imprimis apud omnes habent, & honorem conciliant, quo in bonorum genere quàm insignis esset & singularis Christus Dominus, nemo dubitet qui eum norit. Ipse enim est in quo sunt omnes thesauri sapientie & scientie absconditi. Ipse est qui de sinu Patris ad nos venit ut enarraret nobis & eructaret abscondita à constitutione mundi: per quem gratia & veritas facta est, de cuius plenitudine nos omnes accepimus, qui denique ut paucis multa complectar cum sancto Hieronymo, Respublica erat omnium gratiarum, & statua omnium virtutum. Enumera tibi si potes omnes artes, omnes scientias & facultates de quibus aliquando quidquam audiueris, propone tibi Arithmeticam, Musicam, Geometriam, Astrologiam, Rhetoricam, Philosophiam naturalem, moralem, & supernaturalem. Recense disputationes illas quas Salomon habuit super lignis à cedro Libani vsque ad hyssopum: nec non disceptationes de Iumentis, & volucris, & reptilibus, & piscibus. Nonne Christus hæc & plura cognouit? Nonne de his copiosius & certius quàm Rex ille Iudaicus dicere & disceptare poterat? Nonne si quid tale euulgasset, omnium in se admirationem concitasset? Cur de his ergo ne verbum quidem protulit? Cur tamdiu tacuit qui tam præclare loqui poterat? Cur quando loqui voluit tam demissa & humilia loquutus est, ut Iudæis post esset scandalum & stultitia Gentibus? Sic nimirum sic emenda erat Margarita, sic dandum erat quidquid gloriosius eminebat, ut dum contemptibilia diceret, diceretur ipse contemptibilis & reipsa contemneretur.

Quod spectat vero ad Eius Dignitatem seu quam vocant status Qualitatem, triplex in eo erat quæ apud omnes maximam obtinet



venerationem & cultum, nempe Regia dignitas, Prophetalis & Sacerdotalis. Hic erat dignitatum omnium summus apex, & sublimius honorum culmen quò qui promoti essent, sacro inungebantur oleo & *Christi* dicebantur, quos erat omnino vetitum tangere. *Nolite tangere Christos meos, & in Prophetis meis nolite man-* Ps. 104.  
*lignari.* Cum itaque Christus Dominus hoc triplici dignitatis titulo supra omnes retrò ante Reges & Prophetas esset insignitus, cur non omnes Reges ad eum conuolant, Regem suum agnitori, & Prophetam illum magnum tot promissum oraculis auditori? Quia scilicet non ita vult eminere coram omnibus, non sic circumspici, non sic apparere. Propheta certe est, sed hoc vel maxime nomine deridendus: *Prophetisa nobis Christe quis est qui te* Math. 26.  
*percussit.* Rex omnino est, sed in arundineo sceptro & corona spinea proclamandus: *Ecce Rex vester.* Sacerdos denique est & Ioan. 19.  
summus Pontifex: *Sed non semetipsum clarificauit ut Pontifex fieret,* Hebr. 5.  
inquit Apostolus: Hic est ille Sacerdos magnus Zacchariæ pridem Zacch. 3.  
ostensus qui non aliis *quam sordidis vestibus indutus erat.* Hic est ille Sacerdos qui in Sacramento altaris seipsum consecrat sub specie tam humili & abiecta ut multi ex his etiam qui non erubescunt eum crucifixum, erubescant & negent consecratum. Ipse autem sic se quotidie immolandum simul & contemnendum reliquit, ut licet ad solum sui contemptum immoletur non recuset, & tam facile patiatur se à sacrilegis, à Magis & à dæmonibus profanari & illudi, quàm ab Angelis adorari. O verè absconditam in conchyli margaritam? Potestne fundus maris esse profundior, ubi margarita delitescit, quàm Christus Sacerdos sic demissus & abiectus sub illis modicis speciebus ubi non modo nihili sit à non credentibus, sed à credentibus sit execrandum sacrilegium!

SVPEREST Vita quæ tertium conficit & supremum bonorum genus quam qui tradiderit pro Euangelica margarita, profecto sua omnia tradidisse dicendus est. Erat autem in Christo Domino Vita triplex, nempe naturalis, supernaturalis, & Diuina, neque vlli earum pepercit vmquam, nihil ut sibi penitus reseruaret quin totum effunderet in illius margaritæ pretium. Primo quidem dedit naturalem vitam in quo est mortuus modo, qui totus fuit ad ferendum opprobrium: *Nam in humilitate Iud-* Act. 8.  
*cium eius sublatum est.* Id est, tam humilis & contemptus in vita



fuit vt ad Eum morte tollendum nulla Iudicij forma & ratio fuerit habita. Vel sic aptius : quando est morte condemnatus tam turpi morte damnatus fuit, vt quis qualisue esset, iudicari non posset. Supernaturalem autem vitam non ita potuit depone-  
*Is. 53.*  
*Luc. 22.*  
*1. Cor. 2.*  
*Marth. 27.*  
*Pf. 68.*  
*Rom. 15.*  
 nere sicut naturalem, quia cum illa consisteret in Diuina gratia, in sanctitate, cæterisque donis cœlestibus, non poterat Christus se his exuere, non poterat non esse sanctus, non poterat non esse Deo gratus & vnitus. Quod ergo restabat vt faceret fecit, & quo poterat mori modo secundum illam vitam supernaturalem mortuus est vt sic contemni posset; nempe in existimatione hominum non modo non vt sanctus est habitus, sed vt maleficus, vt seductor, vt latro, *Et cum iniquis deputatus est.* Sic Diuinam dedit vitam cum vt crucifigeretur & illuderetur permisit non modo se non agnosci Deum: *Si enim cognouissent, numquam Dominum gloriæ crucifixissent,* Sed tanquam blasphemum, affectatæ Diuinitatis reum, probris & fannis onerari; *Si filius Dei es, descende de cruce: dixit enim quia filius Dei sum.* Atque adeo ipsum in cruce pendentem se à Deo derelictum clamare non puduit,  
*Deus meus, Deus meus vt quid dereliquisti me;* Quam Iudæi audientes vocem & in prauum detorquentes sensum, nouam sublan-  
 nandi Crucifixo rapuerunt ansam, & in ipsum Deum suas euo-  
 muere blasphemias, vnde in Psalmis Christus: *Quoniam propter te sustinui opprobrium, operuit confusio faciem meam. Et opprobria exprobrantium tibi ceciderunt super me.*

Hæc est itaque pretiosa Margarita, contemptus mundi, contemptus sui: Et hic est peritus prudensque Negotiator Christus Dominus qui omnia sua dedit vt illam sibi emeret, vt contemptum mundi simul ac sui compararet. Tu vero in eadem negotiatione vbi agitur de contemptu tui, quàm te opposito geras modo, agnosce. En Ille omnia sua tradit vt honorem fugiat & contemptum accipiat; Tu e contra, nonne quidquid habes tradis vt contemptum fugias & honorem accipias? Nonne statim atque iniuriam accipis, aut vel animo fingis te contemptum ab aliquo, nonne statim commoueris? Nonne tùm totus animus in id vnum intendit vt iniuriam propulset, contemptum abigat, & honorem læsum restauret? Nonne totum pene tempus in eo vno ponitur, totum studium, tota deuotio, tota pax, tota virtus, & tota vitæ lucunditas? Nonne hîc humilitas, si quæ sit,



*Quantum peritus & prudens est Euangelica margarita, &c. 407*

exhauritur? Nonne mansuetudo absumitur, Charitas, feruor, zelus, & si quod aliud coeleste donum est, totum euanescit & effunditur ad probum illud effugiendum? Nonne hoc est igitur omnia tua dare propterea? Et nonne hoc est, opposito te plane modo gerere quam se Christus gessit qui omnia sua dedit ut probum illud susciperet quod tu fugis! O verè dictum à Domino: *Qui non est mecum, contra me est.*

*Luc. II.*

### III. P V N C T V M.

**Q**UANTVM ergo peritus & prudens est Euangelica margarita negotiator, Tu tantum imperitus es & imprudens, nisi diligenter prospicias. Hoc est, nisi te totum conuertas ab eo qui soles esse, in simili negotiatione, qua cum illo versaris. Cum enim hic te opposito prorsus geras modo ac ille, cum ille det omnia sua ut contemptum sui patiatur, tu vero tua omnia largiaris ne illum feras, profectò quantum ille peritè & prudenter facit, tu tantum imperitè & imprudenter. Nam oppositorum antecedentium necesse plane est ut sint opposita consequentia. *Contra malum, bonum est, & contra mortem vita. Duo & duo, & unum contra unum*, inquit Sapiens; Quasi diceret, sicut malum ita bono opponitur, ut quod de malo tamquam malo dicitur, non possit dici de bono, imo contrarium sit dicendum; ita plane de reliquis quæ sunt inter se opposita, si de oppositorum vno, bonum dicas; malum oportet dicere de alio. Vel nega Christum esse prudentem in emenda illa margarita & in ferendo sui contemptu: vel te facere in hoc ipso tam imprudenter qui contemni nolis, quam ille est prudens. Et tamen in hac præcipue parte ponunt homines suam prudentiam ut auertant à se quidquid probrosum est! O quam verè talis prudentia, non nisi stultitia est, quandoquidem sic Diuinæ opponitur prudentiæ, quantum vnum contrarium suo potest opponi contrario. *Prudentiam prudentium repro-*

*Ecclesi. 33.*

*I. Cor. I.*

O quanta humilitatis æstimatio inde ducenda est, quod pro illa Christus non insipiens certe Negotiator sua dedit omnia! Tantum videlicet pro illa Virtute dedit, quantum vniuersim pro salute hominum! Quid enim amplius pro illorum salute potuit, quam sua dare omnia? Ex quo intelliges tam tibi caram hanc



408 Dominica 9. post Pent. De lachrymis à Christo, &c.

debere esse virtutem, quam ipsam salutem animæ, quæ sic ab illa Virtute pendet, ut si quod sit salutis periculum, hinc maxime timendum sit, quod vel honorem nimis ames, aut nimis probrum timeas. *Quantis sudoribus hæreditas cassa, aut quid simile vanum expetitur! minore labore Margaritum Christi emi poterat.* Sic aptè sanctus Hieronymus. Vide plura passim Verbo, *Humilitas, Mundi contemptus.*



# DOMINICA NONA.

DE LACHRYMIS A CHRISTO  
DOMINO FVSSIS SVPER IERVSALEM.

*Vt appropinquavit Videns Civitatem, fleuit super illam, dicens, quia si cognovisses & tu. Luc. 19.*

## VERITAS PRACTICA.

*Nisi cor tuum moueatur ad Christi verba lachrymantis, Cor illud est de quo Sapiens: Cor durum habebit male in novissimo.*

*Ecclesi. 3.*

*RATIO EST, Quia cor illud est durum quod nec timore frangitur, nec amore mollitur.*

*Sed nisi Cor tuum moueatur ad Christi verba lachrymantis, nec timore frangitur, nec amore mollitur.*

*Ergo illud est Cor durum de quo Sapiens tremendum illud affirmat futurum, ut male habeat in novissimo die.*

I. PVNCTVM.



I. P V N C T V M.



VANGELII hodierni præcipuum argumentum est Ingressus Christi Domini in Ciuitatem Ierusalem: de quo quidem ingressu plura in secunda parte, Dominica Palmarum die: & in quarta parte per integram Hebdomadam. Nunc vero tantum de eius verbis & lachrymis simul iunctis, ad cordis nostri duritiam vel mouendam vel cognoscendam quàm sit periculose pertinax.

Lege textum, Intuere Christi vultum, vide suffosos mœrore oculos, admirare profusas lachrymas, audi verba terrore simul & suauitate plenissima: *Quia si cognouisses & tu, & quidem in hac die tua, quæ ad pacem tibi: nunc autem abscondita sunt ab oculis tuis. Quia venient dies in te, & circumdabunt te inimici tui vallo, & circumdabunt te, & coangustabunt te undique: & ad terram prosternent te, & filios tuos qui in te sunt, & non relinquent in te lapidem super lapidem, eo quod non cognoueris tempus visitationis tuæ.*

Non saxa deflet aut euerſas domos, inquit sanctus Hieronymus, sed homines, atque ipsas hominum animas in sempiternum ruituras exitium, nisi resipiscant. Neque tantum Iudæorum perditionem suis subijcit oculis deplorandam, sed omnium vniuersim hominum, ac particulatim tuam qui hæc legis, meamque qui hæc scribo: Vnde est illa eiusdem sancti Doctoris sententia in hæc Ezechielis verba: *Rex lugebit, & princeps induetur mœrore.* P O S. Ezech. 7. S V M V S, inquit, *Regem lugentem nostra vitia atque peccata Christum dicere, qui appropinquans Ierusalem fleuit super illam.*

Sic itaque spectandæ sunt eius lachrymæ & audienda verba quasi tibi vni funderentur, vt eorum consideratione magis ac magis afficiaris ad deferendum illud vitium quod grauius in te regnat & cui deferendo nihil hætenus profuerunt tot Verba, tot monita, tot remedia quæ in hunc finem sunt impensa. Extremis malis quale est tuum, extrema proferuntur remedia quales sunt hæc Christi voces, eiusdem perfusæ lachrymis. Nisi his sic conjunctim propositis Cor tuum hodie moueatur, certe cauendum est ne sit Cor illud durum in quod aliquando cadant mala illa omnia quæ primò Christus Iudæis denuntiauit.



1. Confid. 2. Expende rationem cum metu & tremore. Cor illud durum est quod nec timore frangitur nec amore mollietur. Longiorem duri cordis affert sanctus Bernardus descriptionem, sed eo tota recidit ut tum maxime intelligatur illa durities quando cordi proponuntur motiua vel timoris aut amoris, neque ullis horum se flecti finit. Cum enim illa duo sint flectendis cordibus aptissima media, profecto si horum neutro inflectuntur, dura sint omnino necesse est, unde Beatus Iob quando se à Deo narrat esse commotum, *Deus*, inquit, *emolliuit cor meum, & omnipotens conturbauit me*: Id est, amore simul & timore concitatum me sensi. Contrà vero illi qui nec Deum ut Patrem dilexerunt, neque ut Dominum timuerunt, indurati prorsus corde dicuntur. *Indurauerunt ceruicem suam. COR suum posuerunt ut adamantem.*  
 Iob. 23.  
 Mal. 1.  
 Ier. 17.  
 Zacch. 7. Nonne hoc est pauendum?

## II. PUNCTVM.

**S**ED nisi cor tuum moueatur ad Christi verba lachrymantis, seu ad Christi verba simul & lachrymas, nec timore frangitur, nec amore mollietur.

Nam sicut Christi lachrymæ pro nobis fusæ nostrum amorem prouocant, sic eius verba bene intellecta & nobis fideliter applicata timorem certe incutiunt vehementissimum. Quod autem & quomodo ea eius verba nobis applicare debeamus atque inde deterri, sic expresse sanctus Gregorius: *Debemus*, inquit, *ex rebus exterioribus introrsus aliquam similitudinem trahere, atque ex euerfis adificiis parietum, morum ruinam timere*. Tum singillatim exponens Christi verba, ne vnum quidem intactum relinquit quod non applicet illi animæ quæ paulo liberius viuit; Duas verò verborum Christi partes quodammoda constituit, dum primo quæ spectant ad nostrum vitæ præsentis statum, Deinde quæ ad consequentem mortem referuntur, commemorat.

Hæc sunt porro Christi verba quæ dicuntur spectare nostrum præsentem vitæ statum: *Et quidem in hac die tua quæ ad pacem tibi, nunc autem abscondita sunt ab oculis tuis*. Sic enim sanctus ille Doctor in hunc ea sensum interpretatur: *Suam hinc diem habet anima peruersa quæ transitorio gaudet in tempore, cui ea quæ adsunt ad pacem sunt: quia dum rebus temporalibus letatur, dum honoribus*



extollitur, dum in carnis voluptate resoluitur, dum nulla ventura pœne formidine terretur, pacem habet in die sua, quæ graue damnationis suæ scandalum in die habebit aliena. Ibi enim affligenda est, ubi iusti lachrymantur: & cuncta quæ modo ei ad pacem sunt, tunc in amaritudinem rixæ vertentur, quia rixari secum incipiet cur damnationem quam patietur non expauit, cur à prospiciendis malis sequentibus oculos mentis clausit: Vnde ei dicitur, NVNC autem abscondita sunt ab oculis tuis. Peruersa quippe anima rebus presentibus dedita, in terrenis voluptatibus resoluta abscondit sibi mala sequentia, quia præuidere futura refugit quæ presentem lætitiā perturbant: dumque in presentis vite oblationibus se deserit, quid aliud quam clausis oculis ad ignem vadit? Vnde bene scriptum est: In die bonorum ne immemor sis malorum. Et inde per Paulum dicitur, qui gaudent, tamquam non gaudentes sint; quia quæ est presentis temporis, ita est agenda lætitiā, ut nunquam amaritudo sequentis iudicii recedat à memoria, quatenus dum mens pauida extreme ultionis timore transfigitur, quantum nunc præsens lætitiā, tantum post irā subsequens temperetur: hinc namque scriptum est, beatus homo qui semper est pauidus; qui vero mentis est durā corruet in malum. Sequentis enim irā iudicii tanto tunc districtior portabitur, quanto nunc & inter culpas minimè timetur.

Hæc ad verbum sanctus Gregorius, ex quibus quæ postremo dicit, *Inter culpas minimè timetur*, sunt imprimis notanda: nam te designant apertius, te manifestius indicant eum esse ad quem totus hic sermo dirigitur; Licet enim peruersa hîc nominetur anima quo te nomine forsan exclusum putas, non est tamen aliter intelligenda hæc animæ peruersitas quàm cum inter culpas non satis timetur: hoc est habere suam diem. Hoc est habere pacem in die sua. Hoc est quod Christus deplorat, hoc est quod vehementer timeri debet: Vnde tu qui hæc consideras, quàm vere potes fateri te non satis timere inter culpas tuas, tam vere debes tibi applicare quæcumque hîc dicuntur de illa anima quæ non satis timet, ne non satis lætetur; quæ futura non prospicit ne contristetur & ne nimis timeat; quæ clausis denique oculis ad interitum suum ruit.

Potestne aliquid dici vel cogitari terribilius? Poterant certe quæ sequuntur Christi Domini & sancti Gregorij verba, terrorem augere non mediocriter: sed vel commodius ad sequens remittentur Punctum: vel hîc sufficiat ad concipiendum timorem



qui est in verbis Christi, hoc vnum recogitare attentius quid sit clausis oculis in ignem vadere! Non ipsa Inferorum gehenna si aperte videretur, ita esset tremenda, quàm dum clausis aditur oculis. Nam si videretur, horrorem sui & fugam commoueret, quando vero non videtur, non euitatur; sicque fit vt qui nimis iucunde volunt viuere, nolint videre quam viuant miserè & periculose.

Quamobrem hoc etiam atque etiam intellige: Cum ille qui non timet inter culpas, ille sit qui clausis oculis in ignem vadit: Cumque tu Ille sis qui non satis times inter culpas tuas, quid sequitur nisi quod tibi tam tremendum esset, quàm illi qui monitus esset de imminente salutis suæ periculo? Vnde & aliud sequatur necesse est, quod si te tamen hæc monita nihil moueant, si nullis neque Christi, neque Sanctorum verbis cor tuum inflectatur, cor plane sit quod neque timore frangitur, nec amore molliatur.

### III. P V N C T V M.

**E**RIT ergo etiam Cor tuum cor illud durum de quo Sapiens: *Cor durum habebit male in nouissimo.* Tunc enim apparebit quàm sit durum quod nec amore molliatur, quem Christi lachrymæ concitare debuerant: nec timore frangatur, quem Verba tanto plena terrore non commouerunt. *Numquid non verba mea sunt quasi ignis, dicit Dominus, & quasi malleus conterens petram?* Ignis scilicet ad amorem, & malleus ad timorem; Vnde qui nec igne liquefiat, nec malleo conteratur: Nonne ille quouis metallo vel petra durior? *Dura ceruice & incircumciso corde!*

*Ier. 23.*

*Act 7.*

*1. Conf. 13.*

*Serm. 3. in  
Nat. Dom.*

Hanc fuisse aliquando sui cordis duritiem & miseriam agnouit & defleuit sanctus Augustinus, qui cum ploraret Didonem mortuam, vt ipse refert, *seipsum à Deo morientem siccis oculis ferret miserimus: & dum fletet eius mortem quæ fiebat amando Aeneam, non fletet suam mortem quæ fiebat non amando Deum.* Sic & propius ad rem nostram sanctus Bernardus: *O duritia cordis mei! Fratres, lachrymæ Christi mihi & pudorem pariunt & dolorem.* Ludebam ego foris in platea, & in secreto regalis cubiculi, super me ferebatur iudicium mortis. *Audiuit hoc Vnigenitus eius, exiit posito diademate, flens & ejulans quod morte damnatus esset seruulus eius. Intueor illum subito procedentem, stupeo nouitatem, causam percunctor & audio. Quid*



facturus sum? Adhucne ludam & deludam lachrymas eius? Plane si insanus sum & mentis inops non sequar eum, nec simul cum lugente lugebo? Ecce unde pudor. Dolor & timor unde? Vtique quia ex consideratione remedij, periculi mei aestimo quantitatem. Et post pauca. Pudet itaque dilectissimi, propriam negligenter dissimulare passionem cui tantam à maiestate tanta, exhiberi video compassionem. Compatitur Filius Dei & plorat: homo patitur & ridebit? Sic & medicina aestimatio & doloris mihi & timoris exaggeratio est.

Et vero etiam hic doloris ac timoris sensus multum posset exaggerari considerando plenius quam vere sit à Sapiente dictum de corde duro, quòd habebit male in nouissimo: neque id plenius considerari potest quam ex sequentibus Christi Domini & sancti Gregorij verbis quæ aliam faciunt partem huc remissam, Quia venient dies in te, & circumdabunt te inimici tui vallo, MALIGNI scilicet spiritus sic vallo animam morituri circumdant ut euadendi aditum inuenire non possit, & operari iam bona non liceat, quæ cum licuit agere, contempsit. CIRCUMDABUNT te & coangustabunt te undique; Tunc scilicet animam coangustant quando ei non solum operis, verum etiam locutionis atque insuper cogitationis iniquitates replicant, ut quæ prius se multa dilatauit in scelere, ad extremum de omnibus angustetur in retributione. ET AD TERRAM PROSTERNENT TE & filios tuos qui in te sunt. Tunc anima per cognitionem reatus sui ad terram consternitur cum caro cui vitam suam credidit, redire ad puluerem urgetur. Tunc in mortem filij eius cadunt cum cogitationes illicitæ quæ modò ex illa prodeunt, in extrema vite ultione dissipantur sicut scriptum est: In illa die peribunt omnes cogitationes eorum: Quæ scilicet duræ cogitationes intelligi etiam per lapidum significationem valent: Nam sequitur, ET NON RELINQVENT in te lapidem super lapidem. Perversa etenim mens cum perversa cogitationi adhuc peruersiorem adjicit, quid aliud quàm lapidem super lapidem ponit? Sed in destructa ciuitate super lapidem lapis non relinquitur, quia cum ad ultionem suam anima ducitur, omnis ab illa cogitationum suarum constructio dissipatur; Quæ cur hæc patiatur, adjungitur; EO QVOD non cognoueris tempus Visitationis tuæ: Pravam namque animam omnipotens Deus multis modis visitare consuevit.

Et quæ plura prosequitur vnïuersim de his Visitationum modis. Tu vide in particulari quibus te visitauit, & quoties hoc tempus non cognoueris. Vix tale tempus nosti, aduerte diligentius.



Isa. 4.

*Visitabo super eum vias eius: & cogitationes eius reddam ei.*

ALIA hic proposita Veritas sic præcedentem illustrat, vt ipsa etiam ex illa lumen capiat.

Si te cognosces, hoc in te flendum nosces, quod deflet Christus.

*RATIO EST, Quia quod potissimum deflet Christus, est indurata eorum peruiacacia qui tunc Ipsi resistebant.*

*Sed si te cognosces, talem in te nosces peruiaciam.*

*Ergo & hoc ipsum in te nosces flendum quod deflet Christus, ac proinde diligentius prospiceres.*

Ier. 9.

AD primam propositionem magis declarandam, possent distinctius quatuor obseruari quæ Christus Dominus fletet. Primum, futura euersio ciuitatis Ierusalem, & miserandus temporalis status Iudæorum, quos cum singulariter Dominus diligeret, certe indolebat tantæ eorum miseriæ. *Quis dabit capiti meo aquam, & oculis meis fontem lachrymarum: Et plorabo die ac nocte interfectos filia populi mei?* Secundum magis flendum, sempiternus erat eorum interitus: *Fili mi Absalom! Absalom fili mi! quis mihi tribuat vt ego moriar pro te? Absalom fili mi! Fili mi Absalom!* Sanè tenerior erat affectus Christi erga Iudæos quàm patris in filium, nec minùs illos in suo perituros peccato videbat, quàm Dauid cerne-  
ret perduellem illum quem deplorabat iam periisse. Tertium quod supra duo alia Christus deflebat acerbius, erat eorumdem peccatum seu indurata in peccato peruiacacia, quâ sibi tam contentiose resistebant vt quibuslibet oppositis remediis adeo non sanarentur & resipiscerent, vt inde potius in profundum peccati ruerent.

2. Reg. 18.

Ier. 30.

*Insanabilis fractura tua, pessima plaga tua, curationum utilitas non est tibi.* Longe est enim grauius coram Deo malum, quâlibet culpa quàm quauis poena. Nihil est autem in malo culpæ grauius, quàm in ea sic animam peruiacaciter indurari, vt quantò magis curetur, tanto magis ingrauescat. *Peruenit ad celos Iudicium eius.* Actum est de illa, nihil restat nisi punitio infligenda. Quartum denique quod simul cum aliis deplorabat Christus, talis erat animi perui-

ibid. 51.

acacia quam videbat futuram in hominibus qui sibi resisterent, qui



*Si te cognosces, hoc in te flendum nosces, quod deflet Christus. 415*

fidem non reciperent vel abnegarent, qui peccato suo sictenaciter adhererent, vt neque gratiis cederent, nec promissis allicerentur, nec minis terrentur. *Quid est quod debui ultra facere vinea mea & non feci ei? An quod expectavi vt faceret vinas, & fecit laticulas? Certe hoc dolendum!* 15. 55

A T verò, quæ secunda est Propositio: *si te cognosces, talem in te nosces peruiaciam.* Sunt enim multa ex peccatis tuis, quæ simpliciter dici non possunt peccata, sed peruiacia in peccatis. Non est superbia tua, simplex superbia, sed indurata & peruiacax; seu potius ipsa est animi tui indurata quædam peruiacia qua Christo iam toties à multis annis te ab illa reuocanti resistis & contradicis; Vnde Scriptura de tali superbo loquitur, *spiritus illius obfirmatus est ad superbiam.* Nonne sic tuus ita est obfirmatus? Nonne multoties sensisti, quantum superbia displiceret Deo, quantum esset damnosa, quantum esset in Scripturis atque ab ipso præsertim Christo exagitata? Quid inde profecisti? Nonne cum annis crescit ambitio? Nonne cum doctrina si quam habes, augetur fastus? Nonne cum dignitate fouetur arrogantia? Nonne denique magis in dies in sublime tolleris, & in Ingenij tui commendatione obfirmaris? Quid est esse peruiacem in peccatis nisi hoc sit? *Conteram duritiam superbia vestra.* Dan. 5.  
Leuit. 26.

*Si te ergo cognosces, hoc in te flendum nosces, quod flebat Christus,* peruiacem videlicet in peccato animum, quem non modo in Iudæis vidit & fleuit Dominus, sed in quibuslibet induratis peccatoribus quos non minus venit saluare quam Iudæos. Neque semel tantum cum ciuitatem ingrederetur, sed si audimus Apostolum, sapissime *in diebus carnis suæ fleuit*: Neque cessat modo per Electos suos idem flere, vt præclare S. Gregorius: *Hoc semel egit cum perituram ciuitatem esse nuntiavit: Hoc quotidie Redemptor noster per Electos suos agere nullatenus cessat, vnde & qui planguntur, si damnationem suam quæ eis imminet, agnouissent, semetipsos cum lachrymis Electorum plangerent.* Hebr. 5.  
Homil. 39.

Nec dicas te non ita desperatum esse ac deploratum, sicut Iudæos; Quid enim sit futurum nescis? Et si te cognosces non minus in te videres causas & radices grauissimorum criminum quæ à quouis homine sunt perpetrata: atque adeo ex consequenti cer-



neres ipsius sempiternæ damnationis in te causam & casum esse, nisi te singularis Dei bonitas inde eriperet. Sed esto, non sit tam grauis superbia tua, quale erat illorum peccatum: Putasne verò fuisse æquale in omnibus illis quos flebat Christus, peccatum? Nonne alij aliis erant nocentiores? At nonne etiam minus peccantes fleuit? Nonne & hi simul cum aliis inuoluti sunt pœna temporali & æterna? Aut si putas te redire & conuerti posse, nonne & ipsi redire poterant quos tamen non desinebat flere? Imo & hoc ipso magis eos flebat, quod cum possent conuerti, nolabant aut differebant, vnde tu qui te posse & velle aliquando dicis, tu peræque es deplorandus quod differendo resistas gratiæ quæ iamiam te vellet à peccato tuo reuersum. *Dedit ei Deus locum pœnitentiæ: & ipse abutitur eo in superbiam.* TIMEO inquit Apostolus, *ne lugeam multos qui peccauerunt ei: & non egerunt pœnitentiam de immunditia.*

Job. 24.

2. Cor. 12.

Quæ plura hûc referri possent ex aliis Partibus aut Feriis, sic paucis habe.

Non viuitur in amore sine dolore.

*In 1. parte, Feria 5. Hebdom. 3. Aduentus.*

Licet omni peccatori sit necessariò pœnitendum, vix tamen vllus est qui necessariam agat pœnitentiam.

*In 1. parte, Dom. 4. Aduentus.*

Nisi probè paratus sis ad aduersa, nec ad ipsa prospera bene paratus es.

*In 1. parte, Fer. 6. Hebdom. 5. post Epiphan.*

Quantùm obest aduersitas improuisa, tantùm prauis prodest.

*In 2. parte, Fer. 6. Hebdom. Sexagesima.*

Qui cum Christo dolente non dolet, non potest cum ipso gaudente gaudere.

Frustra te Christi miseret, nisi se tui prius misereat.

Quantò te ipsum negligis quasi non esses cum cæteris periturus, tantò te Christus doluit præ cæteris perituris.

Vera



*Si te cognosces, hoc in te flendum nosces, quod deflet Christus. 417*

Vera Contritio dolorem sensibilem nec includit nec excludit.

*In 2. parte, Fer. 2. 4. 5. & Sabbato Hebdom. 1. in Quadragesima.*

Qui ruina gaudet inimici, ruinam eius in se trahit.

*In 2. parte, Sabbato Hebdom. 3. in Quadrag.*

Minima quæuis inordinatio cordis immundi, major est quauis inordinatione huius mundi.

*In 2. parte, Fer. 6. Hebdom. 1. post Octau. Paschæ.*

Reuocanti hominem Deo ab errore viæ suæ non obsequi, peius est quàm primò vocantem ne erraret, non sequi.

*In fine 2. partis, ubi de statibus, consideratione 4.*

Quæ denique pro Missionibus habentur in hac 3. parte, Hebdomada decima, satis apte conueniunt supradictis: Necnon illa quæ in 4. parte, Hebdomada 26.

Ad postremam verò Euangelij partem de ingressu Domini in templum, atque inde eiectionis venditoribus, videri debent quæ in fine primæ partis Veritates fusè declarantur.

In loco sacro non pauere, pauendum est.

Ad sacrum locum, sicut ad Sacramentum.



H A C Hebdomada, cum primùm occurrant tres illi homines qui videbantur velle sequi Christum Dominum, neque tamen leguntur eum sequuti propter fatalem illam Concupiscentiam, quæ à Diuino obsequio prope singulos auocat: opportunè de illis tribus Concupiscentiis Christo Domino subjiciendis Meditationes & Veritates instituuntur, exemplo petito ab aliis Creaturis quæ ad nutum illius totæ se formant, vt patebit in sedata maris tempestate, in fu-



418 FERIA 2. Hebd. 9. post Oct. Pent. De tribus hominibus, &c.  
gatis ab humano corpore Dæmoniis, in expulsis gra-  
uibus morbis, & in mortuis suscitatis, prout se histo-  
rica Euangeliorum series offert.

FERIA SECUNDA.  
DE TRIPLICI HOMINVM  
GENERE QVI VIDENTVR VELLE SEQVI  
CHRISTVM, NEC TAMEN  
EVM SEQVNTVR.

*Nemo mittens manum suam ad aratrum, & respi-  
ciens retro, aptus est Regno Dei. Luc. 9.*

VERITAS PRACTICA.  
Affectum probat Effectus.

SENSVS EST, Quod quando variis animi motibus seu  
affectibus afficimur circa rem aliquam potiendam, quisnam  
sit inter ceteros primarius & verior eius rei affectus, decla-  
rat effectus inde sequens.

RATIO EST, Quia ille est primarius & verior rei alicuius  
affectus qui est magis liber & voluntarius.

Sed effectus probat & ostendit quisnam inter ceteros sit magis  
liber & voluntarius affectus.

Ergo verum affectum probat Effectus. Quod certe ad multam  
praxim perutile est observare.

I. PUNCTVM.

**D**E primo ex his tribus hominibus qui ad Christum acces-  
serunt quasi futuri eius Discipuli, sic sanctus Euangelista  
Matthæus: Et accedens vnus Scriba, ait illi, Magister, sequar  
te quocumque icris. Et dicit ei IESVS: Vulpes foveas habent, &



volucres cœli nidos, filius autem hominis non habet ubi caput reclinet. Quasi diceret, vt interpretatur sanctus Hieronymus, Quid me propter diuitias & sæculi lucra sequi vis, cum nec hospitium habeam. Sanctus autem Augustinus sic de Eodem paulo clarius: *Intelligitur hic miraculis motus, ob id tantiam sequi voluisse quam significant aues: nib. Euang. 2. 5.*

De secundo sic pergit sanctus Matthæus: Alius autem de Discipulis eius, ait illi: Domine permittite me primum ire & sepelire Patrem meum: IESVS autem ait illi: sequere me & dimitte mortuos sepelire mortuos suos. Ad quæ Domini verba sic sanctus Augustinus: *Quando Dominus parat homines Euangelio, nullam excusationem vult interponi, carnalis huius temporalisque pietatis.* *De verbis Dom. Serm. 7.*

De tertio denique sanctus Lucas: Et ait alter, sequar te Domine, sed permittite mihi primum renuntiare his quæ domi sunt. Ait ad illum IESVS, Nemo mittens manum suam ad aratrum, & respiciens retro, aptus est regno Dei. Vbi sanctus Cyillus, apposuit manum aratro, inquit, qui habet affectum sequendi, tamen respicit retro, qui dilationem petit occasione redeundi domum. Et sanctus Augustinus: *Vocat te Oriens, & tu attendis occidentem.* *Luc. 9.*

Cum itaque tres illi Viri variis mouerentur affectibus, partimque vellent sequi Christum, & partim sibi suisque prospicere: quisnam eorum primarius & verior affectus fuerit, probauit effectus seu euentus, Id est, si relictis omnibus statim reipsa sequuti sunt Christum, prout ab eo mouebantur, tunc probatum est ex hoc effectum, talem eorum affectum sequendi Christum, fuisse primarium & veriozem: Quod si è contra non sunt sequuti Dominum sed potius adhaeserunt vel parentibus vel familiæ, vel bonis suis ordinandis, dici debet hunc affectum fuisse alio quo Christum sequi volebant potentiozem & veriozem, cum ille effectum suum habuerit & non alius. Hæc est enim vniuersalis & ad multa dignoscenda perutilis Veritas, quod affectum probat effectus, id est, ex effectum declaratur quisnam ex multis simul conuenientibus sit verus & principalis affectus, quoniam vero adulterini & fallaces quibus sæpe decipimur putantes nos velle quod reuera nolumus, aut id nolle quod plane volumus.

Quod vt apertius explanetur, obseruandum est primò hanc vocem, *affectus*, esse æquiuocam ad omnes illos motus quo mouetur animus circa rem vnam vel diuersas exprimendos; siue enim



fit naturalis Inclinator, seu passio appetitus concitator, seu simplex voluntatis complacentia, seu denique absoluta voluntas, dicuntur hi omnes animi motus eodem affectus vel concupiscentiæ nomine, licet eorum ratio sit longe diuersa. Deinde vero est obseruandum quod hi simul affectus quantumcumque varij & diuersi sint, sæpe concurrunt circa vnum & idem objectum, vt vel se iuuent ad illud prosequendum & obtinendum, vel se impedian & destruant. Nonne id sæpe accidit vt quis virtutem aliquam ex naturali indole, vel ex affectu humano, vel rationali & diuino simul prosequatur? Nonne è contra fit etiam sæpius vt quis naturali affectu aueretur virtutem aliquam: & tamen ipsam eandem alio rationali & spiritali affectu diligit & obseruet? Quod & de vitio quolibet sic sentitur & dicitur; cum directe oppositi circa idem excitantur affectus & amoris & odij, & persecutionis & fugæ. Denique quod obserues diligenter, cum hi affectus sint plane oppositi, atque inter se pugnantes, vt patet; oportet alios præ aliis esse vnius rei veros affectus, & alios falsos: neque enim verè & ex æquo potest animus simul virtutem aut vitium colere & odisse: *Aut enim vnum odio habebit & alterum diligit: aut vnum sustinebit & alterum contemnet*, inquit Dominus.

Matth. 6.

Iam verò vt cognoscatur vter altero sit verior rei affectus, videndum est vter sit magis liber & voluntarius; nam hic profecto affectus est verior qui est magis voluntarius; Si magis voluntariè consentis vitio quàm virtuti, magis verus est affectus vitij quàm virtutis; & affectus virtutis quem tùm senties non erit verus affectus virtutis sed falsus & adumbratus. Hinc illa sancti Thomæ & similia possum in prima secundæ: *Actus in tantum est peccatum, in quantum est voluntarius, & in nobis existens. Et cum peccatum principaliter in voluntate consistat, quanto motus peccati magis est proprius voluntati, tanto peccatum est grauius*: Atque idcirco Apostolus, *Voluntarie*, inquit, *peccantibus nobis, terribilis quadam expectatio iudicij*, id est, quo quis magis voluntariè peccat, eo terribilius iudicatur. O pauendam humanæ voluntati sententiam.

I. 2. q. 77.

a. 6. & q.

78. a. 4.

Hebr. 10.

## II. PUNCTVM.

**S**ED effectus probat & ostendit quisnam affectus sit magis voluntarius. Declarandum primo quid sit effectus, nimirum quando actu



& re ipsa fit aliquid quod dependet à nobis, & quod non fieret nisi vellemus, vt cum scientes volentes non ex primo naturæ impetu, sed aduertenter cogitamus, loquimur aut quidpiam agimus; ista cogitatio vel loquela vel actio dicitur esse effectus positivus: aut si non cogitamus, si non loquimur, si non agimus quando agendum esset, dicitur effectus negatiuus qui effectus tam in actu vitij reperitur quam in actu virtutis. Vnde sunt peccata commissionis & omissionis sub eadem peccati specie, *Quia ad idem ordinantur, & ex eodem motivo procedunt*, inquit sanctus Thomas, vt <sup>1. 2. q. 72.</sup> <sup>4. 6.</sup> cum auarus rapit aliena, & non dat sua quæ dare debet ex eodem affectu pecuniæ: Et gulosus superflua comedit, nec debita seruat ieiunia, ex eodem etiam affectu gulæ.

Quibus sic declaratis manifeste patet quod per talem effectum seu positivum seu negatiuum probatur & manifestatur, quisnam ex multis affectus sit magis voluntarius. Nam cum effectus procedat à voluntate, & voluntas ad illum producendum suo moueatur affectu, profecto necesse est quod effectus sit tam certum signum affectus quàm certo constat effectum esse signum suæ causæ. Maneamus in iisdem exemplis auari & gulosi, faciamus vtrumque nonnullos habere affectus virtutis oppositæ suo vitio; Quando tamen actu & effectu positivo vel negatiuo peccant, nonne affectus vitij maior est seu magis voluntarius in illis, quam affectus virtutis? At vnde cognoscis esse magis voluntarium nisi ex illo effectu vitij quem voluntarie ponunt, & quem non ponerent nisi magis afficerentur objecto vitij quam virtutis? O quàm recte Sapientis: *Qui deprauat vias suas, manifestus erit*: manifestum erit <sup>Prov. 10.</sup> quàm sit ipse prauus: licet aliquos habeat bonos affectus intermixtos prauis, quia tamen in effectu est prauus, sic in affectu se indicat & manifestat magis esse prauum quam probum. Dum deprauat vias suas, relinquit suæ prauitatis manifestum signum, sicut quoddam in via, pedis vestigium.

### III. P V N C T V M.

**A**FFECTVM igitur probat effectus: Probat & declarat quisnam ex multis simul concurrentibus sit verus & germanus affectus; probat & verè manifestat quinam in animo sint affectus virtutis & vitij: quia videlicet probat quinam sint actus voluntarij



aut non voluntarij, ex qua probatione liquet quinam sint proprij & veri affectus. Sicut enim inuoluntarij affectus non sunt proprij & veri nostri affectus, ita plane voluntarij sic dicendi sunt veri ut  
 2. Macch. 6. illi soli sint veri. Sic Eleazarus ille nobilis inter suos & a tate grandaeus cum duceretur ad supplicium propter leges paternas, variis affectibus timoris & amoris mouebatur: sed tamen ut indicaret se magis amare mortem pro Deo subeundam quam timere, ut manifeste faceret omnibus suum esse magis affectum amoris quam timoris: *Voluntarie*, inquit Scriptura, *praibat ad supplicium*. Quasi diceret, hoc signum dabat sui affectus.

Atque hinc de Conscientia & de vera virtute aut vitij quid dubitari potest, pene totum soluetur; cum ad omnia quae proponuntur dubia de consensu praestito vel non praestito, respondeat hoc vnum debeat, an aliquid effecisti? An aliquid voluntarium a te productum est? An aliquid quod potuisses non facere, nec debuisses? Si enim ita est, profecto consensisti, & affectum habes vitij, licet forte modo sensum non habeas, aut licet aliquid ex opposita virtute sentias, diceturque tibi à Domino, *Perversa est via tua mihi que contraria*. Quod si nihil voluntarie produxeris, sed te inuito & repugnante contigerit te pati potius quam agere, non est affectus vitij, non est verus eius affectus, licet possit esse sensibilis & vehemens & concitatissimus, quia tamen nihil producit nihil efficit, non est verus affectus: quia verus affectus habet effectum aut non est verus; sicut ex fructu arbor cognoscitur; sicut ex opere Fides & Charitas: sic ex voluntario effectum, verus hominis animus, aut omnis verus affectus.

Rom. 7. Dicat licet Apostolus, *Non quod volo bonum, hoc ago; sed quod odi malum, illud facio*. Illa enim ago & facio quae usurpat non sunt effectus voluntarij, sed primi motus concupiscentiae, qui videntur quidem facere malum quod animus odit, sed tamen reuera non faciunt, quia non est proprie malum nisi sit voluntas quae illud operetur; non est autem voluntas nisi sit libertas, & nisi sit aliquid à tali profectum libertate. Quod certe non erat in Apostolo qui clamans, *Quis me liberabit de corpore mortis huius*: Respondit ipse sibi, *Gratia Dei per Iesum Christum Dominum nostrum*. Vnde & aptissime ad rem nostram concludit: *Igitur ego ipse mente seruo legi Dei, carne autem legi peccati*. Quasi diceret; Ego, parte illa superiore qua maxime consto, id est, intellectu & voluntate, seruo legi Dei per



eius gratiam: Ex alia autem parte quæ est inferior quæ est sensua-  
lis quæ caro dicitur quæ nobis communis est cum belluis, seruo  
legi peccati, non voluntarie, non liberè, sed sensibilibiter, sed pri-  
mis concupiscentiæ motibus quos reprimo & subijcio rationi ac  
gratiæ. *Quomodo carne, legi peccati, ait sanctus Augustinus: Num-*  
*quid concupiscentiæ consentiendo carnali? Absit; sed motus desideriorum* *l. de Contin. c. 6.*  
*illic habendo, quos habere nolebat, & tamen habebat: sed eis non consen-*  
*tiendo, mente seruiebat legi Dei: & tenebat membra ne fierent arma pec-*  
*cati.* Sic in affectuum carnalium & spiritualium pugna quam sen-  
tiebat Apostolus, indicabat ex vero mortificationis effectū, quam  
vere sui essent spirituales affectus & non carnales: vnde tu contra  
ex immortificatione tua quid aliud indicas quam spirituales affe-  
ctus si quos sentis, non tam esse tuos quam alios quibus consentis?  
Vide ne tibi palpes in quibusdam piis de virtute sensibus: Tan-  
tus est veræ virtutis sensus & affectus, quantus re ipsa est eius effe-  
ctus. Cui Veritati concordant hæ sequentes:

Quam in se attrahit Gratiam qui se Deo libens offert,  
eandem sibi detrahit, qui quod offert non reddit.

*In 1. parte, Fer. 3. Hebdom. primæ in Aduentu.*

Quod grauius in te est malum, hoc minùs vis sanari.

*In 1. parte, Fer. 5. Hebdom. 6. post Epiphan.*

Vult & non vult piger.

*In 3. parte, Dominica 7. post Pentec.*

Quod vidèris tibi, velle: velles quidem, sed verè non  
vis.

*In 3. parte, Fer. 2. Hebdom. 12.*



## FERIA TERTIA.

DE SEDATA MARIS TEMPESTATE,

IMPERIO CHRISTI.



424 Feria 3. Hebd. 9. post Oct. Pent. De sedata maris tempestate.

*Imperavit ventis & mari, & facta est tranquillitas magna. Matth. 8.*

*Exurgens comminatus est vento, & dixit mari:*

*Tace, obmutesce. Et cessavit ventus. Marci 4.*

*Increpavit ventum, & tempestatem aquae, & cessavit. Luc. 8.*

### VERITAS PRACTICA.

Vox illa, vox Christi est, dum commoveris: *Tace, obmutesce.* Nec tamen taces aut obmutescis!

RATIO sic ostendit illam esse vocem Christi, dum commoveris, ut simul etiam declaret quod quia non taces aut obmutescis sicut venti & mare tacuerunt ad imperium Christi, valde tibi propterea sit erubescendum & timendum. Erubescere Sardon, ait mare. Sic autem procedit Ratio.

Tunc valde nobis est erubescendum & timendum coram Deo quando infame aliquod probrum merito nobis objicitur.

Sed tale probrum merito tibi objicietur, quia commotus non taces aut obmutescis ad illam Christi vocem: *Tace, obmutesce,* sicut venti & mare tacuerunt.

Ergo tibi propterea valde est erubescendum & timendum: Aut potius ne sic erubescas & confundaris, Cede imperanti Christo, tace commotus & obmutesce.

### I. P V N C T V M.

Dom. 4.  
post Epiph.

**D**E hac sedata maris tempestate iam supra dictum est in prima parte; atque infra de alia simili, dicendum erit: quamobrem hic breuiter, & quantum satis fuerit ad propositam Veritatem attingendam & declarandam, propone tibi rem



rem gestam. Vide ut ascendente Domino in nauiculam & sequentibus eum discipulis, statim oboritur tantus maris æstus ut nauicula operiretur fluctibus. Ipse vero Dominus tum dormiebat. At discipuli terrefacti eum adeunt & inelamant; *Domine salua nos perimus. Et dicit illis IESVS, quid timidi estis, modica fidei? Et exurgens comminatur vento, & dicit mari, tace, obmutesce, cessantque illico, & fit magna tranquillitas. Quod admirati viri qui aderant, Qualis est hic, inquebant, quia venti & mare obediunt ei?*

Certe id mirum quod sic eius imperium insensibiles senserint Creatura! Sed magis mirum quod tibi sic Christus imperet dum ira commoueri aut aliquo simili concupiscentiæ motu agitaris, nec tamen cesses, nec taceas, nec quiescas. Aut negandum eius imperium; aut acquiescendum; aut profecto erubescendum. An negare velles tibi à Christo imperari silentium & quietem dum inordinatè commoueri, & perturbatè loqueris? Quorsum illæ Christi voces ut alia taceam: *Ego autem dico vobis, quia omnis qui irascitur fratri suo, reus erit iudicio: qui autem dixerit fratri suo, raca, reus erit concilio. Qui autem dixerit, fatue, reus erit gehennæ ignis.* Nonne tibi hæc à Christo dicta putas? Nonne idcirco dicta credis ne commouearis aut ne commotus excandesceas, ne tibi vel verbum excidat, sed omnino taceas & obmutescas? Itane vero illi obedis sicut venti & mare obediuerunt? Plane non ita, nec sine fictione diffiteri potes; nec sine confusione & rubore id fateri. Atque hoc saltem discite, *quàm sit tibi propterea erubescendum.*

Ratio est euidentis & ipso sensu satis comprobata. Quando enim infame & probrosum aliquid in faciem obicitur quod diluere & excusare non possumus, tunc aut stolidos esse oportet & insanos, aut omnem exuisse pudorem, aut profecto erubescendum. Qui quidem rubor, tametsi motus est naturalis, quo, ut ait Tertullianus, *omne vitium natura suffudit*, tamen cum Diuina gratia multum valet ad resipiscentiam: *Erubescant & conturbentur vehementer, conuertantur & erubescant valde velociter.* Qui vero nesciunt erubescere, habentur velut desperati, & ad extremum malitiæ deuenisse. *Frons mulieris meretricis facta est tibi, noluiisti erubescere. CONFUSI sunt, quia abominationem fecerunt, quin potius confusione non sunt confusi, & erubescere nescierunt; quamobrem cadent inter ruentes, in tempore visitationis suæ corruent, dicit Dominus.* Quasi diceret, si sciuisent erubescere, resipuissent & ruïnâ declinassent. Nonne

*Ier. 3.  
Ibid. 6.*



id sentis? Nonne probris laceffit humilium te dicis, & nonne humiliatus confunderis, nonne & confusus erubescis?

## II. P V N C T V M.

**S**ED si iussus à Christo non taces & obmutescis, sicut tacuerunt mare & venti: graue tibi probum & infame merito nomen objicitur.

Nam cum sint Creaturæ minus quam tu capaces præcepti, cum sint omni cognitione destitutæ, omni affectu priuatæ; cum Christum imperantem neque nosse neque audire possent, cum nullis moueri minis aut præmiis; & tamen ita dicto fuerunt obediētes, ut ad ipsam Domini vocem sese prorsus continerent; Tu contra quidquid dicat, quidquid minetur, quidquid promittat, quidquid pro suo iure imperet; tu ratione præditus, tu fide instructus, tu saluandus aut damnandus nisi obsequaris; Tu contra ire, tu contra niti & obluatari! Certe hoc probrosum, hoc infame, hoc est esse magis æstuosum & insanum quam ipsum mare! hoc est esse minus docibilem quam ipsos ventos! hoc est esse minus rationalem & sensibilem quam ipsas Creaturas irrationabiles & insensibiles. Hoc est quod Scriptura dicit de Iracundis contra Diuinum imperium se obfirmantibus: *Maledictus furor eorum quia pertinax: & Indignatio eorum quia dura.* Et rursum: *In gente incredibili exardebit ira.* Paruane tibi aut leuia videntur ista probra?

## III. P V N C T V M.

**E**RGO tibi propterea valde erubescendum quod à Christo iussus in ira silere, non fileas, cum venti & mare fileant eo iubente.

*Ezech. 36.* CONFUNDIMINI & erubescite super viis vestris, ait Dominus Deus. Siue in mari, siue in terra viam institutis, videte ut omnia & mouentur & quiescunt ad verbum meum: vos vero nec moueamini nec quiescat. *Osai 20.* Confusio Ephraim capiet: & confundetur Israel in voluntate sua. Id est, nisi ipse se confundat confundetur: sed damno suo, nam illa ipsa voluntate qua mihi reluctatur, confundetur, cum per eam confusione hominum se exponet; *Psal. 108.* Et operietur sicut diploide, confusione sua, sicut veste indutus ridicula despuetur. Sic plane Iracundi & rixantes deridentur. *Ecclesi. 27.* Ira & furor, utraque execrabilia sunt. Vide quæ de his plura in aliis partibus, & in hac etiam parte, Dominica.



*Vox illa, vox Christi est, dum commoueris: Tace, &c.* 427

Expende modò quantis nominibus magis obedire Deo tenearis  
quàm Creaturæ; Inquire quid obstet quo minus obsequaris; Liber-  
tatem aut fragilitatem ne accuses aut excuses; si enim liberum est  
tibi non obsequi, liberum est etiam cum Diuina Gratia obedire; Tua  
vna est malitia, impudentiâ & audacia quam vt coerceas, Audi  
Sapientem: *Accipiet armaturam Zelus illius, & armabit Creaturam ad* <sup>Sap. 5.</sup>  
*ultionem Inimicorum. Pugnabit cum illo orbis terrarum contra Insensa-*  
*tos.* Audi & Prophetam seu ipsummet Dominum: *Audi popule* <sup>Ier. 7.</sup>  
*stulte qui non habes cor, qui habentes oculos non videtis; & aures &*  
*non auditis. Me ergo non timebitis, ait Dominus, & à facie mea non*  
*dolebitis? Qui posui arenam terminum mari, Præceptum sempiternum*  
*quod non præteribit; & commouebuntur & non poterunt; & intumes-*  
*cent fluctus eius, & non transibunt illud: populo autem huic factum*  
*est cor incredulum & exasperans, recesserunt & abierunt. Et non dixe-*  
*runt in corde suo, metuamus Dominum Deum nostrum. Audi denique*  
*Apostolum: omnis amaritudo & ira & indignatio & clamor & blas-* <sup>Ephes. 4.</sup>  
*phemia tollatur à vobis. Aduerte vt post clamorem iungit blasphemiam,*  
*quã ex clamore facilis est aditus ad blasphemiam, non*  
*eam tantum quã iurando blasphematur, sed qua clamando multa*  
*contra Deum & proximum infanda pronuntiantur; Quod & ali-*  
*bi repetit: Nunc autem deponite & vos omnia: iram, indignationem,* <sup>Col. 3.</sup>  
*malitiam, blasphemiam, turpem sermonem de ore vestro. Hæc est ira*  
*progenies: hæc sunt genimina viperarum, suo statim in capite*  
*conterenda.*



FERIA QVARTA.  
DE LEGIONE DÆMONVM  
IMPERIO CHRISTI EIECTA,  
EX POSSESSIS  
CORPORIBVS.

*Legio mihi nomen est, quia multi sumus. Marci 5.*

Hhh ij



## VERITAS PRACTICA.

Obedientia Dæmonum, nostræ est condemnatio inobedientia.

*RATIO EST, Quia per quos patet aut evidentius innotescit alicuius hominis crimen, hic per illos dicitur condemnari. Sed per obedientiam Dæmonum evidentius innotescit crimen inobedientia nostra.*

*Ergo illorum obedientia nostræ est condemnatio inobedientia: & motuum ad eam corrigendam.*

### I. PUNCTVM.

**E**xeunti Ei de navi statim occurrit de monumentis homo in spiritu immundo qui domicilium habebat in monumentis, & neque catenis iam quisquam poterat eum ligare, quoniam saepe compedibus & catenis vinctus dirupisset catenas, & compedes comminasset, & nemo poterat eum domare, & semper die ac nocte in monumentis & in montibus erat clamans & concidens se lapidibus. Videns autem IESVM, à longe cucurrit & adoravit eum, & clamans voce magna, dixit, Quid mihi & tibi IESV, Fili Dei altissimi, adjuro te per Deum, ne me torqueas. Dicebat enim illi; Exi spiritus immunde ab homine. Et interrogabat eum; quod tibi nomen est? Et dicit ei, Legio mihi nomen est, quia multi sumus.

Hæc & plura sanctus Marcus de hoc homine; Duos vero habentes Dæmonia & simul sanatos à Domino refert sanctus Mattheus, sed ille de quo singularis est sermo, erat singulariter & præcipue diuexatus, atque in eo potissimum elucebat quid in animas efficeret Ille animarum Hostis qui sic in corpus desauiebat.

Et verò admirare attentius tantæ multitudinis Dæmonum, quanta est legio, demissam & exactam obedientiam. Statim enim atque iussi sunt exire à corporibus, illico exiire omnes; neque etiam in porcos qui illicaderant intrare ausi sunt, nisi Domino permittente; ac denique impetu quodam facto velut in signum



promptissima suae obedientiae praecipites inde in mare sese proruerunt.

Non sic superbe ! Non sic Impudice obedis Christo ! quoties enim & à quo tempore tibi iubet, *Ne post concupiscentias tuas eas*, & *Ecclesi. 18.* à voluntate tua aueriaris ? Quid tu propterea ? Quoties, inquit volui, *Matth. 23.* & nolui ? Certe haec daemonum obedientia, nostra est condemnatio Inobedientia. CONSIDERA vehementer, ut ait Propheta. Primo quidem *Ier. 2.* quid sit aliquem ab alio condemnari satis declaratur & intelligitur, quando fit talis comparatio vnius cum alio, ut ex facta comparatione, crimen vnius aut culpa magis patefiat & euidentius agnoscat. Sic Sapiens, *Condemnat Iustus mortuus viuos impios*, & *in Sap. 4.* uentus celerius consummata, longam vitam iniusti. Sic Dominus : *Viri*, *Matth. 12.* inquit, *Ninivite surgent in iudicio cum generatione ista & condemnabunt eam, quia poenitentiam egerunt in predicatione Iona.* Et ecce plusquam Ionas hic. *Regina Austri surget in iudicio cum generatione ista & condemnabit eam, quia venit à finibus terrae audire sapientiam Salomonis.* Et ecce plusquam Salomon hic. Ac rursus ibidem : *filij vestri iudices vestri erunt.* Ah quàm multi subditi & inferiores sic futuri sunt Superiorum Iudices !

## II. P V N C T V M.

**S**ED per obedientiam Daemonum, euidentius innotescit crimen inobedientia nostra.

Quo enim minus in illo suo statu quàm nos in nostro possunt obedire, certe eò nostra inobedientia apparet grauior. Tria sunt autem quae id indicant ; Primo sunt hostes Christi infensissimi, & Christus illis aduersarius odiosissimus ; at certe durius est hostem suo velle obedire aduersario quàm amicum amico vel Domino gratioso. *Quid nobis & tibi IESU Nazarene, venisti perdere nos !* *Marci 12.* Deinde sunt obfirmatissimi in sua prauitate, & tamen cedunt Imperanti Christo ; Id profecto arguit in homine non ita deprauato maiorem quandam peruiaciam. *Sicut frigidam fecit cisterna aquam* *Ier. 6.* *suam, sic frigidam fecit malitiam suam.* Non est aqua frigida ex cisterna sicut ex fonte, qui est natiuus aquae locus : sic neque malitia in homine sicut in Damone.

Denique Daemon nihil ex illa sua obedientia reportat meritum, nihilque praemij ; homines vero propositam habent aeternam Bea-



Apoc. 12.

titudinem coelestesque illas sedes vnde expulsi sunt Dæmones; Neque locus inuentus est eorum amplius in cælo. Quis inde non videat quale vtriusque status discrimen ad obediendum; & quàm proindè euidentius innotescat nostra Inobedientia per illorum obedientiam? Adde auxilia, Gratias, collustrationes, motus & infinita propemodum adjuuenta quibus ad obediendum excitamur: & quibus omnino destituti sunt Dæmones. Vnde præclare sanctus Anselmus dixisse dicitur: *Diabolus persistit in malitia Deo reprobante, ego vero Deo renocante; Ille obduratur ad punientem, ego ad blandientem; etsi uterque contra Deum, ille contra non requirentem se, ego contra morientem pro me. Ecce cuius Imaginem horrebam, aspicio in me horribiliorem.*

## III. PUNCTVM.

Deut. 32.

**Q**UAM ergo reddunt obedientiam Christo Dæmones, illa est nostra condemnatio Inobedientiae; cum tanto grauior appareat nostra Inobedientia ex comparatione Dæmonum obedientiae, quantò plura nos mouere deberent ad obediendum quàm illos. *Inimici nostri sunt Iudices*: aut certe grauissimi accusatores, & testes acerrimi. Sic in Apocalypsi, Dæmon dicitur *Accusator fratrum nostrorum*, accusans illos ante conspectum Dei nostri die ac nocte. Sic sanctus Augustinus fusissimè inducit illum accusantem & prouocantem Iudicem ad condemnationem nostram. *Aquisimè inquiet, Index iudica, Iudica meum esse qui tuus esse noluit; meus est, mecum damnandus est; Post renuntiationem ut quid inuasit pannos meos? Quid apud eum Impudicitia faciebat cui ipse renuntiauerat? Quid intemperactia? Quid auaritia? Quid ira? Quid cætera mea? Postremo aquisimè, fugientem à me, confugientem ad te postea cum meis quibus renuntiauerat apprehendi, inuasorem detinui; In ipsa quodammodo mea possessione à me apprehensus est; Quid in theatro faciebat renuntiator turpium voluptatum? Meus esse voluit, & mea concupiuit. Iudica aquisimè, quoniam quem tu non dedignatus es tanto pretio liberare, ipse mihi se postmodum voluit obligare. Poteritne os aperire is qui talis inuenitur, ut in iste Diabolo addicatur? Videte quid agatis: Et quæ plura pergit.*

Ad Care-  
chum. Tom.  
6.

Exod. 24.

Vnde tandem illud concludendum ad seriam emendationem: *Omnia quæ locutus est Dominus faciemus, & erimus obediētes. Vide ut omnia, cum sit idem Dominus qui omnia iubeat, sicque nisi om-*



*Obedientia Daemonum, nostra est condemnatio inobedientiae.* 431

nibus iussis obedias, nec forte vni obedies. Non erit obedientia Christiana sed politica; Nam cum Christiana obediat Christo Domino quia Dominus est, æque obedit in vno atque in alio, quia æque in vno est Dominus atque in alio. Aut si quis non æque in vno obedit ac alio, non obedit ei quia est Dominus, sed quia sic sibi placet aut certe quia non displicet. *Quia verba mea non audierunt, & legem meam projecerunt. Vt quid mihi thus de saba affertis, & calamum suauis-olentem de terra longinqua? Holocausta vestra non sunt accepta, & victimæ vestrae non placuerunt mihi.* Quasi diceret, quia ex omnibus verbis meis, & ex omni lege mea, vos ea tantum facitis quæ vobis placent & non alia, neque illa quæ facitis mihi placent. Hoc certe est sapius expendendum.

Vide in 1. parte, Die 4. Ian. & in Die Purificationis B. Virginis. In 2. parte, Feria 4. Hebdom. 4. post Octau. Paschæ.



## FERIA QUINTA.

### DE SANATA MULIERE HEMORRHOÏSSA.

*Et mulier quæ erat in profluvio sanguinis, annis duodecim, & fuerat multa perpeffa à compluribus Medicis, & erogauerat omnia sua, nec quidquam profecerat, sed magis deterius habebat.* Marci 5.

#### VERITAS PRACTICA.

Iniquè multum agunt, qui tam multa agunt sanando corpori: tam pauca, seruandæ animæ.

*RATIO EST, Quia inique multum agunt qui ius æquum sècò æquitatem iuris, in debitis persoluendis obseruandam, multum peruertunt.*



432 FERIA 5. Hebd. 9. post Oct. Pent. De sanata muliere, &c.

*Sed qui tam multa agunt sanando corpori, tam pauca seruanda animæ, ius æquum seu æquitatem iuris in debitis persoluendis obseruandam multum peruertunt.*

*Ergo iniquè multum agunt: & corrigenda talis iniquitas.*

## I. P V N C T V M.

Matth. 8.  
Marci. 5.  
Luc. 8.

**H**ISTORIA huius sanatæ Mulieris fusissimè describitur à tribus Euangelistis, plurimamque præbet meditandi materiam ex variis quibus insignitur circumstantiis. Tu si vacat, reuolue aliquas; Tùm quia eò nos ducit finis & scopus Hebdomadæ, in his diutius hære quæ referuntur de cura & sollicitudine quam habuit mulier pro recuperanda valetudine. Vide vt complures consulit medicos, nullis parcit impensis, nullis laboribus, imo sua omnia erogat, & adeo non conualescit propterea quin deterius in dies habeat. Contemplare vt auditis miraculis quæ de Christo Domino euulgabantur, inquirat apud se tacita modum quo illum adeat; Cùm enim lege prohiberetur propter lethalem morbum sese immiscere turbæ, quid faciat? Audebitne se prode-  
re? Nonne inde probrosè expelletur, & tamquam legis rea punietur? Sic ergo apud se statuit non palam apparere, nec aperta voce sanitatem postulare, sicut alij infirmi precabantur; sed clancularium & occultum quemdam accessum meditatur quæ à nullo deprehendi possit; *Accesit*, inquit Euangelista, *retro, & tetigit fimbriam vestimenti eius: dicebat enim intra se, si tetigero tantum fimbriam vestimenti eius, salua ero.* Et reuera sic accidit, nam *confestim siccatus est fons sanguinis eius, & sensit corpore quia sanata esset à plaga.* O quam mirus est artifex amor nostri! quàm ingeniosa est cura sanandi corporis! Et quidem non est propterea inculanda hæc Mulier quam ipse Dominus notam fecit omnibus & laudauit; neque alioquin arguenda est moderata cura valetudinis & bene ordinatus corporis amor; sed cùm tam multa fiant & tolerantur ab hominibus pro sanando corpore, tam pauca vero pro anima quæ longe grauioribus iacet in morbis & negligitur; merito id iniquum censeretur debet & pluribus deplorari, vt remedium aliquod afferatur. Sic ergo est, *Inique multum agunt qui tam multa agunt sanando corpori: tam pauca seruanda animæ.*

Ratio



Ratio tam æqua est & euidens quàm ipsa æquitas quæ seruari debet in debitis persoluendis. Sicut enim Ius quoddam æquum est quo & debita tenèris persolvere, & cui plura debeas, plura restituas, quantum possis: ita plane iniquum est si debita non solvantur, cum solui possint: & tanto magis apparet iniquitas, quanto magis peruertitur illius iuris æquitas. Tanto magis autem peruertitur, quanto magis possis omnibus omnia reddere; & tamen malis minus egenti & cui minus debes, sua omnia & cumulata reddere, quàm magis egenti & cui plura iure æquiori debes sua restituere, defraudesque Creditorem bona suorum parte.

Aperta est Protopolipsia seu acceptio personarum, quæ Divino & humano iure prohibetur. *Nulla erit distantia personarum*, ait Dominus. *Si personas accipitis*, inquit sanctus Iacobus, *peccatum operamini, redarguiti à lege.* Denique nihil commendatius quàm ne quid inique fiat, *Nolite iniquum aliquid facere in iudicio, in regula, in pondere, in mensura. Statura iusta, & æqua sint pondera.* Rem metire ex teipso, nonne velles ius tuum tibi seruari? Nonne velles tantum tibi reddi quantum debetur? Nonne de iniquitate debitoris expostulares, si cum posset persolvere, non solueret? Nonne iudicaretur posse, si quod tibi debet & negat, redderet alteri cui non debet? *Quid à vobis ipsis non indicatis quod iustum est?* dicebat Dominus.

*Deut. 10.*

*Iacobi 2.*

*Leuit. 19.*

*Luc. 12.*

## II. PUNCTVM.

**S**ED qui tam multa agunt sanando corpori, tam pauca seruanda animæ, Ius illud æquum seu æquitatem iuris in persoluendis debitis multum peruertunt, & cui minus debent, plura reddunt: cui plura debent minus restitunt.

Sunt enim Corpus & Anima duo veluti Creditores quibus quod suum est, omni ex iure debemus. Corpori autem longe minus debemus quàm animæ, nam si de animæ salute ageretur, si de periculo, si de damno aliquo, si vel vno veniali peccato lædenda esset Anima, Corpus ipsum prius esset exponendum flammis quàm lædenda animæ consensus dandus. *Quam enim dabit homo commutationem pro Anima sua?* Et vero etiam minus est egens corpus quàm anima. Nam primo paucis contentum est corpus: *Habentes alimenta, & quibus tegamur, his contenti sumus:* At verò animæ tam

*Matth. 16.*

*1. Tim. 6.*



multa sunt necessaria quàm multa sunt debellanda desideria, quæ militant aduersus illam.

Matth. 6.  
2. Pet. 1.  
Deut. 4.

Deinde, Superiores ac Diuina ipsa prouidentia in se quodammodo susceperunt curam corporis rei que necessariæ ad vitam sustentandam, vetatque Christus ne de illa solliciti simus: è contra quæ sunt animæ, curam omnem subinferamus oportet, nulla vt illi defint. Custodite sollicitè animas vestras.

Matth. 6.

Denique quando aliquid, quando vel ipsa vita deesset corpori, dum sua non desit animæ, quid tandem inde grauius, cum sit tandem moriturum corpus, atque ex statu animæ resurrectorum, siue in vitam siue in mortem sempiternam? Animæ autem status tanti nostra refert, quanta quanta est ipsa coelestis & æterna Beatitudo! Nonne itaque anima plus est quàm esca? Ac proinde si plus de esca & de corpore solliciti simus quam de anima, nonne peruerimus omnem iuris æquitatem? Nonne plus redditur cui minus debetur? Nonne minus ei redditur cui plus & iure potiori debetur? Esto reddas quod debes corpori, esto id illi debeas quod ei soluis; at cur animæ non idem pendis? Est sapiens, anima suæ sapiens, inquit Ecclesiasticus, quasi diceret, hæc est nota veri & iusti sapientis, si quod sapit, conferat animæ suæ; nam quidquid aliud sapit, non recte sapit. Vnde & Idem appositè: Fili in mansuetudine serua animam tuam, & da illi honorem secundum meritum suum. Peccantem in animam suam quis iustificabit? Et quis honorificabit exhonorantem animam suam?

Ecclesi. 37.

Ibid. 10.

### III. P V N C T V M.

Ps. 81.

**I**N I Q V E igitur multum agunt qui tam multa sanando corpori agunt, tam pauca seruandæ animæ; Quia quantum agunt contra æquitatem iuris in persoluendis debitis obseruandi, tam inique agunt: multum autem agunt contra illam iuris æquitatem quæ sic præscribit suum unicuique reddendum vt cui plura debes, plura reddas. Illi autem Iure hoc violato, cui minus debent plura reddant, & minus reddant cui plus debent. Vsq; quo iudicatis iniquitatem & facies peccatorum sumitis? Nempe sicut in acceptione personarum Ius falsæque peruertitur, quod peccatores preferantur Innocentibus, quia illi externa facie plus feriunt oculos, & mouent animos: ita dum corpus præfertur animæ, secundum faciem iudicatur, &



*Iniquè multum agunt qui tam multa agunt sanando, &c. 433*

secundum eam faciem quæ peccatorum est, quatenus hinc omne peccatum oritur, quod corpus plusquam anima, & terrena plusquam spiritualia foueantur. Hoc est videlicet Iniquum de quo Sapiens: *Discede ab Iniquo, & deficient mala abs te*, Id est, caue hanc iniquitatem qua corpus præ anima colitur, & cauebis omnia mala. Ecclesi. 7.

Hæc est etiam Iustitia de qua Idem Sapiens, *Pro Iustitia agonizare pro anima tua, & usque ad mortem, certa pro iustitia*: Quasi diceret, etiamsi pereat corpus, seruanda est animæ quæ debetur iustitia, & licet in ea seruanda sit labor & certamen, non est detrectandum tale certamen pro tali causa. *Denique debitores sumus non carni, ut secundum carnem viuamus. Obsecro itaque vos fratres per misericordiam Dei, ut exhibeatis corpora vestra hostiam viuentem sanctam, Deo placentem, rationabile obsequium vestrum. PRIMAS apud nos curas quæ prima habentur, obtineant, inquit sanctus Eucherius, summasque sibi sollicitudinis partes, quæ summa est vindicet: hæc nos occupet in presidium sui, iam non plane prima, sed sola omnia vincat, eo studio quo præcedit omnia.* Rom. 2.  
1b. 12.  
Ep. Pav.  
ad Valer.

Vide in 4. parte, Dominica 18. & 23. Videri etiam posset discursus vicesimus octauus tertiæ partis de ordine vitæ & morum, Vbi expresse agitur de Iustitia, si qua est, ad seipsum.



## FERIA SEXTA.

### DE FILIA PRINCIPIS IAIRI RESSUSCITATA.

*Puella surge; & reuersus est spiritus eius, & surrexit continuo. Lucæ 8.*

### VERITAS PRACTICA.

Quam Christo debet anima subiectionem, debet ita in corpore reddere, ac extra corpus.



436 Feria 6. Hebd. 9. post Oct. Pent. De filia principis Iairi, &c.

**RATIO EST**, Quia quod æque debet omnia Christo, debet hoc æque Christo reddere, quocumque in statu sit.

Sed æque debet Christo subjectionem, dum hic vivit in corpore ac dum est extra corpus.

Ergo hanc ita debet in corpore, ac extra corpus, subjectionem Christo reddere. Quod certe est valde rarum.

## I. P V N C T V M.

Matth. 9.  
Marci 5.

Luc. 8.

**A**NTE QVAM sanaret Dominus Mulierem illam de qua in præcedenti Meditatione actum est, venerat quidam princeps Synagogæ, Iairus nomine, ipsum rogaturus pro filia duodenni quæ in extremis erat; Cùmque annuisset Dominus atque in ipso itinere hæmorrhoißam curasset; Ecce è domesticis Iairi quidam accurrens dicit ei, *Quia mortua est filia tua, noli vexare illum.* IESVS autem audito hoc verbo, respondit patri puella, *noli timere, crede tantum & salva erit.* Et cum venisset domum, non permisit intrare secum quemquam, nisi Petrum & Iacobum & Ioannem, & Patrem & Matrem puella. Flebant autem omnes & plangebant illam; At ille dixit, *nolite flere, non est mortua puella, sed dormit.* Et deridebam eum scientes quod mortua esset. Ipse autem tenens manum eius, clamavit dicens *Puella surge.* Et reuersus est spiritus eius & surrexit continuo.

Hæc sanctus Lucas, quæ singula possent fructuose considerari, sed postrema præcipue verba, quæ promptissimam animæ in suum corpus reuocatæ obedientiam exhibent. Hoc enim mirum & consideratione dignissimum quod cum animæ separata à corporibus quocumque in loco & statu à Christo Iudice omnium, constituantur, sic obsequentes sunt, vt nonnisi eius nutu moueantur: & tamen illæ ipsæ animæ dum conjunctæ sunt suis corporibus, ita ipsi Christo repugnantes sunt vt vix illi obsequantur. Quot enim sunt vitia aut peccata cuiuslibet hominis, tot sunt repugnantis Christo animæ motus. Quod cum sit valde inordinatum, contra statuitur hac vtilissima & maxime Practica Veritate, *Quod quam Christo debet anima subjectionem, debet ita in corpore reddere ac extra corpus.*

Ratio est tam facilis & euidentis vt vix aliis notioribus terminis declarari possit. Quid enim notius & manifestius quàm si plura di-



uersi generis cuiuspiam ex æquo debeas, sic etiam ex æquo tenearis omnia reddere quantum in tua situm erit potestate? Cur enim vnum reddas & non aliud, cum istud aliud perinde debeas ac illud vnum? Si tota ratio est cur illud reddas quia debes: Cur non aliud similiter reddas, cum hæc eadem insit ratio, quia debes? *Reddite omnibus debita*, inquit Apostolus, *Cui tributum, tributum: cui vecti-* Rom. 13.  
*gal, vectigal: cui timorem, timorem: cui honorem, honorem.* Nec dicas te tam multa Christo debere vt his omnibus exoluendis par numquam futurus sis; Nam quæ potes saltem debes exoluere, & nihil à te exigitur quod non possis cum Gratia. *Vnicuique sicut Dominus de-* 1. Cor. 3.  
*dit.*

## II. P V N C T V M.

**S**ED aque anima debet Christo subjectionem & obedientiam dum hic viuit in corpore, ac dum est extra corpus.

Cur enim debet extra corpus nisi quia Dominus est, nisi quia Redemptor est, nisi quia Iudex est, aut quidquid tandem dicas quo anima exuta corpore obligetur se Christo subicere, nonne hoc totum dici potest & debet quando est induta suum mortale corpus? Nonne tum æquè Christus est eius Dominus, eius Redemptor, eiusque Iudex? Nonne idcirco expresse dictum ab Apostolo, *Quod nemo nostrum sibi viuit, & nemo sibi moritur: siue enim* Rom. 14.  
*viuimus, Domino viuimus: siue morimur, Domino morimur: Vnde & concludit, Siue ergo viuimus, siue morimur, Domini sumus.* Quasi aperte diceret, sicut perinde Domini sumus siue viuimus, siue morimur; sic perinde debemus illi tanquam Domino nostram subjectionem & obedientiam, dum viuimus, atque dum mortui sumus. Quod & confirmat sic consequenter pergens: *In hoc enim Christus mortuus est & resurrexit, vt & mortuorum & viuorum domine-*  
*tur.* Id est, hoc ex æquo promeruit Christus vt omnium pariter dominetur siue illi sint viuentes, siue mortui: nec minus illi debent qui viuunt quam qui mortui sunt. Sic & sanctus Ioannes, *Omnes,* Apoc. 5.  
*inquit, creaturam que in cælo est, & super terram, & sub terra, & que sunt in mari, & que in eo omnes audiui dicentes: Sedit in throno, & Agno, benedictio & honor & gloria, & potestas in sæcula sæculorum.* Nempe agnoscunt omnes tam viuentes quam mortui se debere honorem & obsequium Deo ac Domino suo Christo. Audere ne tu id negare debitum?



## III. P V N C T V M.

**Q**UAM igitur Christo debet anima subjectionem, debet ita in corpore reddere, atque extra corpus: Nam debet æque reddere quod æque debet: æquè autem hanc subjectionem debet dum est in corpore: Cur non illam igitur æque reddat? *Nonne Deo subjecta erit anima mea, nam & ipse Deus, salutaris meus, susceptor meus. V S- QVE QVO non vis subijci mihi?* An quia dum est in corpore anima, libertatem habet resistendi Christo, quam non habet dum est extra corpus? Itane vero libera est anima ut libertate abutatur? Numquamne se Christo nisi coacta, aut ex necessitate subijciet? Numquamne libere, numquamne volens lubensque Christo se suo totam tradet? Quandonam verò sic libere lubenterque se dabit nisi dum vivit in corpore, nisi dum sua potitur libertate? Tantum ergo abest ut quia modo libera est anima, modo non se debet subijcere, quin potius quia modo libera est, modo id debet, ut quod est in subiectione pretiosius, nempe libertas, non subtrahatur, fiatque subiectio libera, voluntaria, lata & accepta, *Non ex tristitia aut ex necessitate: hilarem enim datorem diligit Deus.*

Alioquin certe expauendum illud Christi decretum: *Verumtamen inimicos meos illos qui noluerunt me regnare super se, adducite huc, & interficite ante me.* De solis viventibus loquitur, nam nullus mortuorum illi repugnat. Sic autem propterea de viventibus loquitur quia noluerunt, quia libertate abusi sunt, quia cum possent obedire vel resistere, maluerunt resistere quam obedire. Quòd autem de his loquitur, tremendum plane est, nempe ut in sua rebellionem moriantur, non resipiscant, non conuertantur, sed sicut in Christo non vixerunt, ita nec in illo moriantur. O deplorandum vitæ & mortis statum! *Verumtamen Deo subjecta esto anima mea, quoniam ab ipso patientia mea.* Si quid propterea patiendum est ut te illi subijcias, dabit tibi quod possis.

Vide in 2. parte, FERIA 3. Hebdom. Quinquagesima. In 4. parte, Sabbato Hebdom. 15.





## SABBATO.

DE DVOBVS COECIS A CHRISTO  
DOMINO ILLVMINATIS.

*Secuti sunt Eum duo cæci clamantes. Matth. 9.*

### VERITAS PRACTICA.

*Quæ magis est oculata Concupiscentia, magis est  
cæca.*

*RATIO EST, Quia quæ magis est oculata Concupiscentia,  
magis seu melius videt & sequitur quæ sunt corrupti mundi  
& deprauata natura.*

*Sed talis Concupiscentia magis est cæca, ut quæ minus videat quæ  
sunt Gratiæ & Rationis.*

*Ergo quæ magis est oculata Concupiscentia, magis est cæca : proin-  
deque illi est magis prospiciendum.*

### I. P V N C T V M.

**T**RANSEVNT E inde IESV sequuti sunt Eum duo cæci cla-  
mantes & dicentes, miserere nostri, fili David. Cum autem ve-  
nisset domum, accesserunt ad eum cæci. Et dicit eis IESVS, credi-  
tis quia hoc possum facere vobis? Dicunt ei, utique Domine. Tunc tetigit  
oculos eorum, dicens, secundum fidem vestram fiat vobis. Et aperti sunt  
oculi eorum : & comminatus est illis IESVS, dicens, videte ne quis sciat.  
Illi autem exeuntes diffamauerunt Eum in tota terra illa. Id est diuul-  
gauerunt, quia non erat præceptum, sed mysterium, ut aiunt In-  
terpretes, nempe ad exemplum humilitatis, quantum in nobis

*vide Epist.*



est, optemus potius nostra præclare facta esse secreta quàm euulgata. Quod si aliquando Christus permisit aut etiam suavit ut quæ fecerat enarrarentur, hanc adhibebat cautionem, ut Deo referretur Gloria. Redi in domum tuam, inquit, & narra quanta tibi fecit Deus.

Quæ & alia huius Miraculi propria postquam tantisper ad fructum expenderis, contemplare attentius ad fructuosissimam praxim, quàm sit oculata simul & cæca concupiscentia; quamque eo magis sit cæca quàm oculata.

Ratio ex illis est quas semini similes ait Seneca, Quod quamvis sit exiguum, cum occuparit idoneum locum, vires suas explicat, & ex minimo in maximos actus diffunditur. Idem facit Ratio, non latè patet si aspicias, in opere crescit: pauca sunt quæ dicuntur, sed si illa animus bene exceperit, conualescunt & exurgunt. Eadem est inquam præceptorum condicio quæ seminum, multum efficiunt: etsi angusta sunt tantum, ut dixi, idonea mens rapiat illa & in se trahat, multa inuicem & ipsa generabit, & plus reddet quàm acceperit.

Hoc ipsum sanctus Bernardus aliter exprimens, Fortis, inquit, mulier Sapientia misit manum ad colum, & digiti eius apprehenderunt fufum. Nouit enim modicam lanam vel linum in longum producere filum, atque in tela extendere latitudinem.

Sic Ratio Veritatis proposita paucis multa complectitur quæ cuique facile est in longiora protrahere. Primò quidem quid vulgariùs & quid fufius ad omne dicendi genus, quam quod prima Propositione præmittitur, eam esse magis oculatam concupiscentiam quæ melius videt quæ sunt deprauata in mundo & in carne? Hi sunt scilicet Sapientes huius sæculi, Sapientes ut faciant mala. Quorum Sapientia non est desursum descendens, sed terrena, animalis, Diabolica; In quibus sancti Iacobi verbis triplex illa concupiscentia quæ à sancto Ioanne describitur, potest intelligi, Concupiscentia oculorum eadem scilicet est quæ terrena & occulatos in terrenis bonis comparandis suos facit. Oculos suos statuerunt declinare in terram. CONCVPISCENTIA Carnis, Ipsa est quæ animalis dicitur & in exquisitis deliciis procurandis acute perspicit: & oculos habet per res varias fornicantes. SUPERBIA denique vite, Diabolica est Sapientia qua ipse Diabolus excelluit in suam perniciem, & qua primos nostros parentes ut deciperet, Aperientur, inquit, oculi vestri, & eritis sicut Dij, scientes bonum & malum. Hi sunt

Luc. 8.

Ep. 38.

Serm. 15. in  
Cant. ex 31.  
Prou.

Ier. 4.

Iac. 3.

1. Ioan. 2.

Ps. 16.

Num. 15.

Gen. 3.



*Quæ magis est oculata Concupiscentia, magis est cæca.* 441

sunt elati & sublimes oculi vt despiciant quidquid infra se vident, & æmulentur atque ambiant quid supra se conspiciunt eminentius.

O quam præclare Sapiens: Domine Pater, & Deus vita mea, ne *Ecclesi. 23.*  
derelinquas me in cogitatu illorum. Extollentiam oculorum meorum ne de-  
deris mihi, & omne desiderium auerte à me. Aufer à me ventris concu-  
piscencias, & concubitus concupiscentiæ ne apprehendant me, & anima  
irreuerenti & infunita ne tradas me.

## II. P V N C T V M.

**S**ED talis concupiscentia magis est cæca vt quæ minus videt quæ sunt  
Gratiæ & rationis. Dubitari non potest quod si minus hæc videt  
quæ sunt magis videnda, quin sit magis cæca. Nam quis cæcus nisi *Is. 42.*  
seruus meus, ait Dominus, Id est, nisi qui profitetur se mihi serui-  
re, & non vult videre quæ sunt mei seruitij, dum per concupis-  
centiam suam prauam, nimis acutè videt quæ sunt mundana &  
sensualia. Quod autem ij qui perspicaces sunt & in mundanis ocu-  
lati negotiis, minus videant quæ sunt diuina & spiritualia, sic  
aperte Scriptura vtriusque Testamenti, *Videntes, inquit, videbi-* *Is. 6.*  
*tis, & non videbitis.* Id est, quo tempore terrena magis videtis, *Matth. 23.*  
minus Cœlestia videbitis. Quid breuius simul & clarius?

## III. P V N C T V M.

**Q**UAE est ergo magis oculata concupiscentia, magis est cæca. Quia  
illis ipsiis rebus mundanis quibus exercitatos habet oculos  
excoecatur velut offusa quadam caligine quæ vel naturaliter vel  
supernaturaliter vel etiam artificialiter obuenire potest. Primò  
quidem naturaliter, quatenus animalis homo non percipit ea quæ sunt *1. Cor. 2.*  
spiritus Dei, stultitia enim est illi, & non potest intelligere quia spiritua-  
liter examinatur, Quasi diceret Apostolus, cum ratio & regula di-  
gnoscenti res spirituales sit ab illa longe diuersa qua res mundanæ  
& sensuales tractantur, hinc fit naturaliter vt qui in his mundi &  
sensuum rebus peritiores sunt, sint imperitiores in spiritualibus:  
non modo quia in istis non sunt exercitati, sed quia in aliis opposi-  
tis sunt valde versati, à quibus desumunt principia iudicandi de re-  
bus etiam opposita. *Palpauimus sicut cæci parietem, & absque oculis* *Is. 59.*



442 Sabbato Hebd. 9. post Oct. Pent. De duobus Cæcis illuminatis.

*attrectantes impegimus in meridie quasi in tenebris, in caliginosis quasi mortui. Sic illi apud Prophetam.*

Deus. 28.

Secundò id contingit supernaturaliter, recedente scilicet diuino lumine quo qui priuantur quid nisi cæci & caliginosi sunt? *Percutiet te Dominus amentia & cæcitate à furore mentis ut palpes in meridie sicut palpare solet cæcus in tenebris, & non dirigas vias tuas.*

2. Cor. 4.

Tertiò denique fraude & artificio Dæmonis qui quos magis possidet magis excœcat, ne videant miserandum suum statum & emergant. *In quibus, inquit Apostolus, Deus huius sæculi excœcauit mentes infidelium, ut non fulgeat illuminatio Euangelij gloriæ Domini qui est Imago Dei.* Idcirco enim dicitur Dæmon Deus huius sæculi, quod sic amatores sæculi possideat ut ab eis colatur velut Deus, sicque illos dementet & excœcet ne videant aut intelligant quem colunt

Ephes. 4.

*Deum. Tenebris obscuratum habentes intellectum, alienati à vita Dei, per ignorantiam quæ est in illis, propter cæcitatem cordis ipsorum.* Quasi diceret, cum ad videndum, opus sit lumine & facultate videndi, neutrum illi habent, nam & versantur in tenebris, & cæci sunt.

Exod. 3.

Potestne miserius aliquid fingi? Et tamen quàm multi ambiunt & sectantur illam oculatam concupiscentiam qua mundo apparent Sapientiores? *Et nesciunt quam sint cæci & nudi & miseri & miserabiles. Collyrio inunge oculos tuos ut videas.* Vide passim Verbo, *Concupiscentia.*







# DOMINICA

## DECIMA POST PENTECOSTEN.

DE PHARIZÆO ET  
PUBLICANO.

*Duo homines ascenderunt in templum ut orarent,  
unus Pharizæus, & alter Publicanus.*

VERITAS PRACTICA.

Omnes insipientes & infelices supra modum, Superbi.  
*Sapient. 15.*

IN TEXTV Libri Sapientiæ sic legitur, *omnes enim insipientes & infelices supra modum animæ superbi*, Id est, supra quam naturaliter fieri soleat; Seu clarius ex Lectione Complutensi, ubi habetur *animæ suæ*, sic tota potest reddi sententia: omnes superbi magis sunt suo vitio insipientes & infelices quam si naturali defectu tales essent; Et hoc pronuntiatur literaliter sensu de inimicis populi Dei; accommodatio autem & morali, de superbis omnibus, & ijs præsertim qui sua ventitantes ut Pharizæus, inde laudem venantur. Vox verò *animæ* quia paulò erat obscurior, omitti potuit in exprimenda Veritate Practica, sine vlla vllius Scripturæ sensus injuria. Cur porro tales superbi dicantur & reuera sint supra modum insipientes & infelices:




RATIO EST, Quod qui sua meliora & solidiora bona commutant in leuissima & nullius pretij, sunt insipientes & infelices supra modum & supra morem communem.

Sed tales superbi sua meliora & solidiora bona commutant in leuissima, & nullius pretij.

Ergo sunt supra modum insipientes & infelices. Quod certe attentius cogitanti potest esse opportunum ad cauendam superbiam.

## I. P V N C T V M.

 VÆ in Euangelio hodierno exhibetur Parabola de superbo Pharizæo & humili Publicano, notior est quàm vt hic fufius enarretur. Et quia finis & fcopus Parabolæ videtur eò fpectare vt demonftraret quàm fint ftulti & miferi qui fe alijs præferunt, & qui fe fuâ superbâ denudant bonis fuis: idcirco vifa eft Sapientis fententia opportunè congiungi poffe ad Chrifti Domini Verba & mentem: atque inde hæc proponi Veritas quæ modo attente confideretur: *Quod omnes insipientes & infelices sunt supra modum superbi.* Emphafim quandam habet illud *supra modum*: Et duo illa fimul iuncta *insipientes & infelices* tam apta funt ad superbiam quæ ex benefactis oritur retundendam, quàm apte conueniunt illis superbis qui fe fuæque iactitant. Quàm verò aptè conueniant, hæc fuadet Ratio. Quid enim infipientius & infoelicius quàm fi multo labore bona tibi quadam compararis, tu vel illa nullo delectu prodigas, vel in leuiore quafdam & nullius pretij reculas vltro commutes, & transferas? Vix talis infipientia reperitur inter homines, nimis funt tenaces fuorum bonorum: & quo bona funt solidiora & veriora, naturalis eorum amor ita mentem humanam occupat, vt vix ab eorum affectu & poffeffione diuellatur. Vnde rectè fuprà modum ordinarium & fuprà communem agendi morem illi dicendi erunt infipientes qui fe fuis ita denudarunt bonis, vt tanto infoeliciores inde euadant & miferiores, quanto erant foelices & beati fi fua conferuaffent.

Ecclef. 33.

Audite me magnates, inquit Sapiens, & omnes populi, & Rectores Ecclefie, auribus percipite: Filio & mulieri, fratri & amico non des po-



reſtatem ſuper te in vita tua: & non dederis alij poſſeſſionem tuam, ne forte pœniteat te, & deprecetur pro illis. Dum adhuc ſuperes & aſpiras, non immutabit te omnis caro. Melius eſt enim ut filij tui te rogent quam te reſpicere in manus filiorum tuorum. In die conſummationis dierum vite tue, & in tempore exitus tui diſtribue hereditatem tuam. Quasi diceret, ſi ſapis ne te umquam bonis tuis exuas quamdiu his eges: aut ſi te his exuiſ, experieris tuo damno quam inſipienter egeris.

Mirum certe quod ſic ſacer Author de bonis perituris ſatagat, Numquid de bobus cura eſt Deo? Numquid de bonis illis caducis cura eſt illi? Oportet certe hic eſſe aliquid myſticum, & ſicut quando de bobus lex facta eſt, non tam boues ſpectabat quam operarios Euangelicos, ut ipſe Apoſtolus interpretatur, ſic quando de bonis illiſ temporalibus non dimittendis tâta in Scripturis habetur cautio, multo magis de ſpiritualibus intelligenda eſt. Adhuc & vos ſcne intellectu eſtis? SPIRITUALIS indicat omnia: & ipſe à nemine indicatur. Id eſt, longe melius poteſt iudicare de temporalibus, quam poſſit animalis iudicare de ſpiritualibus.

1. Cor. 9.

Deut. 25.

Matth. 15.

1. Cor. 2.

## II. P V N C T V M.

**S**ED tales ſuperbi ſuis ſe ultro bonis exuunt, aut quidquid habent melius, commutant in res leuiſſimas & nullius pretij.

Dum enim bonis ſuis operibus ſuperbiunt & inflantur, nonne tùm eorum ſe fructu priuant? Nonne tùm recipiunt mercedem ſuam ſicut dicebat Dominus, nonne tùm potius ſe pœna dignos exhibent quam ullo præmio? Quid ſolidius, quam quod ſibi in omnem æternitatem bonum comparauerant? Quid melius eo bono quàm quo boni effimur? Quid contra leuius eſt quam inanis iactantia aut popularis ille rumuſculus quem ſuperbi conſectantur & cui promerendo ſua benefacta omnia profundunt & tranſmutant? Ambulauerunt poſt vanitatem & vani facti ſunt.

1er. 2.

Sancti omnes Patres hoc vel vno maxime ſuperbiam ſeu vanitatem exagitant quod nos noſtris bonis exſpoliet. Sic præclare ſanctus Cyprianus: Ieiunij vel virtutum ſudoribus laus importuna ſe ingerit, & ſubtiliſſimis aculeis penetrans animam dum extollit, emollit, & pungit dum vngit; Virtutem in hypocriſim vertit, & ſimpliciter inchoata peruertit; quaſi tinea quod integrum erat rodit & occupat, & ſanctitatis fundamenta euellit & diſſepat. Mens hoc veneno imbuta in mi-

l. de Cardin.

Ch. oper.



seriis deliciatur, & occupata hæc scabie, in ulceribus gloriatur. Religio fit superstitio, & succedit ei ambitio subornata; extincto spiritu, quatruiduano cadaueri solum supersunt exuuia, Virtutis species exanimis, & simulachrum sanctitatis.

In Conf.

Mon. c. 11.

Sic sanctus Basilius: Fugiamus inanem gloriam, dulcem spirituum operum spoliatricem, iucundum animarum nostrarum hostem, teneam virtutum, blandissimam bonorum nostrorum depradatricem, eandemque mellis illitu, fraudis sui veneni coloratricem, & mortiferi hominum mentibus poculi porrectricem. Quod opinor ea de causa facit ut vitio se illi avidius ingurgent, nec vlla illius expleantur satietate. Dulce quid humana imperitis gloria est.

l. 34. Mor.  
c. 18.

Sanctus quoque Gregorius: Alia vitia eas solummodo virtutes impetunt quibus ipsa destruuntur, ut videlicet ira patientiam, libido continentiam expugnet: superbia autem nequaquam vnius virtutis extinctione contenta, contra cuncta anima membra se erigit, & quasi generalis ac pestifer morbus, corpus omne corrumpit, quasi tyrannus quidam, obsessam ciuitatem intercipit, & quò ditiores quemque cæperit, eo in dominio durior exurgit, quia quo amplius res virtutis sine humilitate agitur, eò latius ista dominatur. Et post multa de damnosis eius effectibus sic pergit propius ad rem nostram: Sed tanto facilius ruina sequitur, quanto apud se quisque impudentius exaltatur. Hinc enim scriptum est, ante ruinam exaltatur cor. Hinc per Danielelem dicitur: In aula Babylonis deambulabat rex, responditque & ait: nonne hæc est Babylon magna quam ego edificaui in domum regni, in robore fortitudinis meæ, in gloria decoris mei? Sed hunc tumorem quam concita vindicta ira represserit, illico adjunxit dicens: Cum adhuc sermo esset in ore regis, vox de cælo ruit: Tibi dicitur Nabuchodonozor rex, regnum transiet à te, & ab hominibus te ejicient, & cum bestiis ferisque erit habitatio tua, fœnum quasi bos comedes, & septem tempora mutabuntur super te. Ecce quia tumor mentis usque ad aperta verba se protulit, patientia Iudicis protinus usque ad sententiam erupit, tantoque hunc distinctius perculit quanto se eius superbia immoderatus erexit; & quia enumerando bona dixit in quibus sibi placuit, enumerata mala in quibus feriretur, audiuit.

Nonne hoc est suis se bonis exuere, & non modo in res nullius pretij, ea permutare, sed in certam perniciem & damnum suum effundere?



III. P V N C T V M.

**O**MNES ergo insipientes & infelices supra modum sunt superbi. Quia sic se suis priuare meritis, sic se suorum fructu laborum & operum defraudare pro leuicula gloria non nisi valde & supra modum insipientis est atque infelicitis: nec vix in alio genere reperias hominem qui sic temere & insane res alicuius pretij patitur sibi perire, *Vigilaret utique, & non sineret perfodi domum suam.* Vnde apte Propheta, postquam superbo dixit, *Superbia cordis tui extulit te:* Et quæ plura prosequitur, tum hæc addit, *si fures introissent ad te, si latrones per noctem, quomodo conticisses? Nonne furati essent sufficientia sibi? Si vindemiatores introissent ad te, Numquid saltem racemum reliquissent tibi? Quasi diceret, Nonne lugeres tibi tua sic ab hostibus abripi? Et tamen non luges quæ à te aufert superbia!* Quæcumque hostes rapiunt, terrena sunt, caduca sunt; neque sic omnia rapiunt quin aliquid domi vel in agro relinquunt: sed quæ aufert superbia, spiritualia sunt, æterna sunt, diuina sunt, & sic omnia simul bona deprædatur, nihil plane ut superfit.

Hinc etiam apte monebat Sapiens: *Non te extollas in cogitatione anime tue velut taurus, ne forte elidatur virtus tua per stultitiam, & folia tua comedat, & fructus tuos perdat, & relinquareis velut lignum aridum in eremo.* De hac superborum stultitia fuit Diuus Chrysostomus: de illorum vero infelicitate prudenter sanctus Augustinus in Psalmos, ubi hos versus exponit, *Redde retributionem superbis, & donec fodiat peccatori fovea.* NAM & ille, inquit, peccator fuit Publicanus qui oculos eliserat in terram, & percutiebat pectus suum dicens, Deus propitius esto mihi peccatori. Sed quia superbus non erat, Deus autem reddet retributionem superbis: non illi, sed talibus fodiat fovea donec reddat retributionem superbis. Ergo quod ait, *fodiat peccatori fovea, superbos intellige.* Quis est superbus? Qui in confessione peccatorum penitentiam non agit ut sanari per humilitatem possit. Quis est superbus? Qui illa pauca quæ videtur habere bona, sibi vult arrogare, & derogat misericordia Dei. Quis est superbus? Qui etiamsi Deo tribuat bona quæ facit, insultat tamen his qui illa non faciunt, & extollit se super illos. Nam & ille Pharisæus, *Gratias tibi ago, inquit: non dixit ego facio,* Et post multa



de illo, quantum se extulit, cum dicit, quia non sum sicut Publicanus iste? Ille superbus erat in bonis factis: Iste humilis in malis factis. Videte fratres, magis placuit Deo humilitas in malis factis, quam superbia in bonis factis: sic odit Deus superbos.

*Ecclesi. 10.*

Nonne times hoc Diuinum odium? Cur non times ergo superbiam quæ illud prouocat odium? Cur non ergo times humanas laudes quibus illa superbia prouocatur? Noli extollere te in faciendo opere tuo.

Porro contra Superbiam, Præsumptionem, Iactantiam, & similes infortis huius insipientiæ foetus, hæ valere possunt pro variis ad quos diriguntur variandæ Veritates:

Nulla re homo quantumuis gloriosa gloriari potest. Ad laudes nostras tremere potius conuenit quàm exultare.

*In 1. parte, Fer. 2. & 4. Hebdom. 2. Aduentus.*

Qui se existimat stare, videat ne cadat.

*In 2. parte, Feria 6. Hebdom. Septuages.*

Nimia firmitas, infirmitas.

*In 2. parte, Fer. 2. Hebdom. Sexages.*

Sicut vinum nouum, sic nouus honor maximè temperandus.

*In 2. parte, Fer. 2. Hebd. 2. post Oñ. Pasche, & tota pene Hebdomada.*

Nisi te humilies in prosperis, prospera te humiliabunt.

*In 3. parte, Dominica 4. post Pentecosten.*

Qui suam Iustitiam facit vt videatur, maximam quæ fieri possit iniustitiam, videtur facere.

*In 3. parte, Sabbato Hebdom. 5. post Pentec.*

Primæ petitioni Dominicæ prima se opponit superbia; Quod illa petit, hoc ista impetit.

*In 3. parte, Feria 2. Hebdom. 6. post Pentec.*

Quæ à Christo hauritur nostri Cognitio, omnem in nobis exhaurit fastum.

*In*



*Omnes insipientes & infelices supra modum superbi.* 449

*In 3. parte, Fer. 3. Hebdom. 11.*

Superbo maxime formidandum Diuini tribunal Iudicij.

Claritas quæ ab hominibus accipitur, mera est obscuritas.

Ne diuina pereat fides, pereat potius humana gloria.

*In 3. parte, Feria 5. 6. & Sabbato Hebdom. 12.*

Nemo sui boni bonus Iudex.

*In 3. parte, Fer. 3. Hebdom. 14.*

Si cum nostris vitiis nostræ virtutes comparentur, plus nostris vitiis inhonoratur Deus, quàm nostris virtutibus honoretur.

*In 4. parte, Sabbato Hebdom. 19.*

PLVRA vide in 4. parte, Dominica 16. ad hæc eadem quæ recurrunt Domini verba: *Omnis qui se exultat humiliabitur: & qui se humiliat exaltabitur.* Vbi quæ ad Humilitatis Commendationem faciunt, potissimum recensentur, quibus & hæc magis hic opportuna possunt adjungi Veritates:

Ne dicas, sufficiens mihi sum.

Grande malum propria voluntas, quæ se in bono bene faciendo non finit dirigi.

*In 1. parte, Feria 4. & 5. Hebdom. 3. post Epiphan.*

Humilitati tuendæ tutius est, vix de se loqui, quàm vel humiliter loqui.

*In 2. parte, Sabbato Hebdom. 1. post Octau. Pascha.*

Charitas non quærendo sua, melius inuenit quàm si quæreret: Tanto ditior, quanto pauperior.

Si charitas cogitaret de aliis malum, malum de charitate cogitari posset.

*In 2. parte, Fer. 2. & 4. Hebdom. 3. post Pascha.*

Quæ autem ex Publicano poenitente, ad poenitentia partes



450 FERIA 2. Hebd. 10. post Oct. Pent. Rogate Dominum, &c.

Contritionem & Confessionem referri debent, vide passim in singulis partibus, ac præsertim in prima, in Aduentu, Dominica 4. & Hebdomada 3. post Epiphaniam. Item in 2. parte, FERIA 6. & Sabbato Hebdom. 1. in Quadragesima. Necnon in proximè sequenti Hebdomada ubi pro Missionibus de peccato, & de poenitentia.



HAC HEBDOMADA, Cùm suos Christus Apostolos destinaret mittere in vicos & ciuitates, Euangelizandi gratia; perquàm aptis eos instruit Documentis, ex quibus Considerationes & Veritates eruuntur non modo Missionariis accommodæ; sed & aliis quibuscumque personis, vt de suo conferant ad hoc Diuinum opus promouendum, & ad salutem proximi, quoquo modo procurandam.

## FERIA SECVNDA.

DE ORATIONE QVAM EXIGIT

CHRISTVS DOMINVS VT MITTANTVR

OPERARII IN MESSEM.

*Messis quidem multa, operarij autem pauci;  
Rogate ergo Dominum messis, vt mittat operarios in messem suam. Matth. 9.*

## VERITAS PRACTICA.

Sic pium est orare Deum pro salute proximi, vt sit impium non orare.



*Sic pium est orare Deum pro salute proximi, ut sit, &c. 451*  
**RATIO EST,** Quia impium est, denegare alteri benefi-  
cium quod ei facile conferre possis, in ipsius graui necessitate.  
*Sed nisi Deum ores pro salute proximi, denegas alteri beneficium*  
*in ipsius graui necessitate, quod ei facile conferre possis.*  
*Ergo impium est non orare Deum pro salute proximi; Ac proinde*  
*rogandus Dominus messis, non modo ut mittat operarios in*  
*messam suam, sed ut ipsi efficaciter operentur.*

### I. P V N C T V M.

**A**NTEQVAM de Missione Apostolorum ageret sanctus *Math. 9.*  
Euangelista, pramittit hæc verba de Domino IESV valde  
obseruanda: *Et circuibat IESVS omnes ciuitates & castella*  
*docens in Synagogis eorum & predicans Euangelium regni, & curans*  
*omnem languorem, & omnem Infirmi- tatem. Videns autem turbas mi-*  
*fertus est eis; quia erant vexati & iacentes, sicut oues non habentes*  
*Pastorem. Tunc dicit Discipulis, Messis quidem multa, operarij autem*  
*pauci; Rogate ergo Dominum messis, ut mittat operarios in messam suam.*

Obserua igitur & attente considera ut ipse Dominus suo exem-  
plo Missiones instituit; Vide quo zelo & ardore circumquaque fer-  
tur ad saluandas animas! Qua commiseratione tangitur! Quàm  
multa messis! Quàm pauci operarij! Quàm iure merito à nobis  
exigat ut rogemus Dominum messis! Quàm id iustum & pium sit  
nos Eum orare vel ut mittat operarios in messam, vel ut benedi-  
cat eorum operi, vel tandem quo ipse nouit modo, saluti proxi-  
morum prouideat! Quàm è contra impium, crudele, & barba-  
rum, non orare Deum pro salute proximi. Quod quidem præ alijs  
considerandis videtur magis expendendum ad finem nobis pro-  
positum de orando Deo. Licet enim consideratio pietatis quæ exer-  
cetur in tali oratione nos ad eam mouere possit, tamen quando  
sola consideratur virtus aut opus bonum ex consilio tantum fa-  
ciendum, non ita solent omnes permoueri ad agendum, quam  
quando proponitur vitium oppositum quod incurras nisi virtutem  
exerceas. Non est enim omnis actus virtutis ita imperatus, sicut  
omne vitium est vetitum: neque semper ex omissione virtutis cu-  
iuslibet, sequitur vitium. At vero in hac præfenti materia verè



dici potest, *Quod sic pium est orare Deum pro salute proximi, ut sit impium non orare*; Quamobrem id diligentius attentendum.

Ratio autem quæ affertur hæc est, quod si graui aliqua int necessitate proximus tua egeat opera quam ei commodè conferre possis & absque vlllo tuo damno & detrimento; neque tamen ei conferas vlllo modo, nihil subsidij, nihil auxilij feras, nonne hoc impium, ne dicam ferum & barbarū iudicetur ab omnibus? Nonne teipsum tui puderet in tāta immanitate animi? Nonne teipsum condemnares? Nam si non esset grauis necessitas, si beneficium quod postulatur esset difficile vel damnosum, si denique aliquod inde incommodum timeretur, esset forte quod excusares; sed cū nihil horum occurrat, cū nihil petatur nisi quod facile possis absque vlla prorsus vel commoditatum vel otij vel cuiuslibet rei tuæ iactura, & tamen nolis, certe id ita est impium & crudele vt si quid Deo de tuis postea velles offerre, id abominaretur & exhorreret tamquam odiosum & acerbum. Vnde est illud sacri Pro-  
*uerbij*, *Hostiæ impiorum abominabiles*, Et hanc præcipuam afferebat Deus causam cur Iudæorum sacrificia & ieiunia non accepta-  
*ret*, quia *non subueniebant oppresso, non iudicabant pupillo, non defendebant viduam, non liberabant captiuos*. Illudque vnum erit quod  
*Christus Iudex exagitant acius: Quamdiu non fecistis vni de minoribus his, nec mihi fecistis*. Nonne hoc esset impium sic nega-  
*uisse Christo?*

## II. P V N C T V M.

**S**ED nisi ores Deum pro salute proximi, denegas ei operam vel beneficium in sua graui necessitate quod ei facile conferre possis.

Tria sunt distinctè perpendenda. Primum, quotquot in peccato mortali existunt, eos in graui esse necessitate; quàm vero multi sint an ignoras? Secundum est, nihil ad eorum subsidium æquè valere atque orationem. *Manent tria hæc*, inquit sanctus Bernardus, *Verbum, Exemplum, Oratio, MAIOR AVTEM HIS EST ORATIO*. Tertium denique nihil facilius, nullus hic labor, nullæ expensæ, nullum detrimentum; Imo quàm plurimum inde proficies; Nam *benefacit animæ suæ vir misericors*, inquit Sapiens; Vnde illud restat quod nisi ores pro salute proximi, beneficium ei deneges, in ipsius graui necessitate, quod ei facile ac com-



*Sic pium est orare Deum pro salute proximi, ut sit, &c.* 453

modo etiam tuo conferre possis. Nonne hoc est de quo Deus expostulans, *Non ascendistis*, inquit, *ex aduerso, neque opposuistis murum* Ezech. 13.  
*pro domo Israel, ut staretis in praelio in die Domini.* Quali diceret, non adiuuistis orationibus vestris populum quo tempore ijs maxime indigebat. Et rursum: *Et quasiui de eis virum qui interponeret sepem, & staret oppositus contra me pro terra, ne dissiparem eam,* Ibid. 21.  
*& non inueni.* Grauiissima certe expostulatio!

### III. P V N C T V M.

**S**IC ergo pium est orare Deum pro salute proximi, ut sit impium non orare; Cum sic videlicet denegetur beneficium proximo in sua graui necessitate quod ei commode prestare possis & debeas. Nam si verum id est de aliqua necessitate corporis, quanto id magis de anima, cum præcipue Deus & Christus Dominus id à nobis tantopere exigant; & plerumque in hoc negotio magis deferant orationi quam operi? *Orate pro inuicem ut saluemini: multum enim valet* Iac. 5.  
*deprecatio Iusti assidua.* Vnde & Apostolus, *Obsecro ergo vos fratres* Rom. 15.  
*per Dominum nostrum Iesum Christum & per Charitatem sancti Spiritus, ut adiuuetis me in orationibus vestris pro me ad Deum.* Itemque alibi: *adjuuantibus & vobis in oratione pro nobis*, Rursumque apertius, *Vi-* 2. Cor. 1.  
*gilantes*, inquit, *in omni instantia & obsecratione pro omnibus sanctis,* Ephes. 6.  
*& pro me, ut detur mihi sermo in apertione oris mei cum fiducia, notum facere mysterium Euangelij pro quo legatione fungor in catena, itaut in ipso audeam prout oportet me loqui.*

Quod si in Apostolo, viro illo ad Euangelij prædicationem diuinitus segregato, tantum prodesse posset oratio quantum ipse testatur, quid de aliis Operariis longe inferioribus dicendum erit? Et vero si tantæ est efficaciæ & necessitatis oratio, tu qui illam possis prestare commode, non prestabis? An laboranti Apostolo, & petenti frustum panis, denegares? En prope tibi & procul Apostolici viri laborâtes in vinea & messe Domini, orationem tuam postulant, vrgent, & ambiunt; tu obsurdesces? *Qui obturat aurem ad* Prov. 21.  
*clamorem pauperis, ipse clamabit & non exaudietur.* OBSECRO Domine Exod. 4.  
*mitte quem missurus es.*

*Miserere nostri Deus omnium, & respice nos, & ostende nobis lumen miserationum tuarum, & immitte timorem tuum super gentes, quæ non exquisierunt te: ut cognoscant quia non est Deus nisi tu. Immoa signa, &* Ecclesi. 36.



454 FERIA 3. Hebd. 10. post Oct. Pent. In viam gentium, &c.

*immuta mirabilia. Glorifica manum & brachium dextrum. Suscita predicationes quas locuti sunt in nomine tuo Propheta priores. Vide reliqua Ecclesiastici, notato capite. Videri & possunt quaecumque de zelo alibi vel de oratione habentur. Sed magis esset videndum quid abs te desideretur in hac parte: quàm te parùm tangat salus proximi, quàm paucas & frigidas propterea fundas preces: quid deinceps feruentius & efficacius? Loquar in amaritudine animae meae.*

ser. 10.



## FERIA TERTIA.

### DE DISCRETIONE ADHIBENDA

IUVANDO PROXIMO, ET SALVTI  
ANIMARVM PROCVRANDÆ;

*Ad hæc Christi Domini Verba :*

*In viam gentium ne abieritis, & in ciuitates Samaritanorum ne intraueritis; sed potius ite ad oues quæ perierunt, domus Israel. Matth. 10.*

### VERITAS PRACTICA.

Non plus ultra.

*SENSVS EST, Hanc esse discretionem adhibendam iuvando proximo; ut præscripti tui officij limites numquam prætergrediaris, neque magis ultra debitum audeas, quàm ne citra deficias.*

*RATIO EST, Quia in iuvandis proximis maximè est spectandus ordo Diuinae prouidentiae.*



*Sed hic ordo æquè exigit, ut ne plus ultra excedas quàm ne citra defuias.*

*Ergo non plus ultra. Quod quousque se extendat, & quanta sit dignum cautione, diligenter indagandum.*

## I. P V N C T V M.

**E**T conuocatis duodecim Discipulis suis, dedit illis potestatem *March. 10.*  
spirituum immundorum ut ejicerent eos, & curarent omnem languorem & omnem infirmitatem. Cumque illos iam iam missurus esset, præcepit eis dicens, *In viam gentium ne abieritis & in ciuitates Samaritanorum ne intraueritis; sed potius ite ad oues qua perierunt domus Israel. Euntes autem prædicate, dicentes, quia appropinquauit regnum Cælorum. Infirmos curate, mortuos suscite, leprosos munda- te. Et quæ plura habentur: In quibus illud magis mirum quod uetet adiri Gentes seu Infideles & Samaritanos. Ne uidelicet ut ait sanctus Hieronymus, Indæi dicerent se non recepisse Dominum, quod Apostolos ad gentes miserit; Vel, sicut ait sanctus Hilarius, Ut minor excusatio Indæis esset qui plus sedulitatis in admonitione senserunt, & ab eis repulsi Apostoli, ordine ad gentium uocationem transirent, sicut postea illis aperte significarunt; uobis oportebat primum loqui Verbum Dei: sed *Act. 13.* quoniam repellitis illud, & indignos vos indicatis æternæ uitæ: ecce conuertimur ad Gentes. Sic enim præcepit nobis Dominus.*

Sicut ergo non minùs peccassent Apostoli, si quod illis erat uetitum, attentassent, atque si non effecissent quod erat iussum; sic uniuersim inde discimus Discretionem hanc adhibendam esse iu- uando proximo & saluti animorum procuranda: Ut ne ultra quod sibi est ordinatum quisquam magis audeat, quàm merito timere debet ne citra debitum officij declinet & deficiat: sed suos intra fines accepti muneris se unusquisque contineat.

Ratio est tanto efficacior, quantò est generalius & certius principium cui innititur de Diuina Prouidentia cuius statutum ordinem hic præcipue spectandum monet & demonstrat. Spectandus quidem est ubique semper hic Diuinus ordo, sed illic præcipue obseruandus ubi magis elucet; elucet uerò præcipue in negotiatione salutis alienæ, quæ tam pene varia est & diuersa quàm sunt diuersi homines quorum salutem negotieris. Tametsi enim *Deus uult om-* *1. Tim. 2.*



nes homines saluos fieri & ad agnitionem veritatis venire: Non tamen eodem tempore, non iisdem modis & mediis, non per easdem personas & gratias; sed tanta est non modo diuersitas, verum & inæqualitas Gratiarum; vt licet omnes homines sint dilecti, alij tamen præ aliis electi dicantur ad Gratiā & Gloriam, *secundum beneplacitum & propositum eius qui operatur omnia, secundum consilium voluntatis sue*, vt ait Apostolus. Pascentur agni iuxta ordinem suum, & præcinebat Isaias, & Pastor ipse de suis ouibus, *Cognosco meas*, inquit, *& cognoscunt me mea*. VOS non creditis quia non estis ex ouibus meis, oues mea vocem meam audiunt & ego cognosco eas & sequuntur me, & ego vitam æternam do eis, & non peribunt in æternum.

Sed quænam illæ sunt oues? Quænam illa vox Christi quam audiunt, quandonam & per quos auditur? Cur in ciuitate Corozain, cur in Betsaida, vel in Capharnaum prædicatur à Domino; & nullus est prædicationis fructus: In Tyro ac Sidone non prædicatur, vbi fructus extitisset? Quid quod Paulus & Silas, *vetati sunt à Spiritu sancto loqui verbum Dei in Asia; & cum tentarem ire in Bithyniam, non permisit eos spiritus IESV, sed in Macedoniam potius transire voluit?*

Secreta sunt, Mysteria sunt, Sacramenta sunt, interno mentis cultu potius adoranda, quam vlla rationis indagine peruestiganda. Satis id nobis sit scire, quod sapienter obseruat Estius in suis commentariis ad Verba Christi, *Si in Tyro & Sidone factæ fuissent virtutes. DEVM non solum esse Authorem actionis siue effectus qui ex prædicatione prouenit, sed & omnium mediorum, & actionum intermediarum quibuscumque voluerit uti, seu quacumque voluerit adhibere: Cur autem illas potius quam alias, aut cur illic & non alibi, hoc vnum cum Apostolo respondendum est: O altitudo diuitiarum Sapientiæ & scientiæ Dei! Quam incomprehensibilia sunt Iudicia eius! Et inuestigabiles viæ eius! Quis enim cognouit sensum Domini, aut quis consiliarius eius fuit?*

## II. PUNCTVM.

**S**ED Diuinus & arcanus hic ordo æquè exigit vt ne plus ultra excedas, quàm ne citra deficias.

Nam cum Diuinæ Gratiæ, quæ ad iuuandum proximum sunt necessariae, non disiungantur ab illo quem statuit Deus ordine, quid



quid facies si ultra ordinem perrexeris? Quid facies sine Diuina gratia? Quid facies sine illo qui dixit, *Sine me nihil potestis facere?* CV Rtransgredimini verbum Domini quod vobis non cedit in prosperum? *Ioan. 15. Num. 14.* Nolite ascendere, dicebat Moses ijs qui cum defecissent citra debitum officij, volebant ultra progredi; *Nolite, inquit, ascendere, non enim est Dominus vobiscum, ne corrumpatis coram Inimicis vestris.* Sic erat diuina lege cautum: *Propheta qui arrogantia deprauatus voluerit loqui in nomine meo, quæ ego non precepi ei, interficietur.* *Dens. 18.* Sic ipse Deus sapissime contra tales inuehitur: *Non mittebam & ipsi currebant; Non loquebar ad eos, & ipsi prophetabant.* *Ier. 23.* Quod quam sit noxium, apparuit in illis sacerdotibus, qui sicut Machabæi militare voluerunt, cum sicut illi ad militiam non essent à Deo destinati. *Et fugati sunt, inquit Scriptura, existimantes se fortiter facturos.* *Ipsi Macch. 9.* *autem non erant de semine virorum illorum per quos salus facta est in Israel.* In die illa ceciderunt sacerdotes in bello dum volunt fortiter facere, dum sine consilio exeunt in prælium. Hoc erat ultra progredi; hoc erat æquè contra Diuinum peccare ordinem, quàm si Machabæi diuinitus ordinati ad præliandum, non essent præliati.

Hinc apte Sapiens, *Noli esse Iustus multum, id est nimis, neque plus sapias quam necesse est, ne obstupeas.* *Eccl. 7.* Quod fusè Apostolus profecquitur, vt iam alibi est declaratum: *Dico enim per Gratiam qua data est mihi, omnibus qui sunt inter vos: non plus sapere quam oportet sapere, sed sapere ad sobrietatem: & unicuique sicut Deus diuisit mensuram fidei.* *Rom. 12.* Sicut enim in vno corpore multa membra habemus, omnia autem membra non eundem actum habent: ita multi vnum corpus sumus in Christo, singuli autem alter alterius membra. Habentes autem donationes secundum gratiam qua data est nobis differentes.

Quod & in alio loco repetens, sic apte ad rem nostram: *Si totum corpus oculus, ubi auditus? Si totum auditus, ubi odoratus? Nunc autem posuit Deus membra, vnumquodque eorum in corpore, sicut voluit; quod si essent omnia vnum membrum, ubi corpus?* *1. Cor. 12.* Quasi diceret, sicut præclarus ille ordo quem Deus in humano corpore posuit peruerteretur si quod eius membrum alterius membri munus obiret: ita planè si quis in mystico Christi corpore quod est Ecclesia si quis plusquam debet, velit operari, confundet ordinem & confundetur. Quod & egregie sanctus Gregorius, vt in prima parte est obseruatum, Vnde quæ hic desunt potes repetere, & quæ illic desiderantur, possunt hinc suppleri. *In Communi Confess. Pontificum.* *Quid sancta, inquit,*



l. 28. Mor.  
ca. 11.

*Ecclesia nisi superni sui capitis corpus est, in qua alius alta videndo, oculus; alius recta operando, manus; alius ad injuncta discurrendo, pes; alius praeceptorum vocem intelligendo, auris; alius malorum fetorem, bonorumque fragrantiam discernendo, naris est. Quis corporali more membrorum dum vicissim sibi accepta officia impendunt unum de semetipsis omnibus corpus reddunt. Et post pauca: Sed cum miro consilio Auctor & dispositor noster huic illa largitur quae alij denegat: alij hac denegat quae illi largitur, mensuras sibi positas egredi nititur quisquis posse plusquam acceperit, conatur: ut fortasse is cui tantummodo datum est praeceptorum occulta differere, tentet etiam miraculis coruscare: aut is quem superna virtutis donum ad sola miracula roborat, etiam diuinae legis pandere occulta contendat. IN PRAECIPITIO enim pedem porrigit qui mensurarum suarum limitem non attendit. Et plerumque amittit & quod poterat qui audacter ea ad quae pertingere non valet, arripere festinat. Nam & membrorum nostrorum tunc bene ministeriis utimur, cum sua eis officia distinctè seruamus. Lucem quippe oculis cernimus: vocem vero auribus audimus. Si quis autem mutato ordine voci oculos, luci aures accommodet, huic incassum utraque patent. Et quae ibi fusius presequitur.*

Num. 16.  
Ps. 72.

*Satis hinc aperta propositio: & satis apertum est quàm multa molietur ambitio in animis nostris, quae nos ulterius promoueant contra hunc diuinum ordinem. Cur eleuamini super populum Domini? DEIECISTI eos dum allenarentur.*

## III. P V N C T V M.

**N**E plus ergo ultra. Ne plus ultra audeamus in iuuandis proximis, quàm ne citra debitum deficiamus; Quia hic maxime spectandus ordo Diuinæ Providentiæ, qui æquè violatur si plusquam disponat audeas, atque si minus agas quàm statuat, *Recupera proximum*, inquit Sapiens, *secundum virtutem tuam, & attende ne incidas.* Incides scilicet si plus attentes quàm virtus tua vel officium tuum patiatur.

*Legistine aliquando apud Iobum quid turgidus & insolens Eliu de se prædicet? Plenus, inquit, sum sermonibus, & coarctat me spiritus uteri mei. En venter meus quasi mustum absque spiraculo, quod laticulas novas dirumpit. Loquar & respirabo paululum: aperiam labia mea, & respondebo.* Sic se Iuniores quidam non vocati temerè inge-



runt ad Concionandum: quibus & illud Psalmi conueniat: *Subito* ps. 63.  
*sagittabunt eum, & non timebunt: firmauerunt sibi sermonem nequam.*

Sed quàm pauendum illud quod in actis Apostolorum narra-  
 tur; Tentauerunt quidam inuocare super eos qui habebant spiritus malos, act. 19.  
*nomen Domini IESV, dicentes: adjuro vos per IESVM quem Paulus*  
*prædicat. Respondens autem spiritus nequam dixit eis: IESVM noui,*  
*& Paulum scio: vos autem qui estis! Et insiliens in eos homo in quo*  
*erat Dæmonium pessimum, & dominatus amborum inualuit contra eos,*  
*ita ut nudi & vulnerati effugerent de domo illa. Hoc illis scilicet acci-*  
*dit ut qui à Spiritu sancto regi ordinate nolunt: à malo inordinate*  
*rapiantur & male pereant. Prudentiæ tuæ pone modum. Rationa-* Pr. 23.  
*bile sit semper obsequium tuum. Altiora ne quaesieris: sed quæ præ-* Rom. 12.  
*cepit tibi Deus, illa cogita semper. NEC infra, ut ait sanctus Gre-* Ecclesi. 3.  
*gorius, minima negligens deficias, nec ultra, maxima superbiens ten-* l. 38. Mor.  
*das: nec minus coneris explere quam sufficit, nec plus arripias quàm ac-* c. 11.  
*cepisti: ne aut ad mensuram quam debes, non peruenias: aut eandem*  
*mensuram deserens, extra limitem cadas. Angusta quippe porta est quæ*  
*ducit ad vitam: & ille hanc ingreditur qui in cunctis quæ agit, dis-*  
*cretionis subtilitate, propter hanc sollicitè coarctatur. Nam qui per vo-*  
*luntates proprias secunda mente se dilatat, angustæ sibi portæ aditum dam-*  
*nat. Quid restat quam illud Christi probum: Vos non intratis, nec* Matth. 23.  
*introducunt finitis intrare. Aduerte diligenter: & noli altum sapere.* Rom. 11.

Vide in 1. parte, die 31. Decembris. Et in Communi Confesso-  
 rum Pontificum.



## FERIA QVARTA.

### DE PACE PROCVRANDA

CVM SALVTE.

*Intrantes in domum, salutate eam, dicentes: Pax*  
*huic domui. Matth. 10.*



VERITAS PRACTICA.

Pax in pugna.

RATIO EST, Quia pax est in subordinatione partium.  
Sed ista subordinatio non fit nisi pugnando.

Ergo pax in pugna: Quod tamen pauci capiunt.

I. PUNCTVM.

**D**IVINÆ Sapientiæ Diuina hæc fuit adinuentio, vt cum salute proximi promouenda, iungeret pacem. Cum enim negotium salutis sit valde asperum & difficile, non poterat illa condiri asperitas suauiori condimento quam pacis, quæ ab omnibus vniuersim amatur & colitur. *Tantum est pacis bonum, inquit sanctus Augustinus, vt etiam in rebus terrenis atque mortalibus, nihil soleat gratius audiri, nihil desiderabilius concupisci, nihil postremo possit melius inueniri.*

19. de Ciuit.  
Dei. c. 121.

Cum verò multiplex sit genus pacis, totum illud in pugna consistit. Quod certe mirum, cum potius pax ita videatur repugnare pugnae vt si sit pugna, tum pax desit; si pax adsit, desit pugna. Quamobrem eò diligentius reuoluenda est Veritas quo magis inuoluta videtur.

Ibid. c. 13.

Sic autem apertissimè & breuissimè declaratur: Pax est subordinatio partium, quod diseret sanctus Augustinus exponit de omni genere pacis. Pax, inquit, est tranquillitas ordinis: Pax corporis, est ordinata temperatura partium. Pax anima irrationalis, ordinata requies appetitionum. Pax anima rationalis, ordinata cognitionis actionisque consensio. Pax corporis & anima, ordinata vita & salus animantis. Pax hominis mortalis & Dei immortalis, ordinata in fide, sub æterna lege obedientia. Pax hominum, ordinata concordia. Pax domus, ordinata imperandi atque obediendi concordia cohabitantium. Pax ciuitatis, ordinata imperandi atque obediendi concordia ciuium. Pax cælestis ciuitatis, ordinatissima & concordissima societas fruendi Dei, & inuicem in Deo.

De hac postrema pace non est hîc quæstio, sed de aliis spe-



ciebus quæ ad triplex tantum genus referri possunt. Nempe cum Deo; *Pacem habeamus apud Deum per IESVM Christum.* Deinde cum proximo: *Pacem habete inter vos.* Ac denique nobiscum: *Pax Dei quæ exsuperat omnem sensum custodiat corda vestra & intelligentias vestras in Christo IESV.* De qua triplici pace sic apte & breuiter sanctus Bernardus, *Quia tentatio est vita hominis super terram, merito in terra homini, non gloria sed pax est querenda: Pax cum Deo, Pax cum proximo, Pax cum seipso.* Nonne tu vero gloriam magis quam pacem quæris? Quid est quod sapius tecum & cum proximo turbat pacem, nisi quod quæris gloriam? Itane vero hanc præfers paci? Nil tam aduersum veræ paci quàm vana gloria, nam cum pax sit in illa subordinatione partium quæ supra descripta est, nil aliud agit gloria quàm rectum inuertere ordinem. *Superbia cordis tui extulit te, habitantem in scissuris petrarum, exaltantem solium tuum.*

Rom. 5.

Marci 9.

Phil. 4.

Serm. 5. in

Festo omn.

Sanct.

Abdias.

## II. P V N C T V M.

**A**T vero ista subordinatio seu ordinatissima subjectio partium, in qua triplex illa pax sita est, non fit nisi pugnando.

Cum enim semper naturalis sit repugnantia nostri appetitus cum Ratione nostra, & rationis nostræ cum rationibus proximi atque ipsius etiam Dei ordinantis quæ nobis difficilia intellectu, & dura operatu videntur; numquam subijcietur appetitus rationi aut ratio Deo nisi valide cum Gratia expugnentur. Numquam verò ita expugnantur, vt non sit semper aut sæpe contra pugandum, neque enim naturalem difficultatem omnino tollit Gratia; sed nos iuuat & confortat vt pugnemus & vincamus. Quis enim neget Apostolum omni abundasse gratia? Quis autem nesciat quantam simul difficultatem & repugnantiam senserit, cum ipse aperte dicat: *Video aliam legem in membris meis, repugnantem legi mentis meæ, & captiuantem me in lege peccati quæ est in membris meis.* Infelix ego homo, quis me liberabit de corpore mortis huius! Gratia Dei per IESVM Christum Dominum nostrum. Non quidem vt non sentiat legem illam membrorum repugnantem, neque vt non contra pugnet, sed potius vt pugnam illam generose suscipiat & gloriose perficiat: Sic enim Ille alibi: *Ego igitur sic curro non quasi in incertum, sic pugno non quasi aërem verberans, sed castigo*

Rom. 7.

1. Cor. 9.



corpus meum & in seruitutem redigo, ne forte cum aliis predicauerim, ipse reprobus efficiar.

Atque ut omnibus innotescat sic esse decertandum, sic omnes  
Coloss. 3. adhortatur: *Mortificate ergo membra vestra quae sunt super terram.* Id est, quae terram sapiunt & non coelum, quae deorsum in terrena nos abripiunt & à Diuinis auocant; seu quae sunt super terram, hoc est, quandiu terrenum hoc corpus geritis: sic enim de his & aliis similibus Apostoli verbis, sanctus Augustinus: *Milites Christianos Apostolica tuba isto sonitu accendit in praelium: bellum in quo versamur, ostendit; & ut acriter dimicemus, & hostes nostros mortificemus* l. de Contin. *ne ab eis mortificemur, accendit. Hostes autem nostri opera sunt carnis quae sunt fornicatio, Immunditia, contentiones, emulationes & similia. In hoc praelio aduersus carnalem exercitum, velut aliam producemus aciem spiritualem: fructus Spiritus est, inquit, Charitas, Gaudium, Pax, Longanimitas, Benignitas, Bonitas, Fides, Mansuetudo, Continentia. Haec est actio continentiae si opera carnis mortificentur.*

Hac ad verbum sanctus Augustinus, qui & paulo ante dixerat quod non est omittendum: *Hanc pugnam non experiuntur in semet-ipsis nisi bellatores virtutum, debellatoresque vitiorum. Non expugnat concupiscentiae malum nisi continentiae bonum. Sunt autem qui legem Dei omnino nescientes, malas concupiscentias nec in hostibus deputant, eisque miserabili caecitate seruientes, insuper etiam beatos se putant satiendo eas potius quam domando. Nonne tu ex istis es? An ita pugnas ut domes? Si quid sit in te repugnans quod non domes, dominatur tui, nec satis pugnas. Cessauerunt fortes in Israel & quieuerunt; quiete scilicet vitiosa & probrosa.*

### III. PUNCTVM.

**S**IC Pax ergo in pugna, quatenus ad habendam pacem cum Deo, cum proximo, & nobiscum, subiicienda est concupiscentia Rationi & Ratio Gratiae: neque perfecte possit illa subiectio fieri nisi expugnetur inferius quod superiori resistit, & tamdiu expugnetur, quamdiu resistet. Nam si resistens non expugnaretur praualeret, & non esset vera Pax, non esset tranquillitas ordinis, non esset subordinatio partium, non esset inferior subordinata superiori: *Non est Pax impiis dicit Dominus Deus.*

Atque hinc tria discas ad Praxim. Primum quod licet pacis bo-



num sit tam eximium vt ex sancto Augustino & ex ipso sensu percipitur, pauci tamen illud habent quia pauci secum pugnant; *Viam pacis non cognouerunt, non est timor Dei ante oculos eorum.* ps. 13. Secundum est, quod si quem doces Pacem, doce illam pugnam si- *Gal. 2.* ne qua nulla Pax: Doce pugnandi modum suauem & fortem *Christo confixus sum cruci.* Tertium vt efficacius docere & persuadere possis, tu ipse tecum sic pugna vt quantum fieri potest pacem habeas cum omnibus, Pacem sinceram & solidam, Christi com- page firmatam. *Et pax Christi exultet in cordibus vestris,* *peruenit Col. 3.* id est triumphet, palmam & præmium ferat in pugna. Quasi diceret, multa quidem occurrent quæ impediunt hanc pugnam, sed bonum pacis præualeat omnibus illis occurrentibus; & ad illud obtinendum bene positus pugnae labor credatur, non modo quia bonum hoc præstat cæteris temporalibus bonis quæ ab hac pugna nos reuocant; sed quia bonum est ipsius Dei cuius in animis nostris locus tantum *in pace factus est.* ps. 75.

Vide in 1. parte, Die 9. Ian. & passim Verbo Pax, Libertas.



## FERIA QUINTA.

### DE SIMPLICITATE IUNGENDA PRUDENTIÆ.

*Ecce ego mitto vos sicut oves in medio luporum:  
Estote ergo Prudentes sicut serpentes, & simplices  
sicut columba. Matth. 10.*

### VERITAS PRACTICA.

In spiritali pugna fortior est Ovis Lupo.



464 FERIA 5. Hebd. 10. post Oct. Pent. Sicut oves in medio luporum.

SENSVS ET RATIO EST, Quod in spiritali pugna quam habemus ineundam cum vitiis & vitiosis, tunc fortiores erimus & superiores si Christo Duce pugnemus.

Sed si oves fuerimus, si ouium mansuetudinem imitetur potius quam ferocitatem luporum: tunc Christo Dice pugnabimus, nec aliter.

Ergo & tunc apparebit quod in spiritali pugna fortior est ovis lupo, & columba miluo. Quamobrem hæc induenda est armatura mansuetudinis & simplicitatis, pugnando contra Lupos, contra mundanos & contra quoslibet vitiosos.

## I. PUNCTVM.

**C**VM negotium salutis æternæ sit Diuinum potius quam humanum opus, non est mirum si documenta instruendis Euāgelicis Operariis sint Diuina potius & supernaturalia quam humana & naturalia. Quid minus naturale & humanum quam oves in mundum mittere vt adducant & conuertant ad se lupos? Sed optimè sanctus Chrysostomus, Vt intelligant Apostoli nouum hoc esse belli genus & insolitum praliandi morem, cum illos nudos mitteret, vna indutos tunica, sine calceis, absque virga, & absque zona & pera, & ab excipientibus ali inberet: Non fecit hic dicendi finem, sed inexplicabilem virtutem suam proferens, Etiam sic euntes, inquit, mansuetudinem tamen ouium ostendite, quamuis ad lupos ituri, nec simpliciter ad lupos, sed etiam in medio luporum: neque vero ouium tantum mansuetudinem habere iubet, sed etiam columbæ simplicitatem: sic enim virtutem meam maximè ostendam, cum ab omnibus lupi superabuntur: & quamuis illa sint in medio luporum, & innumeris morsibus laceantur, non modò non consumpta fuerint, verum etiam illos in sui naturam transmutauerint. Majus certe atque admirabilius est mentem Adversariorum commutare, & animum in diuersum transferre, quam illos occidere: præsertim cum duodecim tantum essent, & lupis plenus esset orbis vniuersus. Erubescamus igitur, qui longe diuersa facientes, tanquam lupi in aduersarios ruimus. NAM QVAMDIU OVES FVERIMVS, VINCIMVS: etiamsi mille circumstent lupi, superamus

Hom. 24. in  
Matth.



*superamus & victores sumus: quod si lupi fuerimus, vincimur. Tunc enim à nobis Pastoris auxilium recedit qui non lupos sed oves pascit.*

Hæc ad verbum sanctus Ioannes Chrysostomus, Vnde Veritas modo expendenda & eius declaratio est deducta: *In spirituali videlicet pugna* quam habemus cum vitiis & vitiosis hominibus *fortior est ovis lupo*; Fortior est qui pugnando se mansuetum exhibet, quam qui ferocem & arrogantem: fortior est quam ipsi feroces & superbi quos habet expugnandos & conuertendos.

Ratio est manifesta, quia ille fortior est pugnando qui Christo Duce & adiutore pugnat: Quid clarius? *Nam si Deus pro nobis, quis contra nos?* Inquit Apostolus. Et Propheta egregie: *Dominus Deus Rom. 8. auxiliator meus, ideo non sum confusus: ideo posui faciem meam ut 1. 50. petram durissimam, & scio quoniam non confundar. Iuxta est qui iustificat me, quis contradicet mihi? Stemus simul, quis est aduersarius meus? accedat ad me. Ecce Dominus Deus auxiliator meus quis est qui condemnet me?* Sic Elisasus in clamanti seruo ad multitudinem hostium: *Heu heu heu Domine mi quid faciemus? Noli timere, inquit, plures 4. Reg. 6. enim nobiscum sunt quam cum illis.* Sic dum adsit Christus nobis pugnantibus, Ille vnus pugnam conficiet.

Veni & vide: Et vidi, ait sanctus Ioannes in Apocalypsi: *Et Apoc. 6. ecce equus albus, & qui sedebat super illum, habebat arcum, & data est ei corona, & exiit vincens ut vinceret.* Quod & rursum illi apparuit. Et quoniam esset ille Pugnator & Victor manifestius declaratum est cum vidit cælum apertum: *Et ecce, inquit, equus al- 1b. 19. bus, & qui sedebat super eum, vocabatur Fidelis & Verax, & cum iustitia indicat, & pugnat.* Nempe Christus Dominus est de quo sic præclare Origenes ad illud Canticorum: *Equitatus Pharaonis asimi- Hom. 2. in laui te. EQVVS, inquit, & Equitatus Dei & Christi, sunt Apostoli, Cant. & anima sancta. Sessor est Verbum Dei, cuius ille frenum suscipiunt, ut quocumque voluerit flectat eas, itaut ad omnia bona non à se, sed à voluntate Sessoris ducantur & reducantur, atque à malo refrænentur.* O quam foelix tum pugna, & quam certa Victoria! Dubitasne Christum posse si velit, vincere? Dubitasne velit si tecum contra suos pugnet hostes? *Confidite, ego vici mundum.* Ioan. 16.

## II. P V N C T V M.

**S**ED si tamquam ovis pugnando mansuetus fueris, tum Christo Duce & adiutore pugnabis.



Rom. 14. in  
Matth.

Ille est enim Pastor & Dux ouium non luporum, ut iam audiisti ex sancto Ioanne Chrysostomo, qui & alias addens rationes sic Christum suis loquentem inducit: *Nolite turbari, si cum vos inter lupos mitto, tanquam oves & columbas esse iubeo. Nam etsi possum contrarium quoque prestare, & non permittere, ut grave aliquid patiamini, nec lupis tanquam oves subjecti sitis, sed efficere ut Leonibus terribiliores euadatis, tamen sic expedit fieri: hoc & vos quoque illustriores faciet & meam declarabit virtutem.*

Iudicum 5.

Sic mulier Debbora dum de hostibus populi Dei victoriam reportasset: *Nona, inquit, bella elegit Dominus, & portas hostium ipse subuertit. Quasi diceret, nouum hoc est bellandi genus & maxime proprium Deo, ut per infirmos & exiguos qualis est mulier, debellet suos hostes. Sic enim magis apparet, ipsum esse debellatorem & victorem, atque vni ipsi dandam victoriae gloriam. Sic*

Iud. 9.

*Iuditha ut Diuinum tibi efficacius conciliaret adiutorium contra Holofernem: Erit, inquit, hoc memoriale nominis tui, cum manus femine deiecerit eum: non enim in multitudine est virtus tua Domine, neque in equorum viribus voluntas tua est, nec superbi ab initio placuerunt tibi: sed humilium & mansuetorum semper tibi placuit deprecatio. Sic Psalter Regius postquam dixit, suscipiens mansuetos*

Ps. 146.

*Dominus, humilians autem peccatores usque ad terram: Mox subiungit, Precinite Domino in confessione, Psallite Deo nostro in cythara; Quasi diceret, ob hoc vel maxime Deus noster laudandus est quod oves eligat ut superet lupos, quod mansuetos suscipiat ut humiliet superbos & peccatores.*

In caput 6.  
Luc.

Denique sicut vniuersim dicitur idcirco Dominum elegisse piscatores & ignaros qui Euangelium predicarent, ut virtus inde Diuina magis innotesceret; sic & eisdem vult mansuetos & simplices non feroces & potentes potentia seculari, ut sic ipse magis appareat in illis pugnare & vincere qui mundum *non ferro sed ligno vicit. ADVERTE*, inquit sanctus Ambrosius, *coeleste consilium: non Sapientes aliquos, non diuites, non nobiles: sed piscatores & publicanos quos dirigeret, elegit, ne traduxisse prudentia, ne redemisse diuitiis, ne potentia nobilitatisque autoritate traxisse aliquos ad suam gratiam videretur, ut Veritatis ratio, non disputationis gratia preualeret.*

Nonne hoc coeleste probas consilium? Nonne huic velles inservire? Nonne Domino potius quam tibi velles referri si quid



à te in proximum fructuose fieret? An vero simplex maui haberi quàm ingeniosus & doctus? Attende quid respondeas: & quid dixerit Sapiens in Prouerbiis: *Superbus & arrogans vocatur* Prou. 21. *indoctus.*

### III. PUNCTVM.

**S**IC igitur in spirituali pugna fortior est ouis lupo: Sic Euangelici Operarij agentes cum mundanis facilius eos superabunt & conuertent, si mansueti & humiles fuerint, quàm si scientia vel autoritate tumentes nescio quid fastuosum præ se ferant. Nam præterquam quod ipsis mundanis hoc odiosum est, longe id etiam alienum à Christo qui mites beatos prædicat, *Quia possidebunt terram*, Id est, vt multi interpretantur, ipsos homines quibuscum agent lucrabuntur, quod & Propheta dixerat; *Mansueti hæredibunt terram & delectabuntur in multitudine pacis.* Et Sapiens, *Fili in mansuetudine opera tua perface & super hominum gloriam diligeris.* Matth. 5. 39. Ps. 36. Pr. 3. Vnde apte sanctus Ioannes Chrysostomus: *Neque contumelia affecti feroces simus, etiamsi contemptiores & pauperiores nobis sint qui nobiscum contendunt; sed mansuetudine furorem comprimamus; nihil enim illa potentius, nihil illa fortius.* Hom. 34. 318 Gen.

Quod & alibi confirmans Apostolorum exemplo; *Si rebus ipsis, inquit, id ita fieri, videre desideras, lege actuum Apostolorum librum; perspicies profecto, cum sæpe Iudaorum populus in Apostolos insurrexerit, ac dentes exacuerit, illos columbæ simplicitatem imitando & cum decenti modestia respondendo, iram ipsorum superasse, furorem extinxisse, impetum retardasse.* Nam cum illi dicerent, *Nonne præcipiendo præcepimus vobis, ne doceretis in nomine isto? Quamuis innumera possent edere miracula, nihil tamen asperum neque dixerunt, neque fecerunt, sed summa cum mansuetudine respondentes dicebant, si iustum est vos audire magis quàm Deum, iudicate.* Hom. 34. 318 Matth. *Perpexisti simplicitatem columbæ, vide nunc serpentis prudentiam: Non enim possumus, inquit, nos quæ vidimus & audiuimus, non loqui.*

Sic iungenda semper simplicitati prudentia, vnde est illud sancti Hieronymi scitè dictum; *Habeto simplicitatem columbæ, ne cuiquam machineris dolos; & serpentis astutiam ne aliorum supplanteris insidiis. Non multum distat in vitio, vel decipere posse, vel decipi Christianum. Velle ne decipi & illudi? Nonne hoc quantum*



468 FERIA 6. Hebd. 10. post Oct. Pent. Ne terreamini ab his, &c.

potes, caues? Et vero etiam vide ne decipias. Si sola fuerit prudentia sine simplicitate rationabili, primò te decipiet: deinde tu alios, nam eris alioquin callidus, eris versutus, eris hypocrita. Numquid hoc est decipere?

Pron. 3.

Vide in 1. parte, die 30. Decembris, Vbi hæc Sapientis declaratur Sententia. *Abominatio Domini est omnis Illusor: & cum simplicibus sermocinatio eius.*



## FERIA SEXTA.

### DE MAGNANIMITATE

MAXIME NECESSARIA OPERARIIS

EVANGELICIS:

*Dico vobis amicis meis, ne terreamini ab his qui occidunt corpus. Luc. 12.*

### VERITAS PRACTICA.

In paucis Christi verbis ad amicos suos, Plus est ne terreantur, quàm in cunctis Inimicis, vt ipsos terreant.

*Vel sic:*

Plus est quod Christus monet ne terreamur, quàm quod mouent Inimici vt nos terreant.

RATIO EST, Quia quod spirituale est, quod æternum & Diuinum, plus est seu plurius est ducendum, quàm quod temporale est, quod caducum & transitorium.

Sed quod Christus monet ne terreamur, spirituale est, æternum



In paucis Christi verbis ad amicos, Plus est ne terreantur, &c. 469

est & Diuinum : quod vero mouent Inimici ut nos terreant, totum est temporale, & transitorium.

Ergo plus est quod Christus monet ne terreamur, quàm quod mouent Inimici ut nos terreant. Ac proinde erigendus ad Christum Animus contra vanos mundi terrores.

I. P V N C T V M.

**Q**UAM verè Christus suos in mundum mitteret sicut oves in medio luporum, declarauit apertius cum prædixit illis quanta essent perpeffuri. Tradent enim vos, inquit, in conciliis, & in synagogis suis flagellabunt vos : & ad præsides & ad reges ducemini propter me in testimonium illis & gentibus. Tradet autem frater fratrem in mortem, & pater filium, & insurgent filij in parentes, & morte eos afficient : & eritis odio omnibus propter nomen meum. Sed ne propterea terrentur, hæc addidit. Dico autem vobis amicis meis : ne terreamini ab his qui occidunt corpus, & post hæc non habent amplius quid faciant. Ostendam autem vobis quem timeatis : timeate Eum qui postquam occiderit, habet potestatem mittere in gehennam : Ita dico vobis, hunc timeate. In quibus paucis verbis tam amice, tam suauiter dictis, longe plus erat ne terrentur Apostoli, quàm quidquid mouere poterant Inimici contra ipsos. Quæ certe Veritas si attente consideretur multum valere potest apud quosuis Operarios Euangelicos vt sint magnanimi & constantes in aduersis quæ nunc etiam illis non desunt, sic disponente Domino vt non aliter Euangelium prædicetur.

Sic autem euidenter suadetur Veritas : quia quod spirituale est, quod æternum & Diuinum seu ad Dei cultum & honorem spectans, longe plus est & semper plurius ducendum vt inde moueamur & excitemur cum Gratia, quàm quod est temporale, quod caducum & transitorium. Licet enim visibilia & sensibilia nos magis naturaliter moueant quam spiritualia & quæ à sensibus sunt remota : si Diuina tamen fides accedat, & quæ sit inter bona vel mala de quibus agitur comparatio, si non ex humano sensu, sed ex diuino intellectu velimus inquirere, tantum æterna temporalibus, & spiritualia sensibilibus præponderabunt, quantum quod reuera est excedit illud quod non subsistit. Omnes gentes Is. 40.



470 FERIA 6. Hebd. 10. post Oct. Pent. Ne terreamini ab his, &c.

*quasi non sint, sic sunt coram eo: & quasi nihilum & inane reputate sunt ei. Quantumcumque longe, quantumque late aut misere viuant homines & durent viuentia; Quae pro nihilo habentur, eorum anni erunt. QVI letamini in nihilo, ait Propheta de bonis omnibus. De malis vero testis sit ille Machabaeus de quo expresse scribitur quod tamquam nihilum duceret cruciatus.*

*1. Cor. 7. Et hic natiuus sensus est verborum Apostoli: Qui flent tamquam non flentes: & qui gaudent tamquam non gaudentes: & qui emunt tamquam non possidentes: & qui vtuntur hoc mundo, tamquam non vtantur: praeterit enim figura huius mundi. Quasi aperte diceret, quaecumque sunt in hoc mundo sic aestimanda sunt, quasi non sint in re, sed in figura tantum; neque propterea in malis flendum, aut in bonis gaudendum, quia nec verè mala nec verè bona sunt.*

*1. Ioan. 5. Quo in sensu sanctus Ioannes: Omne, inquit, quod natum est ex Deo, vincit mundum: & haec est victoria quae vincit mundum, fides nostra. Id est, quando spectamus Deum seu res diuinas & aeternas, tunc nihil plane est nobis mundus. Quidquid mundus opponat nobis vel quod alliciat bonum, vel quod nos terreat malum, totum hoc vincimus si fide decertamus; nam fides docet totum hoc bonum vel malum nihil esse praeter Diuinis & aeternis. Itane cedis? Itane fide decertas! O quam rara, quam modica talis fides! Fide muri Iericho corruerunt. Sic mundana quaeque.*

*Hebr. 11.*

## II. P V N C T V M.

**S**ED quod Christus monet ne terreamur, spirituale est, aeternum est & Diuinum: quod vero mouent Inimici, totum est temporale, caducum & transitorium.

Quando sola vox Christi esset, Ne terreamini, res diuina esset & plus aliquid in illa voce esset quam quod omnes Inimici mollerentur vt nos metu malorum terrerent, vel malis ipsis afficerent; quia solius Christi iubentis aut vetantis consideratio, longe pluris aestimanda esset quam nostri corporis, seu vitae temporalis ratio, de qua sola potest agi quidquid possunt agere & mouere Inimici.

Sunt verò alia spiritualia & aeterna quae proponit Christus & quae opponit bonis vel malis temporalibus, quae ab aduersariis possunt contingere: Occident, inquit, corpus: At si propterea timeatis & deficiatis, Deus perdet corpus & animam in gehennam ignis sem-



*In paucis Christi verbis ad amicos, Plus est ne terreantur, &c. 471*

*piternam. Confundent vos & pudefacient coram hominibus : At ego vos erubescam & negabo coram Patre & Angelis eius, si me propter confusionem illam humanam deseritis. Parentes & amicos obijcient quorum vel amore vel timore abducamini ab instituto prædicandi opere : At meam oppono amicitiam, meumque odium : meam cognationem, meumque diuortium, vt si quid affinitati debetur, reddatur Diuinæ potius quam humanæ : & si quid vno verbo speratur aut timetur ab hominibus, magis à Deo vel speretur vel timeatur, cuius potentia longe est maior in remunerando vel puniendo quàm in hominibus. Cito velociter reddam* <sup>1. cor. 3.</sup> *vicissitudinem vobis super caput vestrum, ait Dominus Deus. Id est, illud ipsum quod speratis vel timetis in hac vita, ego vicissim in altera paro vobis quod reddam; sed tanto grauius, quantum est pondus æternitatis præ momentaneo & leui tribulationis humanæ & temporanæ. Quod optime nouerat sapientissimus ille inter Iudæos Senex qui ne aliquid contra religionem admitteret, Etsi in presenti tempore, inquit, supplicis hominum eripiar, sed ma-* <sup>2. Macch. 6.</sup> *num Omnipotentis nec viuus nec defunctus effugiam. Sic sapiendum, sic loquendum esset.*

### III. P V N C T V M.

**P**LV S est ergo quod Christus monet, paucis ad amicos verbis, ne terreantur, quam quod omnes mouent Inimici vt ipsos terreant. Nam quod spirituale est quodue attingit animam, plus est quam quod spectat solum corpus; & quod æternum ac Diuinum est, longe ante illud quod solum est temporale & humanum, duci debet. Quid est autem quod proponunt aduersarij siue vt blandiantur siue vt terreant, quid est aliud quàm temporale aliquid, quàm caducum & euanidum gaudium aut cito desitutum tormentum? Quid vero Christus opponit nisi quod sempiternum, nisi quod ipsius animæ bonum vel malum spectet in omnem æternitatem? Ne ergo, inquit, timueritis eos: nihil enim est opertum quod non re- <sup>Matth. 10.</sup> *uelabitur: & occultum quod non sciatur: Id est, vt interpretatur sanctus Hilarius, licet modo non appareat quod dico, apparebit tamen suo tempore, & tùm videbitur quam nulla & inania fuerint qua con-* <sup>Matth. 24.</sup> *tra fiunt aut dicuntur. Sic sæpe aliàs, Videte ne turbemini. Nolite* <sup>Luc. 21.</sup> *terreri; Non turbetur cor vestrum neque formidet. Cui & cohærenter* <sup>Ioan. 14.</sup>



Phil. 1.

Apostolus. *Tantum digne Evangelio Christi conuersamini: Collaborantes fidei Euangelij, & in nullo terreamini ab aduersariis: quæ illis est causa perditionis, vobis autem salutis.*

Non prohibetur sensus timoris qui non est in nostra potestate, sed ne ultra sensum timor abeat, ne quid in nobis efficiat quod fidelitati ministerij nostri aduersetur, ne desistamus propterea conuertendis animabus, fidei propagandæ, & Veritati propugnandæ. Vel ne timeamus omnino, vel magis timeamus Deum quàm homines, & bono timore malum expellamus vt ait Sapiens: *Qui timet Dominum nihil trepidabit & non pauebit. Hoc vnum timeamus,* aiunt Sancti, *ne quid vehementius quàm Deum timeamus.* Hoc vnum in malis timendum est, ipse malorum timor. Et qui nimis humana timet mala, non satis timet, quia non timet Diuina & æterna quæ longe magis timenda sunt.

Ecclesi. 34.

Greg. Nyss.  
scas.

Quod præclare admodum & sentiebat & loquebatur sanctus Franciscus Xauerus, qui literis ad Prouincialem Lusitaniam datis scribit in hæc verba de suo in Iaponiam itinere: *Obstupefunt studiosi mei omnes, & amici, quòd tam longinquum ac periculosum suscipere iter non verear. Multa mihi tempestatum, Syrtium, Piratarum pericula proponunt. Cæterum haud paulò magis ego illos inuicem obstupefco quòd tam exiguam habeant Dei fiduciam cuius illa omnia in ditione sunt, & potestate. Equidem cùm Dei nutu atque imperio omnia gubernari certo sciam, NIHIL OMNINO METVO PRÆTER IPSVM DEVM; Ne scilicet de mea in suo obsequio, religionisque studio, negligentia inertiaque meritas exigat pœnas. Quocirca reliquos terrores, discrimina, arumnas, cruces, nihil admodum pertimesco. Vnum quippe timeo rerum omnium effectorem ac moderatorem Deum: quod res ceteræ, quamuis noxiæ, non nisi quatenus ille sinit, nocere hominibus queant. Et rursus ubi agit de sua in Sinas expeditione, post multa de vtriusque periculis & corporis & animi: sic concludit, Quocirca cùm hæc animi pericula longe maiora corporis periculis indicemus, satius ac tutius esse ducimus per vitæ discrimina perrumpere, quàm in discrimen adducere animi salutem. Omnino deliberatum est mihi in Sinas, Deo fauente, inuitis eius hostibus, penetrare: Nam si Deus pro nobis, quis contra nos? Magnum omnino adimus periculum; si nihil aliud, perpetuæ seruitutis. Verumtamen hæc me cogitatio consolatur, satius esse Dei causa seruiutem seruire, quàm crucis fuga, perfrui libertate.*

Ibid.

Ad



*Optabilius est bonum bellum quàm mala pax.* 473

Ad hæc quid dices qui metu vel vnus asperioris Verbi aut repulsa ferenda non audes cum peccatore congredi? Non audes manifeste peccantem arguere, vel clam monere ne peccet. *Vae dissolutis corde! Vae mihi quia taci! Vae mihi est si non Euangelizauero.* Ecclesi. 2.  
Isaia 6.  
1. Cor. 9.  
Vide Passim vbi de Fortitudine.



## S A B B A T O.

*DE MALA PACE QVAM*  
*CHRISTVS SVIS VETAT.*

*Nolite arbitrari quia Pacem venerim mittere in  
terram; non veni Pacem mittere sed gladium.*  
Matth. 10.

### VERITAS PRACTICA.

*Optabilius est bonum Bellum quàm mala Pax.*

*RATIO HÆC EST præter alias, quia optabilius est  
bellum habere cum hominibus quam cum Deo; aut pacem cum  
Deo habere, quàm cum hominibus.*

*Sed bonum bellum, bellum est cum hominibus, & Pax cum Deo:  
Mala vero Pax, Pax est cum hominibus, & bellum cum  
Deo; optabilius ergo est bonum bellum quam mala Pax. Quod  
tamen in Praxi est rarum.*

### I. P V N C T V M.

**T**ANTA res est, salus animæ, seu salutis promouenda  
negotium, vt nullis obstaculis retardari, nullis considera-  
tionibus impediri suos velit Dominus, quin semper quan-  
tum in ipsis erit, opus Domini operentur. Opponet se illis qui-  
3. Pars. Ooo



dem Mundus, sed mundo resistant oportet, & cum duobus præcipue modis sese mundus opponat, terrore scilicet & blanditiis, seu metu poenarum & affectu cognationis; contra utrumque oppositionis genus sic suos instruit ut postquam de tolerandis malis egit, statim de blanditiis superandis tractet; *Nolite arbitrari, inquit, quia Pacem venerim mittere in terram: non veni in Pacem mittere sed gladium: veni enim separare hominem aduersus Patrem suum, & filiam aduersus matrem suam, & nurum aduersus socrum suam, & inimici hominis domestici eius. Qui amat patrem aut matrem plusquam me, non est me dignus. Et qui amat filium aut filiam super me, non est me dignus.* Suntque alia plura in hanc sententiam quæ pergît Dominus, quasi diceret suis Euangelicis Operariis, Cum prædicando Euangelium videbitis Conciues, amicos, parentes & alios cognatione seu amicitia iunctos diffidere à vobis, vel inter se pugnare propter Euangelij prædicationem, Vos, ne desistatis ab opere & munere vestro; licet offendantur, licet amicitiam & pacem quæ inter vos inerat, soluant, & in odium vertant; Melius est tale odium quam mala hæc amicitia, Melius est bonum bellum quam mala Pax; Non est ista Pax quam veni mittere in terram, cum potius attulerim gladium quo discindantur istæ amicitia & illa foedera quæ sese opponunt Euangelio. Sic interlinearis glossa, *Non ad hoc, inquit, inter homines veni ut carnales affectus confirmem, sed spirituali gladio dissociem;* Et sanctus Hieronymus, *Missum est bonum bellum ut rumperetur Pax mala, Pax illa scilicet quæ vel à prædicando vel à credendo impediret & quæ idcirco dicitur mala quod tale bonum impediatur.*

Salutare profecto Monitum & quod extendi ulterius potest ad Debitum correctionis fraternæ persoluum. Sunt enim multi qui quos peccare vident, non audent arguere vel monere, ne pacem inter se turbent, maluntque eos in suis vitiis relinquere, ut se in pace conseruent, quàm si vitia corripiant, bellum quodammodo domi gerant: Sed audiant illi Christum Dominum, *Non veni Pacem mittere sed gladium;* Audiant & considerent Veritatem propositam: *Optabilius est bonum bellum, quàm illa mala Pax.* Non est quidem optandum bellum, & si fieri potest Pax cum omnibus est habenda, sed si non potest licite fieri, magis optandum bellum tamquam quid melius quàm mala Pax.

Ratio est euentissima quoad primam illam partem qua di-



citur melius esse bellum quod haberi potest cum hominibus quam cum Deo : & meliorem illam pacem quæ habetur cum Deo quam quæ haberetur tantum cum hominibus , cum præiudicio pacis Diuinæ. Hoc enim perinde est ac dicere , melius est offendere homines , siue illorum incurrere offensionem sine vlla culpa nostra , quàm culpam aliquam admittere qua quidem euitaretur offensio hominum , sed Diuina incurreretur offensa. Quis autem de hac propositione dubitare possit ? Quis Christianus nesciat , ne veniale quidem peccatum consideratione omnium omnino hominum fas esse perpetrare ? Quis nesciat illud Ecclesiastici , *Ne accipias personam ut delinquas* : Atque illud eiusdem , *Quid est* Eccli. 42. & 18. *homo , & quæ est gratia illius ? Et quid est bonum , aut quid nequam illius ?* Si videlicet comparetur cum Deo. O quam sapienter Apostoli , Principibus sacerdotum se persequentibus : *Si iustum est* Act. 4. *in conspectu Dei vos potius audire quam Deum , iudicate* : Quasi dicerent , licet recusari posset vestrum iudiciũ , quia de vobis agitur : tamen res ita est euidens quod Deo potius quam vobis parere debeamus , vt vestram de hac veritate sententiam non recusemus. Tunc contrà sentire velles ?

## II. P V N C T V M.

**S**ED bonum bellum , bellum est cum hominibus , & Pax cum Deo : Mala vero Pax , Pax est cum hominibus & bellum cum Deo.

Fieri quidem potest correptio seu admonitio cum aliqua culpa si non seruentur prudentiæ leges & circumstantiæ ; sed supponimus debite fieri , & bene correptum , malè insurgere & infringere in Corripientem ; *Non enim amat pestilens eum qui se corripit* ; Tunc sicut in eo qui corripitur malum est culpæ , sic in eo qui corripit de quo hic præcipue agitur , malum est aliquod poenæ quod dicitur bellum seu pugna & dissidium : sed bonum est bellum quia ex bona susceptum est causa , nempe ex Charitate , ex zelo , ex fidelitate quam debet suo muneri & officio qui subditum corripit aut alium sibi commissum : qua in debita fidelitate Pax cum Deo seruatur , quia sic Ille iubet , sic illi obeditur quando præceptum de correctione seruatur.

At vero mala Pax , Pax est cum illo quem ne offendas non corripis ; sed bellum est cum Deo ; peccatum est , offensa Dei



- est, Iniuria Dei est, creatura præfertur Creatori, nempe is peccator qui corripì debuerat magis timetur quam Deus qui corripì præceperat. Sic dictum Heli à Domino, *Magis honorasti filios tuos quam me.* Sic arguitur David quod noluerit, *contristare spiritum Amnon filij sui, quoniam diligebat eum.* Sic reprehenduntur Propheta molliores & palpantes vitiis. *In malitia sua levificaverunt Regem, & mendaciis suis principes? A Propheta usque ad sacerdotem cuncti faciunt dolum, & curabant contritionem filie populi mei cum ignominia dicentes, Pax Pax, & non erat Pax.* PROPHETAE tui viderunt tibi falsa & stulta nec aperiebant iniquitatem tuam ut te ad pœnitentiam pronocarent. VAE quæ consuunt puluillos sub omni cubito manus, & faciunt cernicalia sub capite universa ætatis, ad capiendas animas.
- Tu vulnus fratris tuis conternis, inquit sanctus Augustinus, tu vides perire & negligis? Pejor es tu tacendo quam ille conviciando. Rursumque Idem, *Nescio utrum Christiane amicitia putanda sunt in quibus magis valet vulgare Prouerbiū, Obsequium amicos, Veritas odium parit, quàm Ecclesiasticum, Meliora sunt vulnera diligentis quàm fraudulenta oscula odientis.* Tritum est illud sancti Gregorij sed profecto graue & serium: *Qui emendare potest & negligit, participem se delicti constituit.* Velle ne ea ipsa committere quæ tu in aliis vides? At si non corripis quando potes & debes, tu horum efficeris omnium reus & particeps; Vnde Apostolus, *Nolite communicare operibus infructuosis tenebrarum, magis autem redarguite.* Ex quibus certe patet, quantum inesse possit culpæ in illa mala Pace, & quale inde bellum cum Deo qui expresse propterea dicitur, *Deus emulator, & ulciscens Dominus: ulciscens Dominus & habens furorem.*

## III. P V N C T V M.

- OPTABILIVS est igitur bonum bellum quàm mala Pax, Cum sit optabilius bellum. cum hominibus quam cum Deo, & Pax optabilior cum Deo quam cum solis hominibus. Disce, inquit Propheta, *ubi sit prudentia, ubi sit virtus, ubi sit intellectus, ut scias simul ubi sit Pax.* Et apte Sapiens: *Melior est manifesta correptio quam amor absconditus.* VTINAM magis neminem obiurgare necesse sit, aiebat sanctus Bernardus, *Hoc enim melius,*



sed quoniam in multis offendimus omnes, mihi tacere non licet cui ex officio incumbit peccantes arguere, magis autem urget Charitas. Aptissime autem sanctus Augustinus, Phrenetici nolunt ligari, lethargici nolunt excitari, sed Charitas illam ligat, istum stimulat, ambos amat, ambo offenduntur, sed ambo diliguntur; ambo indignantur ægri, sed sanati gratulantur.

Ser. 41. in Cantica.

Ep. 167.

Et certe si vel errarent animantes belluæ, vel in foueam decidissent, essent retrahendæ, vnde est illud Deuteronomij, Non vis debis bouem fratris tui aut ouem errantem, & prateribis; & si videris cecidisse de via, subleuabis; Quanto magis si ipse frater, si domesticus si quiuus alius ceciderit & errarit? Tanta est huius præcepti commendatio vt eius commendandi finem vix vllum, Scripturæ faciant, Corripe amicum, inquit Ecclesiasticus, ne forte non intellexerit & dicat, non feci, aut si fecerit non iterum addat facere. Corripe proximum, ne forte non dixerit, & si dixerit, ne forte iteret. Corripe amicum, saepe enim fit commissio. Corripe proximum antequam commiseris: Et da locum timori altissimi, quia omnis Sapientia timor Dei, & in illa, timere Deum, & in omni Sapientia dispositio legis. Et non est Sapientia nequitia disciplina, & non est cogitatus, peccatorum prudentia; Quasi diceret, Ne putes te prudenter agere ad conseruandam pacem, si quando corripiendus est proximus, tum fileas; Non est prudentia sed nequitia & nequitia disciplina, Id est, fomentum malitiæ & peccati, quod ipso peccato peius est. Expende singula & da locum timori Altissimi, non timori hominum vel amori.

Deut. 22.

Ecclef. 19.

Si quis autem corripui noluerit, hoc ipso magis est corripiendus.

Vide in 4. parte, Feria quarta Hebdomadæ 16. vbi hæc demonstratur Veritas.





## APPENDIX, AD MISSIONES FRUCTUOSE OBEVNDAS.

Iuxta hæc Christi Domini mittentis suos, Verba :

*Euntes predicate, dicentes, quia appropinquavit  
Regnum cælorum. Matth. 10.*

QVOD Missionum Author Christus Dominus suis præcepit Apostolis ut primum dicerent, & prædicarent, hoc Ipse sibi ante præscripserat cum *cepit prædicare & dicere: Pœnitentiam agite, appropinquavit enim regnum cælorum*: Atque hoc ipsum postea septuaginta duobus Discipulis imperavit, cum illos *misi binos ante faciem suam in omnem locum quod erat ipse venturus; Dicite illis, inquit, appropinquavit in vos regnum Dei*. Diuersa quædam est Verborum forma, sed idem plane sensus: Nam regnum cælorum, regnum est Dei qui potissimum in cœlis regnat: & regnum Dei regnantis in terra siue in mentibus hominum, regnum cælorum est, sicut Gratia dicitur Gloria, cuius est semen & quoddam velut initium.

Verè autem appropinquare dicebatur hoc Regnum cum Christus venit in terras, cum cepit prædicare, prædicari & credi, quia quod antè hominibus per peccatum fuerat clausum, sic per Christi mortem proximè referandum erat, ut quotquot Christi fidem pœnitentes reciperent, cœli regno reciperentur.

Quod verò Christus prædicando dicebat, *Pœnitentiam agite*, mandavitne suis Discipulis ut prædicarent, non est quidem expressum in Scripturis, sed non est tamen dubium quin prædicauerint, cum expressè de his dicat sanctus Marcus, *Et exeuntes prædicabant, ut pœnitentiam agerent*, Quæ certa scilicet ad Cœlum via est, possidendum.

Sic itaque Christus Dominus, sic Apostoli, sic Discipuli omnes, facti sunt forma Missionum, illis qui legitima potestate vocati tam sublime, tam Diuinum opus susciperent. Sic omnibus uni-



uersim dicitur: *Euntes predicate dicentes, appropinquauit in vos regnum Dei; Pœnitentiam agite, appropinquauit enim regnum cœlorum.* Hic est Finis Missionum, qui finis est hominis conditi, qui finis est Incarnati Verbi, qui finis est Missi Spiritus sancti, qui finis est Euangelicæ prædicationis per vniuersum sparsæ mundum; *Saluamini à generatione ista praua.* Nonne hic omnium finis ut *Act. 1.* salus æterna compareretur, ut Deus regnet in nobis per gratiam, & nos tandem eum illo regnemus per gloriam?

Hunc scopum singulariter Euangelicus sibi præfigat Operarius, quo quicquid demum operetur, rectà spectet: siue plebem erudiat & primis Christianæ fidei rudes imbuat Elementis, siue Confessiones audiat, siue ex plano, siue ex superiore loquatur suggestu, siue priuatim, siue publice dicat: Cœlorum vbique regnum, æternam vbique salutem inspiret, interferat & inculcet.

Tria possent separatim ad dicendum constitui tempora, primum quo ad pueros & rudiores de primis nostræ fidei diceret principiis. Secundum quo de pietatis agatur officiis, ut orare mane & vespere, Missam audire, Confessionem instituere, Conscientiam examinare, Rosarium recitare, domestica Christianæ obire ministeria: Festos dies religiose transigere: profestos fructuose suo quemque in officio: similiaque proponere quæ vitam & mores omnium piè forment.

Tertium verò & præcipuum, quo Conscientia vehementius stimuletur ad integram & perfectam vitæ mutationem. Licet enim in quibusuis dicendi temporibus ut dictum est, salutis æternæ commendatio sit frequenter ingerenda; tamen hoc tertio tempore, tota est terenda hæc materia, tota versanda & vrgenda. Nihil aliud tunc pene sonet quam quod operosum illud salutis Negotium propius spectat, In eumque finem Missionarius paratam habeat dicendorum materiam, quæ concitandis cum Diuina gratia mentibus aptior & opportunior iudicetur, & quam diligenter præuisam, ac multum etiam atque etiam secum animo reuolutam expromat, & de sacro Christi propinet Latere.

Pendet illud quidem de delectu materiæ Iudicium ex variis personarum loci, temporis, ac nonnullis aliis quæ obuenire possunt circumstantiis: sed multa probatum est experientia, non siue fructu proponi quæ hic suggeruntur argumenta, vel ab vno



vel à pluribus simul collaborantibus pronuntiata, vel quo sub-  
jiciuntur ordine singula; vel quæ quivis pauciora delegerit, pro  
ratione temporis, quod in quaque ponetur statione; vel pro il-  
lorum captu qui dicent, & qui audient.

PRIMA CONCIO, SEV PRIMVM  
CAPVT VNDE MATERIA CONCIONVM  
DE SVMI POTEST.

Acceptandam esse libenter comparandæ salutis  
occasionem, quæ in his offertur  
Missionibus.

*Adiuuantes exhortamur ne in vacuum gratiam  
Dei recipiatis: ait enim, tempore accepto exau-  
diui te, & In die salutis adiuui te: Ecce nunc  
tempus acceptabile, ecce nunc dies salutis.*  
2. Cor. 6.

*Quomodo nos effugiemus, si tantam neglexerimus  
salutem? Hebr. 2.*

VERITAS PRACTICA.

Qui negligit, negligetur.

SENSVS ET RATIO EST, Quod qui oblatam à Deo  
salutis gratiam negligit, ab ipso etiam Deo negligetur.

Sed qui non acceptat libenter hanc modo quæ offertur comparan-  
dæ salutis occasionem, negligit oblatam à Deo gratiam.

Ergo & is negligetur: aut potius ne quis negligatur, libenter ab  
unoquoque acceptanda est hæc salutis occasio.

I. PVNCTVM.



I. P V N C T V M.

**D**E sumi posset exordium aut aliquale proëmium ex occurrenti aliquo Festo, vel Euangelio, vel quauis demum opportunitate quæ ansam daret discursui, fieretque quod ait Sapiens, *sermo opportunus, optimus*. Aut certe si nihil tale occurrat, satisque videatur ex propositis supra verbis Apostoli subiectam eruere veritatem Practicam, ac eius sensum & rationem breuiter enarrare; tum ad primam propositionem declarandam tria hæc præmittantur & exponantur. Primum quod ait S. Thomas, in omnibus Dei operibus Misericordiam & Iustitiam reperi-  
ri, præcedit Bonitas, tum Iustitia sequitur, quod maxime locum habet in his operibus quæ salutem nostram propius spectant, de quibus illud Sapientis est expressum; *Ne dicas miseria Domini magna est, multitudinis peccatorum meorum miserebitur: Misericordia enim & ira cito ab illo proximant, & in peccatores respicit ira illius; Non tardes conuerti ad Dominum, & ne differas de die in diem, subito enim veniet ira illius, & in tempore iræ disperdet te.* Prov. 15.  
1. p. q. 21.  
4.  
Eccli. 5.

Secundum inde consequens est quod ut intelligatur qualis erga quosuis futura sit Ira & Iustitia Dei, cogitandum est qualis eius fuerit erga ipsos Misericordia; nam etsi miseretur omnium, ut ait Sapiens, dicitur tamen misereri cuius vult, & misericordiam præstare cui præstiterit, id est, maiorem ac maiorem exhibere benignitatem quibus voluerit, sine cuiusquam injuria, cum sit suarum Dominus gratiarum quas potest majores aut minores impertiri quibus ipsi placuerit; Tum verò dicimus quod quando majores impertitur gratias, tunc etiam major est eius ira & iustitia. Sic idem expresse Sapiens, *Misericordia enim & ira est cum illo, potens exoratio & effundens iram; Secundum misericordiam suam, sic correctio illius.* Sap. 12.  
Rom. 9.  
Eccli. 15. Quid clarius?

Tertium quod propius propositionem nostram attingit, non tantum Ira sequitur Misericordiam, sed modus Iræ seu Iustitiæ inferendæ sequitur modum misericordiæ violatæ; Tu violasti diuinam misericordiam, oblatas ab eo salutis gratias negligendo; Tu negligis, & quæ vltiores dandæ fuissent gratiæ, recusabuntur. *Va qui prædaris, nonne & ipse prædaberis? Et qui spernis, nonne & ipse sperneris? Cum consummaueris depredationem, depredaberis.* 15. 33.



*cum fatigatus defieris contemnere, contemnérís. Sic diuina Sapiencia Se adjungit Misericordiæ & Iustitiæ, vt quomodo Misericordia est offensa, sic offendentem Iustitia puniat, dicatque de se peccator quod rex ille Adonibezec, Sicut feci, ita reddidit mihi Deus.*

*Ind. 1.*

*O sicut feci, ô ita reddidit Deus! Quale est illud sicut feci, & quale istud, ita reddidit Deus! Nempe sicut neglexit peccator Gratiam, ita Gratia peccatorem negliget; Quod certe grauius est & damnosius, quàm si qualibet alia punireris poena. Quid enim metuendum dum adsit gratia? Quid vero non pauendum si absit?*

*osae 7. & Væ eis quoniam recesserunt à me. SED & væ eis, cum recessero ab eis!*

*2.*

## II. PUNCTVM.

**S**ED qui non acceptat libenter hanc modò qua offertur comparanda salutis occasionem, negligit oblatam à Deo gratiam.

Tria hîc etiam occurrunt exponenda, & tantò quidem accuratius, quantò ipsum non modo sermonis huius, sed & totius Missionis finem complectuntur plenius.

*2. Cor. 6.*

Primum est, quàm multæ, quàm magnæ, quàm salubres modo gratiæ vobis omnibus offerantur ad salutem comparandam. Licet enim nunquam desint, tamen fatendum est cum Apostolo quædam esse magis accepta tempora quibus maiora salutis subsidia prouideat Deus, & quibus ipse plenior adjungat gratiam; qua de re discursus erit integer proponendus: Tantùm hîc modo breuiter dico, quòd quæ duo maximè faciunt ad salutem, Verbum Dei, & Sacramenta, nunc vobis offeruntur tam facili & efficaci modo recipienda, vt nullus sit qui non intelligat diuina fauente gratia quid sit sibi agendum, & qui non velit id agere dum modo velit intelligere. Parui & magni, rudes & capaces, serui & Domini, egentes & locupletes, viri ac fæminæ: Patres & filij, ægri & sani; laborantes & otiosi; omnes cum diuina ope, omnes simul & seorsim, quod suæ cuique proprium est ætati, capacitati, conditioni & statui palàm & particulatim audient, intelligent, capient, possidebunt, & quod ait Propheta: *Pascentur agni iuxta ordinem suum.* Nullus est tam paruus & rudis ad quem nos non demittamus: nullus tam implicatus negotiis cui nos non accommodemus: nullus tam cupidus salutis quem non expleamus saluberrimis dictis: nullus tam multis onustus vitiis & peccatis quem non subleuemus;

*17. 5.*



nullus tam inordinata vitæ cui non ordinem statuamus, siue ad præterita restauranda in melius, siue ad præsentia dirigenda fructuosius, siue ad futura præcauenda sapientius. Debitores nos facimus omnium, vt quod commendabat princeps Apostolorum S. Petrus: *Vnusquisque nostrum sicut accepit gratiam in alterutrum illam administremus, sicut boni dispensatores multiformis gratia Dei.* 1. Petr. 4.  
*FIDUCIAM autem talem habemus per Christum ad Deum, non quod sufficientes simus cogitare aliquid à nobis quasi ex nobis, sed sufficientia nostra ex Deo est, qui & idoneos nos fecit ministros Noui Testamenti.* 2. Cor. 3. Cum ad hoc præsertim Nos miserit, vt quod est Sacri Euangelij magis necessarium scitu & factu, vobis annuntiemus. Hoc est enim esse Missionarium, esse Operarium Euangelicum, esse ita præconem Euangelij, simul & Regni Coelorum, vt prædicando Euangelium, operetur quodammodo regnum coelorum, id est, sic Euangelicè prædicet, vt qui prædicantur, compuncti corde veniant & dicant sicut primi Christiani ad Apostolos primò prædicantes. *Quid faciemus viri fratres? O singularem gratiam!* Act. 2.  
*ô verba vitæ æternæ! ô me beatum si ita loquar! ô vos felices, si hæc ita sentitis.*

Secundum quod illustrandæ propositioni seruiat, sic oblatam hanc vobis putatote salutis occasionem, vt non fortuito casu oblatam, sed singulari Diuinæ nutu prouidentia præuisam & procuratam existimetis; ac propterea Christum Dominum sua particulatim merita Patri suo obtulisse, quibus mihi & vobis, mihi ad dicendum, & vobis ad audiendum, certas obtineret & conferret gratias quæ multis aliis denegantur. Quod enim in actis Act. 16. Apostolorum legitur vetatos esse Diuinitus loqui eos Verbum Dei quadam in parte Asiæ, sed potius irent in Macedoniam: hoc penè cunctis euenit Euangelicis Operariis, vt cum etiam primò cogitarent aliquò proficisci: Tum miro derepente casu fieri, vt aliò vel adducantur, vel mittantur. Vnde admirabundus Propheta, *Qui sunt, inquit, isti qui vt nubes volant?* Nempe vt est in libro Is. 60. Iob, *Sicut nubes lustrant per circuitum, quocumque eas voluntas gubernantis duxerit, ad omne quod præceperit illis super faciem orbis terrarum, siue in vna tribu, siue in terra sua, siue in quocumque loco misericordie sue, eas iusserit inueniri:* Sic plane de Diuinis Operariis sentiendum, de quibus circa quandam orbis partem sic ipse ait Iob. 37. Deus; *Nubibus mandabo ne pluant super eam, imbrem.* Vnde & Is. 6.



quando nubes pluunt, quando præter solitum Missi sunt qui matutinum & serotinum fundant imbrem, Ille Ille est qui tam verè tum mandat nubibus ut ibi pluant, quam qui mandat ne alibi pluant.

Tertium denique ac præcipuum quod aduertatis est, nisi hanc libenter acceptetis occasionem salutis quæ à Deo vobis offertur, nisi quod vestrum est, efficiatis; nisi Veritatis Euangelicæ quæ vobis exponetur, sitis fidelissimi cooperatores ut S. Ioannes loquitur: Plane illud de vobis affirmabitur quod de inuitatis ad regias nuptias: *Illi autem neglexerunt*, Nam oblatam Diuinitus gratiam negligetis. Quid enim aliud vos auertat quàm contemptus? Cum enim tria duntaxat soleant à piis institutis animos minùs feruentes auocare, *Labor, Iactura, Dedecus*, aut si quid simile: nihil horum trium occurret quod vos deterreat. Non labor, nam neque longas preces, nec continuata ieiunia, neque procul remotas peregrinationes proponimus; Tantùm adeste nobis dicentibus quo vobis erit commodius tempore. Non iactura cuiusquam rei, neque enim quidquam à vobis nec pro victu, nec pro labore, nec pro ipsa etiam gratitudine postulamus: nam quæ est Dei gratia & Nobilium quarundam Personarum insignis charitas, impensis omnibus abunde prouisum est, nullis ut prorsus essemus oneri. Non est timendum denique probum vllum aut dedecus si quod iam agitis, pergatis agere paulo frequentius quandiùm vobiscum erimus. Quid restat itaque quod vos à nobis aut ab ipso Deo se vobis offerente auocet nisi negligentia, nisi contemptus, nisi quædam salutis incuria, & Diuini cultus fastidium, propter quod Deus tam vehementer expostulat & queritur se contemni & negligi: *Filios enutriti & exaltati, ipsi autem spreuerunt me!* Deum sperni! expendite hoc: Et à vobis, à filiis sperni carissimis, & quo tempore præsertim, cogitat de vobis in suum regnum promouendis! Ista omnia contemptum valde augment. Sed quid tandem, quid inde sequitur?

### III. P V N C T V M.

1f. 33.

**V**AE qui spernis, nonne & ipse spernèris? Nonne hoc ita pridem conclusum est, nonne hoc iam ante pronuntiatum est, nonne hoc euidenter ex præmissis propositionibus sequitur?



Nonne qui oblatum à Deo salutis gratiam negligit, meretur à Deo negligi? Nonne hæc est salutis gratia quæ modo vobis offertur, & quam nisi libenter acceptetis, nihil aliud dici potest quam quod oblatam gratiam negligatis? Nonne hæc sunt probata omnia? Quid ergo aliud expectetis quam ut aliquando etiam ab illo quem negligitis, negligamini, sicut expresse ait, *Et ego neglexi eos, dicit Dominus, dicit de præterito iam se neglexisse, quia futurum tam certum est quam si iam esset præteritum; vel certe sicut iam Deus neglexit eos qui se neglexerant, sic prorsus idem futurum de omnibus. Quod ne cui esset dubium, atque ut omnes intelligerent quid esset à Deo negligi: Sapien-* Hebr. 8.  
*tia, inquit Sapiens, foris prædicat, in plateis dat vocem suam, in capite turbarum clamat: Conuertimini ad correptionem meam: En proferam vobis spiritum meum, & ostendam vobis verba mea. Quia vocavi & renuistis: extendi manum meam, & non fuit qui aspiceret, despexistis omne consilium meum, & increpationes meas neglexistis: Ego quoque in interitu vestro ridebo, & subsannabo, cum vobis id quod timebatis aduenerit, cum irruerit repentina calamitas, & interitus quasi tempestas ingruerit, quando venerit super vos tribulatio, & angustia: Tunc innocabunt me, & non exaudiam, mane consurgent, & non inuenient me, eo quod exosam habuerint disciplinam, & timorem Domini non susceperint, nec acquieverint consilio meo, & detraxerint uniuersa correptioni meæ. Quod & rursus per Prophetam repetit: Ego eligam* Prou. 1.  
*illusiones eorum, & quæ timebant, adducam eis; quia vocavi & non erat qui responderet. Quæ certe verba si minutatim expendantur mirum quantum possint in quousvis auditores. Parumne scilicet, censeretur quod tam aperte minatur Deus se tum magis deserturum eos cum magis vellent adiuuari? Se tum irrisurum & subsannaturum eos cum magis serio diuinam inclamabunt opem? Hoc est scilicet, hoc est à Deo negligi cum vel hora mortis, vel graui necessitate premente, non illud præbet auxilium quod non negasset nisi neglectus, nisi offensus esset: sicut de Antiocho legitur: Orabat scelestus Dominum, à quo non esset misericordiam consecuturus.* Is. 66.  
*Quis vellet sic se à Deo negligi? Et tamen id tam certo futurum his est qui oblatam à Deo salutis occasionem & gratiam negligent; quam certum est Scripturam hoc dicere, & quod Scripturæ dicunt, ita esse.* 2. Micch. 9.

Quamobrem vnicuique vestrum libenter dicerem quod Dauidi



2. Reg. 24. quendam Prophetam Gad, ut habetur in libris Regum: *Trium tibi datur optio, elige unum quod volueris*: Vel te negare Scripturas quas  
 1. Par. 21. audiisti; Vel te à Deo negligendum: Vel te præsentem hanc salutis occasionem non neglecturum. *Nunc ergo delibera & vide quem respondeam ei qui me misit, sermonem*. Visne à Deo negligi? Vis negare Scripturas? Nolles scio, nolles. Ergo ne negligas quod offertur. Nam si negligis, iterum dico, tam certo negligèris quam sunt certæ Scripturæ quæ id dicunt. Sic oportet nos premi, sic coarctari, quia si timemus nescio quid in salute procuranda; timorem hunc grauiori timore pellamus, neque tantum in illis qui rem oblatam negligent, consideranda est boni quo se priuant iactura, sed etiam mali periculum quod incurrunt, ut nisi bono pelliciantur, malo deterreantur.

Liceat itaque mihi concludere quod olim Moses, in re paræ:  
 Dent. 30. *Testes inuoco hodie cælum & terram, quod proposuerim vobis vitam & mortem: benedictionem & maledictionem. Elige ergo vitam, ut & tu viuas. NO LITE negligere, nolite cessare*, Verba sunt sacra Scripturæ, *Filij mei nolite negligere*; Sic vitam hanc præsentem discitis instituere, ut æternam vobis possitis comparare.

## SECUNDA CONCIO, SEV CAPVT SECUNDVM CONCIONVM.

De Indulgentiis quæ solent in Missionibus  
promulgari.

*Præbete corda vestra, & animas vestras, ut queratis Dominum Deum vestrum.* 1. Par. 22.

## VERITAS PRACTICA.

Tam raræ sunt indulgentiæ, quàm frequentes.

*SENSVS EST, Quod multæ quidem aliàs, & frequentes proponuntur indulgentiæ; Sed rari sunt & valde pauci qui*



propositum in illis lucrum referant, nisi diligenter aduertant, quod iam docebitur aduertendum.

RATIO EST, Quia nulla est indulgentiarum plena & integra participatio, nisi sublata omni culpa.

Sed rari sunt qui omnem tollant culpam, sicut modo tollenda docebitur.

Ergo & rari & pauci qui propositum in indulgentiis referant lucrum; Ac propterea diligenter modo attendendum quod de fructu reportando dicendum est.

I. P V N C T V M.

**Q**UOD Sacris quibusdam Locis ac Temporibus religiosius aliquando colendis concedi solet ab Ecclesia, vt tum celestes aperiantur Thesauri & quæ vocantur Indulgentia proponantur omnibus comparandæ: hoc ipsum nostris hisce conceditur Missionibus, quo tempore, quibus & in locis celebrentur, hoc ipsum inquam, Indulgentiarum lucrum ac meritum omnibus qui quod suum est non neglexerint, exhibetur. Tanta est Missionum dignitas ac præstantia, vt quidquid est ad salutem in Ecclesia copiosius & opportunius, abunde his suppeditetur quo sic magis ac magis colantur, celebrentur, frequententur, quasi modo nobis quod olim diceret Sapiens & Propheta: *Comparete vobis sine argento, & collum vestrum subijcite iugo. VENITE, properate, emite, & comedite; Venite, emite absque argento, & absque vlla commutatione vinum & lac:* Id est, quæ magnis & paruis prosint, sine vllis vestris impendiis, ac multis etiam cum vitæ commodis. Ecclesi. 31.  
15. 55.

Verum, quæ nostra est socordia, sic prauè affecti sumus, vt quantumcumque res quæ proponuntur sint salutare & commodæ, si sint tamen frequentes & obuiæ, negligantur aut parui fiant: sic fieri modo posset vt quia multis aliis in locis ac temporibus lucra hæc spiritualia frequenter exponuntur, iam minoris æstimarentur nec suo pondere ac pretio ponderarentur. Idcirco particulatim hunc de indulgentiis sermonem instituimus, vt vel tali fastidio remedium aliquod afferatur, vel intelligant vniuersi non tam frequentes esse indulgentias quàm putentur.



Frequentes quidem sunt, sed rari admodum qui lucrum inde reportent, vel quia nesciunt, vel quia nolunt id agere quod ex sua cuique parte necesse est, & quod si modo perceperitis, sperandum est cum Dei gratia, vos vobis non defuturos.

Hic itaque declarandum suscepimus quid sit, quod cum sat frequentes sint indulgentiæ, sint tamen rari qui plene illas lucrentur, ut cum eius rei causam & rationem audieritis, inde omnes æmulemini vehementius ut quod vestrum est in hoc negotio, & quod multum facit ad finem huius Missionis, non denegatis.

Causa porro hæc est, quod ad plenam & perfectam indulgentiarum participandam gratiam, necesse omnino sit ut omnis tollatur culpa. Rem paulo altius repetamus, & quæ sit doctrina Catholica de indulgentiis accurate inuestigemus, sicque gradatim procedamus. Primò, In omni peccato duo semper insunt, culpa & poena. Secundo, Si culpa est mortalis, poena est immortalis & æterna, quæ nunquam remittitur nisi sublata culpa. Tertio, Non sic autem remittitur poena æterna cum culpa, ut non remaneat aliqua temporalis subeunda poena, quod patet in Adamo, In Israelitis, In Dauide & aliis, *Ego autem in die ultionis visitabo & hoc peccatum eorum*, inquit Dominus. Quod & præclare sanctus Gregorius in illa Verba Iob: *Sciens quod non parceres delinquenti. DELINQUENTI Dominus nequaquam parcit, quia delictum sine ultione non deserit. Aut enim in se hoc homo pœnitens punit, aut hoc Deus cum homine vindicans percutit. Nequaquam igitur peccato parcit quia nullatenus sine vindicta laxatur. Sic David audire post confessionem meruit, Dominus transtulit peccatum tuum, & tamen multis post cruciatibus afflictus ac fugiens reatum culpæ quam perpetraverat, exoluit. Sic nos salutis unda à culpa primi parentis absolvimur, sed tamen reatum eiusdem culpæ diluentes absoluti quoque adhuc carnaliter obimus. Bene ergo dicitur, sciens quod non parceres delinquenti, quia delicta nostra siue per nos, siue per semetipsum referat, etiam cum relaxat.*

Quarto, Poena illa temporalis varia est pro varietate & gravitate peccatorum; Sed vel vnius peccati etiam venialis est gravissima, quod patet ex poenis purgatorij, ex pœnitentiis sanctorum, ex poenis illatis à Deo propter levia quædam peccata, quale illud Davidis de numerato populo, propter quod septua-

ginta



ginta virorum millia, peste sublata sunt : & Moſis de quodam animi dubio cum ex petra deducenda fuit aqua, propter quod ingreſſu terræ promiſſæ fuit prohibitus : & Mariæ ſororis eius quæ propter murmur aliquod, foediſſimam contraxit lepram at- que ex humano per ſeptem dies diſiuncta eſt conſortio. Vnde & patet vnumquemque pauco tempore reum eſſe grauiffimæ pœnæ.

Quinto : Atque in hac quidem vita poſſent hæ pœnæ ſolui, ſi in gratia vel libenter & patienter ſumerentur, ſed ex noſtra impatientia fit, vt ex his pœnis noua peccata emergant potius quam vetera diſſoluantur : ſicque ia dies crefcat reatus noſter, & Illud in nobis fiat quod Propheta de Iſraelitis dicebat : *Ephraim factus eſt ſubcinericius panis qui non reuerſatur.*

*Oſee 7.*

Sexto, Iam verò per Indulgentias plenarias & verè participatas tollitur illa omnis pœna temporalis, nempe applicantur nobis merita Chriſti, Beatiffimæ Virginis, & Sanctorum ex Theſauro Eccleſiæ cuius clauēs traditæ ſunt ſummo Pontifici, & poteſtas abſolutè data ſoluendi omne quod ligat, & quod impedit ingreſſum coeli. Cum itaque pœnæ ſoluendæ impediunt illum Ingreſſum, tam certum eſt poteſtatem eſſe datam ad tollendas illas pœnas, quàm certum eſt, datam eſſe ad id omne tollendum quod impediret ſalutem & beatitudinem. Illa autem ſolutio pœnarum fit pro Indulgentiam, id eſt, per gratuitam relaxationem quæ nobis communicatur à ſummo Diſpenſatore theſauri qui eſt in Eccleſia, conflati ex meritis ſatisfactoriis Sanctorum omnium. Sicut ſi quis ex pecunia ſibi data in aliquod bonum opus, liberaret Incarceratum; ſicut nos noſtris ſuffragiis liberamus animas de Purgatorio. Hæc eſt Communicatio & Communio ſanctorum de qua in Symbolo Apoſtolorū, & de qua Illud Apoſtoli uſurpatur; *Gaudeo in Paſſionibus pro vobis, & adimpleo ea quæ deſunt Paſſionum Chriſti in carne mea, pro Corpore eius quod eſt Eccleſia.*

*Coloſſ. 1.*

Quibus ita præmiſſis & apertè declaratis, quod hic præcipuè inculcandum eſt, Nulla eſt prorsus Indulgentiæ participatio, niſi prius remittatur illa culpa cuius pœnæ datur Indulgentia; ſicque numquam eſt in effectu Indulgentia plenaria, niſi præcedat plena culparum omnium remiſſio; Nam quandiu manet Culpa, manet ſemper pœna. Poſſe quidem culpa tolli vt diximus ſine pœna; ſed numquam pœna ſine culpa quam



sequitur semper & indiuisè velut umbra corpus; vt supra visum est, & videri præterea potest D. Thomas 1. 2. q. 52. a. 4. vbi de triplici genere poenæ peccatum consequente; Ac tandem terminabitur primum istud punctum, concitato in peccatum odio, quod tale est malum vt numquam non sit malum auctori, vnde est Illud Archangeli Raphaelis: *Qui faciunt peccatum & iniquitatem, hostes sunt animæ suæ.* Qua de te plura Concione de malis peccati mortalis.

Tob. 12.

## II. P V N C T V M.

**S**ED pauci tollunt omnem culpam, sicut tolli debet.

Nam vt tollatur omnis culpa, debet omnis tolli affectus circa quoduis objectum inordinatus; qui sicut non esset culpa, nisi esset voluntariè inordinatus, sic non est inordinatus, nisi sit culpa. Neque aliter definitur vitium quam inordinatus appetitus, à quo si tollas hanc inordinationem, transibit vitium in virtutem; sed nisi etiam tollas, remanebit semper vitium & peccatum, atque vt ait Iob, *Vsq̃ue ad Inferos peccatum illius.*

Iob. 24.

Hinc Scriptura cum ad poenitentiam nos adhortatur: *Conuertimini*, ait, & *agite poenitentiam ab omnibus iniquitatibus vestris, & non erit vobis in ruinam iniquitas.* Projicite à vobis omnes prauaricationes vestras in quibus prauaricati estis, & facite vobis cor nouum & spiritum nouum. Quid est facere sibi cor nouum, nisi omnem inde penitus tollere vitij vetustatem, & prauam habitudinem, quoad voluntarium scilicet, qui à nobis eum gratia pendeat, affectum animi: quam cordis ac spiritus nouitatem Græcus Interpretes optime vertit cum verba Christi *poenitentiam agite* sic vno verbo reddit μετανοείτε, quasi diceret mentem vertite, à prauo in rectum vertite ordinem, nulla resideat inordinatio, nulla intus culpa remaneat.

Ezech. 18.

IAM verò quam pauci sint qui sic mentem vertant, quis non videt? Quis diuitias non eodem semper affectu diligit? Quis honores non eodem prosequitur impetu? Quis vno verbo, vitæ præsentis commoda non eodem procurat animo quo ipsam curat vitam? *Filij hominum usquequo graui corde?* BEATVS diues qui inuentus est sine macula, & qui post aurum non abiit, nec sperauit in pecunia & thesauris: quis est hic, & laudabimus eum? Quasi di-

Ps. 4.

Ecclesi. 31.



ceret, valde est rarus. Quæ tota huius puncti doctrina fufius declaratur in i. parte, Dominica quarta Aduentus, vbi hæc Veritas exhibetur:

Licet omni peccatori fit neceffario pœnitendum, vix tamen vllus est qui neceffariam agat pœnitentiam.

Quia videlicet vix vllus est qui tollat inordinatum rei affectum, quæ est caufa peccati, & qui nifi tollatur, nulla est peccati remiffio, nulla peccatoris pœnitentia, nec conuerfio.

### III. P V N C T V M.

**P**ATET igitur quod erat demonftrandum, quàm rare fint indulgentie, licet frequentes proponantur, Seu quàm rari fint qui propositum ex illis fructum & Lucrum referant, quia nempe peccati pœna quæ per indulgentiam tollenda erat, non tollitur nifi sublata culpa; culpa vero non auferitur nifi affectus vnde processit, fuerit ordinatus, quod tam rarum est quam quid rariffimum. Non est qui hoc faciat bonum, non est vique ad vnum.

Atque hinc tria fequuntur ad praxim valde opportuna. Primum est, non effe fastidiendas aut negligendas quæ modo proponuntur, indulgentias, quod aliàs seu frequentes proponantur: Nam audiuitis quanta fit fructus raritas in illa frequentia, meritòque vobis fit timendum, ne quid vniquam Lucri & commodi tanto ex thesauro reportaueritis: sperandum verò his diebus non ita cassum & inanem futurum vestrum laborem, quia diligentius & acuratius de his omnibus instituendi estis, quæ ad tantum boni participandam gratiam requiruntur.

Secundum autem obseruandum est; quod qua ratione audiuitis non effe sublatam peccati pœnam, audiuitis simul non effe sublatam culpam: quid porrò inde fequitur nifi nullas fuisse vestras Confessiones? Nam si bonæ ac probatæ fuerint, certe sublata est culpa: aut si culpa remansit, profectò nullæ fuerunt: remansit autem culpa si affectus non est sublatus vt dictum est, & quam fit probabilius affectum non fuisse sublatum, satis superque est declaratum, vnde videtis quanta fit neceffitas excutiendæ diligentius conscientiæ, nec non in internos nostros affectus penitius inquirendi.



Tertium, ne in tanto negotio mollescat aut terreamini, quasi sit supra vires opus, quasi nil supra quàm factum est, possitis agere, *Ecclesi. 2.* *Metuentes Dominum sustinete misericordiam eius*, Bonus est timor, sed spes simul iungatur. Tantum adeste nobis frequentes & attentì, nec dubito per Dei Gratiam, quin quod suis dicebat Apostolus, *Rom. 6.* *Habebitis fructum vestrum in sanctificationem, finem verò vitam æternam*. Hoc est quod ipso dicendi dicebam initio: *Præbete corda vestra & animas vestras ut queratis Dominum Deum vestrum*. Hoc vnicum à vobis petimus, non collectas, non pecuniam, non munera; sed propensas in salutem voluntates, voluntariâ frequentiam & facilem animi docilitatem in his audiendis quæ deinceps suggerentur.

*Isti sunt dies quos observare debetis*, Dies Critici, dies ex quibus reliqua pendet vita, imò & ipsa quanta quanta esse potest æternitas. Sunt enim dies non minus diligenter observandi pro salute animi, quam dies Critici pro sanitate corporis. Quod breviter quidem docetur in 2. parte, in die Pentecostes ubi agitur de peccato in Spiritum sanctum: Fusius verò Dominica Palmarum, quæ omnino videri debet ad hunc fructuosè discursum concludendum, vel in alium integrum differenda est Veritas, quæ de diebus Criticis, illic proponitur.

### CAPVT TERTIVM CONCIONVM.

DE NEGOTIO SALVTIS, QVOD POTISSIMVM  
AGITVR LN HIS MISSIONIBVS.



TEST applicari discursus vel vniuersim ad curam adhibendam suæ salutì quamdiu hîc viuatur: vel particulatim ad hanc salutis procurandæ quæ offertur occasionem.

Scripturæ verba ex occurrenti tunc Euangelio desumi possunt, vel à Christo Domino: *Pœnitentiam agite, appropinquauit enim regnum cælorum*: Vel ex Apostolo: *Cum metu & tremore vestram salutem operamini*. *Matth. 4.*  
*Phil. 2.*

Scopus dicendi sit: firmiter persuaderi, nullum esse negotium quod tantam à nobis exigit curam & sollicitudinem in omnibus, quàm salutis negotium.

Ratio est, quia quædam sunt circumstantiæ in omni negotio



quarum consideratione plus vel minus curæ ac sollicitudinis est adhibendum.

Sed nullum est negotium in quo illæ circumstantiæ reperiuntur tam graues & potentes ad curam exigendam in omnibus, quam salutis negotium.

Ergo & nullum est quod tanta cura & diligentia sit procurandum: quod tamen omnino non fit, imo & nullum est quod minus curetur.

Vide in hac 3. parte, Dominicam 8. ubi in persona Villici totus hic discursus fusè declaratur. Adjungi possent quæ ibidem sequuntur Veritates, ad hæc verba: *Redde rationem villicationis tuæ*, vel differri, cum de quatuor nouissimis post agatur.

Et verò videri debet, in 2. parte, Dominica 2. post Pascha, quæ ibi declaratur Veritas:

Quod æstimatione speculatiuâ nihil quidem pretiosius nobis est animâ, seu salute animæ: sed Practicâ nihil vilius.

## CAPVT QVARTVM CONCIONVM.

De præjudiciis Saluti oppositis, vnicuique particulariùs applicandis, & diligentius præcauendis.

*Intrate per angustam portam, quia lata porta & spatiofa via est quæ ducit ad perditionem, & multi sunt qui intrant per eam. Matth. 7.*

### I. P V N C T V M.

**I**X memoratis superiori Concione capitibus, quæ salutis vestræ negotium quàm sit præ cæteris graue & momentosum ostendunt, nullum est vehementius, & ad finem huius Missionis aptius, quàm quod *Præjudiciu* dicitur, quo de sa-



lute nostra sic actum esse indicatur, vt non sit quidem desperata salus quia remedium adhuc superest : sed nisi diligentius quam antehac prospiciatur, vix spes vlla restet. Quâ certe consideratione quid potentius, quid acutius ad stimulandam animam vt vel serò tandem at serò, quantumque necesse est, attendat & prouideat. *Expergiscimini ebrij & flete*, ait Propheta.

Ier. 1.

Facit hoc vero vel maxime nostram hanc ad Missionem, cuius cum finis sit, ad Poenitentiam & veram animi conuersionem cum Diuina Gratia nos inducere, quid opportunius, quàm certum nosse periculum in quo versetur, nisi certò conuertamur? *Va tibi Moab; peristi popule Chamos?*

Ier. 48.

Cum sint autem multa illa præiudicia, seu cum possint variis exponi modis, non sufficit illa breuiter attigisse, sicut suprâ tentatum est, sed & modo, & pluribus consequenter enarranda res est sermonibus, nullum vt vestrum lateat, quantum sua nunc interlit, vbi de extremo salutis suæ periculo videt agi: *Saluate animas vestras*. Sentisne Peccator indurate quam sint hæc aculeata verba?

Ibid.

Ad hunc itaque finem & scopum vt omnes intelligant, quàm deplorando in statu iaceat suæ salutis negotium, atque vt inde libentius velint emergere, Quod primum hodie proponitur, duplex est illa Via quam Christus in Euangelio demonstrauit, vna lata & spatiosa, quam multi etiam ex Christianis incedunt, & omnes pereunt : altera verò arcta quam pauci tenent, & qui soli saluantur.

Stupenda certe res est, & quam nisi diuina Veritas edoceret, vix credi posset; sed tanta firmitate nos ea de re certos esse Christus voluit, vt in totâ Euangelicâ quæ ad mores spectat doctrinâ, vix aliud & verbo & sensu expressius habeatur. Non enim solis contentus verbis rem euidenter aperit, sed adjuncto etiam admirantis & stupentis animi quodam signo, tantam esse demonstrat multitudinem eorum qui pereunt, & tantam eorum paucitatem qui saluantur, vt Ille Ipse qui nihil admiratur, nonnisi tamen mirabundus de hac paucitate loqueretur.

*Intrate, inquiebat, per angustam portam, quia Lata porta & spatiosa via est quæ ducit ad perditionem, & multi sunt qui intrant per eam? QVAM angusta porta & arcta via est quæ ducit ad vitam! Et pauci sunt qui inueniunt eam; Ac rursus apud alium Euangelistam,*



querenti cuidam si pauci sint qui saluentur, sic respondit: *Contendite intrare per angustam portam, quia multi dico vobis, querent intrare & non poterunt*, id est, quotquot per aliam querent intrare quam per angustam portam, non poterunt ad salutem intrare, & qui etiam neglexerint intrare per angustam portam, quando cum gratia facile poterant, querent intrare postea, nec ita facile poterunt: dicentque cum illis stultis Virginibus, *Domine, Domine aperi nobis: at ille respondens aiet, amen dico vobis, nescio vos, vigilate itaque quia nescitis diem, neque horam*. Vigilate ad gratias fideliter suscipiendas, quando vobis offeruntur, aut ad susceptas vtiliter impendendas, quando se occasio dederit; nam si praesentem neglexeritis diem & hanc horam pratermiseritis, nescitis an crastinam sitis habituri.

Quamobrem unusquisque iam videat in quam ambulet via, & cum se agnorit in lata esse, tam certo se agnoscat esse in salutis periculo quam certum est illos qui per latam incedunt viam, & multos esse, & omnes perire. Quomodo autem se quis in lata esse via possit cognoscere, sic euidenter demonstratur:

*Vel te oportet in lata esse via, vel in arcta.*

*Sed si te probè noris, non es in arcta via.*

*Ergo in lata sis oportet, & ibi pereas necesse est, nisi quantocyùs inde retraharis.*

Prima propositio manifeste infertur ex verbis Domini qui nos intrare iubet per angustam portam, siue in arctam viam, *Quia* inquit, *lata porta & spatiosa via est quae ducit ad perditionem*; quae sane ratio non valeret, si tertia esset quaedam via; Nam qui nollet ingredi viam arctam, nonne Christo statim objiceret, tenebo viam quae inter arctam & latam sit velut media, quae nec arcta laborem viae contineat, nec spatiosae periculum mihi subiciat.

Hoc est scilicet quod sibi fingunt homines, ut pluribus, ac de hoc toto argumento declaratum habes in opusculo quod *lata via* inscribitur. Sed quis ausit Christi rationem in re tam seria nullam esse affirmare? Nonne hoc ipsum est quod alio confirmat symbolo dicens, *Aut facite arborem bonam & fructum eius bonum: aut facite arborem malam & fructum eius malum*, quasi diceret, non est quid medium. Quò tandem duceret media illa via? Quis esset eius terminus? Quae sententia proferenda dum cunctos Christus adultos iudicabit? Eruntne alij iudicandi, quam quos à dextris suis ipse



Matth. 25.

Iudex statuet, vel à sinistris? Eritne alia sententia præter illas duas quæ iam decreta sunt & pronuntiata: quarum altera benedictos, & altera maledictos declarat? *Et ibunt hi in supplicium æternum* inquiebat Dominus, *Iusti autem in vitam æternam*, quasi diceret, æterni duntaxat duo sunt illi termini quod duæ tendunt viæ: sicut latam, supplicium manet æternum; sic arctam, vita æterna. Si tertiam viam statuis, quære prius quod tendat, terminum: aut certè si alium indagare non potes extra illos duos qui adultis parati sunt, ne tibi tertiamingas viam: & fatere quod habet Propositio, vel te in lata vivere, vel in arcta via.

l. 2. Ep. 14.  
ad Celant.

Quod ita verum est, vt sanctus Hieronymus audenter scribat: *Omne quod agimus, omne quod loquimur, aut de lata aut de angustia via est.*

## II. PUNCTVM.

**S**ED, quæ est secunda discursus Propositio, *Si te probe noffes, & quenam sit arcta via, tu simul facile noffes in hac te via non ambulare.*

l. 27. Mor.  
c. 24.

Primò quidem est via quam pauci tenent, tu vero nonne vitam agis quàm multi viuunt in sæculo? Deinde vero, inquit S. Gregorius, *Arcta via in qua quisque studiosè constringitur, est in hoc mundo viuere, & de mundi huius concupiscentia nihil habere.* Tune ita viuus in hoc mundo? Nihilne mundi rerum concupiscis? Non voluptates, non diuitias, non honores, non alia quæ naturalem excitare solent cupiditatem? Responde: Nihilne te horum excitat ad sui concupiscentiam? Aut quam in te sentis excitatam itane reprimis, itane moderaris vt præter rationem & virtutem nihil concupiscas?

Suprà dicta  
Ep.

Hoc est enim, hoc est quod arctam facit viam, *Nihil inordinate concupiscere.* Non est exire mundo, non est esse solitarium, non Eremitam, non Monachum, non Religiosum, non Sacerdotem, non multis addictum esse ieiuniis & castigandæ carnis exercitationibus, non est hoc inquam quod arctam designat viam: Sed quocumque viuendi genere vitam agas, *Si omni cupiditate calcata*, inquit S. Hieronymus, *soli studemus virtuti, per angustam viam nitimur.* Non aliam sancti omnes Patres producant notam quàm repressæ cupiditatis: Vnde tu quàm facile posses agnoscere



te non esse hominem qui se ita voluntarie premat & constringat, nonne tam euidenter possis nosse te in arcta non esse via?

Neque dicas te sat multis vndeque premis miseris, te domesticæ facultatis arctissimas pati angustias, te debitorum grauari onere, necnon sexcentis humanæ vitæ calamitatibus penè in dies enecari; non enim poena sed poenæ tolerantia, viam facit arctam: si libenter patereris, si necessitatem in virtutem conuerteres, si murmura, si commotiones animi, virtute Christiana reprimeres, tunc arctam posses viam incedere, sed si paupertatem odisti, non magis reprimis cupiditatem, quam si amares diuitias, nam illud paupertatis odium non nisi ex amore diuitiarum nascitur. Neque etiam dicas, te paucis contentum esse, te nihil suprâ necessitatem appetere, nihil iniustum, nihil alienum, nihil nimium: nam licet ista concederem, potest tamen nimius esse vel acquirendi, vel possidendi ardor, neque ad arctam tenendam viam ita spectatur quid velis, aut quid habeas: quam quomodo quidquam velis aut habeas. In vna scilicet cupiditate repressa, vt dictum est, tota viâ ponitur arctitudo; nihil autem spectat ad reprimendam cupiditatem quod multum aut parum habeas, sed hoc vnum, vt quidquid habeas, temperatè possideas, non cupiditate sed virtute, non in passione desideris, sed in moderatione rationis, non incitato naturæ impetu, sed Diuinæ ductu Gratia. *Tanquam aduenas & peregrinos abstinere vos à carnalibus desideriis quæ militant aduersus animam.*

Neque rursus objicias id esse rarum, id esse paucorum hominum, id esse penè ignotum: Nam hoc vltro profiteor, & hoc ipsum est quod Christus dixit, paucorum esse hanc viam; hanc Ipse notam designauit vt cum animaduertes te ex illis non esse paucis, hinc intelligeres, te in arcta non esse via. Nonne id vides? Nonne id fateris?

### III. P V N C T V M.

**Q**UID ergo inde sequitur nisi quod erat demonstrandum, te saluti oppositum ferre tecum, semper & ubique, præiudicium: te in lata esse viâ quæ ducit ad perditionem & ad interitum sempiternum?

Nam cum in ambarum alterutrâ necesse omnino sit, vitam



traducere sicut ostensum est, cumque in arcta non te contineas, vt fateris; quid superest quam te in lata esse via, teque tam certò periturum, quàm certum est Christum non errasse qui hasce duas tantum proposuit vias quarum vna vitæ, & altera mortis esset æternæ?

Nec dicas te peccatorem quidem esse, sed non ex illis grauioribus qui latam videntur viam facere. Nam hic dupliciter errare posses, quod certe est diligenter aduertendum: primo quidem quod putes latam viam esse tantum Illorum qui grauius peccent aut frequentius; Non est ita, neque hic nomine viæ tam certò intelliguntur qui actu peccant, quam qui ad peccandum sunt proni, & contractis habitibus sic affecti, vt peccatum vix deponant, in eoque moriantur; vt dicetur separato discursu fufius.

Luc. 16.

Luc. 13.

1. Cor. 5.

Ephes. 5.

Apoc. 22.

Iam vero licet aliis alia sint peccata grauiora, nonne est satis ad perditionem animæ quod quis in peccato lethifero moriatur, licet peccatum istud non sic ex grauioribus? Nonne est satis illi Diuiti qui sepultus est in inferno, quod epularetur quotidie splendide; licet in illis epulis non esset tam scelestus quam Herodes in suis, qui sanctissimum Virum Ioannem enecauit? Nonne propterea Christus Dominus cum de quibusdam occisis loqueretur: *Putatis, inquit, quod hi præ omnibus peccatores fuerint qui talia passi sunt? Non, dico vobis, sed nisi pœnitentiam habueritis, omnes similiter peribitis.* Nonne id confirmat Apostolus cum vniuersim ait de iniquis, *An nescitis quod iniqui regnum Dei non possidebunt?* Nolite errare, neque fornicarij, neque idolis seruientes, neque adulteri, neque molles, neque masculorum concubitores, neque fures, neque auari, neque ebriosi, neque maledici, neque rapaces regnum Dei possidebunt. In his certe quæ commemorat, magna est, vt vides peccatorum differentia: sicque fornicarij dicere poterant se non esse tam iniquos quam vel adulteros, vel idolis seruientes; Et tamen satis sunt iniqui vt damnentur. Ac rursum Idem Apostolus, *Hoc enim scitote intelligentes, quod omnis fornicator aut immundus, aut auarus, quod est idolorum seruitus, non habet hereditatem in regno Christi & Dei.* Sic & sanctus Ioannes audiuit è coelo quinam inde arcerentur, *Foris canes & venefici & impudici & homicidæ & idolis seruientes, & omnis qui amat & facit mendacium.* Quasi diceretur, non tantum coelo excludi eos qui grauius peccant, sed qui quo-



cunque mortali peccant, quod ante mortem non expiarint, & qui aliter sentiat, longe à vero dissentire.

Deinde vero erras quod te ex grauioribus non reputes, & quasi Phariseus dicas, *Non sum sicut ceteri hominum, raptores, iniusti, adulteri*: Licet enim istis non sis coinquinatus vitiis, fieri tamen potest ex aliqua circūstantia, vt peccatum tuum sit grauius, sitque peccatum in Spiritum sanctum vt ostendetur aliàs, iamque apparet ex illa præsumptione animi qua intumescis contra Monentem de periculo tuæ salutis, quasi sis securus, quasi nil timeas, quasi cum inferno & morte feceris pactum. Quando hoc vnum esset non est leue peccatum: *Propter hoc audite verbum Domini viri illuso- res: Dixistis enim, Percussimus fœdus cum morte, & cum inferno fe- rimus pactam.* Vide locum Prophetæ. Non quod sic loquatur pec- cator, sed qui dùm nihil timet, seque putat velut securum, sic vi- detur viuere quasi pactum fecisset cum morte & inferno, quasi non esset moriturus, vel nisi quando, & quomodo vellet & quasi non esset damnandus, quasi non esset quod timeret. *O præsumptio nequissima, vnde creata es cooperire aridam malitia & dolositate illius.* Hoc est scilicet quod alter dicebat Sapiens, *sunt impij qui ita securi sunt quasi iustorum facta habeant.* Ipsi iustiores timent, *Ipsa columna cæli contremiscunt,* tu intrepidus erecto collo tibi cælum promit- tis! Non est certius signum quo te in lata via esse pateat, & quod in ea pereas nisi quam citiùs reuertaris.

Vide in hac 3. parte, Dominica 3. post Pentecosten, vbi hæc Veritas explanatur:

Qui sibi palpat quod non longe erret, periculosius sæpe errat, quam qui aberrat longius.

## CAPVT QVINTVM.

QVAM SIT EVIDENS CONTRA ILLOS  
PRAEIVDICIVM, QVI CVPIDITATIBVS NON  
RESISTVNT, TANTA PEREVNTIVM  
MVLTITVDO, VEL TANTA  
SALVANDORVM PAVCITAS.

*Multi sunt vocati, pauci vero electi.* Matth. 20.



Videnda est in 2. parte, Dominica Septuagesimæ, vbi hæc Veritas proponitur:

Quæ causa est cur pauci salui sint, hæc in te causa est cur ex illis forte non sis.

*RATIO præsupponit quod ubi est eadem causa & ratio, ibi etiam idem reperitur effectus, quo tamquam certo præsupposito sic procedit ratiocinatio.*

*Causa præcipua cur sit tanta saluandorum paucitas, & tanta pereuntium multiitudo, est Concupiscentia non repressa.*

*Sed hæc eadem causa in te reperitur.*

*Ergo & idem omnino sequetur effectus, nisi tollas causam.*

**P** R I M A propositio tria complectitur quæ sunt sigillatim exponenda.

Primum est paucos saluari; Secundum est, non id esse referendum ad Deum, aut ad aliam causam quam ad ipsos homines qui sua culpa pereunt. Tertium, quod radix omnis culpæ & perditionis est Concupiscentia.

De primo, vide dictam Dominicam Septuagesimæ in 2. parte.

De secundo, videnda est etiam Dominica 3. post Epiphaniam in 1. parte, vbi hæc Sapientis Ecclesiastici fusa declaratur sententia: *Non dixeris, Per Deum abest.*

*Ecclesi. 15.*

De tertio, tripliciter explicari potest malum concupiscentiæ, unde perditio sequitur: Primò quod sit radix totius culpæ: Nam *unusquisque tentatur à concupiscentia sua abstractus*: Quæ primo quidem solus est motus naturalis, cui si resisteres, fieret virtus, in omni genere boni; dum verò illi libere consentitur, fit culpa seu peccatum quod tanto saepe est grauius, quanto maior est concupiscentia, ut ait sanctus Thomas, & explicatum habetur in hac 3. parte, Sabbato Hebdomadæ 14.

*Iac. 1.*

Deinde vero ex concupiscentia fit ordinariè quidam abusus rerum omnium, quæ cum sint ex se indifferentes, deprauantur à prauo vtentium fine qui secundum proprias ambulant concupiscentias: quæ de re videri debet Feria 5. post Cineres in 2. parte, vbi ad verba Domini, *Non pro mundo rogo*, explicatur hæc Veritas:



Quà late patet mundus, nihil est vspiam ita cauendum, quàm quod intus in te vno later, nempe Concupiscentia.

Denique quod extremam affert perniciem, cùm ad peccati remissionem necessaria sit omnino pœnitentia, id est, verus dolor de peccatis, vera conuersio animi, vix vlla talis est ob prauam concupiscentiam quæ sic animum peccatoris objecto peccati affigit, vt raro inde auellatur, & propterea, *Nullus sit qui agat pœnitentiam super peccato suo dicens, quid feci, vt iam ante dictum est,* Ier. 8. & post dicetur sapius.

I AM verò quæ secunda est Propositio, quod hæc perditionis causa in te reperitur, qui concupiscentiæ reprimendæ non vacas, abundè declaratur in illo dicto Sabbato Hebdomadæ 14. infra in hac parte vbi hæc exponitur Veritas:

Licet in aliis Concupiscentia sæpe peccatum minuat, in te tamen sapius auget.

Vnde tandem Conclusio, & prejudicium, Ne in tanta multitudine rapiaris cum aliis. *Vino ego, dicit Dominus, quia si fuerit Iechonias annulus in manu dextera mea, inde euellam eum, Id est,* Ier. 22. quantumcumque aliàs fuerit mihicarus & considerandus, tamen nisi resipiscat, plane cum aliis peribit pereuntibus. Caue, resipisce. *Si confiteamur peccata nostra, fidelis est & iustus vt remittat nobis peccata nostra, & emundet nos ab omni iniquitate. ECCE non* 1. Ioan. 1. *est abbreviata manus Domini vt saluare nequeat, & non aggrauata auris eius vt non exaudiat. VENITE & reuertamur ad Dominum.* Is. 59. *Quia ipse cepit & sanabit nos. Percutiet & curabit nos, &c.* osæ 6.

## CAPVT SEXTVM.

ALIVD PRÆIUDICIUM, QVIBVSVIS EX CONCVPISCENTIA VIVENTIBVS, AB IP SO IVDICE DENVNTIATVM.

*In peccato vestro moriemini.*



*Vos de deorsum estis, Vos de mundo hoc estis: Dixi ergo vobis, quia moriemini in peccatis vestris.*  
Ioan. 8.

Vide in 4. parte, Feria 5. Hebdomada 19. Necnon in hac 3. parte, Dominica 9. ubi ad Christi lachrymantis verba, *quia si cognovisses & tu*, explicatur copiose quod dixit Ecclesiasticus: *Cor durum habebit malè in novissimo.*  
Ecclesi. 33.

### CAPVT SEPTIMVM.

DE PECCATO IN SPIRITVM SANCTVM QVOD  
EST IAM COMMVNE MVLTIS, ET VNDE  
MANIFESTVM ERVITVR ADVERSVS  
ILLOS PRAEIVDICIVM.

*Vos semper Spiritui sancto resistitis.* Act. 7.

Videnda in 2. parte, Dominica Pentecostes, ubi hac plene declaratur Veritas:

Peccati contra Spiritum sanctum malignitas sic est singularis, vt multis iam peccatoribus sit communis.

### CAPVT OCTAVVM.

QVOD VNDE TIMOREM MINVIS, INDE TIBI  
MAGIS SIT TIMENDVM.

*Posuisti firmamentum eius, formidinem.* Pl. 88.

Duplex potest esse sensus, Primus quod firmamentum nostrum sit formido seu timor Dei, quod expresse ait Sapiens, *Firmamentum virtutis, tegimen ardoris, umbraculum meridiani*: Et alibi, *Si*  
Ecclesi. 34.



non in timore Domini teneris te instanter cito subuertetur Domus tua. *Ibid. 27.*  
OMNE namque virtutum edificium, inquit S. Bernardus, illico  
vergit in precipitum; si huius gratia amiserit presidium.

Alius sensus & in quo præcipue inhaerendum, hic est scilicet  
quod illud ipsum quod putatur esse firmitus ad securitatem sa-  
lutis nisi diligenter tibi caueas & aduertas, illud est vnde magis  
formidare debes. Quod certe est ad Timorem efficacissimum.  
Nam non potest esse maior causa timoris quam si dicatur id  
esse infirmius quod putatur firmitus. Atqui hoc ipsum est quod  
hic demonstramus; vnde necessario sequetur ille pavor quem  
sanctus Augustinus, dicit *omni securitate appetendum.*

*De Symbolo  
ad Cate-  
chum.*

I. P V N C T V M.

**P**RIMA propositio per se patet, & illustrari potest fa-  
miliari similitudine Illius qui cum litem haberet &  
plurimum confideret causæ suæ, si quæreretur  
quamobrem ita confideret, & tunc audiret à perito nihil ma-  
gis illi præiudicare quam illud ipsum quod in suum iactat fauo-  
rem, nonne esset quod timeret? Sic cum Iudæi nimis præsume-  
rent de Lege sibi data, hinc potius docet eos Apostolus magis  
sibi timendum. *Quicumque in Lege peccauerunt, per Legem indica-  
buntur.* Vide Romanorum secundo. Et cum Gentiles ad fidem  
conuersi contra Iudæos etiam se auderent efferre insolentius  
quod illi defecissent & in eorum Locum essent suffecti: tum  
vnumquemque Apostolus vehementissime compescebat, *Noli  
gloriari, noli altum sapere sed time.* Vide ibidem Romanorum vn-  
decimo, atque idem concludere ad propositum.

II. P V N C T V M.

**A**D secundam verò propositionem: Tria sunt præcipue quæ  
videntur firmamenta nostræ salutis seu nostræ securitatis  
de Salute; Nempe Bonitas Dei, Redemptio per Christum facta,  
& Religio Christiana quam profiteamur. Atque hæc quidem vera  
si bene intelligerentur & usurparentur. In his omnino tota est  
nostra spes & nostra salus. *Nisi quia Dominus adiunxit me, paulo Ps. 93.  
minus habitasset in Inferno anima mea.* MISERICORDIÆ DO- Thren. 3.



*mini quia non sumus consumpti.* Sic præclare semper de his sentiendum, sed non propterea tamen præsumendum, nec omnis timor expellendus, ne illa quæ sunt ex se optima & saluberrima fiant ex nobis nociua & mortalia, sicut dicebat Sapiens, *Hæc omnia sanctis in bona, sic & impiis & peccatoribus in mala conuertentur.* Quod quomodo fiat, nunc diligentius attendendum: Et primo quidem de Bonitate Dei.

Cum sit Deus bonus & misericors iam multis nos bonis præuenit, iam multa nobis condonauit peccata, iam multo tempore nos expectat ad pœnitentiam, nonne id fateris? At vero si illis non obstantibus, pergis semper illum offendere, neque serio cogitas de emendatione, nisi cum peccare non poteris, nonne ista bona quæ tibi bonus Deus præstitit te magis condemnabunt? Nonne grauius est peccare in Eum qui tam tibi bonus est, quàm si non esset ita bonus? Nonne est Infidelitas & Ingratitudo maior sic peccare in eum quem maximè deberemus diligere? Nonne est intoleranda crudelitas, ob id amicum & Benefactorem magis offendere quia amicus est & Benefactor? Nonne hoc est quod

*Amans præcipue queritur: Quem maxime diligebam, auersatus est me?* Itane velles tibi fieri? Itane te gereres cum quouis homine? Itane Deum minus vereris quàm quemlibet hominum? Audite cæli & auribus percipe terra, quoniam Dominus locutus est, filios enutriui & exaltaui, Ipsi autem spreuerunt me. Cognouit bos possessorem suum, &c. Vide Isaia c. 1. & Ier. 2. An oculus tuus nequam est, quia ego bonus sum? An diuitias bonitatis eius & patientiæ & longanimitatis contemnis? O quam aliter Sancti sentiunt de bonitate Dei. O quam bonus & suauis est Domine spiritus tuus, inquit Sapiens, sed quid inde? An offendendus? An offensam dissimulabit? Audi, vt pergit, Ideoque eos qui exerrant corripis, & de quibus peccant admones, vt relictæ malitia credant in te Domine.

Est & egregius locus Micheæ 6. suauiter & fortiter vrgendus: Audiant montes iudicium Domini, & fortià fundamenta terræ, quia iudicium Domini cum populo suo. Popule meus quid feci tibi, aut quid molestus fui? Responde mihi, quia eduxi te de terra Aegypti. Et quæ plura ibi habentur. Vide vsque ad hæc verba: Salus erit timentibus nomen tuum. Vide & Ecclesi. 5. & 16. Secundum misericordiam suam, sic & correptio illius.

In hoc valde erramus quod fingamus nobis Dei Bonitatem in



in eo tantum esse ut bene nobis velit & faciat, nec peccata puniat, aut alias peccatorum poenas exigat, quam ut aliquando fieri solet in Festis solemnioribus, illa confiteamur, & de cetero, cursum eundem liberius vitæ retineamus, quasi non posset aliter fieri. Falsum id omnino est, & hoc expresse vetitum dicere & sentire, ut sæpe nobis erit dicendum. *Non dixeris, peccavi: & quid mihi accidit triste?* Altissimus enim est patiens redditor. De propitio peccato noli esse sine metu, neque adjicias peccatum super peccatum: & ne dicas, misericordia Domini magna est, multitudinis peccatorum meorum miserebitur: misericordia enim & ira ab illo citò proxinant, & in peccatores respicit ira illius. Hæc est alioquin inordinata fiducia, quæ ut ait S. Gregorius, *Apud omnipotentem Deum vindicta locum habere potest: indulgentia verò obtinere non potest.* Hanc enim ipse arguit indulgentiam in illis Patribus qui non satis seueri sunt suis filiis, ut in Heli & aliis: Et certè quo quis est melior, eò magis in se suisque omnibus odit peccatum; & ab illa bonitate Sapiens laudat Deum quod cum sit bonus & suavis, errantes corripiat, moneat & serio alloquatur ut relicta malitia cordant in se, quasi diceret, nec aliter credant aut sperent nisi relicta sua malitia. Sicque à benefactis suis atque à sua bonitate se Ipse quodammodo excitat ad puniendos eos quibus benefecit: *Quid est quod debui ultra facere vinea mea & non feci? An quod expectavi ut faceret vvas & fecit labruscas? Et nunc ostendam vobis quid ego faciam vinea mea: auferam sepem eius & erit in directionem, &c.* Denique hoc est peccare in Spiritum sanctum sic de bonitate Dei præsumere, ut alibi demonstratur.

SECUNDVM de Christo Domino, multum quidem facit ad spem nostram, ut dictum est & plusquam dici potest; sed qui tamen inde præsidunt & in suis præsumunt peccatis, quasi securi sint quod Christus passus sit: hoc est Calvinicum, hoc est hæreticum, hoc est ab Ecclesia prorsus anathematizatum, ut videre est in Tridentino. Nihil magis pauendum peccatori nolenti se conuertere quam aspectus Crucifixi, nam hoc primum positum à sanctis inter motiua timoris. Ibi videt peccator apertissime quid sit peccatum, & quænam eius poena. *Propter scelus populi mei percussit eum. QVIA si in viridi ligno hæc faciunt, in arido quid fiet?* Ibi videt quanta sit salus æterna, quale sit bo-



num pro quo Deus sit patitur; & quod per peccatum contemnit. Ibi videt peccator quanti Deus fecerit animam ipsius pro qua dedit suam, quam tamen prodigit & mancipat Diabolo pro vna delectatiuncula, pro pecuniola, pro aliquo temporali bono! Ah probum! Ah indignitatem! Ibi Dæmon exprobrat Christo Do-

De Eleemo-  
sy. & Mi-  
seric.

mino quod refert S. Cyprianus. *En peccatorem pro quo nec alapas nec flagella accepi cui nec requiem promitto neque regnum: sed quem solum falsa pollicitatione deludo, & tamen se totum mihi tradit! Tuos tales munerarios Christe demonstra preceptis tuis monitos, &c.* Tu huius blasphemix author & causa quid dices? Quid dices Christo ex Cruce roganti te ne se offendas pro omnibus beneficiis quæ in te contulit, pro plagis, pro sanguine, pro anima, pro vita, hoc vnum à te efflagitat, *Ne me offendas.* Ego vero, dices, eo te liberius offendam quo te magis video pati. Auderesne hoc? Et hoc ipsum reipsa & opere dicis quando non definis peccare præsumendo de Christo.

Pf. 118.

*Supra deorsum meum*, inquit, *fabricauerunt peccatores*, seu vt habet alia versio *arauerunt*, id est, non me aliter tractauerunt quam si vomere & aratro carnem meam euulsiissent in sulcos: & sicut Arator ex arata terra sperat messem, ita peccantes ex poenis meis suam præsumunt salutem, quod dum faciunt me magis grauant quam dum paterer quia me priuant fructu meæ Passionis, *Iste omnis fructus vt auferatur peccatum*, Et illi magis afferunt.

Isaie 27.

S. Thomas.

Et certe grauior est priuatio finis quam eorum quæ impenduntur ad finem, vbi notandum est quod non tantum priuatur fine sed contrarij effectus est causa siue objectum, quatenus inde peccator magis obfirmatur. Atque hinc illius gemitus per

Is. 49.

Luc. 2.

1. Petr. 2.

Prophetam: *In vacuum laboravi sine causa & vane fortitudinem meam consumpsi.* Hinc illa prædictio Simeonis: *Ecce positus est in ruinam & resurrectionem multorum.* Hic Lapis & Petra Scandali de qua Is. 8. Rom. 9. & 7. 1. Petr. 2. & hinc illud Apoc. 6. *Abcondite nos ab ira Agni.* Nihil quippe terribilius, vt declaratur in 3. parte, Sabbato secundæ Hebdomadæ.

SE QUITVR tertium de professione Christiana. Magnum fane beneficium. Sed quid est esse Christianum? An solum frequentare Ecclesiam, recitare rosarium & similia quædam exercere pietatis officia? *Apertius sub tali nomine peccamus*, ait Salua-



Caput 8. Concionum. Vnde minus times, magis inde timendum. 507

nus: & sanctus Augustinus. Deprehenderis, inquit, & detegeris <sup>l. de Prou.</sup> Christiane, quando aliud agis & aliud profiteris, fidelis in nomine, aliud demonstrans in opere, non tenens promissionis tue fidem: modo ingrediens Ecclesiam orationes fundere, post modicum in spectaculis cum histrionibus impudice clamare! Quid tibi cum pompis diaboli quibus renuntiasti? Vel credis quæ de peccato dicuntur, vel non credis. Si non credis, falso te Christianum iactas, & hypocritarum te poena manet; Pars eius cum hypocritis, inquit Dominus. Quod si credis, & tamen tam libere peccas, ah manifestus contemptus. Quid! credere per peccatum offendi Diuinam Majestatem, præsentem, potentissimam, Iustissimam: & nihil plane curare! Credere per peccatum perdi omnia merita, perire coelum, perire tibi Christum: Et tamen tam facile peccare quam si nihil esset! Propter hoc, amplius accipietis Iudicium, inquit Dominus, Ille seruus qui cognouit voluntatem Domini sui & non fecit, uapulabit multis. Ah Christianus est. Sed fecitne voluntatem Domini sui? Vapulabit multis. Audiuit sacrum & concionem, Vapulabit multis, quia sciebat & non fecit. <sup>Math. 24.</sup> <sup>S. Aug. ad Catech.</sup> <sup>Math. 23.</sup> <sup>Luc. 12.</sup>

III. P V N C T V M.

**H**INC ergo patet quam vere dictum sit, Posuisti firmamentum eius, formidinem: Et quam vere magis illi timendum sit, ubi solet magis præsumere. Nam quando hoc vnum esset, ita præsumere, satis esset ad perditionem. Etiam quando tu omnium sanctorum merita solus haberes, non esset præsumendum, sed semper timendum & cauendum à peccato sicut Apostolus dicebat & sentiebat: Nihil enim mihi conscius sum, sed non in hoc iustificatus sum. Tu vero sceleribus plenus tibi arroges coelum! tu præsumas coelestem Gloriam & non timeas! O præsumptio nequissima, ait Sapiens. Hæc fuit Iudæorum perditio ut exprobrat illis Propheta: Ecce vos confiditis vobis, in sermonibus mendacij qui non proderunt vobis: furari, occidere, adulterari, iurare mendaciter. Et venistis & stetistis coram me in domo hac. Vide locum Propheta. <sup>1. Cor. 4.</sup> <sup>Eccles. 37.</sup> <sup>Ier. 7.</sup>

Denique sic Idem penitus accidet quod Amano illi superbissimo homini, qui cum se iactaret de Gratia quâ valebat apud Regem & Reginam Esther, ibi inuenit suum interitum ubi præsumebat habere meritum. <sup>Esther 7.</sup>



Lib. 20. Mor. c. 5. Caueant itaque, semperque Deum timeant & sanctos imitentur, qui vt ait S. Gregorius, *Positi inter gaudium spei & tentationis metum, confidunt & timent, confortantur & titubant, certificantur & suspecti sunt.*

---

### CAPVT NONVM.

QVOD NEC CHRISTO CREDITVR,  
NEC OBEDITVR.

Nullus est Christianus qui non credat Christum esse Filium Dei: & vix vllus est Christianus qui hoc verè credat.

Vide in 3. parte, in Festo Transfigurationis Domini, vbi hæc Veritas explanatur, offerturque Symbolum duodecim Articulorum fidei Practicæ à Christo prædicatæ cui vix omnino creditur. Additur & Decalogus, decem ipsius Christi Domini præceptorum, quibus & plane contradicitur.

---

### CAPVT DECIMVM.

QVIDQVID DE CHRISTO SE SCIRE DICANT IMPII,  
CHRISTVM NESCIRE DICENDI SVNT.

In 4. parte, Feria 4. Hebdomadæ 19.

---

### CAPVT VNDECIMVM.

CHRISTVM E COELO NOBIS LOQVENTEM NON  
AUDIRE PERICVLOSIVS EST, QVAM  
DVM IN TERRIS LOQVERETVR.

*Videte ne recusetis Loquentem.* Hebr. 12.

In 2. parte, In die Ascensionis Domini.



---

CAPVT DVODECIMVM.

NULLA NISI PRIMARIA SATIS ESSE POTEST  
CVRA DE PECCATIS EVITANDIS.

In 4. parte, Dominica 18.

---

CAPVT DECIMVM TERTIVM.

DE MALO PECCATI MORTALIS, SIVE AD  
POENITENTIAM DE PRAETERITIS, SIVE AD  
CAVTELAM DE FUTVRIS, SIVE AD  
TEMPORALES MISERIAS MITIVS  
FERENDAS.

*Scito & vide, quia malum & amarum est, reliquisse  
te Dominum Deum tuum, & non esse timorem  
mei apud te, dicit Dominus Deus exercituum.  
Ier. 2.*

Malo peccati nullum par aliud malum.

RATIO quæ alias omnes complectitur sic formari potest, quia  
quod est malum Dei, Christi Domini, & ipsius in omnem  
æternitatem, animæ, tale est malum ut par illi aliud nullum  
sit malum.

Sed peccatum, malum est Dei, Christi Domini, & ipsius in om-  
nem æternitatem, animæ.

Igitur malo peccati nullum par aliud malum. Quod profecto est  
diligentiſſime perpendendum, ad fines supra dictos.



## I. P V N C T V M.

**P**RIMA propositio breuiter expediri debet, declarando quod cum omne malum, sit relatiuum malum, id est, respectu habito ad personas quarum est malum, hinc sequitur tanto esse grauius malum, quo personæ vel plures vel digniores, vel insignius offenduntur; vel quando damna sunt plura & grauiora: Vnde Sapiens, *Malum est, malum est, dicit omnis emptor: & cum recesserit, tunc gloriabitur*, Id est, vnusquisque malum de re quapiam pronuntiat prout ad se refert rem illam de qua cum alio disceptatur.

Prov. 20.

Is 40. &  
46.

Cum verò personæ nullæ sint digniores quàm Deus in se consideratus, vel vt homo Deus, qui dicitur Christus Dominus, vel quàm Animæ nostræ Immortales ad æternam procreatæ Beatitudinem: quis non intelligat, vt quod illis est simul malum & aduersum, sit tale in genere suo malum, nullum vt illi aliud nec genere nec specie, nec indiuiduo par inueniri possit? *Et cui assimilastis me, & adequastis, dicit sanctus?* Vide Locum.

## II. P V N C T V M.

**S**ED peccatum, malum est Dei, malum est Christi Domini, & malum nostræ in omnem æternitatem animæ.

Dan. 7.

Quod cum variis explicari possit modis, tunc hic videtur accommodatior, vt sicut peccatum comparatur cum illa ferocissima bellua decem capitum quæ visa est à Daniele Propheta, sic quæcumque hic de singulorum dicentur malo, referantur ad decem capita quæ quisque dicendo possit magis aut minus enarrare, prout vno aut pluribus voluerit narrationem proferre discursibus.

Primò, peccatum dicitur malum Dei, vt est vnus Deus in natura. Secundò, vt est Trinus in personis. Tertio, vt est æqualiter Infinitus in Diuinis attributis. Quæ tria mala fusissime declarantur in hac 3. parte, Dominica prima, vbi de sanctissimo Mysterio Trinitatis, cui peccatum directè opponitur.

Esther 7.

Ezech. 15.

Quartò, malum est Dei, quo Deus præsens offenditur à vili creatura propter leuiculare commodum. *Me præsentem, in domo mea! Et violabant me propter pugillum hordei, & fragmen panis!*



Quintò, Dominationis diuinæ malum est & offensa, quatenus peccator à Domino Deo suo se subtrahit perfringendo leges eius, statuta, imperia, iura, & foedera, *Confregisti iugum meum, rupisti vincula mea, & dixisti, non seruiam.* Ier. 28

Sextò, Bonitatis & Misericordiæ Dei manifestus est in peccatore contemptus. *Etenim quia non profertur cito contra malos sententia, absque timore vllò filij hominum perpetrant mala.* Nonne si statim atque peccas te puniret Deus, Deum magis timeres? Quid est autem quod te non statim puniat nisi quia bonus est, nisi quia patiens & longanimis & multæ misericordiæ? *An diuitias bonitatis eius, & patientiæ, & longanimitatis contemnis? Ignoras quoniam* Ecc. 8.  
Rom. 2.

Septimò, Sanctitatis illius, quam præcipuo quodam cultu sancti venerantur, grauis est offensa; Nam vel peccator putat Deum peccata nostra parum vel multum odisse ac detestari. Si parum, parum est illi Sanctus Deus: *Existimasti inique quod ero tui similis?* Ps. 49. Si multum, quomodo non veretur peccando tantum exacerbare odium? En nosti quod reuera est, Deum tanto peccatum odisse odio, quanto amore amat legis aternæ rectitudinem cui peccatum aduersatur, id est, amore infinito ac simili consequenter odio, tu tamen illud odium tam facile commoues quam facile peccas! Peccas certe & grauiter in Diuinam Sanctitatem. *Va genti peccatrici, populo graui iniquitate, semini nequam, filijs sceleratis, dereliquerunt Dominum, blasphemauerunt sanctum Israel.* Is. 1.

Octauò, Sapientiam qua Deus cuncta regit & gubernat, peccator offendit, & quantum in se est, vexat, impugnat, inuertit & omni modo persequitur. Nam præterquam quod peccato suo se ab illo Diuinæ gubernationis ordine quem præfixum habebat subtrahit; quid aliud vellet aut nollet peccator, quam quod suæ lubet libidini? Quid est autem hoc aliud velle quàm quod nolit Deus: aut quid nolle aliud quam quod Deus velit? Ac tandem quid hoc totum est, sic aduersari Deo, nisi se toto Sapientiam eius & regimen velle inuertere, conturbare, dissoluere? *O plene omni dolo & omni fallacia, fili Diaboli, non desinis subuertere vias Domini rectas!* Act. 13.

Nonò, Diuinam plane peccator irridet Iustitiam: Cum enim non ignoret quantas Deus peccatori sit comminatus poenas, cum probe sciat vno solo peccato tot castigata vel Angelorum vel



hominum millia; tot vrbes, tot ciuitates, tot regna, totum denique diluuiò periisse mundum: cum in eius manu quem offendit se ita positum credat, vt si manum velle subtrahere, statim in Infernum præceps decideret, vbi sempiterno torqueretur igne; neque tamen cesset à peccato, quid est irridere Deum nisi hoc sit? Quid est quod ait Apostolus, *Deum non irrideri*, nisi quod peccatores Diuinam contemnendo iustitiam, Deum irrident qui tamen non irridetur, quia Diuinam illam aliquando sentient iustitiam.

Gal. 6.

Decimò, tale Dei malum est peccatum, vt quoddam velut deicidium dici possit: quam enim Deus habebat vitam in anima per charitatem & gratiam, plane peccato tollitur; vnde & quia simul anima moritur, idcirco à Scriptura dicitur, *Quasi romphaea bis acuta omnis iniquitas*, Id est, duplicem inferens plagam & mortem, Deo videlicet & animæ peccatrici.

Ecclesi. 21.

Serm. 3. de Resurr.

Adde quod ait S. Bernardus de propria voluntate, prout est peccati causa, *In ipsum, horribile dictu, defauit authorem, & quantum in ipsa est, Deum perimit. Omnino enim vellet Deum peccata sua aut vindicare non posse, aut nolle, aut ea nescire. Vult ergo eum non esse Deum, quia quantum in ipsa est, vult eum aut impotentem, aut iniustum esse, aut insipientem. Crudelis plane & omnino execranda malitia, quæ Dei Potentiam, Iustitiam, Sapientiam perire desiderat. Nonne hoc est, esse malum Dei?*

SE D & apertius etiã id, in Christo patebit, qui cum propter peccatum tanta sit olim passus: nunc verò magis à peccato patitur, propter has decem causas quæ sunt illi velut decem plagæ quibus mirum in modum affligitur.

Prima quæ multas continet, quia quod à pluribus olim est passus, nunc à quouis peccatore per vnum solum peccatum patitur; nam simul venditur, negatur, accusatur, flagellatur, condemnatur, crucifigitur, & moritur; vt in die parasceses in 2. parte, videri potest amplissime declaratum.

Matth. 6.

Secunda, Christus semel tantum pro peccatis olim est crucifixus & mortuus, nunc verò rursus & quoties iteratur peccatum, Vox illa vox impletur Apostoli: *Rursum crucifigentes sibi metipsum filium Dei, & ostentui habentes. O quoties repetitam plagam!*

Tertia, sic volebat olim pati propter peccatum, nunc vero tam inuitus



inuitus à peccato patitur, quam inuisum est illi quoduis peccatum. *Quæ nolui elegerunt.*

1f. 66.

Quarta, tot abundat bonis Christi Passio, vt inde quidquid gratiæ Sacramenta continent omnia, velut à fonte deriuetur: peccatum autem mera est malitia, mera malignitas, & ipsa desolationis abominatio, Cuius imago quædam fuit euersio ciuitatis Ierusalem. Cumque is patientis Christi fructus & finis præcipuus fuerit vt auferretur peccatum, quid contra directius quam quod peccatum renouat? Quid contra Christum acrius & vehementius quàm si destruatur quod ædificatum voluit, aut quod destruxit, ædificetur? *Vnus ædificans, & vnus destruens quid prodest illis nisi labor?* *Quæ utilitas in sanguine meo, dum descendo in corruptionem?*

Matth. 24.

Ecclesi. 34.

Ps. 29.

Quinta, quantumcumque grauis & acerbus esset Christi patientis dolor, erat tamen dolor Christi tantum patientis secundum illam quâ solâ pati poterat humanam naturam; at vero peccatum sic Diuinam ipsam petit & offendit naturam vt si Diuinitas pati & mori posset, per peccatum moreretur, vnde quàm vere dixit Christus, *Pater maior me est*, tam verè magis diligit & colit Patrem quàm seipsum, ac proinde & magis etiam ex consequenti dolet suum Patrem offendi per peccatum, quàm se per crucem cruciari.

Ioan. 14.

Sexta, quod erat Christo patienti valde iucundum, sic Deo Patri reconciliare homines, hoc illi ex opposito plurimum graue ac molestum in peccato quod perpetratur, sic homines ab offenso desungi Deo. *Iniquitates vestra diuiserunt inter vos, & Deum vestrum.*

1f. 59.

Septima, si gloriosum Christo fuit, vt certe fuit, *Per mortem suam illum destruere qui habebat mortis imperium, id est Diabolum*, quod expresse refert Apostolus: Nonne hanc Christo peccator tollit gloriam, qui peccato suo, sui totum imperium reddit Diabolo, quod Christus eripuerat? Et quid Christo magis ignominiosum quam sui loco videre in anima tua regnantem Dæmonem aut ipsum audire hostem sibi exprobrantem, quod nihil passus pro te quem possidet, neque regnum habens coeleste quod tibi vmquam promittat, facilius tamen ille te possidet quam ipse Christus! O probrum! ô malum Christo Domino, si quod à nobis esse potest malum!

Hebr. 2.



Octava, quid ingratius & acerbius potest accidere Benefactori munifico quam illius ingratitudo cui beneficium contulit, quando præcipue tanta ingratitudini conjuncta est impietas ut ex collato beneficio fiat audacior ad ipsum Benefactorem suum liberius offendendum? Vix inter homines tanta reperitur immanitas: At vero illa est frequentissima quam Christo peccator exhibet. Nam primo quidem cum Christus pro eximio illo quo nos atiecit Redemptionis beneficio, nihil magis à nobis desideret, quam ne peccemus; Potestne quis peccator esse, & non esse ingratus? Quid quid enim reddas, nisi quod velit Benefactor & quod possis, reddas, ingratus es. Deinde verò si de salutis periculo peccatorem Conscientia forte stimulet, nihil esse periculi dicet peccator, nihil quod metuat: quia videlicet Christus est passus, & patiundo peccatorem redemit. Nonne hoc ipso peccatur audacius, nonne propterea minus timetur, nonne idcirco projectus in omne crimen curritur? Nonne hinc denique peccati contra Christum immanitas & sæuitia manifeste apparet? Sic apte Sapiens, postquam monuit: *Gratiam fideiussoris ne obliuiscaris, dedit enim pro te animam suam*, tum consequenter addit: *Repromissorem fugit peccator & immundus. Bona Repromissoris sibi ascribit peccator, & ingratus sensu derelinquit liberantem se!*

Nona, cum Christus moreretur, certo sciebat se quantocyus resurrecturum, *Quia*, inquit, *ego pono animam meam ut iterum sumam eam. Et potestatem habeo ponendi eam, & potestatem habeo iterum sumendi eam. Hoc mandatum accepi à Patre meo.* At vero cum in corde peccatoris moritur, quandònam ibi resurget? Forte numquam, aut nonnisi tardissime, vel nisi quando peccatori placuerit, post multas Christi se offerentis repullas & neglectas gratias.

Decima ex illis Christi verbis colligitur, *hoc mandatum accepi à Patre meo*, nempe illud erat quo quidquid ageret & pateretur, ita condiebat, ut quo magis pateretur, tanto se magis gauderet pati, quod ita pateretur ex mandato Patris, ut nobis exhibenda Deo similiter daret exempla obedientiæ. Nunc verò in peccato cum videat oppositam omnino peccantis inobedientiam, quantam illi putas peccatum inferre plagam, quam vehementem, quam acerbam! Suntne hæ peccator, expectationes meæ! Nec dubium quin his sæpe à peccando verbis properantem in peccatum retardet animam; sed quod prædictis cumulum affert malis, tam



præceps in libidinem se se anima projicit, vt ipsum licet videat Christum pendentem aut iacentem, tamen non retardetur & quod ait Apostolus, *Ipsam Dei conculcet Filium.*

Hebr. 10.

Nonne diceret illam esse Romanam serui Tullij filiam & Tarquinij superbi coniugem quæ in iacentem humi Patrem imperauit rhedam suam reulientibus etiam ad tantum crimen equis, inuehi ac intrudi, vnde vico, scelerati nomen est inditum.

ATQVE hæc sunt ex multis pauca quæ peccati malum quam sit Christo graue demonstrent, vnde restat tantum exponere quam sit ipsi perniciosum animæ peccatrici, quæ decem inde damna longè infensissima, peccando contrahit.

Primum est, Diuinæ priuatio Gratia, necnon illius amicitia quæ Deum inter & animam gratiosam intererat, *Ipsi ad iracundiam prouocauerunt & afflixerunt Spiritum sancti eius: & conuersus est eis in inimicum, & ipse debellauit eos!* O quanta status animæ diuersitas quæ Deum habet amicum aut inimicum!

Secundum est, quod cum anima gratiosa tam pulcha esset in oculis sui sponsi, vt sponsus admirans illi diceret, *Quam pulchra es amica mea, quam pulchra es:* Fit vero per peccatum tam deformis, vt Ipse illi eidem cum stupore objiciat: *Quam vilis facta es nimis, iterans vias tuas!*

Cant. 4.

lev. 2.

Tertium, quæcumque sibi merita comparasset, his plane omnibus excidit: *Omnes iustitiae eius quas fecerat, non recordabuntur,* Dicit Dominus per Prophetam: & S. Cyprianus, *Hæc sunt, inquit, peccata lapsis quod grando frugibus, quod turbidum sydus arboribus, quod armentis pestilens vastitas, quod nauigiis sana tempestas.*

Ezech. 18.

l. de Lapsis.

Quartum, quidquid boni agat, nihil ad coeli Gloriam proficiet. *Etsi distribuero in cibos pauperum omnes facultates meas, etsi tradidero corpus meum, itaut ardeam: charitatem autem non habuero, nihil mihi prodest,* ait Apostolus.

1. Cor. 13.

Quintum, neque ad illa quæ ex veteribus contracta sunt peccatis debita persoluenda, quidquid facit, quidquid faciat peccatrix anima, quia cum sit ipsa mortua, mortuum & eius opus dicitur, ac nullius in æternam vitam promeriti. *Quare ieiunamus, & non aspersisti?* Vide locum Prophetæ satis amplum, necnon Ezech. 15. vbi de ligno vitis ambusto, vnde nihil fieri possit operis.

Is. 58.

Ezech. 15.



Sextum, Protectione singulari cum sibi caram animam foueret Deus; tum vero peccatricem deserit, & vel Dæmonibus vel suis mancipatam cupiditatibus abjicit. *Quare transgredimini præceptum Domini quod vobis non proderit, & dereliquistis Dominum ut derelinqueret vos?* Quasi peccatoribus diceretur, Putabatis peccando, vos vestra melius procuraturos negotia: Sed longe fallimini, cum in peccatis vestris derelinquatis Dominum, & in vestris vos Dominus derelinquat negotiis.

Septimum inde sequitur, ut quæ Dei Patris erat filia, quæ Christi Domini soror; & quæ Spiritus sancti sponsa, mox ubi peccatum admisit, fiat Dæmonis serua, captiua, ludibrium. *Respiciant à diaboli loqueis, à quo captiui tenentur ad ipsius voluntatem.* A quo enim quis superatus est, huius & seruus est. O si hæc peccator expenderet.

Octauum, qui Iustorum precibus promissit omnia, negat omnia precibus peccatorum. Etiam cum multiplicauerint orationem, *Non exaudiam, inquit Dominus.* Parumne hoc censeretur debet peccatori cui hoc vnicum videbatur restare bonum, ut oraret, & tamen ipsa eius oratio non modo nihil exorat, sed sæpe insuper transit in peccatum, ut ait Psalter.

Nonum, certissima cœli hæres erat anima cum erat in gratia quæ ius ad cœlum tradit: at cum excidit per peccatum illa gratia, cœlo etiam protinus excidit & illa sancta ciuitate procul amandatur, *In quam non intrabit aliquod coinquinatum,* Ut audiuit & retulit dilectus Christi Discipulus.

Decimum denique, quod est velut peccati centrum quod suo tendit impetu secumque peccatorem rapit, æterna est damnatio, *Mors illa secunda est quod stagnum dicitur ardens igne & sulphure.* Nam mors prima quæ multas alias continet de quibus dictum est, mors est animæ peccatoris, mors est ipsius Dei qui per charitatem viuebat in anima, mors est meritorum omnium, mors est vitæ beatæ ac æternæ; quæ mors quantumuis multiplex, vna tamen censetur quæ simul ac peccatum est, *generatur,* ut ait sanctus Iacobus: tum verò post sicut de peccato in peccatum naturali quod vocant pondere tenditur, sic de morte ad mortem, de morte prima ad secundam, quæ ratione quidem poenæ ac permanentis status vnde numquam redeatur, mors est prima grauior, sed ratione mali simpliciter dicti, mors prima grauius est malum,



nam est malum culpæ, quod est malum offensi Creatoris, poena vero tantummodo malum est creaturæ, neque tam graue censendum est puniri quauis poena, quàm poena dignum fieri. O quam vere Apostolus: *Stipendia peccati mors*, Quasi diceret, hæc Rom. 6. est merces quam peccatum suis rependit seruis. Hoc est salarium quod referunt peccatores. Hoc vno *mortis* verbo decernitur, illos omnibus priuari bonis, illos omnibus cumulari malis, quod & paucis Sapiens multa complexus, *Illos Dominus iridebit.* Sap. 4. & erunt post hæc *decidentes sine honore & in contumelia inter mortuos in perpetuum, quoniam disrumpet illos inflatos sine voce, & commouebit illos à fundamentis, & usque ad supremum desolabuntur.*

## III. P V N C T V M.

**Q**VÆ cum ita sint; Quis non videt quam sit verū, *Quod malo peccati nullum par aliud esse malum*: Cū sit malum Dei, malum Christi Domini, & malum ipsius in omnem æternitatem animæ peccatricis? Quo certe malo quid grauius, quid acerbius dici aut fingi potest? Vnde quod ait Dominus per Prophetam: *Scito & vide quia malum & amarum est reliquisse te Dominum Deum tuum*, perinde est ac si diceretur: cū tres præcipui reperiuntur modi quibus in cognitionem boni vel mali deuenitur, nempe Fides, Scientia & Experientia; tres hi modò tibi offeruntur modi quibus agnoscas quale malum sit peccatum. Nam primò cum Deus hîc loquatur, habet Fides quod certo credat: Deinde verò cū Ratio & causa cur ita sit afferatur, nonne hoc est quod euidentem facit scientiam? Denique cū ipso prope sensu damna quæ inferuntur à peccato, percipias, quid est quod experientiâ manifestius agnosci possit, quam quod de malo isto relatum est?

Quod quia maximi refert cū ad præteritæ tum ad futuræ cautionem vitæ, probe ab omnibus intelligi: propterea decem ex supra dictis colligo Capita quæ sint velut quædam Corollaria quibus vnâ simul apertius declaretur quàm sit reuera malum & amarum peccatum.

Primum est, quod quidquid de hoc malo dicant scribantue homines, vel ipsi etiam Angeli, nihil tamen satis atrox & acerbum loqui possunt quo eius exprimatur malitia, quia quidquid dixerint Creaturæ, totum finitum est, malitia vero peccati tam



prope est infinita, quam ipsa Dei Majestas quæ peccato violatur. Quamobrem sacra Scriptura non tam verbis quam rebus utitur ut hoc nobis repræsentet malum. Verba cuiuscunque linguæ satis expressa defunt: res inter vniuersas, quæ sint deterrimæ, quæ sint magis odibiles & magis execranda depromuntur ad aliquam huius mali partem exprimendam: *Vua eorum*, inquit, *vua fellis*, & *botri amarissimi*: *fel draconum vinum eorum*, & *venenum aspidum insanabile*. TAM QVAM à facie colubri fuge peccatum; dentes leonis, dentes eius, interficientes animas hominum. PROGENIES viperarum quis vobis ostendit fugere à ventura ira? VVLNVS & linor & plaga tumens. COMPTRVERVNT iumenta in stercore suo. SIMILES estis sepulchris dealbatis. NESCIS quia tu es miser & miserabilis, & pauper & cecus & nudus. Nonne his & similibus abundant Scripturæ symbolis?

Quid, quod de Deo refert quæ à peccato patitur, quæ certe nimis indigna Deo essent, nisi magis apta essent ad peccati fæuitiam demonstrandam. Tale est istud Genesis, *Tactus dolore cordis intrinsecus, pœnitet, ait, me fecisse hominem*: Sic in Psalmis: *Exacerbavit Dominum peccator, secundum multitudinem ira sua non queret. Et iratus est furore Dominus, & abominatus est hereditatem suam*.

Denique, si quantulacumque peccati possit Imago pingi, cerne substratum pedibus Archangeli Michaelis Dæmonem: Vide quàm horrenda iacet figura: quidquid Pictor aut Sculptor finxerit, minus est quam quod re ipsa est. Vnde autem putas tantum Dæmonibus indictum esse horrorem? Solius peccati est vitium, non naturæ: natura illorum erat tam decora quàm ipsius Michaelis. Tolle peccatum à Dæmone, Michaelem facis. Pone peccatum in Michaele vel quouis Seraphino, Dæmonem effecisti. Lege caput 28. Ezechielis, & videbis qualis esset Dæmon ante peccatum, quàm decorus, quàm splendidus, quàm perfectus; cùmque inde in alium plane oppositum demigrasse statum cernes, cernes in peccato quanta sit foeditas, quantus horror, quanta execratio.

Secundum quod ex dictis colligas est, nihil extra hominem, in tota rerum vniuersitate reperiri quod ipsi plus nocementi affecat, quàm ipse homo sibi per peccatum. Non si totus in te conspiret orbis, non si tota coelestium aut inferorum acies conjuraret in perniciem tuam, tantum tibi nocere possint quam tu tuo



peccato. Quid enim inferant detrimenti? Bona eripient, famam obscurabunt, corpus diuellent, vitam auferent, quid sunt hæc omnia, si pura & immunis à peccato fuerit anima? Quid sunt hæc omnia si vel cum vno peccati damno comparentur, Quod est inuisum esse Deo? Quod quia non ignorat humani generis hostis, hoc vnum quærit vt in peccatum inducat hominem. *Da mihi animas, cetera tolle tibi*, vnde cum à nobis peccatum pen- Gen. 24. deat, sicque nobis ipsi malum hoc inferamus, rectissime dicitur Tobia ab Archangelo Raphael, vt iam supra relatum est: *Qui faciunt peccatum & iniquitatem, hostes sunt animæ suæ*; sunt illi veri hostes, non alij, quia sunt illi qui sibi verè nocent. Tob. 12.

Tertium ex dictis inferendum; Licet de illo peccati malo particulatim fuerit dictum, quod in Deum redundat, & in Christum, & animam: tamen inde etiam facile colligi, quantam in res cæteras stragem edat, quod quia diuersis agitatum est supra discursibus, plura hîc reticentur, videndâque est in 2. parte, Feria 6. Hebdomadæ 1. post Octauas Paschæ: & Sabbatum sequentis ibi Hebdomadæ: nec non in hac 3. parte, Dominica 3. vbi de oue per- dita & inuenta.

Quartum est, præter illud malum quod vniuersum seu in genere dictum est de peccato: dici posse sigillatim de singulis vitiis malum aliquod particulare quod specialem vt vocant contineat malitiam, & quo singulariter offendatur Deus à Christus, ipsaque peccatrix lædatur anima. Suum enim vermen ac proprium virus habet Superbia, suum Inuidia, suum luxuria, suumque pariter cætera vitia. Quodque est ad malitiæ peccati stupendum incrementum, sic est singulis sua singularis addicta vitiositas, vt hæc tamen omni peccato sit certo quodam modo communis; nam in omni peccato superbia quædam est, quædam inuidia, quædam adulterij ac mendacij ac etiam idololatriæ species, quædam ebrietas, & quædam iniustitia, propter quam & illud usurpari possit. *Qui offendat in vno, factus est omnium reus.*

Quintum, tanta est præ cæteris huius mundi malis vel vnius peccati quantumuis parui malignitas, vt omnia mundi mala Deus possit assumere, paupertatem, ignominiam, famem, sitim, nuditatem, frigus, æstum, angores animi, metum, flagella, tristitiam atque ipsam mortem, mortem autem crucis, quo vno verbo, quidquid malorum est continetur; peccati vero vel minimi ma-



Hebr. 4.

culam, non omnino possit induere, *Tentatus per omnia pro similitudine, absque peccato.*

Sextum, etsi perdideris omnia præter gratiam, cœlum tibi certò restituet omnia perditâ. Perdideris vero gratiam per peccatum: an ita certo recuperabis? Recuperabis, inquires, si pœnituerit; Sed an certo pœnitebit? Nonne opus Gratia quæ merum est Dei donum, quam nullis vmquam demereri potes operibus, potes autem contrâ tuis peccatis sic illam offendere, sic auertere, sic prohibere, vt non modo efficacis defectu gratiæ non refurgas à peccato, sed in aliud atque aliud incidas vnde vix vmquam possis emergere.

1. 2. q. 75.  
a. 4.  
Hom. II. in  
s. 3.

Hoc est scilicet, hoc est expauendum peccati malum, vt sit vnum alterius causa & pœna; quod expressè docet D. Thomas post sanctum Papam Gregorium, cuius est valde notanda sententia, libro primo super Ezechielem, in hæc Prophetæ verba: *Si conuersus iustus à iustitia sua fecerit iniquitatem, ponam offendiculum coram eo. DISTRICTA sunt*, inquit sanctus Doctor, *omnipotentis Dei iudicia, Et qui peccatorem diu expectat vt redeat, non redeunti atque contemnenti, ponit adhuc vbi grauius impingat. Peccatum quippe quod per pœnitentiam citius non deletur, aut peccatum est, aut causa peccati simul & pœna peccati. Iusto iudicio omnipotens Deus obligatam peccatis mentem etiam in culpam alteram permittit cadere, vt qui flendo & corrigendo noluit mundare quod fecit, peccatum incipiat peccato cumulari.*

Gen. 15.

Ps. 68.

Osee 5.

1. Tim. 2.

Apos. vlt.

Quod postquam fufius allatis declarauit exemplis, sic rursus expendendum nobis proponit & Sacris Scripturæ confirmat testimoniis. *Hoc autem*, inquit, *nobis cum tremore considerandum est, quomodo iustus & omnipotens Deus cum precedentibus peccatis irascitur, permittit vt cœcata mens in aliis labatur, vnde Moyses ait, nondum completa sunt peccata Amorrhæorum. Dauid quoque ait: appone iniquitatem super iniquitatem ipsorum, vt non intrent in iustitiam tuam. Propheta etiam alius dicit: maledictum & mendacium & homicidium & furtum & adulterium imundauerunt, & sanguis sanguinem tetigit. Sanguis enim sanguinem tangit quando peccato peccatum additur, vt ante Dei oculos adjunctis iniquitatibus anima cruentetur. Paulus Apostolus ait, vt impleant peccata sua semper. Ioanni quoque per Angelum dicitur: qui nocet, noceat adhuc, & qui in sordibus est, sordescat adhuc: Vnde nunc etiam Dominus dicit, Si conuersus iustus à iustitia sua fecerit*



fecerit iniquitatem, ponam offendiculum coram eo; ac si aperte dicat, quia videre pœnitendo noluit ubi iam impingit, iusto eum iudicio deserens, ponam ei ut alibi impingat. Quod tamen Domini ponere est, nequaquam ad peccandum premere, sed nolle à peccato liberare, sicut de Pharaone dicitur, Ego indurabo cor eius. Hæc & plura sanctus ille Doctor quæ peccati prauitatem satis demonstrent.

Septimum, sed esto detur gratia resurgendi; detur Christo passo ac mortuo quod peccatum pœnitendo deleatur: quale putas illud ad peccati grauitatem indicandam, quod sit piaculum tam execrandum, nullis prorsus ut humanis aut Angelicis viribus ac meritis expiari possit; sed oporteat ipsum Diuinum sanguinem, ipsum totum simul cum vita Diuinum fundi sanguinem, ut vel vnum possit remitti peccatum, quod numquam alioquin solueretur. Quod ita verum est, ut quoties iteratur peccatum, toties illi soluendo, rursus iteranda esset Christi passio, nisi meritum suum infinitum nostris inclusisset Sacramentis, quæ fufum quodammodo renouant sanguinem, dum eius vim ac valorem applicant peccatori. Agnosce vulnus peccator, agnosce vulneris tui grauitatem; pro quo Christum oporteat quoties peccas, vulnerari.

Octauum, sine tali remedio nulla quidem peccati fieret sanitas, sed qualecumque sit remedium & qualicumque modo applicatum, nisi quod suum est peccator etiam faciat, nulla vis erit remedij, nullus Diuini valor sanguinis. Quod autem à peccatore præsertim exquiratur, dolor est super omnem dolorem, Id est, qui summus haberi possit, si non intensius ut vocant, at profecto appretiatiue, quia videlicet summum est malum quod deploratur, *Sicut fuit sensus vester ut erraretis à Deo, decies tantum, Bar. 4. iterum conuertentes requiritis eum.*

Nonum, ac verò licet pœnitenti remittatur culpa, non idcirco pœna omnis soluitur, sed luenda restat grauis, diuturna, temporalis, & spiritualis, quales leguntur in Scripturis plurimæ vel à Deo latæ, vel ab Ecclesia constitutæ, vel ab ipsis vltro assumptæ pœnitentibus, ut iam supra commemoratum est. *Ego autem in die ultionis visitabo hoc peccatum eorum, Quasi diceret Dominus, Culpam ego quidem remitto, sed pœnam eius reseruo quam statuto infligam die, vnde & statim sequitur: Percussit ergo Dominus populum: Vide supra ubi de Indulgentiis.*



Decimum, quæcumque porro pœna vel vni peccato Diuinitus statuatur, semper infra condignū est, aiunt omnes Theologi, *2. Reg. vi.* semper major est culpa quam quauis pœna. Contemplare septuaginta illa virorum millia quæ ob vnam Dauidis vanitatem occisa sunt, magna certe strages & horrendum supplicium, sed tamen minus malum quam illa Dauidis vanitas. Rex ipse Iudæorum Herodes cum oblatam à populo gloriam paulo auidius quam par erat hausisset: statim percussus ab Angelo, & consumptus à *Act. 12.* vermicibus expirauit. Numquid grauis pœna videtur? Videtur certe, sed tamen infra condignum est, & Herodis superbia grauior est eius morte. Quanta quanta denique est ipsa Inferorum aternitas vni Angelorum peccato inflicta, semper infra condignum est, nec tam grauis vniquam erit eorum pœna licet aterna, quam grauis fuit illorum culpa licet momentanea.

Expende pœnas, adi tormentorum locum, circumspice omnia: stagnum ardens igni & sulphure, vermes, & blasphemias, eiulatus, rabiem, & quidquid horrendum fingi potest: totum hoc minus vna lethali culpa.

Nouerat hoc insignis ille peccati osor Chrysostomus ad quem cum missi essent ab Imperatrice Eudoxia, qui possent expiscari quam grauiorem in vita censeret pœnam, vt in Illum foemina vindex pœnam deuolueret: *Ego*, inquit, *unum duntaxat in malis duco peccati malum*, Non paupertatem, non infamiam, non exilium, non domesticam deprædationem, non ipsam mortem: Vnde illi Emissarij domum regressi regiam, reginæ renuntiant: *Frustra terres Chrysostomum, nihil ille timet præter peccatum*. O quàm pauci hoc sentiunt! Quàm multi contra nihil minus timent quam peccatum; vbi de leui commodo agitur, de fama, de voluptate, quàm facile mentiuntur, perjurant, detrahunt, concupiscunt!

Neque vero negent se peccatum velle aut cogitare cum lucrum appetunt; Neque enim necesse est id cogitare vt peccetur, sicut nec se velle dicent damnari cum peccant: quia tamen peccato connexa est damnatio, simul ac quis peccare vult, vult & damnari; sic plane, simul ac iniquè lucrum appetis, peccas & vis peccare, quia vis illud cui peccatum annectitur, neque aliter latro vult peccatum quam volendo latrocinium, seu potius quàm volendo quidquid furatur, quidquid in rem suam trahit.



Vnde apte Propheta, *Ve qui trahitis iniquitatem in funiculis vani-<sup>15. 8.</sup> tatis, & quasi vinculum plaustrum, peccatum*, Id est, sicut funiculis trahuntur ea quæ ipsis ligata sunt, & sicut plaustro conuehantur ea quæ in se continet; aut sicut valido vinculo plaustrum ipsum ligatur & mouetur, ita peccatum illis ipsis rebus inseritur quibus ligata est anima. Quod & alius Propheta egregie: *Colligata* <sup>osee 13.</sup> *est iniquitas Ephraim, absconditum peccatum eius.* Hæc est peccati <sup>Hebr. 3.</sup> fallacia quæ incautos obdurat, & quam vt caueamus, tantopere monet Apostolus: Hæc sunt denique Monita quæ hoc Missionis tempore præsertim subministrantur, vt agnoscatis quàm parum sane hætenus quæ sunt salutis vestræ præcipua capita tractaueritis, & qua deinceps solitudine sint exquirenda. *Conuertere Iacob* <sup>Bar. 4.</sup> *& apprehende.*

## CAPVT DECIMVM QVARTVM.

### DE SEPTEM PECCATIS CAPITALIBVS VT OPPONVNTVR SEPTEM ORATIONIS DOMINICAE PETITIONIBVS.

Vide in 2. parte, Dominica 5. post Pascha. *Vsq̃ue modo non pe-  
tistis quidquam.*

In 3. vero parte fusiùs per septem ipsos dies Hebdomadæ sextæ, in quibus sigillatim vni petitioni suum oppositum capitale vitium manifestatur.

Contra hæc etiam septem vitia quomodo sit vniuersim pugnandum in septem Christi patientis stationibus, explicatur in 2. parte, in Die sancto Parasceues.

Denique quàm multa passim occurrant contra singula vitia Veritates, patere facile potest ex Indicibus cuiusque partis, quos præuidisse oportuit & selegisse, præsertim contra luxuriam, gulam, inuidiam & inde procedentes similtates, odia, contentiones quibus placandis non parua ponenda est opera, siue ex superiore suggestu, siue ex plano. Vide verbo Iniuria, Inimicitia, Reconciliatio & similia.



## CAPVT DECIMVM QVINTVM.

SICVT A PECCATO, SIC A PECCATI  
RELIQVIIS RESVRGENDVM.

In 3. parte, Dominica 15.

## CAPVT DECIMVM SEXTVM.

NISI AB OMNI CVPIDITATE VOLVNTAS, SICVT  
AB OMNI ERRORE INTELLECTVS VERE  
CONVERTATVR, VIX VLLA EST  
VERA CONVERSIO.

In 4. parte, Feria 2. Hebdom. 16.

## CAPVT DECIMVM SEPTIMVM.

QVOD VIDERIS TIBI VELLE, VELLES QVIDEM,  
SED VERE NON VIS.

In 3. parte, Feria 2. Hebdom. 12.

Cui Veritati affinis & ista est:

Frustra multiplicas medicamina, sanitas non erit tibi:  
Quod grauius in te est malum, hoc minus vis sanari.

In 1. parte, Fer. 5. Hebdom. 6. post Epiphaniam.

## CAPVT DECIMVM OCTAVVM.

SI NON AGIS QVOD VULT DEVS, HOC VNVM  
INFAME HABES QVOD RESPONDEAS,  
NOLO, NON PLACET.



Quod cum sit execrandum, multum valere potest hæc Consideratio ad integram sui conuersionem.

*In 4. parte, Feria 5. Hebdomada 18.*

---

CAPVT DECIMVM NONVM.

MAGIS TENEMVR OMNES AFFECTV, NOSTRA  
RELINQVERE, QVAM EFFECTV APOSTOLI  
VEL RELIGIOSI.

Quod certe est scitu opportunum, contra communem multorum opinionem, qua sibi falso persuadent quod docetur de mortificandis affectibus, solos spectare Religiosos.

*In 1. parte, Fer. 3. Hebdom. 2. post Epiphaniam.*

Quò hæc referri possunt ex 4. parte, Dominica 17. & sequentibus Feriis:

In leui quidem cupiditate, pars aliqua nostri cordis detrahitur: in graui vero, totum cor Deo perit.  
Verendum ne quod tibi deest ad perfectionem, desit ad salutem.

Hoc amanti cœlum paupertas est, quod amanti terram diuitiæ.

---

CAPVT VIGESIMVM.

DE QVATVOR NOVISSIMIS, AD PLENAM ET  
INTEGRAM NOSTRI CONVERSIONEM.

Mortificandis Concupiscentiis opportuna mortis memoria.

Quæ viuenti res fuit gratior, hæc fiet morienti grauior.



Vt vita mortem ordinat, sic mors vitam.

In omnibus operibus tuis memorare nouissima tuā,  
& in æternum non peccabis.

*In 2. parte, Feria 4. Cinerum.*

Adolescenti frequentius mors cogitanda quàm seni.

*In 3. parte, Dominica 15. post Pentecosten.*

Qui non est semper paratus, numquam est paratus.  
Malæ vitæ mors bona, rara est.

Qui non obseruat furem, obseruatur à fure, & capi-  
tur.

*In 4. parte, Feria 3. & 4. Hebdom. 28.*

Videri etiam debet in eadem parte, Feria 5. Hebdom. 23. de illo  
cui dictum est: *Stulte, hac nocte, animam tuam repetunt à te.*

Feria item 6. Hebdomadæ 24. vbi de Diuite Epulone & pau-  
pere Lazaro.

Tres etiam primæ Feriæ Hebdomadæ 25. vbi de Lazaro in-  
firmo, mortuo & suscitato.

## CAPVT VIGESIMVM PRIMVM.

### DE IUDICIO.

Nemo Christianus Christi iudicio condemnabitur  
nisi qui prius suo Christum iudicio condemnauerit.  
Nihil in iudicio magis est timendum peccatori, quam  
quod minus timet.

*In 1. parte, Dominica 1. Aduentus.*

Qui nimis humana timet iudicia, non satis reueretur  
Diuina.

*In 1. parte, Feria 4. Hebdom. 6. post Epiphan.*

*Redde rationem villicationis tue.*

*In 3. parte, Dominica 8. vide & 28. in 4. parte.*



CAPVT VIGESIMVM SECVNDVM.

DE INFERNO.

SIC de Inferni poenis agendum est vt quanto in earum periculo quisque versetur, aduertat. Quem in finem apta est illa Veritas quæ habetur in 1. parte, Dominica 4. post Epiphaniam:

Peregrinantis in corpore animæ majus est periculum, quàm periclitantis in naui corporis.

Quæ porro de illis poenis cogitari & proponi possint fructuosius, habentur in 4. parte, Feria 6. Hebdomadæ 24. vbi expenditur illud damnatæ animæ dictum: *Crucior in hac flamma.*

CAPVT VIGESIMVM TERTIVM.

DE COELESTI GLORIA.

TOTA est de hoc argumento Hebdomada quæ dicitur Rogationum in 2. parte, vbi ex multis hæ videntur aptiores Veritates, quæ à terrenis animos auocant, & peccatorum fibras euellunt.

CAPVT VIGESIMVM QVARTVM.

DE BONO FACIENDO CONFORMITER  
SVÆ VOCATIONI.

*Omnis Arbor quæ non facit fructum bonum excidetur.*

Matth. 7.

Cum tota Iustitia Christiana consistat in his duabus partibus, *Declinare à malo, & facere bonum.*

Quæ primam spectarent partem, sic abundantius, vt visum est hactenus, subministrari debuerunt; nunc quæ secundam breuius. Nihil est autem quod aptius indicet necessitatem & qualitatem



Boni ab vnoquoque faciendi, quàm similitudo arboris de qua fuit in hac 3. parte, Dominica 7. Vide & selige quæ ibi designantur aliunde petenda; quibus & hæc præcipue Veritas iungi potest:

Nisi diligenter aduertas, stulto labore consumeris.

*In 1. parte, Sabbato Hebdom. 2. post Epiphaniam.*

Nec aliena sunt quæcumque de recta intentione suis præfigenda operibus passim habentur: Maxime verò sunt opportuna quæ de vocatione cuique propria diligenter excolenda, Veritates continent, qualis est ista:

Salutis animæ nulla est certior certitudo quam in certo vocationis gradu attingendo.

*In 1. parte, Feria 2. Hebdom. 5.*

Cui & conformia illa sunt quæ habentur in eadem parte:

Hoc est verè laudabile, laudari ab officio.

*Dominica 2. Aduentus.*

Non aliud sed aliter.

*Die 7. Ianuarij.*

In paruis, major est serui Dei fidelitas.


*Feria 6. Hebdom. 6. post Epiphan. & vide Decembris 6.*

## CAPVT VIGESIMVM QVINTVM.

QVOD SI RVSTICI VELINT TRANQVILLE RES  
SVAS AGERE, SINT OMNIVM HOMINVM  
FOELICISSIMI: SIN SECVS, INFELICISSIMI.

*Beati sumus Israel, quia quæ Deo placent, manifesta sunt nobis. Baruch 4.*

### I. P V N C T V M.

 VID est quod dicitur in Genesi, creatis vnoquoque die distinctim rebus omnibus, Deum aspexisse suum opus & probasse tamquam valde bonum: præterquam quod de homine, quo creato nihil tale dixisse fertur, cum tamen homo sit inter



inter omnia Diuina opera magis eximium & probatum: Respondent sancti Patres & præsertim S. Ambrosius, sic sapienter & à Deo factum & à Scriptura relatum esse, vt intelligeremus sic ordinatum esse Diuinitus vt ad suum ipsi bonum de suo conferrent homines, & prout ipsi Deo subjecti essent ac rebus bene vel male vterentur, tum boni vel mali essent homines. Quod quidam Ecclesiasticus videtur innuere cum ait *Deum reliquisse hominem in manu sui consilij*, Vt quo vellet se promoueret, id est, illum fecisse liberum, & prout vere vel male sua libertate vteretur, tum de illo bonum vel malum dicendum esse. Eccles. 15.

Quod cum vniuersim de omni dictum sit homine, tum præcipue verum puto de his qui rusticam & laboriosam vitam agunt. Sæpe dubitatur & quæritur quàm sint illi præ aliis hominibus felices aut infelices. Et quantum à quibusdam putantur foelicissimi omnium, tantum ab aliis infœlicissimi iudicantur. Dicam quod sentio, & proderit audiuisse. Solutio difficultatis, & veritatis enodatio pendet à vobis ipsis. Si Rustici velint tranquillè vt iam docentur, res suas agere, sunt illi omnium hominum foelicissimi; sin contra viuant aliter ac instruuntur, sunt infœlicissimi.

Ratio est valde consideranda, & multum facit ad finem nostrum qui totus eò spectat vt iam vos omnes in bono cum Dei Gratia confirmemini. Sic autem clare procedit ratio: si qui sint homines censendi foelicissimi, sunt illi maxime qui securius ad æternam possunt tendere Beatitudinem: Aut illi contra sunt infœlicissimi qui per multos labores ad æterna tendunt supplicia.

Sed tales sunt præ cæteris omnibus, si velint Rustici: Nam & possunt si sibi attendant, ad æternam securius tendere beatitudinem; & nisi sibi attendant, per multos ipsi labores ad æterna tendunt supplicia.

Ergo & ipsi si velint sunt omnium foelicissimi vel infœlicissimi.

Prima propositio satis quidem per se clara, clarius tamen intelligetur, si præmittatur, quod est certissimum, non esse nostram in hac vita positam foelicitatem vel infœlicitatem. Quia præterquam quod bona & mala huius vitæ non sunt mere bona nec mala, sunt ita breuia & transitoria, si maxime comparentur ad æterna, vt nihil sit in rebus creatis tam caducum & fragile quo



vita ista non sit fragilior, fugacior & incertior, vt fufe habetur in 2. parte, Dominica 3. post Pascha, vide accuratè.

Atque hinc fit vt si quid veræ foelicitatis aut infoelicitatis esse possit in hac vita, totum ex alia deriuetur & pendeat; prout scilicet tutius & securius ad æternam perducet foelicitatem, tum illud dicendum erit foelicius: aut certe si ad sempiterna trahunt supplicia, tum illud infoelicius merito recensendum, si præsertim illud fuerit laboriosum & difficile quo quis in æternum perit. Nam à miseriis ad misérias tendit quod certe est miserrimum, & illud est deploratissimum quod illi gemunt in Inferno qui dicunt, *Lassati sumus in via iniquitatis: ambulauimus vias difficiles.* Qua de re videndum est in 1. parte, Sabbatum Hebdom. 2. post Epiphaniam, nisi iam dictum sic, & res per se patet quoad vtramque partem; cur enim beati dicuntur pauperes vel qui lugent, aut qui persecutionem patiuntur, nisi quod ad æternam sic tendant Beatitudinem? Cur contra *Va diuitibus* intentatur cum videantur diuites omnium foelicissimi, nisi quia non spectatur hæc vita, sed alia cuius ratione censendum est quid sit foelicius aut infoelicius. Nam si tantum spectaretur hæc vita, *Miserabiliores sumus omnibus hominibus*, inquit Apostolus. Quis autem dicat illum Apostolum miserabiliores fuisse; aut quis alio neget sensu quam quia de foelicitate aut miséria iudicari non debet ex huius ratione vitæ? *Non contemplantibus nobis quæ videntur, sed quæ non videntur; quæ enim videntur, temporalia sunt, quæ autem non videntur, æterna sunt.*

## II. P V N C T V M.

**S**ED si Rustici velint tranquille res suas agere prout modò docentur, securius tendunt ad æternam beatitudinem: aut contra si sibi non attendunt, per multas illi misérias ad plures & grauiores tendunt.

Nam primo quid securius quam non habere obstacula quæ mundani habent, & habere adjumenta quæ vel illi non habent vel quibus vtì nolunt? Nonne sunt magnum salutis obstaculum sollicitudines illæ mundanæ, quæ dicuntur spinæ suffocantes Verbum Dei? Nonne his verò carent Rustici qui suis contenti rebus hoc vnum satagunt vt quod ipsi possunt & debent diligenter



operentur : quod autem extra suam est potestatem non continent, non ambiunt, non expetunt ? *Vae mundo à scandalis ? Vae* Matth. 18.  
*tibi Corozain ? Vae tibi Bethsaida*, Id est, vrbibus & vrbis qui habent quidem sua salutis adjumenta, sed tot habent curarum & negotiorum etiam implicamenta, vt his quodammodo inuoluantur, obruantur, & ad quolibet salutis monita, funestum illud respondeant, *Non possum venire, habe me excusatum.* Luc. 14.

Non est, non est secura salus in talibus curis, *Inuenimus eam in* Pf. 121.  
*campis sylue*, Vnde & in Canticis, *Egrediamur in agrum, commoremur in villis*. Ibi tam continuus & innocens labor est, vt vix de vlla re alia cogitetur; Ne vero nimis etiam de terrenis cogitetur, nunc admonentur omnes, rectum labori suo finem præfigere, nempe vt Diuinam exequantur voluntatem quæ sic de ipsis statuit vt vitam laborando agant, qua recta semel formata intentione, quidquid agunt, meriti locum habet & tantò majoris ac certioris meriti supra vrbanos, quanto non partem aliquam, sed totam ipsam vitam laborando & Diuinam exequendo voluntatem traducunt.

Hæc dilatarì debent fufius, declarando quanta insint bona in bene occupato viuendi genere. Bene autem dicitur occupari quando ex vna parte necessitas illud vrget, & ex alia Pietas necessitatem in virtutem commutat, vt quidquid necessario fit, liberè propter Deum fiat. O foelicem in tali libertate necessitatem ! ô beatam in tali necessitate libertatem.

Sic verè adimpletur quod ait Sapiens : *Vita operarij sufficientis* Ecclesi. 4.  
*sibi, condulcorabitur, & in ipsa inueniet thesaurum* : Quibus in verbis quæ duo sunt ad foelicitatem valde opportuna, iucunditas & utilitas, continentur ; vnumque hoc requiritur quod maxime Rusticis commendatur, vt sint suis contenti, non murmurent contra Deum, non inuideant aliis, non præsumant, non desperent de Diuina bonitate : hæc est enim vita operarij sufficientis sibi, vnde alia duo fluunt, dulcedo & thesaurus ; dulcedo vitæ, dulcedo solitudinis, dulcedo conscientie, dulcedo pietatis : Thesaurus vero Gratiarum, meritorum & virtutum : humilitatis & patientie, Charitatis & obedientie Christianæ.

Siue enim quis lucretur aliquod temporale seu perdat, ex vtroque perinde proficit ad spiritualem profectum, nam vtrumque perinde à Domino accipit, & in vtroque Deum perinde



laudat, sicut æque reuera est laudandus in omnibus; & quanto frequentius abundant mala, tanto abundantior est meritum thesaurus qui colligitur ex illa docilitate animi, quæ necessitatem ut diximus in virtutem commutat: Sic, *Non quæsitæ Cruces sunt magis exquisitæ*, In 2. parte, & 2. Hebdom. Passionis.

Hom. 25.  
ad Pop.

Sic præclare sanctus Ioannes Chrysostomus: *Si iacturam*, inquit, *audientes non tumultuemur, sed dicamus, Benedictus Deus: multo plures Diuitias inueniemus. Non enim tantum lucrabitur in pauperes, diuitias distribuens, & circumiens ut egenos inueniat, quemadmodum ipse per hoc Verbum lucrificet: unde & Iob magis miror*, Et quæ plura prosequitur manifeste ostendere plus Iobum meruisse, patienter perdendo, quam misericorditer dando pauperibus quod habebat. Non sic impij, non sic in mundo impij, qui vel ex lucro magis intumescunt & superbiunt; vel ex iactura magis deprimuntur & murmurant proficientes in peius ex omnibus.

2. Tim. 3.

Iob. 4.

Sic itaque Rusticani securius possunt si velint ad æternam contendere Beatitudinem, verèque illis singulatim quod filio suo dicebat Tobias, dici potest. *Noli timere fili mi, pauperem quidem vitam gerimus, sed multa bona habebimus si timuerimus Deum & recesserimus ab omni peccato, & fecerimus bene*, Quod scilicet ex quotidiano vitæ vlu faciendum venit.

Sap. 17.

QVOD si vero nolint sic bene agere, tunc ex multis & magnis miseriis in plures & majores dilabuntur; Nam si suum libenter propter Deum non operantur opus, vel nihil agunt vel nisi repugnantes laborant: quis autem non videat sat magnam in utroque miseriâ? Quid facies in egestate si non seminas in hyeme? Nonne paupertate & fame premèris: si autem repugnanter seminas & laboras, quoties ad votum non pluit aut serenum est: si tum murmuras si tum infrendes contra Deum, nonne sic miseram vitam agis? Nonne sic peccas, nonne sic peccando viam tibi paras ad illas grauiiores misérias quæ numquam desinent? Nonne de his miseriis dici potest quod ait Sapiens de tenebrosa nocte quam patiebatur Ægyptij, *Imago tenebrarum quæ superuentura illis erat?*

### III. P V N C T V M.

AC proinde ut concludamus, nonne sic ergo manifestè patet quod si vellent Rustici tranquille & Christiane res suas age-



re, possent esse omnium qui viuunt foelicissimi: vel certe si non sibi attendunt, infelicissimi, propter rationem allatam quæ sic ipsos confirmare debet ad indefessam suæ salutis curam, vt omnem prorsus excludat excusationem, si secus faciant.

Quid enim melius desiderare possunt quàm ipsam beatitudinem, quæ se ipsis offert in illis quotidianis laboribus quos habent exantlandos, si tantum velint ipsos labores ad illam referre beatitudinem? Quid autem facilius? Quid propius? *Mandatum hoc quod Deut. 30: ego precipio tibi hodie non supra te est, neque procul positum, nec in cælo situm vt possis dicere quis nostrum valet ad cælum ascendere vt deferat illud ad nos, & audiamus, atque opere compleamus, neque trans mare positum vt causeris & dicas, quis ex nobis poterit transfretare mare, & illud ad nos vsque deferre vt possimus audire & facere quod præceptum est: sed iuxta te est sermo valde in ore tuo, & in corde tuo, vt facias illum.*

Non enim petuntur ab illis ieiunia, preces & eleemosynæ quas non possint persolvere, sed hoc vnum, vt quod agunt, Christianè agant: non quali Paganus animo qui non aliam expectat vitam, sed quali Baptisatus debet qui professus est se rebus omnibus mortuum, vt soli Christo solique cælo viueret. *Non te seruire feci in 1s. 43: oblatione, nec laborem tibi præbui in thure.* Deus est ipse qui loquitur. *Reduc me in memoriam & indicemur simul, narra si quid habes vt iustificeris.*

Quod vnum narrare possunt Rusticani, paupertas est & miseria quam patiuntur; Sed hoc vnum est quo beati esse possunt si velint illam tranquillè pati, aut quo miseres euadent nisi tranquillè patiantur. Velint nolint, patiendum est; at nonne fatius sic velle pati vt sis beatus quàm vt sis magis miser? Si malè patiendò beatus esses, aut si desineres esse miser, forte aliquid excusare posses; sed cum è contra sic te miseriorem reddas, neque aliter beatus esse possis quàm si bene & Christianè pati discas, nonne est quo exciteris ad hanc rectam viuendi normam?

Nihilne pro summo Deo qui te tam multis præuenit beneficiis: nihil pro Christo tam multa pro te passo; nihil pro tot commissis à te peccatis, nihil pro euitato inferno, nihil pro cælo possidendo vis pati? Tune solus sine palma in cælo, vbi teste Diuo Ioanne *Apo. 7: Beati omnes suas habent in manu palmas?* Quid pateris nisi quam gemis paupertatem? Quod bonum aliud agis opus? Tolle hanc



Hic. 5.

à te patientiam, quid boni restat operis? Aut quidquid boni referre possis, quale istud erit ad illam vitiosam impatientiam qua totam inficis vitam? *Patientes igitur estote fratres*, ait sanctus Iacobus, *usque ad Aduentum Domini. Ecce agricola expectat pretiosum fructum terra, patienter ferens donec accipiat temporaneum & serotinum.* Id est, quod pateris Agricola pro terrena ratione, hoc ipsum patere pro coelesti, discè à teipso patiente, bene pati. Non aliud suadetur tibi patiendum quam quod pateris, sed bene ut patiaris tibi ipse persuade à teipso qui iam persuasus es pati. Sic enim pergens concludit sanctus Apostolus, *Patientes igitur estote & vos, & confirmate corda vestra, quoniam Aduentus Domini appropinquauit. Nolite ingemiscere fratres in alterutrum, ut non iudicemini.* Quasi diceret, tantum abstinete à queruloso gemitu, ab impatienti murmure, à reluctanti contra labores animo, ut sit labor vester fructuosus, non poena dignus, sed prämio, non prämio tantum temporali, sed aeterno quod Christus conferet.

Non putes verò te bene semper excusatum, cum dicis, non putabam.

*In 3. parte, Feria 3. Hebdom. 8.*

His multa passim affinia reperias, de patientia, de nullis excusationibus, de necessitate in virtutem conuertenda, & similibus.

### CAPVT VIGESIMVM SEXTVM.

QVO MINVS POTES REDDERE QVAECVMQVE  
DEBES, EO MAGIS DEBES REDDERE  
QVAECVMQVE POTES.

*In 3. parte, Feria 2. prima Hebdomade.*

### CAPVT VIGESIMVM SEPTIMVM.

SI VIS QVOD NON HABES, DA QVOD HABES.

*In 1. parte, Dominica 2. post Epiphaniam.*



---

CAPVT VIGESIMVM OCTAVVM.

AFFECTVM PROBAT EFFECTVS.

*In 3. parte, Feria 2. Hebdomada 9.*

---

CAPVT VIGESIMVM NONVM.

DVM LVCET, AMBVLANDVM : NE TENEBRAE  
F I A N T.

*In 1. parte, die 5. Ianuarij.*

Quo longius differes, difficultatem difficilius tolles.

*In 1. parte, Feria 2. Hebdom. 4.*

Si quid videtur difficile quod Christus dixit, hoc ipso  
redditur facile, quod Christus dixit.

*In 3. parte, Feria 5. Hebdom. 5.*

---

CAPVT TRIGESIMVM.

VERBUM DEI NON REDIT VACVVM, AVT PROSIT  
NECESSE EST RECIPIENTI, VEL OBSIT.

*In 3. parte, Feria 2. Hebdom. 8.*

Melius erat viam Iustitiæ non introisse, quàm re-  
troisse.

*In 2. parte, Feria 5. Hebdom. 4. post Pascha.*

In occurrentibus Festis diebus, siue Dominicis, seligenda sunt  
illa quæ supra dictis capitibus magis conuenient.

---

QVOD si Missionibus præsens interesset Episcopus vel ipsi  
Missionarij Patres Illum in visitanda Diocesi comitarentur, siue



præcederent ad instruendam plebem de Sacramento Confirmationis, quod esset administraturus; tunc circa hoc Sacramentum triplex Sermonis genus posset institui.

Primum familiare de his quæ ad Sacramentum recipiendum magis necesse est scire & facere, quales sunt isti articuli.

1. A septennio quotquot non sunt confirmati, debent se cum Diuina Gratia paratos exhibere ad Sacramentum recipiendum cuiuscumque sint sexus & conditionis.

2. Non est huius quidem Sacramenti tanta necessitas & obligatio sicut Baptismi & Pœnitentiæ; qui tamen illud contemneret, vel ita negligeret vt nollet omnino suscipere, quasi non illo egeat; peccaret grauiter.

3. Scire debent omnes confirmandi, prima saltem Mysteria nostræ fidei quæ continentur in Symbolo quod dicitur Apostolorum: Necnon præcepta Decalogi & Ecclesiæ, ac nonnulla alia quæ solent pueri discere & orare.

4. Confessos esse oportet antequam suscipiant Sacramentum aut saltem esse in Gratia.

5. Ieiunos esse decet si mane administretur Sacramentum.

6. Paratum habeant Linteum seu vittam qua frons inuncta cingatur.

7. Patrimum eligant aliquem seu Susceptorem, diuersum ab eo qui fuit in Baptismo, & qui sit iam confirmatus; inter quem & confirmatum, atque huius parentes intercedit affinitas spiritualis.

8. Sint confirmandi flexis genibus, iunctis manibus, & religiosè compositi.

9. Intentionem forment conformem Sacramento, non vt illud tantum voluntariè suscipiant, sed eo fine quo institutum est, vt paulo post dicitur, nolendo quidquam oppositum, & id omne volendo quod in animis nostris potest efficere ad Christi Domini Gloriam, & suscipientis salutem.

10. Denique Sacramentum hoc magnificent, & quanta sit eius dignitas libenter audiant, vt se illi totos affectu & effectu conforment.

SECUNDVM est dicendi genus quod de hac possit haberi materia, modo paululum cultiori, declarando dignitatem Sacramenti per quatuor eius causas.

Prima



Prima est quæ dicitur Sacramenti materia, nempe oleum & balsamum ab Episcopo prius benedictum & singularæ quadam reuerentia consecratum, tum simul mixtum ac dictum Chrisma siue vñtio qua frons confirmati solennitur illinitur. Hinc autem Sacramenti dignitatem sanctus Cyprianus, & alij Patres apte deducunt, quos inter Isidorus Hispalensis sic egregie: *Chris-matis vñ-  
guentum Moyses primum in Exodo iubente Domino composuit & consu-*  
*dit, quo primi Aaron & filij eius in testimonium sacerdotis & sanctitatis*  
*peruncti sunt. Deinde quoque & Reges eodem Chrismate sacrabantur,*  
*vnde & Christi nuncupabantur sicut scriptum est, nolite tangere Christos*  
*meos. Eratque eodem tempore in regibus & sacerdotibus tantum mystica*  
*vñtio qua Christus figurabatur, vnde & ipsum nomen à Chrismate di-*  
*ctum est. Sed postquam Dominus noster verus rex & sacerdos æternus à*  
*Deo Patre cælesti, mystico unguento est delibutus, iam non soli Pontifi-*  
*ces & reges, sed omnis Ecclesia vñtione Chris-matis consecratur, pro eo*  
*quod membrum est æterni sacerdotis & regis. Ergo quia genus regale &*  
*sacerdotale sumus, ideo post lauacrum ungimur, vt Christi nomine cen-*  
*seamur. Quid hac dignitate sublimius?*

In die Cane  
Dom.  
l. 2. de Ec-  
cles. Offe-  
c. 25.

Secunda causa est Forma quæ in his Verbis ad Episcopo confir-  
mante vsurpatis continetur: *Consigno te signo Crucis, & Confirmo te*  
*Chrismate salutis: in nomine Patris, & Filij, & Spiritus sancti.* Quasi  
diceretur Confirmato: Tu singulari per hoc Sacramentum signa-  
culo consecraris & Confirmaris in filium & seruum Dei. Tu  
impresso quodam in animam charactere, seu quadam velut ex-  
pressa nota designaris in domesticum & quoddam quasi pecu-  
lium Dei ac Christi. Licet abessent cætera, tu hoc nomine, tu  
ratione huius Sacramenti, specialiter ad Christum spectas, vt fit  
ille tuus, & tu Illius totus. Tu illum colas, ille te saluum & bea-  
tum faciat: Cuius initi foederi pignus quoddam & vinculum est  
ipse Spiritus sanctus qui effuse propterea sese confirmato com-  
municat.

Sic luculente sanctus Ambrosius: *Repete quia accepisti signacu-*  
*lum spirituale; Spiritum Sapientie & intellectus, Spiritum consilij at-*  
*que virtutis, Spiritum cognitionis atque pietatis, Spiritum sancti timo-*  
*ris, & serua quod accepisti. Signauit te Deus Pater, confirmauit te*  
*Christus Dominus, & dedit pignus Spiritus in cordibus tuis, sicut Apo-*  
*stolica lectione didicisti; Nempe ex secunda Corinthiorum, capite*  
*primo. Et rursus alibi. Sicut in Christo morimur vt renascamur,*

De his quæ  
iniciantur  
Mysterijs.  
c. 7.

I de Sp.  
sancto, c. 6.



ita etiam Spiritu signamur ut splendorem atque imaginem eius & Gratiā tenere possimus, quod est utique spiritale signaculum. Nam et si Spiritu signemur in corpore, veritate tamen in corde signamur, ut Spiritus sanctus exprimat in nobis imaginis celestis effigiem. Potestne dici aliquid splendidius & nobilius?

Ep. I. ad  
Decentium.  
c. 3.

Tertia causa est Efficiens seu Minister Sacramenti, qui ordinarie solus est Episcopus indutus sacris vestibus. Sic enim soli leguntur Apostoli quos representant Episcopi, Sacramentum hoc primitus ministrasse, sicque post uniuersis statutum esse in Conciliis, Ecclesiastica docet historia: Sanctusque Pontifex Innocentius primus, docet his Verbis: *Hec autem Pontificibus solis deberi, ut vel consignent vel Paracletum Spiritum tradant, non solum consuetudo Ecclesiastica demonstrat, verum & illa lectio actuum Apostolorum quæ asserit Petrum & Ioannem esse directos qui iam Baptizatis traderent Spiritum sanctum.* Quamobrem quanta est Apostolica & Episcopalis celsitudo, tantam huius Sacramenti dignitatem manifeste prodit.

Ep. ad Epif.  
Hispan.

In Ps. 141.

Psal. 125.

Quarta demum causa est, Finis instituti & recepti Sacramenti, qui cum multiplex afferri possit, tum ille insignis vnde insigniter Sacramentum commendatur, quod propterea confirmemur, vngamur & ampliori Gratia sancti Spiritus robaremur, ut contra Dæmonem, contra Mundum seu mundanos respectus dimicare acius & possimus & velimus. Idcirco in fronte ac signata Cruce suscipitur ut non erubescamus Euangelium: & alapa tum infligitur ut paratos nos esse admoneamur ad ferendum quidquid propterea nobis aduersum contigerit. Sic inter alios magnifice sanctus Melchiades Papa & Martyr: *Sicut exigit militaris ordo ut cum Imperator quemcumque in militum receperit numerum, non solum signet receptum, sed etiam armis competentibus instruat pugnaturum: Ita in Baptizato, benedictio illa munitio est. Dediti militem: da ei adiumentum militia. Nunquid prodest si quisquam parentum magnam pupillo conferat facultatem, nisi providere studeat & Tutorem? Itaque Paracletus regeneratis in Christo, custos & consolator & tutor est. Idcirco dicit sermo Diuinus: Nisi Dominus custodierit ciuitatem, frustra vigilat, qui custodit eam. Ergo Spiritus sanctus, qui super aquas Baptismi salutifero descendit illapsu, in fonte plenitudinem tribuit ad innocentiam, in Confirmatione augmentum prestat ad Gratiā. Et quia in hoc mundo, tota ætate victuris inter inuisibiles hostes & pericula*



gradiendum est, in Baptismo regeneramur ad vitam; post Baptismum Confirmamur ad pugnam: in Baptismo abluiamur, post Baptismum roboramur. Etsi continuo transitoris sufficiant regenerationis beneficia, vituris tamen necessaria sunt Confirmationis auxilia. Regeneratio per se saluat, mox in pace beati saeculi recipiendos: Confirmatio autem armat & instruit ad agones huius mundi & praelia, reservandos. Et paucis interjectis. Itaque ante descensionem Spiritus sancti, usque ad negationem, Apostoli deterrentur: post visitationem vero eius, usque ad Martyrium contemptu salutis armantur. Secundum hoc per Christum redimimur, per Spiritum vero sanctum, dono Sapientiae spiritualis illuminamur, edificamur, erudimur, instruimur, consummamur, ut illam Spiritus sancti vocem audire possimus: Intellectum tibi dabo, & Psal. 31. instruam te in via hac qua gradieris. De Spiritu sancto accipimus, ut spirituales efficiamur, quia animalis homo non percipit ea, quae sunt Spiritus Dei. De Spiritu sancto accipimus, ut sapiamus inter bonum malumque discernere, iusta diligere, iniusta respuere, ut malitia ac superbia repugnemus, ut luxuria ac diuersis illecebris, & faedis indignisque cupiditatibus resistamus. De Spiritu sancto accipimus vitam 1. Cor. 2. amorem, & gloriae ardorem, ut succensi Diuinitus, erigere a terrenis mentem ad superna & Diuina valeamus.

Hac sanctus Papa, quibus & ista sunt affinia Diui Augustini: Usque adeo de Cruce non erubesco, ut non in occulto loco habeam Crucem Christi, sed in fronte portem. Multa Sacramenta aliter atque aliter accipimus: Quedam, sicut nostis, ore accipimus; quia vero in fronte erubescitur, Ille qui dixit, qui me erubuerit coram hominibus erubescam eum coram Patre meo qui in caelis est, ipsam ignominiam quodammodo & quam Pagani derident in loco pudoris nostri constituit. Audis hominem insultare impudenti & dicere, frontem non habet; impudens est. Non habeam nudam frontem: tegat eam Crux Domini mei.

Atque hinc tertium dicendi genus, Genus illud quod grande vocat seu vehementius & fufius, in eos scilicet qui humanis ducuntur respectibus, qui ne irrideantur committunt aliqua vel omittunt, contra Conscientiam, contra Religionem, pietatem, aut alias quas alioquin colunt virtutes, qui propter verbum scandalizantur, Matth. 13. ut ait Christus. Qui contristant Spiritum sanctum in quo signati sunt Ephes. 4. in diem Redemptionis, ut ait Apostolus: Id est, qui peccant in illam Spiritus sancti gratiam quam in Sacramento Confirmationis



acceperunt. Nam, vt diximus, Confirmati signaculo quodam interno notantur, seu nota quadam & indelebili caractere signantur quo præ aliis non confirmatis in omnem æternitatem agnoscantur esse Christi. Dies autem redemptionis eorum dicitur quia sic redimuntur à seruitute mundi & Diaboli, sic illis propria confertur Gratia, qua si velint, possint mundo resistere, possint & debeant se mundanis redimere respectibus qui se opponunt Christo colendo: Vel certe si se rursus abjiciunt in talem mundi seruitutem, tunc manifeste peccant in illum Spiritum atque in illam Gratiā qua poterant se tam misera redimere seruitute.

Quamobrem consequenti vel distincto discursu, qua fieri poterit granditate sermonis, agendum est contra illos tamquam contra perduelles, & desertores, qui sane multi sunt & iam pene omnes sic à Christo deficiunt vt vix vllus cum tantilla sui pudoris iactura velit Christo seruire. *Erubescant & conturbentur vehementer: conuertantur & erubescant valde velociter.*

Huc spectant subjectæ Veritates ex diuersis partibus.

Sicut scandalizans, ita peccat scandalizatus.

*In 1. parte, Dominica 2. Aduentus, vbi omissum aliquid vide in Erratis.*

Non minus modò quam olim Christus in propria venit, nec sui magis Eum recipiunt.

*In 1. parte, Dominica 4. Aduentus.*

Injuriam infert Gratiæ maximam qui pro ferenda injuria non certat fortiter.

*In 1. parte, In Festo S. Stephani.*

Injuriosum est Christo si nulli quidem velis inferre injuriam, nolis tamen illatam ferre.

*In 1. parte, die 16. Ianuarij.*

Si quid nos reuocat à Doctrina Christi, vel ob id maxime recipienda est.

*In 1. parte, Fer. 6. Hebdom. 2. post Epiph.*

Qui nimis humana timet Iudicia, non satis reueretur Diuina.



*In 1. parte, Fer. 4. Hebdom. 6. post Epiph.*

Voluntatis eiusdem est, nolle afferre scandalum, &  
sufferre velle si quando prauè accipitur.

*In 2. parte, Fer. 3. Septuagesima.*

Quæ in malo bona est Confusio, in bono mala est.

*In 2. parte, Fer. 6. Hebdom. 1. in Quadragesima.*

Quem pro Christo sperni pudet, Christi pudet.

Humanus respectus, inhumanus Christi despectus.

*In 2. parte, Fer. 3. & Sabbato Hebdom. 4. in Quadrag.*

Quanta olim erat fidelium gloria, mundum vincere:  
tanta modo est ignominia, vinci à mundo.

*In 2. parte, Dominica in albis ad hæc verba Epistolæ:*

*Hæc est victoria quæ vincit mundum, fides nostra.*

Videnda hæc est præcipuè.

De peccato in Spiritum sanctum, varia.

*In 2. parte, In die Pentecostes.*

De dono fortitudinis.

*Ibid. Feria 5. & in 3. parte, Fer. 5. Hebd. 7.*

Hæc est magis laudabilis humilitas, quæ sic laudes fugit vt laudanda non omittat.

*In 3. parte, Fer. 3. Hebdom. 12.*

In hanc Domini sententiam:

*Nemo potest duobus Dominis servire, varia.*

*In 3. parte, Dom. 14.*

Nisi diligenter aduertas, ore facta confessio, factis à te negatur.

*In 4. parte, Fer. 2. Hebdom. 15. post Pentec.*

Cos bonæ libettatis, mala libertas.

*In 4. parte, Fer. 5. Hebdom. 20. De cœco nato qui tanto liberius Christum confitebatur, quanto liberius à Iudæis negabatur.*





# DOMINICA VNDECIMA.

DE SURDO ET MUTO SANATO  
A CHRISTO DOMINO.

*Adducunt ei surdum & mutum, & deprecabantur eum ut imponat illi manum. Marci 7.*

## VERITAS PRACTICA.

Qui non audit, non audietur.

RATIO EST, Quia ordinariè loquendo quædam est proportio & convenientia pænæ à Deo infligendæ cum culpa delinquentis.

Atqui hæc est proportio & convenientia pænæ cum culpa illius qui non audit, ut non audiat à Deo.

Ergo qui non audit, non audietur. Quod quàm sit damnosum satis patet, & patebit etiam apertius alia Veritate consequenter adjuncta:

Quibus nos attentiores esse oporteret, in his magis obsurdescimus.



I. P V N C T V M.



**MIRA** est huius surdi curatio quæ in hodierno Evangelio legitur. Nam ut ait sanctus Euangelista, *Apprehendens eum Dominus de turba seorsum, misit digitos suos in auriculas eius: & expueris tetigit linguam eius; & suspiciens in cælum ingemuit, & ait illi, Ephpheta, quod est adaperire, & statim aperte sunt aures eius, & solum est vinculum linguae eius, & loquebatur recte. Et praecepit illis ne cui dicerent. Quanto autem eis praeceperat, tanto magis plus predicabant, & eo amplius admirabantur dicentes: Bene omnia fecit: & surdos fecit audire, & mutos loqui.*

Iam vero quorsum illa omnia tam singularia quæ à Christo Domino gesta sunt? Cur ille in cælum aspectus, cur gemitus, cur contactus? Nonne vel verbum sufficiebat aut sola etiam voluntas ad perficiendam sanitatem? Ita plane si de sola sanitate corporis ageretur, sed aliam in isto surdo surditatem cogitabat & curabat Dominus: nempe spiritualem illam animi qua ita omnes obsurdescimus ad Deum nobis loquentem, ut quibus frequentius loquatur, illi sint qui minus eum audiant; *Quis surdus nisi ad quem nuncios meos misi? Qui vides multa, nonne custodies? Qui apertas habes aures, nonne audies?* Et quia hæc surditas gravius est malum & curatu difficilius quam putetur, Idcirco Christus Dominus in cælum suspicit, ingemuit, inclamat, & manum admouet, ut his signis excitemur ad considerationem & remedium tanti mali.

Cum multa porrò ex hac surditate damna proveniant, tum illud damnosissimum quod proposita nobis Veritate continetur, *Qui non audit, non audietur.* Quid sit autem non audire nec audiri, explicabitur in progressu Rationis qua Veritas sic declaratur:

Si spectemus ordinarium poenæ infligendæ modum quem Deus servat dum in hac vita delinquentes punit, animadvertemus talem esse proportionem & convenientiam inter culpam & poenam ut quo in genere, qua in materia, quoque modo & instrumento quis peccat, eodem & puniatur. Sic expresse Sapiens ubi agit de Plagis Ægypti, *Per quæ peccat quis, per hæc & torquetur.* Sap. ii. Exodi 7. & sequent. Contemplare decem illas Plagas quibus Ægyptij divinitus sunt



correpti, quod male affecissent populum Dei; videbis omnes ita correspondere malo quod infligebant Israelitis, ut non minus mireris Diuinam in puniendis peccatis Sapientiam quam Iustitiam.

Prima Plaga fuit conuersio Nili & aquarum in sanguinem, quia scilicet Nilo suo Ægyptij ita gloriabantur, ut in eo vno tamquam Deo spes suas ponerent; & quia mares Israelitarum infantes, statim ab ortu in fluuium projecerant; Vnde Moses miro eductus est modo.

Secunda: Ranae undique perstreperentes quibus mirum in modum affligebantur Ægyptij, in poenam videlicet neglecti vagitus Infantium Hebræorum, quos ut ranas habuerant in aquis perforantes.

Tertia: Sciniphes animalcula valde aculeata statim prodibant e puluere vel e terra tantisper mota quibus Ægyptij. molestè pungebantur. Cur ita porro nisi quia sic Israelitas afflixerant in terra fodienda, conuehendisque oneribus?

Quarta: Omne genus muscarum sic importunum erat Ægyptiis, & totis simul graue ac singulis, ut nullibi possent quiescere: Opportune certe & condigne, quia sic Israelitas flagellis & stimulis toto exagitarent corpore.

Quinta: Pestis saeuissima cunctas animantes Ægypti sustulit: quia nempe Ægyptij non aliter Israelitis utebantur quam velut animalibus: minus curabant humana corpora quam iumenta sua.

Sexta: Vesicarum turgentium in Ægyptiorum carne facta sunt vlcera, & aspectu horrenda & sensu grauia; Nimirum sic Israelitas adusserant suis in fornacibus accendendis, & coquendis lateribus, ut tota turgerent cute.

Septima: Grando & ignis mixta pariter ferebantur per totam Ægyptum, tum tonitrua personabant tam acuta, & fulgura discurrebant tali cum impetu, ut omnes horrore quaterentur. Sic videlicet Ægyptij, sic truci vultu, sic minaci ore, sic toruis oculis, contumeliosis verbis, & manu semper erecta Israelitas diuexarant.

Octaua: Locustarum vis ingens corrodit quidquid in agris seminatum erat, quia sic Ægyptij corroserant cuncta Israelitarum bona.

Nona: Tenebrae densae & palpabiles sic constringunt Ægyptios



ptios vt velut arctis astricti vinculis se mouere non possent; Quamobrem vero? Quia sic Israelitas suis in custodiis concluderant, & duris vinctos catenis sibi astrinxerant.

Decima denique: Moriuntur in Ægypto primogenita quauis; quod in mares Israelitarum enecandos Ægyptij præcipue intenti fuerant.

Sicque deinceps cum delinquentibus ita est actum à Deo vt vix <sup>Ind. 1.</sup> vllus fuerit qui non illud potuerit affirmare quod Rex Adonibezec: *Sicut feci, ita reddidet mihi Deus.* Sicut multorum Regum amputauerat manus & pedes, sic ipse mulctatus fuit. Sic humiliantur superbi, sic auari egent, *Sic omnes qui acceperint gladium* <sup>Matth. 26.</sup> *gladio peribunt*, Sic Diuina iustitia in *mensura, & numero & pondere* <sup>Sap. 11.</sup> *exercetur*, Nonne hinc est quod colatur & timeatur?

## II. P V N C T V M.

**A**T QVI hac est proportio & conuenientia pœna cum culpâ illius qui non audit, vt non audiatur.

Videndum hîc primo quid sit non audire. Deinde quid non audiri. Ac denique quàm sit conueniens illa pœna.

De primo septem illæ voces quæ in Psalmo vigesimo octauo enumerantur, considerari possunt tamquam voces Dei quibus vnicuique nostrum loquitur & quam qui non audiunt, dicendi sunt non audire Deum.

Prima vox quæ occurrit in Psalmo, *Vox est Domini super aquas*, <sup>Apoc. 17.</sup> A QVÆ *populi sunt*, ait Scriptura, & populi egentiores, vnde est illud Ecclesiastæ, *Mitte panem tuum super transeuntes aquas.* Sic <sup>Ecc. 11.</sup> videlicet in mundo peregrinantur & discurrunt pauperes velut aquæ decurrentes, vt victum sibi quærant. Dùm itaque pauper eleemosynam petit, nonne vox est eius qui dicet, *Esurui & non dedistis mihi manducare?*

Secunda vox, *Vox Domini in virtute*, dici debet sacra Scriptura <sup>Matth. 29.</sup> vbi Deus tanta in virtute loquitur quantam describit Apostolus dum ait: *Viuus est sermo Dei & efficax & penetrabilior omni gladio* <sup>Heb. 4.</sup> *ancipiti, & pertingens usque ad diuisionem animæ ac spiritus, compagum quoque ac medullarum, & discretor cogitationum & intentionum cordis.*

Tertia vox *Domini in magnificentia*, Mundus est vniuersus de



Sap. 1. quo sic Sapiens: Spiritus Domini repleuit orbem terrarum, & hoc quod continet omnia, scientiam habet vocis. Nempe loquuntur nobis omnia Deum esse colendum, & illi vni vacandum.

Quarta vox est Domini confringentis cedros, Superbas scilicet mentes, dum de cruce Christus nobis loquitur contemptum mundi & perfectam humilitatem, de qua voce Apostolus: Accessistis, inquit, ad testamenti novi mediatorem IESVM & sanguinis asper-  
Hebr. 12. sionem melius loquentem quam Abel, Vnde & addit, Videte ne recuse-  
tis loquentem.

Quinta vox Domini dicitur intercidentis flammam ignis, Nempe illius ignis qui est usque ad perditionem deuorans, & omnia eradicans  
Iob. 31. genimina, Quæ vox ita auditur in sanctissimo Sacramento, vt ipsum Sacramentum efficiat in animis nostris quam ibi loquitur colendam nobis castimoniam & puritatem. Sic prædictum olim à Propheta: Dabit vobis Dominus panem arctum; & non faciet auolare à te ultra Doctorem tuum: & erunt oculi tui videntes præceptorem tuum, & aures tue audient.  
Is. 30.

Sexta vox est Domini concutientis desertum, Conscientia scilicet de qua cum dicitur, Opus legis Scriptum in cordibus, & signatum super nos lumen vultus Dei, perinde est ac si diceretur, ibi vocem esse Dei docentis quid sit bonum & malum, & licet aliæ deessent voces, sic concutientis animum vt malum oderit & amet bonum.  
Rom. 2.  
Ps. 4.

Septima Denique vox Domini preparantis ceruos, Id est, animas: ad pariendum salutis Spiritum, sicut Ceruæ tonitru territæ facilius pariunt, voxque illa est Domini per suos loquentis opera-  
rios qui cum Apostolo dicunt, An experimentum quaritis eius qui in me loquitur Christus?  
2. Cor. 13.

Quibus sic declaratis, euident est, quod sicut diuersa per has diuersas voces loquitur Deus, sic plane qui vel vnā non audierit vocem, non audit Deum: qui non audit Pauperem aut Prædicatorem, non audit Christum sibi loquentem in illis. Is vero non audietur, & quidem conuenienter vt Scripturæ omnes testantur. Qui obturat aurem suam ad clamorem pauperis: & ipse clamabit & non exaudietur, Ac rursus, qui declinat aures suas ne audiat legem, oratio eius erit execrabilis. Quid clarius? Quid expressius? Quid porro terribilius?  
Pr. 21.  
Ibid. 28.



III. P V N C T V M.

**Q**UI non audit igitur, non audietur : Quia cum illius negligentia seu malitia poena conueniens sit exigenda, non potest exigi conuenientior quam ut qui negligit audire se rogantes, negligatur ipse rogans. *Vae qui spernis, nonne & ipse sperneris.* 1<sup>a</sup> 30.  
 EGO eligam Illusiones eorum, & quae timebant adducam eis : quia vocavi, & non erat qui responderet : locutus sum & non audierunt. Id est, 1<sup>a</sup> 66;  
 ex multiplici poenarum genere quibus ego Dominus possem eos punire, seligam illas praecipue quae peccato eorum magis conuenient : & in hoc maxime quia peccant quod admoniti vel rogati dissimulant se audire, & illudunt sibi loquentibus, sic & ego illis illudam, sic dum rogabunt non audiam ; Ego quoque in interitu *Pron. 1.*  
*vestro ridebo & subsannabo, cum vobis id quod timebatis, aduenerit : cum irruerit repentina calamitas & interitus quasi tempestas ingruerit : quando venerit super vos tribulatio & angustia. Tunc inuocabunt me, & non exaudiam : mane consurgent & non inuenient me : eo quod exosam habuerint disciplinam, & timorem Domini non susceperint ; Comedent fructus viae suae, suisque consiliis saturabuntur.* Quasi diceret *Gal. 6.*  
 quod deinde Apostolus, *Quae seminauerit homo, haec & metet.* Quod & ipsi peccatores agnoscunt qui dicunt apud Prophetam, *Peccata nostra responderunt nobis.*

Velle ne non audiri à Deo & eo praecipue tempore quo eius opes & Gratia plurimum indiges ? Vide ergo ut illum audias, audi quid loquatur, quid in te arguit Conscientia ? Qua parte magis deficiis ? Quid te pungit & stimulat acrius ? Num tibi durum est tam pertinaciter, contra stimulum calcitrare ?

Stupendum certe illud, *Quod in illis minus audimus Deum & magis obsurdescimus in quibus attentiones esse nos oporteret.* Quae quidem distinguì posset Veritas à praecedenti, & hac fufius ratione explanari quae sic breuiter indicatur.

Attentiones nos esse oporteret in ijs de quibus frequentius & grauius admonemur. Quid clarius ? Sed in illis minus audimus & magis obsurdescimus. Quid enim frequentius & grauius inculcatur quam ut superbiam detestati, sectemur humilitatem, gaudeamus humilitate, exulemus in injuriis, beatos nos arbitremur in paupertate, in luctu & persecutionibus ; miseros vero in gloria,



548 Dominica II. post Pent. De surdo & muto sanato, &c.

in laudibus, & mundano risu. At nonne ad ista potissimum surdī  
fumus? Nonne secundum similitudinem serpentis, sicut aspidis  
furdæ, & obturantis aures suas sic contra hæc Diuina monita  
reluctamur? Quod si vt ait Apostolus, *Omnis prauaricatio & inobe-*  
Ps. 57. *dientia accipit iustam mercedis retributionem, quomodo nos effugiemus*  
Hebr. 2. *si tantam neglexerimus salutem?* Dicendum esset cum Propheta:  
Is. 50. *Dominus aperuit mihi aurem: ego autem non contradico: retrorsum*  
Exodi 5. *non abij.* Et contrā cum rebeli Pharaone dicis: *Quis est Dominus,*  
vt audiam vocem eius? Potestne quidquam magis oppositum &  
magis execrandum cogitari? In mente ergo habe qualiter acceperis,  
Apoc. 3. & audieris, & serua, & pœnitentiam age.

QVÆ autem cæteris Euangelij partibus Veritates aliunde pe-  
tendæ respondeant, sic habeto.

*Apprehendens eum de turba seorsum.*

Nulli magis necessario secedendum quàm qui minùs  
necessarium sibi putat secessum.

In 2. parte, Feria 2. infra Octauam Ascensionis.

*Misit digitos suos in auriculam eius.*

Ad perfectam scilicet obedientiam, quæ vt sic perfecta, nullis oppo-  
sitis rationibus patere debent aures.

Qui rationes inquirat obedientiæ, rationem quærit  
suæ inobedientiæ.

In 2. parte, Feria 4. infra Octauam Ascensionis.

*Et exspuens tetigit linguam eius.*

Quæ est regula Temperantiæ in edendo, eadem est  
in loquendo.

In 3. parte, Feria 6. Hebdom. 7.

*Suspiciens in cælum, ingemuit.*

Sic pium est orare Deum pro salute proximi, vt sit im-  
pium non orare.

In 3. parte, Feria 2. Hebdom. 10.



*Qui non audit, non audietur.*

549

*Et ait illi : adaperire. Et statim aperta sunt aures eius, & solutum est vinculum linguae eius, & loquebatur rectè.*

Quod magis confert ad faciendam Confessionem, minus efficitur, nisi cum Sacerdote prius confertur.

*In 1. parte, Fer. 3. Hebdom. 3. post Epiphan.*

*Et praecepit illis ne cui dicerent.*

*Vide superiore Dominica, de Humilitate.*

*Bene omnia fecit.*

Sic propterea non contristabit iustum quidquid ei acciderit.

*In 1. parte, die 10. Ianuarij.*

Si non semper, numquam magnificas Deum.

*In 1. parte, Sabbato Hebdom. 4. post Epiphan.*



HAC HEBDOMADA, occurrit historia colloquentis Christi cum muliere Samaritana, obferuaturque sic frequentissime Dominum cum unaquaque anima de ipsius salute & perfectione colloqui.

FERIA SECVNDA.  
DE SITI CHRISTI DOMINI  
LOQVENTIS SAMARITANAE.

*Da mihi bibere. Ioan. 4.*



VERITAS PRACTICA.

Quod vel Inimico numquam negares, sapissimè recusas Christo.

*SENSVS ET RATIO EST, Quia numquam inimico sitienti negares potum aqua.*

*Sed hoc saepe recusas Christo.*

*Ergo illi recusas quod non negares Inimico; Quod certe est impium & crudele, ac proinde praeauendum.*

I. PUNCTVM.

**T**EXTVS Euangelicus paulo longior quàm vt referatur, legi potest à versu quinto capitis vsque ad decimum quintum, ibidemque annotari quæ ad gustum & fructum valere queant; atque illud maxime quod de Christo refertur fatigato, sedente supra fontem, sitiente & petente à muliere Samaritana quæ tunc aquam haustura venerat; *Da mihi bibere.* Ista enim omnia mystica sunt, Vnde sanctus Augustinus: *Iam incipiunt mysteria, non enim frustra fatigatur IESVS. Omnia ista innuunt aliquid; indicare volunt aliquid, intentos nos faciunt vt pulsemus.*

Reuera quidem sitiebat Dominus vt qui circa meridiem ex longo itinere & calenti sole fatigatus sederet; Verumtamen sitis illa sitim aliam exprimebat, eratque velut Mysterium & Sacramentum quod est signum visibile continens inuisibilem virtutem & gratiam: sitis nempe corporea Christi sitim eiusdem spiritualem representebat, qua salutem animarum sitiebat. *Sitiebat*, inquit sanctus Augustinus, *mulieris fidem.* Et quod de hac muliere particulatim refertur, hoc vniuersim de omnibus idem ipse Dominus dixit: *Sitio*, iterumque dicit vnicuique nostrum quoties de salute nostra nobiscum agit. Quod certe est consideratione dignissimum, vt caueamus ne quid petenti recusemus, cum perinde nefarium esse possit, ac si sitienti potum aquæ negaremus. Quod nefas vt apertius videatur, sic est proposita Veritas: *Quod Inimico numquam negares, sapissime recusas Christo; Hinc enim*



*Quod vel Inimico numquam negares, sapissimè recusas Christo. 551*

apparet, recusationem longe minus esse rationabilem ex comparatione scilicet Inimici & Christi Domini IESU.

Age ergo, quid est quod Inimico numquam negares? Nempe aquæ potum si commode sitienti præstare posses, neque enim natura humana adeo fera est & inhumana, yt non commiseratione tantæ miseriæ moueatur. *Occurrentes sitienti ferte aquam:* Sic ipsa videtur apud Prophetam natura clamare: aut si natura *1f. 21.* repugnaret, tum certe Charitatis Christianæ lex vrgeret, qua expresse iubemur referente Apostolo, *Si esuriat inimicus tuus, ciba illum; sitit? Potum da illi;* Cui Charitatis officio qui defuerit, en *Rom. 12.* condemnationis eius æternæ iam prolata est à Iudice sententia: *Sitini & non dedistis mihi potum, nam quamdiu non fecistis uni de Math. 25.* minoribus his, nec mihi fecistis. Velle ne hanc incurrere maledictionis pœnam?

## II. PUNCTVM.

**A***T QVI hoc sepe, in alio sensu, recusas Christo.*

Quoties scilicet à te petit quæ spectant ad salutem tuam, tanto ardore animi petit quanto peteret sitiens potum aquæ; ac proinde si quæ petit, recusas; recusas sitienti potum. Quod apertissime patet in hac muliere Samaritana quæ si recusasset Conuersionem suam quam sitiebat Christus, plane sitienti & petenti bibere, recusasset potum; Nonne est ita? Cur porro ita, nisi quia non aquam putei sitiebat Christus, sed eius animæ meliorem statum & salutem? At vero si modò æque vehementi & ardenti desiderio quod à te petit desideret, licet sitim corporis non sentiat, nonne tamen dicendus erit sentire sitim animi? Nonne ardens desiderium est quædam animi sitis? Nonne illa erat sitis qua magis laborabat Christus quàm corporis? Ac denique cum illius sitis refrigerium non aliud sit quam quod petit ad salutem; hoc si illi negas, nonne est sitienti potum negare?

Certe consequentia est euidens si quod antecedit de sitienti Christo non diffitearis. Nec vero diffitendi locus vllus est si attente cogites Christum Dominum non minori iam desiderio salutem nostram optare quam cum olim in cruce dixit: *Sitio.* Putasne aliquid de illius Charitate deductum? Blasphemum esset id cogitare, vnde necessarium est concludere quod si olim



ex Charitate sitiuit tuam salutem, ex eadem nunc Caritate quæ nullam diminutionem passa est, æque illam sitit, licet non æque sensibili modo.

Iob. 40.

Adde, quod non minori ardore Christus salutem nostram desideret, quam Dæmon perniciem nostram. Tantus est autem ardor Dæmonis ut comparetur siti, dicaturque de eo in libro Iob: *Habet fiduciam quod insuat Iordanis in os eius.* Id est, tanta siti premitur perditionis hominum, ut non expleatur nec satisfiat nisi electos quosque absorbuerit: quanto magis Christus sitire dicendus est qui certe magis Deum Patrem & nos amat, quàm Dæmon oderit; unde euidentissimum est quod quicquid ex illo desiderio petit, petit velut sitiens; & quod illi recusatur, recusatur velut potum sitiienti.

Ah quoties petiit, & quoties recusasti! Recense si potes & confundere.

## III. P V N C T V M.

Jer. 2.

Mich. 6.

Is. 5.

**I**GITUR quod Inimico numquam negares, sapissimè recusas Christo. Nec repetendæ sunt ultra propositiones, adeo iam patent ad Veritatis intelligentiam, sed ad Praxim vrgenda est ista comparatio Inimici & Christi; Nam rectè cogitanti non potest non iniuriosum esse Christo Domino & alienum ab omni sensu pietatis quod minori apud te in pretio habeatur quàm Inimicus qui in hoc officiorum genere postremus haberi solet. *Quid inuenerunt in me iniquitatis? POPVLE meus quid feci tibi, aut quid molestus fui tibi? Responde mihi.* Sunt ipsa Domini verba de tot tuis repullis conquerentis. Et rursum: *Quid est quod debui ultra facere vineæ meæ & non feci? Tu vero quid fecisti eorum quæ debuisti? An quod expectaui ut faceret vinas & fecit labruscas?*

Resume etiam ad vehementiores affectus quod Christus Dominus dicebat Mulieri, & tibi dictum puta quoties petit à te quod illi negas: *Si scires donum Dei, & quis est qui dicit tibi, Da mihi bibere, tu forsitan petiisses ab eo, & dedisset tibi aquam vinam.* Forsitan, inquit, quando de te loquitur quia id à te pendet & sapius libertate abuteris. At verò quando de se suisque donis loquitur, sic absolute pronuntiat; *Omnis qui bibit ex aqua hac, sitiet iterum: qui autem biberit ex aqua quam dabo ei, non sitiet in æternum, sed aqua quam*



*Quæ à Christo hauritur nostri cognitio, omnem in nobis, &c. 553*

*quam ego dabo ei, fiet in eo fons aquæ salientis in vitam æternam. Ac tandem ei dices, Domine da mihi hanc aquam. CONVERTE nos* Thren. 9.  
*Domine, & conuertemur.*

*Vide potissimum in quo, vel in substantia, vel in modo, vel in fine. In quo corrigit adolescentior, aut senior viam suam?* Ps. 119.



## FERIA TERTIA.

### DE COGNITIONE SVI QVAM

MVLIER SAMARITANA, ET  
ANIMA NOSTRA HAVRIT  
A DOMINO.

*Quinque viros habuisti, & nunc quem habes, non est tuus vir. Ioan. 4.*

### VERITAS PRACTICA.

*Quæ à Christo hauritur nostri Cognitio, omnem in nobis exhaurit fastum:*

*Id est, non tantum eum qui repugnat cognitioni peccatorum, sed eum etiam qui opponitur humilitati & modestiæ qua quis demisse de se sentit.*

*RATIO EST, Quia quæ à Christo hauritur nostri Cognitio notam nobis facit nostram Insufficienciam.*

*Sed ex nota nobis insufficientia omnis in nobis exhauritur fastus.*

*Ergo & quæ à Christo hauritur nostri Cognitio, omnem in nobis exhaurit fastum. Quæ Veritas magis confirmatur ex hac sequenti altera.*



554 FERIA 3. Hebd. 11. post Oct. Pent. *Quinque viros, &c.*

Quidquid in se cognoscit anima, nil tam certo de se cognoscit quo extollatur, quàm quo humilietur.

*RATIO EST, Quia nil tam certo de se cognoscit anima quam quod fide Diuina cognoscit.*

*Sed nil tam fide Diuina cognoscit quo extollatur, quàm quo humilietur.*

*Ergo neque id tam certo cognoscit; Ac proinde longe Verius & tutius se humiliat quam se exaltet.*

I. P V N C T V M.



*V*M dicenti Christo Samaritanæ vt vocaret virum suum, respondissetque Mulier se non habere virum: tum illi Christus Dominus, *Bene, inquit, dixisti, quia non habes virum, quinque enim viros habuisti, & nunc quem habes non est tuus vir; hoc verè dixisti.* Quo in sermone illud primum egit Dominus vt senosset Mulier, quò facilius vltra progrediretur ad conuersionem suam, sicut reuera contigit. Hoc enim præcipue motiuo inducta est vt in Christum crederet, atque vt suos etiam Conciues ad credendum adduceret: *Venite, inquit, & videte hominem qui dixit mihi omnia quaecumque feci: numquid ipse est Christus? Et ex ciuitate illa multi Samaritanorum, ait Euangelista, crediderunt in eum, propter verbum mulieris testimonium perhibentis, quia dixit mihi omnia quaecumque feci.* Tantum valet vera sui cognitio.

Quamobrem hoc illud ipsum est quod in quauis anima primum incipit operari Dominus, & ad quod perficiendum cum ipso nos exhortantur omnes sancti Patres. *Volo animam primum omnium scire seipsam, inquit sanctus Bernardus, & alij passim in illud primi Cantorum: Si ignoras te, ô pulcherrima inter mulieres, egredere, & abi post vestigia gregum.*

Neque vero nudam & sterilem seu quam vocant speculatiuam nostri cognitionem operatur in nobis Dominus, sed fecundam, sed fructuosam, sed Practicam: Cumque hic potissimus huiusce Cognitionis fructus sit illa demissio animi quæ fugit omnem fastum, omnem arrogantiam, præsumptionem & complacentiam, hoc imprimis est intelligendum, & sic formanda Veritas quæ mo-



do expendatur: *Quæ à Christo hauritur nostri Cognitio, omnem in nobis exhaurit fastum*; Aut non est à Christo cognitio, aut non est in cognitione seu in cognoscente seipsum, fastus. Cum vero duplex sit genus fastus, vnum quo erubescimus confiteri peccata, & aliud quo gestimus nostra depradicare facta: Contra vtrumque cognitio hæc nostri, nos aptè format: sed de secundo hic particulatim agimus; acturi de primo commodius in sequenti meditatione. Sicut autem non est alia nostri cognitio per Christum habita quàm quæ nos à tali fastu reuocat, sic nec talis cognitio potest ab alio quouis haberi quàm à Christo, quod vtrumque simul declarat hæc allata Ratio: *Quæ à Christo hauritur nostri Cognitio, notam nobis facit nostram insufficientiam ad omne opus bonum*: Sic enim ipse aperte Christus, *Sicut palmes non possunt ferre fructum à semetipso nisi manserint in vite, sic nec vos nisi in me manseritis. Ego sum vitis, vos palmites: qui manet in me, & ego in eo, hic fert fructum multum, quia sine me nihil potestis facere.* NON ait sine me parum potestis, inquit sanctus Augustinus, sed nihil potestis facere: siue ergo parum siue multum, sine illo fieri non potest sine quo fieri nihil potest.

Quod ut magis confirmaret Dominus, sic de seipso sentiebat & *ib. 5.* loquebatur: *Non possum ego à meipso facere quidquam. A meipso facio nihil, sed sicut docuit me Pater, hæc loquor.* Quasi diceret, si meam insufficientiam Ipse agnosco, si sic de me loquor, si quæ est ratio cur id de me dicam, quanto magis illa valet ut de vobis idem sentiat. Quo spectabat Apostolus cum dicebat: *Hoc sentite in vobis quod & in Christo IESU, qui cum in forma Dei esset, non rapinam arbitratus est esse se aequalem Deo, sed semetipsum exinanivit.* Id est, tamquam nihilum & inanè aliquid se fecit cum se fecit hominem; Sicut enim homo non est à se, neque à se potest quidquam boni, sic Christus Dominus se faciens hominem, non est à se, neque quidquam potest à se tamquam ab homine; & hoc est se exinanire; hoc est se redigere in eum statum in quo verè possit dicere, *A meipso nihil facio*; *Non possum à meipso quidquam facere*; Hoc est denique quod in nobis sentire debemus, sicut sentiebat Idem Apostolus à Christo probe edoctus, *Non quod sufficientes simus cogitare aliquid à nobis quasi ex nobis, sed sufficientia nostra ex Deo est.* Itane sentis, Itane verè te agnoscis?



## II. PUNCTVM.

**S**ED ex nota nobis nostræ insufficientiæ, omnis in nobis exhauritur fastus.

Non quod ista notio nostræ insufficientiæ, per se sola fastum à nobis tollat, neque enim ad hoc sufficientes sumus quasi ex nobis; sed quod illa ipsa Diuina Christi Gratia quæ hanc nostram insufficientiam nobis notam facit, simul cum ista notione quam haurimus exhauriat quidquid fastum & arrogantiam sapit. Sic expresse Diuus Augustinus exponens illa Christi verba quæ supra commemorauimus de vite & palmite: *Magna, inquit, Gratiæ commendatio, corda hic instruit humilium, ora obstruit superbiorum: huic Veritati resistunt liberi arbitrij non assertores sed precipitatores; Qui à semetipso fructum se existimat ferre, in vite non est.* Quasi diceret, sicut causa fastus & superbiæ prouenit ex falsa opinione quam quis habet de sua excellentia, de suo merito, siue, vt aiunt, de sua sufficientia; sic bene iuuante Domino talis desinet fastus cum talis causa desinet, cum talis opinio euanescet; euanescet autem cum vera ei succedet notitia quæ homo se cognoscet non se magis sufficientem esse ex se producere aliquem fructum, quam sit palmes sine vite. Licet enim fructum in se aut in aliis faciat, quia tamen cognoscit non à se facere, simul etiam cognoscit non magis sibi esse gloriandum quam securi vel alteri cuiuspiam instrumento quo ad agendum vititur, *Numquid gloriabitur securis contra eam qui secat in ea?*

*Is. 10.* Sic ipse Christus consequenter ex cognitione sui, *Si ego, inquit, glorifico meipsum, gloria mea nihil est.* Sic ipse Apostolus, post multa de se commemorata: *Tametsi nihil sum, Nihil laudis, nihil gloriæ mihi propterea vendico: Quia soli Deo debetur Gloria, Solus ille est qui à se omnia potest, & sine quo nullus hominum quidquam potest. Quid habes & quid facis quod non accepisti? Si autem accepisti, quid gloriaris, quasi non acceperis.*

Vidistine vnquam Sacerdotem ob id superbientem quòd Corpus Christi consecraret? Quod tamen est opus omnium excellentissimum: sed quia manifeste cognoscit se id non à se facere, idcirco non potest inde superbire. Sic neque aliud quiduis boni, Sacerdos aut alius magis potest ex se facere, quàm ex se solo, cōsecrare Cor-



*Quæ à Christo hauritur nostri cognitio, omnem in nobis, &c. 557.*

pus Christi; Et qui hanc habet notam suam Insufficienciam, tam parum gloriatur & superbit ex vno quam altero, aut si superbit ex vno, tam vanus est & arguendus quam si superbiret ex alio. Vnde recte Apostolus cuidam ex bono suo intumescenti, *Frustrà inflatur sensu carnis suæ & non tenens caput ex quo totum corpus per nexus & conjunctiones subministratur*; Quasi diceret, frustra gloriatur & sine causa, non seipsum iste nouit, non sibi suam objicit insufficientiam, non aduertit à quo habeat vt aliquid possit. Sicut enim à capite corporis effluit quidquid in membra sensus diffluit, sic à Christo totum manat quidquid à quouis homine boni sentitur & agitur. *Domine omnia opera nostra operatus es nobis.* Hoc ita *1p. 26.* forte modo dices cum Propheta, sed dum vane de tuis extolleris, tibi & Veritati contradicis.

### III. P V N C T V M.

**S**IC ergo quæ à Christo hauritur nostri Cognitio, omnem in nobis exshaurit fastum; aut non est à Christo talis sui Cognitio quæ superbum relinquat hominem, aut si à Christo est, nihil vanitati nihil superbix, nihil fastui relinquit in homine; *Et nolite, inquit, in sublime tolli.* *RECVMBE in nouissimo loco. OSTENDE te* *Luc. 12. 1b. 14.* *Sacerdoti. VNVS est bonus Deus. SINITE paruulos ad me venire, talium est enim regnum cælorum. ERVNT nouissimi primi: & primi nouissimi.* *Matth. 19. 1b. 20.* Hæc & similia quæ ad nostri cognitionem & humilitatem faciunt, sic dicuntur à Domino vt agnoscamus ab eo solo nostra esse omnia, ab eo solum hauriri, huic vni accepta esse referenda; & hoc ipsum etiam quod de nostri cognitione cognoscimus.

Quod præclare admodum sanctus Augustinus prosequitur ad illum Psalmi versum: *In diluuiò aquarum multarum. HÆC, inquit,* *Ps. 37.* *aqua humiliationis cordis, hæc aqua vitæ salutariæ, abicientis se, nihil de se præsumentis, nihil suæ potentia superbè tribuentis. Hæc aqua in nullis alienigenarum libris est, non in Epicureis, non in Stoicis, non in Manicheis, non in Platoniciis. Vbicumque etiam inueniuntur optima præcepta morum & Disciplina, humilitas tamen ista non inuenitur. Via humilitatis huius aliunde non manat: à Christo venit. Hæc via ab illo est qui cum esset altus, humilis venit. Et quæ plura pergit vt discas non ab alio quàm à Christo quærendam esse hanc tuæ Cognitio-*



nem, neque ab illo aliam quàm quæ monstrat omnem depoenendum fastum.

*Joan. 10.*

O quàm vere Christus, *Ego sum ostium: & qui non intrat per ostium, ille fur est & latro.* Primus quippe ad vitam spiritualementroitus fit per nostri Cognitionem: qui vero se per Christum non cognoscit, non intrat per ostium, & quoties sibi de se bonisque suis complacet & gloriatur, fur est & latro qui Gloriam Dei surripit, & se ipse suis denudat bonis.

*Ecc. 9.*

*3. Reg. 8.*

*Isa. 3.*

QVIA vero iste bonorum aspectus quæ quisque putat se habere, non parum facit ad fastum illum & superbiam in nobis excitandam; præsto adsit oportet sequens Veritas: *Quod quidquid boni in se aspiciat & cognoscat anima, nihil tam certo de se agnoscit quo extollatur, quàm quò deprimatur & humilietur.* Nihil enim tam certò in se cognoscit quàm quod Diuina fide cognoscit. Quid clarius? Nihil est autem quod tam fide Diuina cognoscat unde extollatur, quàm unde humilietur. Nescit enim fide Diuina se habere bonum aliquod, nescit se esse in Gratia, nescit an sit *in odio vel in amore Dei*; quia potius ex fide est id omnino nesciri. At vero etiam ex eadem fide Diuina certo scire debes & indubitanter, te nihil esse, te nihil ex te posse nisi malum, te verè peccatorem esse. *Non est enim homo qui non peccet.* Quæ cum plurimum valeant ad nos deprimendos, nonne apparet tanto hæc certiora esse quam quæ fastum excitant, quanto certius est quod fide Diuina scitur quam quod humana opinione putatur? Cur ergo non te libentius humilies quam te extollas? Nonne semper Veritatem malles quàm errorem, quàm falsitatem, aut quàm mendacium? At vera & Christiana humilitas, ipsa est Veritas. Unde quidquid opponitur Veritati, repugnat humilitati, ac proinde non modo fastus & aperta superbia, sed qualibet etiam tacita de suis bonis aut meritis præsumptio non nisi error est, non nisi falsitas & non nisi mendacium. *Verè mendaces erant colles & multitudo montium:* Id est, quidquid in nobis videtur eminens & excelsum, ubi vanitatis Idolo, sicut olim in excelsis profanè sacrificatur, vere id mendax & falsum est.





## FERIA QVARTA.

### DE ILLVSTRI COGNITIONE CHRISTI DOMINI MANIFESTANTIS SE IPSVM SAMARITANÆ ET CVIVIS PECCATRICE ANIMÆ.

*Domine, video quia Propheta es tu, Patres nostri  
in monte hoc adorauerunt, & vos dicitis quia  
Ierosolymis est locus ubi adorare oportet. Ioan. 4.*

#### VERITAS PRACTICA.

Numquam illustrius se manifestat Christus, quàm  
dum animæ peccatricis illustrat Conscientiam &  
peccatum latens, ipsi manifestat.

RATIO EST, Quia numquam illustrius se manifestat Chri-  
stus quàm dum Bonitatis, Potentiæ, & Sapientiæ certiora dat  
signa.

Sed dum animæ peccatricis illustrat Conscientiam & peccatum la-  
tens ipsi manifestat, certiora dat signa suæ Bonitatis, & Po-  
tentiæ & Sapientiæ.

Ergo numquam illustrius se manifestat quàm dum animæ pecca-  
trici illustrat Conscientiam, & peccatum latens ipsi manife-  
stat. Quod certe est ad amorem Christi tum actiuum tum pas-  
suum illustrandum, non parum efficax.



I. P V N C T V M.

**T**AMETSI nihil adhuc de se Christus aperte dixerat Samaritanæ mulieri: neque quis esset, omnino indicasset: tamen vt audiuit Illum sua sibi reuelantem peccata, statim coepit subodorari non vulgarem esse hominem, sed eximium quendam Prophetam & Magistrum, qui posset soluere quaestionem qua illo tempore agitabatur frequentius de loco sacrificij publice instituendi: sicque paulatim Mulier ad manifestam eius deuenit notitiam, dum apertam accepit ab illo sua Conscientiæ peccatique latentis cognitionem.

Hoc illud est videlicet quod vniuersim de nobis omnibus tam *Ezech. 37.* magnifice prædictum erat à Propheta, in persona Iudæorum: *Hac dicit Dominus Deus: Ecce ego aperiam tumulos vestros, & educam vos de sepulchris vestris, populus meus. Et scietis quia Ego Dominus cum aperuero sepulchra vestra, & eduxero vos de tumulis vestris.* Quid est enim tumulus aut tumulatum esse nisi latens habere peccatum in Conscientia? Quid est porro aperiri tumulum, nisi hoc latens manifestari peccatum? Quid est denique inde scire de Domino quia Dominus est, nisi inde illum manifestius nosse?

Hinc ergo deducta Veritas, quæ modo attentius consideretur, Numquam illustrius se manifestat Christus quam dum anima peccatricis illustrat Conscientiam, & peccatum latens ipsi manifestat. Differetur in crastinum solutio quaestionis à Samaritana, Christo propositæ, vt quàm sit certa hæc Veritas, quàm opportuna ad cognitionem & amorem Christi adaugendum expendi possit accuratius.

Sic autem aperte declaratur, ex tribus Diuinis attributis. Numquam enim illustrius se manifestat Christus quam dum suæ Bonitatis & Potentiæ simul ac Sapientiæ certiora dat signa. Vnum eorum sufficeret quidem ad certam sui manifestationem faciendam: sic distinctim, Deus à potentia cognoscitur in creatione mundi: sic à Sapientia in eius conseruatione: Et à bonitate in Redemptione humani generis: Sed quando tria illa simul concurrunt, tunc profecto *Ezech. 40.* *Matth. 18.* *funiculus ille est triplex qui difficile rumpitur, tres sunt illi digiti qui appendunt molem vniuersæ terræ, tres sunt illi testes in quorum ore stat omne verbum, tria sunt denique* quæ



*Numquam illustrius se manifestat Christus, quàm dum, &c. 561*

quæ de Christo enuntiant, quod ibi adsit, ibi operetur, ibi colendus sit & amandus.

*Verè Dominus est in loco isto, & ego nesciebam. Nonne sciebat Iacob qui loquitur, vbique esse Dominum? Sciebat certe, sed quia in illo loco, vidit scalam stantem super terram, & cacumen illius tangens cælum: Angelos quoque Dei ascendentes & descendentes per eam, & Dominum innixum scala dicentem sibi: Ego sum Dominus Deus Abraham patris tui, & quæ plura referuntur in quibus singularis Dei apparebat Potentia, Bonitas, & Sapientia; idcirco tam singulariter ibi Deum adesse cognouit, vt si per impossibile, non fuisset vbique, fuisset tamen in illo loco. Sic ipse Deus de Templo locisque sacris: Oculi quoque mei erunt aperti, & aures meæ erectæ ad orationem eius qui in loco isto orauerit. Nonne vbique oculos & aures habet erectas? Sed quia in templis plura Bonitatis & Potentiæ suæ demonstrat argumenta, ibi præsertim esse Deus & attendere & operari dicitur. O si tum etiam essemus illic erectiores & corpore & animo, quàm plura sentiremus Diuinæ signa præsentia!*

## II. P V N C T V M.

**S**ED dum animæ peccatricis illustrat Christus Conscientiam, & peccatum latens ipsi manifestat; certiora dat signa suæ Bonitatis, Potentiæ, ac Sapientiæ.

Primò quidem Bonitatis, nam cum peccatrix anima sit ab eo auersa, mereaturque in sua derelinqui auersione, quid est quod Dominus illam non deferit? Quid est quod æternis eam pœnis non addicit, quod eam Dæmoni non mancipat? Quid inquam est quod non modo non eam punit, sed præterea monet vt resurgat, accendit vt excitetur, illustrat mentem vt se suumque statum agnoscat, quid nisi bonitas & misericordia, tantoque major Bonitas, quanto res de qua tum agitur periculosa, momentosa & pretiosa est? O quàm bonus & suavis est Domine Spiritus tuus in omnibus, ideoque eos qui exerrant, partibus corripis: & de quibus peccant, admones, & alloqueris, vt relictæ malitia credant in te Domine.

Suauitas autem de qua hic Sapiens loquitur, est in Sapientia, Sapientia vero in variis & accommodatis modis quibus vnumquemque Christus mouet & excitat: quasi è re nata, quasi aliud



562 FERIA 4. Hebd. II. post Oct. Pent. Domine, video quia, &c.

agendo, quasi ab vno successiue ad aliud. Primo petit aquam, tum de alia quadam loquitur aqua, post de Viro, actandem de peccato. Sic cum Samaritana egit, sic cum vnaque peccatrice anima, sic saepe tecum dum minus forte cogitares, Sic attingit à fine usque ad finem fortiter, & disponit omnia suauiter.

Ibid. 8.

Potestatis denique singularem exhibet notam, dum quæ secreta sunt pandit: dum quæ obscura illustrat; dum quæ dura, emollit; quæ mortificata viuificat; Hoc nempe folius Dei est, sic in Creaturam illabi, vt citra vllum medium, solo suo spiritu, sola sua potentia, in inum animæ fundum penetret, ibique renes scrutetur & corda & penitiora quæque videat & videnda proponat. Hic est sermo viuus & efficax, & penetrabilior omni gladio ancipiti, & pertingens usque ad diuisionem animæ ac spiritus, compagum quoque ac medullarum, & discretor cogitationum & intentionum cordis.

Hebr. 4.

Possesne te Hunc celare tam Potentem? Possesne te ab illo abscondere? Aut quando etiam posses, vellesne ita latere & celari vt ab oculo tam benigno non videreris?

### III. PUNCTVM.

**N**VM QVAM ergo illustrius se manifestat Christus quàm dum animæ peccatricis illustrat Conscientiam, & peccatum latens ipsi manifestat: Quia quæ sunt Illustriora signa suæ præsentia, sic manifestat, vt minime dubitare possit Anima quæ se agnoscit peccatricem, quin sit Christus à quo illustratur, cum sit tantæ Bonitatis, tantæ Potentiæ, tantæque Sapientiæ donum, sic illustrari & conuerti, vt non sit alia Bonitas quam Diuina, non alia Potentia nec Sapientia quam suprema & infinita quæ hos effectus patrare possit.

Pf. 143.

Domine, quid est homo quia innotuisti ei, aut filius hominis quia reputas eum? Sic recolendum beneficium Iustificationis, sic agnoscendus amor Diuinus quo præuenti sumus, sic deprimenda mens in recordatione omnium quibus humiliari & abjici possit. Nec parcendum verbis & actis quibus peccati confessio exprimat, & Diuinæ satisfiat Iustitiæ. Contemplabor vt videam quid dicatur mihi; & quid respondeam ad arguentem me. VENITE & reuertamur ad Dominum, quoniam ipse cepit, & saluabit nos: percutiet & cu-

Abac. 2.

Os. 6.



Numquam illustrius se manifestat Christus, quàm dum, &c. 563

rabit nos : sciemus, sequemurque ut cognoscamus Dominum. CON-  
VERTE me & conuertiar, quia tu Dominus Deus meus. Postquam  
enim conuertisti me, egi poenitentiam : postquam ostendisti mihi, per-  
cussi femur meum. Confusus sum & erubui, quoniam sustinui oppro-  
brium adolescentia mea. ILLE homo qui dicitur IESVS, lutum Ioan. 9.  
fecit, & vixit oculos meos : Et abij, laui, & video. AN non co-  
gnoscitis vosmetipsos quia Christus IESVS in vobis est ? Nisi forte  
reprobi estis ; Quasi diceret, quid dubitatis in re tam aperta ? Po-  
testne dubitari quàm Christus addit praesens quando sua praesentia  
tot edit signa ? Potestne vero credi hic adesse hic mouere Conscien-  
tiam, sicque ad relapsendum, animam flectere, & non conue- ti,  
non compungi ? Certe hoc indicaret nimis obduratum pectus, &  
velut reprobam mentem. Adhortamini vosmetipsos per singulos dies  
donec hodie cognominatur, ut non obduretur quis ex vobis fallacia  
peccati. Participes enim Christi effecti sumus : si tamen initium sub-  
stantia eius usque ad finem firmum retineamus : Primos scilicet il-  
los Gratiarum motus quibus incipimus subsistere vita spiritali ; &  
quos ad finem firmum retinemus quando perfecte conuertimur  
& in perfecta conuersione perduramus.

Vide in 1. parte, Fer. 3. Hebdom. 4. post Epiphan.



## FERIA QVINTA.

### DE SVBLIMI COGNITIONE DEI QVAM CHRISTVS SAMARITANAE COMMVNICAT, ET ANIMAE SIBI ADDICTAE.

Spiritus est Deus, & eos qui adorant eum, in  
spiritu & veritate oportet adorare. Ioan. 4.

Bbbb ij



## VERITAS PRACTICA.

Sicut Spiritus & veritas sunt indiuisibiles, ita si in spiritu & veritate Deum velis adorare, oportet te toto indiuisum Dei esse.

*RATIO EST, Quia si in spiritu & veritate Deum velis adorare, oportet te perfecte subicere appetitum rationi, & rationem Deo.*

*Sed ut perfecte subicias appetitum rationi, & rationem Deo, oportet te toto non minus indiuisum Dei esse, quam spiritus & veritas sunt indiuisibiles.*

*Ergo & te talem esse oportet si in spiritu & veritate Deum velis adorare. Quæ sane Consideratio multum habere potest momenti ad acquirendam perfectionem.*

### I. P V N C T V M.

**Q**UÆSTIONEM à Samaritana propositam sic soluit Christus Dominus: *Mulier crede mihi, quia venit hora & nunc est, quando neque in monte hoc, neque Ierosolymis adorabitis Patrem. Vos adoratis quod nescitis: Nos adoramus quod scimus, quia salus ex Iudeis est: sed venit hora & nunc est quando veri adoratores adorabunt Patrem in spiritu & veritate. Nam & Pater tales querit qui adorent Eum. Spiritus est Deus, & eos qui adorant Eum, in spiritu & veritate oportet adorare.*

Quæ verba quia sunt valde sublimia & augusta, fusiori egent explicatione; Vt vero eorum explicatio sit fructuosior, inferenda est in ipsa propositæ Veritatis declaratione: cum & re ipsa Veritas quæ nunc expendenda proponitur non possit melius declarari quam ex illorum explicatione verborum. Sic enim habet: *Sicut Spiritus & veritas sunt indiuisibiles, ita si in spiritu & veritate Deum velis adorare, oportet te toto indiuisum Dei esse.* Ratio autem seu declaratio hæc est, quia si in spiritu & veritate Deum velis adorare, oportet te perfecte subicere appetitum rationi, & rationem



*Sicut spiritus & veritas sunt indivisibiles, ita & te, &c. 565*

Deo. Quod ut probe intelligatur, vides quam necessario sit explicandum quid sit *in Spiritu & veritate Deum adorare*: Sic porro dilucide explicatur proponendo tibi quatuor genera hominum de quibus Christus loquitur.

Primi sunt Samaritani, qui tum idola simul & Deum adorabant, talis quibusdam ritibus contra quos Dominus ait, *vos adoratis quod nescitis*. Secundi sunt Iudæi, qui vnum & solum Deum vero cultu & à Deo ordinato colebant ex quibus ipse Dominus erat oriundus ac proinde dicebat, *Nos adoramus quod scimus*. Tertij erant futuri Christiani, qui neque ut Samaritani tali s ritibus, neque ut Iudæi cruentis & merè corporeis Sacrificiis in templo tantum Ierosolymitano, sed in Spiritu & veritate adorarent, Id est, spirituali cultu qui partim futurus sit internus in virtutibus, & partim externus in Eucharistico Sacrificio, eritque magis verum Sacrificium veritate opposita non tantum falsitati Gentilium sed & vmbis & figuris Iudæorum, qui solis in cæremoniis exterioribus intenti erant & parum de cultu interno solliciti.

Quanti denique sunt ex Christianis perfectiores seu perfectioni vacantes, qui non tantum aliquoties in templis quod catei omnes faciunt, sed ubique & semper Deum colunt, suo viuendi modo qui dicitur in Spiritu & veritate: quatenus Spiritui subicitur caro, & mundus Christo, prout ipse Deus ordinat & ab unoquoque vult fieri. Et hi sunt Adoratores seu cultores & serui Dei quos Pater, id est, ipse Deus quaerit, nam sicut Deus Spiritus est, ita diligit spirituales seu spirituali vita viuentes. Sic expresse inter alios sanctus Athanasius, *Veri adoratores, inquit, sunt illi qui fugientes mundum & seculum, sic viuunt ut ipsi de domibus, de corporibus, de operibus, de verbis, de cogitationibus templa & Sacrificia faciant.*

At nonne hoc ipsum est quod in propositione dicitur, *Si velis in Spiritu & veritate Deum adorare, oportet te perfecte subicere appetitum rationi, & rationem Deo*? Sicut enim illa Dei adoratio in Spiritu & veritate, perfectionem Diuini cultus & Christianæ religionis continet; ita hæc perfectio continetur duplici hominis subiectione pro duplici qua constat parte, nempe appetitus quæ est pars Inferior sublit Rationi, & Ratio quæ est Superior se Supremo subdat, id est, Deo. Sic iam supra ex sancto Prospero & alijs Patribus dictum est: *Dominetur vitis ratio, subiciatur corpus*.

Prosper:  
In sententia  
tiii.



animo, animus Deo: & impleta est tota hominis perfectio. O quanta inde perfectionis commendatio & dignitas qua sic in Spiritu & veritate Deus adoratur, qua sic in homine quod Deus quærit, inuenit!

## II. P V N C T V M.

**S**ED vt subicias appetitum rationi, & rationem Deo, oportet te toto, non minus ac Spiritus & veritas sunt indiuisibiles, indiuisum esse Dei; Sed, quod idem est, oportet te totum esse indiuisum à Deo, oportet te totum, quantus quantus es in animo & corpore, non ex parte tantum, sed ita omnino esse Dei; nihil vt prorsus agas aut cogites quam quod Deo placet.

Si enim ex parte aliqua deesses Deo, vel ex parte inferiori deesses vel superiori; nam si vtrique pars sua in subiectione contineretur, profecto totus esses Dei, totus esses perfectus vt dictum est, ac proinde totus esses Dei, cum alioquin perfectus non esses, nisi totus illius esses. Vnde necessario ex his duobus alterutrum sequitur, vel quod totus sis Dei si perfecte subicias appetitum rationi, & rationem Deo: vel si non sis totus Dei, non perfecte compleas subiectionem illam vt iusque patris; Subtractio quadam est, subtractionis es filius, vt ait Apostolus: *Quod si subtraxerit se, non placebit anima mea. Nos autem non sumus subtractionis filij in perditionem*, Quali diceret, toti sumus Dei nostri, sicut filij sunt toti patris; aut si aliquid de toto illo subtraheremus, non essemus illius toti; & perinde periremus ac si penitus non essemus Dei. Quia videlicet sicut si Spiritus humanus diuideretur, totus periret, aut sicut si esset diuisa veritas iam non esset veritas, sed mendacium & falsitas, ita plane si vel ex aliqua tantum parte desis Deo, totus deinde deeris; Vel illum totus relinques, vel te Ille totum abjiciet, quia non te vult ex parte aliqua, sed te totum. *Ex toto corde tuo, ex tota anima tua: ex tota mente tua: ex totis viribus tuis: ex tota virtute tua: ex tota fortitudine tua.* Non aliter reperies expressum primum mandatum quam ex toto, vnde si aliquid demas, iam non explēs mandatum.

Math. 23.  
Luc. 10.  
Marc. 12.  
Deut. 6.

3 Reg. 3.

*Diuidatur infans, inquiebat falsa mater: At verò vera, Non diuidatur. Obsecro Domine date illi infantem viuum, & nolite interficere eum.*



*Sicut spiritus & veritas sunt indivisibiles, ita & te, &c. 567*

Sic plane Diuina Bonitas non patitur nos à se diuidi: nos ita totos sibi vult esse, vt non aliter eius simus quam si simus toti.

O quàm longe errant qui tamquam seueritatis & Iustitiæ iugum esset, reformidant quod audiunt de perfecta sui mortificatione; non est id seueritatis & Iustitiæ, sed Bonitatis & beneuolentiæ.

### III. PUNCTVM.

**S**ICVT ergo Spiritus & veritas sunt indivisibiles, ita si in Spiritu & veritate Deum velis adorare, oportet te totum indivisum Dei esse: Quia oportet te ex vtraque tui parte esse subjectum Deo, quod est adorare Deum in Spiritu & veritate, simulque totum illius esse: Aut si aliqua ex parte desit illa subjectio, desit & adoratio in Spiritu & veritate. Iam non secundum veritatem ambulas, iam tu ex illis es de quibus Apostolus: *Qui pereunt, eò quod Charitatem veritatis non receperint, vt salui ficerent.* 2. Thess. 2.

Vellesne id tibi exprobraretur? Vellesne fugere Deum te quærentem? Quò tandem ires si ab illo fugeres? Quocumque tandem pergas, te se.rius ocyus inueniet; sed tua interest vt qualem te quærit, talem inueniat. Talem autem quærit vt adores eum in Spiritu & veritate: quod cum perfecte non possis explere nisi totus illius sis, nisi te totum illi subicias, hoc hodie refer ex hac Consideratione, te tantum obligari ad hanc perfectam subjectionem, quantum obligaris ad adorandum Deum in Spiritu & veritate, quantum obligaris ad colendum Deum cum alios sui Cultores nolit, quantum denique obligaris ad eum animi statum tibi comparandum, qualem quærit Deus, ne si forte te non inueniat qualem quærit, neque tu illum talem inuenias qualem quæris. Cum quæseris Dominum Deum tuum, inuenies eum, si tamen *toto corde quæseris*: Quasi diceret, non enim aliter inuenies qualem scilicet quæris, nisi toto corde quæseris. Quid est autem toto Dominum corde quærere, nisi nos totos ipsius esse, nos totos ipsi subjectos, & nos totos quales quærit? Vnde & alibi; *Præbete corda vestra & animas vestras, vt queratis Dominum*, Rursumque aptissime: *Manus Dei nostri est super omnes qui quarunt eum in bonitate*, Id est, Illi subjecti sint & humiliati sub potenti manu Dei *Deut. 4.* *1. Par. 22.* *1. Esd. 8.*



§ 68 FERIA 6. Hebd. II. post Oct. Pent. Ego sum qui loquor tecum.

Joan. 7.

2. Cor. 12.

neceſſe eſt, qui ſic eum quaerunt vt inueniant, aut certe non inuenient. *Queretis me, & non inuenietis.* TIMEO, inquit Apoſtolus Corinthiis, *ne forte cum venero, non quales volo, inueniam vos; & ego inueniar à vobis, qualem non vultis.* O quam timendum nobis ne ſic nobiſcum Deus.

Vide in 1. parte, Die 4. Ianuarij. Et in 4. parte, Dominica 17.



## FERIA SEXTA.

### DE CONTINVA COMMUNICATIONE

CHRISTI CVM ANIMA QVAVIS GRATIOSA

ET FIDELI, AD BENE SEMPER

AGENDVM.

*Ego sum qui loquor tecum.* Ioan. 4.

### VERITAS PRACTICA.

Quod Chriſtus ſemper vellet, nobiſcum loqui & agere, ſi vellemus: ſic certe volendum eſt.

RATIO EST, Quia idcirco ſemper vellet Chriſtus nobiſcum loqui & agere ſi vellemus, vt ſemper poſſimus bene agere, vt bene ſemper agamus.

Atqui hoc nobis volendum eſt, ſic ſemper bene agere.

Ergo quod Chriſtus ſemper vellet nobiſcum agere ſi vellemus, ſic certe volendum eſt. Et fructus inde uberrimi ad omnem vite partem emanarent.

I. PVNCTVM.



I. P V N C T V M.

**D**IVINVM Christi sermonem de spirituali cultu quem quærit à nobis Deus, non potuit non admirari Samaritana mulier: ex eoque factum putatur vt de venturo proxime Messia, cogitationem susceperit, quasi subodoraretur Illum esse aut Illi similem cui loquebatur: vnde & propterea sic Christo intulit: *Scio quia Messias venit qui dicitur Christus, cum ergo venerit Ille, nobis annuntiabit omnia.* Tum vero Christus ipse Dominus: *EGO SVM QVI LOQVOR TECVM.*

O verba verba ignita, & penetrabiliora omni gladio ancipiti! Quis splendor inde erupit in intellectum mulieris? Quis ardor eius voluntatem accendit? Quis amœnus & suavis stupor omnes eius demulsit sensus? Hæc facilius cogitari possunt quam exprimi.

Sic porrò Ille Idem semper nobiscum, sic ille ipse Christus Dominus numquam cessaret nobiscum loqui, nobiscum meditari, nobiscum studere, nobiscum omnia simul agere quæ nobis agenda sunt. Semper id vellet si vellemus, si eum sineremus agere, si non obstaremus, si consentiremus agenti. Numquid hoc mirum! At numquid magis mirum quod nolimus sic eum nobiscum agere, quod agenti obstemus, quod eius actionem & operam interturbemus! Hæc est scilicet animi nostri stupiditas, hæc est eius dementia vt cum se Christus continuo nobiscum communicet ad bene semper agendum, malimus bene non agere quam sic Christo attendere. Contra hodie expergiscendum, excitandusque modo animus, vt plene intelligat, *Quod sicut vellet Christus cuncta nobiscum semper agere si vellemus, sic omnino velimus oportet, sic velimus incessanter.*

Ratio iam proximè producta est, quod idcirco vellet Christus nobiscum semper agere vt bene semper operemur. Sicut enim sine illo nihil possemus agere, vt supra visum est, sic cum illo possumus omnia: ne vero causamur nobis deesse auxilium, sic semper Ille adest, vt numquam dicendum sit, *Per Deum abest*, sicut *Ecclesiæ. 15.* expresse monet Sapiens. Cur autem quæ de Deo dicuntur vniuerfim, dicantur particulatim de Christo, hæc ratio est, quia Ille est causa meritoria totius Gratia quæ ad bene agendum datur,



570 FERIA 6. Hebd. 11. post Oct. Pent. Ego sum qui loquor tecum.

& quoties datur atque operatur Gratia, tunc Christus non modo cum duabus aliis Diuinis Personis operatur vt Deus, sed simul vt Deus homo singulari influxu concurrat ad opus tamquam vitis ad fructum palmitum, tamquam caput ad membrorum motum, tamquam lux mundi ad illustrationem & fecunditatem totius vniuersi.

3<sup>ess</sup>. 6. c. 16. Sic luculente Tridentinum ex Euangelio: Cum, inquit, Ille ipse Christus IESVS tamquam caput in membra, & tamquam vitis in palmites, in ipsos Iustificatos *IVGITER VIRTUTEM INFLVAT*: quæ virtus bona eorum opera semper antecedit, & comitatur & subsequitur, & sine qua nullo pacto, Deo grata & meritoria esse possent: nihil ipsis Iustificatis amplius deesse credendum est quo minus plenè illis quidem operibus quæ in Deo sunt facta, Diuina legi pro huius vite statu satisfecisse, & vitam æternam suo etiam tempore, si tamen in gratia decesserint, consequendam, vere promeruisse censeantur, cum Christus Saluator noster dicat: si quis biberit ex aqua quam ego dabo ei, non sitiet in æternum, sed fiet in eo fons aquæ salientis in vitam æternam. Quasi diceret, numquam deerit illi gratia per me danda, neque vnumquam cessabo illi adesse & cum illo agere, qui me volet secum operari.

Sap. 9.

O bonitatem! ô Sapiëntiam! Agnosco illam esse Sapiëntiam quam à bonitate Diuina petebat Sapiens. Da mihi sedium tuarum assistricem Sapiëntiam & noli me reprobare à pueris tuis: mitte illam de cælis sanctis tuis & à sede magnitudinis tuæ, vt mecum sit & mecum laboret, vt sciam quid acceptum sit apud te: scit enim illa omnia & intelligit, & deducet me in operibus meis sobriè, & custodiet me in sua potentia. Sic orandum quotidie.

## II. P V N C T V M.

**S**ED velimus oportet sic semper bene agere.

Primò id necessario volendum est quando aliter non potest euitari peccatum: ad hoc enim euitandum sic obligati sumus, vt numquam velle peccatum liceat. *Nemini datum est peccandi spatium.*

Secundò, quando ex officio, ex obedientia, ex Caritate aut ex alia quapiam virtute tenemur agere; tunc bene exercenda virtus, tunc bonum bene est agendum, nec omittenda aut differenda



occasio prout monet Sapiens : *Noli prohibere benefacere eum qui potest : si vales , & ipse benefac.* Ne dicas amico tuo : vade & reuere-  
tere , cras dabo tibi , cum statim possis dare. Prou. 3.

Tertiò denique , quod hic præcipue quæritur , vbique & semper velimus oportet bene agere , nam nisi talis esset voluntas , non esset bona , non esset conformis Christo qui semper nos secum agere desiderat , *Ignem veni mittere in terram , & quid volo nisi ut accendatur ?* Quando hoc solum esset Christi desiderium , nonne mereretur à nobis impleri ? Cur nobis ille adest ad omnia ? Quidquid dixeris , siue honor sit Patris , siue meritum fusi Sanguinis quo stimulatur , siue Caritatis ardor quo nos prosequitur ; siue boni æterni consideratio , quod tantum perit nobis aut prouenit , quantum otiose vel fructuose operamur ; quidquid inquam horum dixeris quo moueri possit Christus ad continuam sui communicationem , dici debet ad inducendam nostram voluntatem , vt se Christo conformans , æque velit bene agere atque Ipse desiderat & contendit. Luc. 12.

Quale enim illud est scire Christum stantem ad ianuam & pul-  
fantem vt ingrediatur , vt operetur , vt omnia nostra dirigat , in-  
struat & promoueat pro sua Bonitate & Sapientia : & nos foris  
Eum deseramus , nos ingressum denegemus , nos operam nostram  
detrectemus , nos probum hoc subeamus , *In propria venit , & sui eum non receperunt :* nos ipsum aliquando adituri audiamus quod  
dixit Isaac Geraritis , *Quid venistis ad me , hominem quem odistis ,*  
& expulistis à vobis ? Possesne hoc ferre probum ? Apo. 3.  
Gen. 26.

### III. P V N C T V M.

**Q**UOD ergo vellet Christus semper nobiscum agere si vellemus :  
hoc certe volendum est ; Hoc omnino agendum paribus cum  
Christo animis : vt non defraudemur à die bono , & particula boni  
doni non te prætereat. Ecclesi. 14.

Hoc est quod tantopere sacra vrgent Scripturæ : *Quodcumque potest manus tua instanter operare.* OMNIS arbor qua non facit fructum bonum excidetur. OMNEM palmitem in me non ferentem fructum tollet eum. ABUNDANTES estote in omni opere Domini semper. BONVM facientes non deficiamus : tempore enim suo metemur non deficientes : Ergo dum tempus habemus , operemur bonum. Eccl. 9.  
Matth. 7.  
Ioan. 15.  
1. Cor. 15.  
Gal. 6.  
Heb. 12.

CONTEMPLANTES ne quis desit gratie Dei.



Luc. 12.

Hoc est quod ipsa suadet ratio, quod Charitas Christi vrget, quod utilitas nostra exigit, quod nostra premit necessitas. Nisi enim cum metu & tremore salutem operemur: Nisi thesaurizemus nobis thesauros in celo: Nisi diuites in Deum simus: de salute periclitamur. At quis metus & tremor? Qui thesauri? Quae diuitiae? Si tam multis bonis priuamur operibus, quantis priuabimur si Christo delimus volenti semper agere?

Hoc est denique quod tu ipse oras in singulos dies; *Dirigere & sanctificare, regere & gubernare dignare Domine Deus, rex caeli & terra hodie corda & corpora nostra, sensus, sermones, & actus nostros in lege tua, & in operibus mendatorum tuorum: ut hic & in aeternum te auxiliante salui & liberi esse mereamur, Saluator mundi.*

Ecclesi. 2.

Rom. 8.

Serm. 13. de  
Verbis  
Apost.

l. de Corrept.  
& Grat.  
c. 2.

Capisne quid sit dirigi, quid sanctificari, quid regi & gubernari à Domino? Visne quod petis: aut id non vis? Si te nolle agnoscis, cur id oras? Cur dissimulas? Cur hypocritam agis? *Vae duplici corde & labiis scelestis.* Si te id velle affirmas: Nonne est velle semper cum Christo agere? Quia ut dirigat, semper illi agendum est, nec nisi nobis simul agentibus nobiscum aget: nam & ipsi qui aguntur ab eius Spiritu, non aguntur ut nihil agant. Quod praeclare docet sanctus Augustinus. *Dicit, inquit, mihi aliquis, Ergo agimur non agimus: Respondeo, immo & agis & ageris: & tunc bene agis si à bono agaris. Spiritus enim Dei qui te agit, adiutor est agentibus. Nemo autem agitur si ab illo nihil agatur. Spiritus enim adiuuat infirmitatem nostram. Et alibi expressus: Intellegant si filij Dei sunt, se Spiritu Dei agi, ut quod agendum est agant, & cum egerint, illi à quo aguntur, gratias agant. Aguntur enim ut agant, non ut ipsi nihil agant. Et hoc eis ostenditur quid agere debeant ut quando id agunt, sicut agendum est, id est, cum dilectione & delectatione Iustitiae, suauitatem quam dedit Dominus, ut terra eorum daret fructum suum, accepisse se gaudeant.*

Sed nisi etiam agant quid restat nisi ut infructuose gratiam se accepisse doleant?

Vide in 1. parte, Fer. 6. Hebd. 3. in Aduentus.

Numquam est Dei amor otiosus.



*Rape ad Eum quos potes. Nam si potes & non rapis, &c. 573*



## SABBATO.

DE ZELO QUI EX COGNITO  
CHRISTO SENTITVR, AD EVM ALIIS  
MANIFESTANDVM, EXEMPLO  
SAMARITANAE.

*Venite & videte hominem qui dixit mihi omnia  
quaecumque feci : Numquid ipse est Christus ?  
Ioan. 4.*

### VERITAS PRACTICA.

*Rape ad Eum quos potes. Nam si potes & non rapis,  
tot cælo perdis quot Christo lucrari poteras.*

*RATIO EST, Quia tot cælo perdis quot tuâ culpa pereunt.  
Sed si potes & non rapis, tot tua culpa pereunt quot Christo  
lucrari poteras.*

*Ergo & tot cælo perdis. Quod sanè damnum ita est lugendum,  
ut in eo lugendo plus hic operæ poni debeat quàm in ipsa pro-  
banda Veritate.*

### I. PUNCTVM.



*VI Dominum comitabantur Discipuli, quando cum Sa-  
maritana muliere coepit loqui, abierant omnes in proxi-  
mam ciuitatem vt cibos emerent; Tum vero cum redierunt,  
Primò quidem mirati sunt quia cum muliere loquebatur, nemo ta-  
men dixit quid quaris, aut quid loqueris cum ea? Sed rogabant eum*



*dicentes, Rabbi, manduca. Ille autem dicit eis; Ego cibum habeo manducare quem vos nescitis. Dicebant ergo Discipuli ad inuicem, Numquid aliquis attulit ei manducare! Dicit eis IESVS, meus cibus est vt faciam voluntatem eius qui misit me, vt perficiam opus eius.*

Quæ postrema verba sunt valde obseruanda, tum propter eam quam in se continent dignitatem, tum propter respectum quem habent ad propositam Veritatem quæ est de zelo manifestandi Christi, ad exemplum Samaritanæ mulieris, quæ statim vt audiuit illum esse Messiam qui expectabatur, reliquit hydriam & abiit in ciuitatem & dicit illis hominibus: *Venite & videte hominem qui dixit mihi omnia quacumque feci, Numquid ipse est Christus?* Quod quidem testimonium tanti fuit ponderis, vt multi Samaritanorum crediderint, Eum conuenerint, & in ciuitatem suam adduxerint, vbi cum duos dies mansisset, multo plures crediderunt in Eum propter sermonem eius. Et mulieri dicebant, quia iam non propter loquelam tuam credimus, ipse enim audiuiamus & scimus quia hic est vere Saluator mundi.

O quantum potuit vna Mulier, tam breui tempore! Vix vnam modo mulierem multi viri conuertunt, & ecce vna mulier tam multos adducit viros ad Christum! Vndenam hoc? Elanguit plane zelus noster, & quasi esset indifferens ijs etiam qui Concionatores habentur, quid vel quomodo dicant, dum dicendo placeant, sic suum leuiter munus obeunt.

Itane verò sit illud indifferens quod nisi diligenter obeas, ita damnosum est vt de salute non tantum Auditoris sed & ipsius Concionatoris agatur? Itane Christi causa peragitur? Itane negotium salutis animarum curatur? Tu quisquis in id operis à Christo vocatus es, disce quanti sit ponderis, disce quàm meritò S. Augustinus te hoc vrgeat dicto: *Rape ad Eum quos potes. Nam si potes & non rapis, tot cælo perdis quot Christo lucrari poteras.*

Certe sufficeret ipsius rei Dignitas, ipsius Christi Ratio cui vel vnam lucrari animam Diuinorum est Diuinissimum opus: sed saltem cogita quantum etiam tua referat si quos potes non rapis. Non enim modò præstantissimum omittis opus, sed horrendam accersis tibi perniciem: Quid enim horrendum magis quam eorum esse perditionis causam quorum salutis author fieri poteras? Sic autem prorsus est, tu illos ipse perdis qui tua culpa pereunt. Hoc primum expende. Nondum tibi demonstratur quod culpa tua



*Rape ad Eum quos potes. Nam si potes & non rapis, &c. 575*

pereant, sed posito quod sequenti patebit puncto, nonne id verè dicitur, quod si quis tua culpa perit, tu illum perdis? Nam si non illum perderes, quanam esset tua culpa? Vel cur dicitur culpa tua, nisi quia tale infert damnum? Nisi enim damnum inferretur non esset culpa vel non grauis, cum culpæ ratio vel grauitas à damno consequenti petatur.

Sic dicitur de quibusdam Sacerdotibus quod *peccatum eorum* 1. Reg. 2.  
*erat grande nimis coram Domino, quia homines retrahebant à sacrificio Domini*, quasi diceretur, non aliter esse peccatum aut non ita grande nisi hoc sequeretur detrimentum.

Nonne si des alteri scandalum, grauiter peccas, etiamsi leue illud sit quod agis, etiamsi non sit ex se malum, etiamsi bonum alioquin esset? Quia tamen proximum scandalizat, quod est graue damnum, certe est grauis culpa, nec est aliter culpa quam quia damnum illud affert, & quanta est grauitas damni, tanta est culpæ grauitas: Vnde Apostolus: *Omnia quidem sunt munda, sed malum est homini qui per offendiculum manducat.* Rom. 14.  
*Sic peccantes in fratres & percutientes conscientiam eorum infirmam, in Christum peccatis.* 1. Cor. 8.  
*Quapropter si esca scandalizat fratrem meum, non manducabo carnem in aeternum, ne fratrem meum scandalizem*, Id est, ne mea culpa pereat & ne illum perdam qui mea culpa sic periret. Nam vtrumque pari modo Apostolus ita connectit vt si ex scandalo quis pereat, pereuntem perdere is dicatur qui scandalizat. *Et peribit Infirmus in tua scientia frater propter quem Christus mortuus est? Noli cibo tuo illum perdere pro quo Christus mortuus est. Noli propter escam destruere opus Dei.* Nonne hoc ipsum est quod habet propositio, Tot cœlo perdis quod tua culpa pereunt? O quæ culpa si culpæ grauitas ex damno penditur!

## II. P V N C T V M.

**S**ED si potes ad Christum rapere & non rapis, tot tua culpâ pereunt quot Christo lucrari poteras.

Si enim potes cur non rapis? Si quæreretur cur non raperes, hoc vnum posses dicere, quod non possis: Sed si cum possis non rapias, quid dices? Quid excusabis, Tu præsertim qui hoc debes ex officio? Nihil certe aliud respondendum restat nisi quia non vis. Percurre animo quidquid obuenerit cogitandum de homi-



ne qui non præstat quod potest & quod debet, quare quamobrem non illud præstet, vide num aliud præter illud vnum occurrat quod nolit, si enim vellet cum possit, nonne id faceret? Ac proinde cum id non faciat, nonne inde est quod nolit facere?

Iam verò nolle quod debes & quod potes in re tam seria & graui, nonne culpa est, nonne crimen est, nonne peccatum tam graue quàm ipsum scandalum, quod vt dictum est, non aliter est peccatum quàm quod eum perdit quem scandalizat?

Nec dicas eos sua perire culpa, vel tametsi quidquid potes, effecisses non inde ipsos conuersum iri ad Dominum. Esto enim sint in culpa: tunc vero extra esse dicendus es? An nescis multos ad eandem posse culpam concurrere? An ignoras quod illius qui quod debet & quod potest non vult efficaciter, mera negligentia est, quæ ex illorum genere peccatorum est quæ omissionis dicuntur, & quæ non minorem sæpe culpam contrahunt quam quæ commissionis vocant? *Quomodo nos effugiemus*, inquit Apostolus, *si tantam neglexerimus salutem*, Id est, si tantam nobis comparandæ vel aliis procurandæ salutis occasionem non acceperimus?

Hebr. 2.

Sic sol causa est tenebrarum & frigoris, quia non illustrat aut calefacit aërem. Sic anima dum discedit è corpore corpus deforme reddit: sic medicus ægrum occidit, dum sanare negligit. Sic diues pauperem quem non pascit interficit. Sic plane ad rem nostram: si salutis alienæ negligentes *districte iudicentur*, inquit sanctus Gregorius, *ex tantis procul-dubio rei sunt, quantis venientes ad publicum prodesse potuerunt*. Est autem prorsus idem, non omnino loqui & non loqui apposite: cum perinde ex utroque salus æterna iactetur. Vnde & idem sanctus Doctor: *Admonendi sunt*, ait, *vt si proximos sicut se diligunt, minime illis taceant vnde eos iuste reprehendant. Vocis enim medicamine vtrumque saluti concurritur, dum & ab illo qui infert, actio praua atque perversa compescitur, & ab hoc qui sustinet doloris feruor vulnere aperto temperatur. Qui enim proximorum mala respiciunt, & tamen in silentio linguam premunt, quasi conspectis vulneribus usum medicaminis subtrahunt, & eò mortis authores sunt, quò virus quod potuerant curare noluerunt.*

1. p. Pass.  
c. 5.

3. p. Adm.  
15.

Ibid. Adm.  
26.

Quod & fulissime postea repetens: *Quo reatu*, inquit, *constringantur*, *aspiciant qui dum peccantibus fratribus Verbum predicationis subtrahunt,*



Rape ad Eum quos potes. Nam si potes & non rapis, &c. 377

subtrahunt, morientibus mentibus vite remedia abscondunt. Vnde & bene quidam Sapiens dicit: Sapiencia abscondita, & thesaurus inuisus, quæ utilitas in virisque? Si populum fames attereret, & occulta frumenta ipsi seruarent, auctores procul-dubio mortis existerent: qua itaque plectendi sunt pœna considerent qui cum fame Verbi, anima peccant, ipsi pacem perceptæ gratia non ministrant: Vnde & bene per Salomonem dicitur, qui abscondit frumenta, maledicitur in populis: Et post nonnulla quibus hanc sententiam explicat sic pergit: Si medicinalis artis minimè ignari secundum vulnus cernerent, & tamen secare recusarent, profecto peccatum fraternæ mortis ex solo torpore committerent: quanta ergo culpa inuoluantur, aspiciant qui dum cognoscunt vulnera mentium, curare negligunt ea, sectione Verborum. Vnde & bene per Prophetam dicitur, Maledictus qui prohibet gladium suum à sanguine. Gladium quippe à sanguine prohibere, est prædicationis Verbum à carnalis vitæ interfectione retinere, de quo gladio rursum dicitur, Et gladius meus manducabit carnes. Ecclesi. 29.  
Prov. 11.  
Jer. 48.  
Deu. 32.

Ex quibus & aliis quæ plura ibi prosequitur, manifeste patet, quod erat demonstrandum, tuam esse culpam si pereant qui per te saluari poterant. Quod S. Iustinus Martyr, sic paucis sed efficacibus decernit Verbis: Qui possunt nec docent, damnationem incur-  
In Dialogo cum Tiphys.  
runt.

### III. P V N C T V M.

**A** V D I ergo Diuinum monitum: Rape ad Eum quos potes, nam si potes & non rapis, tot cælo perdis quot Christo lucrari poteras. Auditores ad audiendum sunt aliquando excitandi, sed modò, vt ipsi audiant Concionatores: sic eos excitat qui supra sanctus Gregorius: Audiant quod talentum qui erogare noluit cum sententia damnationis amisit. Audiant quod Paulus eo se à proximorum sanguine mundum credidit, quo feriendis eorum vitiis non pepercit, dicens, Confessor vos hodierna die quia mundus sum à sanguine omnium vestrum: non enim subterfugi quo minus annuntiarem omne consilium vobis. Audiant quod voce Angelica Ioannes admonetur cum dicitur, QVI AVDIT, DICAT, VENI. Vt nimirum cui se vox interna insinuat, illuc etiam clamando alios, QVO IPSE RAPITVR, TRAHAT, Ne clausas fores etiam vocatus inueniat, si vocanti vacuus appropinquat. Audiant quod Isaias qui à Verbi Ministerio ta-  
3. p. Adm.  
26.  
Act.  
Ap. 22.



16. 6. cuit, illustratus superno lumine, magna voce pœnitentia semetipsum ipse reprehendit dicens, vae mihi quia tacui. Audiant quod David hoc Deo in munere obtulit quod prædicationis gratiam quam acceperat non abscondit, dicens, Ecce labia mea non prohibebo, Domine tu cognouisti. Iustitiam autem tuam non abscondi in corde meo, Veritatem tuam & salutare tuum dixi. Audiant quid sponsi colloquio ad sponsam dicitur, que habitas in hortis, amici auscultant te, fac me audire vocem tuam. Audiant quod Moyses cum irascentem Deum populo cerneret, & assumi ad ulciscendum, gladios inberet, illos à parte Dei denuntiavit existere qui delinquentium scelera incunctanter ferirent, dicens, si quis est Domini iungatur mecum. Ponat vir gladium super femur suum. Ite & redite de porta usque ad portam per medium castrorum, & occidat unusquisque fratrem suum, & amicum & proximum suum. Gladium quippe super femur ponere, est, prædicationis gladium voluptatibus carnis anteferre, ut cum sancta quis studet dicere, curet necesse est illicitas suggestiones edomare. De porta vero usque ad portam ire, est à vitio usque ad vitium per quod ad mentem mors ingreditur increpando discurre. Per medium vero castrorum transire, est tanta equalitate intra Ecclesiam viuere, ut qui delinquentium culpas redarguit, in nullum se debeat fauorem declinare: unde & rectè subjungitur, occidat vir fratrem & amicum & proximum suum. Fratrem scilicet & amicum & proximum interficit qui cum punienda inuenit, ab increpationis gladio, nec eis quos per cognationem diligit, parcit. Si ergo ille Dei dicitur qui ad ferienda vitia Zelo Diuini amoris excitatur, profecto esse se Dei denegat qui in quantum sufficit, increpare vitam carnalium recusat.

Atqui hæc quidem, ut dixi, sufficerent ad rapiendos quosque Prædicatores ut ipsi quos possunt, ad Christum rapiant; si quis verò se nimis adhuc desidem persentiret: cogitandum illi attentius quid sit perdere animam, quid sit sua culpâ perire animam quam si voluisset, saluare cum Christo poterat.

Primò quidem quando sola cogitaretur animæ dignitas, sicut nihil in tota rerum vniuersitate tanti est pretij, sic nulla foret tantæ iactura boni, si vel totus periret orbis, quanta est vnius animæ pereuntis, spectatâ tantum ut dictum est, naturali animæ dignitate.

Deinde verò si perpendatur Beatitudo cui fruendæ creata erat anima, & unde tuâ culpâ excidit, quis illius boni pretium, quis illius iacturam pretij commemorare possit?



Rape ad Eum quos potes. Nam si potes & non rapis, &c. 379

Adde his Diuinæ Gloriæ quantum conducat ex salute vel perditione animæ ! Vide quanto interuallo hæc inter se distent, vel laudari Deum in omnem æternitatem ab anima, vel blasphemari !

Quid porro censes de Christi Sanguine ? Quanti putas illum valere si rem metiris suo pondere ? At quantus quantus est ille Sanguis, tanti valebat anima quam perdidisti, nec minoris es reus boni deperditi quàm magnum est Diuini Sanguinis pretium quo illa redempta fuit anima quæ per te periit.

Iam verò Infernum ingredi, vide sempiternos illos ignes, Diuinæ sufflatu accensos iræ : intueri animam illic volui & reuolui per immensa illa quæ numerari non possunt annorum spatia ; quare quamobrem sic ardeat ; audi te in causa esse, audi quemadmodum te ad Diuinum Tribunal prouocet ; prouocatum aspice Iudicem qui de negligentia vel vanitate tua in dicendo cognoscat, & sic reuera decidat, quod si fructuosius prædicasses, illa nunc coelo frueretur anima quæ in Inferno cruciatur, teque illi tandem conjungat in poenis animæ cuius culpam fouisti !

Parumne tibi hæc ad stimulum & ad propositæ Veritatis præxim valere videbuntur ? Et ne tibi gratis dicta putes, audi Scripturam, audi Prophetam, audi Dominum. *Si steterissent in consilio meo & nota fecissent Verba mea populo meo, auertissem utique eos à via sua mala, <sup>1er. 23.</sup> & à cogitationibus suis pessimis. Quid paleis ad triticum ? Numquid non Verba mea sunt quasi ignis, dicit Dominus, & quasi malleus conterans petram ? Propterea ecce ego ad Prophetas qui nihil profuerunt populo huic : Dabo vos in opprobrium sempiternam, & in ignominiam æternam quæ nunquam obliuione delebitur.*

Hæc pauca ex multis quæ vno continentur Capite, vnde ad uberiorem fructum, Vide etiam atque etiam illud Apostoli quam fit apte verèque dictum:

Opportunè, importunè.

*PRAEDICA*, inquit, Verbum, Insta opportunè, importunè, ar. 2. Tim. 4. *gue, obsecra, increpa cum omni patientia & doctrina. Erit enim tempus cum sanam doctrinam non sustinebunt, sed ad sua desideria coaceruabunt sibi magistros prurientes auribus ; & à veritate quidem auditum auertent, ad fabulas autem conuertentur. Tu vero vigila. In omnibus*



§ 80 Sabbato Hebd. 11. post Oct. Pent. Venite, videte hominem, &c.

*labora, opus fac Evangelista. Ministerium tuum imple, sobrius esto.* Quasi diceret, quidquid sit de aliis, Tu tuo fungere officio, siue adsint plures aut pauciores qui audiant, siue multus aut nullus fructus inde proueniet; Insta semper opportunè, importunè, Insta importunè sicut opportunè, Eodem te gere modo apud paucos quo apud multos Auditores: eandem adhibe operam & constantiam in modico atque in plurimo fructu. Hoc est enim quod multos à dicendo auertit qui, nisi frequens sic Auditor & locus commodus, & opportunum tempus, non putant sibi esse dicendi locum & tempus. Sed errant,

*RATIO EST, Quia non aliter dicendum est quando opportunè dicetur, quàm ut Christo seruias, ut ipsi placeas, & quod à te Deum velle putas, exequaris.*

*Sed quando dices importunè, seu quando modicus aut nullus erit sermonis fructus, perinde Christo seruies, perinde illi placebis, & quod à te exigit solues, ac si opportunè & fructuosè diceres.*

Sic ex æquo igitur opportunè instandum est & importunè siue ex superiori suggestu dicas, siue ex plano: siue domi, siue foris: siue in publico, siue in familiari congressu.

#### I. P V N C T V M.

Proib. 15.

**V**ERVM id quidem quod ait Sapiens, sermonem opportunum esse optimum, & quædam interdum offerri ad dicendum opportunitates quæ foelices admodum habent exitus: sed ubi maxime agitur de Christo prædicando, vel vniuersim de salute animæ, vel particulatim de aliquo alicuius arguendo vitio, non sunt illæ foelices ita expectandæ occasiones, ut si non adsint, non dicas: Nam Ratio præcipua & primarius finis cur in hoc opere laboremus non tam est fructus operis & laboris, quàm Diuina voluntas & ordinatio quæ nos huic operi destinauit & cui obedire & placere, totum esse debet quod quæramus.

Hoc valde expendendum in omni quidem materia sed in hac



præcipuè vbi sese multi fines ingerunt qui Diuinum hoc opus valde deprauant. *Dum omni modo, siue per occasionem, siue per veritatem* Phil. 1. *Christus annuntietur*, est quidem gaudendum cum Apostolo, sed diligenter videndum istis Annuntiatoribus, quomodo & quo fine illum annuntient. Audi eundem Apostolum, vno abreuiato verbo omnia concludentem, *Sic nos existimet homo ut ministros Christi* 1. Cor. 4. *& dispensatores Mysteriorum Dei: hic iam queritur inter dispensatores ut fidelis quis inueniatur. En fidelitas est*, illud verbum abbreviatum. Quid est autem esse fidelem? Idem ipse se alibi explicat, *Dum modo consummam cursum meum & ministerium verbi quod accepi à Domino IESU.* Illudque vnum est quod identidem suis inculcat; *Ministerium tuum imple. Vide ministerium quod accepisti in Domino ut illud impleas.* Act. 10. 2. Tim. 4. Coloss. 4.

Hoc ipsum denique est quod dicebat Christus, *meus cibus est* ut Ioan. 4. *faciam voluntatem eius qui misit me, ut perficiam opus eius.* Quasi diceret, hæc mea vita, hoc vno sustentor & viuo ut quid velit à me Is qui me misit, hoc perficiam: Vnde & discedens ex hoc mundo, licet pauci essent conuersi, dicebat tamen Patri: *Ego te clarificauit super terram: opus consummavi quod dedisti mihi ut faciam.* Satis mihi est tibi satisfecisse: nihil vltra quæro. Hære diutius in illo Christi affectu.

## II. P V N C T V M.

**S**ED quando dices importunè, seu quando modicus aut nullus erit fructus, perinde Christo seruias, perinde illi placebis & munere tuo defungèris, ac si opportunè & fructuose diceres, Dum scilicet tua non desit opera: dum si defuerit fructus, non per te deuerit: dum nil subtraxeris vtilium: dum accommodate & apposite dixeris. Hoc erat ministerium tuum, hæc missio, hæc opera tua: satis tibi sit te fecisse quod tuum est, Deus non plura requirit à te. Non est tua opera fecisse fructum sed Diuinæ; quod est igitur Dei, relinquendum Deo, tibi quod tuum est sufficiat. Sic præclare Apostolus: *Gratia Dei sum id quod sum, & Gratia eius in me vacua non fuit, sed abundantius illis omnibus laboravi: non ego autem sed Gratia Dei mecum.* 1. Cor. 15. Siue enim ego, siue illi; sic prædicamus. Quasi diceret, non commemoro nec moror fructum quem per me Deus fecit. Satis mihi est & satisfactum puto Diuinæ quam accepi Gratiæ,



si quanta in me fuit, tantus fuerit meus labor: non ex fructu me-  
tior impensa mea obsequia, non exinde capio testimonium meæ  
Conscientiæ, & debita Deo fidelitatis, sed ex labore, ex conatu  
& cooperatione cum Gratia: sicque mecum sentire debent quot-  
quot eodem mecum funguntur munere. Satis nobis est hoc effe-  
cisse per Gratiam quod à nobis illa exigebat.

Sed nonne fructum exigebat? Omnino, si Auditores attendis-  
sent; sed posita Eorum negligentia nihil aliud à te tuoque labore  
voluit quam ut laborares. Multa quidem praterea dici possent de  
*Luc. 7.* Diuina Sapientia quæ sic *iustificatur à filiis hominum*, ut ait ipse  
Christus, dum illis non deest quo minus si velint conuertantur,  
Dici etiam multa possent de tuo laboris præmio quod te in Coelis  
manet. Sed his omiſſis hoc vnum sufficit quod vnum tibi quæren-  
dum est, te perinde Deo placere posse, ac munus tuum implere  
quando importunè & infructuose dixeris, ac si opportune & ad  
fructum vberimè. Quin addo, saepe id amplius ad meritum tuum  
fore, quod minus aliis proderit sua culpa; dicique potest de vi ac  
merito tuæ impensæ operæ quod de pace danda Christus dixit:  
*Ibid. 10.* *Si fuerit filius pacis, requiescet super illum pax vestra, sin autem, ad  
vos reuertetur.* Parumne tibi est, non tantum nihil tibi de tuo  
perire merito, sed etiam adaugeri, & quod à te alij non recipiunt,  
ad te redire cum foenore?

### III. P V N C T V M.

*Act. 20.* **I**NSTANDVM igitur opportunè, importunè; Nec subterfugien-  
dum quo minus *annunties omnibus omne consilium Dei*; veniant  
vocati ad coenam aut non veniant: satis est seruo si quos debet vo-  
*Luc. 14.* cauerit, possitque dicere Domino suo, *Factum est ut imperasti.*  
*Matth. 10.* **N**ON est Discipulus super magistrum, nec seruus super Dominum suum:  
*sufficit Discipulo ut sit sicut magister eius, & seruo sicut Dominus eius.*  
Videsne Dominum, quàm multis & quam multa magnaue de  
Diuinis, vni Samaritanae communicarit! Quod si virorum aliqui  
*Luc. 17.* de Samaria conuersi sunt, quandiu putas in fide perstiterunt? Certe  
paulo post dum ciuitatem volet ingredi Christus, non admitte-  
tur, recusabunt ingressum ciuitatis, illi ipsi apud quos biduum  
posuit, quibus loquutus est, & quibus videbatur persuasisse quod  
esset Saluator mundi. Hic cine fructus eius operæ?



Certe illis timendum, qui nisi gaudeant fructu sui laboris, non laborant; timendum inquam est, ne se potius subdole & malignè quàm Christum quærant! *Operarij subdoli*, inquit Apostolus, *transfigurantes se in Apostolos Christi*. Et non mirum, ipse enim Satanas transfigurat se in Angelum lucis, non est ergo magnum, si ministri eius transfigurentur velut ministri Iustitiæ quorum finis erit secundum opera ipsorum. Quasi diceret, fingunt se Zelatores Diuinæ gloriæ & salutis animarum, & hoc Zelo tegunt suam prauam intentionem, sicut Dæmon saepe obtentu religionis & pietatis, suas operit technas & insidias.

Hoc est tibi magnopere dispiciendum & deplorandum. *Vae mihi quia tacui*. *VAE mihi si non Euangelizauero*. *Qui observat ventum, non seminat, & qui considerat nubes, numquam metet*. *NON possumus quæ vidimus & audiuimus non loqui*. *SPIRITVS meus qui est in te, & verba mea quæ posui in ore tuo, non recedent de ore tuo*. Hæc tibi Dominus, tu quid illi? Fatere tuam ignauiam, & modicum Zelum, atque vt accendaris deinceps feruentius, Vide in 1. parte, Die 18. Ianuarij.

Nemo magis sibi Christum seruat, quàm qui minùs sibi soli seruat.

Nemo minus sibi Christum seruat, quàm qui magis sibi soli seruat.







# DOMINICA DVODECIMA.

PARABOLA SAMARITANI  
QUI HOMINEM A LATRONIBVS CAESVM  
CVRAVIT, CVIVS PARABOLAE  
CONCLVSIO EST:

*Vade & tu fac similiter. Lucae 10.*

## VERITAS PRACTICA.

Si vis curari, cura.

*SENSVS EST, Quod non modo in homine Parabolico qui incidit in latrones representéris, sed etiam in viro Samaritano qui hominem male à latronibus affectum curauit. Ac proinde sicut debes curari ab alio, sic alium debes curare: Alius est, nempe Samaritanus, nempe Christus qui te curet: & alius est homo male affectus quem tu cures, nempe proximus in quavis necessitate positus.*

Si vis itaque curari à Christo, cura proximum. Si vis curari, cura.

*RATIO EST, Quia non potes curari, nisi à Christo Domino.*

*Sed*



*Sed Christus Dominus non te curabit, nisi cures proximum, quanta possis ope.*

*Ergo si vis curari, cura. Quod certe tam æquum est, ut non modo aliis sed tibi ipsi sis iniquus, si ut cureris non cures, quandoquidem aliter curari non possis.*

## I. P V N C T V M.



**EVANGELII** hodierni tres sunt veluti partes præcipuæ. Prima est quâ dicuntur *Beati oculi & beata aures eorum qui videbant & audiebant Dominum IESVM.* *Matth. 13.* Secunda continet interrogationem cuiusdam Legisperiti, & responsionem Christi de modo vitæ æternæ possidendæ, qui refertur ad mandatorum obseruationem. Tertia denique cum de proximo diligendo alia esset orta quæstio, Christus enarrauit nobilem illam Parabolam de Homine qui incidit in latrones, à quibus cæsus est multis plagis, & de Samaritano qui mira cæsum hominem Caritate curauit, quem neglexerat Sacerdos & Leuita; tùm vero sermonem concludens, Legisperito dixit, *vade & tu fac similiter*; sic adesto proximo laboranti. Hic est ille tuus proximus qui tua magis eget opera, sicque eum adjuuando vitam æternam quam quærebas possidebis. O verè beatæ aures quæ hæc audiebant, & beatæ manus quæ audita complebant!

Hanc ut beatitudinem assequaris tibi hoc idem certissimè dictum puta quod illi, *vade & tu fac similiter*. Atque ut plenius totam Parabolam intelligas, magis que afficiaris ad eius practicum finem, qui est, proximo tua egenti opera subuenire & opitulari: Sic te obligatum putes ad hanc opem ferendam, ut quantum adjuuari & curari velis à Christo, tuis in plagis & morbis: tantum ipse curare & adjuuare proximum debeas.

Ratio est ampla, & multi plena documenti: nam primo sicut te agnoscere debes in illo homine qui plagas accepit: sic in viro Samaritano Christus Dominus est intelligendus à quo solo cureris. Plagæ quas accepisti à primo natiuitatis ortu sunt quatuor illæ insignes de quibus expressus est Diui Thomæ articulus, ubi ex Beda sic apte ad rem nostram discurrit: *Per Iustitiam originalem perfecte* *1. 2. q. 87. a. 3.*



ratio continebat inferiores animæ vires, & ipsa ratio à Deo perficiebatur, ei subiecta. Hac autem originalis Iustitia subtracta est per peccatum primi parentis, & ideo omnes vires animæ remanent quodammodo destitute proprio ordine quo naturaliter ordinantur ad virtutem, & ipsa destitutio VULNERATIO dicitur natura. Sunt autem quatuor potentie animæ quæ possunt esse subiecta virtutum scilicet Ratio ( seu Intellectus ) in quo est Prudentia : Voluntas in qua est Iustitia : Irascibilis in qua est Fortitudo : Concupiscibilis in qua est Temperantia. Inquantum ergo ratio seu Intellectus destituitur suo ordine ad verum, est vulnus ignorantia; Inquantum verò voluntas destituitur suo ordine ad bonum, est vulnus malitia: inquantum verò irascibilis destituitur suo ordine ad arduum, est vulnus infirmitatis: inquantum vero concupiscentia destituitur suo ordine ad delectabile moderatum ratione, est vulnus concupiscentiæ. Sic igitur ista quatuor sunt vulnera inflicta toti humane nature ex peccato primi parentis: Sed quia inclinatio ad bonum virtutis in unoquoque diminuitur per peccatum actuale, etiam ista sunt quatuor vulnera ex aliis peccatis consequentia, inquantum scilicet per peccatum & ratio hebetatur, præcipue in agendis, & voluntas induratur ad bonum: & major difficultas bene agendi accrescit, & concupiscentia magis exardescit. Sic ad verbum sanctus Thomas.

Iam verò quod à Christo, & ab eo solo quatuor istæ plagæ seu vulnera possint curari, fusè tractat sanctus Bernardus in hac Apostoli Verba de Christo Domino: *Qui factus est nobis Sapientia* *in à Deo, & iustitia, & sanctificatio, & redemptio.* Quæ quatuor ad totidem virtutes Cardinales sic refert, ut cum Christus dicitur primò Sapientia, idem sit ac Prudentia per quam tenebras nostri Intellectus expulit. Deinde cum dicitur Iustitia, Iustitia illa intelligatur quæ est opposita malitiæ voluntatis, & quæ à Christo provenit per gratias sanctificantes quibus peccata absoluntur; & per actuales quibus voluntas à malitia sua conuertitur in bonitatem. Tertio cum Christus dicitur sanctificatio, perinde est ac Temperantia contra vulnus concupiscentiæ, quo vulnere, quia præcipue inficitur & maculatur homo in corpore & anima, ideo temperantia quæ est illi opposita dicitur sanctificatio seu sanctimoniam sine qua nemo videbit Deum. *Hæc est voluntas eius sanctificatio vestra, ut abstinere vos à fornicatione & aliis quæ corpus & animam maculant, quæque dum per temperantiam continentur, sanctificatio sequitur.* At quomodo Christus factus est nobis ista

1. Cor. 1. in à Deo, & iustitia, & sanctificatio, & redemptio.

1. Cor. 1.

Hebr. 12.  
1. Thess. 4.



sanctificatio seu Temperantia? Nempe per exemplum suae vitae sanctissimae, longēque abhorrentis ab omni concupiscentia; tūm vero etiam quia cum factus est homo, factus est aptius & facilius objectum nostri amoris ut qui tantum carnalia noueramus amare, carnem in Christo reperiremus quam amaremus. Quartō denique cum dicitur Redemptio, plane idem est ac Fortitudo in Irascibili contra Infirmitatem, sic enim Christus maxime fortitudinem quam sectaremur ostendit in Passione, & nos quā exemplo quā meritis redemit ab illis malis & miseriis quae sibi hominem quodammodo vindicant; *Infelix homo, quis me liberabit de corpore mortis huius? Gratia Dei per IESVM Christum. Lex Spi-* Rom. 7: 8.

ritus vitae in Christo IESV liberavit me à lege peccati & mortis.

Atque hinc pergens sanctus Bernardus: Frustra, inquit, huius seculi Sapientes de quatuor virtutibus tam multa disputauerunt, quas tamen apprehendere omnino nequiverunt: cum illum nescierunt, qui factus est nobis à Deo Sapientia docens prudentiam, Iustitia delicta donans, & Sanctificatio in exemplum temperantiae continenter vivens, & Redemptio in exemplum patientiae fortiter moriens. Quid vobis cum virtutibus, qui Dei virtutem Christum ignoratis? Vbinam quaeso vera Prudentia nisi in Christi doctrina? Vnde vera Iustitia, nisi de Christi misericordia? Vbi vera Temperantia, nisi in Christi vita? Vbi vera Fortitudo, nisi in Christi Passione? Soli igitur, qui eius doctrina sunt imbuti, prudentes dicendi sunt: soli iusti, qui de eius misericordia veniam peccatorum consecuti sunt: soli temperantes, qui eius vitam imitari student: soli fortes, qui eius patientiae documenta fortiter in adversis tenent. Incassum proinde quis laborat in acquisitione virtutum, si aliunde eas sperandas putat quàm à Domino virtutum, cuius doctrina armarium prudentiae, cuius misericordia opus iustitiae, cuius vita speculum temperantiae, cuius mors insigne est fortitudinis. Ipsi honor & gloria in saecula saeculorum.

Ex quibus sancti Patris verbis sicut manifeste patet, remedium ab illo nobis allatum qui Samaritanus dici voluit, sic patet ab eo Ioan. 8. solo datum qui solus nostra est salus, nostra sanitas & nostra redemptio.

O quantum inde Illi astringimur! Quantum inde illi debemus! Quantum inde tenemur cum Davide dicere, *Benedic anima mea Domino, & noli oblivisci omnes retributiones eius. Qui propitiatur omnibus iniquitatibus tuis, qui sanat omnes infirmitates tuas.* Ps. 103.



II. P V N C T V M.

**S**ED Christus Dominus ut te his curet remediis, vult te curare & iuuare proximum tuum, quanta possis ope & Charitate. *Vade & tu fac similiter.*

Primò enim nisi condones quæ in te peccata sunt & nisi reconcilieris omnibus qui te læserint aut à te læsi sint, nihil est quod speres à Christo. Iam id fuisse multoties suprà probatum est. *Vade prius reconciliari fratri tuo.*

Deinde, si esurienti panem, si sitienti potum, si nudo vestem, si iacenti auxilium negaueris, negabit & tibi Christus quæ dare paratus erat: nam id ratum fixum, *In qua mensura mensus fueris, remetietur tibi.* Neque aliter Immisericordes in extremo iudicio condemnabuntur, quàm quod in peccato mortui fuerint: neque aliter in peccato morientur quàm quod eis Gratia quædam negata sunt quas habuissent si misericordes fuissent; ac proinde manifeste sequitur, quod nisi curemus proximum non curemur.

Denique, quando hanc Christus protulit Parabolam, dixitque illi viro cui loquebatur, *Vade & tu fac similiter*, Nonne putas tibi Christum simul loquutum esse? Nonne putas Christum vidisse proponendam hanc hodie in Ecclesia Parabolam, tibi que particulatim exponendam? Nonne verò credis hæc non frustra Christum dixisse, non sine fine aliquo, nec finem alium esse quàm ut tali exemplo mouearis ad idem faciendum, aut nisi mouearis nec ipse tuis miseriis commoueat? *Nam qui spernit me, inquit, & non accipit Verba mea, habet qui iudicet eum: sermo quem locutus sum, ille iudicabit eum in nouissimo die.* Hic est autem sermo quem locutus est: *Vade, & tu fac similiter*: Vnde nisi id feceris, sermo ille te iudicabit.

III. P V N C T V M.

**S**I vis ergo curari, cura. Si vis curari in Intellectu tot ignorantibus quibus cæcutis, doce vel cura doceri quos potes prima fidei Christianæ mysteria. Si vis curari malitia quæ multa est in voluntate tua, tu simul cura quàm poteris peccantes reuocari, mo-



ueri, argui: curam illorum praesertim habe qui tibi sunt crediti.  
 Si vis curari tam longis infirmitatibus & horrendis plagis vtriusque appetitus, cura infirmitates animi & corporis quas multas vides in proximo. *Intellige quae sunt proximi tui ex teipso.* Vide quid *Ecclesi. 31.* tibi fieri velles à Christo & ab aliis, & hoc ipsum illis procura: vel si negaueris cuiquam; tibi etiam quod velles negabitur: discesque tuo bono vel damno: *Sicut feci, ita reddidit mihi Dominus. Iud. 1.*

Nec certe alia dici potest causa cur perinde modo nostris in vulneribus viuamus & moriamur ac si remedia Samaritanus non attulisset, nisi quia non utimur, nisi quia curari nolimus; aut ut curemur, curare alios negligimus. *Transiit mensis, finita est aestas, & nos saluati non sumus. Super contritione filiae populi mei contritus sum & contristatus; stupor obrinuit me. Numquid resina non est in Galaad, aut medicus non est ibi? Quare igitur non est obducta cicatrix filiae populi mei?* *1. r. 8.*

Hac est differentia fatui & sapientis ut ille procul à se rejiciat quidquid fructuosum audit, hic autem ad se adjiciat & sibi applicet: sic enim aperte Sapiens Ecclesiasticus: *Cor fatui, inquit, quasi vas confractum & omnem sapientiam non tenebit: verbum sapiens quodcumque audierit sciens laudabit, ET AD SE ADIICIET; audiuit luxuriosus & displicebit illi, & projiciet illud post dorsum suum.* *Ecclesi. 21.* Quamobrem illud etiam atque etiam tibi hodie applica quod Christus dixit: *Vade & tu fac similiter.*

Illa porro similitudo in tribus videtur consistere; Nam primo Christus miseretur omnium, nullo prorsus excepto; *Misericordia Domini plena est terra, Vade & tu fac similiter erga omnes.* *Ps. 32.* Deinde sic miseretur ut omne genus miseriae curet, & omne genus impendat misericordiae, *Non est qui se abscondat à calore eius,* *Ps. 28.* Vade & tu fac similiter quantum tu quidem poteris. Denique id pure & ex mera Caritate praestat, *Sanabo contritiones eorum, diligam eos spontaneè.* *Osae 14.* Vix tu idem facere possis cum non nisi praeventus diligas: ac saltem hoc vnum specta quod sis praeventus, quod Christo id debeas, quod quæ debes Christo cum non possis rependere, saltem hac pauca proximo prout ille ordinavit, praestes; sicque ex eius veneratione ordinis quo nostri curam curæ aliorum attexuit, ex æquo vtrumque procuremus.

*Carissimi, si sic Deus dilexit nos, & nos debemus alterutrum diligere.* *1. Ioan. 4.*



590 Dominica 12. post Pent. Parabola Samaritani, &c.

Sic Deus dilexit mundum vt sic mundus diligeret  
Deum sicut dilectus est.

*In 1. parte, Feria 2. Hebdom. 1. in Aduentu.*

Atque ad alias Euangelij partes seu particulas, si quis aliunde  
petitas velit applicare Veritates, sic commode poterit.

*Beati oculi qui vident qua vos videtis.*

Quàm rarò cogitas Christum, tam crebrò resistis  
sancto Spiritui.

*In 1. parte, Feria 4. Hebdom. 1. in Aduentu.*

*Multi Propheta & Reges voluerunt videre qua vos  
videtis, &c.*

Vix vllus est qui non se verè putet desiderare Chri-  
stum: & vix vllus est qui eum verè desideret.

*In 1. parte, Feria 5. Hebdom. 1. in Aduentu.*

*Et ecce quidam Legisperitus surrexit, tentans eum.*

Qui cum affectu incompósito Deum consulit, non  
Deum sed Deo consulit.

Non à Deo consilium petere, sed dare velle videtur.

*In 2. parte, Fer. 4. Pentecosten.*

*Magister, quid faciendo vitam aeternam possidebo?*

Sic dignum est cœlum nostris desideriis, vt nisi cœ-  
lum desideres, cœlo sis indignus.

*In 2. parte, Feria 6. post Octauam Ascensionis, in qua Hebdomada  
videri possunt plura his conformia.*

*In lege quid scriptum est? Quomodo legis?*

Qui à lege excludit aliquid, excludit à se totam legem.

*In 1. parte, In Festo Purificationis B. Virginis.*

Aut nulla aut tota est Charitas in agendis, sicut Fides  
in credendis.

*In 2. parte, Feria 4. Hebdom. 4. post Pascha.*



*Diliges Dominum Deum tuum ex toto corde tuo, &c.*

*Vide in 4. parte, Dominica 17.*

*Et proximum tuum sicut teipsum.*

Sicut non sunt amanda vitia propter amicos homines,  
sic non sunt odio habendi homines propter eorum  
vitia.

*In 1. parte, Dominica 5. post Epiph.*

Quidquid profers ne parcas aliis, contra te profers,  
ne tibi parcat Deus.

*In 4. parte, Dominica 20. post Pentecosten.*

Affectum probat effectus.

*In 3. parte, Feria 2. Hebdomada 9.*

Effectum juuat affectus.

*In 4. parte, Fer. 4. Hebdom. 26.*

*Homo quidam incidit in latrones, &c.*

Malo peccati nullum par aliud malum.

*In 3. parte, Hebdomada decima, in Appendice ad Missiones, capite 13.*

Non est in peccatis excusanda infirmitas, cui sanan-  
dæ præsens est medicina.

*In 4. parte, In Festo sancti Lucae.*

*Accidit ut Sacerdos quidam descenderet eadem via,  
& viso illo præterijt. Similiter & Lenita, &c.*

Nisi pauper affectu sis, vix satis affectus eris in pau-  
peres.

*In 3. parte, Dominica 6. Vide & Dom. 8.*

Si dum adest occasio, virtus abest, vix unquam aderit.

*In 2. parte, Fer. 2. Hebdom. 2. in Quadrag.*

*Samaritanus autem quidam iter faciens, venit secus  
eum, & videns eum misericordia motus est, &c.*



392 Dominica 12. post Pent. Parabola Samaritani, &c.

Hic ascendit ad summos, qui descendit ad infimos.

*In 2. parte, Fer. 3. Hebdom. 2. post Octavas Pasche.*

Hoc amanti cœlum paupertas est seu misericordia,  
quod amanti terram, diuitiæ.

*In 4. parte, Fer. 3. Hebdom. 17.*

*Curam illius habe, & quodcumque supererogaueris,  
reddam tibi.*

Ars omnium artium quæstuosissima est eleemosyna.

*In 3. parte, Dominica 6.*

Multorum est Conscientia cauteriata & peruersa nisi  
te sinant dirigi.

*In 1. parte, Fer. 2. Hebdom. 3. post Epiph.*

*Vade, & tu fac similiter.*

Exemplo suo Christus nos magis vrget quàm imperio.


*In 1. parte, Die 13. Ianuarij.*

Quod intellectus confert actioni, hoc actio refert  
intellectui.

*In 2. parte, Feria 2. Pentecostes.*

Qui non seruat consilia, quia non sunt præcepta,  
nec ipsa etiam præcepta seruabit.

*In 3. parte, Fer. 2. Hebdom. 5.*



HAC HEBDOMADA, cùm sanasset Dominus Paralyticum in Piscina iacentem, multa de rebus à se gestis honorifice simul & tam demissè prædicat, vt quomodo Magnanimitas cum Humilitate iungenda sit, aperte doceat; Eò itaque referuntur meditationes & Veritates considerandæ, ex toto capite quinto sancti Ioannis.

FERIA



*Quod videris velle, velles quidem, sed non vis.* 593

FERIA SECVNDA.  
DE SANATO PARALYTICO,  
I V X T A P I S C I N A M.

*Vis sanus fieri?* Ioan. 5.

VERITAS PRACTICA.

*Quod vidéris tibi velle, velles quidem, sed verè non vis.*

*SENSVS EST, Præcipuè de sanitate spiritali quam velles quidem, sed reuera non vis: & quærenti Domino, vis sanus fieri? Non posses verè respondere, volo.*

*RATIO EST, Quia si repellis necessaria sanitatis remedia, non vis sanari.*

*Sed repellis illa remedia.*

*Ergo non vis sanitatem, quam tamen velle videris: Quod est sanè diligenter expendendum.*

I. P V N C T V M.

**R**AT Ierosolymis insignis quædam piscina quæ dicebatur probatica, id est, ouina seu pecuaria, *προβατον* enim ouem significat, oues autem & aliæ pecudes in vicinò templo immolandæ, ibi prius abluebantur, vt refert S. Hieronymus. Et verò tantę virtutis erat illius stagni aqua, vt quicumque infirmus post motionem aquæ ab Angelo factam, prior in eam descendet, sanus illico resurgeret. Illic porro iacebat inter multos expectantes Angelum, suo tempore descendentem, Homo quidam paralyticus iam triginta & octo annos; *Quem cum vidisset Dominus, Vis, inquit, sanus fieri? At ille, Domine, hominem non*



*habeo, ut cum turbata fuerit aqua, mittat me in Piscinam; dum venio enim ego, alius ante me descendit. Dicit ei IESVS, surge, tolle grabatum tuum & ambula. Et statim sanus factus est homo ille, & sustulit grabatum suum, & ambulabat.*

Hæc Sacer Euangelista fusius: in quibus illud primò certe mirum & omni consideratione dignissimum, quòd Christus ab Infirmo petat an velit sanus fieri? Poteratne de illius voluntate Christus dubitare? Nemo id sanus dixerit. Nos itaque, nos animo infirmiores quàm esset ille paralyticus corpore, respiciebat Dominus; hoc à te quærebat in illius persona, *Vis sanus fieri?* Velles quidem, sed an reuera velis, quæritur, & attente consideranti Rationem propositam, apparebit euidenter te reuera nolle quod tamen tibi videris velle.

Ratio hæc est. Si repellis necessaria sanitatis remedia, repellis sanitatem & non vis sanus fieri. Quid clarius? Quando præcipue remedia sunt ita necessaria vt vix aliter sanitas obtineri possit. Quando sunt remedia præsentia, & ita omnia simul ordinata & præparata vt possit quidem infirmus si velit, ea commode sumere, & tamen nolit; quis non dicat talem periclitari de vita, si morbus est lethalis? Quis non dicat saltem nolle illum ab eo morbo sanari, cuius sanandi necessaria non vult remedia? Vellet quidem infirmus sanitatem sine remediis, sed non vult absolute & proprie nisi quātum potest, illis vtatur sine quibus sanitas esse non potest. Quamobrem Christus Dominus non dixit, velleſne? Séd, vis sanus fieri? Non velleitas quæritur sed voluntas, voluntas nempe finis absoluta & efficax quantum in nobis est: quæ vt talis sit, debet simul esse mediorum ad illum finem, vt supra visum est ex sancto Thoma: Et aperte Scriptura, *Altissimus*, inquit, *creauit de terra medicamenta, & vir prudens non abhorrebit illa. Fili in tua infirmitate ne despicias teipsum, sed ora Dominum & ipse curabit te.* At quomodo te curabit? *Da*, inquit, *locum medico, etenim illum Dominus creauit, & non discedat à te quia opera eius sunt necessaria.* Sicut itaque manifestum est quod qui necessaria illa medici opera nollet cum posset, nollet simul sanitatem corporis, quid est quod non æque sit euidentis infirmum spiritu qui nolit remedia spiritalia, nolle etiam suam spiritualem sanitatem? Nonne idem Dominus vtrique sanitati sua præscripsit remedia? Nonne illi parendum vtrobiq;? Aut certe etiamſi posset homo consentire in

Dominica  
septima.

Eccles. 38.



*Quod videris velle, velles quidem, sed non vis.* 195

mortem corporis; possetne licite velle mortem spiritualem  
mortem animæ, mortem sempiternam? *Miserere anima tue pla-* Ecclesi. 39.  
*cens Deo.*

## II. P V N C T V M.

**A**T QVI tu necessaria illa sanitatis remedia sic repellis, ut ijs om-  
nino nolis uti.

Hoc est præsentis Considerationis Caput accuratiùs expendendum, quod ut efficacius fiat, distingue hæc tria. Primum, quænam sit infirmitas tua grauior? Forte Superbia & Vanitas. Secundum, quænam eius sint remedia magis necessaria? Certe est humiliatio, vnde Dauid ad Dominum, *Tu humiliasti sicut vulneratum, superbum*: ut eum scilicet sanes; Et, *Bonum mihi Domine, quoniam humiliasti me.* Tertium denique quæriscne an repellis has humilia-  
tiones & confusiones? Sentiscne sicut Dauid, bonum tibi esse quod humiliaris aliquando & confundaris? Lætari scne propterea sicut de remedio sanitatis, sicut de bono, sicut de accepto beneficio? An te beatum existimas sicut Christus asseruit eos esse beatos qui maledicta libenter sufferrent? Responde Christo, id est, *Math. 5.*  
simpliciter & candide, nam Ille est qui te interrogat, & quidquid dixeris, Ille est qui te nouit & qui videt quantum intumescas contra huiusmodi occasiones humiliandi tui, & sanandæ tuæ infirmitatis. *Insanisti in me & superbia tua ascendit in aures meas.* 4. Reg. 19.

Verè enim Sapiens: *Abominatio est superbo humilitas*: & vere, humiliatio caminus dicitur ubi probantur humiles. Ecclesi. 13.  
Ibid. 2.

## III. P V N C T V M.

**Q**UOD vidèris ergo velle, velles quidem, sed verè non vis. Nam velles quidem non esse superbus, sed tamen non vis, quia non vis te humiliatum, non vis humiliationem quæ est remedium necessarium tuæ sanandæ superbiæ, quod perinde est ac si vulneratus nollet curationem sine qua vulnus est insanabile; & tum eius voluntas tam aliena esset à sanitate quam à remedio. Sic dicitur animæ obduratæ & recusanti sanantem Domini manum: *Insanabilis fractura tua, pessima plaga tua, quid clamas super contritione tua? Insanabilis est dolor tuus,* Quia scilicet reculas me. Ier. 30.  
Osee 7.

Ffff ij



Feb. 21.

dicinam. Et quidquid dicas, quidquid excuses, mendacium dicitur coram Deo: quia nulla est infirmi excusatio nolentis sanitatem, quibus eam modis vult Deus impertiri. Quasi tu legem statuas Deo, & non Deus tibi! Quasi tu melius scias quid sit velle aut nolle, quam Deus norit! Quasi tu singulariter & præter ordinem velis saluari! *Numquid Deum docebit quispiam scientiam, qui excelsos indicat?* Si potuisset ille paralyticus quem sanauit Dominus sese mouere, & se in aquam projicere: aut si hominem habuisset à quo projici posset, & noluisse; reuera noluisse fieri sanus, quia non usus fuisset mediis quibus uti ad sanitatem commodè poterat; Vnde ille hoc vnum habuit quo se excusaret, *hominem non habeo*, quasi diceret, non per me stat, quantum in me est, vel quantum expedit; da viam emergendi, & sequar. Quod re ipsa effecit, nam à Domino iussus surgere, & lectum portare atque ambulare, non hæsit dubius, non stetit piger, non dubitauit statim à lecto surgere, non erubuit portare lectum, nec quidquid eorum omisit quæ iussa fuerant ut sanus fieret. Hoc est scilicet verè velle; hoc est velle sanari quando sanitati comparandæ media capiuntur.

1. p. q. 19.  
4. 9.

1. Cor. 10.

Et certe, si humana voluntas intantum certa est & recta voluntas, in quantum est conformis suæ regulæ quæ est Diuina voluntas, ut ait sanctus Doctor, quomodo posset intelligi vera esse voluntas sanitatis si non sit voluntas mediorum, cum non sit voluntas conformis Deo qui vult & præscribit illa sanitatis media? *An emulamur Dominum*, inquit Apostolus? *Numquid fortiores illo sumus?*

2. Reg. 6.  
Ibid. 16.

Hoc itaque tibi ad Praxim in occasionibus proponendum esset, Vis esse humilis? Vis sanari à superbia & vanitate? Responde, & vrge te ipsum, quod non aliter sanaberis quam per hanc humiliationem quam idcirco permittit Deus. Medium est eo affectu quo finis ipse acceptandus. *Vilius fiam & ero humilis in oculis meis. DOMINVS præcepit ei ut malediceret David, & quis est qui audeat dicere, quare sic fecerit?* Huc referri debet quod supra est propositum: Nisi diligenter aduertas, Quod petis à Deo iniustius, hoc est quod petis iniustius.

*In hac 3. parte, Sabbato Hebdom. 7.*

Quàm periculosum porrò & capitale sit, Homine non uti, quasi si Hominem non haberes qui te mitteret in piscinam, Id est Directorem: Vide in 1. parte, tota Hebdomada 3. post Epiphaniam.



*Hæc est maximè laudabilis humilitas, quæ sic laudes, &c. § 97*

Quid hæc autem significant ad spirituale profectum, *surge, tolle grabatum tuum, & ambula* : declaratum habetur in eadem l. parte, Feria 4. Hebdom. 4. post Epiph.



## FERIA TERTIA.

### DE HUMILITATE CHRISTI

DOMINI QUÆ POST SANATVM  
PARALYTICVM EMINUIT.

*Iesus declinavit à turba constituta in loco. Ioan. 5.*

### VERITAS PRACTICA.

Hæc est maximè laudabilis humilitas, quæ sic laudes fugit ut laudanda non omittat.

RATIO EST, *Quia hæc est maxime laudabilis humilitas quæ sic cauet ab extremis suis, ut suo se in medio generose contineat. Sed Humilitas quæ sic laudes fugit ut laudanda non omittat facere, sic cauet ab extremis suis, ut suo se in medio generose contineat.*

*Ergo hæc est maxime laudabilis humilitas, cuius exemplum nobis hic exhibet luculentum Christus Dominus quod imitemur.*

### I. PUNCTVM.

**M**IRABILIS quidem Christus in omnibus operibus suis, & ipse est qui facit mirabilia magna solus; Verùm si quod eius opus est mirabilius, si quod eius miraculum dici potest alio præstantius, certe miraculum sanati Paralytici videtur esse



ex præstantioribus, ob has duas causas. Prima, quòd hominis illius infirmitas omnibus esset notissima, vt qui iam triginta & octo annos palàm spectandus iacuiisset. Altera, quod in loco & tempore fuit sanatus vbi tùm frequentissima totius anni erat populi celebritas, nempe in Piscina & in festo Paschæ vel Pentecostes, vt probabilius creditur, quo die vndeque conueniebant Iudæi Ierosolymam sacrificandi gratia, & in illum locum sese omnes dabant quò descendebat Angelus moturus aquam Piscinæ, & eum sanaturus qui se prior in illam post aquæ motum immisisset.

Nonne tùm sanare hominem tam infirmum & tanta facilitate quanta sanatus est Paralyticus, gloriosissimum erat & super omnem admirationem stupendum & exaltandum? Et tamen vix vllum fuit obscurius miraculum, vix vllum fuit de quo minor fermocinatio & rariora præconia; nullæ hîc laudes, nullus admirationis clamor, nullus religionis stupor, nullus sermo nisi forte illorum qui murmurant quod homo sanatus ferat humeris lectum suum in die festo. Et quod magis mirum, nec ipse qui sanatus est suum Benefactorem nouit, aut vllas ei gratias egit. *Is autem qui sanus fuerat effectus*, inquit Euangelista, *nesciebat quis esset*, qui scilicet eum sanasset. *IESVS enim declinauit à turba constituta in loco.* O verè generosam & laudabilem humilitatem Domini IESV qui in tanta gloriæ & honoris occasione fugit laudem, fugit conspectum hominum & quærit latebras!

Verùm non hîc tantùm sistit eius Humilitatis generositas & commendatio: Nam cùm sciret illum hominem quem sanarat corpore, nonnullis premi peccatis, voluit & hanc animi sanitatem illi conferre, atque idcirco Templum quo iuerat, ingreditur Dominus, hominem conuenit, & hoc salutari monito sanum intus esse iubet sicut exterius: *Ecce*, inquit, *sanus factus es, iam noli peccare, ne deterius tibi aliquid contingat.* Quæ Christi Domini verba sic Glossa exponit; *Istum IESVS sicut sanat exterius, ita intus sanauit.* Actandem cùm videret Iudæos non modo non prædicantes miraculum quod patrarat, sed infrendentes quod sanaret hominem vel sanatum iuberet deferre lectum, in die festo; Ipse aduersarios ultro adit, alloquitur, & de sua cum Deo æqualitate mîros habet sermones. Hoc est scilicet esse generosum & præcipue commendandum, Sic bonorum operum laudes fugere vt tamen non fugias bene operari, sic gloriam rei bene gestæ recusare vt vel pro-



bra tranquille audias, & sapienter diluas. Hæc est denique vera & verè laudabilis humilitas quæ sic laudes fugit, ut laudanda non omittat, quando sic Dei cultus, sic proximi vtilitas, & officij ratio postulat.

Cuius propositæ Veritatis cum multæ reddi possint rationes, tum hæc modo videtur expendenda, quod hæc maxime laudabilis Virtus vniuersim loquendo, aut particulatim Humilitas sit censenda, quæ sic ab extremis suis cauet, ut in suo se medio, suaque mediocritate constanter & generosè contineat. Neque enim est vera virtus nisi in medio. Nihil frequentius in scholis & sanctis etiam Patribus. *Bonum virtutis moralis*, inquit sanctus Thomas, 1. 2. q. 64. *consistit in adæquatione ad mensuram rationis. Manifestum est autem* a. 1. *quod inter excessum & defectum, medium est æqualitas seu conformitas, unde manifeste apparet quod virtus moralis in medio consistit.* Sic sanctus Gregorius Nazianzenus, *non potest esse virtus cui vel deest, vel* Orat. de seipso. *cui excedit conueniens mensura. Da operam ut sagittam ita semper manu teneas, ut ad destinatum scopum tendat, ut neque ultra Christi mandatum, neque citra eiusdem præcepta eam mittas, neutro enim modo, virtutis album feries.* Sic Cassianus explicans vetus illud Prouer- 2. Collat. c. 16. *bium, ακρότιτες, ἰσοτιτες, id est nimietates, æqualitates: nimietates ex alterutra parte se tenentes, siue ab excessu, siue à defectu, docet æqualiter improbandas.* Sic sanctus Hieronymus: Philo- sophorum quoque sententia est μεσότητις ἀρετῆς, ὑπὲρ ἧλας κακίας ἔν, Ep. 3. ad Deme- trium. Quod Latinus, inquit, ita potest sermo resonare, moderatas esse virtutes, excedentes modum atque mensuram inter vitia deputari. Vide quæ suprà fufius ex Scriptura & sanctis Patribus referuntur. Et vide attentius quam sint conformia rationi quæ nobis imperantur, cum sit virtus ipsa ratio, ipsa rationis æquitas & moderatio, & quàm proinde simus inexcusabiles qui virtutem negligimus & negligentia nostræ nonnullas etiam rationes prætendimus. *Arguet te malitia tua.* In 1. parte, die 31. Decembris.

*Ier. 23.*

## II. P V N C T V M.

**S**ED Humilitas quæ sic laudes fugit, ut laudanda non omittat facere, sic cauet ab extremis ut suo se in medio generosè contineat. Nam quænam sunt extrema humilitatis, nisi præsumptio, vanitas aut ambitio per excessum; & pusillanimitas seu nimia sui ab-



jecto per defectum? Ac proinde quodnam est humilitatis medium, nisi talis æqualitas & moderatio, vt neque excedat in vno, neque deficiat in altero? Neque nimis præsumat, aut altius sapiat quam oportet sapere; neque nimis se abjiciat, nimis lateat & taceat cum præiudicio Diuinæ Gloriæ, nec non boni publici vel alicuius particularis iactura. Quod vtrūque extremū sic prudenter & generose cauēt Humilitas, dum ex vna parte, fugit laudes, rumusculos, congratulationes, & similia superbiæ nutrimenta; nec tamen ex alia quidquam omittit eorum quæ vel Charitas vel Obedientiā repræsentant esse faciendā, siue plurimam secum inuehant laudem, siue modicā, siue nullā: *Per gloriam & ignobilitatem, per infamiam & bonā famam*, inquit Apostolus, non per solam gloriam & bonā famam, quia forte excederet in vanitatem; neque etiā per solam ignobilitatem & infamiam, ne forte deficeret in nimiam & infructuosā abiectionem; sed temperatē vtroque, & per vtrumque in medio: *Per arma Iustitiæ, à dextris simul & à sinistris*, sic fortiter vnusquisque decertet pro salute proximi sine suo spiritali damno: & pro sua propria perfectione sine proximi detrimento.

Quæ quidem Moderatio inter extrema nos ducens, tam propria est humilitati, vt propterea Diuus Thomas hanc referat ad modestiam & temperantiam, dicatque humilitatem nihil aliud esse quam *moderationem quandam spiritus iuxta illud sancti Petri: In incorruptibilitate quieti & modesti Spiritus*: Afferatque illud Origenis sic scribentis in Lucam: *Si vis nomen audire huius virtutis, quomodo etiā à Philosophis appellatur, Ausculta eandem esse humilitatem quam respicit Deus, quæ ab illis Metriotis dicitur, id est mensuratio vel moderatio.*

O quam multi decipiuntur qui dum ab vno extremo fugiunt, in aliud miseri dilabuntur! Et quam vere monuit Sapiens: *Attende ne seductus in stultitiam humilieris. Noli esse humilis in sapientia tua, ne humiliatus in stultitiam seducaris.* Id est, ne in humilitatis Praxi finas te ex proprio tuo sensu trahi, quo in alterutrum virtutis extremorum pertraheris; Sic enim in vitium potius quam Virtutem traheris.



III. P V N C T V M.

**H**ÆC est igitur maxime laudabilis humilitas, quæ sic laudes fugit, ut laudanda non omitat facere: quia sic vera est Virtus quæ in medio sistit. Vnde expresse sanctus Thomas; Illi qui contemnunt honores hoc modo, quod pro ijs adipiscendis nihil inconueniens faciunt, nec eos nimis appetantur, laudabiles sunt. Si quis autem hoc modo contemneret honores, quod non curaret facere ea quæ sunt digna honore, hoc vituperabile esset. Et hoc modo Magnanimitas est circa honores, ut videlicet studeat facere ea quæ sunt honore digna: Non tamen sic ut pro magno æstimet humanum honorem. Et alibi, quod est valde notandum, sic ait Magnanimitatem & humilitatem simul conuenire, ut humilitas quidem, reprimat appetitum ne tendat in magna præter rationem rectam: Magnanimitas autem animum ad magna impellat secundum rationem rectam. Vnde sicut non obstat Magnanimitas, quo minus Humilitas tendat ad latendum & ad fugienda honorifica seu laudabilia, quando recta suadebit ratio, sic Humilitas non impedit Magnanimitatem quin moueat animum ad illa ipsa laudabilia consecretanda, non propter ipsorum laudabilitatem, sed propter honorem Dei, & proximi utilitatem; sicque humilitas sit semper magnanima & generosa, sicut magnanimitas semper humilis & modesta. Scio & humiliari, scio & abundare, ubique & in omnibus institutus sum, aiebat Apostolus. Tum aptissime consequenter sanctus Ambrosius, Non ergo indocta humilitas, sed quæ habeat sui modestiam & scientiam, laudi datur. Est enim humilitas formidinis, est & imperitiæ atque ignorantie, Vnde & Scriptura dixit, humiles spiritu saluabit. Preclare ergo dixit scio & humiliari, id est quo in loco, qua moderatione, quo fine, in quo officio, in quo munere. Quod & sanctus Bernardus sic egregie: Non infra dejici, nec attolli supra. Non euadere in longius nec extendi in latius. Tene medium si non vis perdere modum: locus medius tutus est: medium sedes modi; & modus, virtus. Vide qua ex parte magis deficias, & prospice.





## FERIA QVARTA.

### DE MAGNIFICA CHRISTI HVMILITATE , SEV DE HVMILI EIVS MAGNIFICENTIA.

*Amen amen dico vobis , non potest filius à se face-  
re quicquam nisi quod viderit Patrem facientem.  
Quicumque enim Ille fecerit , hac & filius simi-  
liter facit. Pater enim diligit filium , & omnia  
demonstrat ei quæ ipse facit , & maiora ei de-  
monstrabit opera , vt vos miremini. Ioan. 5.*

### VERITAS PRACTICA.

Nullus est Diues , humili quantumuis paupere , ma-  
gnificentior.

RATIO EST , Quia quo quis plura & ditiora bona possidet  
eaque libentiùs omnia , ad rectum quem intendit finem disper-  
titur , eò est magnificentior.

Sed nullus diues plura & ditiora bona possidet , nec libentiùs dis-  
pertitur quàm humilis.

Ergo nullus est eo magnificentior ; Aut certe quo minus est magnifi-  
cus , eo minus est humilis. Quod est sollicite providendum.



## I. P V N C T V M.



V M argueretur Christus Dominus à Iudæis, quod diem Sabbati violaret, Primum hoc ad defensionem suam respondit, *Pater meus usque modo operatur & ego operor.* Id est, nihil ago quod non agat mecum Pater meus qui est Deus. Quod perinde erat ac dicere, nihil ago quod possitis arguere, quia ipsum est Dei opus quod ago. Quo responso cum illi excanduis- sent, atque iam etiam de illo interficiendo cogitassent, quod Pa- trem suum diceret Deum, æqualem se faciens Deo: Tum IESVS confirmans quod dixerat: *Amen amen dico vobis, non potest filius à se facere quicquam, nisi quod viderit Patrem facientem;* Et quæ supra memorantur, In quibus obseruandam dicimus magnificam Chri- sti humilitatem, seu humilem magnificentiam. Nam quid humi- lius, quidue simul magnificentius quàm quod ait, se nihil à se fa- cere, & se tamen facere quæcumque Pater facit? Quod non in- telligas modo de vno aut altero quod facit opere, sed vniuersim de omnibus; Quidquid agit Pater hoc agit filius, & nihil agit filius nisi quod agat Pater; quæ quidem quàm sint magnifica simul & humilia magis adhuc patebit in declaratione Veritatis proposi- tæ quæ Paradoxum continere videtur. Quid enim magis contra sensum vulgarem quàm quod humilis sit magnificus? Aut quod etiam nullus quantumuis diues, sit magnificentior humili, quan- tumuis paupere? Et tamen ita est, & Ratio si diligenter expen- datur, ita plane persuadet.

Quid namque est esse magnificum? Supra liberalitatem Virtus est Magnificentia, vt ait sanctus Thomas, quæ non solum respi- 2. 2. q. 134. cit rationabilem vsum pecuniæ vel aliorum bonorum, sed ma- gnum vsum, magnos sumptus & impensas, secundum tamen re- ctam rationem; Id est, secundum probatum finem quem sibi pro- ponit Magnificus, & eo quidem erit magnificentior quò & finis erit magis probatus, quò plura bona & ditiora possidebit, & quo minus eis parcat, seu quò effusius omnia dispertietur ad obtinen- dum illum finem.

Hæc partim delibata sunt ex sancto Doctore, sed quæ habet de fine sibi proponendo non sunt breuius contrahenda, nec aliis quàm eius verbis referenda; Nullus, inquit, *finis humanorum ope-* 1. 2. ad 3.



rum est adeo magnus sicut honor Dei. Et ideo magnificentia præcipue magnum opus facit in ordine ad honorem Dei. Vnde Philosophus dicit in quarto Ethicorum quod honorabiles sumptus sunt maxime qui pertinent ad diuina sacrificia: Et circa hos maxime studet magnificus: Et ideo magnificentia coniungitur sanctitati, quia præcipue eius effectus ad religionem siue ad sanctitatem ordinatur. Sic nempe de Deo dicitur, magnificus in sanctitate. **SANCTIMONIA** & magnificentia in conspectu eius. **CONFESSIO** & magnificentia opus eius. **MAGNIFICENTIAM** gloria sanctitatis tue loquentur. **ET** magnificabor & sanctificabor.

Exodi. 15.  
Ps. 95.  
Ps. 110.  
Ps. 144.  
Ezech. 38.

Non sic illi non sic, qui magnificant fimbrias, qui amant primos recubitus, & primas cathedras.

## II. P V N C T V M.

**S**ED nullus diues plura & ditiora bona possidet aut libentius dissipatur aut meliori fine, quàm humilis, quantumuis pauper.

Quid est enim ditius aut præstantius, quàm bonum spirituale, in cuius comparatione diuitias nihil esse duxit virorum omnium ditissimus ac Sapientissimus? Quis porro bonis spiritualibus magis abundat quàm humilis super quem præcipue requiescit bonorum Author omnium: Qui singulariter dicitur conferre humilibus gratiam, vt sicut valles abundant frumento, ita & humiles omni spiritali fructu gaudeant: Vnde sanctus Augustinus, *Quanto humilior, tanto amplius: confluit enim aqua ad humilitatem vallis, denatat tumoribus collis.* Quis denique libentius & liberalius in nobilissimum illum finem, qui est Diuinus cultus, dispensat illa bona quàm humilis, qui nihil eorum sibi attribuit, nihil arrogat, nihil reseruat, sed totum quod habet, & totum quod est in continuum Sacrificium illi offert à quo se totum accepisse confitetur? Hæc est *Confessio & sanctimonia & magnificentia in conspectu eius.* In conspectu hominum non ita forte videbitur, sed in conspectu Dei non est magnificentia nisi vbi sanctimonia, nec est sanctimonia nisi vbi Confessio; neque Confessio nisi vbi humilitas, quæ mala sua mere mala & mere sua cognoscit: bona autem sua, nec mere bona, nec mere sua confitetur: sed quidquid est inde meriti quidquid gloriæ & honoris totum hoc Deo reddit. *Tua est Domine magnificentia & potentia, & gloria; Cuncta*

Sap. 7.

Iac. 4.

Serm. 17. de  
Verbis  
Dom.

Ps. 95.

1. Par. 29.



*enim que in cælo sunt & in terra, tua sunt. Quid sanctius? Quid magnificentius?*

Magnificentiam suam iactent Assueri, Salomones, Iustiniani & quotquot in Diuinos etiam sumptus sua profuderunt; sed nisi fuerint humiles, non fuerunt sancti; & nisi sancti fuerint, non potuerunt esse magnifici, quia sanctitas & magnificentia non disiunguntur. *Tu quærebas magnificentiam*, inquit sanctus Augustinus, *prius dilige sanctitatem. Cum sanctificatus fueris, eris & magnificus*. In Ps. 95. *nam si prapostere prius esse uolueris magnificus, ante cadis quam surgas. Non enim surgis sed extolleris.* Et post pauca, explicans versus Psalmi consequentes: *Afferte Domino patria gentium, afferte Domino Gloriam & honorem. Tollite hostias & introite in atria eius*: Et quæ sequuntur ad Gentiles conuersos dirigit, commonetque ne gloriantur si vel magnificam Deo domum ædificarint, vel pretiosa dederint munera, cum in illis externis donis non sit ea magnificentia qua præcipue colitur & honoratur Deus. *Sacrificium Deo*, inquit, *Spiritus contribulatus, Cor contritum & humilatum Deus non spernit. Cum humili corde intra in domum Dei, & cum hostia intrasti. Si autem superbus es, inanis intras. Nam unde superbires, nisi inanis esses? Nam si plenus esses, non inflareris. Quasi diceret, nihil magnifice facis ad gloriam Dei, quantumcumque magna dones, nisi fueris humilis. Sis vero humilis, tum plenus es donis à Deo datis & Deo referendis, quæ licet pauca essent, maiorem tamen Deo deferrent laudem, & maiorem afferrent illi magnificentiam, Quoniam magna potentia Dei solius*, ait Sapiens, *& ab humilibus honoratur.* Ecclesi. 3. O verè honoranda humilitas quæ sic honoratur Deus!

### III. P V N C T V M.

**N**ULLVS est igitur Diues magnificentior humili, quantumuis *paupere*; Quia nullus est qui plura & maiora profusus in nobilissimum qui potest haberi finem profundat, & frequentius offerat, quàm humilis qui cum pro cultu & dilectione Dei dederit omnem suam substantiam, *Quasi nihil despiciet eam*; Quasi nihil dedisset, sic se despiciet, quia nihil dedisse confitetur nisi quod acceperat, nisi quod debebat, nisi quod acceptum à Deo magis obligat dantem ad gratias illi referendas, quàm putet sibi

Cant. 8.



Supra.

2. 2. q. 134.  
4. 1.

deberi quid aliud, nisi poenas & flagella ex malo donorum usu. Quæ Confessio & humilitas ita sanctificant animam, & ita placent Deo, ut inde exurgat Magnificentia quæ in conspectu eius sola magnificari debet & æstimari. Si enim ipsa Dei Magnificentia, ut Scripturæ referunt, in sanctitate est, certe si quæ est hominum magnificentia, sic erit in ea sanctitate quam parat humilitas, cum vel maxime dicat sanctus Thomas, magnificentiam

1. 10. Ep. 84.

humanam esse quandam Diuine magnificentia participationem quæ nos Deo similes reddat. Neque enim aliter nos reddit similes quam humilitate, cum sine humilitate magnificentia superbos nos redderet & à Deo maxime dissidentes.

Quamobrem hic etiam atque etiam vide quanto sit cultu fouenda humilitas à qua est talis magnificentia, cui nulla par, similisque coram Deo reperiatur. Quod si coram hominibus magnifici tanto sunt in honore, quanto nos esse videmus, quid sentiendum est de honore quem humiles consequuntur apud Deum? Sed vide etiam attentius qualis esse debet illa humilitas quæ est magnificentia parens & nutrix, nempe integra, sincera, indiuisa quæ non partem sed totum reddat Deo. Sic enim egregie sanctus Ambrosius, ut iam supra notatum est: *In vera humilitate nihil diuisum, nihilque non solidum est, & ideo omnes participes suos unum facit, quia inæqualitatem ipsa non recipit. Huius igitur boni proprietates in confessione est Gratia Dei, quæ tota repellitur, nisi tota suscipiatur.* O Verba aurea & authore suo digna! Sed neque Verba nec Authorem magnificis, nisi facta verbis respondeant.

Vide in 4. parte, FERIA 6. Hebdom. 16. Vbi hæc Veritas explicatur:

Interrogatus quid primum in præceptis Christianæ religionis obseruandum; quid secundum; quid tertium: Responde, Humilitatem.





## FERIA QVINTA.

DE SVBLIMI ET HVMLI  
POTESTATE IVDICANDI HOMINES  
QVAM CHRISTVS SIBI  
DATAM DICIT.

*Sicut Pater suscitatur mortuos & viuificat, sic & filius quos vult viuificat. Neque enim Pater iudicat quemquam, sed omne iudicium dedit filio, ut omnes honorificent Filium, sicut honorificant Patrem. Ioan. 5.*

### VERITAS PRACTICA.


*Superbo maxime formidādū Diuini Tribunal Iudicij.*

*RATIO HÆC EST INTER ALIAS, Quia illi maxime formidandum Tribunal est, qui se dum viueret, Diuino Iudicio magis opposuit.*

*Sed superbus se Diuino præcipue opponit Iudicio.*

*Ergo illi maxime formidandum Tribunal Iudicij: Ac proinde ipsa præcipue reformidanda superbia.*

### I. P V N C T V M.

 *O dementiæ & impietatis deuenerant Iudæi, ut Christum Dominum auderent accusare & velut reum læsæ religionis condemnare quod non seruaret dies festos, aut quod se æqualem Deo faceret; quibus cū respondisset quæ heri*



considerata sunt, nunc addit, tantum abesse ut ab eis accusari & iudicari possit, quin potius futurus sit aliquando ipsorum Iudex sicut & reliquorum hominum, iamque se in ea potestate constitutum esse à Patre, ut sicut Pater suscitavit mortuos & vivificat, sic & filius quos vult vivificet, quos vult etiam mortificet, iudicet & condemnet, quia omne iudicium seu omnis iudicandi Potestas illi prorsus relicta est.

Rom. 14.

Quæ certe Potestas quam sit honorifica, quam sublimis & summa, quis non videt si precipue cogitet talem hanc esse Potestatem ut omnes omnino homines illi subdantur, agaturque in eo iudicio de re omnium maxima quæ est salus æterna. *Omnes stabimus ante Tribunal Christi. Scriptum est enim, vivo ego dicit Dominus, quoniam mihi flectetur omne genu.*

Joan. 5.

At vero intueri quantam humilitatem huic tantæ iungat potentia. Primo enim sibi ut homini datam hanc à Patre Potestatem fatetur; Deinde, quod certe mirum est, non aliter se usurum illa Potestate affirmat quam prout noverit Patrem velle, & prout ipse Pater iudicavit. Sic enim expresse addit: *Sicut audio, sic iudico: & iudicium meum iustum est, quia non quero voluntatem meam, sed voluntatem eius qui misit me.* O qualem humilitatem!

L. 35. Mor.

c. 10.

Lact. 8.

*Qui*, ut ait S. Gregorius, tunc quoque obedit cum Iudex venit. Quod & postea repetit Dominus cum dixit: *Ego non iudico quemquam: & si iudico ego, iudicium meum verum est, quia solus non sum, sed ego & qui misit me Pater.* Quasi diceret, si mea res duntaxat ageretur, si de iniuriis solum & calumniis quas patior quæstio esset, libenter cederem, libenter condonarem; sed solus non sum, non solus homo in me offenditur; at ipse est Deus qui est Pater meus, qui cum iudicet & condemnet offensam mihi à peccatore illatam, necesse est ut cum ipso eam condemnem, & meum iudicium non potest non esse iustum, quia idem est ac Divinum.

Sic plane Humiles humiliter se ubique gerunt dum sublimiora quæque tractant; cum è contra superbi etiam in ipsis suis humiliationibus intumescant & inflentur. His sane præter ceteros maxime formidandum est Tribunal Iudicis tam potentis & humilis Christi.

Quæ Veritas nobis hodie proposita, cum ex se pateat, tamen vel hac etiam Ratione magis elucescet. Si cui videlicet formidandum est iudicium illud animæ, quod statim à morte fiet, maxime illi est formidandum qui dum viveret, suum Divino iudicio iudicium

magis



magis opposuit. Nam primò cum is conformiter suo iudicio vixerit, oportet eum vitam vixisse plane oppositam Christo, sicut & ei oppositum vt supponimus habebat iudicium: quale autem iudicium illi homini post vitam futurum est qui vitam omnino contrariam Iudici vixit? *Reuelabitur ignominia tua, & videbitur op- 1s. 47. probrium tuum: ultionem capiam, & non resistet mihi homo.*

Deinde vero cum suum iudicium prætulerit iudicio Christi, non potuit ista præferentia Iudicij non esse iniustissima & ini-  
quissima, proindeque præcipue iudicanda. *Ego iudicio contendam 1er. 23. tecum.* Denique cum id sit ratum quod per quæ quis peccat, per hæc & torqueatur vt supra fuisse est demonstratum; iudicio certe puniri & torqueri debet qui iudicio peccauit. Quod expresse re-  
fert Sapiens post denuntiatas poenas regibus & Iudicibus terræ, *Quoniam, inquit, non recte iudicastis nec custodistis legem iustitia: 1bid. 6. Horrende & cito apparebit vobis, quoniam iudicium durissimum his qui præsumunt, fiet.* Sic enim fiet iusta retributio & debita vicissitudo, vt qui durius & seuerius iudicium exercuerunt, durissimo ipsi exer-  
ceantur & condemnentur iudicio. O qualis tum status animæ! O quam verè Propheta Domino, *In mensura contra mensuram, cum ab- 1s. 27. jecta fuerit, iudicabis eam.*

## II. P V N C T V M.

**S**ED superbus suum præcipue Diuino Iudicio, iudicium seque totum opponit.

Primo quidem cum Christus inter omnia vitia superbiam quæ verbo quæ exemplo exagitarit, & ex omnibus virtutibus humi-  
litem non modo vt utilem sed necessariam proposuerit, huic se iudicio superbus manifeste opponit, & nihil æque detestatur quàm quod præcipue Christus commendat, nihil æque prosequitur quàm quod odit Dominus. Nonne hoc est esse illi oppositum? *Qui non 1uc. 12. est mecum, contra me est.*

Secundo id patet, quia iudicio de aliis omnibus rebus feren-  
do, plane superbus sese Christo opponit; de diuitiis, de honori-  
bus, de primis cathedris, de humanis laudibus, & de ipso viuendi modo qui dicitur mundus, quidquid iudicet Christus, contrarium omnino superbus sentit. Vnde ipse Dominus his à quibus pro-  
uocabatur vt se mundo manifestaret mundano modo: *Mundus*



Ioan. 7.

Ibid. 14.

Job. 41.

me odit, quia testimonium perhibeo de illo, quod opera eius mala sunt. Et paulo post, Venit enim Princeps mundi huius, & in me non habet quidquam. Quasi diceret, nihil illi mecum, neque mihi cum illo est, qui Rex est super vniuersos filios superbiae, Sed omnia nobis opposita.

Ioan. 5. &amp;

8.

Is. 55.

Matth. 16.

Serm. 7. in

Ps. 118.

Tertio denique, cum superbus non superbiat nisi ex opinione siue ex iudicio proprio alicuius boni naturalis quod se putat habere præ aliis, vnde laudem & gloriam plus æquo ambit & fectatur, hoc totum iudicium vanum est, vitiosum est, diabolicum est, ac proinde Christo Domino prorsus oppositum, qui cum de seipso diceret se nihil esse, se nihil à se facere, si suam gloriam quæreretur, gloriam suam nihil esse; solum Deum esse bonum, & & similia: longe magis id dicit & sentit de homine, ac proinde sic directe opposita prorsus sentit vt non aliter ac coelum exaltatur à terra, sic viæ Domini & cogitationes eius exaltentur à viis & à cogitationibus superbi & mundani. Vnde cum Petrus nondum sanctus, Dominum alloqueretur ex sensu nimis adhuc humano & mundano; Vade, inquit Dominus, post me Satana, scandalum es mihi, quia non sapias ea quæ Dei sunt, sed ea quæ hominum. O si vel sapere humana, Christo est aduersari, quis nisi superbus præ cæteris Christo aduersatur, qui humana præ cæteris sapit? Sic aptè sanctus Ambrosius exponens illud Scripturæ: Dominus superbis resistit: Tamquam suæ contumeliæ propulsator, veluti quoddam suscepit aduersus superbiam speciale certamen: tamquam dicat, meus iste aduersarius est qui me laceffit, mihi debetur ista congregatio.

## III. P V N C T V M.

**S**I cui ergo formidandum est Tribunal futuri Iudicij, superbo maxime est formidandum, qui suum ita diuino Iudicio Iudicium, suos mores, affectus, sensus, vitamque opponit vniuersam, vt quod Christus dixit bonum, hoc malum superbus sentiat; & quod Ille malum prædicat, hoc iste bonum pronuntiet. Sed quis sapientior, quis Iudex æquior? Ex quo autem Iudicio Iudex iudicabit? An ex Diuino suo, vel ex mundano superbi & Diabolico?

Is. 50.

Mal. 4.

Ecce ego ad te superbe, dicit Dominus, quia venit dies tuus, tempus visitationis tuæ. Et cadet superbus & corruet, & non erit qui suscitet eum. Et alibi: Ecce dies veniet succensa quasi caminus, & erunt



omnes superbi, & omnes facientes impietatem, stipula: & inflammabit eos dies veniens, dicit Dominus, quæ non derelinquet eis radicem & germen. Videsne superbo maxime paratum esse Iudicium? Videsne primos illos esse iudicandos qui se primos inter homines esse voluerunt? Sicut iudicio contendit aduersum Patres vestros, sic iudicabo vos, dicit Dominus Deus. Ezech. 16.

Atque hæc forte satis concedes de superbis illis quorum iam iudicia sumpta sunt, de Lucifero, de Pharaone, de Core, Dathan, & Abyron, de Herode & de similibus; de te autem nihil tale esse timendum. At verò vide, quid de rebus sentias & iudices? Quid de diuitiis & honore; quid de his omnibus quæ mundus prædicat, & quæ Christus contrà execratur? Nam vt ipse aiebat, quod hominibus altum est, abominatio est ante Deum. Luc. 16. Cuinam Iudicio te tuamque vitam magis conformas? Hoc est enim Iudicium quod rerum caducarum pretio facis, hoc est inquam Iudicium quod superbia facit, & quod reddit formidandum Tribunal Christi, quæ contra sentiens contrariam tibi omnino sententiam pronuntiabit. *Dies Domini super omnem superbum & excelsum, & humiliabitur.* Is. 12.

Senti de te quidquid voles, atque ista Iudiciorum contrarietas quæ est in te & in Christo, vocetur superbia vel quouis alio nomine, parum refert si reuera Christo aduersaris, nam hoc est nomen quo vel superbus vel quouis impius in extremo Iudicio male mulctatur, neque in alios quam Christo aduersarios dicit Apostolus defauturum Iudicium, *Terribilis, inquit, expectatio Iudicij, & ignis amulatio quæ consumptura est aduersarios.* Hebr. 10. *DIES ille Domini, dies ultionis, vt sumat vindictam de inimicis suis.* Ier. 46. Talem vindictam qui non satis timeret, nonne nimis præsumeret? At scito te non posse dici timere illam, quamdiu in te agnosces superbiam quam non exagites & insecteris. *Nimis odito execrationem, & cognosce iustitias & iudicia Dei,* ait Sapiens. Ecclesi. 17.





## FERIA SEXTA.

### DE CLARITATE CHRISTI QVAM NON ACCIPIT AB HOMINIBVS.

*Ad hac Eius Verba:*

*Claritatem ab hominibus non accipio. Ioan. 5.*

#### VERITAS PRACTICA.

Claritas quæ ab hominibus accipitur, mera est obscuritas.

*RATIO EST, Quia illa Claritas tota est in Iudicio hominum. Sed in tali hominum Iudicio nihil nisi obscuritas.*

*Ergo & ipsa Claritas mera est obscuritas; ac proinde canenda & contemnenda.*

#### I. PUNCTVM.

**N**E putarent homines quidquid Christus antè dixit ad defensionem suam contra calumnias Iudæorum, ideo dixisse vt injuriam repellendo, factam tectam suam gloriam conseruare vellet; atque inde eius exemplo de conseruanda sua gloria nimis satagerent & angerentur homines; ne hoc inquam sibi fingerent & persuaderent, hæc verba statim addidit: *Claritatem ab hominibus non accipio*, quibus profitetur se quidquid dixit ad suam gloriam, non eo dixisse animo vt gloriam ab hominibus expectaret; Iam enim se satis humanæ Gloriæ, siquam in hoc mundo quæreret, accepisse à Ioanne, ad quem miserant rogaturi de ipso testimonium, & à quo perhonorificum, vt veritas postulabat, re-



*Claritas quæ ab hominibus accipitur, mera est obscuritas.* 613

tulerant. Ego autem, inquit, non ab homine testimonium accipio, sed hac dico ut saluemini. Ego habeo testimonium majus Ioanne, Nempe à Scripturis, à Prophetis, ab Angelis, ab ipso Patre æterno, à miraculis, à sanctitate, ab operibus; *Opera quæ dedit mihi Pater ut Ioan. 5. perficiam ea, ipsa opera quæ ego facio, testimonium perhibent de me.*

Sic Ille non tantum ut Iudæos instrueret, sed nos præcipue qui hæc lecturi, audituri & meditaturi eramus, nos qui captandæ humanæ gloriæ nimis intendimus, sic disceremus eius exemplo, quod si quid aliquando in nostri nostrorumque defensionem apud homines dicere cogeremur, non ita diceremus quasi humanam captaremus auram & gloriam: sed hoc vnum duntaxat enitere-mur ut Veritas innotesceret, neque tam nostram quam Veritatis causam & patrocinium susciperemus.

Quid enim illa est humana Gloria si per se spectetur? Quid illa Claritas quæ ab hominibus accipitur, si attente consideretur? *Mera est obscuritas, mera est vanitas, merumque nihil.*

Quod ut clare patefiat, expende quod primo dicitur totam istam Claritatem pendere à Iudicio hominum; Nempe humanum ipsum est Iudicium, seu ipsa testificatio Iudicii quod de illo faciunt homines quem honorant, vel de rebus ob quas illum honorant. *Quem dicunt homines esse filium hominis?* Quod ita verum est ut si sciremus eum, à quo honorem accipimus, malè de nobis sentire & iudicare, Plane nollemus eius honorem; & eum tamquam Adulatorem & Parasitum detestaremur; *Sagitta vulnerans Ierem. 9. lingua eorum, dolum locuta est.* Quia malum est internum de nobis Iudicium honorificum quàm ipsam externam honorificationem, quæ nisi testetur honorem internum, dissimulatio est & irrisio; unde & mallems quodammodo illis externis priuari testificationibus, dummodo nobis constaret aliunde nos in bona esse apud eos æstimatione & opinione: Adeo verum est totum esse in iudicio hominum. O humanam opinionem: quanta mala in mundum inuexisti, quanta quotidie inuehis, & quanta in futurum inuehes! Sic clamabat identidem sanctus Franciscus Xauerus.

## II. P V N C T V M.

**S**ED in illo humano Iudicio nihil est nisi obscuritas. Quod tribus quidem modis intelligi potest. Primò, id val-



614 Feria 6. Hebd. 12. post Oct. Pent. Claritatem ab hominibus, &c.

de obscurum est quid verè sentiant de nobis homines; nam sensus suos ita variè confingunt & dissimulant vt vix cuiquam hominum certa fides possit adhiberi. *Caput suum mouebit, inquit Sapiens, & plaudet manu, & multa susurrans commutabit vultum suum.*

Secundò, tametsi nobis loquerentur vt sentiunt, ita tamen obscurum est an vere sentiant & iudicent, vt nihil certi possis habere. Quid enim incertius quam humana de rebus iudicia? Quis nescit, & quis non experitur quantis pateant erroribus, quot ignorantia tenebris inuoluantur, & quam saepe speciem seu apparentiam pro re ipsa sumamus? Vnde Christus Dominus. *Nolite iudicare secundum faciem: Et Propheta; Species decepit te. POPULE meus, qui te beatum dicunt, ipse te decipiunt. Stat ad iudicandum Dominus: & stat ad iudicandos populos, Quasi diceret, solius est Domini iudicare.*

Tertiò denique, licet sint aliqui qui aliquando in aliquibus recte sentiant & iudicent, quàm parum durat ille sensus? Nonne statim euanescit, aut in aliud immutatur? Nonne vel etiam quo ipso durat tempore, tantis aliunde infuscantur & obscurantur vitiiis & vituperiis illa laudes, vt satius esset ad famam & gloriam non laudari, quàm tot adjunctis probis laudem foedari; Nam vt sunt in malum proni sensus, vt sibi mutuo inuident homines, si quid aliquando laude dignum agnoscant in homine, statim vitiosum aliquid sibi representant, quo illa laus pene tota deteritur & obtenebratur. *Verba bilinguis quasi simplicia: & ipsa perueniunt vsque ad interiora ventris. Nonne illos audis, Doctus est & eloquens, sed parum religiosus. O Vanitatem! O humana iudicia quis vobis fidat? Quàm verè Dauid, Verumtamen vani filij hominum. Mendaces filij hominum in stateris, vt decipiant ipsi de vanitate in idipsum. QUI inquirebant mala mihi, locuti sunt vanitates. DISPERSAT Dominus vniuersa labia dolosa, & linguam magniloquam. Sic Sapiens de his vniuersis iudiciis Deo loquens; Tamquam pueris insensatis, iudicium in derisum dedisti. Id est, ostendisti quàm essent ridicula omnium hominum iudicia, quàm puerilia, quàm malè sana & inter se pugnancia.*

### III. P V N C T V M.

**E**RG O ipsa Claritas quæ ab hominibus accipitur, mera est obscuritas. Cum non nisi a hominum iudiciis pendeat in quibus nihil



*Claritas quæ ab hominibus accipitur, mera est obscuritas.* 615

nisi obscurum, incertum, dubium, inuolutum & ita vno verbo infuscatum, vt meræ tenebræ dici possint: *Tenebris obscuratum habentes intellectum.* Quæ autem à Deo est Claritas ipsa lux est, sicut *& Deus lux est in quo tenebræ non sunt vlla*, Neque fallitur in suo iudicio, nec quemquam fallit: Quem Ipse laudat verè est laudabilis: & quem probat, vere probandus est. Nonne igitur præstat hanc magis à Deo Gloriam quærere quam ab hominibus? *Qui gloriatur, in Domino gloriatur.* Non enim qui seipsum commendat, aut quem homines prædicant, ille probatus est, sed quem Deus commendat. Commendat autem præcipue humilem & Pauperem Spiritu, quæ commendatio tam vera & luculenta est Claritas, quam verum & certum est Dei Iudicium.

Non vetatur tibi Gloria, sed vana tantum & tenebrosa, eiusque loco vera proponitur. Disce vbi Pax vbi vera Gloria: Et hoc propone serio: *Mihi absit gloriari nisi in cruce Domini nostri IESV Christi per quem mihi mundus crucifixus est & ego mundo.* ERATIS aliquando tenebræ, nunc autem lux in Domino: vt filij lucis ambulate. *Fructus enim lucis est in omni bonitate, & iustitia, & veritate, probantes quid sit beneplacitum Deo: & nolite communicare operibus infructuosis tenebrarum.*

O quam vere Picus Mirandulanus, Si illud est verum, querendam gloriam, non quæ ex hominibus, sed quæ ex Deo est, cur de Iudiciis hominum semper pendemus? Deo placere nemo est qui curet.



## SABBATO.

### DE REPUGNANTIA ET INCOMPATIBILITATE FIDEI CVM VANA GLORIA.

*Quomodo vos potestis credere, qui gloriam ab inuicem accipitis, & gloriam quæ à solo Deo est non quaritis? Ioan. 5.*



VERITAS PRACTICA.


Ne diuina pereat fides, pereat potius humana gloria.

RATIO EST EVIDENS, Quia in aequali periculo bonorum  
inequalium, satius est perire minus bonum quam majus.

Sed humana gloria, minus est bonum quam Fides Diuina qua pe-  
raret nisi periret humana gloria.

Ergo ne Diuina pereat fides, pereat potius humana gloria.

I. PUNCTVM.

ONCLVDEMVS cum Domino agitatam tota  
Hebdomada de humilitate materiam, hac eius nobili  
sententia, Quod sit ita repugnans Diuina Fides cum  
humana & vana gloria, vt vix simul possint consistere; Hic est  
enim sensus Verborum Christi, Quomodo vos potestis credere qui  
gloriam ab inuicem accipitis, & Gloriam que à solo Deo est non qua-  
ratis? Quasi diceret, mirum esset si vos cupidi vanæ gloriæ, cre-  
deretis: cum id fieri nequeat, cum simul repugnent Fides & va-  
nitas.

Hinc autem efficax elicitur motiuum ad fugandam istam vani-  
tatem & mundanam gloriam, Quod scilicet alioquin pereat Fi-  
des; Quis enim sanus de re tanta qualis est fides Christiana, velit  
periclitari, ob affectum inanis gloriæ? Et tamen ni pereat iste  
affectus, peribit fides; Ergo ne fides pereat, pereat potius iste prauus  
affectus.

Quæ Conclusio satis per se nota, vt planius etiam Innotescat,  
& in affectum effectumque deriuetur, Vide quam verum sit quod  
prima propositione dicitur, satius esse perire minus bonum quam  
majus, quando videlicet alterutrum ex æquo periclitatur, vt nisi  
minus pereat, pereat majus. Nonne hoc in quolibet genere boni  
est euidentissimum? Nonne vt seruetur totum corpus, exponitur  
membrum? Nonne vt membrum seruetur, exponuntur pecuniæ?  
Nonne vt pecuniæ conseruentur, quies & voluptas deseruntur?  
Non est haerendum diutius in re tam plana, nisi forte mireris ho-  
mines



mines in hoc tam stolidos vt quod in bonis præcipuum est, salus animæ, postponent cæteris longe inferioribus: Quam vt stoliditatem illis objiceret Dominus, ad serpentem, infame illud & odiosum animal illos prouocat. *Estote, inquit, prudentes sicut serpentes*, qui scilicet vt caput seruent in quo viuunt, reliquum exponunt corpus. *Sic inter fallentia & solida bona discernant*, ait sanctus Prosper, *Tales Dominus in Euangelio fieri præcepit*. Quò etiam referri potest quod ab ipso Domino dictum, tradiderunt antiqui: *Estote boni Trapezite*, id est, prudentes in delectu bonorum. Item: *omnia probate, quod bonum est tenete*: Et rursum: *Hoc oro, vt Charitas vestra magis ac magis abundet in scientia, & in omni sensu, vt probetis potiora*. Cass. Coll. 1. c. 20. & Coll. 2. c. 9. 1. Thess. 5. Phil. 1.

## II. P V N C T V M.

**S**ED humana Gloria minus est bonum quam fides Diuina, qua periret nisi periret humana seu vana gloria.

Ne quidem bonum est vana illa Gloria cum sit peccatum, vt expresse ait sanctus Thomas ex Diuo Augustino: Et super temporalia quæuis mala sit grauius malum. Sed esto, sit aliquod sensibile bonum; At quis Christianus comparet illud bonum cum fide Diuina, sine qua impossibile est placere Deo, vt ait Apostolus, sine qua nihil sanctum, nihil castum, nihil viuum, vt ait sanctus Leo, & de qua vt alios omitam, sic apte sanctus Ambrosius: *O thesauris omnibus opulentior Fides! o virtutibus corporis omnibus Fides fortior! o medicis omnibus salutarior!* Et tu huic tam excellenti bono compares nescio quas gloriolæ blanditias! o probrum!

Quod autem periret Fides nisi periret vana gloria seu inordinatus vanæ gloriæ appetitus, multis modis explicari potest. Primò cum Christus multa dixerit contra id quod vano illo gloriæ appetitu appetunt homines: ne hi manifestè videantur se Christi dictis opponere, malunt illa sensu alio & peruerso interpretari quam quo reuera Christus dixit, & quo facile crederent nisi vana retraherentur gloria. Quod nempe Christus dixit: *Vae vobis diuitibus! Vae cum benedixerint vobis homines! Vae vobis qui diligitis primas cathedras & salutationes in foro!* Non credunt vani seu mundani homines: Non credunt se propterea miseros sicut dicit Christus: imo se crederent miseros nisi salutaarentur: & non aliter amant



Ps. 143.

benedici & saluari quàm quia se propterea beatos putant. *Beatum dixerunt populum cui hæc sunt.* Nonne sic igitur periret fides contra hos saltem articulos qui de mundo siue de mundi vanitate proponuntur? At quis nescit, vno pereunte articulo, totam perire fidem?

Rom. 1.

Deinde verò de aliis articulis fidei non minùs dici potest quod à vana pereunt gloria, quàm qui vanam ipsam spectant gloriam. Nam vanus & superbus ita de se præsumit, vt se posse putet intelligere quæ simpliciter credenda essent; vel nisi ea intelligat, non se putet debere credere. Qua mentis præsumptione quid perniciosius nostræ fidei, quæ nisi omnem captiuat intellectum, ipsa captiuatur: & *Veritas Dei*, vt loquitur Apostolum, *in iniustitia detinetur*, & tandem perit.

2. Thess. 2.

Quod naturali quidem consequentia sic necesse est euenire cum vnum ita repugnet alteri, vt se inuicem simul ferre non possint: sed & supernaturali ac Diuina insuper Prouidentia sic agitur, vt cum Deus superbis maxime resistat, atque illos tum præsertim humiliet & castiget quando curiosius res Diuinas inuestigant: non aliter frequentius illos puniat quàm permittendo vt non modò non intelligant quod præsumunt, sed variis circa hoc implicentur erroribus, sicut aperte monet Apostolus: *Ideo mittet illis Deus operationem erroris, vt credant mendacio, vt iudicentur omnes qui non crediderunt veritati sed consenserunt iniquitati*: Sux scilicet vanitati qua iniquè præsumebant se de rebus fidei velle cognoscere.

Denique cum dicatur mori & perire Fides, nisi ad actum reuocetur, quando eius exercendi necessitas sese offert: quis non videt quàm crebro necesse sit vnumquemque Christianum multos fidei actus palam exercere quos tamen profiteri pudebit, nisi vana pereat gloria, nisi derisum potius quam plausum, nisi potius ignominiam quàm gloriam, sit paratus à mundo accipere. Si nempe condonandum est proximo, si ferendæ injuriæ, si toleranda probra, si cedendum inferioribus, si vincendum in bono malum, Nonne hæc Christiana Fides commendat? At nonne hæc vana mundi reprobatur gloria? Quid hinc igitur agat mundanæ huius mancipium gloriæ, quando fidei declarandæ non declinanda occurrit necessitas? Nonne si desistas agere quod tunc agendum Fides docet, licet fidem ore teneas, opere tamen perdis, quando vel aliquid oppositum positivè quod vocant operaris, vel negatiuè



*Ne diuina pereat fides , pereat potius humana gloria.* 619

tantum, non id agendo quod Fides exigebat ? Nonne sic expresse sanctus ait Iacobus : *sic & Fides si non habeat opera , mortua est in semetipsa.* Quasi cadauer exanime , dicebat S. Bernardus ; corpus est , sed mortuum , & mortuum corpus non modo non est homo , sed nec penè corpus. *Hac est gens ,* inquit Propheta , *que non audit vocem Domini Dei sui , nec recepit disciplinam : perijt Fides , & ablata est de ore eorum.* Id est , fidem quidem receperat & ore fateretur , sed cum ad disciplinam siue ad opus ventum est , perinde se gessit ac si fidem non habuisset , sic fides perijt & ablata est de ore eorum ; ore confitentur , factis autem negant.

### III. P V N C T V M.

**N**E Diuina igitur pereat fides , pereat potius humana gloria : Quamquam nec ipsa peribit gloria , quia nihil est gloriolius quam constanter suam seruare fidem , sed pereat inordinatus ille appetitus gloriæ qui sic animam occupat vt nullum Diuinæ fidei locum relinquat. *Pereat Samaria , quoniam ad amaritudinem concitauit Deum suum : in gladio pereant : paruuli eorum elidantur.* Quasi diceretur , si aliter perire non potest praua illa mundi affectio quam pugnando , certe pugnetur , & in ipsis primis motibus & cogitationibus elidatur : *Nam hac est victoria qua vincit mundum Fides nostra.* Et hi sunt qui triumphant in cœlis , *Qui fidem suam numquam mutauerunt ab eo.*

In hoc itaque prælio standum & persistendum acriter , *In omnibus sumendo scutum fidei.* *SCUTO circumdabit te veritas eius , non timebis à timore nocturno , à sagitta volante in die.* *LEVITER* volat , inquit sanctus Bernardus , *leniter penetrat , sed dico tibi , non leue infligit vulnus , cito interficit.* Nimirum sagitta hæc vana gloria est. *Qui feruentiores esse videntur , ipsi paueant , ipsi sibi caueant in hac parte : nihilominus adhuc solliciti non deserere scutum inexpugnabile Veritatis.* *Quid enim aliud tam contrarium vanitati ?*

Sic ille pluribus , quorum summa est , vt obuias illas & familiares quæ occurrunt ex Scripturis Veritates semper paratas habeamus quibus vanitatem expugnemus : Atque in ipso pugne procinctu Verba Scripturæ pronuntiantes , exerceamus actum fidei , vt per fidem cedat Vanitas ne per Vanitatem cedat Fides. *Vanitas Vanitatum , & omnia Vanitas , & cassa sollicitudo mentis.*



620 Dominica 13. post Pent. De decem leprosis mundatis, &c.

1. Reg. 12.  
Ier. 10.  
Pr 30.  
Ps. 10.

*NOLITE* declinare post vana qua non proderunt vobis, neque eruent vos quia vana sunt. *VANA* sunt & opus risu dignum, in tempore visitationis suae peribunt. *VANITATEM* & verba mendacia longe fac me. Odisti observantes Vanitates superuacue. Plusquam vana & vacua talis est observatio, quia non modo nihil prodest ad gloriam, sed & multum obest. Vide in 2. parte, Sabbato Hebdom. Septuagesima.



# DOMINICA DECIMA TERTIA.

DE DECEM LEPROSIS MVNDATIS  
A DOMINO, QVORVM VNVS DVNTAXAT  
ACCEPTVM AGNOVIT BENEFICIVM.

*Nonne decem mundati sunt? Et novem ubi sunt?  
Non est inuentus qui rediret & daret gloriam  
Deo, nisi hic alienigena. Luc. 17.*

## VERITAS PRACTICA.

Verè paucorum est vera Gratitude.

*RATIO EST, Quia vera Gratitude ea est quae refert  
vsum accepti beneficii in unum Deum.*



Sed paucorum est, sic sum referre beneficij in unum Deum.  
Ergo & paucorum est vera Gratitude. Ac verendum magnopere ne tu inter multos ingratus potius, quam inter paucos gratus censearis.

I. P V N C T V M.



**E**VANGELII hodierni narratio plana est. Occurrerunt Domino decem viri leprosi qui steterunt à longe, & leuauerunt vocem, dicentes; IESV, praeceptor, miserere nostri. Quos vt vidit, dixit, Ite, ostendite vos Sacerdotibus. Et factum est, dum irent, mundati sunt. Vnus autem ex illis, vt vidit quia mundatus est, regressus est cum magna voce magnificans Deum: & cecidit in faciem ante pedes eius, gratias agens: & hic erat Samaritanus. Respondens autem IESVS, dixit: Nonne decem mundati sunt? Et nouem ubi sunt? Non est inuentus qui rediret, & daret gloriam Deo, nisi hic alienigena. Et ait illi, Surge, vade, quia fides tua te saluum fecit.

Hac sanctus Lucas, ex quibus singillatim expensis, multa poscent ad praxim vel nondum declarata formari: vel iam proposita repraesentari.

1. In lepra foeditatem peccati agnosce, & vide supra in Appendice ad Missiones.
2. Cum sit verò lepra proprij consilij & propriae voluntatis, Vide in 2. parte, Sabbato Hebdom. 2. post Pascha, & Feria 5. quae est Octaua Ascensionis.
3. Statim vt leprosi occurrunt Domino, leuant ad ipsum vocem suam, nec differunt. Sic captanda virtutis occasio, multumque cauenda dilatio. Vide in 1. parte, Feria 2. Hebdom. 4. in Aduentu. Die 5. Ianuarij. Feria 2. Hebdomadae 4. post Epiph. Et in 2. parte, Fer. 2. Hebdom. 2. in Quadragesima.
4. IESV praeceptor, miserere nostri. Discedat ab iniquitate omnis qui nominat nomen Domini. 2. Tim. 2. Vide in 1. parte, In die Circumcisionis Domini.
5. IESV praeceptor. Quae sint eius praecepta, qui Decalogus & quam malè seruatus. In hac 3. parte, In die Transfigurationis Domini.



622 Dominica 13. post Pent. De decem leprosis mundatis, &c.

6. *Miserere nostri.* Satis id multi clamant, sed pauci ex animo; Rara est admodum Contritio, veraque poenitentia. Vide in 1. parte, Dominica 4. Aduentus, & in Appendice ad Missiones.

7. *Quos ut vidit, dixit: Ite, ostendite vos Sacerdotibus.* Hoc ipsum iam dixerat vni leproso, *Vade, ostende te Sacerdoti.* In 1. parte, Dominica 3. post Epiph. & tota sequenti Hebdomada, vbi notantur sex capita de quibus vnique expedit sapere adire Sacerdotem vel Directorem. Vide & frequenter vtere, sunt enim ad dirigendam Conscientiam peropportuna, siue vt declinet à malo, siue vt faciat bonum.

8. *Et factum est, dum irent, mundati sunt.* Quàm sit præstans Obedientia quæ dicitur Charitatis. In 1. parte, Feria 6. Hebdom. 4. post Epiph. Et in 3. in fine vbi agitur de voto Obedientiae. Quo magis Christo subijcitur, eo magis erigimur. In 2. parte, Feria 3. Quinquagesimæ.

9. *Vnus autem ut vidit quia mundatus est.* Non ita liquet de peccatis remissis, nec propterea tamē habēda est sollicitudo anxia & scrupulosa, sed neque rationabilis deponenda. In 1. parte, Fer. 3. Hebdom. 4.

10. *Noane decem mundati sunt, &c.* De vera Gratitude quæ non minus modò paucorum est, quàm tunc fuit vnus tantum ex decem viris mundatis. Quod quia mirum est & non minus damnosum quàm probrosum, idcirco singularis hac proponitur Veritas: &

Ratio eius quæ assertur non ita forte trita est & obuia, proindeque plurima consideratione indiget vt bene intelligatur quid sit vera Gratitude, neque enim in verbis sita est, nec in affectu solo sensibili, aut in tali ratione beneficij ad Deum qua frequenter dicimus nos tale ab eo accepisse beneficium, nos illi valde esse obstrictos, plurimasque reddimus gratias. Non hic inquam sistit Gratitude, sed in ipso Beneficij & acceptæ gratiæ vsu secundum Deum, id est, eo modo, eo fine, eo loco & tempore, quod putamus Deum velle nos vti suo beneficio, nihil aliud penitus attendentes quàm illam eius ordinationem, & voluntatem, vt sicut eum agnoscimus Authorem Gratiæ, Ita & Finem eiusdem, actu & effectu purè agnoscamus. *Qui manducat, inquit Apostolus: Domino manducat; gratus enim agit Deo. Et qui non manducat; Domino non manducat, & gratias agit Deo. Nemo enim nostrum sibi viuit. Quasi diceret, hoc est verè gratias Deo agere si manduces vel*



non manduces propter Deum: quia reuera non aliter viuere debemus, neque alio nobis sine sua dona largitur Deus, quam vt ipsi seruiamus & viuamus.

Quod confirmans Idem Apostolus, *In omnibus*, ait, *gratias* 1. Thess. 5.  
*agite: hæc est enim voluntas Dei in Christo IESV.* Id est, sic vult  
Deus agnosci sua beneficia, vt sicut in omnibus Eum Benefa-  
ctorem habemus, ita & in omnibus gratias reddamus. Sed quo-  
modo in omnibus, nisi omnia referendo ad ipsum? Quod &  
alibi sic apertius exprimit: *Omne quodcumque facitis in verbo, aut in* Coloss. 3.  
*opere, omnia in nomine D. N. IESV Christi, gratias agentes Deo &*  
*Patri per ipsum:* Siue vt ait Psaltes, *In idipsum*, id est, in illud ps. 35.  
ipsum propter quod collatum est beneficium.

Et certe, quantumcumque de accepto beneficio Deum lau-  
daremus, si beneficio abuteremur ad eum offendendum, nonne  
ingrati essemus? Si quis autem non refert vsum beneficii ad  
Deum, Deum offendit quia sic habet alium finem præter Deum,  
qua inordinatione finis & deprauatione intentionis, non potest  
non offendi Deus, ynde est illud Psalmi, *Retribuebant mihi mala*  
*pro bonis, sterilitatem anime meæ.* Id est, dum mihi bene non fa-  
ciunt, male faciunt. Et hic est primus Ingratitudinis gradus, ait  
sanctus Thomas. Alioquin ille Pharizæus qui dicebat, *Deus, gra-* 2. 2. q. 107.  
*tias tibi ago quod non sum sicut ceteri hominum,* Et quæ alia superbe Luc. 18.  
effutiit, Gratus fuisset & Gratitude quoddam exemplar edi-  
disset; quis hoc tamen dicat? Cur porro potius ingratus censen-  
dus est quàm gratus, nisi quia gratias suas non referebat ad Deum;  
referebat quidem beneficium sed non beneficii vsum; fatebatur  
Deum authorem bonorum suorum operum, sed non eorum fi-  
nem. Non propter Deum opera illa fecerat, nec propter Deum  
agnoscebat se accepisse gratiam vt opera illa faceret, atque id-  
circo non erat verè gratus.

Denique videndus est noster Samaritanus qui non modo gra-  
tias verbo reddebat, sed *procidens in faciem suam*, & se totum ad-  
uoluens pedibus Benefactoris sui, ita vult ei adhærere, vt non  
prius ab eo discedat quàm iubeatur abire, & quocumque tandem  
eat, non ibit nisi iussus, nihil faciet nisi iussus, & propter eum  
qui iussit, sicque non modo Eum agnoscebat authorem sanitatis &  
vitæ, sed ad Illum, & sanitatem & vitam suam referet. Hoc est  
esse Gratum. *O Domine, quia ego seruus tuus sum, ego seruus tuus* ps. 137.



& filius ancille tuæ. Dirupisti vincula mea, tibi sacrificabo hostiam laudis. Nempe meipsum in hostiam & in laudem tuam.

## II. P V N C T V M.

**S**ED paucorum est, sic usum beneficij referre in vnum Deum.

Nam ad hanc puram relationem oportet esse affectibus suis puros, quod certe paucorum est: Quando enim nimis afficimur erga creatum aliquid, sicut dolemus quando non illud possidemus, sic quando re cupita fruimur, amor gaudium, & alij humani affectus ita rem ad nos attrahunt & referunt, vt vix de relatione ad Deum cogitemus; satis nobis esse putamus si quod erat in desiderio atque in spe, possideamus, *Bos cognouit possessorem suum, & asinus praesepe Domini sui: Israel autem me non cognouit: & populus meus non intellexit! AMBVLAVERVNT post vanitatem, & vani facti sunt, & non dixerunt, ubi est Dominus qui ascendere nos fecit de terra Aegypti!*

Is. 12.

Ier. 2.

In hoc enim situs est amor concupiscentiæ, vt ad nos rem concupitam deferamus, propter nos illam amemus: Nos in ea diligamus. Amor autem Amicitiae amat amicum propter ipsum, amat Deum propter Deum, hæc est vtriusque amoris differentia; Et licet non semper malus sit amor concupiscentiæ, nec malum sit, amore nostri ordinato beatitudinem æternam concupiscere vel gratias quæ nos ad illam ducant; In multis tamen talis amor valde imperfectus & vitiosus est, Nempe qui sanitatem tantum optet vt bene valeat, qui donum orationis tantum desideret vt commodius oret; isti affectus non sunt satis puri, & quia non satis puri sunt, nos in nobisipsis sistunt: nec ultra tendunt in Deum; & quia non ultra tendunt in Deum, non sunt satis puri.

Iac. 4.

Phil. 2.

Ista enim duo sese inuicem consequuntur, ac proinde verissimum est quod ad hanc puram relationem vsus beneficij, oportet esse affectibus suis puros, & vnus Dei gloriam quærere. *Appropinquate Deo, & appropinquabit vobis. Emundate manus peccatores. Purificate corda duplices animo. Quam pauci vero tales! Omnes enim quæ sua sunt quærunt, non quæ sunt IESV Christi.* Vnde paucorum certe est, sic vsum beneficij referre in vnum Deum. Neque aliter ipsi nouem Leprosi non redierunt atque ingrati fuerunt, quam quia sic sanitatem amabant vt cum se viderent sanos, tum quasi obtinuissent



obtinuissent quod vnum optabant, conquieuerunt, nec aliud cogitarunt. O peruersum nostri amorem qui sic peruertit amandi ordinem vt dona plusquam Datorem amet.

I I I. P V N C T V M.

**V**ERE igitur paucorum est vera Gratitude: Nam paucorum est vera cordis & affectuum puritas, cuius defectu non refertur vsus accepti beneficij ad vnum Deum, in qua sola vsus relatione sita est vera Gratitude: Vt è contra Ingratitudo, quando beneficium aliter vsurpatur: quia Deum priuat sua gloria, sua laude, suo fine, suoque merito. *Ego dedi eis frumentum & vinum & oleum, oscari & argentum multiplicavi eis & aurum quæ fecerunt Baal. ARGENTVM* *ibid. 8.* *suum & aurum suum fecerunt sibi idola vt interirent.* Quod confirmatur ex his Apostoli verbis, *In nouissimis diebus, inquit, erunt* *2. Tim. 3.* *homines seipso amantes, superbi, elati, blasphemii, parentibus non obediens, ingrati, scelesti;* Quæ sunt omnia vitia opposita Gratitude ab vna eademque radice prodeuntia, quæ est inordinatus sui amor. Hic nempe vt dictum est omnia ad se attrahit, & quidquid ore dicatur, contradicit opere, & non est ex multis qui redeat & det gloriam Deo nisi vnus aut alter.

Expende iterum illa Christi verba, *Qui redeat & reddat gloriam Deo.* Nam vt flumina fluunt ad mare vnde veniunt, sic beneficia ad fontem suum redire debent: & vt gloria non datur tantum verbo, sed magis opere, sic non ille gloriam accepti beneficij dabit Deo qui dicet tantum se ab eo accepisse beneficium, nisi etiam omnem ex vsu beneficij referat gloriam; alioquin quæ Dei gloria, si tantum agnoscatur Author beneficij, vt ab Illo proueniat: sed non finis vt ad ipsum Authorem referatur? Non est diuidenda Dei Gloria sed vni Deo relinquenda, *Gloriam meam, inquit, alteri non dabo.* *Is. 42.*

Est aliud in beneficio præter laudem & Gloriam, quod tibi facile concedet Deus, nempe meritum & merces; sed si Gloriam boni operis quam sibi reservat præripere volueris, tum eius merito & fructu priuabere. *Amen dico vobis, receperunt mercedem suam.* *Matth. 6.* Qua de re supra fufius.

Iam vero reflecte discursum in teipsum, & vide an ita Deum pure quæras in omnibus acceptis Gratiis, vt nihil de tuo honore

K k k



626 Dominica 13. post Pent. De decem leprosis mundatis, &c.

cogites? Hinc iudica de tua Gratitude vel Ingratitude. Nolles Ingratus dici; Nam *omne vitium dixit qui dixit Ingratum*: Sed siue dicaris vel non, si reuera fueris coram Deo ingratus, nonne te idem probrum manet, ac si dicereris? At vero nisi cuncta pure & sincere ad illum referas, nonne hæc est Ingritudo quam hodie didicisti? Vides ergo quanta te maneat obligatio purificandi semper affectus, ne intentio corrumpatur & Gratitude violetur? Hoc sit propositum tuum: *Ego autem ad Dominum aspiciam: expectabo Deum Salvatorem meum*. Vide in 1. parte, Feria 3. Hebdom. 5. post Epiphan. In 2. Feria 5. Septuagesimæ: In 3. Feria 2. Hebdom. 2.

Ad Sacramentum vnde Virtutes exeunt, reuertuntur, vt iterum fluant.



HAC HEBDOMADA, cum à Iudæa Dominus transisset in Galilæam, adduxit Discipulos suos in desertum, quò statim conuenit multitudo multorum millium quos ex triduo ieiunio fessos pauit, multiplicatis quinque panibus & piscibus; tum Diuino illos Sermone instruxit qui habetur Ioannis sexto, de Sacramento sui Corporis, cuius Figura quædam fuit, antecedens panum multiplicatio.

## FERIA SECVNDA.

### DE SECESSV DOMINI ET DISCIPVLORVM EIVS IN DESERTVM.

*Venite seorsum in desertum locum, & requiescite pusillum.* Marci 6.



*Christo non seruit, qui Christo quidem laborat, sibi verò quiescit. 627*

## VERITAS PRACTICA.


Christo non seruit, qui Christo quidem laborat, sibi verò quiescit.

*RATIO EST, Quia Christo non seruit qui debitam ei seruitutis partem subtrahit.*

*Sed qui Christo quidem laborat, sibi vero quiescit, debitam ei seruitutis partem subtrahit.*

*Ergo is Christo non seruit. Quod cum sit valde pudendum & damnosum, audiendus Christus Dominus vocans ad quietem sicut ad laborem, unde nec minus quiescendum propter Christum, quam laborandum.*

## I. P V N C T V M.

 **EX**ATIGATOS ex longo itinere Discipulos, seu variis iteratarum sæpe Missionum laboribus fractos, cum Dominus paululum recreare vellet, *Venite*, inquit, *seorsum, in desertum locum, & requiescite pusillum.* Erant enim, *vt* Marc. 6. addit Euangelista, *qui veniebant & redibant multi, & nec spatium manducandi habebant.* O foelix pro Christo labor! O foelix cum Christo quies! Quiesce tantisper in illo affectu: Tum vide accuratius, quomodo Ille ipse qui Operarios suos ad opus & laborem vocat, reuocat ad quietem: neque hi aliter requiescunt quam vt laborarunt, nempe non aliter laborarunt quam vocati seu Missi ad opus & laborem, neque etiam ab opere & labore cessant nisi reuocati, nisi iussi vt quiescant. O Illustre documentum quo discamus quid sit seruire Christo! Multi enim putant satis esse si quas horas impendant in eius obsequium vel orando, vel studendo, vel cuius demum suo vacando muneri: tum verò post sibi viuant, sibi manducant, sibi relaxent animum, sibi otientur, sibi quiescant, & vno verbo quidquid vitæ degendæ superest, prout velint transigant, & quidquid velint, sui gratia velint & agant.

Sed errant profectò grauiter: & contra hunc errorem statuitur



Coloss. 3.  
2.iii. 2.

proposita Veritas, *Quod is Christo non seruit qui Christo quidem laborat, sibi autem ita quiescit, quasi quiescendo & relaxando animum non ita spectandus esset Christus sicut laborando.* Non est hoc seruire Christo, non est seruire Domino suo si debitam ei seruitutis partem detrahas, quam nullo modo vellet sibi detrahi. Sicut enim peccarent Domini qui debita mercedis parte seruos defraudarent, sic plane peccant serui, si debitam Domini denegent seruitutis partem. *Serui, obedite per omnia Dominis carnalibus, Vide vt nihil excludit Apostolus, qui & rursus expressius; Seruos, inquit, Dominis suis subditos esse, in omnibus placentes, non contradicentes, non FRAVDANTES, sed in omnibus fidem bonam ostendentes.* Quæ si Dominis carnalibus præstanda sunt, quanto magis Christo, qui tale ius habet in vniuersam vitam nostram, vt Ipse de iure suo non possit remittere, nec te ita debito seruitutis eximere vt aliquam vitæ partem non illi debeas, ac nisi reddas, fraudis factæ reus existas.

Ephes. 6.

Luc. 12.

Et certe, si Apostolus proponit seruitutem quam debemus Christo in exemplar seruitutis quæ debetur hominibus, velitque *per omnia seruos obedire suis Dominis carnalibus, non ad oculum seruientes, quasi hominibus placentes, sed vt seruos Christi;* Nonne consequens est, sic ipsi Christo plene atque vniuersim seruiendum esse, nulla vt debitæ seruitutis pars desit? Alioquin quomodo inde concluderet, sic Dominis seruiendum in omnibus sicut Christo, nisi sic Christo seruiendum esset in omnibus? *Ille seruus qui cognouit voluntatem Domini sui, & non fecit secundum voluntatem eius, vapulabit multis.* Cur porro nisi quia non seruit Domino? Cur vero non seruit Domino, nisi quia debitam ei seruitutis suæ partem negat & subtrahit? O infidum seruum, qui cum subtractos homines à seruitute sui Domini deberet in officium reuocare: se inde etiam, malignè subripit, & malignitatis suæ iustas obtendit causas!

## II. P V N C T V M.

**S**ED qui Christo quidem laborat, sibi verò requiescit; sic debitam ei seruitutis partem subtrahit.

Nam cum illa requies & relaxatio animi sit pars quædam vitæ, vitam autem debeat omnino integram & nulla ex parte deficientem in eius seruitutem, profecto tantum demit debitæ seruitutis,



*Christo non seruit, qui Christo quidem laborat, sibi verò quiescit. 629*

quantum demit vitæ. Aut neget Christianus debere se totam vitam Christo, aut fateatur se quod debet non reddere, si tollit illam vitæ partem quam sibi soli applicat. *Non estis vestri, empti enim estis pretio magno. VT qui viuunt, iam non sibi viuunt*, ait Apostolus; Quod vt apertius videas, inquire apud te ipsum cur laboret ille seruus Christo, qui laborem illi suum non negat? Cur Christo seruit ex illa vitæ parte quæ laborando consumitur? Dicat aliquam causam, appellet aliquem Titulum quo se putet obligatum ad illam suæ seruitutis partem quam concedit. An quia Christus est Dominus? An quia Redemptor noster? An quia Iudex & Retributor futurus? Dic, dimidiate Christi serue, dic quod voles Nomen quod inferre tibi videatur aliquod seruitutis obsequium; nisi videatur totius vitæ inferre seruitutem, sanctum illud nomen blasphemabis, tantumque illi detrahes dignitatis & meriti, quantum de seruitio putabis detrahendum. Cum enim tale sit Nomen vt quantus quantus es, totum te Christo addicat: Tu qui partem tui tantum inde concedis, & negas aliam; nonne negas sancto Nomini quod debetur? Nonne ius Christi proscindis? Nonne imperium contrahis? Nonne Dominium conculcas? Nonne id denique re ipsa dicis quod solus ausit proferre impius, *Quis est omnipotens, vt ex illa parte seruiamus ei?* O intolerandam audaciam. 1. Cor. 6.  
2. Cor. 5.  
Iob. 22.

Addi posset quod alibi monstratum est, illam vitæ partem quæ cessatur à labore, tantò magis deberi Christo quanto est carior, & quanto est euidentius periculum ne cum sibi quis viuât & non Christo, solutius viuât & liberius peccet. O quanta tum linguæ libertas! ô quanta tum peccandi procliuitas? In 1. parte,  
die 4. Ianuarij.

### III. P V N C T V M.

**N**ON seruit igitur Christo qui laborat quidem Christo, sibi vero requiescit; Quia dum sibi requiescit, se ita subtrahit Christo sicut si sibi laboraret: cum æque illi debeat quietem, ac laborem: cum illi æque debeat illam vitæ partem qua quiescit, atque illam qua laborat: cum illi æque debeat illum vitæ actum quo loquitur, atque illum quo silet: cum illi denique se totum debeat, ex quo toto quantum deducit, tantum de seruitute deducit, tantoque verius dicendum de illo est quod Christo non seruit. *Huius* Rom. 16.



630 FERIA 2. Hebd. 13. post Oct. Pent. Venite seorsum, &c.

cemodi Christo Domino nostro non seruiunt, sed suo ventri, suæ libidini, suæ quam vocant recreationi & voluptati.

3. Reg. 18.

Deut. 22.

Leuit. 19.

Eccl. 1. 2.

2. Cor. 6.

Matth. 6.

Apoc. 3.

2. Cor. 6.

Luc. 17.

Hoc est scilicet claudicare in duas partes; Hoc est arare in bone simul & asino: Hoc est veste indui quæ ex duobus texta est: Hoc est agrum suum serere diuerso semine: Hoc est duplicem esse corde, & duabus viis incedere: Hoc est sociare lucem cum tenebris, & Christum cum Belial: Hoc est seruire velle duobus Dominis: Hoc est neque calidum neque frigidum esse, sed tepidum. Quæ omnia in Scripturis reprobantur; contraque palam conceptis verbis edicuntur: In omnibus exhibeamus nosmetipsos sicut Dei ministros.

Times forte, ne nimis multa Deo præstes! Inconsulte! Postquam fecisses omnia, te nonnisi seruum inutilem profiteri deberes: qualem te vero dices cum aliqualem tantum partem reddideris? Vide in 1. parte, Die 4. Ian.



## FERIA TERTIA.

### DE QVINQVE HOMINVM

MILLIBVS SATVRATIS, MVLTIPPLICATIONE

QVINQVE PANVM, QVÆ FVIT

FIGVRA SANCTISSIMI

SACRAMENTI.

Accepit IESVS Panes, & cum gratias egisset, distribuit discumbentibus. Ioan. 6.

### VERITAS PRACTICA.

Quod præsertim spectat Christus, non est quid ad se afferas, sed quid à te auferas.

RATIO EST, Quia in accessu ad sacram Mensam, de quo



*Quod præsertim spectat Christus, non est quid ad se, &c. 63\**

*hic præcipue agitur, quod præsertim spectat Christus, est puritas cordis.*

*Atqui ad puritatem cordis magis refert quid à te auferas, quam quid ad Christum afferas.*

*Ergo hoc ipsum est quod præsertim spectat Christus, non quid ad se afferas, sed quid à te auferas : Pravam scilicet cupiditatem qua Cor inficitur, & qua sublata purum manet cum Gratia, & aptius dispositum ad alias gratias recipiendas.*

### I. P V N C T V M.

**D**E hac panum multiplicatione, cæterisque miraculo coniunctis circumstantiis, iam semel atque iterum suprà tractatum est. Quod modo hîc proponitur considerandum referri debet ad vsum sanctissimi Sacramenti cuius figura quædam fuit hæc panum multiplicatio. Sic enim quotidie Diuinus ille Panis multiplicatur, vt licet innumera hominum millia eo reficiantur, semper tamen supersit quo refici possint : Et verò imprimis attendenda est illa hominum dispositio qui multiplicatis à Christo panibus saturati sunt. Vide vt omnes sua omnia reliquerunt, vnum vt Christum sequerentur. Contemplare attentius vt omnes prædicanti attendunt, & loquenti sic adhærent vt sui penitus suorumque obliti nihil aliud curent, nil aliud cogitent. Iam triduo ieiuni permanent, nec vllus de cibo loquitur, nullus de discessu verbum facit; nec timent famem, nec laborem metuunt, nec mortem reformidant. Tantum Christo fruuntur, tantum loquentem audiant, vel silentem videant, & sibi satis esse profitentur. Non discedent nisi iussi vel dimissi, & morientur potius ad eius deuoluti pedes quàm ab illo dimitti petant. O præclarum exemplar procurandæ dispositionis ad sacram Mensam ! Sic affectu reliquisse nos omnia oporteret sicut illi effectum homines : sic reficeremur Communicantes, & tam Diuina mentis saturitate repleremur, vt non aliquid nos reliquisse sed mutasse in melius, tum facile sentiremus.

Hunc in finem proponitur Veritas modo expendenda, Quod

*In 2. parte,*

*Dom. 4.*

*Quadrages.*

*In 3. parte,*

*Dom. 6. post*

*Pentecostæ*



ex multis quæ videntur facienda paranti se ad sacrum Epulum, Non tam positivum aliquid Christus spectat quod ad se afferas, quam negativum, ne afferas: & quod à te prius tollas quam accedas.

Ratio iam sæpe potuit agitari, sed quoties agitur de præparando corde ad orationem vel Communionem, nihil aliud inquirendum aptius & convenientius quam ipsius cordis puritas & munditia. *Beati mundo corde quoniam ipsi Deum videbunt.* Non tantum aliquando in gloria, sed iam in gratia quam percipient tam vberem & copiosam, ut verè Deum præsentem sentiant & quodammodo videant. Cum enim sit idem Dominus hic recipiendus à nobis, qui nos in cœlo recipiet, sicut ut ab eo recipiamur, maximè requiritur puritas & munditia, sic ut eum recipiamus, eadem suo modo Puritas quæritur, quia velut pro eodem à nobis duci debet, & à Christo nos recipi, & nos Christum recipere. *Et ero immaculatus cum eo, & observabo me ab iniquitate mea,* dicendum cum Davide quoties cum Christo nobis versandum est, siue in cœlo, siue in terra, semper & ubique est Christus, semper est Dominus, ubique sanctus & sanctitatis amantissimus, *Sancti eritis quia ego sanctus sum, dicit Dominus.*

Adde, quod cum ex se satis sit propensus ad conferendas gratias, dum nihil ex parte nostra obstat; hoc vnum maxime quaerit nihil ut obstat, cumque aliud quod obstat vehementius nihil sit quam impuritas cordis aut affectuum: Quid est quod illi iustius persoluamus? Nonne tam sæpe audis illum inclamantem, *Lauamini, mundi estote, auferite malum cogitationum vestrarum ab oculis meis, & venite;* Quasi diceret, nec aliter etiam venire audeatis. Nonne hoc tibi notum? Nonne hoc tibi videtur æquum? Nonne hoc timendum quod dixit Petro: *Si non lavero te, non habebis partem mecum?*

## II. PUNCTVM.

**A**T QVI ad puritatem cordis magis refert quid à te auferas, quam quid ad ipsum afferas.

Afferendum quidem est Cor mundum quod petit, sed Cor ut mundetur, non tantæ est positivæ nostræ operæ quàm negativæ. Nihil quicquam nisi cum Gratia poteris, sed poteris cum ipsa facilius quæcumque dicuntur positiva, id est, actu ipso præstanda

ut



ut orare, confiteri, abstinere & similia, quam non amare honorem, non timere contemptum, nulla re denique perperam affici; hæc sunt scilicet negatiua quæ præ aliis difficiliora sunt etiam cum pari gratia, & quæ minus proinde damus, in quibus tamen dandis tota consistit puritas, quia hæc sunt *quæ coinquinant hominem*, Hæc sunt quæ dicuntur à nobis auferenda, hæc sunt quæ magis refert auferre ad cordis puritatem, quia donec à corde auferantur, cor non erit purum; statim autem atque sublata fuerint, purificabitur.

*Aufer rubiginem de argento & egredietur vas purissimum*, ait Sapiens, *Si quis se emundauerit ab istis, erit vas in honorem, sanctificatum, & utile Domino ad omne opus bonum paratum*, inquit Apostolus, *Auferte ista hinc, & nolite facere domum Patris mei, domum negotiationis*, ait ipse Dominus. Aufert ipse quidem solus ab inuitis Iudæis quæ in templo vendebantur, sed vult à te simul volente & lubente auferri quod in templo cordis tui profanum est & immundum. *Si abstuleris de medio tui catenam*. O præclare dictum! sunt enim non modo concatenati cordis affectus, sed cor ita suis ligatur affectibus, ut catena cordis sit ipse cordis affectus, neque aliter Cor ligari desinat, quam desinat prauè affici. *Dissolue colligationes impietatis, solue fasciculos deprimentes*.

### III. P V N C T V M.

**Q**UOD spectat ergo præcipue Christus Dominus, non tam est quid ad se afferas, quam quid à te auferas, Quia in tuis illis prauis affectibus auferendis puritas cordis quam maximè quærit, sita est; & Charitas tua major ostenditur cum quod in te est difficilius, tibi que carius, non negas petenti Christo. Sic *Incorruptio facit esse proximum Deo*. Et sic proximum esse Deo facit esse sanctum, esse beatum, esse Diuinum.

Hinc aptè Sapiens: *Qui mundus est, rectum est opus eius*, Quasi diceret, rem totam perfecit, totum confecit negotium qui mundus esse cepit. Vnde & Apostolus: *Has ergo habentes promissiones, carissimi, mundemus nos ab omni inquinamento carnis & Spiritus, perficientes sanctificationem in timore Dei*. Arduum quidem opus; sed opus est etiam grande, præparare animum recipiendo Christo. Neque enim homini præparatur habitatio sed Deo. *Mundate domum*.



634 FERIA 3. Hebd. 13. post Oct. Pent. De quinque millibus, &c.

*Domini, auferte omnem immunditiam de sanctuario.* Hoc videlicet cogitandum, nil minus agi quam de paranda domo Domini, quam de ornando sanctuario, & instruendo propitiatorio vbi verissime sedeat Christus Dominus.

*Prou. 3.* Quod autem à te petitur, licet arduum & difficile sentiat, non est bonum aliquod quo te priues, sed malum est quo te priuari bonum est & beatum. Aut certe si te putas dare aliquid, vide cui des, nempe Deo cui nihil vniquam perit datum; vnde aptissime Sapiens: *Honora Dominum de tua substantia, & implebuntur horrea tua saturitate, & vino torcularia tua redundabunt.* Hoc est videlicet honorare Dominum de nostra substantia, quando pro illius honore naturales cordis affectus expurgamus; Tum vero Dominus seipso nos ita reficit & saturat, vt quod iam dixi, non dedisse sed accepisse sentiamus. Hinc & alius Sapiens, *Bono animo gloriam redde Deo. Da Altissimo secundum datum eius, quoniam Dominus retribuens est, & septies tantum reddet tibi.* Nonne iam satis multis nos prauent? Nonne satis multa in coelo nobis reseruat? Et quasi nihil illa essent, quasi nihil fecisset, aut facturum esset: nunc in presenti etiam multiplicanda spondet quæ ipsi vltro dederimus: nec tamen excitamur ad id dandum quod postulat! Infida certè nimis humana corda.

Vide Initio huius 3. partis.



## FERIA QVARTA.

### DE SVBMERSIONE PETRI

A M B V L A N T I S S V P E R

A Q V A S.

*Videns ventum validum, timuit; & cum cœpisset mergi, clamauit dicens, Domine, saluum me fac.* Matth. 14.



*Res aduersæ non possent quemquam deicere, nisi se his, &c. 635*

## VERITAS PRACTICA.

*Res aduersæ non possent quemquam deicere, nisi se his prius vellet subicere.*

*RATIO EST, Quia rebus aduersis dejici nihil proprie est aliud quàm à virtute tum exercenda reuocari ad vitium. Sed nisi homo vellet se rebus aduersis subicere, non cum possent à virtute ad vitium reuocare.*

*Ergo non possent quemquam deicere, nisi se his prius vellet subicere, & sinere se in vitium trahi. Quod nimis probrosum est & cauendum.*

### I. P V N C T V M.

**P**ROPE desertum illud, vbi Christus Dominus requieuit cum Discipulis & pavit turbas, erat quoddam fretum seu sinus maris quàm ducebatur Betlsaidam & Capharnaum, quæ erant ciuitates Galilææ, quòque venturus erat ipse Dominus. Illuc vero præmisit suos, & inquit ascendere in nauculam & præcedere eum trans fretum donec dimitteret turbas. Et dimissa turba, ascendit in montem solus orare. Naucula autem in medio mari iactabatur fluctibus; erat enim contrarius ventus. Quarta autem vigilia noctis, venit ad eos ambulans super mare. Et videntes eum, turbati sunt dicentes, quia Phantasma est. Et præ timore clamauerunt, statimque IESVS locutus est eis, dicens, Habete fiduciam, Ego sum, nolite timere. Respondens autem Petrus dixit, Domine si tu es, iube me ad te venire super aquas. At ipse ait, Veni. Et descendens Petrus de naucula, ambulabat super aquam ut veniret ad IESVM. Videns vero ventum validum timuit, & cum cœpisset mergi, clamauit dicens, Domine saluum me fac. Et continuo IESVS extendens manum, apprehendit eum, & ait illi, Modicæ fidei quare dubitasti?

Hæc sanctus Euangelista, quæ omnia quidem singulari sunt consideratione dignissima, sed imprimis quod vel Petrus ambularet super aquas, vel submergatur. Si enim submergitur pondere



suo naturali, quomodo ante ambulabat? Aut si virtute Domini ambulabat, quomodo postea tam periculose submergitur? Ratio expressa est in Textu: *Videns, inquit, ventum validum, timuit & diffidit: Vnde illi Dominus, Modica fidei, quare dubitasti?*

En ergo causa submersionis Petri, non naturale pondus, non mare agitatam, non venti flantes; sed inordinatus timor & diffidentia. *Non ventus periculum, inquit sanctus Chrysostomus, sed modica fides fecit.*

Sic plane nobiscum agitur in Aduersis de quibus tantopere querimur, Non ipsæ res nos deprimunt, sed ipsi nos nostra culpa deprimimus & nos mergimus. Quæ putamus esse rerum vitia, nostra sunt, & merè nostra. *Neque enim res aduerse quemquam dejicere possent, nisi se prius illis vellet subicere.* Quæ Veritas modo expendenda cum iam supra sæpius aliis expressa terminis declarata fuerit, nunc breuiter & facile sic persuadetur.

Rebus aduersis dejici nihil est aliud quam non esse constantem, non esse patientem, vel humilem vel obedientem, vel denique non eam exercere virtutem quæ tum exercenda esset Christiano & Religioso: Sed potius degenerare in vitium oppositum, vel murmurando, vel superbiendo, vel impatientiæ verba, nimiaque tristitiæ signa dando: quod est valde notandum. Nam non est proprie dejici, opprimi vel paupertate, vel calumnia, vel quauis demum miseria, cum multi viri fortes sic oppressi fuerint, neque tamen dejecti. Non est etiam angere tantisper aut ita dolere & contristari ut qui patitur videatur dejectus: sic enim plures etiam Sancti suis in aduersis rebus, nonnihil doluerunt, *Et supra modum grauati sumus*, ait Apostolus, quantum ad sensum seu ad dolorem sensibilem, quo videbantur quidem dejecti, sed non ita verè & propriè, *Dejicimur*, inquit Idem, *sed non perimus.* Quod antè sic exposuerat dicens, *In omnibus tribulationem patimur, sed non angustiamur: aporiamur sed non destituimur: persecutionem patimur, sed non derelinquimur.* Quasi diceret, sic aduersis premimur & dolemus, ut tamen dolor non sit vitiosus, non simus propterea impatientes, indignabundi, & murmurantes: sed stamus in Domino; *Aestimati sumus sicut oves occisionis, sed in omnibus superamus propter eum qui dilexit nos.*

Hoc est non dejici, nam hoc est non reuocari à virtute in vitium. Cum è contra *qui tentationes non suseperunt cum timore Do-*

2. Cor. 1.

2. Cor. 4.

Rom. 8.

Iudith 8.

1. Cor. 10.



*Res aduersæ non possent quemquam deicere, nisi se his, &c. 637*  
mini, & impatientiam suam, & improprium murmurationis suæ contra Dominum protulerunt, Hi vere dejecti sunt, & proinde exterminati sunt ab exterminatore; & à serpentibus perierunt, vt Scriptura sæpe commemorat.

Numquid tu ex istis es? Et numquid quorum sequeris culpam, timere debes pœnam?

## II. P V N C T V M.

**S**ED nisi homo vellet se rebus aduersis subicere, non eum possent à virtute in vitium renocare.

Intelligendum primò quid sit, se aduersis subicere: nam id bono sensu posset dici & fieri, quo scilicet Sapiens dicit, *Collum vestrum subicite iugo.* Sed alius est sui subijciendi modus & sensus quonempe idem ait, *Ne subicias te omni homini pro peccato,* id est, ne te ita summittas & permittas cuiquam homini, vt si te ad peccandum vellet attrahere, consentias potius quam resistas. Peruerfa enim tùm esset summissio & subiectio. Sic itaque se aduersis subicere, perinde est ac se ita illis dimittere & se totum finire, nulla vt vi opposita renitaris & obsistas, sicque frangaris animo, & in illa delabaris vitia quæ vere dejectum & miserum hominem faciunt, vt supra dictum est.

Iam vero quod hîc proponitur, *nisi homo vellet sic se abicere & summitti aduersis, non possent aduersa quauis illum à virtute in vitium auocare,* satis aperte patet: Manet enim semper homo liber & satis potens cum Gratia, vt ne totus quidem Infernus possit eum cogere ad peccandum si homo nolit. *Fidelis enim Deus est,* ait Apostolus, *qui non patietur vos tentari supra id quod potestis, sed faciet etiam cum tentatione prouentum, vt possitis sustinere.* Et rursus, *Ipse enim dixit, non te deseram, neque derelinquam, itaut confidenter dicamus: Dominus mihi adiutor, non timebo quid faciat mihi homo.* FREMIT mundus, premit corpus, insediatur Diabolus, non cado, inquit sanctus Bernardus, id est non pecco, non sum impatiens, *Fundatus enim sum supra firmam petram.* Quæ certe Petra satis capax & potens est vt sic sustentet & firmet quosuis homines si se illa firmari velint; vnde si cadant, si peccent, si murmurent, non aliunde est quàm quia nolunt ad Petram recurrere: nolunt dare manum sustentanti Christo, nolunt illi confidere, nolunt omnino pati, & cum propterea tamen miseriis suis non liberentur, malunt pati



sine Christo quam cum Christo, malunt pati in peccato quam cum Virtute.

O miseros impatientes, bis miseros! miseros in miseriis, & inferiores in peccatis! Quam verè Sapiens in Prouerbiis, *Qui impatiens est, sustinebit damnum: & cum rapuerit, aliud apponet.* Itemque Ecclesiasticus: *Cor nequam grauabitur in doloribus, & peccator adjiciet ad peccandum.* Nonne te illius peccatoris miseret! At nonne tu ille es peccator qui sic addis malum tuis malis?

### III. PUNCTVM.

**R**ES aduersa non possent igitur quemquam dejicere, nisi se his prius vellet ita subicere, ut propterea virtutem desereret & in peccatum laberetur, Quod est proprie rebus aduersis dejici, sed quod est etiam extra rerum omnium creaturarum potestatem, quæ si vnâ omnes iungerentur, & superæ & mediæ & inferæ, non possent hominem inuitum & nolentem inducere ad peccandum. Nemo enim inuitus peccat. *Nihil vobis nocebit,* inquit Dominus. Tum vero sanctus Petrus: *Et quis est qui vobis noceat si boni amulatores fueritis? Sed & si quid patimini propter iustitiam, beati. Timorem autem eorum ne timueritis, & non conturbemini.* HABETE fiduciam: *Ego sum, nolite timere.* Sic Christus dicebat Discipulis clamantibus, quod videntes hominem ambulanti supra mare, putabant esse Phantasma seu spectrum.

Sic plane Christus est in hoc turbulento casu qui te vexat. Quod tu vocas incommodum, Phantasma est & mera Imaginatio. Muta nomen & voca potius commodum quia Christus est, Christi est bonitas & prouidentia quæ te his ventis ad portum ducit. *Sustine sustentationes Dei; conjungere Deo & sustine, ut crescat in nouissimo vita tua.*

Contemplare attentius in Discipulis quam saepe audiisti Præxim virtutum quæ distinguuntur quæ sunt nostræ potestatis, & quæ non sunt. Vide ut laborant remigando, hoc enim possunt: sed cum flantem ventum non possint retardare, non hoc tentant, non id laborant. Sic tu semper in omni casu vide quid possis, & in Domino effice. Quod minimè verò possis, acquiesce sic volenti Deo. Si quid autem videris perdere. *Crede Deo & recuperabit te.* Vide in 1. parte, Dominica 4. post Epiphaniam.



*Quàm parum pretiosus tibi sit panis vitæ, apparet ex, Eccl. 639*



## FERIA QUINTA. DE SANCTISSIMO SACRAMENTO VT EST PANIS VITÆ.

*Ego sum Panis vitæ. Ioan. 6.*

### VERITAS PRACTICA.

*Quàm pretiosus est Panis vitæ, tanto in pretio esse deberet vita, cuius est Panis.*

*Vel sic:*

*Quàm parum pretiosus tibi sit Panis vitæ, apparet ex paruo pretio in quo illam habes vitam.*

**RATIO EST,** *Quia finis & media sic inter se conueniunt, ut ex vnus aestimato pretio, colligatur & aliud.*

*Sed Panis vitæ & vita spiritalis quam in paruo habes pretio, habent se per modum finis & medij.*

*Ergo quàm parum pretiosus tibi sit Panis vitæ apparet ex paruo pretio in quo illam habes vitam. Quod quia nefas est dictu, discite tanti esse faciendam illam vitam, quanti ipsum Panem vitæ.*

### I. PUNCTVM.



**VM** Dominus venisset Capharnaum, eò etiam conuenerunt Iudæi cum ex illis ipsis multi qui in Deserto pasti erant, tum ex alijs plurimi qui hoc miraculo fuerant excitati, atque eius videndi & alloquendi miro desiderio



tenebantur, qui sic suos aleret & foueret. Post aliquos ergo sermones vltro citroque habitos, eò tandem Dominus orationem deuoluit vt occasione panum quos pridie multiplicauerat in eorum conspectu, de Pane Sacramentali seu de Sacramento Corporis & Sanguinis sui sub specie Panis & vini relinquendo, fuse differuerit prout habetur capite sexto sancti Ioannis. Nos inde tria duntaxat in tres sequentes dies deducemus, vnde ex frequenti huius sanctissimi Sacramenti vsu discamus esse Spirituales, Cœlestes & quos vocant Diuinos homines.

Ac primo quidem hodie spirituales in hæc Christi Domini Verba: *Ego sum Panis vite*, Id est, vitæ spiritualis qua disponimur ad beatam & æternam. Et quia in hoc maxime deficimus, quod vitam illam in Praxi non satis æstimemus, in id præcipue nobis incumbendum est, vt intelligamus quanti sit à nobis facienda. Non possumus autem certius intelligere quam ex comparatione ipsius Panis & vitæ, quæ comparatio talis est vt quam pretiosus est Panis vitæ, tanto in pretio esse deberet vita cuius est Panis: seu quod idem est, Quam parum pretiosus tibi sit Panis vitæ, apparet ex paruo pretio in quo illam habes vitam.

Sic proposita Veritas si attente consideretur erit forte efficacior, cum in id consentire nimis refugiat animus vt parum æstimemus Panem illum qui Christus Ipse est. Et verò manifesta est ratio quæ id conuincit: Quia videlicet tanta est colligatio finis & rei cuiuslibet quæ propter illum finem facienda proponitur, vt quantum finis æstimatur, tantum res illa æstimeretur cuius æstimatio tota deriuatur à fine. Vide quæ supra dicta sunt de mediis ad finem: nam idem concludunt de fine ad media.

Proponatur duobus Viris idem labor ad honorem consequendum, quis eorum putas laborabit impensius? Nonne is certe qui honorem magis æstimabit? Cur pro pecuniis tantus labor assumitur: pro virtute nullus? Quia plus pecuniæ æstimantur quam Virtus. *Pecunia obediunt omnia*, inquit Sapiens. Cur Israelitæ noluerunt laborem illum assumere qui erat assumendus pro terra Promissionis obtinenda? *Quia*, inquit Psalter, *pro nihilo habuerunt terram desiderabilem*. Terra erat illis velut finis laboris, & quia finis ille parum ducebatur ab illis, sic & labor neglectus est, quia si finis non æstimatur, neque res ad finem ducens, vllò erit in pretio. *Sic filij huius sæculi prudentiores sunt filiis lucis in generatione sua,*

Hecl. 10.

Ps. 107.

Luc. 16.



*Quam parum pretiosus tibi sit panis vitæ, apparet ex, &c. 641*

*sua, quia filij sæculi magis laborant pro sæculo, quàm filij lucis pro coelo. Cur porro ita, nisi quia sæculum magis in Praxi à suis filiis, quam coelum à suis æstimatur.*

*O pudor humani generis! Pudor est certe, inquit sanctus Chrysostomus, sic excitari ad virtutem sicut ad pecuniam; quemadmodum Sapiens nos ita excitat dicens, si quaesieris eam quasi pecuniam: sed quandoquidem eò deuenimus, si saltem ut pecuniam sic sapientiam & virtutem quaereremus! At proh dolor, longe minus hanc quaerimus!*

## II. P V N C T V M.

**S**ED Panis vitæ, & vita hæc spiritualis quam in paruo habes pretio, habent se per modum finis & mediæ.

Vita spiritalis est quidam veluti finis Panis vitæ, quia panis hic vitæ idcirco præcipue institutus est ut vitam spiritualemente agamus. *Hæc vita nostræ causa est, inquit sanctus Hilarius, quod in nobis manentem per carnem, Christum habemus.* Sic Tridentinum iam supra auditum, ubi de ratione seu fine eius institutionis agitur: *Saluator noster sumi voluit Sacramentum hoc tamquam spiritualemente animarum cibum quo alantur & confortentur viuentes vita illius qui dixit, qui manducat me & ipse viuet propter me.* Quid clarius? Quid expressius? Nam sicut vita naturalis est finis illius panis quem propterea manducamus, sic vita spiritalis est finis illius quem idcirco comedimus. Non enim viuimus ut comedamus, sed comedimus ut viuamus. Vnde & vna eademque petitione docemur eundem Panem petere: *Panem nostrum supersubstantialemente da nobis hodie.* Quasi diceretur: da nobis vtrumque panem pro vtraque vita, naturali scilicet & supernaturali sustentanda. Admirare, obstupescere; talem Panem ministratum, pro tali vita, pro tali fine!

Quam paruo autem in pretio vitam hanc habeas, nisi agnoscas, tu teipsum planè ignoras, nam cum hæc vita spiritalis tota sit posita in mortificatione interna qua sensitiuus Appetitus subicitur Rationi & Ratio Deo, sicut iam toties visum est: an nescis quàm parum huic mortificationi studeas, quàm raro tibi contradicas ex vera virtute, quàm crebro & frequenter tibi tuis in rebus satisfactum velis? Cum sit inter vos zelus & contentio, nonne carnales estis, & secundum hominem ambulatis? Hæc ex multis nota certissima.



## III. P V N C T V M.

**Q**UAM parum igitur tibi sit pretiosus Panis vite, apparet ex paruo pretio in quo practice vitam illam habes, cuius est panis & cuius est quoddam veluti medium, quo talis vita nutriatur, crescat & roboretur. Sic enim dum finem parui ducis, profecto necesse est, vt quod est medium institutum ad illum finem, parui facias. Nam licet alij sint fines huius Sacramenti & sacrificij, cum tamen certum sit etiam, vnum hunc ex primariis & precipuis esse, vt vitam illam alat spiritualem, quis non videat contemptum huius vite spiritualis redundare in sacrum Panem ex illa saltem parte & consideratione qua est medium ad illum finem?

Iam vero parumne tibi videtur Christum ex parte contemnere, nisi ex toto contempnas? *Quare calce abiecastis victimam meam?* Id est, ex aliqua parte: Quod certe nimis inuisum est & impium; vnde & alibi grauissime conquerens prouocat coelum & terram ad hanc impietatem proclamandam.

*Audite celi, & auribus percipe terra, quoniam Dominus loquutus est: Filios enutriui & exaltaui, ipsi autem spreuerunt me.* Licet nutrimentum illud esset esca communis, ad vitam naturalem sustentandam, tan en impium & sceleratum esset filios, talem alumnum spernere, talem Patrem contemnere; quanto magis nefarium si eum spernas qui te suo Ipse Corpore pascit & nutrit! quanto id stupendum magis coelo & terræ! Vrgete in hac cogitatione vehementius, nec à meditando surgas nisi serio statueris te non modo in speculatione vt dicitur, sed in Praxi & re ipsa tanti facturum spirituali modo viuere, quanti illud facis quod Christus instituit vt illo spirituali modo viuas, alioquin *Iudicium tuum manducabis, non dijudicans corpus Domini*, non dijudicans quo fine sit institutum Sacramentum.

Vide in 2. parte, FERIA 6. Hebdom. 4. post Pascha, vbi hæc exhibetur Veritas:

Quàm gloriosum est Sacramento, multa in nos posse, si velimus: tam ignominiosum est, pauca posse quòd nolimus.



*Qui cœlesti pane sic viuunt vt cœlestes fiant, ita in suis, &c. 643*



## FERIA SEXTA.

### DE SACRATISSIMO SACRAMENTO VT EST PANIS DE COELO.

*Pater meus dat vobis Panem de cœlo verum.*

*Hic est Panis de cœlo descendens, vt si quis ex ipso  
manducauerit, non moriatur. Ego sum Panis vi-  
uus qui de cœlo descendi.*

*Hic est Panis qui de cœlo descendit. Ioan. 6.*

### VERITAS PRACTICA.

*Qui cœlesti pane sic viuunt vt cœlestes fiant, ita in  
suis viuunt corporibus, sicut Cœlites in assumptis.*

*RATIO EST, Quia Cœlites sic viuunt in assumptis corpo-  
ribus, vt nullo corporis deprauentur motu.*

*Sed qui cœlesti pane sic viuunt vt cœlestes fiant, sic nullo sui cor-  
poris deprauantur motu.*

*Ergo sic in suis viuunt corporibus sicut Cœlites in assumptis. Quæ  
certe est excellentissima sacrae Communionis Gra-  
tia, quam vtrum fructuose participes, patet ex hac  
nota, si sinas corpus tuum suis depruari motibus,*

### I. P V N C T V M.

**A**D declarationem Verborum Domini quibus se dicit, *Pa-  
nem de cœlo verum*, sufficeret illa ratio quam subicit, *Quia  
de cœlo descendit*, Et qui de Ipso manducauerit non ita mo-  
riatur quin per mortem, in cœlo viuat. Sed præterea fructuose con-



1. Cor. 15.

fiderari potest, idcirco etiam sanctissimum Sacramentum sic Panem de cœlo dici, quod qui frequenter illud & religiose vsurpant ita quodammodo Cœlestes fiant vt impleatur illud Apostoli: *Primus homo de terra terrenus, secundus homo de cœlo cœlestis. Qualis terrenus, tales & terreni: & qualis cœlestis, tales & cœlestes. Igitur sicut portauimus imaginem terreni, portemus & imaginem cœlestis.*

1. Cor. 15.

Sed quâ notâ, quò indicio hî agnoscentur qui sic fient cœlestes? Nempe illo quod proposita Veritate continetur, vt sicut Cœlites in assumptis viuunt corporibus, Ita illi in suis, quantum humana pati potest conditio. Nihil enim aptius exprimit singularem illam gratiam quæ ex frequenti & religioso Sacramenti refertur vsu, quàm quod dicitur de Angelis vel de aliis in cœlo residentibus quando hîc apparent hominibus. Contemplare tantisper Raphaelem Archangelum aut alium quemuis ex illis Beatis Spiritibus, cum hominibus conuersantem. Assumpsit sibi corpus aëreum, id est, ex aëre conflatum & compactum in quo sic angelicè viuît vt nullo corporis deprauetur motu, quia reuera tale corpus non deprauatur sicut mortale nostrum corpus. Dico mortale, quia quando erit immortale & beatum post resurrectionem, tum erit etiam Spiritale, incorruptum, gloriosum: sicque iam tale est Christi Domini Corpus, ac Beatissimæ Virginis Matris, eorumque omnium qui forte resurrexerint in æternam vitam: qui omnes quantumcumque hîc nobiscum agerent, sic in suo viuerent corpore sicut in cœlo viuunt, id est incorruptè, immaculatè, sanctè ac beatè, quia semper beati essent, licet in cœlo non essent; & statui beatorum repugnat posse corrumpi aut deprauari. *Caro & sanguis, inquit Apostolus, regnum Dei possidere non possunt, neque corruptio incorruptelam possidebit.*

O foelicem illum statum! ô beatam incorruptelam! ô incorruptam beatitudinem!

## II. PUNCTVM.

**S**ED qui cœlesti Pane sic viuunt vt cœlestes fiant, sic nullo sui corporis deprauantur motu.

Rom. 7.

Moueri quidem possunt aliquo deprauato motu, sed ita leuiter aut ita repugnante ratione cum gratia, vt ipsi vix deprauentur: Sicut vnus pro omnibus profitetur Apostolus, qui licet adhu-



*Qui cœlesti pane sic viuunt ut cœlestes fiant, ita in suis, &c. 645*

*videret aliam legem in membris suis repugnantem legi mentis sue, & captiuantem se in lege peccati, Vnde exclamaret, Infelix homo quis me liberabit de corpore mortis huius, continuo tamen addit, Gratia Dei per IESVM Christum Dominum nostrum. Vnde & concludit: Igitur ego ipse mente seruo legi Dei, carne autem legi peccati. Nihil ergo nunc damnationis est ijs qui sunt in Christo IESV, qui non secundum carnem ambulant. Lex enim Spiritus vite in Christo IESV liberavit me à lege peccati & mortis; Id est, ab illo peccati fomite qui per consensum nostrum nos occidit, sed qui nihil nocet sine consensu nostro: Ne autem consentiamus facit illa Christi gratia, quæ tam certo tam copiose & abundanter in frequentato piè Sacramento solet hauriri, ut sola eius quod receptum est cogitatio, teste sancto Chrysostomo, *Nobis omnium irrationabilium motuum possit esse correctio.**

Multi sanctorum Patrum in hanc dicta sententiam vide superius; & adde quod hic maxime proprium est, sic perfectè adimpleri quod ait Apostolus, *si complantati facti sumus similitudini mortis eius: simul & resurrectionis erimus.* Nam negando consensum prauis motibus, complantamur similitudini mortis Christi, id est sumus ei in morte similes; nempe sicut Ille in cruce est mortuus, ita & nos nobis morimur, crucifigentes veterem hominem: Tum vero etiam similes sumus eius resurrectionis, quatenus in corpore nostro mortali viuimus sicut in Immortali, sicut in Incorrupto, & Glorioso. Quodque alibi rursus repetit: *Semper nos qui viuimus, in mortem tradimur propter IESVM: ut & vita IESV manifestetur in carne nostra mortali, Ergo mors in nobis operatur; Nempe operatur vitam illam resurgentis IESV, vitam incorruptam, vitam nullo corporis deprauatam motu.* Nam cum sic per Christi gratiam affecti simus ut inordinato nulli motui consensum velimus dare, status est quidam mortis qui operatur beatum illum statum Resurrectionis quo velut immortales & incorrupti dici possumus, ut in secunda parte demonstratur.

O mihi sic liceat mori, ut mihi sic liceat viuere!

### III. P V N C T V M.

**S**ICVT ergo Cœlites in assumptis viuunt corporibus, ita & qui cœlesti pane sic viuunt ut cœlestes fiant, sic in suis licet corruptis &

*In 1. & 2.  
Hebdomada  
huius 3.  
partis.  
Rom. 6.*

*2. Cor. 4.*

*In Feriis  
Paschali-  
bus.*



646 Sabbato Hebd. 13. post Oct. Pent. Non sicut manducauerunt, &c.

*deprauatis corporibus incorrupti tamen & vix ullo deprauati viuunt motu, quia per communicationem Christi Corporis quod frequenter & studiose suscipiunt, hanc recipiunt gratiam vt quod ait sanctus*  
*1. de Contin.* Augustinus cum Apostolo, *Mortificent membra sua quae sunt super terram, fornicationem, immunditiam, & alia, quando eis mente non consentiunt, neque exhibent eis arma, corporis membra. Et quod est vigilantia maiore Continentiae curandum, ipsa etiam eorum cogitatio, si eorum quadam suggestionem, & quasi susurratione tangatur, tamen ab eis ne oblectetur, auertitur.*

*2. Ioan.* Vide quàm longe absis à tali statu! Vide quid inde te auocet, qua cura te praepares ad Sacram mensam, qua vigilantia tuis animi & corporis motibus reprimendis incumbas! *Videte vosmetipsos, ne perdatis quae operati estis.*



## S A B B A T O.

### DE DIVINISSIMO SACRAMENTO

IN VETERI MANNA FIGURATO.

*Hic est Panis qui de caelo descendit; Non sicut manducauerunt Patres vestri manna, & mortui sunt. Qui manducat hunc Panem, viuet in aeternum.*  
Ioan. 6.

### VERITAS PRACTICA.

Qui oblatam expellit Sacramenti gratiam, qua Diuinus esse possit, non minus forte peccat quam qui olim manna repulerunt.

*RATIO EST, Quia in hoc praecipue peccarunt Israelitae nauseantes manna, quod vilissimos Aegypti cibos illi pretioso caelesti cibo quem offerebat Deus, anteferrent.*



Qui oblatam expellit Sacramenti gratiam qua Diuinus, &c. 647

Sed qui oblatam expellit Sacramenti gratiam, qua Diuinus esse possit, mauult esse animalis quam Diuinus; & sic vilissimum animi statum præfert dignissimo quem offert Christus.

Ergo non minus peccat quam qui olim manna repulerunt. Quod certe non est mediocriter formidandum.

# I. P V N C T V M.

**A**NTIQVVM manna quod Israelitis quotidie de coelo <sup>Sap. 16.</sup> descendebat, sic erat figura Diuinissimi Sacramenti, vt quæ Diuinitatis in Christo sunt, magis representaret quam humanitatis. Quod enim manna *omne delectamentum in se haberet, & omnis saporis suauitatem*, vt ait Sapiens: Vel quod bonis tantum faperet, non autem malis; quod nulla compararetur arte: quod quī plus de illo colligerent quàm ordinata esset mensura, non plus reportarent; Ac denique si quæ essent alia huius cibi miracula, Diuinās proprietates ita exhibebant, vt cum etiam Eucharisticum Sacramentum figurarent, Diuinam non modo Christi naturam exprimerent sed & Diuinam eius virtutem qua Diuinos eos faceret sui que similes, qui se frequentarent religiosius, sibi que se totos vnirent arctius.

Non satis illi fuit Diuinitatis suæ participes nos facere, in illa quam assumpsit humanitate, nisi etiam vnumquemque particulatim Diuinum hominem faceret, si Diuinus esse malit quam animalis, aut nisi malit animalis esse quam Diuinus. Hoc enim vnum obstat ad hanc particularem Diuinitatis participationem & consortium ineundum. Quod obstaculum quam sit indignum, quam iniuriosum Deo, & nobis perniciosum, non poterat melius exprimi quàm Veritate proposita, qua denuntiatur, *Non minus peccare eum qui Diuinam illam Sacramenti gratiam qua Diuini efficimur, à se excludit, quàm qui vetus illud manna olim repudiauerunt.*

Vna est enim eademque prorsus vtriusque peccati ac iniuriæ Ratio quæ primo in Israelitis patuit quod vilissimos Ægypti cibos cibo illi tam pretioso & coelesti, quale erat Diuinum illud manna quod illis quotidie ministrabatur, anteferrent. *Recordamur, Num. 11. inquit, Piscium quos comedebamus in Ægypto gratis: In mentem nobis veniunt cucumeres, & pepones, porri que & cepe & allia. Anima*



648 Sabbato Hebd. 13. post Oct. Pent. Non sicut manducauerunt, &c.

*nostra arida est, nihil aliud respiciunt oculi nostri nisi Man. In quo quidem peccato triplex videtur inesse malitia, nam primo volunt aliter regi quam velit Deus. Deinde cum Panis ille tam suavis esset & delectuens vniuscuiusque voluntati & gustui, prorsus immerito conqueruntur de tali cibo. Denique comparant illi & anteponunt cibos tam viles & abjectos, ut vel ipsorum nomina pudorem injiciant ac horrorem: Vnde grauiter succensus Deus dedit illis quidem escas quibus concupiscentiæ tantisper satisfacerent: Sed adhuc carnes erant in dentibus eorum, nec defecerat huiusmodi cibus, & ecce furor Domini concitatus in populum, percussit eum plaga magna nimis: vocatusque est ille locus, sepulchra concupiscentiæ: ibi enim supelierunt populum qui desiderauerat.*

*Ibid.*

*Hebr. 10.*

*Horrendum quippe est incidere in manus Dei viuentis; Et valde procliuè est in illas incidere, si quod benignæ manus illæ offerunt ad nostram salutem & perfectionem, maligna mente repellimus.*

## II. P V N C T V M.

**S**ED qui oblatam expellit Sacramenti gratiam qua Diuinus esse possit, mauult esse animalis quam Diuinus, & sic vilissimum animi corporisque statum præfert dignissimo quem offert Christus.

*ap. 7. 18.*

Sigillatim cuncta sunt enucleanda. Primo dicitur oblatam esse Sacramenti Gratiam quæ per frequentem & religiosum Sacramentivsum Diuini quidam homines reddimur. Nam qui vita Dei constanter viuit, Diuinus homo non minus dici potest quam Virgines dicuntur Angelici, quod Angelica viuant vita; aut quàm fraudulentis & mendaces dicuntur Diabolici, quod sic Diabolum imitentur. Quid est autem aliud viuere vita Dei quàm operari in omnibus, vbique & semper, sicut Deus operatur, aut quod ipse operatur? Sic enim sanctus Thomas ponit Dei vitam in eius operatione per quam & demonstrat in eo esse vitam. Quid vero prætendit aliud Christus Dominus sese nobis communicans in Diuinissimo Sacramento, quàm se ita nobiscum commiscere & vnire, ut ex nobis duobus fiat vnum quodammodo Principium earum omnium operationum quæ vel in intellectu, vel in voluntate, vel in cæteris animi corporisque facultatibus exerceri possunt ad æternam vitam, possimusque vere cum Apostolo affirmare, *Vita autem iam non ego, viuit vero in me Christus?*

*Gal. 2.*

*Et*



Et rursum, *An experimentum queritis eius qui in me loquitur Christus?* 2. Cor. 13.  
Nonne sic Apostolum diceret Diuinum hominem? Cur porro, nisi quia Deus in illo uiueret & operaretur? Vnde idem dici necesse est de quouis homine qui sua quæque in Deo vel in quo Deus operetur: Vnde Sapiens, *obaudite me Diuini fructus.* Ecclesi. 39.

Secundo, Diuinam illam quæ offertur expellit gratiam, qui ad eam vel recipiendam vel in vsum adducendam non attendit; Qui sibi scilicet non inuigilat vt ex ea potius operetur quam ex appetitu naturali, vel humano respectu: *Qui ea potius quæ carnis sunt Rom. 8. sapit, quam quæ sunt Spiritus:* Vnde

Terrio patet, quod qui Diuinus esse poterat si tali gratia constans cooperatus esset, euadit in aliud quoddam extremum vt sit animalis, id est, animali vita uiuat; Non modò non ex Gratia Diuinoque ductu, sed ne quidem ex rectæ Rationis motu; at solum ex appetitu quæ pars illa est inferior quæ nobis vna est cum cæteris animantibus, ac propterea dicitur animalis, & animales illi qui ex ea potius quam ratione viuunt, *ANIMALES, Spiritum non habentes. ANIMALIS homo non percipit ea quæ sunt Spiritus Dei.* 1. Cor. 2.

Quarto denique, quod est præcipuum Propositionis caput, cum quis ex naturæ viuens impetu sic mauult animalis esse quàm Diuinus, manifeste vilissimum viuendi statum præfert dignissimo quem offerebat Christus. Præfert enim animale statum Diuino; præfert naturam corruptam, Diuinæ Gratia; præfert terram cælo, tempus æternitati: vno denique verbo, præfert appetitum Deo.

*Obstupefcite cæli super hoc!*

### III. P V N C T V M.

**Q**VI oblatam igitur expellunt Sacramenti gratiam, non minus forte peccant quam qui olim manna repulerunt; Quia cum possent si vellent per illam gratiam esse Diuini homines, malunt esse animales; cum possent Diuinam vitam viuere, malunt viuere belluinam: cum possent suis in omnibus animi corporisque motibus Cooperatores Diuinitatis existere, malunt deserto Deo sequi appetitum: quod certe non est minus iniquum quam neglecto manna, concupiscere viliores aliquos cibos. *Qui nutriebantur in croceis, amplexati sunt stercora.* Esto non murmurent, non se nauicare dicant super Diuino cibo, sicut Israelitæ fastidiosi de suo



650 *Sabbato Hebd. 13. post Oct. Pent. Non sicut manducauerunt, &c.*

manna locuti sunt; Eſto in hac parte ſint Iudæis modeſtiores, quia tamen longe major eſt inter Diuinam & animaleſ vitam diſtancia, quam inter manna deſerti & Ægypti allia: ſic fieri poteſt coram Deo, vt quod ex vna parte decedit iniquitatis, accedat & ſuperetur ex alia.

*Apo. 3.*

Quod eò magis verum eſt, quòd hic non fiat comparatio vnius actus ſiue peccati cuiuſquam, cum peccato Iudæorum. De interno & habituali quem vocant ſtatu quæſtio eſt, & quo ſenſu affirmat Dominus ſe malle frigidum quam tepidum, hoc ipſo dicendum eſt pejori ſæpe in ſtatu eſſe animales, licet minus peccare videantur, quàm qui facinora quædam perpetrant grauiora. Hi enim facilius reſipiſcunt & ad meliorem mentem redeunt quam

*4. Coll. c. 19.*

illi tepidi & animales. Quod præclare Caſſianus: *Frequenter, inquit, vidimus de frigidis atque carnalibus, Id eſt, de ſecularibus ac Paganis ad ſpiritualem perueniſſe feruorem: de tepidis atque animalibus omnino non vidimus.*

O deplorandum eorum ſtatum qui tantò magis pereunt quo ſe minùs perire vident! Videſne teipſum in hoc periculo? Certe oportet te eſſe vel frigidum, vel calidum, vel tepidum. At te frigidum & de peſſimis vnum eſſe, quales ſunt Pagani & ſclerati quique, non profiteberis. An vero te calidum, te feruentem & inter ſanctiores te recenſere audebis? Quid reſtat ergo quàm quod ſis tepidus & animalis, ſicque periculoſe viuas, niſi quantocys ad meliora ſuſpires? *Qui timet Deum, conuertetur ad cor ſuum.*

*Eccleſi. 21.*

Niſi Chriſto reſiſteres, ſic te Chriſtus in ſe, ſicut panem conſecratum, conuerteret.

Vide in hac 3. parte, Sabbato Hebdom. 1.







# DOMINICA

## DECIMA QVARTA.

*Nemo potest duobus Dominis servire, &c. Matth. 6.*

VERITAS PRACTICA.

*Vel Domino Deo, vel libidini renuntiandum.*

RATIO EST, Quia sic verum est neminem posse duobus diuersis & dissidentibus servire Dominis, ut si horum vni servire velimus, renuntiandum sic alteri.

Sed Dominus Deus & libido sunt illi duo diuersi & dissidentes Domini, quorum vni servire velimus.

Vel igitur Domino Deo vel libidini renuntiandum est. At renuntiare Deo quis nisi perfidus velit? Ergo renuntiandum libidini, quod sane motuum est efficax.

### I. PUNCTVM.

**Q**UOD in more frequentique vsu positum cernimus apud eos qui persuadendum aliquid suscipiunt, ut sibi repugnantes cogant ad concedenda quædam absurda quæ tamen nolint concedere: hoc familiare Christo fuit, & hoc insigniter patet in hodierno Euangelio. Propositum Christo erat persuadere nobis vni Deo ac Domino seruiendum esse: Difficilis sane



persuasio terrenis mentibus quæ Deo quidem seruire non detre-  
ctent, nisi planè sint infideles; at illi vni seruire, & non libidini  
simul ac cupiditati, tam difficile semper est visum quam facile est  
& proclive suis seruire cupiditatibus.

Quid ergo fiat illis peruersis mentibus? Numquamne Veritati  
cedent? Numquamne oppositam deponent falsitatem? Num-  
quamne soli suo seruire Domino persuaderi se sinent? Sinent cer-  
te, cum Diuina Gratia, si audiant in quod se alioquin absurdum  
& periculum conijciant. Nam nisi suo soli Domino seruiant, seu  
quod idem est, si libidini simul ac Domino seruire pergunt, non  
Domino, non vlla ex parte Domino, sed soli seruiunt libidini.  
*Nemo enim potest duobus seruire Dominis*, quales sunt Dominus &  
libido. *Aut vnum odio habebit, & alterum diligit: aut vnum sustinebit,*  
*& alterum contemnet.* Alterutri necessario renuntiandum. At quis  
non videt quàm sit delirum & absonum, quàm sit periculosum, &  
extremum renuntiare Domino vt soli seruiatur libidini? Quis non  
sentit nisi plane infidelis quàm sit æquius renuntiare libidini, vt soli  
seruiatur Deo! Hic finis & scopus est quò Christi sermo tendit?  
Hoc vnum premit & vrget, vt hoc considerato absurdo facilius  
acquiescamus in id quod docet, *Vni Domino Deo seruiendum.*

Quamobrem ex omnibus considerandis illud vel maxime quod  
proponitur & qua exprimitur forma perpendi debet, *Vel Domino*  
*Deo, vel libidini renuntiandum.* Nam si semel hoc persuasum fue-  
rit, planè intentum habebitur. Quàm facile autem persuaderi  
possit, sic ipse nobis Dominus palàm demonstrat. *Nemo*, inquit,  
*potest duobus Dominis seruire*, Hoc fundamentum est totius disce-  
ptationis, hic rei fundus & cardo. Sic porro hæc sententia debet  
intelligi vt duo illi quibus serui non potest Domini, sint inter se  
oppositi & dissidentes: sic enim propterea Christus addit, *aut vnum*  
*odio habebit & alterum diligit*, quo quidem dicto non tantum de-  
clarat se agere de diuersis & repugnantibus Dominis, sed mani-  
feste probat quod dixit non illis posse duobus seruire Dominis,  
quia scilicet cum sint oppositi, oppositos etiam in seruo procrea-  
bunt odij vel amoris affectus: non potest autem seruus, si de na-  
turæ motu loquamur, sic seruire odioso sicut amato. Sicut enim  
amatum sustinebit, ita & odiosum contemnet.

Deinde verò, licet seruus quantum in se quidem est vtrique Do-  
mino seruire posset; non posset tamen, quantum in ipsis est Do-



minis: Nam vt dictum est, cum sibi aduersentur illi Domini, quod vni ex ipsis à seruo gratum erit, erit ingratum alteri. Quidquid Dauidi bene feceris, hoc sibi Saul malum interpretabitur. Vide huius rei luculentum exemplum, capite vigesimo secundo libri primi Regum.

Quod & illustrari posset ex his quæ à sanctis Patribus atque ipso in primis sancto Thoma dicuntur, nec non vnicuique sunt nota <sup>1. p. 7. §1.</sup> de diuersis nostris affectibus inordinatis. Nam vnde rixa & lites <sup>4. 2.</sup> in nobis? *Nonne ex concupiscentiis quæ militant in membris nostris,* <sup>Iac. 4.</sup> quæ cum sint plerumque oppositæ, quando vni seruire volumus, aliam offendimus: quando concupiscibili satisfacimus, sæpe irascibilis commouetur: sicque in nobis de nobis rixa fit & contentio; quia quot sunt affectus oppositi tot sunt diuersi Domini, quibus placere vellet inordinatus animus; cum id autem non possit idcirco angitur & vexatur. Cur id vero non possit quid est aliud quàm quod nemo possit duobus seruire Dominis, quorum vt vni seruiat, necesse omnino est vt alteri renuntiet; *Dum alterna intentione se impetunt quasi aduersante se vnda collidunt,* <sup>17. Mor. 18.</sup> inquit sanctus Gregorius iuxta illud Isaia, *quasi mare feruens quod quiescere non potest, & redundant fluctus in conculcationem & luctum.* <sup>Is. 57.</sup>

## II. P V N C T V M.

**S**ED Dominus Deus & libido sunt illi duo dissidentes Domini, de quibus hîc singulariter agitur.

Possent alij oppositi Deo, designari: posset Dæmon & Mundus, Id est, quot quot homines vita & moribus Deo aduersantur, siue id quod in mundo & inter homines, malo vtentium vsu & fine, Deo contradicit: sed vna voce *libidinis* hæc omnia continentur, quia neque Dæmon, neque Mundus ita Deo se opponit sicut ipsa libido hominis quæ vna vel maxime Deum impetit, atque illi contrà obnititur. Libido autem, triplex est illa concupiscentia quæ circa vitæ commoda, voluptates & honores inordinate impellimur, quarum illa quæ oculorum concupiscentia siue habendi amor dicitur, hîc potissimum à Domino sugillatur; hoc est mammona quod diuitias significat & diuitiarum appetitum; simul verò & aliæ connectuntur concupiscentiæ quia par omnium & eadem plane est ratio.



Rom. 7.

Tribus porro præsertim modis hæc libido Deum sibi facit aduersarium. Primò in suis primis & ingenitis motibus qui vt plurimum legi Diuinæ contradicunt: hæc est enim lex in membris posita quam videbat Apostolus repugnantem legi mentis suæ, & se captiuantem in lege peccati.

Jer. 8.

Deinde est quando resurgendū à peccato, quanti Deum inter & hanc libidinem oppositi motus? Quàm diuerlis vtriusque stimulis mens agitata peccatoris! Numquid qui cadit non resurget? Et qui auersus est non reuertetur? Quare ergo auersus est populus iste in Ierusalem auersione contentiosa? Apprehenderunt mendacium, & noluerunt reuerti. Omnes conuersi sunt ad cursum suum quasi equus impetu vadens ad prælium, Id est, reuocantur à sua quique concupiscentia, ne ipsos sui poeniteat.

Job. 21.

Ibid. 22.

Tertio denique, si quid Deo consulente vel imperante ferendum est aut agendum quod displiceat; aut nihil ages si libidinem audis, aut nisi repugnanter, & inuitè, malleque Deum tibi subdere quam te Deo. Quis est omnipotens vt seruiamus ei. Quali nescires eum esse omnipotentem & omni excellentem virtute; aut quasi nolles talem eum esse, ne tantæ cogaris virtuti cedere. Qui dicebant Deo, recede à nobis: & quasi nihil posset facere omnipotens, aestimabant eum. Sic plane omnes præue affecti; quidquid Deus bonorum polliceatur, aut quidquid poenarum comminetur, tam parum illi cedunt, tam parum illum aestimant, quam si nihil eorum quæ dixit, posset facere. Nonne hoc est cum Deo dissidere? Nonne hoc est illi aduersari? Imperet Deus Dæmoni, quidquid volet, imperet cælo, soli, lunæ, cæterisque creaturis, mari, terræ & inferis, nulla vna erit quæ non Diuina imperia statim adimpleat. Imperet vero libidini, seu humano animo, Non concupisces; post concupiscentias tuas non eas: Eritne vel vnus homo, vel certe quam rarus erit qui post aurum non abeat nec speret in pecunia & thesauris, quis est hic, & laudabimus eum? Adeo id manifestè constat, quàm hic vnus & solus sit Dominus, qui Domino Deo contradicat & aduersetur!

Exodi 20.

Ecclesi. 18.

Ecclesi. 31.

Gen. 4.

2. 33.

Quo iure autem hic appetitus dicatur Dominus, nullum est plane legitimum; imo est naturale ac positium, vt seruiat ac subijciatur Rationi & Gratia, sub te erit appetitus eius, & tu dominaberis illius, ait ipse homini Dominus Index noster, Dominus legifer noster, Dominus Rex noster. Sed cum sit homo liber & sui in-



ris, ius illud sic peruertit vt qua lege libido seruire debuerat, eadem videatur imperare; & illa est ancilla de qua Sapiens, *quæ facta est hæres Domine suæ*, quæ dominatum in rationem ita exercet, vt Diuinitatem ipsam æmuletur, & quod in idolis Dæmon tentat, hoc in mente Appetitus obtineat, vt tamquam Deus colatur, & sit illud *idolum zeli ad prouocandam emulationem*, de quo apud Prophetam; Et fusè declaratum est in hac 3. parte, Dominica prima. Vide accuratè, & ingemisce vehementius ad tantæ peruersitatis aspectum.

III. P V N C T V M.

**V**EL igitur Domino Deo, vel libidini renuntiandum. Nam cum ex vna parte nemo duobus Dominis seruire possit; ex alia vero, nobis omnino necesse sit vel seruire Deo vel libidini: profecto hinc liquide sequitur quod eo ipso quo vni seruire velis, renunties alteri necesse est. *Si in toto corde vestro reuertimini ad Dominum, auferre Deos alienos de medio vestri, & preparate corda vestra Domino, & seruite ei soli.* Nonne id concedis de vero Dei ac idolorum cultu? Nonne fateris vtrumque simul esse non posse? At nonne audiisti libidinem esse velut idolum his qui libidini seruiunt? Nonne audiisti Christum Dominum aperte denuntiantem omnibus qui se sequi volent, vt se abnegarent, vt sibi suisque omnibus renuntiarent? Quid magis aut expressius dici posset de idolis abnegandis quàm quod de libidine dicitur?

Sicut autem Christus libidinem, sic libido Christum abnegandum pronuntiat. Aut certe quod est immanius, ipse est Dæmon qui per libidinem Christo renuntiari iubet, vt sibi seruiatur; Quod iam sæpe supra sanctus docuit Cyprianus, dum de duplici tractat Martyrio, vbi hæc inter alia plurima: *Satanas tibi loquitur per tuam concupiscentiam, abnega Christum, & esto diues: Sacrifica mammona, & Christo nuntium remittito. Nec dicit, morere, sed potius oblecta oculos, & tamen tu sponte submittis genua Satanae, & ABNEGATO CHRISTO te totum illi mancipas!* Poteratne loqui significantius? Poteratne expressius dicere de Christo abnegato, si sequeris libidinem, quàm quod Christus de abneganda dixit libidine, si velis Ipsum sequi.

O portentum peruersitatis! Quid peruersum dici potest nisi



656 Dominica 14. post Pent. Nemo potest duobus Dominis seruire.

*Math. 27.* quod infra libidinem Gratia, nisi quod infra inferos coelum, & infra Satanam, Christus ponatur! *Quem vultis de duobus*, inquit ille peruersus Iudex! Iniqua certe Christi atque odiosa comparatio cum viro virorum omnium nequissimo! Sed quàm longe iniquior si cum ipso Satana, si cum ipsa nequitia comparatur! Quando vel sola Dominorum diuersitas proponeretur, nonne tanta est vt vna eius consideratio rem supra modum execrandam subijciat?

Quid vero, si diuersa eorum obsequia, si diuersa quæ proponunt sibi obsequentibus præmia, considerentur? *Nunc sit idem*, ait sanctus Chrysostomus, *quale si Rex, suos quidem hæredes, filij vero cohæredes post alia quoque innumera beneficia nos constituere volens, contemnatur: Latronum verò princeps qui nos parentesque nostros innumeris affecit incommodis, vno tantum obolo præcedente, à nobis adoratur. Regnum Deus pollicetur, & contemnitur: gehennam ministrat Diabolus, & adoratur!* Breuius verò sanctus Augustinus, *Patietur*,

*inquit, durum & perniciosum Dominum quisquis seruit mammonæ, suæ enim cupiditate implicatus seruit Diabolo.*

Hæc essent ponderanda peccatori, hæc mundano perpendenda, quando resistendum est cupiditati, quando certandum contra seipsum. Audiant illi qua de re agitur, intelligant semel nihil minus agi quam de Christo Rege vel Dæmone præferendo. Non verba putent quæ dicta sunt cum sint à sanctis dicta Patribus. Non hominum sola putent dicta, sed & ipsius Christi qui palam idcirco professus est: *Qui non est mecum, contra me est.* Expendant hoc Diuinæ pondus vocis, *contra me est*, contra Christum, pro Dæmone! Nec leuiter percurrenda ista quæ hic habet Dominus, *Aut vnum odio habebit, & alterum diligit.* Nam si ex fide Diuina certum est quod sicut resistendo libidini pro Christi cultu, Christum diligis, & Dæmonem odio habes: Sic dum libidini cedis, Dæmonem diligis & Christum odio habes.

Dic quidquid contrà voles, magis Christo id affirmanti credendum est, quam neganti tibi. Et semel quidem dixisse, satis Christo esset: at iterum atque amplius idem repetiit, *Me mundus odit. Odio habuerunt me gratis.* Quæ certe Verba satius esset recitare & credere, quam quæ illi opponi possint inquirere. *Diligis odientes te, & odio habes diligentes te.*

Videri passim multa possunt, ex singulis partibus hûc spectantia. Præsertim vero hæc:

Sibi



*Vel Domino Deo, vel libidini renuntiandum.* 657

Sibi non Domino viuit qui temperatè non viuit.

*In 1. parte, Dominica 4. in Aduentu.*

Non nisi tribus oblatiis concupiscentiis Rex Christus  
re agnoscitur.

*In 1. parte, In Epiphania Domini.*

Nisi te subdas Deo, Deum tibi subdis.

*In 1. parte, Die 12. Ianuarij.*

Qui non renuntiat omnibus, non potest esse Christi  
Discipulus.

*In 1. parte, Fer. 3. Hebdom. 6. post Epiphan.*

Hæc sponsæ fides est, vt sicut neminem præter spon-  
sum velit diligere, ita velit à nullo diligi.

*In 1. parte, Sabbato Hebdom. 6. post Epiphan.*

Sicut martyrio vita naturalis, sic mortificatione vita  
sensualis.

*In 1. parte, de sanctis Martyribus.*

Quid nequius quam quod excogitauit caro & sanguis?

*In 2. parte, Feria 2. Septuagesimæ.*

Quà latè patet mundus, &c. De concupiscentia quæ  
facit mundum oppositum Christo.

*In 2. parte, Fer. 5. post cineres.*

Quod difficillimè crederes, te contra Christum esse,  
hoc est facillimum creditu si Christo credis.

*In 2. parte, Dom. 3. in Quadragesima.*

Quod nouo negatur homini contra veterem, hoc in-  
dulgetur veteri contra nouum.

*In 2. parte, Sabbato Hebdomada Passionis.*

*In die vero parasceues, multa, vbi de peccato grauius affligente  
Christum, quam ipsa Cruce crucietur.*

Vel nulla Christi recoletur memoria, vel nulla erit  
in eius cultu querimonia.



658 Dominica 14. post Pent. Nemo potest duobus Dominis seruire.

*In 2. parte, Dominica infra Octauam Ascensionis.*

Peruersa quædam est in mundo Trinitas quæ nisi caueatur, Diuinam in nobis peruertit Trinitatem.

*In 3. parte, Dominica prima.*

Satius esset nullo die velle viuere, quam non omni die velle cum Christo mori.

*In 3. parte, Fer. 5. Hebdom. 2.*

Quò minùs concupiscentiam mortificabis, eò magis à concupiscentia mortificaberis.

*In 3. parte, Fer. 4. Hebdom. 5.*

Non tam spectatur quid dones in Diuinis, quàm quid non dones.

*In 3. parte, Fer. 6. Hebdom. 8.*

Quæ magis oculata est concupiscentia, magis est cæca.

*In 3. parte, Sabbato Hebd. 9.*

Nisi se quisquis Christo conformet, sibi Christum conformabit.

*In 4. parte, Fer. 2. Hebd. 15. post Pentec.*

*Videnda porrò in eadem 4. parte, Dominica 17. & tota inde sequens Hebdomada ubi de concupiscentia & de diuitibus varia.*

Quod seruitutem peccati facit magis tolerabilem, hoc eam reddit minus tolerandam.

*In 4. parte, Fer. 6. Hebd. 19.*

Numquam magis eris tuus, quàm cum de tuo minus habebis, vt totus Christi sis.

*In 4. parte, Fer. 4. Hebd. 24. quæ pene tota hûc referri potest.*

Quis vt Deus?

*In 4. parte, In Festo S. Michaelis Archangeli.*



*Sollicitudo animi tanto minus probanda est, quanto magis, &c. 659*

## AD ALIAS EVANGELII PARTES.

*Ideo dico vobis ne solliciti sitis anima vestra quid manducetis, neque corpori vestro quid induamini.*

### VERITAS PRACTICA.

Sollicitudo animi tanto minus probanda est, quanto magis probat Christus, seu quantis demonstrat rationibus, ne simus solliciti.

*RATIO EST MANIFESTA, Quia tanto minus aliquid est probandum, quanto magis Christo & rationi opponitur. Quid clarius?*

*Sed sollicitudo animi tanto magis Christo & rationi opponitur, quanto magis Christus probat, seu quantis demonstrat rationibus ne simus solliciti. Nonne hoc etiam evidens?*

Nam dum plura Christus affert quibus Doctrinam suam probat, profecto & se id sentire manifestius indicat, & verum esse quod sentit, manifestat apertius; Vnde & quod illi Doctrinæ opponimus, tum magis Christo & rationi opponitur.

*Ergo & hinc manifestè patet quod sollicitudo animi tanto minus probanda est & habenda, quanto magis probat Christus ne simus inordinate solliciti.*

Quamobrem hoc vnum superest, vt quantis id Christus rationibus probet, demonstretur. Sunt autem octo efficaces & validæ in Euangelij textu.

Prima est, quia sollicitum esse, idem est ac seruire mammonæ seu cupiditati: hanc enim sollicitudinem inordinata cupiditas imperat, cui si seruis, Deo non seruis; nam nemo potest duobus Dominis seruire, vnde & primum est quod inde Dominus infert: *Ideo dico vobis ne solliciti sitis*; Quasi diceret; sicut ostendo non esse



seruiendum cupiditati, ne Domino Deo non seruias, sic simul indico non oportere esse sollicitos, quia sic cupiditati seruiretur, non Deo. Spinæ sunt suffocantes Verbum Dei, & ipsæ inordinate sollicitudines ita nociuæ sunt vt illud Christi Verbum quo dicuntur alia Dei Verba suffocare, suffocent. Vide hanc Veritatem expositam, in 2. parte Dominica Sexagesimæ.

Secunda ratio quam Christus affert, *Nonne anima plus est quam esca, & corpus plusquam vestimentum?* Id est, cum sine dubio salus æterna tum animæ tum corporis præstet terrenis aliis bonis, nonne satius est vacare illi negotio, & impedimenta quauis rejicere quales sunt illæ mundi huius sollicitudines? Vel sic intelligi potest Christi dictum: Si Deus vobis non sollicitis animam & corpus dedit, quæ profecto præstantiora sunt quam esca vel vestimentum; Nonne & dabit alia quæ his sustentandis sunt necessaria, & quæ multo minora sunt? Nam qui dat esse dat consequentia. Si pro illo quod principale vocant, nulla fuit adhibenda sollicitudo vestra, nec pro illo quod accessorium dicunt, inferri debet, inordinate videlicet, vt diximus, non ibi figentes acrius animum, aut finem reponentes, aut de nostra præsumentes industria, vt est apud

1. 2. q. 108. S. Thomam.

4. 3.

Luc. 12.

Tertia ratio, *Respicite volatilia cæli, considerate cornos*, vt est apud sanctum Lucam, Id est, viles illas ac desides bestias quas tamen Deus pascit, *Quanto magis vos, qui pluris estis apud illum?*

Quarta, *Quis vestrum cogitans potest adjicere ad staturam suam cubitum vnum?* Addit sanctus Lucas, *Si ergo neque quod minimum est potestis, quid de cæteris solliciti estis?* Vnde duplex eruitur sensus, primo quasi diceret Dominus, si quod est minus non potestis, neque quod est majus tentare fas est, vestris sollicitudinibus: Adjicere autem ad staturam suam cubitum vnum, quod non potestis, minus est quam vitam suam in multos prorogare annos, quod vnum tamen tentatis efficere dum de vita vestra nimis estis solliciti. Deinde vero sicut vanum & inutile prorsus esset, multum angere & sollicitum esse de adjiciendo ad staturam suam vel vno cubito, quia non potestis; sic plane cassa & vacua cenferi debet illa sollicitudo quæ de vita longiori laborat, hoc enim non magis est in vestra potestate quam aliud.

Quinta ratio, *Considerate lilia agri*. Diuersa est hæc ratio à Tertia quæ proponebat volucres quibus pascendis intendit Deus.



*Sollicitudo animi tanto minus probanda est, quanto magis, &c. 661*

Nam diceret homo sollicitus, sibi non tantum vitæ necessaria comparanda esse: sed quæ insuper decent statum suum. Respondet itaque Dominus neque in his etiam Deum defuturum, quod declarat exemplo liliorum quæ non sunt ad necessitatem agri vel hominum, sed ad decorem, ad venustatem, & honestam voluptatem: quæ quidem lilia, similesque alij flores tanta varietate & concinnitate sunt condita, vt nec Salomon sua potentia vel sapientia potuerit esse gratior & gloriosior: vnde inferri omnino necesse est, quod ad status sui decentiam desiderare quis possit, tam provide dispensaturum Deum, quàm ista minutiora nobis non sollicitis & cogitantibus abunde prouidet & subministrat.

Sexto, *modica fidei. Quanto magis vos pusilla fidei?* Amica quædam est oburgatio diffidentiam arguentis quæ omnium sollicitudinum causa est, & causa tam dedecorosa fidelibus qui Diuinam agnoscunt Prouidentiam, quàm odiosa Deo qui se benignum Patrem æque ac potentem Dominum vellet agnosci; *Propter hac* *Luc. 12. Ephes. 5.*  
*enim venit ira Dei in filios diffidentia.*

Septimo, sic pergit oburgare diffidentes & plus æquo sollicitos. *Hac enim omnia Gentes inquirunt*, Id est, Infideles quos Ethnicos & Paganos dicimus qui vel ignorant Deum vel eius negant prouidentiam, non sunt de rebus suis magis solliciti quàm qui se fideles profitentur, quod certe indicat vel illos parum esse fideles Deo, vel parum sibi fidelem Deum credere. Quod vtrumque quàm sit damnosum quis non videt?

Octauo denique sic concludit, *Scit enim pater vester quia his omnibus indigetis*. Quasi diceret, quid non Ille faciat qui suos amat tamquam pater filios, qui potest his quos amat benefacere, & qui probe scit quibus indigeant, vt bene faciat? De bonitate patris & potentia non dubitatis, nam in vniuerso patet mundo; Neque minus certi sitis de certa eius scientia circa vnumquemque particulatim cui tantum aduigilat quantum toti vniuerso. Nonne hinc aptè sanctus Petrus: *Omni sollicitudinem vestram* *I. Petr. 5.*  
*projicientes in eum, quoniam ipsi cura est de vobis*. Et nonne his te rationibus in id adduci sines?

Mirum certe quod Christus suorum velit reddere rationem dictorum: sed quanto magis mirum quod neque Christo nec eius rationi creditur? Si quæ ratio videretur infirma, en Christus qui sua illam autoritate roborat. Si Christus in loquendo esset ex-



1f. 5.

Proib. 1  
Ez. 18.

cellior: En ratio quæ loquentem interpretetur, & nobis illum accommodet. Quid est quod ultra debuit facere vineæ suæ, & non fecit ei? *An quod expectavit ut faceret uvas, & fecit labruscas?* In duobus differunt uva & labrusca, Primum quod uva sit suavis, labrusca verò aspera. Deinde quod uva sit utilis, labrusca infugifera. Sic plane de anima curis vacua vel sollicita; Sicut illa tota quæta est, tota suavis & frugifera; sic ista inquieta peracerba, nulli utilis, & sibi noxia. *Comedent fructus vine suæ. O BSTUPESCENT eorum dentes.* Et patebit ipsis sensibus, quis è duobus æquior Dominus: An mundus qui non nisi curas & sollicitudines in suos inijcit: An Christus qui curam omnem in se projectam recipit.

Vide in 1. parte, die 6. Decembris.

In 2. Fer. 2. Hebdom. 3. post Pascha. FERIA 3. Hebdom. 4. Fer. 3. Hebdomadæ infra octauam Ascensionis.

In hac 3. parte, Dominica 6. & Fer. 3. sequenti. FERIA 3. Hebd. 7. FERIA 4. Hebd. 8. FERIA 5. Hebd. 9. Sabbato Hebd. huius 14. In fine devoto paupertatis. Quo quis pauperior, eò ditior.

In 4. FERIA 4. 6. & Sabbato Hebd. 17. Sabbato Hebd. 18. FERIA 2. Hebd. 21. & pleraque sequentes ibi FERIA. FERIA 4. Hebdom. 4. FERIA 2. Hebd. 28.

*Quarite ergo primùm regnum Dei, & Iustitiam eius: & hæc omnia adjicientur vobis.*

## VERITAS PRACTICA.

Nisi primùm quæras regnum Dei, quantumvis aliter illud quæras, non acquires.

*RATIO EST, Quia nisi primùm quæras regnum Dei, curam eius quærendi postponis alteri curæ.*

*Sed si curam quærendi regni Dei postponis alteri curæ, non acquires regnum, quantumvis aliter illud quæras.*

*Ergo nisi primùm quæras regnum Dei, quantumvis aliter illud*



Nisi primum quæras regnum Dei, quantumuis aliter, &c. 663  
quæras non acquires. Quod quàm sit periculosum quis  
iam non videt, siue multitudinem eorum qui non  
ita regnum illud quærunt, inspicias: siue damnum  
quod inde sequitur, spectes.

I. P V N C T V M.

**N**ÆC est maxime practica Veritas & vniuersalis Conclu-  
sio quam Christus Dominus ex prædictis deduxit omni-  
bus: *Querite ergo primum regnum Dei, & Iustitiam eius.*  
Quasi diceret, hoc primum debetis quærere quod primum est  
dignitate & merito. Sed regnum Dei primum est dignitate &  
merito supra creata omnia, sicut ostendi vobis. Ergo hoc debe-  
tis primum quærere. Ergo hoc primum quærите. Sicut autem per  
regnum Dei comprehendit illud quod est finis noster, vt Dei Glo-  
ria, salus ac Beatitudo nostra: sic per Iustitiam eius intelligit  
quæcumque sunt ex nostra parte facienda vt regnum illud com-  
paretur, quæ vltiori nomine dicuntur Media quorum alia sunt  
communia omnibus, alia particularia pro vario cuiusque statu,  
*Sicut diuisit Dominus.*

1. Cor. 7.

Ne verò tantum existimetur hoc esse Consilium & non præ-  
ceptum omnino necessarium quod exequamur, sic est formata  
Veritas, quæ modo expendatur, vt plane intelligas, *Quod nisi  
primum quæras illud regnum Dei, quantumuis illud aliter quæras, non  
acquires.* Id est, talem importat necessitatem executionis, qua-  
lis est necessitas acquisitionis. Quid autem magis necessarium,  
quàm quod ait Dominus, *Vnum esse necessarium?*

Luc. 10.

Sic porro breuiter & dilucidè declaratur Veritas: Nisi primum  
quæras regnum Dei, curam eius quærendi postponis alteri curæ.  
Hæc est enim communis interpretatio vocis illius *primum* vt si-  
gnifiet non prioritatem vt vocant temporis, sed excellentiæ,  
meriti, dignitatis, quasi diceretur, maxime, præ cæteris omni-  
bus præcipue, singulariter & supra cætera omnia.

Sic expresse sanctus Augustinus, *primum non tempore sed dignitate*  
vt in sequenti veritate refertur fusius: satis hinc autem declaratur  
cum dicitur, hoc ipsa primum quæri vel non quæri regnum Dei  
si cura eius quærendi præferatur vel postponatur alteri cuius cura.



Cum enim totum quærendi negotium consistat in cura studioque quærendi, si prima est cura, primum quæretur. Potest autem esse prima cura dupliciter, nempe exterius & interius: exterius quidem, ratione temporis, curando primum & antequam aliud quidvis agas quod spectat ad salutem: interius autem intentione mentis, seu affectu, pretio ac rei æstimatione quam vocant appretiationem & præferentiam, quæ non tantum in animo resideat, sed inde ad opus in quouis operandi occurſu transeat: præterendo semper quod est Diuinæ Gloriæ seu salutis æternæ, ceteris quibuscumque omnibus etiam vitæ huius temporalis, sicut monebat Sapiens, *Non ponas animam tuam scandalum*: & sicut agebat Apostolus: *Non facio animam meam*, id est vitam, *pretiosorem quam me*, id est, salutem.

Ecclesi. 32.

Epist. ad  
Valer.

*Primas apud nos curas*, inquit S. Eucherius, *quæ prima habentur, obtineant, summasque sibi sollicitudinis partes quæ summa est vindicet, hæc nos occupet in præsidium sui, iam non plane prima sed sola omnia vincat, eo studio quo præcedit omnia.* Hoc est scilicet primum quærere regnum Dei, cum sic eius quærendi cura, curæ præfertur alteri; vel si quid aliud ex æquo cures, non quæris primum regnum Dei: siue de utroque affirmes siue neges; siue prius vnum dicas siue posterius: vnum plane & idem est dicere, si curam quærendi regni postponis alteri, non quæris primum regnum Dei: vel nisi primum quæras regnum Dei, curam eius quærendi postponis alteri. *Verterunt ad me terga & non facies, cum docerem eos diluculo & erudirem, & nolent audire ut acciperent disciplinam.*

Ier. 37.

## II. PUNCTVM.

**S**ED si curam quærendi regni Dei postponis alteri curæ, non acquies illud regnum.

Cum enim duo sint ad acquirendum illud regnum præcipue necessaria, nempe Diuina Gratia, nostrumque studium; plane verendum est ne tunc vtrumque desit. Ac primo quidem gratia non omnis quidem sed quanta tibi adfuisse, si tuas non peruertisses curas; quantum enim Deo displicet sic minoris æstimari quæ pluris essent ducenda, tanto de solita diminuît gratia, sicque cum peruerso perueritur, sicut cum bono bonus fit, & cum sancto sanctus

ut



*Nisi primum queras regnum Dei, quantumuis aliter, &c. 665*

vt est in Psalmis & quidem appositè in Hebræo, vbi non peruerit Deum sed *luctari & contra obuersari* legimus, quali diceretur. Ipsum ex adiutore fieri aduersarium; Quod sane numquam satis expenditur. Ps. 17.  
Bellarm.

Deinde verò nostrum studium seu opera quam ad Diuinam debemus adungere Gratiā, quis nescit inde tanto magis debilitari ac frangi, quantò minor est cura siue rei de qua tunc agitur æstimatio? Quis nescit tanto magis vel minus in rem adlaborare homines, quantò magis vel minus illam velint: tantum autem velint, quantum de rei pretio iudicant? Nonne propterea iam sæpe aliās Sapientem audiuiſti, qui nos vt vehementius ad conquirendam Sapientiam adhortaretur, *Si quesieris eam*, inquit, *quasi pecuniam*, id est, quo ardore & studio pecunia solet quari, quæ multum æstimatur & colitur! Sic manus à Propheta videtur sub extensis animalium pennis, quia quæ per manum operatio designatur, non aliter ad suum opus fertur, quam prout operis præcedit cognitio, reiue valor: Vnde in illa celebri stupendaque quadriga quam idem vidit Propheta, pari pede incedunt bos & aquila, licet longe dispari moueantur motu, quia nec vehementius nec tardius quàm vt res exigit, incedendum. Et tarditas maturanda, & maturitas retardanda pro rei pretio, quæ quæritur. Pron. 2.  
Ezech. 1.

Hoc verò insuper proprium habet cura temporalium, vt si semel laxetur, totum abripiat animum, vixque coelestibus quam applicet partem, relinquit vllā. Quid tum dimidiatus poterit animus qui licet totus adesset, vix satis esset operi? Nonne hæc est eorum culpa qui ad cœnam magnam & regias nuptias inuitati noluerunt accedere, quia scilicet aliis nimis implicati erant curis. Nonne idcirco Dominus, *Nemo*, inquit, *mittens manum suam ad aratrum, & respiciens retrò, aptus est regno Dei*. Quia quò respicit, eò tendit, & quò tendit, inde à scopo suo, inde à regno Dei auertitur. Quò spectabat Apostolus cùm diceret, *An nescitis quid* Luo. 9.  
1. Cor. 9. *q̃ qui in stadio currunt, omnes quidem currunt, sed vnus accipit præmium, sic currite vt comprehendatis. Omnis autem qui in agone contendit, ab omnibus se abstinet: quasi diceret, qui non abstinent ab omnibus, qui sese aliis implicant, non current non comprehendent.*

Et rursus, *Nemo militans Deo implicat se negotiis secularibus, vt ei placeat cui se probauit*, quia si se his implicaret non Deo militaret, vel militans expugnaretur, vinceretur. Quid porro aliud significat 2. Tim. 2.  
Apo. 12.



666 Dominica 14. post Pent. *Querite ergo primum regnum Dei.*

Mulier illa quam Ioannes vidit sole amictam, stellis coronatam, & Luna sub pedibus eius? Nonne anima quævis est cælo nata, cælo intendens, quæ Lunam habet sub pedibus non in capite, id est, curam temporalium & mutabilium infra res æternas & immutabiles, alioquin stellas non attingeret, cælum non possideret.

Gen. 27.

Hæc est denique differentia benedictionis Iacob & Esau, qui figuram exhibent Electorum & Reproborum. Nam cum utrique à Patre promittatur ros cæli & pinguedo terræ; in hoc potissimum diuersa est hæc promissio, quod ros cæli assignetur Iacob ante pinguedinem terræ: Et è contra, pinguedo terræ detur Esau antea rorem cæli. Quasi diceretur, hoc vno maxime differre inuicem Electos & Reprobos, quod illi primo regnum Dei & Iustitiam eius quærant, tum omnia illis adjiciantur; isti vero Reprobi primo velint terrena omnia sibi adjici, tum regnum Dei quærent; Sed quærent; at non inuenient, non acquirant: *Ibi erit fletus & stridor dentium, cum videritis Abraham & Isaac & Iacob, & omnes Prophetas in regno Dei, vos autem expelli foras. Et venient ab Oriente & Occidente & Aquilone & Austro, & accumbent in regno Dei. Et ecce sunt nouissimi qui erunt primi, & sunt primi qui erunt nouissimi.* Id est, Illi sunt qui expellentur foras qui primi sunt in curis huius sæculi.

Luc. 13.

### III. P V N C T V M.

Apo. 3.

Ibid. 1.

**E**RGO nisi primum quæras regnum Dei, quantumuis aliter illud quæras, non acquies: Quia dum alia magis curabis, major ista cura te abstrahet ab illa quæ acquirendo Dei regno est necessaria, sicque opera tua non inuenientur plena coram Deo, sic tepidus eris nec calidus quod peius est quàm esse frigidum: sic modicam habebis virtutem quæ dum appendetur, non erit regno emendo sufficiens: sic licet aliqualem tuum laborem sciat Dominus, habebit tamen aduersum te, *Quod charitatem tuam primam reliquisti, & nisi prima opera facias veniet tibi, & mouebit candelabrum tuum de loco suo, nisi pœnitentiam egeris.* Quæ omnia sic expressis denuntiata verbis, nonne veritatem apertè confirmant? Nonne eius declarant praxim? Nonne vt primum illud quæramus regnum Dei, nos vehementer excitant?

Quid stultius, & à communi hominum agendi more disun-



*Nisi primum quæras regnum Dei, quantumvis aliter, &c. 667*

ctius, quàm minora præferre majoribus, lucem tenebris, & mendacium veritati postponere? Quid sentires de homine qui breviori calceando calceo pedem abscinderet? Nonne hunc stultum diceres? Cur porro nisi quia cum calceus sit propter pedem, non pes propter calceum, vesanus ille sit qui hunc inuertit ordinem cum aperto sui detrimento. At nonne hoc ipsum est, cum corpus præfertur animæ, cum æterna cedunt temporalibus & Christus mundo posthabetur? Nonne sicut vestimentum propter corpus, ita & corpus propter animam? Nonne hunc peruertit ordinem cum manifesto sui damno qui plus in corpus quam animam impendit curæ ac studij? *Numquid poterit aliquis gustare quod gustatum affert mortem?* Nonne gustus, nonne voluptas cedunt timori mortis aut amoris vitæ? Cur non igitur cedent timori mortis animæ, vel amoris vitæ sempiternæ? *O stulti & tardi corde ad credendum!* *Luc. 24.*

Vide in 2. parte, Feria 6. post Octauam Ascensionis.

Sic dignum est cælum nostris desideriis, vt nisi cælum desideres, *Quantum scilicet desiderare par est, cælo sis indignus.*

## ALIA VERITAS PRACTICA, PRÆCEDENTI CONNEXA.

Sic primo quæri debet regnum Dei, vt secundo nil ita quæri possit.

*SENSVS ET RATIO EST, Quod quæri debet regnum Dei, tamquam finis.*

*Sed secundo nil ita quæri potest, vt finis.*

*Ergo sic primò quæri debet regnum Dei, vt secundo nil ita quæri possit. In quo tamen multi peccant.*

### I. PUNCTVM.



ANC Veritatem multum illustrat præcedens Veritas, & præcedentem Veritatem multum ista confirmat. Quod enim supra dictum est de notione huius vocis *primo* uue *primum*, huc recurrit, vt non tam significet ordinem



numeri quam dignitatis: sic nempe intelligendum quod modo proponitur; *Sic primo regnum Dei quæri debet ut secundo nil ita quæri possit*, Quasi diceretur, possunt quidem secundo quæri alia, sed non quo sensu quæritur primo regnum Dei. Nam sic primo quæritur regnum Dei tamquam finis, tamquam ex se & propter se nobis appetendum: non ita vero alia quæ secundo quærantur: non sic ut finis & propter se possunt appeti, sed velut secundaria, velut media quædam ad illum unum finem ordinata, & propter illum solum usurpanda.

Hinc autem ut dixi plurimum roborantur quæ considerata sunt de comparatione terrenorum cum cœlestibus & Diuinis: nam si illa tantum ut media quædam ad finem desiderari possunt, quomodo vehementius possunt desiderari quam ipse finis? Quis medicinam quæ propter sanitatem tantum assumetur, magis diligat quam ipsam sanitatem? Quod si sanitati officeret medicina vel cibus, quis amans sanitatis non medicinam & cibum fugeret? Sic plane si obsunt terrena cœlestibus, quis amator salutis non terrena caueat?

Age igitur expendamus attentius quo sensu primum quæri debeat regnum Dei, nempe ut Finis, qui quidem tripliciter cogitari potest. Primò ut significet perfectionem nostram: *Dicitur enim finis qui consumit & dicitur finis qui perficit*, ait S. Augustinus: *aliter quippe intelligimus cum audimus, finitus est cibus qui manducabatur; & aliter intelligimus cum audimus, finita est vestis qua texebatur; in utroque audimus, finitum est, sed cibus ut iam non esset, vestis ut perfecta esset, finis ergo noster, perfectio nostra esse debet.* Sic itaque primo quæri debet regnum Dei, tamquam nostra perfectio, sic enim unimur Diuinæ voluntati quæ nos eo tendere voluit per quotidiana media quæ subministrat; & in illa vnione nostra est perfectio, perfecta est illa voluntas Dei de qua sanctus Apostolus, *Ut probetis quæ sic voluntas Dei bona, beneplacere & perfecta*; Nempe ut sæpe dictum est, bona est voluntas Dei cum quidquid vult facimus; est vera beneplacens quando illo quo vult modo agimus; perfecta denique est, cum unum quem habet finem nobis proponimus. Possetne proponi melior?

Secundo finis dicitur quod propter se appetitur, nec ultra si finis est ultimus, referri potest. Cum autem regnum Dei sit ipse Deus in nobis regnans per gratiam & per gloriam, sic perfectio

In Ps. 54.

Rom. 12.



*Sic primo quæri debet regnum Dei, ut secundo nil ita, &c. 669*

tamquam finis primo quæri debet, quia nihil ultra est quod supra quæri possit. Sunt quidem varij gradus & species eius inquirendi, sed dum Ipse semper quærat, semper finis noster quæritur, quocumque modo quærat. *Quærite Dominum, & confirmamini, quærite faciem eius semper. SED si semper quæritur, quando inuenitur?* ait sanctus Augustinus. *An semper dixit, in tota vita ista quâ hic vivitur, ex quo nos id facere debere cognovimus, quando & inuentus quærendus est?* Iam quippe illum inuenit Fides; sed adhuc eum quærit Spes. Charitas autem & inuenit eum per fidem; & eum quærit habere per speciem, ubi tunc sic inuenietur ut sufficiat nobis, & ulterius non quærat.

*Pf. 104.*

Tertiò finis dicitur quies seu quoddam veluti centrum in quo aliquid requiescit tamquam in termino quem prætendebat; Sic manifeste regnum Dei finis est noster, nostra quies, nostra felicitas, hic quidem inchoata per Iustitiam seu virtutem quæ nos ducit ad patriam; illic vero perfecta & completa; Quo in sensu quæri debet regnum Dei, statuendo nostram omnem felicitatem & requiem in illo quærendo inueniendo & possidendo. *Hæc requies mea in sæculum sæculi, hic habitabo, quoniam elegi eam. FESTI-* *NEMVS ergo ingredi in illam requiem.* Id est, hoc vnum intendamus, non retardemur in aliis degustandis, ne si forte nimis retardemur, non possimus in illam ingredi requiem. Sic festinatur non corporis passibus, sed animi affectibus.

*Pf. 131.  
Hebr. 4.*

## II. PUNCTVM.

*SED secundo nil ita quæri potest, ut finis.*

Nihil ita ex terrenis quæri potest tamquam nostra perfectio; Nihil in creaturis omnibus quod per se sic appetendum, & ultra quod aliud quæri non possit; Nihil in quo quiescamus, nihil quod ut finem & scopum prætendamus. Quid enim sunt creata omnia quam vanitas vanitatum, & afflictio spiritus & cassa sollicitudo mentis? Et tu in his finem tuum ponas? Tu nihil ultra quæras? Tu tamquam illa sint bona in se, bonumque tuum, quæras? Ita plane fit dum peccatur peccato illo quod mortem affert. Non aliter peccatum lethale est, nec aliter æterna punitur poena quàm quod in creatura ponitur finis ultimus. Et licet secundo quærat, loco, sic tamen quæritur quasi primum

*Ecl. 1. 2.*



670 Dominica 14. post Pent. *Quærite ergo primum regnum Dei.*

quæreretur. Nam primum & finis hic pro eodem habentur, ut dictum est, sicque propterea quod uni regno Dei debetur ut primum quærat, hoc peccator creaturæ defert, hoc voluptati, hoc pecuniæ, hoc vanitati. Nec efficacius probari potest nil posse quæri ut finem ultimum, quam dicendo nil posse quæri quod sit lethiferum, quod sit mortale peccatum. Quæ de re vide quæ fufius proferuntur in hac 3. parte, Dominica prima: & in quarta, Sabbato Hebdomadæ 18.

### IIL P V N C T V M.

*§ 2. de Serm. Dom. c. 16.*  
**S**IC primo igitur quæri debet regnum Dei, ut secundo nil ita quæri possit, Quod utrumque simul expresse à sancto Augustino traditur dum Christi Domini Verba sic exponit: *Quid intersit inter bonum quod appetendum est, & necessarium quod sumendum est, hac sententia declaravit cum ait: quærite primum regnum Dei & iustitiam eius, & hæc omnia apponentur vobis.* Regnum ergo & Iustitia Dei bonum nostrum est, & hoc appetendum, & ibi finis constituendus propter quod omnia faciamus quacumque facimus: sed quia in hac vita militamus ut ad illud regnum pervenire possimus, quæ vita sine his necessariis agi non potest: apponentur vobis hæc inquit, sed vos regnum Dei & Iustitiam eius primum quærite. Cum enim dicit illud primum significavit quod hoc posterius querendum est non tempore, sed dignitate. Illud tamquam bonum nostrum; hoc tamquam necessarium nostrum, necessarium autem propter illud bonum. Neque enim verbi gratia, debemus Evangelizare ut manducemus; sed ideo manducare, ut Evangelizemus. Et post multa. Et ideo cum dixisset: quærite primum regnum Dei & iustitiam eius, non dixit, deinde ista quærite, quamvis sint necessaria, sed ait, hæc omnia apponentur vobis, id est consequenter, si illa quæritis sine ullo vestro impedimento, ne cum ista quæritis, illinc avertamini, aut ne **DVOS FINES CONSTITVATIS**, ut & regnum Dei propter se appetatis, & ista necessaria: sed hæc potius propter illud. Ita vobis non deerunt, quia duobus Dominis servire non potestis. Duobus autem Dominis servire conatur qui & regnum Dei pro magno bono appetit, & hæc omnia temporalia. Non poterit autem simplicem habere oculum, & uni Domino servire, nisi quacumque sunt cetera, si sunt necessaria, propter hoc unum assumat; id est, propter regnum Dei. Et post pauca: *Ergo simplici corde tantummodo*



Sic primo quæri debet regnum Dei, ut secundo nil ita, &c. 671

propter regnum Dei debemus operari bonum ad omnes: Non autem in hac operatione vel solam vel cum regno Dei mercedem temporalem cogitare, quorum omnium temporalium nomine crastinum posuit dicens, nolite cogitare de crastino, non enim dicitur crastinus dies nisi in tempore, ubi præterito succedit futurum. Ergo cum aliquid boni operamur, non temporalia sed æterna cogitemus, tunc erit illud bonum & perfectum opus. Pergit vero deinde pluribus declarare quomodo Sancti possint sibi temporalia prouidere, sic videlicet ut propter ista, Deo non sic militent, ut in operibus suis non regnum Dei, sed istorum acquisitionem intueantur.

Quod & alibi copiosè prosequitur explanans illum Psalmi decimi octauæ versum, *Auerte oculos meos ne videant vanitatem.* Concione 12. In Ps. 118.  
*HO S*, inquit, oculos quibus contemplamur quare faciamus quidquid facimus, auerti possit, ne videant vanitatem, id est ne hanc attendat propter quam faciat cum boni aliquid facit. In qua vanitate præcipuum locum obtinet amor laudis humane propter quàm multa magna fecerunt qui magni in hoc sæculo nominati sunt. Et post multa contra hanc vanitatem, sic propius ad rem nostram: Porro si vanum est propter hominum laudes bona facere, quanto vanius propter adipiscendam pecuniam, vel augendam, siue retinendam, & si quid huiusmodi est commodi temporalis quod nobis accedit extrinsecus, quia omnia vanitas. Propter ipsam denique temporalem salutem non debemus facere bona opera nostra, sed potius propter illam quam speramus æternam, ubi bono incommutabili perfruamur, quod nobis erit ex Deo, imo quod nobis est ipse Deus.

Ex quibus sancti Doctoris verbis intellige quàm sit illorum qui se nimis addicunt temporalibus frigida ratio, cum aiunt se non habere malam intentionem, se nulli facere injuriam, se sua tantum velle sibi suisque conseruare. Nam quæro abs te si ex illis es, propter quid vis illa tibi bona conseruare? Nonne propter ipsa bona quæ nimis diligis, aut propter hanc temporalem vitam quæ illis sustentatur bonis? Nonne hoc est quod ait sanctus ille Doctor, esse vanum & cauendum? Nonne satis mala est illa contentio qua tantum vacas bonis acquirendis vel conseruandis propter ipsa bona? Expende illud propter, expende finem ibi latentem. Non quid agas contempleris, sed propter quid, illud agas. Nam si vel bonum opus ageres propter illum finem cuius gratia tuis vacas commodis, tum bonum male age-



672 Dominica 14. post Pent. *Quærite ergo primum regnum Dei.*

res, & bonum esse desineret: quanto id magis verum in his  
tuis negotiis & affectibus ubi nil Spirituale & Diuinum, sed to-  
tum terrestre est ac humanum quod tractas. Non est crimen  
quia terrestre est, sed quia propter hoc solum tractas quod est  
terrestre & caducum, non sicut res ipsæ vituperabiles & crimi-  
nosæ, sed vel affectus, vel vsus, vel vtentis intentio seu finis. Si  
affectus est immoderatus, crimen est in illa immoderatione af-  
fectus. Si profanus aut peruersus est vsus, crimen est in illa vsus  
peruersitate. Si finis denique solum temporalis nec aliò spectans  
crimen est in illo fine, quia quod vni debetur Creatori vt sit fi-  
nis ad quem, sicut est principium à quo sicut omnia, tu trans-  
fers in creaturam; quod tamen leue initio videatur, fit tamen  
processu semper graue, quandoquidem ille est oculus qui te  
scandalizat & qui potius deberet erui quam quod inde sequitur  
damnum inferri. Sunt illæ spinæ suffocantes fermentem coeli-  
tus iactam, sunt illa denique *desideria nocua & inutilia qua  
mergunt homines in interitum & perditionem*; Numquid hoc leue  
censeri debet?

2. Tim. 6.

*Tu autem o homo Dei, hac fuge, sectare verò Iustitiam pietatem, &c.*  
Sicut à Deo, sic ad Deum.

Vide hanc inter alias quæ multæ hûc referri possunt Veritates.

*In 2. parte, Dominica 4. post Pascha.*



HAC HEBDOMADA, cùm Scribæ & Pharizæi  
quererentur apud Dominum de Ipsiis Discipulis  
quod non seruarent seniorum Traditiones, respon-  
sione sua Christus Dominus detegit nobis aliquas Illu-  
siones quæ in vita spirituali possunt accidere, deque  
ijs certissimæ Veritates statuentur: Ex capite decimo  
quinto Matthæi.

FERIA



*Nec propter alios à bono te excusabis, nec quemquam alium, &c. 673*

## FERIA SECVNDA.

QVERVNTVR SCRIBÆ ET  
PHARIZÆI APVD DOMINVM  
DE ILLIVS DISCIPVLIS.

*Quare Discipuli tui transgrediuntur traditionem seniorum? Matth. 15.*

### VERITAS PRACTICA.

*Nec propter alios à bono te excusabis, nec quemquam alium propter te excusabis.*


SENSVS PROPOSITIONIS EST, *Quod si ad maiorem tuam perfectionem agnoueris coram Deo aliquod bonum tibi esse faciendum, sic constans esto in eo faciendo ut non desistas; nec te putes excusatum ab illo bono opere propter alios qui non idem faciunt; neque vero etiam propterea quemquam accuses qui non idem præstet.*

RATIO EST, *Quia ubi agitur de bono perfectionis, non est aqua semper tui & aliorum ratio siue obligatio.*

*Sed quando non est aqua obligatio, non est locus excusationi, aut accusationi.*

*Ergo nec te excusare debes à bono propter alios, neque alios propter te accusare. Quod tamen proclive est fieri, & diligenter cauendum.*

### I. PUNCTVM.

RANT Scribæ & Pharizæi religiosiores sui temporis apud Iudæos; sed eorum religiositas tam multis erat infuscata superstitionibus ut potius irreligiositas censenda esset. Hæc autem inter alias frequentissima vigeat superstitio,



Marci 7.

vt dùm mensæ accumberent, se toties lauarent ad vsque cubitum, quoties cibi genuseffet mutandum; erantque ita religiosi in ea ceremoniâ, vt si quos pietatis sectatores cernerent non eam obseruare, notarent eos vt profanos & velut laxæ religionis reos incusarent. Cum itaque Discipulos Domini animaduertent perfectioris vitæ cupidos, nec tamen huius conuiualis obseruantia studiosos, conueniunt ipsum Dominum grauiter exostulantes & dicentes: *Quare Discipuli tui transgrediuntur traditionem seniorum? Non enim lauant manus suas cum panem manducant.* Expressiora quædam habet sanctus Marcus, *Et cum vidissent, inquit, quosdam ex Discipulis eius communibus manibus id est non lotis manducare panes, vituperauerunt: Pharisei enim & omnes Iudei nisi crebro lauerint manus non manducant, tenentes traditionem seniorum, & à foro nisi baptisentur non comedunt, & alia multa sunt quæ tradita sunt illis seruare, baptismata calicum & vrceorum, & eramentorum, & lectorum.*

Hoc erat igitur grande piaculum Discipulorum Domini quod se ita non lauarent: seu potius hæc erat Phariseorum intoleranda superstitio & Illusio vt vulgarem quandam manuum ablutionem velut religiosam obseruantiam colerent, & quos viderent non colere, velut irreligiosos accusarent. Respondebit illis Dominus sequenti meditatione, Interim vero obseruemus hoc esse satis familiare & commune vitium ijs qui se paulo arctius continent in officiis Christianæ & Religiosæ Pietatis, vt alios notent, accusent, iudicent & condemnent qui apparent liberiores & laxiores. Quod est Illusionis genus damnosissimum.

Certe, si quis liberior & laxior te vellet contra Conscientiam tuam relaxare & in partes suas attrahere; cauere quidem debes ne dissoluaris, constans esto, nec te putes excusandum si à bono desistas proposito quia & illi non sic viuunt: Verum neque tu alios etiam accuses quod non idem atque tu seruent. *Nec te excusare potes, nec alios accusare.*

Hæc est Veritas ad Praxim vtilissima, Cuius fundamentum hoc est quod primo præmittitur, Quoties agitur de bono Perfectionis seu de bono quod non est præceptum, sed tantum ex consilio & vt vocant, ex deuotione; fieri potest vt non æqua sit tui & aliorum ratio. Nulla quidem est, vt supponimus, neque in te neque in alijs, obligatio ex præcepto; sed tamen possunt considerari alia



*Nec propter alios à bono te excusabis, nec quemquam alium, &c. 675*

quædam obligationum genera. Primo ex certa Dei inspiratione, deinde ex Directoris consilio; Denique à cognitione sui qua quis se videt his aut illis mediis ad perfectionem magis iuuari vel inde impediri, tunc dicitur inesse maior quædam obligatio ad qua ex illis motiuis se quisquis inductum nouerit. *Non enim omnia possunt esse in hominibus*, ait Sapiens, Et rursum: *Non enim omnia omnibus expediunt, & non omni anima omne genus placet.* *NVM QVID omnes Apostoli? Numquid omnes Prophetæ? VNVS QVISQVE proprium donum habet ex Deo, vnus quidem sic, alius verò sic.* *HAE C* dicit qui tenet septem stellas in manu sua; Id est, diuerfos spiritus, variaeque dona coelestia, nam sicut stella differt à stella in claritate, sic coeleste donum à dono, sic Diuina Gratia differt à Gratia. O diuitem in omnes Dei Bonitatem! ó prouidam cunctis Diuinam Sapientiam!

## II. P V N C T V M.

**S**ED quando non est æqua & similis obligatio, non est locus excusationi propriae vel accusationi alienae.

Sicut enim obligatus ad bonum non excusatur si obligationi non satisfaciat, ita certe non obligatus non potest accusari. Hoc ipso autem quo Deus tibi dat Gratiam ad aliquid faciendum, quam non dat alteri, simul tibi declarat, illud à te velle quod non ab altero. *Sequere me dicit Dominus Petro, hic vero videns Discipulum quem diligebat IESVS, dixit IESV, Domine hic autem quid? Tum Dominus: Sic eum volo manere donec veniam, quid ad te, tu me sequere.* Quasi aperte diceret: non illud ipsum ab eo volo, quod à te, Petre, desidero. Quamobrem ne me desistas sequi quo gressu & qua ratione volo me sequaris, etiamsi me ille non eodem modo sequatur. Nec propterea Illum excusabis quod se tibi non adiungat ad idem opus, quia nolo idem ab eo.

Non est spectanda præcise res de qua est quaestio, sed Diuina voluntas circa rem talem. Res erat bona & sancta, ministrare mensis initio nascentis Ecclesiae sicut ministrabant Apostoli: At vero ubi senserunt se admonitos à Spiritu sancto satius ipsis esse prædicare verbum Dei, non est bonum, *Non est æquum*, inquiunt, *nos derelinquere verbum Dei & ministrare mensi*; Tum videlicet non erat bonum eis, quia tum aliud ab eis volebat Dominus. Iam vero si



quis Apostolorum se à prædicando verbo voluisset excusare quod alij Discipuli non illud prædicarent: aut si non prædicantes Discipulos voluisset accusare; nonne iniqua fuisset eius excusatio & accusatio? Cur porro, nisi quia non erat æqua & similis utrorumque obligatio, non idem ab utrisque volebat Deus? Quod quidem per se est tam clarum & manifestum ut Ambitio & Negligentia duo illa insigniora Vitia non aliter grauius perpetrentur quàm quod vel supra quæ Deus velit, vel infra procedatur.

*Prov. 4.* Neque declines ad dextram, neque ad sinistram: vias enim quæ à dextris sunt, nouit Dominus; peruersæ vero sunt quæ à sinistris sunt. Ex vtra parte deficiis? Forte ex vtraque.

## III. P V N C T V M.

**N**EC propter alios igitur à bono te excusabis, nec quemquam alium propter te accusabis: Quia sic peruerteres vniuersum Gratiarum ordinem qui tam diuersus est circa bona quædam facienda quàm sunt diuersi non tantum ordines in Ecclesia, sed diuersæ etiam personæ in vnoquoque ordine. Ac proinde dicebat

*x. Cor. 15.* Apostolus: *Vnusquisque in suo ordine*, primum quidem in ijs quæ spectant gratiam, tum quæ futuram gloriam. Hæc est scilicet Varietas qua *circumdatur Regina in vestitu deaurato*, Id est, Ecclesia triumphans & militans cuius tot sunt figuræ & adumbratæ quædam Imagines, quot sunt in mundo corpora siue cœlestia siue terrestria, siue humana siue ciuilia: quæ cum omnia non nisi diuersis constent partibus, quæ suum quæque munus & ordinem distinctum habent, nihil esset vniuersæ rerum naturæ repugnantius, quàm si pars vna, deserto suo munere & ordine, se in alterius munus ingereret, aut ad sui formam ceteras omnes efformaret.

Numquid sol cessabit lucere quia solus in die lucet? Aut numquid ideo cetera poteris accusare astra, quòd minus quàm sol lucent? Vellesne corpus humanum aut totum esse oculum, aut totum aurem? Quis à ficu poma, vel à pomo ficus desideret? Numquid *in magna domo non solum sunt vasa aurea & argentea, sed & lignea & fictilia*: & quædam quidem in honorem, quædam autem in contumeliam? Quid insulsius quam si seruus dominari velit, aut

*Prov. 30.* Dominus se seruo nimis subiciat? Hoc est quod terram commouet & conturbat, inquit Sapiens, cum seruus regnauerit: & hoc est quod terra non potest sustinere, cum ancilla fuerit hæres Domine sue.



*Nec propter alios à bono te excusabis, nec quemquam alium, &c. 677*

Vide quæ supra de his fufius ubi non modo difcas quàm fit fru- In 1. parte,  
in Communi  
Conf. Pon-  
tif.  
tuofum tibi fuoque muneri vacare fideliter, fed quàm præterea  
perniciofum, inde difcedere quouis prætextu, vel alios iudicare, Rom. 14.  
quod idem tecum non fentiant, nec fe tibi conforment. *Is qui*  
*manducat, non manducantem non fpernat: & qui non manducat, man-*  
*ducantem non iudicat, Deus enim illum affumpfit. Tu quis eft qui iudi-*  
*cas alienum feruum? Domino fuo stat aut cadit. Tu autem quid iudicas*  
*fratrem tuum, aut tu quare fpernis fratrem tuum? Omnes enim stabimus*  
*ante tribunal Chrifti. Vnusquisque noftrum pro fe rationem reddet Deo.*  
*Non ergo ampliùs inuicem iudicemus: fed hoc iudicate magis ne po-*  
*natis offendiculum fratri vel fcandalum. Quod certe fit alterutro ex*  
*his duobus quæ in Veritate confiderata continentur, nempe fi de-*  
*fiſtas facere propter alios quod tibi faciendum cognoueris: aut*  
*fi accuſes alios quod idem tecum non præſtent. Vtroque poſ-*  
*funt perinde offendi, quia vtrumque perinde eft inordinatum.*  
*In mente ergo habe, qualiter acceperis, & audieris, & ſerua.* Apoc. 3.



## FERIA TERTIA.

### RESPONDET DOMINVS

PHARIZÆIS.

*Quare & vos transgredimini mandatum Dei, pro-*  
*pter traditionem veſtram? Matth. 15.*

### VERITAS PRACTICA.

Nemo fui boni, vel mali bonus Iudex.

*Id eſt, in Ratione boni vel mali agendi, Iudicium noſtrum quan-*  
*tumuis pium videatur & religioſum, nobis ſaltem debet eſſe*  
*ſuſpectum.*



678 Feria 3. Hebd. 14. post Oct. Pent. Quare & vos, &c.

RATIO EST, Quia ubi periculum est ne nostrum Iudicium à natura corrupta corrumpatur, suspectum nobis esse debet.

Sed in ratione boni vel mali agendi, periculum est ne Iudicium nostrum corrumpatur.

Ergo tunc nobis saltem suspectum esse debet; & non statim sequendum: sicut multis aliquando accidit, & tibi sapius.

## I. P V N C T V M.

Comm. in  
Matth.



RECTISSIME sanctus Hieronymus de responsione Domini ad Pharizæos, Falsam calumniam vera responsione confutat. Cum, inquit, vos propter traditionem hominum Præcepta Dei negligatis, quare Discipulos meos arguendos putatis, quod Seniorum iussa paruipendant ut Dei scita custodiant? Quodnam vero Pharizæi mandatum transgredierentur, Ipse Dominus in Evangelio pergens loqui, sic aperit; Nam Deus dixit, honora Patrem & matrem, & qui maledixerit Patri vel matri, morte moriatur; vos autem dicitis, quicumque dixerit Patri vel matri, Munus quodcumque est ex me, tibi proderit, & non honorificabit Patrem suum aut matrem suam: & irritum fecistis mandatum Dei propter traditionem vestram.

Quæ Domini Verba sic explicat Idem sanctus Hieronymus; Præceperat Dominus, vel imbecillitates vel atates vel penurias Parentum considerans, ut filij honorarent etiam in vita necessariis ministrandis, Parentes suos. Hanc providentissimam Dei legem volentes Scriba & Pharizæi subvertere, ut impietatem sub nomine pietatis inducerent, docuerunt pessimos filios, ut si quis ea quæ Parentibus offerenda sunt, Deo vouere voluerit, qui verus est Pater, oblatio Deo præponatur Parentum muneribus: vel certe ipsi Parentes, quæ Deo consecrata cernebant, ne sacrilegij crimen incurrerent declinantes, egestate conficiebantur. Atque ita fiebat ut oblatio liberorum sub occasione templi & Dei, in Sacerdotum lucra cederet.

Hæc sanctus Doctor in quibus illud præcipue observa quod dicit, Ut impietatem sub nomine pietatis inducerent. Quod proprie est illud quando sub prætextu boni fit malum. O quam multos hæc illudit illusio! Quam multi libere peccant ut aliquid boni



agant? Quàm multi officiosè mentiuntur, iucundè detrahunt, & ut placeant aliis, displicent Deo! *Numquid Deus indiget vestro mendacio?* Iam pridem dixit Apostolus & supra declaratum est. *Non esse facienda mala ut eueniant bona.* Sed quia sæpe aliter iudicamus, & videmur nobis piè & religiose iudicare, idcirco opportune hæc vniuersalis Veritas proponitur ut in ratione boni vel mali agendi, Iudicium nostrum, quantumcumque pium & religiosum videatur, suspectum nobis sit, nec cito in praxi sequendum.

Ratio est facilis, sed sæpe nobis consideranda pro fructu quem continet, mirum enim quantum nostro nos decipiamus iudicio, & eo quidem facilius quo videtur æquius & religiosius. At certe diffidendum & tùm vel maximè cum periculum est ne à natura corrupta corrumpatur. Hæc est vna videlicet ex humanis miseriis deploratissima, ut cùm appetitum cohibere & regere deberet Ratio atque Iudicium, Iudicium potius ipse appetitus peruertat & deprauet. *Inconstantia Concupiscentia transuertit sensum*, ait Sapiens, *Munera extorcant prudentes & subuertunt Verba Iustorum*, ait ipse Deus: & alibi, *Victoriam & honorem acquireret qui dat munera: animam autem aufert accipientium.* Certe vbi sublata est anima, Iudicium superesse non potest, neque aliter qui dat munera, Iudicium accipientis aufert, quam quia munerum appetitu se suo finit corrumpi Iudicio qui munus accipit. *Nescierunt facere Iudicium rectum, thesaurizantes iniquitatem & rapinam in diebus suis.* **AVDITE** hoc Principes domus Iacob, & Iudices domus Israel qui abominamini iudicium, & omnia recta peruertitis. Principes in muneribus iudicabant: & Sacerdotes in mercede docebant; & Prophete in pecunia diuinabant: & super Dominum requiescebant dicentes: *Numquid non Dominus in medio nostrum? Non venient super nos mala.* Propter hoc, causa vestri, Sion quasi ager arabitur, & Ierusalem quasi acervus lapidum erit, & mons templi in excelsa sylvarum. Quasi diceret, inde tota pernicies quod Iudicium corrumpatur: & inde tota Iudicij corruptio quod ex appetitu deprauetur.

## II. PUNCTVM.

**S**ED in ratione boni vel mali agendi tunc maximè periculum est ne Iudicium nostrum corrumpatur.



Quia videlicet tunc maxime viget & excitatur appetitus naturalis. Nam si hic appetitus hoc unum spectat ut quod sibi placet, auide prosequatur, & quod sibi displicet, cito fugiat; Nonne tum illa prosecutio & fuga maxime concitantur quando est evitandum culpæ malum, vel bonum opus faciendum? Quandoquidem in alterutro semper inest quod magis appetitui placeat aut displiceat. Quid enim huic magis placet quam epulari, iocari, ludere, quæ sunt mala sæpe evitanda: & quid magis displicet quam ieiunare, silere, obedire, humiliari, & similes virtutum actus, quæ sunt nobis bona præstanda? *Omnia disciplina*, inquit Apostolus, *in presenti quidem videtur, non esse gaudij, sed mæroris*. Atque inde primo sequitur ut pro maiori complacentia vel displicentia quam appetitus sentit, ipse appetitus corrumpatur, deinde vero sic corruptus iudicium ad se trahat & corrumpat. *Sandalia eius rapuerunt oculos eius: Pulchritudo eius captivam fecit animam eius*: De Iuditha sermo est circa Holofernem: & de re quavis delectabili, circa iudicium sermo usurpari potest.

Quod vel ex eo maxime probatur quod tam multi peccent & tam pauci se vere agnoscant peccatores, quia videlicet in peccatis cæcutiunt, corruptum est iudicium; videtur festuca in oculo proximi, & trabs non apparet in proprio. *Collyrio inunge oculos tuos ut videas*.

## III. P V N C T V M.

**N**EMO igitur sui boni vel mali bonus est Index. *NON* est qui *innocet iustitiam*, ait Propheta, *neque est qui iudicet verè*; Quod tum præcipue verum est quando agitur de bono virtutis arduo & difficili exercendo quod refugit appetitus; vel de vitioso actu evitando quo concupiscentia delectatur; tunc nisi diligenter cum Gratia sibi homo aduigilet, facile sibi persuadebit tale bonum sibi non expedire, aut tale malum sibi non nocere. *En morior, quid mihi proderunt primogenita, Sic accepto pane Esau, & lentis edulio, comedit, & bibit & abiit parvipendens quod primogenita vendidisset*. Sic fascinatio nugacitatis obscurat bona: Sicque mens fascinata vel negabit se peccasse, vel quod peccauit non esse admodum graue. *Comedit & tergens os suum dicit, non sum operata malum*. **PECCAUI, & quid mihi accidit triste?**

Itane



Itane vero Christianus de peccato iudicare posset, nisi iudicio corruptus esset? O quàm vere sanctus Dorotheus: *Cum subjecti* Serm. 19.  
*simus multis passionibus, prauisque affectibus, nostro Iudicio non debe-*  
*mus omnino fidere. Quando enim norma vel regula curua est & infle-*  
*xa, numquam quod secundum eam dirigitur, rectum efficitur, sed*  
*distortum. Quid si culpam amici, inquit sanctus Bernardus, in* Tract. de  
*tuo iudicio, amor illius aut minuit, aut prorsus abscondit, quanto ma-* Grad. Hū-  
*gis amor tui tuum contra te iudicium fallit?* mil.

Sanctus vero Gregorius in Moralibus de hac vniuersa iudicij pra- l. 9. Mor.  
 uitate & ignorantia sic præclare & fuse differit: *Sape recto studio* c. 18. & 19.  
*contra delinquentium culpas accendimur, & cum ultra æquitatis metas*  
*per iram rapimur, hoc zelum iustæ distinctionis æstimamus. Sape officium*  
*predicationis assumimus, ut per hoc fraternæ utilitati seruiamus, sed*  
*nisi placeamus cui loquimur, nequaquam libenter accipitur quod præ-*  
*dicamus. Cumque placere mens utiliter studet, ad amorem laudis pro-*  
*prie turpiter defluit, & quæ à captiuitate vitiorum curabat alios eruere,*  
*ipsa suis facinoribus incipit captiua seruire. Quasi latrunculus quippe*  
*est appetitus laudis humane, qui recto itinere gradientibus ex latere*  
*iungitur, ut ex occultis educto gladio gradientium vita trucidetur.*  
*Cumque propositæ utilitatis intentio ad studia priuata deducitur: hor-*  
*rendo modo unum idemque opus culpa peragit quod virtus inchoauit.*

*Sape & ab ipsis exordiis aliud cogitatio expetit, aliud actio ostendit.*  
*Sape se fidelem sibi nec ipsa cogitatio exhibet, quia aliud ante oculos*  
*mentis versat, & longe ad aliud ex intentione festinat. Nam plerumque*  
*nonnulli terrena præmia appetunt, & iustitiam defendunt, seque inno-*  
*centes æstimant & esse defensores rectitudinis exultant, quibus si spes*  
*nummi subtrahitur, à defensione protinus iustitiæ cessatur: & tamen*  
*defensores se iustitiæ cogitant, sibi que se rectos asserunt qui nequaquam*  
*rectitudinem, sed nummos querunt.*

Et post pauca. *Sape recta agimus & nequaquam præmia, nequa-*  
*quam laudes ab hominibus expectamus, sed tamen mens in sui fiduciam*  
*erecta, his à quibus nihil expetit, placere contemnit, eorum iudiciæ*  
*despicit, seque male liberam per abrupta elationis rapit: & inde sub vi-*  
*tio pejus obruitur, unde quasi deuictis vitiis, nullis se appetitionibus*  
*subjacere gloriatur. Sape dum nosmetipsos plus iusto discutimus, de ipso*  
*discretionis studio indiscretius erramus, & mentis nostræ acies quò plus*  
*cernere nititur, obscuratur: quia & qui importunè solis radios aspicit, te-*  
*nebre scit, & inde nihil videre compellitur, unde videre amplius conatur.*



682 FERIA 3. Hebd. 14. post Oct. Pent. Quare & vos, &c.

Ex quibus sancti Doctoris verbis, & aliis supra dictis patet, Iudicium humanum depravari ex appetitu tripliciter, Primo quidem cum homo sibi fingit non esse malum quod perpetrat: Deinde cum an sit malum aut bonum plane ignorat. Denique cum bonum putat quod est malum. O quis sibi fidat! ô quis sibi non diffidat!

Prou. 3.

Ibid. 11.

Ecclesi. 11.

*Ne innitaris prudentie tuæ: ne sis Sapiens apud teipsum, V I A stulti recta in oculis eius; qui autem Sapiens est, audit consilia. NE dicas quid est mihi opus? Et quæ erunt mihi ex hoc bona? Ne dicas sufficiens mihi sum, & quid ex hoc pessimabor?*

Vide in 1. parte, FERIA 4. & 5. Hebdom. 3. post Epiphan. Et in 2. parte, Sabbato Hebdom. 2. post Pascha: FERIA 5. quæ est Octava Ascensionis, Vbi hæc tractatur Veritas:

Qui sensu suo priuato saniozem se aliis putat, sano se priuat sensu.



## FERIA QVARTA.

### DE HIS CHRISTI DOMINI VERBIS AD PHARIZÆOS.

*Hypocrita, bene prophetavit de vobis Isaias dicens, Populus hic labiis me honorat, Cor autem eorum longe est à me. Matth. 15.*

Verba Prophetæ sunt hæc:

*Appropinquat Populus iste ore suo, & labiis suis glorificat me: Cor autem eius longe est à me. Is. 29.*



VERITAS PRACTICA.

Quò saepe vehementius Deum oras, ore quidem illi adstas propius, sed corde distas longius.

*RATIO EST, Quia quò vehementius aliquid Deum oras, saepe est naturalis ipse affectus magis inordinatus. Sed cum sic orando affectus est magis inordinatus, tum corde distas à Deo longius, licet illi adstes ore propius.*

*Ergo & quò saepe vehementius Deum oras, ore quidem illi adstas propius, sed corde distas longius. Quod certe est Illusionis genus valde cauendum.*

I. P V N C T V M.

**Q**UAE Dominus in Pharizæos Verba prosequitur, plana sunt, si de Pharizæis tantum intelligantur; sed si ad nos, ut par est, illa conuertimus, vix vllus forsan se ijs notari animaduertet, nisi quod orando distractum cor habeat, quæ est humana infirmitas quam sancti quique gemunt.

Verum, In Veritate proposita grauius aliquid continetur quod merito est expendendum. Fit enim aliquando & forte à te sapius, ut cum quid vehementius naturaliter desideramus, id etiam vehementius Deum rogemus, & tum nos magis deuotos, magis illi affectos, vnitos & orationi attentos existimemus. Quæ certe est Illusio. damnosissima & valde cauenda; Nam è contra, *Quo illud vehementius Deum oras, tum saepe longius ab eo distas.* Nonne hoc est pauendum si verum est? Disce autem ex hac Ratiocinatione quàm fit verum. Dubitari non potest quin saepe quando vehementius aliquid Deum rogas, illud aliquid ex illo rerum genere sit quæ naturaliter diligimus ut vitæ prosperitates, commoda, foelices negotiorum euentus, honores, diuitias & similia quæ sunt ordinaria nostra desideria, satis honestis & piis etiam tecta pretextibus, ut sic commodius seruiamus Deo, vel ne bonorum contrariis & oppositis premamur malis. Nonne hæc aliquando ita desideras



684 Feria 4. Hebdomada 14. post Octavam Pentecostes. Hypocrita bene, &c.

& Deum oras? At nonne verendum est ne illa desideres vehementius quam oporteret? Nonne verendum est ne desiderium illud minus sit ordinatum, & plus æquo feratur in rem concupitam, quam recta Ratio postulet?

Gen. 27. Perge ulterius & inquire à te ipso nūm quando sic vehementior est affectus, affectus sit magis inordinatus, aut in re quæ desideratur, aut in modo, vel in fine. Sic Esau vehementer benedictionem Patris postulabat, Nam *irrugit clamore magno, & consternatus*, ait, *Benedic etiam & mihi. Pater mi.* At vero quam parum fuerit tum eius affectus ordinatus, constat ex Apostoli Verbis: *Scitote enim quoniam & postea cupiens hereditare benedictionem, reprobatus est; non enim inuenit penitentiae locum, quamquam cum lachrymis inquisisset eam.* Sic Rex Antiochus, Rex ille scelestus qui tam vehementer, orabat Dominum à quo non erat misericordiam consecuturus, Nonne ex ipso naturali & inordinato quo vivebat affectu sic orabat ut viveret, & quò vehementius orabat, licet affectum tegeret & dissimularet, eo tamen coram Deo magis inordinatus erat; nam reuera vitam non desiderabat nisi ut more solito viveret. Sic denique vehementer illi orabant de quibus ipse Deus, Is. 58. *Rogant me*, inquit, *Iudicia Iustitiae, appropinquare Deo volunt: quare ieiunauimus, & non aspexisti? Humiliauimus animas nostras, & nescisti!* Sed quod eis respondetur, satis indicat quàm inordinatum orando & ieiunando affectum haberent, vnde quo erat eorum oratio vehementior, tanto magis inordinatus prodibat eorum affectus. O quàm vere sanctus Iacobus: *Petitis & non accipitis, eo quod malè petatis, ut in concupiscentiis vestris insumatis.* Iacobi 4.

## II. PUNCTVM.

**S**ED cum sic orando, tuus affectus est magis inordinatus, tum corde distas à Deo longius, licet illi adstes ore propius.

Nam quod est valde considerandum, numquam corde longiores à Deo sumus quam cum voluntate & affectu dissentimus; quando autem desiderium rei alicuius est vehementius quam oporteret, tunc est inordinatum, & voluntas ita desiderans sic à Deo dissentit, ut quantum est inordinate desiderans, tantum à Deo dissentiat, distentque simul longius. *Accedet homo ad cor altum, & exaltabitur Deus.* Id est, tanto magis recedet Deus ab



illo homine qui se inordinate prouehit aut aliquid supra se al-  
tius cupit. Numquid est cor tuum rectum, aiebat Iehu Rex Israel, <sup>4. Reg. 10.</sup>  
Sicut cor meum cum corde tuo? Et ait Ionadab: Est. Si est, inquit,  
da manum tuam: Qui dedit ei manum suam: at ille leuauit eum ad se  
in currum. Sic Deus ab vnoquoque petit vt se sibi vniat, viuant-  
que simul. Non est autem cor rectum si est inordinatum, cum  
rectitudo cordis pendeat à sua regula, quæ est æterna Lex seu Di-  
uina voluntas.

Sic apte sanctus Augustinus; Qui sunt recti corde? Qui volunta- <sup>In Prafa-</sup>  
tem suam ad voluntatem Dei dirigunt, non voluntatem Dei ad volun- <sup>tionem.</sup>  
tatem suam curuare conantur. Et paulo post, Hoc cogitant qui recto <sup>Pf. 124.</sup>  
sunt corde, qui voluntatem Dei sequuntur non suam: faciunt illum præ- <sup>In Exposit.</sup>  
cedentem, & se sequentes: non autem se precedentes & illum sequentem. <sup>eiusd. m.</sup>  
Et in omnibus eum bonum inueniunt, siue emendantem, siue conflatem,  
siue consolantem, siue exercentem, siue coronantem, siue purgantem, siue  
illuminantem.

Itemque alibi: Qui sunt recti? Qui dirigunt cor secundum volun- <sup>In Pf. 34.</sup>  
tatem Dei, & si eos perturbat humana fragilitas, Diuina consolatur  
æquitas. Quamuis autem corde mortali priuatim aliquid velint quod  
sue interim causæ vel negotio vel presenti necessitati conueniat, ubi in-  
tellexerint & cognouerint aliud Deum velle, præponunt voluntatem Me-  
lioris voluntati sue, & voluntatem Omnipotentis voluntati infirmi; &  
voluntatem Dei, voluntati hominis. Et post multa de exemplo Christi  
orantis in horto, Non quod ego volo, sed quod tu Pater. QVOMODO,  
inquit, disiunctus es à Deo qui iam hoc vis quod Deus? Eris ergo re-  
ctus & te decet laudatio, quoniam rectos decet laudatio. Si autem cur-  
uus fueris, laudes Deum quando tibi bene est, blasphemias quando tibi  
male est, &c. Quasi diceret, sicut illi corde cum Deo coniuncti sunt  
qui recti sunt, seu qui amant & faciunt eius voluntatem: sic ab  
eo disiuncti sunt corde qui curui sunt & ita inordinati vt Deum  
non laudent nisi cum ipsis bene fecerit. Si non fuerint saturati, & <sup>Pf. 58.</sup>  
murmurabunt, O infida corda, o curuas in terram animas.

### III. P V N C T V M.

**Q**VO saepe igitur vehementius Deum oras, ore quidem illi adstas  
propius, sed corde distas longius, Quia illa orationis vehe-  
mentia procedit potius ab inordinato quodam cordis affectu



quam à recta ratione vel pia voluntate: Vnde fit vt quàm inordinata est cordis affectio, tam longe Cor distet à Deo. Sicut enim accessus cordis ad Deum consistit in ipsius cordis rectitudine & ordinatione secundum Diuinam voluntatem, sic eius à Deo recessus fit, cum curuum & inordinatum redditur, quando scilicet sese per affectum naturalem nimis inflectit in res creatas. *Va eis, quoniam recesserunt à me. Non clamauerunt ad me in corde suo, sed ululabant in cubilibus suis: super triticum & vinum ruminabant, recesserunt à me.* Id est, satis quidem vehementer orabant cum clamarent & ulularent, sed cum pro suis bonis temporalibus tantum me orarent, ibique cor haberent defixum: quò se putabant orando propius ad me accedere, eo recedebant longius, sic orando tantum temporalia & caduca. Non me inuocant non me desiderant qui sic orant, sed illa tantum bona quæ sibi optant.

Osia 7.

Ps. 52.

Quod præclare sanctus Augustinus ad illa Psalmi Verba, *Deum non inuocauerunt. NON NE*, inquit, quotidie tales rogant Deum? Non rogant Deum. Attendite si possimus hoc dicere adiuuante ipso Deo. Deus gratis se vult coli, gratis se vult diligere, hoc est, castè amari: non propterea se amari, quia dat aliquid præter se, sed quia dat se. Qui ergo inuocat Deum vt diues fiat, Deum non inuocat, hoc enim inuocat quod ad se vult venire: quid enim est inuocare, nisi vocare in se? In se ergo vocare, hoc dicitur inuocare. Nam cum dicitur, *Deus da mihi diuitias*: non vis vt ipse Deus ad te veniat, sed vis vt diuitie veniant ad te. Quod vis vt ad te veniat, hoc inuocas. Si autem Deum inuocares, ipse ad te veniret, ipse esset diuitie tue. Nunc autem vis habere arcam plenam, & inanem conscientiam. Deus non implet arcam, sed pectus. Quid tibi profunt exteriores diuitie, si te interior premit egestas? Ergo isti qui propter secularia commoda, qui propter terrena bona, qui propter vitam præsentem & terrenam felicitatem inuocant Deum, non inuocant Deum.

Ecclesi. 1.

Hæc ad Verbum sanctus Ille Doctor ex quibus non modo patet propositæ Veritatis Ratio, sed quàm sit damnosum quàm putandum & alienum à vera religione sic orare Deum. Hoc est scilicet quod Ecclesiasticus primo ipso libri capite tantopere præcauebat: *Ne sis incredibilis timori Domini, & ne accesseris ad illud duplici corde. Ne fueris hypocrita in conspectu hominum, & non scandalizeris in labiis tuis. Attende in illis, ne forte cadas, & addu-*



*cas anima tua inhonorationem, & reuelet Deus absconsa tua, & in medio Synagoga elidat te; quoniam accessisti malignè ad Dominum, & cor tuum plenum est dolo & fallacia. Nec importunum videri debet quod ex sancto Iacobo huc iterum reuocamus: Appropinquate Deo, & appropinquabit vobis. Emundate manus, Peccatores: & purificate corda, duplices animo.*

Hanc Ecclesiastes cordis purificationem, sic oraturo commendabat: *Custodi pedem tuum, ingrediens domum Dei; & appropinqua ut audias. Id est, caue affectum inordinatum, caue ne ex eo Deum ores; audi potius ipsum Deum te admonentem vt hunc prauum deponas affectum; cui admonitioni si parueris, longe plus Deo dabis quam si multas illi mactasses victimas; vnde & pergit Sapiens, Multo enim melior est obedientia quam stultorum victima, qui nesciunt quid faciunt: Nempe nesciunt nec cogitant quantum Deo displiceat sic orari cum affectu inordinato. Videte, vigilate, & orate.*

Videri debet in 2. parte, Feria 4. Pentecostes.



## FERIA QUINTA.

### AD HÆC CHRISTI DOMINI VERBA CONTRA PHARIZÆOS.

*Omnis Plantatio quam non plantauit Pater meus  
cælestis, eradicabitur. Matth. 15.*

### VERITAS PRACTICA.

*Humana consilia eò sæpe pejora, quò meliora.*

*RATIO EST, Quia consilia quauis eò pejora sunt, quò magis  
obsunt intento fini.*



688 FERIA 5. Hebd. 14. post Oct. Pent. Omnis plantatio, &c.

Sed quò meliora sunt, eò saepe intento fini magis obsunt.

Ergo eo saepe pejora sunt quò meliora. Quamobrem in id acuratiùs inuigilandum est.

## I. PUNCTVM.



VM nihil haberent Pharizæi quod Verbis Christi opponerent, nec tamen Christo Domino crederent, hoc vnum restabat illis murmurare, infrendere, & tamquam se ab eo male acceptos atque offensos palàm conqueri. Quod cum animaduernerent Discipuli Domini, *Accedentes*, inquit Evangelista, *dixerunt ei: Scis quia Pharizæi audito Verbo hoc, scandalizati sunt. At ille respondens ait: omnis plantatio quam non plantauit Pater meus Cælestis eradicabitur. Sinite illos, cæci sunt & duces cæcorum; cæcus autem si cæco ducatum præset, ambo in foveam cadunt. Quasi diceret, ne turbemini aut vlllo modo moueamini propter facta Pharizæorum, quia deficient, exarescent, aut etiam euellentur, sicut infecunda plantatio; Atque vniuersim illud certi habetote quod quidquid non fuerit à Deo vel cum Deo institutum, illud non stabit.*

Quæ Christi Domini sententia valde Moralis est & saluberrimum continet documentum, quo admonemur nihil inconsulto Deo statuendum: nihil quidquam suscipiendum sine Deo, nihil alioquin profuturum, quantumcumque videatur sapienter susceptum; Imo quò sapientius illud videbitur, si tantum humanum est consilium, nec Diuinum accesserit; quò inquam illud humanum consilium melius & utilius apparebit, eò saepe deterius fiet.

Hoc est quod expressius hodierna Veritate proponitur, per humana consilia intelligendo non modo quidquid homines consulant, sed quod ipsi nobiscum statuimus, nostro tantum naturali & humano consilio instructi, sine peculiari recursum ad Deum & non habita potius ratione ad Eius ordinationem & voluntatem quàm ad nostram. Hæc erit plantatio quam non plantauit Pater Cælestis, & quæ eradicabitur, nihil proficiet, imo & nocebit, & tanto forte grauius quanto illud humanum consilium videbatur utilius. Quod quia magis mirum est & periculosum nisi præcaueatur, idcirco diligentius expendendum.

Ratio



Ratio autem quæ id demonstrat, hæc est inter alias, quod tunc inferi debet consilium inutile aut etiam perniciosum quod adeo non proficit ad finem negotij cuius causa suscipitur, vt ei noceat & contraheniat. Nonne hoc est ipso naturæ notum lumine, necnon ipso naturali sensu compertum? Quorsum enim deliberamus & consilia nobiscum vel cum aliis simul inimus de negotiis, nisi ad ea scilicet ad suum finem & exitum perducenda? Quænam autem meliora vel pejora consilia dicimus nisi quæ facilius eò ducunt, aut inde deducunt quò spectamus? Quænam prudentior mediorum electio nisi quæ directius ad propositum finem ducit? Nonne vel hoc ipso Diuina commendatur Sapientia quod *attingat Sap. 8.*  
*à fine vsque ad finem fortiter, & disponat omnia suauiter.* Id est, conuenientibus sibi proposito finis mediis. Atque hinc Sapiens: *Sapientia callidi est intelligere viam suam: & imprudentia stultorum errans: Prou. 14.*  
*GENS absque consilio est & sine prudentia, utinam saperent & intelligerent ac nouissima prouiderent. Deut 32.* Nempe inconsulti sunt qui sibi finem suum non proponunt.

## II. P V N C T V M.

**S**ED humana consilia quò utiliora videntur, eò saepe magis obsunt fini seu negotio quod suscepimus, quàm illi prosint.

Primò quidem quando hoc vnum esset quod humana sunt tantum consilia quibus Diuina non accesserunt, neque vt accederent sunt implorata, nonne sufficeret ad prouocandam illam desertionem Dei quam ipse per Prophetam minatur: *Va filij desertores, dicit Dominus, vt faceretis consilium & non ex me, & ordiremini telam & non per spiritum meum, vt adderetis peccatum super peccatum, qui ambulatis vt descendatis in Aegyptum, ET OS MEVM NON INTERROGASTIS: sperantes auxilium in fortitudine Pharaonis, & habentes fiduciam in umbra Aegypti. Et erit vobis fortitudo Pharaonis in confusionem, & fiducia umbra Aegypti in ignominiam. Quæ omnia tam vere nobis singulatim applicari possunt, quam certum est de nobis singulis singularem esse Dei prouidentiam, si eam vellemus attendere.*

Deinde verò, quò utiliora videntur illa consilia, maior in eis fiducia ponitur, tantumque solent homines in humana industria & solertia ponere vt quo maior est industria & solertia, eo plus



4f. 19.

Jer. 2.

Luc. 9.

Is. 5.

Rom. 8.

1. Cor. 1.

in ea ponant. Nonne id est naturale & humanum? At scito id esse valde perniciosum quia inde magis etiam à Deo rettahimur, aut certe minus in eo fidimus. Quod ita quidem illi displicet ut propterea se negotio Ipse opponat & rem disturbet, quod his apte Propheta concepit & expressit Verbis: *Dominus miscuit in medio eius spiritum vertiginis: & errare fecerunt Aegyptum in omni opere suo, sicut errat ebrius & vomens.* Lege caput integrum Prophetæ quod pene totum est de hoc argumento, & caput trigesimum primum ubi hæc præcipue perpendenda sunt verba: *Aegyptus homo, & non Deus: & equi eorum caro & non Spiritus: & Dominus inclinabit manum suam, & corruet auxiliator, & cadet cui præstatur auxilium, simulque omnes consumentur.* Cui coherenter Jeremias, quoniam obtrivit Dominus confidentiam tuam, & nihil habebis prosperum in ea.

Denique, quantumcumque sint illa consilia nobis ad negotium temporale ac humanum finem utilia, quænam est illa utilitas si æterno nocet negotio & illi obstat supernaturali Fini ad quem omnia dirigenda essent negotia? *Quid enim proficit homo si lucretur uniuersum mundum, se autem ipsum perdat, & detrimentum sui faciat?* Sæpe autem hoc accidit ut quod utiliora sunt illa humana consilia ad finem temporalem, deteriora sint ad supernaturalem. Nam cum finis temporalis vix sit alius quam vel honoris vel commodorum aut voluptatis argumentum: Quid hæc ad vitam æternam? Imo quantum ab incommutabili & vero bono hæc caduca deducant, quis non videt, quis non deplorat nisi cæcus & perditus? *Propterea dilatauit Infernus animam suam, & aperuit os suum absque ullo termino: & descendent fortes eius, & populus eius, & sublimes glorioſique eius ad eum.* Nonne & propterea Prudentia carnis mors est? Et *Sapientia carnis inimica est Deo? Legi enim Dei non est subiecta, nec enim potest.* Sic stultam fecit Deus Sapientiam huius mundi.

## III. PUNCTVM.

1. Cor. 1.

**H**UMAN A ergo consilia eò sæpe pejora quo meliora: Quia cum merè humana sint, humanâ tantum ducuntur sapientia quæ Diuinâ sic est opposita ut quod stultum est Dei, sapientius sit hominibus: & quod infirmum est Dei, fortius sit hominibus: Vnde quid sequitur nisi quod videbatur melius coram hominibus, fiat coram Deo pejus, sicut quod erat apud Deum Sapientius, factum apud ho-



mines stultius? Dominus dissipat consilia gentium, reprobantem autem cogitationes populorum, & reprobantem consilia Principum: Consilium autem Domini in aeternum manet. Iam vero quid boni speres Deo non adjuuante? Aut quid mali non timeas contradicente Deo?

Nihil agas, inquit Deus, me inconsulto, & omnia tibi foeliciter fluent. Tu vero contra; Etiam Te non consulto, foelicius cedent. Itane auderes loqui? Et nonne apud Deum opera magis audiuntur quam verba? Non credis Sapienti, vel potius ipsi Deo sic per Sapientem imperanti; Habe fiduciam in Domino, ex toto corde tuo, & ne inittaris Prudentiae tuae. In omnibus viis tuis cogita Illum, & Ipse diriget gressus tuos. Et ne sis Sapiens apud te ipsum. Quod & Apostolus repetit: Nolite prudentes esse apud vosmetipsos. Neque ad hanc propriam cauendam Prudentiam, sufficit consulere homines, nisi etiam Ipse consulatur & inuocetur Deus. Vnde aperte Sapiens, postquam dixit inter Consultores eum esse praefendum qui sanctitate praestat, addit & post illum etiam consultum, tum praecipue Deum esse consulendum. Cum viro, inquit, sancto assiduus esto, quemadmodum cognoueris obseruantem timorem Dei; Cor boni consilij statue tecum, non est enim tibi aliud pluris illo. Anima viri sancti enuntiat aliquando vera quam septem Circumspectores sedentes in excelsis ad speculandum. Et in his omnibus deprecare Altissimum ut dirigat in Veritate viam tuam.

Denique, ut magis appareat differentia plantationis plantatae à Domino & non plantatae, seu animae confidentis in Deo vel in homine, audi ipsum loquentem Dominum: Hae dicit Dominus: maledictus homo qui confidit in homine, & ponit carnem brachium suum, & à Domino recedit cor eius. Erit enim quasi myrica in deserto, & non videbit cum venerit bonum: sed habitabit in siccitate in deserto in terra falsuginis, & inhabitabili. Benedictus vir qui confidit in Domino, & erit Dominus fiducia eius. Et erit quasi lignum quod transplantatur super aquas, quod ad humorem mittit radices suas, & non timebit cum venerit aestus, Et erit folium eius viride, & in tempore siccitatis non erit sollicitum, nec aliquando desinet facere fructum.

Videsne differentiam vtriusque Confidentiae? Poteratne magis innotescere quam ex facta comparatione tanta benedictionis & maledictionis oppositae? Quis tam parum sui amans qui cum possit à Deo benedici benedictione praecipua, malit maledici maledictione pessima? Sic proinde sapienter Iuniorē monebat Se-



692 FERIA 6. Hebd. 14. post Oct. Pent. Quæ procedunt, &c.

Tobias 4. nior Tobias: *Omni tempore benedic Deum: & pete ab Eo, ut vias tuas dirigat, & omnia consilia tua in ipso permaneant.* Quem in vsum apti  
Ps. 5. occurrent multi Psalmorum versiculi: *Domine deduc me in iustitia tua: propter inimicos meos dirige in conspectu tuo viam meam.*  
Ps. 143. NOTAM fac mihi viam in qua ambulem, &c.

Vide in hac 3. parte, Quæ tres primæ habentur de statibus, circa finem totius partis.



## FERIA SEXTA.

*Quæ procedunt de ore, de corde exeunt: & ea coinquinant hominem. De Corde enim exeunt cogitationes malæ, homicidia, adulteria. Hac sunt quæ coinquinant hominem. Matth. 15.*

### VERITAS PRACTICA.

*Et si in aliis hominibus, Concupiscentia sæpe peccatum minuit: In te tamen sæpius auget.*

*RATIO EST, Quia quando Concupiscentia antecedens est, diminuit peccatum; Quando vero est consequens, illud auget. Sed in te sæpius est consequens.*

*Ergo & sæpius auget peccatum; Quod tamen non aduertis & in quo multum illuderis.*

### I. PUNCTVM.

**V**T apertius appareret quàm longe grauius arguendi essent Pharizæi suis illotis cordibus, quàm Discipuli Domini, non lotis manibus; Tunc conuocatis ad se Dominus turbis dixit eis, *Andite & intelligite: Non quod intrat in os coinqui-*



*nat hominem, sed quod procedit ex ore, hoc coinquinat hominem. Tum paulo post particularius ad Discipulos, Quae procedunt, inquit, de ore, de corde exeunt, & ea coinquinant hominem; De corde enim exeunt cogitationes mala, homicidia, adulteria, fornicationes, furta, falsa testimonia, blasphemiae: haec sunt quae coinquinant hominem. Non lotis autem manibus manducare, non coinquinat hominem.*

Quae Christi Domini Verba cum possint intelligi de omni peccato quod ex corde exit, quatenus à voluntate procedit; sunt tamen quaedam quae de corde magis exeunt, quae scilicet ex Concupiscentia magis procedunt, & ea sunt etiam quae magis peccantem coinquinant quia peccatum augent, quod certe pauci aduertunt, Tuque inter illos si te probe noris, & grauius his peccatis peccas, & minus aduertis. Audi igitur Veritatem propositam quae tota tibi proponitur: *Et si in aliis peccatum saepe diminuit Concupiscentia, in te illud tamen saepius auget.* Agnosces ex hac Ratione quae praesupponit quod docet Diuus Thomas, appetitum sensitium seu concupiscentiam, posse se habere ad liberum arbitrium *antecedenter & consequenter.* Antecedenter quidem secundum quod passio appetitus sensitui trahit vel inclinat rationem vel voluntatem. Consequenter autem secundum quod motus superiorum virium si sint vehementes, redundant in inferiores; non enim potest voluntas intensè moueri in aliquid quin excitetur aliqua passio in appetitu sensitui. Si sit igitur antecedens passio, diminuet peccatum, quia minus est à voluntate, & quanto minus peccatum est voluntarium, tanto minus est peccatum. *Passio autem consequens non diminuit peccatum sed magis auget, vel potius est signum magnitudinis eius, inquantum scilicet demonstrat intensiorem voluntatis ad actum peccati: & sic verum est quod quanto aliquis maiori libidine vel concupiscentia peccat, tanto magis peccat.*

Ipsa sunt sancti Thomae Verba quibus nihil addendum pro intelligentia primae propositionis, nisi forte illud Sapientis: *Post concupiscentias tuas non eas, & à voluntate tua auertere.* Quibus Verbis potest illa antecedens & subsequens notari passio. Atque pro aliquali commouendo affectu, cogita paulo diutius quantum quotidie peccata peccantium crescant, non modo numero, sed grauitate, cum eorum quotidie crescat Concupiscentia. *Cor suum leuauerunt contra me quasi ventum pestilentem.* Multus est in his Verbis sensus; exquirere.



## II. P V N C T V M.

**S**ED in teipso sapius est illa consequens Concupiscentia.

Jer. 2.

Quidquid sit de aliis, teipsum inspice; *Vide vias tuas in conuallibus: Scito quid feceris: cursor leuis explicans vias suas. Onager assuetus in solitudine. In desiderio anima sua attraxit ventum amoris sui.* Nonne iam pridem agnoscis te vanitati, libidini, aut alteri, quod noris, vitio esse obnoxium? An illud qua par est solitudine curas euellendum? Si deest necessaria sollicitudo, signum est te amare illud vitium, & tibi esse voluntarium, adeo ut quando in illud incidis, non ex passione antecedente sed consequente incidas. *Scito iniquitatem tuam, quia in Dominum Deum tuum prauaricatus es.* Antecedebat passio in primis adolescentiae annis cum nondum illam ita clare aduerteres: sed modo post tot annos in ea sentienda & cognoscenda positos, post tot meditationes, tot Gratias, tot Communiones ad eam extirpandam efficacissimas; si adhuc viget, voluntarie quodammodo detinetur, sicque consequens est; quod non tam à passione voluntas, quam à voluntate mouetur passio; cum si pridem voluisses, si velles etiam nunc cum Deo, facile concupiscentiam reprimeres. *Arguet te malitia tua.*

Jer. 2.

Jer. 8.

Adde quod, vltro quaris occasiones, aut oblatas non refugis; tu teipsum ad vanitatem excitas, extollendo res à te gestas, excitando tacite alios ad praedicationem tui; & aliis miris modis quibus Concupiscentiam foues. *Quasi equus impetu vadens ad praelium. Hoc est attrahere ventum amoris sui.*

Jer. 4.

Denique, quoties occurrunt contraria passioni seu concupiscentiae; dic, quae non das signa doloris & impatientiae? Quid porro illa significant nisi te diligere illud & omnino velle quod doles non habere? *Via tua & cogitationes tuae fecerunt haec tibi: ista malitia tua, quia amara, quia tetigit cor tuum.* Expende singula Prophetarum Verba.

## III. P V N C T V M.

**E**TSI in aliis igitur Concupiscentia saepe dimittit peccatum, in te tamen saepius auget, Quia saepius consequens est, voluntaria



*Et si in aliis hominibus, Concupiscentia saepe peccatum, &c. 695*

est, voluntarie nutrita & excitata. *Hæc sunt quæ de corde exeunt & quæ coinquinant hominem.* Quod sic Propheta exprimit Verbis aptissimis: *Sicut frigidam fecit cisterna aquam suam, sic frigidam fecit malitiam suam.* Id est, non calenti sed frigido vt dicunt sanguine, malum operatur: quasi diceretur, non repentino motu sed quasi præcognito & deliberato, licet aliter peccanti videatur. Atque in hoc duplex est Illusio. Prima quidem quod putes non esse voluntarium nisi quod expresso voluntatis actu perficis, quasi non velles quod te velle non cogitas. Error est alibi refutatus.

Deinde verò, etsi fatearis te peccare in illis ad quæ natura incitante propendes, non tamen idcirco grauius te peccare arbitreris, quia naturæ propensio videtur peccatum excusare. Sed non ita in te, vt dictum est, quia cum corruptam debuisses naturam excolere, necnon Diuinæ subicere Gratia: Tu illam potius foves & nutris, vnde fit vt non modo sit voluntaria & inexcusabilis illa naturæ propensio, seu quæ inde procedit culpa; sed tanto euadit grauior & poena dignior, quanto est magis naturalis, quia magis est nota, magis tua, magis expressa per tot actus in te concitatos, à te liberè acceptatos, & sponte quadam elicitos.

Non id quidem aduertis, non id putares ita esse, quia ex illis de quibus dicitur, *Transierunt in affectum cordis*, Id est, quanti quanti sunt intellectu, voluntate, memoria, verbis, factis, gestibus, & se totis, transierunt in affectum cordis, nihil aliud sapiunt aut cogitant; seu ex his omnibus animi corporisque facultatibus, affectum suum fouent & colunt. Quo tantum abest vt excusentur, quin propterea grauius accusentur, quia hinc apparet valde robustam esse concupiscentiam: nec aliter roborari potuisse quam libera voluntate consentiendi primis eius innatis motibus. Quod satis aperte Sapiens, cum dixit, *Si præstes animæ tuæ concupiscentias eius, faciet te in gaudium inimicis tuis.* Id est, talem te ipse efficies qualem te Inimicus, qualem te Dæmon optat, nempe in peccatis totum, nec aduertentem. Nam si saltem aduerteres; aut si totus in concupiscentia non viueres, res in extremo non esset: sed totum aut penè totum esse in culpabili concupiscentia, nec advertere, nec sentire, nec monenti credere, hoc est *concupiscere concupiscentiam*, quod est extremum malitiæ. Exar-

Jer. 6.

Dom 7. post  
Pentec.

Ps. 71.

Ecclesi. 10.

Ps. 105.

Ps. 17.



696 Sabbato Hebd. 14. post Oct. Pent. De muliere Cananæa.

*& comprehendam illos : & non conuertar donec deficiant. Confringam illos , nec poterunt stare : cadent subtus pedes meos. Sic dicendum, sic agendum in Domino.*

Videri potest in 1. parte, Feria 5. Hebdomadæ 6. post Epiphaniam. In 2. parte, Feria 5. post Cineres : Et in hac 3. parte, Feria 3. Hebdom. 8. Vbi hæc exhibetur Veritas :

Ne putes te benè semper excusatum, cùm dicis : non putabam.



## SABBATO.

### DE MULIERE CANANÆA.

*O Mulier, magna est fides tua, fiat tibi, sicut vis.*  
Matth. 15.

### VERITAS PRACTICA.

Sicut non satis fedit Deo, qui nimis satagit : sic, qui de suo non satis agit.

**RATIO EST,** Quia fiducia in Deum debet esse ordinata.

Sed qui de suo non satis agit, non minus agit contra ordinem Divinae fiduciæ, seu contra fiduciam ordinatam, atque is qui nimis satagit.

Sicut ergo non satis fedit Deo qui nimis satagit, sic qui de suo non satis agit. Quod tamen pauci cogitant.

### I. PUNCTVM.



*Sicut non satis fidit Deo, qui nimis satagit, sic qui de suo, &c. 697*

I. P V N C T V M.

**A** DIVNGIT proximè suprà dictis in eodem capite, sanctus Matthæus historiam de muliere Cananæ, quæ cum audisset Dominum IESVM accedere in partes Tyri & Sidonis, statim à finibus illis egressa clamavit dicens ei, miserere mei Domine, fili David, filia mea male à Demonio vexatur. Qui non respondit ei verbum. Et accedentes Discipuli eius rogabant eum dicentes, Dimitte eam quia clamat post nos. IESVS autem respondens ait, Non sum missus nisi ad oves quæ perierunt domus Israel. At illa venit & adoravit dicens, Domine adiuua me. Qui respondens ait, Non est bonum sumere panem filiorum & mittere canibus. At illa dixit, Etiam Domine, nam & canelli edunt de micis quæ cadunt de mensa Dominorum suorum. Tunc respondens IESVS, ait illi: O mulier, magna est fides tua, fiat tibi sicut vis. Et sanata est filia eius ex illa hora.

In quibus sacri Euangelistæ verbis illud præcipue observandum est quod notat sanctus Augustinus, *Clamabat fœmina, & dissimulabatur à Christo, non ut misericordia negaretur, sed ut desiderium accenderetur, & humilitas commendaretur.* Sicque nobis aperte detegitur duplex quædam Illusio & error errori oppositus, in quem plerique incidunt, dum aduersis premuntur, aut aliqua graui necessitate laborant.

Sunt enim qui tùm ita fatagunt, ita se cruciant & inanī labore diuexant, quasi Deo non fiderent. Sunt alij verò qui se ita dicunt Deo fidere, vt nihil sibi agendum putent. Quæ duo cum sint extrema vtrunque vitiosa, nunc luculento Cananæ exemplo nobis euitanda proponuntur. Non enim illa se inaniter domi excruciat, non vanos edit eiulatus, non se male vexat cum male vexata filia. Sed neque tamen otiosa remanet; adit Christum, adit Apostolos, repulsa non repellitur, rejecta non abjicitur; vrget & inclamat opem ac misericordiam, nec quiescit donec impetret quod optabat.

Hoc est verè Deo confidere, sic inter extrema laboris & sollicitudinis, incedere vt neque excedat sollicitudo neque deficiat: Et quia clarius est quod qui nimis satagunt, minus videntur Deo confidere quam qui nihil de suo agunt; Idcirco ab vno ad aliud discemus Veritate proposita, *quod plane sicut non satis confidit Deo qui nimis satagit, sic qui de suo non satis agit.*



Ratio est ita plana, vt quoad illam primam partem qua dicitur veram in Deum fiduciam debere esse ordinatam, nulla sit alia probatione opus. Nihil enim non ordinatum potest illi placere qui *non est Deus dissensionis*, seu vt græca vox habet, *inordinationis Deus, sed pacis & ordinis*. Et licet virtutes Theologicae non consistant ex se in medio sicut morales, sed tantò melius illarum bonum sit, quanto magis acceditur ad summum, vt scribit sanctus Thomas: ex parte tamen nostra, vt ait Idem sanctus Doctor, in medio quodam consistunt: quia debemus ferri in Deum credendo, sperando, & amando, secundum mensuram nostræ condicionis, quæ fit vt Virtutes illæ quibus credimus speramus & amamus, habeant extrema quædam & medium quo possint ordinari.

1. Cor. 14.

1. 2. q. 64.

¶ 4.

Et particulatim de Spe seu fiducia sic ibidem: *Spes, inquit, est media inter presumptionem & desperationem ex parte nostra*. Quod & alibi expressius, vt mox videbitur.

Cant. 2.

Serm. 49.

in Cantica.

O quam præclare sanctus Bernardus ad illa sponsæ verba: *Ordinavit in me Charitatem: DISCRETIO ita omni Virtuti ordinem ponit, vt ordo modum tribuat & decorem*.

## II. P V N C T V M.

**S**ED qui de suo non satis agit, non minus agit contra ordinem Diuinæ fiduciæ, seu contra fiduciam ordinatam, atque is qui nimis satagit.

Cur enim qui nimis satagit non seruat ordinem, nisi quia excedit plus agendo quam debeat, plus agendo quàm velit Deus, quàm Ratio postulet, quàm requirat negotium, quàm ipse Agens possit perficere? *Quid de crastino solliciti estis*, Id est, inani & inquieta rerum solitudine quæ ad solum Deum spectant. *Quis vestrum cogitans potest adjicere ad staturam suam, cubitum unum?*

Math. 6.

Sic planè qui de suo non satis agit, sic per defectum peruertit ordinem; Non enim agit quod est ordinatum vt agat, & sine quo Deus nihil præstabit: Quæ est manifesta præsumptio, Spei Diuinæ opposita, inquit S. Thomas, cum quis inhæret Diuinæ potentiae per immoderantiam, respiciendo scilicet quod absolutè Deus possit, & non quod velit facere per certa quædam media: in quo ex vna parte est excessus, inordinate sperando; ex alia vero est defectus non agendo quæ sunt ordinata vt illud fiat quod speratur; *Sicut si sine poenitentia sibi vellet peccata remitti, aut sine meritis saluus*

2. 2. q. 21.

¶ 1. &amp; se-

quentib.



*Sicut non satis fedit Deo, qui nimis satagit, sic qui de suo, &c. 699*

esse. Quid de illo censeret, qui sic se sperare diceret? Plane præsumeret, nec nisi male & inordinate speraret: quia non seruaret ordinata. Cur non igitur ille in alia quauis materia sic diceretur præsumere, sicque ordinem non seruare, qui de suo non agit quod agendum est: qui non serit, quod metat: qui non studet, quod discat: qui non orat, quod obtineat: qui non se colligit ut orare possit?

*Numquid de tribulis ficus, aut de spinis uua? Numquid quia solitudo vetatur nimia, nulla est prorsus habenda? Quorsum illæ Domini voces, serue male & piger: SERVVM inutilem projicite in tenebras exteriores. Quorsum illæ Apostolicæ cohortationes, solitudine non pigri, SOLICITE cura teipsum probabilem exhibere Deo operarium inconfusibilem. VO S autem curam omnem subinferentes ministrare in fide vestra virtutem: In virtute autem scientiam: in scientia autem abstinentiam: in abstinentia autem patientiam: in patientia autem pietatem: in pietate autem amorem fraternitatis: in amore autem fraternitatis, Charitatem. Hæc enim si vobiscum adsint & superent, non vacuos nec sine fructu vos constituent in D. N. IESV Christi cognitione: Cui enim non præsto sunt hæc, cæcus est & manu tentans, obliuionem accipiens purgationis veterum delictorum.*

*Matth. 7.*

*Matth. 25.*

*Rom. 12.*

*2. Tim. 2.*

*2. Pet. 1.*

An hæc tibi videntur inaniter dicta? Vel si serio dicta putas, nonne aperte vides quam multa sint inter se ordinata quæ de tuo conferas: aut si non conferas, non serues statutum ordinem? *Vade ad fornicam, ô piger: & considera vias eius.*

*Prov. 5.*

### III. P V N C T V M.

**S**ICUT ergo non satis fedit Deo qui nimis satagit, sic qui de suo non satis agit. Vterque scilicet deserto veræ Fiduciæ medio, se in extrema projicit quæ inordinatam fiduciam faciunt quæ magis offenditur Deus quàm colatur. *Nolite confidere in verbis mendacij dicentes, Templum Domini, templum Domini, templum Domini est. Quod si bene direxeritis vias vestras & studia vestra, habitabo vobiscum. Ecce vos confiditis in sermonibus mendacij qui non prode runt vobis. INDICABO tibi ô homo quid sit bonum, & quid Dominus requirat à te: Vtique facere iudicium, & diligere misericordiam, ET SOLICITVM AMBVLARE CVM DEO TVO. Tum Vox Domini ad ciuitatem clamat: Et salus erit timentibus nomen tuum.*

*Jer. 7.*

*Mich. 6.*

Certe si quis recte vniquam & ordinate sperauit in Domino,

Tttt ij



Ps. 51.

fuit ille Pfalter Regius quem idcirco multoties à Deo liberatum Ipse Deus affirmat quod in ipso sperasset: quomodo vero spem & fiduciam suam exercebat? Ego, inquit, *sicut olina fructifera in domo Dei, speravi in misericordia Dei in eternum.* Id est, sicut arbor & illa præcipue arbor quæ est valde frugifera ex se suaque radice simul cum sole producit fructum suum, ita ego cum Deo quod in me erat, quod meum erat, quod à me Deum velle narem, in id totus elaborabam, id vnum contendebam. Quod cum ubique præstiterit, tum id maxime apparuit in rebus cum Saule gestis. Licet enim certo sciret se futurum Regem, seque iam inunctum à Propheta Samuele non obliuisceretur; ita tamen declinabat omnes illos mortis casus in quos se redactum sæpissime vidit, quasi nihil promissum sibi fuisset: sic nempe volebat Deus ipsum sperare & confidere, vt non in suo quidem arcu speraret, sed in Diuina misericordia se protegente: neque tamen ita speraret in illa protectione vt nihil ageret, sed agendo consideret & confidendo ageret. *In Deo meo transgrediar murum.* Sic & nos exhortatur vt agamus & speremus, *Viriliter agite, & confortetur cor vestrum, omnes qui speratis in Domino.*

Ps. 17.

Ps. 30.

Judith. 8.

Sic sancta Judith, postquam conciuēs suos de vana quadam & inutili sollicitudine qua se angebant arguit, docet illos quid agere debeant, & ad illud agendum exhortatur: *Humiliemus illi animas nostras, & in spiritu constituti humiliato seruientes illi, dicamus flentes Domino, vt secundum voluntatem suam sic faciat nobiscum misericordiam suam.* Hæc æmulare virtutis exempla; nec pigeat à fœminis discere quod est agendum; sed pudeat potius non id agere quod illæ docent & faciunt.

Cum autem multa passim de spe ac fiducia proponantur, videri possunt in singulis partibus.

FINIS CONSIDERATIONVM ET VERITATVM  
TERTIÆ PARTIS DE VITA DOMINI IESV.



*Tantò unusquisque est magis aut minus verè bonus, &c. 701*



# VERITATES PRACTICÆ.

AD DIES FESTOS SANCTORVM  
QVI INCIDVNT IN HANC  
TERTIAM PARTEM.

*DE SANCTO BARNABA APOSTOLO.* Die 11. Iunij.

*Erat vir bonus, & plenus Spiritu sancto & fide.*  
Act. 11.

## VERITAS PRACTICA.

Tanto vnusquisque est magis aut minus verè bonus  
& sanctus, quantò magis minusue participat de  
Spiritu sancto.

RATIO EST, Quia tanto quis est magis aut minus vere  
bonus & sanctus, quanto magis de vera bonitate & sanctitate  
participat.

*Sed vera Bonitas & sanctitas est Spiritus sanctus.*

*Ergo tantò quis est magis aut minus verè bonus & sanctus,*



quantò magis minusue participat de Spiritu sancto; quem proinde oportet crebrò & vehementer orare & colere.

## I. P V N C T V M.

Act. 4. 9.  
11. 2. 13.  
14. & 15.



VALIS hic Vir, quanti quemeriti fuerit, discite ex libro actuum Apostolorum, notatis capitibus, ubi ne inter alia, de Illo & de Coapostolo Ipsi, Paulo; omnes Apostoli simul congregati loquuntur Antiochenis Christianis; *Placuit nobis collectis in unum eligere viros & mittere ad vos cum carissimis nostris Barnaba & Paulo, hominibus qui tradiderunt animas suas pro nomine Domini nostri IESU Christi.* Sed ipse Spiritus sanctus, iam ante quanti eum faceret, satis manifestarat, cum ex omnibus Discipulis, Eum segregandum iussit ad idem Prædicationis Evangelicæ munus ad quod Apostolus Paulus erat vocatus. *Segregate, inquit, mihi Saulum & Barnabam, in opus ad quod assumpsi eos.*

Act. 13.

Quid quod Idem Spiritus sanctus totum Seipso repleuit hominem, ut ex eisdem Actis relatum est, nonne hoc vnum sufficit ad singularem sancti Viri sanctitatem declarandam? Nam ut habet proposita Veritas, *Tanto unusquisque est magis aut minus bonus & sanctus, quantò magis minusue participat de Spiritu sancto;* Vnde cum sanctus hic Apostolus plenitudinem quandam huius Spiritus participavit, quid nisi plenitudinem sanctitatis & bonitatis habuit? Congaude illi, & ope eius ad Veritatis notitiam & Praxim implorata, Expende primò quàm verum sit quod prima Propositione dicitur, Tantò vnumquemque magis aut minus verè bonum & sanctum esse, quantò magis minusue de vera bonitate & sanctitate participat. Sicut enim à diuitiis homo est diues, à doctrina doctus, à fortitudine fortis, à Iustitia iustus, & à cæteris qualitatibus ita instructus & affectus, quales ipsa sunt; sic prorsus à bonitate & sanctitate bonus & sanctus est, quisquis est sanctitatis capax, & à majori bonitate magis bonus & sanctus. *Induite novum hominem qui secundum Deum creatus est in Iustitia & sanctitate Veritatis:* Id est, in vera sanctitate, non falsa, non adumbrata. Quoniam sit porro illa Veritas seu vera Sanctitas deducunt sancti Patres à duobus Græcis vocabulis quorum primum & magis vñtatum est *ἁγιότης* seu *αγιότης* quod componitur, inquit Origenes, ex à priuatiua,

Ephes. 4.



Tantò vnusquisque est magis aut minus verè bonus, &c. 703.

& id est terra, quasi dicas sine terra, sine terrenis affectibus. Hic proprius veræ sanctitatis effectus & character: Vnde sanctus Dionysius vocat eam *omni ex parte immaculatam puritatem*. Aliud vero vocabulum est ἁγιότης seu *isiorus*, quo dum sanctus Chrysostomus vtitur, intelligit semper ab omni scelere & labe immunem puritatem; Vnde & sanctus Iacobus veram religionem vocat *mundam & immaculatam apud Deum*; Quia eius præcipua pars est, vt ait, *Immaculatum se custodire ab hoc sæculo*. *SALVVM me fac Domine, quoniam defecit sanctus; quoniam diminutæ sunt veritates*. Sic nempe deficit Sanctus dum deficit Veritas seu vera Sanctitas quæ ab hominibus diminuitur, detruncatur, peruertitur, & deprauatur.

## II. PUNCTVM.

**A**T vera hæc bonitas & sanctitas est Spiritus sanctus. Non modo in se vt est Increata Bonitas & Sanctitas cum duabus aliis Diuinis personis, sed in nobis dicitur vera sanctitas; Primo quatenus verè sanctificat animam nostram suâ præsentia, suâ gratiâ, cæterisque donis supernaturalibus illi adjunctis, quæ nos à terrenis ad cœlestia transferunt. Deinde quatenus operatur in nobis, & nos in Eo quidquid sanctum & bonum est, per triplicem viam perfectionis, purgando nos ab omni labe peccati; tum illuminando ad eas virtutes cognoscendas & exercendas quæ sunt nostro conformes statui. Denique prouehendo ad sublimem quandam vnionem cum Deo, in qua constituti crescamus quotidie tum multitudine tum perfectione nobilissimorum Caritatis actuum; vt patet in illis primis Christianis qui sancto feruentes Spiritu sua omnia proiecebant ad pedes Apostolorum, vno contenti Deo, quos inter iam à prima conuersionis die singulariter eminebat Beatus Barnabas, de quo hæc sunt insigniter scripta in Actis Apostolorum: *Ioseph autem qui cognominatus est Barnabas ab Apostolis, quod est interpretatum, filius consolationis, Leuitæ Cyprius genere, cum haberet agrum, vendidit eum, & attulit pretium, & posuit ante pedes Apostolorum*.

Sic nempe Spiritus Veritatis quem mundus non potest accipere, mundana & terrena omnia consulebat abjicienda, vt toti Spirituales & Cœlestes euaderent, qui à terrenis affectibus emerisissent. Ad



pedes vero Apostolorum non in manus, pecuniam & sua quæque afferebant, tum quod indigna illa reputarent quæ illorum manibus contractarentur, tum quod, vt ait sanctus Chrysostomus, maioris ducebant Christiani quod ab Apostolis dona reciperentur, quàm quod darentur. Hoc est enim potissimum contemnere opes, hoc est pascere esurientem Christum, si absque arrogantia & fastu id facias, sicque des aliis quasi tibi ipsi plura dari quam dare beneficia videaris.

O excellentem illorum hominum sanctitatem! ô singulare Spiritus sancti Donum quo vno reliqua continentur, quando sic affecta est anima vt postquam sua omnia externa & interna dederit, plus se recepisse ab eo qui accepit sua, quàm se dedisse sentiat!

### III. P V N C T V M.

**T**ANTO igitur unusquisque est magis aut minus verè bonus & sanctus quanto magis minusue participat de illo Spiritu sancto à quo est talis bonitas & sanctitas que est immaculata puritas & vera sanctitas. *AVFERES spiritum eorum & deficient, & in pulverem suum reuertentur. Emitteres spiritum tuum & creabuntur, & renouabis faciem terræ.* Prius auferendus noster Spiritus, tum deinde datur Diuinus. Quantum aufertur de nostro, tantum datur de Diuino. Si toti nostro exinanimur, toti Diuino replemur, O qualis mutatio, ô qualis Spirituum diuersitas, humani & Diuini! Et tamen formidamus dare nostrum, vix mediam eius concedimus partem, vix vltro etiam gratis oblatum Spiritum illum sanctum recipimus aut retinemus: priusquam enim de nostro possimus aliquid, sese Ipse offert, sese insinuat, Ipse nos excitat, ipse pro nobis postulat, id est, postulare facit, & postulantibus sese amplius atque amplius in dies communicat.

*Rom. 8.*

*Luc. 11.*

*Quis ex vobis, inquit Dominus, patrem petit panem, numquid lapidem dabit illi? Aut piscem: numquid pro pisce serpentem dabit illi? Aut se petierit ouem, numquid porriget illi scorpionem? Si ergo vos cum sitis mali, nostris bona data dare filiis vestris, quanto magis Pater vester de cælo dabit Spiritum bonum petentibus se. Vbi apte Beda: bonum dicit ex quo omnia bona: & hoc vnum præcipue petendum manet quia in eo vno cetera continentur. Vide supra Sabbato ante Pentecosten, quomodo sanctus Spiritus sit orandus.*

DE



*Mendaces filij hominum in stateris, si res non pendunt, &c. 705*



DE BEATO ALOYSIO  
GONZAGA SOCIETATIS IESV.

Die 21. Jan.  
nij.

*Consummatus in breui expleuit tempora multa.*  
Sap. 4.

VERITAS PRACTICA.

Mendaces filij hominum in stateris, si res non pendunt cœli pretio.

RATIO EST, Quia hoc est homines esse mendaces in stateris, si res aliter aestiment quam reuera valeant.

Sed si res non pendant cœli pretio, res aliter estimabunt quàm reipsa valeant.

Ergo & erunt mendaces in stateris. Quod quàm sit damnosum patet. Quàm sit vero cauendum & qua industria, discas ex Beato Illo, cuius est hodierna memoria apud Patres Societatis IESV.

I. P V N C T V M.



ALOYSIVS Gonzaga Marchio Castillionensis ex Serenissima Mantuanorum familia, cum ageret annum decimum octauum admissus est in Societatem IESV, in qua tantum vixit per quinque annos; sed tanta cum perfectione vt vere de eo dici possit quod Sapiens de Henoch refert, *Consummatus in breui, expleuit tempora multa.* Id est; in illo breui spatio quinquennij, tantum sibi meritorum cumulum & thesaurum comparauit, quantum si alius non ita studiosus perfectionis sibi collegisset per multas annorum decades. Hoc autem inter alia pietatis colenda monumenta quæ de illo sane multa extant, nar-



ratur solemne Ipse fuisse dicere, quoties de rebus humanis cogitaret, audiret, aut usurparet aliquid; *Quid hoc ad vitam aeternam?* Quasi diceret, non aliter mihi res ista est aestimanda & usurpanda quam prout reuera valet; neque aliud plane valet quam prout me ex Diuina ordinatione iuuat ad finem meum qui est honor Dei cum vita aeterna, consequendum. Cui quidem dicto cum interiore conformaret animum ad singula quaeque obuersantia vel abstinendo, vel sustinendo, mirum quantum in religiosae perfectionis studio illis quibus vixit annis profecerit, quippe qui hac solerti arte & continua Praxi nihil inane faceret, nihil non meritorium, nihil non actu & re ipsa intentum ac directum ad Beatum & aeternum illum finem cui possidendo creati sumus.

Ps. 61.

Quod & nos cum Diuina Gratia ut fructuosius imitemur, proposita est Veritas, quae non modo sanctae huius Praxis utilitatem, verum & necessitatem quandam ostendat, cum alioquin nisi qua hic Beatus statera res humanas ponderabat, ponderemus, simus *illi mendaces filij hominum in stateris*, de quibus Psalter Regius. Quis hoc autem de se vere dici patiatur? At profecto id tam vere dici poterit, quam certum est ex vulgato Scripturae stylo & sensu, *Esse mendacem in stateris*, nihil aliud esse quam inique & injuste de rebus iudicare, seu pluris aut minoris eas facere & praedicare quam valeant. Sicut enim qui priuato & injusto pondere, Id est, grauiori vel leuiori quam leges ferant, res vendibiles ponderaret, mendax in stateris diceretur, quod grauius in lege cauebatur; sic qui maioris aut minoris res externas hominum & internas aestimat; qui honorem scilicet, diuitias, foelicitatem saeculi, popularem auram & similia magno in pretio habeat: paupertatem verò, humilitatem & virtutes mundo despectas despicit; mendax est in statera, id est, in illa aestimatione & iudicio quod de rebus facit. *Nolite facere iniquum aliquid in iudicio, in regula, in pondere, in mensura. Statera iusta, & aqua sint pondera. STATERA dolosa, abominatio est apud Deum, & pondus aequum voluntas eius.*

Ierit. 19.  
Prou. 11.

## II. PUNCTVM.

**S**ED qui res non pendunt caeli pretio & qua statera Beatus hic res humanas ponderabat, aliter eas aestimabunt quam reuera valeant.



Sicut enim res dicuntur pendere & ponderari pretio cœli, quando de his non aliter iudicatur, quam prout valent ad salutem, seu ad promerendam æternam illam beatitudinem quæ in cœlo possidetur: sic aliter pendere & æstimari dicuntur, quando nulla beatæ illius vitæ seu Diuini cultus ratio proponitur, quando ex vulgi sensu, & populari trutina ponderantur, quando ex mundano & corrupto iudicio æstimantur. Tunc autem quis non videat aliter res æstimari quam reuera valeant? Quid enim res omnes valent quàm prout hominem ducunt ad suum finem, cui fruendo conditus ipse est; & alia omnia creata sunt & ordinata vt ipsum iuuent ad illum ipsum finem attingendum?

Sunt hæc enim media vel naturalia vel supernaturalia quæ suam bonitatem à fine suo deriuant, sicut à sanitate medicina quæ est ad illam ordinata. Non ita vero vulgus res æstimat, non ita mundus de his iudicat & contendit. Pauperitatem abhorret vt extremum malum, diuitias autem prosequitur tamquam suum bonum. Et tamen beati dicuntur Pauperes Spiritu, & vā diuitibus intonatur. *Euerterunt scilicet sensum suum & declinauerunt oculos suos vt non viderent cælum, neque recordarentur iudiciorum instorum.* Id est, idcirco peruerse de rebus iudicarunt quia non eas cœli pretio expenderunt, nullam in eis cœli sed terræ tantum & humanæ vitæ rationem induxerunt. Vnde & Sapiens, *oculi stultorum in finibus terræ*, quasi diceret, qui de rebus aliter sentiunt sicut stulti & amentes, idcirco ita sentiunt quia non vltra terrenas & humanas rationes sese euehant. Nihil de cœlo cogitant. *Non est ista sapientia desursum descendens*, inquit sanctus Iacobus, *sed terrena, animalis, diabolica.* Hæc est ratio inferior quæ de rebus secundum carnem & mundum iudicat, cui opposita est illa superior quæ vt ait sanctus Augustinus, *intendit æternis conspiciendis, aut consulendis, & ex ijs accipit regulas agendorum.*

*QUI* vero æterna intueri negligunt, inquit sanctus Gregorius, & appetitui temporalium mentis pusillanimitate incumbunt, tanto ab æternis altius corruunt, quanto bona temporalia esse quasi sola suspiciantur. His instorum simplicitas displicet, & cum occasionem perturbationis inueniunt, suam eos arripere dupliciter suadent, vnde apte quod subditur, *Dixit illi, nempe lobo, uxor sua: adhuc permanes in simplicitate tua? Benedic Deo & morere.* O quale iudicium, quale consilium. Vere quasi vna de stultis mulieribus locuta est, quæ in lo-



quando terram non cœlum respexit ! Quo humano & terreno sensu cum Petrus Dominum esset alloquutus, hoc stupendum accepit responsum : *Vade post me Satana : scandalum es mihi, quia non sapis ea quæ Dei sunt, sed ea quæ hominum.*

## III. P V N C T V M.

**M**ENDACES igitur filij hominum in stateris si res non pendant cœli pretio, & nisi quæ statera Beatus hic vniuersa ponderabat, & ipsi ponderent. Nam pluris humana, & minoris æstimabunt spiritalia quàm valeant ; aliter de vtrisque iudicabunt quam esset iudicandum ex relatione quam habent ad finem cuius sunt media. Quod est esse ita mendacem in stateris quàm qui res venales venderet iniquo pondere. *Pondus & pondus, mensura & mensura, utrumque abominabile est apud Deum.* Vno videlicet & eodem pondere res vniuersæ sunt expendendæ prout cœlo valent, & colendo Deo rerum omnium Conditori. *Omnis æstimationis siculo sanctuarij ponderabitur*, Id est, quantum ipse Deus rem æstimat, & æstimari à nobis imperat. Atque hinc mendaces & mendacia dicuntur quæcumque huic Diuinæ & soli veræ non respondent æstimationi. *Ephraim, pascit ventum, & sequitur æstum : tota die mendacium & vastitatem multiplicat.* Notanda hæc valde verba, quasi Propheta diceret, tot mendacia multiplicat quot habet falsa de rebus iudicia & quot profert verba his iudiciis conformia. Quid diceret de homine ita mendaci ut quot verba tot proferret mendacia ? Quid vero dices de te nisi hac vtaris statera, qui quot sensus quot iudicia & verba de rebus humanis profers, tot mendacia, tot vanitates, tot insanias falsas multiplices & vastitatem, id est, ad tuam ipsius perniciem.

O quam opportunè Sapiens : *Cogitationes Iustorum Iudicia* ; Nempe, non ex leui naturæ ductu & impetu de rebus cogitant sed maturo cum consilio, cum reflexione ad finem æternum, & ad Diuina Iudicia : quæ propterea etiam dicuntur pondus & statera, quia sunt forma quadam & mensura Iudicij quod de rebus conformiter nos habere par est nisi malimus decipi. *Iustum iudicium indica, vel certe iusto iudicio iudicaberis.* Quid tibi autem morituro & iudicando ille honor, illa pecunia ? *Non proderunt diuitie in die ultionis : Iustitia autem liberabit à morte.*



*Sicut prima & puerilis ætas index est secuturæ vitæ, &c. 709*

O si tibi hæc saperent si hæc in corde essent frequentius & in ore, quàm *multa redimeres modico pretio!* Hæc est eminens scientia IESV Christi propter quam Apostolus existimabat omnia detrimentum esse de qua in 2. parte, Feria 3. Pentecostes, Vbi hæc Veritas statuitur: *Ecclesi. 20.  
Phil. 3.*

Qui eminentior est in hac eminenti scientia, minùs inter homines eminere cupit.



# IN NATIVITATE

## S. IOANNIS BAPTISTÆ.

*Die 24. Iulij.*

*Quis putas Puer iste erit? Luc. 1.*

### VERITAS PRACTICA.

Sicut prima & puerilis ætas index est secuturæ vitæ præsentis, Ita hæc vita præsens indicium est futuræ post æternitatis.

*RATIO EST, Quia idcirco prima & puerilis ætas index est secuturæ vitæ præsentis, quòd talem cum ea connexionem habeat, ut ab una facile ad aliam capiantur indicia.*

*Sed non minor est ad hunc eundem finem connexio huius vitæ cum futura & æterna.*

*Ergo non minus inde possunt capi indicia; Ac proinde sicut pueritia sequentis est index ætatis, ita & hæc præsens vita, futuræ est indicium æternitatis. Quod certe est valde observandum.*



## I. PUNCTVM.



**ADMIRANDA** prorsus omnia quæ in Sancti Ioannis Conceptione & Natiuitate contigerunt. Annuntiatur ab Angelo; Concepitur à sterili matre; Sanctificatur ex ipso matris vltro; Iam inde agnoscit Redemptorem in aluo Sanctissimæ Virginis adhuc existentem, & exultat præ gaudio: Nascens Patri loquelam perditam reddit; Matri Prophetiam impetit. Nomen à cælo datum accipit. Quid plura? Dum circumdicitur & vagit infans in cunis, tam multa supra infantilem ætatem edit pietatis & virtutis signa vt omnes noti & vicini hæc spectantes & audientes, inter se mutuo quærent, *Quis putas Puer iste erit? Etenim manus Domini erat cum illo*, inquit Euangelista, Quasi diceret, in illo Infante Dominus ostendebat quadam potentie suæ miracula quæ portendebant aliquid grande futurum. Nec vana certe fuerunt portenta & signa, nam *Ille est Propheta & plus quam Propheta*, inquit ipse Christus Dominus, *de quo est scriptum, Ecce ego mitto Angelum meum ante faciem tuam qui preparabit viam tuam ante te. AMEN dico vobis non surrexit inter natos mulierum maior Ioanne Baptista.* Nemo melius nouit quis sit magnus quàm Christus qui est ipsa quadam mensura Sanctorum magnitudinis: ac proinde Illius erat nobis enuntiare quam magnus esset Ioannes.

Matth. II.

Quibus tantisper consideratis, redi ad Puerum, venerare Eius sanctitatem, & sanctitatis signa mirare, quibus vt ait sanctus Ambrosius, *Futura vite insigne præmittitur, & gratia sequutura virtutis signatur.* Tum verò, vt inde fructus solidior excerpatur: Contemplare Veritatem propositam: Atque illud imprimis quid sit cur ab Infantia, conjectura capiatur in sequentem ætatem? Nempe quia talis est connexio primæ & consequentis ætatis, vt ex illa facile colligatur quid sit deinceps futurum. Sic Sapiens; *Ex studiis suis*, inquit, *intelligitur Puer*, Cum enim solo naturæ ductu agatur, natura se statim prodit & quo propendat certis indicibus aperit; vbi vero tantillum Puer naturali assueuerit propensione, tum roboratur in dies, & ex libidine fit consuetudo, atque ex consuetudine quadam velut necessitas. Hinc illud inter om-

Pr. 20.



*Sicut prima & puerilis aetas index est secutura vitæ, &c.* 711

nia Prouerbia : Prouerbiū est, inquit Sapiens, *Adolescens iuxta viam suam ambulans, etiam cum senuerit non recedet ab ea.* Et apud Iobum : *ossa eius implebuntur vitiis adolescentia eius, & cum eo in puluere dormient :* Quia videlicet, vt ait sanctus Hieronymus, *difficulter eraditur quod rudes animi perhiberunt. Lanarum conchyliis quis in pristinum candorem renocet? Recens testa diu & saporem retinet & odorem quo primum imbuta est.* Ibid. 22.  
Iob. 20.  
Ep. ad Gaudent.

Vnde sanctus Gregorius Nazianzenus cū Iulianum illum Apostatam adhuc Athenis Iuuenem nossēt, non dubitauit augurari ex eius iuuenilibus vitiis quā vitiosus in omnem ætatem futurus esset. Quod & de pluribus Sanctis memoratur quos præueniens Gratia iam inde à pueris efformabat ad virtutem : & fundamenta quædam ponebat quæ essent indicia futuri ædificij.

O beatus ille quem sic præuenierit Dominus in benedictionibus dulcedinis suæ !

## II. P V N C T V M.

**S**ED non est minor ad hunc finem connexio huius vitæ præsentis cum futura & æterna.

Nam ex vitæ præsentis sic futura dependet vt qualis quisque hīc vixerit seu bene seu male, talem omnino sortiatur exitum & sortem foelicem aut infœlicem in omnem æternitatem. *Nolite errare,* inquit Apostolus, *Deus non irridetur, quæ seminauerit homo, hæc & metet ; quoniam qui seminat in carne sua, de carne & metet corruptionem ; qui autem seminat in spiritu, de spiritu metet vitam æternam. Bonum autem facientes non deficiamus, tempore enim suo metemus non deficientes.* Nihil poterat dici expressius, sicut enim tam manifesta est connexio inter sementem & messem, vt nemini dubium sit quin aliud nihil metatur quam quod est seminatum ; sic ne dubites, inquit Apostolus, quin similis & prope par connexio reperiat in hac & altera vitæ. In hac enim seminatur, & quod seminaueris, metitur in altera. Si secundum carnem vixeris, vitæ tuæ messis inter Zizaniorum fasciculos in æterno igne parata est. Quod si Spiritu viuas & ambulas, tibi tua messis seruetur in coelestibus illis horreis vbi triticum suum Deus seruat. Gal. 6.  
Matth. 13.

Sic sanctus noster Ioannes Pharizæis illis qui ad se ventitabant,



16. 3.

prædicebat: *Progenies viperarum quis demonstrauit vobis fugere à ventura ira?* Et post quædam de Christo iam iam venturo, Cuius, inquit, *ventilabrum in manu sua, & permundabit aream suam, & congregabit triticum suum in horreum, paleas autem comburet igni inextinguibili;* Quasi diceret, sicut video vos modo tamquam inanes paleas sine vlllo fructu, ita mihi vos videre videor in illo igne vbi homines suæ infructuosæ vitæ pœnas daturi comburentur.

Matth. 7.

At dices, id quidem certum & ratum de his qui suo in peccato moriuntur: sed non omnes qui in eo viuunt, in eo mori: nec proinde tantam esse connexionem huius vitæ cum altera, quanta est primæ & tenerioris ætatis cum adulta & virili. Respondetur, non omnes quidem in peccato mori, sed maiorem partem, & eam certe totam quæ in lata & spatiosa vita incedit & ambulat, quæ idcirco via perditionis dicitur, & spatiosa quod multi per eam ambulent & pereant. Sicut autem de Adolescente audiisti quod iuxta viam suam ambulans non recedet ab ea, sic de Viro ambulante in lata via: vix vnquam inde recedet & in ea peribit. Quid est enim ambulare per illam viam aut ab illa recedere? Nonne hoc vnum est, quod tam sæpe audiisti, secundum concupiscentias viuere, aut eas omnino coercere velle? Iam vero quotus ex his qui cupiditate pecuniæ vel honoris aut voluptatis tenetur, ab ea sese coerceat? Licet aliquoties aut sapius peccatum confiteatur, appareatne propterea cupiditatem deponi? Putasne vero peccatum dimitti non deposita ex animo cupiditate? Quod perinde est ac si quærerem, putaresne peccatum dimitti non contrito vel non attrito? Quid respondes? An ignoras, sine dolore animi nullam esse Confessionem? Et vero quis esse potest dolor peccati, retenta cupiditate rei quæ fuit causa peccati? Nullus plane, nullus talis peccati dolor, nulla neque vel attritio; vel Contritio: nulla Confessio; ac proinde quid sequitur nisi mors in peccato quæ est illa vitæ lata perditio?

Iban. 8.

Nonne hoc ipsum est quod Christus Dominus tam aperte dixit quàm sunt hæ aperta voces; *In peccato vestro moriemini.* Non enim aliis aut alia de causa dixit quàm quod incederent per illam latam viam, & ab ea numquam recederent, quia quam semel mundi cupiditatem altius animis suis imprefferant, numquam exuerent. *Aut mutare posset Aethiops pellem suam, & Pardus varietates*



*Sicut prima & puerilis ætas index est secutura vitæ, &c. 713*

tates suas, si possent illi vere conueniri & resipiscere. Possent quidem cum Gratia, si volent: sed non volent, neque reuertentur; tanta est prauæ cupiditatis improbitas, sicque frequentius videas ex malo puero virum bonum, quam ex malo viro, senem sanctum & in arcta via positum, quæ sola est salutis via.

*Quorundam hominum, inquit Apostolus, peccata manifesta sunt, r. Tim. 3. præcedentia ad iudicium: Id est, antequam indicentur ab hominibus aut à Deo, patet illos iudicandos, patet illos à peccatis non recessuros, atque in ipsis tandem morituros. Neque illos paucos esse homines, sed multos, inquit cum lachrymīs; Multi ambul- Phil. 3. lant, quod sæpe dicebam vobis, nunc autem & flens dico, inimicos crucis Christi, quorum finis interitus. Audisne finem eorum fore interitum? Vnde vero id audet affirmare, nisi propter connexionem huius & alterius vitæ quæ talis est vt qui sic inimicus crucis Christi fuerit, male pereat in æternum? O æternum male quod à momento pendet huius vitæ!*

### III. P V N C T V M.

**S**ICVT ergo prima & puerilis ætas index est secutura vitæ præsen-  
tis, Ita hæc vitæ præsens indicium est futuræ post æternitatis; Pro-  
pter eandem scilicet antecedentium & consequentium conne-  
xionem quæ utrobique pariter reperitur, & quæ fit vt non temere  
sed rationabiliter indicetur vnum ex alio. Ego scio contentionem  
tuam, & cervicem durissimam. Adhuc viuentem me & ingrediente vo-  
biscum, semper contentiosè egistis contra Dominum, quanto magis cum  
mortuus fuero? Noui quod post mortem meam iniquè ageris, & decli-  
nabitis citò de via quam præcepi vobis, & occurrent vobis mala in ex-  
tremo tempore quando feceritis malum in conspectu Domini. Sic Mo-  
ses suis, non spiritu tantum Prophetico, sed ratione probe sub-  
ducta, quod scilicet natura sua essent contentiosi, neque naturæ  
domandæ studuissent, ac proinde consequenter euenturum affir-  
mat, vt cum ab eis discesserit, in pejus ruant & tandem intereant.  
Quod & reuera contigit; atque idem prorsus eos omnes manet  
euentus qui dum viuunt non ita sibi temperant, vt cum moriuntur,  
intemperantis ipsos vitæ poeniteat. Tempore quo fuerint dissipati, 1ob. 6.  
peribunt. Inuolute sunt semite gressuum eorum, ambulabunt in vacuum  
& peribunt. Nonne quor verba, tot fulmina?



Neque tu iustes contra, hoc esse de aliis iudicare, quod est à Christo vetitum, & hoc esse eos in desperationem agere, quod est omnino nefas. Non enim ex nobis ipsis iudicium ferimus, Ipse est Christus Dominus, Ipse omnium Index, qui post allatum eorum exemplum qui repentino casu perierunt, semel ac iterum, nisi poenitentiam, inquit, egeritis, omnes similiter peribitis. Quod autem illi poenitentiam vix agerent qui suis essent addicti cupiditatibus, nonne euidenter indicauit cum dixit, *facilius esse camelum per foramen acus transire, quam diuitem intrare in regnum caelorum?* Vnde enim tanta difficultas nisi à defectu poenitentiae? Et vnde talis defectus nisi à praua cupiditate quae ita diuitum animos occupat vt nullum poenitentiae locum relinquat? Quod & Apostolus manifeste declarauit: *Nam qui volunt, inquit, diuites fieri, incidunt in tentationem & in laqueum Diaboli, & desideria multa inutilia & nocua quae mergunt homines in interitum & perditionem. Radix enim omnium malorum est cupiditas.* Credisne his Christi Domini & sancti Apostoli verbis? Potestne vero his credere & non iudicare eos perituros quos ipsi iudicant & condemnant? Ne propterea verò desperent quamdiu viuunt, si velint respiscere; At nisi respiscant, desperent certe, sed neque Christus, neque Apostolus, neque nos, in desperationem eos adigimus, ipsi se potius praecipites agunt cum redire nolunt, nec opportunis vti remediis quae ipsis offeruntur. *Respiscant, inquit, à Diaboli laqueis, à quo captiui tenentur, ad ipsius voluntatem.* Et idcirco indicia illa prolata sunt ante mortem, ne post mortem proferantur, ne in illa incidant iudicandi, dum tempus habent poenitendi. Quod praclare sanctus Bernardus, dum de signis beatae vitae disserit: *Hoc sane verbo, inquit, & electis consolatio ministratur, & subtrahitur reprobis excusatio. Cognitis si quidem signis vitae, quisquis haec negligit, manifestè conuincitur in vano accipere animam suam, & pro nihilo habere terram desiderabilem comprobatur.*

Quod & Dominus Iudaïs exprobrabat qui nossent faciem caeli diiudicare, & ex certo caeli aspectu, quae aëris futura esset temperies possent praedicere; cum tamen ea quae ad salutem suam spectabant, ex signis non minus certis quae ipsis erant objecta, nescirent aut nollent conijcere. *Hypocrite, faciem caeli & terra nostris probare: hoc autem tempus quomodo non probatis? Quid autem & à vobis ipsis non indicatis quod iustum est?* Vide in quarta parte, in

Luc. 13.

Matth. 19.

2. Tim. 6.

2. Tim. 3.

In Off.

Pasch.

Ser. 2.

Luc. 12.



Festo Decollationis sancti Ioannis. Et vide quæ in te sint à tua praua cupiditate signa infausta, vt cum Diuina gratia prospicias, *Vigiles, & omni tempore ores vt dignus habearis fugere ista omnia quæ futura sunt, & stare ante Filium hominis.* *Ibid. 21.*

ALIA VERITAS PRÆCEDENTI  
ADIVNGENDA, VEL SEORSIM CONSIDERANDA  
IN ILLVD ISAIAE:

*Dominus posuit me sicut sagittam electam. Is. 49.*

Sanctus Ioannes Electis est, sicut sagitta electa.

SENSVS EST DVPLEX; Primus ad eos magis spectat qui proficiunt in Spiritu quorum est proprium facile compungi & excitari cum Gratia, maiores ad progressus, ex eorum attenta consideratione quæ ipsis confusionem pariant, & modicam suam virtutem indicent. Talis est autem sancti Ioannis vita tam aspera, tam innocens, tam longè supra humanam emînens, cuius certe consideratio vel hoc vno valde compungat & sagitter eorum animos, qui se non putant plura posse quam faciant, cum tamen ad perfectiora vocentur. Vndenam potui tam multa, tam grandia, tam perfecta? Putasne à meipso? Nonne ex Gratia? Nonne ex vocatione ad talem gratiam talemque sanctitatem? *De plenitudine eius nos omnes accepimus?* NON potest homo accipere quidquam nisi fuerit ei datum de cælo. *Ioan. 7. Ibid. 34.* Tibi ergo cum minime delit ea Gratia quæ augendæ tuæ perfectioni necessaria est, quid est quod ultra non progredieris? Quid quod excusas nimiam difficultatem? Sic Ille hodie & quoties consideratur suo in deserto, neque manducans neque bibens, sic sagittat & compungit electorum mentes, vt hinc valde confundantur & excitentur.

Alter sensus, pro his qui non ita proficiunt aut perfectioni vacant, præsupponit quod monet sanctus Petrus, *Magis satagite vt per bona opera certam vestram vocationem & electionem faciatis; hæc enim facientes non peccabitis aliquando: sic enim abundanter ministrabitur vobis introitus in æternum regnum Domini nostri, & Saluatoris IESU Christi.* Quo præsupposito, sic intelligenda est Veritas vt



qui velint certam suam Electionem facere, considerent Vitam & Verba sancti Ioannis: hinc sagittabuntur, hinc excitabuntur cum Gratia ad illam certam Electionem faciendam. Talis Consideratio Medium est aptissimum ad hunc finem.

RATIO EST, Quia Medium aptissimum ad certam suam Electionem faciendam illud est quod singulariter excitat animum ad refranandam triplicem Concupiscentiam. Sicut enim concupiscentia non refranata radix est omnium peccatorum, & inde consequentis æternæ damnationis causa: sic quando refranatur, securis ad illam radicem ponitur, subtrahuntur peccata & salus comparatur. Nonne hoc est quod supra dicit sanctus Petrus: *Hæc enim facientes non peccabitis & salui eritis?*

Sed Consideratio Vitæ & Verborum sancti Ioannis singulariter excitat animum ad refranandam triplicem concupiscentiam, seu illum appetitus motum qui dicitur *concupiscentia carnis, & concupiscentia oculorum, & superbia vite*. DOMINVS posuit eum sicut sagittam electam, Id est singularem & aptissimam, ad hanc triplicem retundendam ex animo Concupiscentiam. Quod certè patuit in triplici hominum genere qui prædicantem Eum conueniunt, & quo audito compuncti sunt & persuasi vitam in melius commutare. Primo quidem Pharizæi quorum superbiam exagittauit & excussit. Deinde Publicani & milites, qui cum aliena raperent, ab hac praua cupiditate dimoti sunt. Tertio denique meretrices, Eo audito, impuræ voluptati renuntiarunt. Quod enim omnes audiebant contra has concupiscentias à sancto illo Viro pronuntiatum, in Eo ipso videbant impletum & cumulate perfectum. Videbant vitam voci conformem; videbant paupertatem oppositam suis rapinis: videbant humilitatem cuius ambitioni repugnantem: videbant asperitatem longe à voluptate abhorrentem. Vox erat clamans, ipsa eius vita, ipse habitus, ipse potus & esus, ipse is totus corpore & animo quantus quantus erat, Vox erat clamans; *qui habet duas tunicas det non habenti, & qui habet escam similiter faciat*. CONTENTI estote stipendiis vestris, Id est, nihil aliud concupiscite: *Securis ad radicem*. OMNIS arbor non faciens fructum bonum, excidetur.

Hæc erat sagitta salutis Domini, sagitta electa & acuta qua illi transfixi sunt de quibus dicitur, *quod baptisati ab eo confiterentur peccata sua*, detestarentur pristinam vitam, & ad ipsam vitiorum

Joan. 2.

Luc. 3.

Matth. 3.

Luc. 3.

Joan. 5.



radicem penetrantes, sic cupiditati iam repugnabant, ut quicumque ab Illo crimina, probra & maledicta in se intorqueri audirent, audirent sine murmure; peterentque omnes paribus animis quid sibi faciendum deinceps esset ad salutem.

O certe aureum & opportunum Petri Chrysologi dictum: *Ioannes virtutum schola, magisterium vite, sanctitatis forma, norma* Ser. 127.  
*Iustitie*: Vnde apparet luculente Veritas quo sensu est proposita ut qui velint Electionem suam certam facere, considerent vitam & verba sancti Ioannis, quibus tamquam sagitta compungentur, 11. Conf. 94  
& inhorrescent & inardescant ad melius, ut de se fatebatur sanctus Augustinus. Vide in Eius die Festo. Vide etiam attentius quomodo Christus Dominus Prædicationem illam Ioannis vocet *consilium Dei* Luc. 7. quod quia non sunt sequuti, dicuntur *sprensisse illud in semetipsos*, Id est, in suam perniciem & reprobationem, quasi diceret; quod erat eis medium à Deo constitutum ut suam certam electionem facerent, versum est ipsis retrò in occasionem ruinæ & perditionis. Quod quidem illis postea grauius & apertius declarauit cum diceret, *Venit ad vos Ioannes in via Iustitie, & non credidistis ei: Publicani autem & meretrices crediderunt ei: vos autem videntes nec poenitentiam habuistis postea, ut crederitis ei.* Matth. 23. Crediderant ex Pharizæis nonnulli, sed vel plures alij non crediderunt, vel illi ipsi qui crediderant exciderunt à fide, & *ad horam tantum exultarunt in luce eius*, ut iam illis dixerat Dominus. O quàm verendum ne hic totus sistat diei fructus, exultare ad horam! ô quàm timendum, ne & ipsa diei exultatio sit potius humana vel etiam sensualis, quam Diuina vel Spiritualis! *Exulta cum tremore.* Ps. 2.

Quæ plura de Magnitudine sancti Ioannis dici possent, peti debent ex hoc triplici capite. Primum est, ex persona Christi affirmantis inter natos mulierum non Illo esse maiorem. Secundum est, ex Ipsius officio quod est esse Testem Christi, & quod est esse Talem Sanctitate ut iure merito illi credatur testimonium de Christo ferenti. Tertium ex ipsius sancti Ioannis Humilitate quæ summa fuit & cui semper ex æquo respondet Sanctitatis magnitudo. Vide autem in 1. parte, Dominica 2. & 3. Aduentus. In 2. Die 2. Aprilis. In 4. Feria 3. Hebdom. 16.





Die 29. Iunij.

II N F E S T O S S.  
A P O S T O L O R V M  
P E T R I E T P A V L I.

*Constitues eos Principes super omnem terram. Pl. 44.*

VERITAS PRACTICA.

Sicut fide, sic moribus, veri probantur subditi tantorum Principum.

*RATIO EST, Quia veri subditi tantorum Principum idcirco fide probantur, quod hi duo præ ceteris Apostoli fuerint constituti Principes, ut nos docerent veram fidem quam qui non tenent non se illis vere subdunt.*

*Sed ita etiam sunt constituti Principes ut nos docerent Christianos mores, quos æque seruaremus ac fidem.*

*Ergo sicut fide, sic moribus veri probantur subditi tantorum Principum: Vnde apparet quanta sit necessitas operum ac morum fidei Christianæ conformium, cum alioquin nostros non cognoscamus Principes, qui sunt constituti super omnem terram, ut omnis terra subdatur eis, aut per illos Christo Domino, cui non aliter seruitur quam intellectu & voluntate, seu fide ac moribus.*



I. P V N C T V M.



V A M vere illi Duo inter alios Apostolos constituti sint Principes super omnem terram, patet ex eminenti eorum dignitate & potestate qua singulariter à Christo Domino donati sunt. Et quidem Potestas sancti Petri & eius successorum Pontificum quæ dicitur Potestas Clauium tres habet eminentiæ gradus supra quosuis alios Sacerdotes & Pontifices. Primus, quia est vniuersalis & absoluta de remittendis omnibus omnino peccatis, Censuris & quibuscumque vinculis dissoluendis quæ animam ligare possent & à Coeli introitu retardare: sic enim illi dictum & successoribus, *Tibi dabo claues regni cælorum, & quodcumque ligaueris super terram, erit ligatum & in cælis; & quodcumque solueris super terram, erit solutum & in cælis.* Quæ Potestas aliis Pontificibus est limitata. Secundus gradus est, quod hæc Potestas in omnes omnino personas extenditur, nullo Iuris ipsius sicut in aliis, definito termino: *Pasce, inquit, agnos meos, Pasce oues meas; Pasce paruos & magnos: filios & Patres; subditos & Dominos; omnes denique peccatores saluandos.* Tertius est quod hæc potestas est ita perpetua & indeficiens vt portæ inferi non sint præualituræ aduersus eam, sicut præualuerunt aduersus alias aliorum Pontificum sedes quæ ab hæreticis aut Schismaticis fuerunt occupatæ.

O Beate Cæli Ianitor, inquit sanctus Hilarius, cuius arbitrio clauis æterni aditus traduntur, cuius terrestris iudicium præiudicata auctoritas sit in cælo: vt quæ in terris aut ligata sint aut soluta, statuti eiusdem condicionem obtineant & in cælo.

Sic ille Primus omnium & Iudæos & Gentiles conuertit, atque à peccatis absoluit vt est in actis Apostolorum.

P O T E S T A S vero sancti Pauli quæ dicitur Scientiæ ad conuertendos homines in tribus etiam excelluit præ cæteris. Primo quidem quia Christum & eius vitæ mortisque mysteria singulari concepit intelligentia & concipienda proposuit, *Cuius factus sum, inquit, minister secundum donum gratiæ Dei quæ data est mihi, secundum operationem eius. Mihi omnium sanctorum minimo data est Gratiæ hæc in Gentibus, Euangelizare inuestigabiles Diuitias Christi, &*



*illuminare omnes. Secundum quo praeclit eius scientia est, ut vix vlla gens fuerit quam non per se suasue epistolas erudierit, in-*  
*formarit & permouerit ad Christi cultum. Vt aliquem, inquit, fru-*  
*etum habeam in vobis sicut & in ceteris gentibus, Gracis ac Barbaris,*  
*sapientibus & insipientibus debitor sum: ita (quod in me) promptum*  
*est, & vobis qui Roma estis Euangelizare.*

Rom. I.

1. Cor. 15.

Act. 9.

Ecclesi. 43.

Tertium denique quod Ipsemet praedicando peragravit plures orbis partes vbi abundantius omnibus cum Diuina Gratia se laborasse scribit, & reipsa ostendit quam vere esset Domino, *Vas electionis ut portaret nomen eius coram gentibus, & Regibus & filiis Israel.* Vnde & de Illo tam apte praedicari potest quam quod de sole dicitur: *Vas admirabile, opus Excelsi: magnus Dominus qui fecit illum: & in sermonibus Illius festinavit iter.*

Exodi 6.

Gen. I.

S. Leo

Serm. I. de

Apost.

3. Reg. 7.

Zacch. 4.

Ecclesi. 49

O vere digni Principes constituti à Domino super omnem terram. Iste est Aaron & Moyses quibus praecepit Dominus ut educerent filios Israel de terra Aegypti per turmas suas. Haec sunt duo luminaria magna quae creauit Deus super terram, vnum ut praesset diei, & alterum ut praesset nocti. Hi sunt duo Cherubini super Arcam vbi Diuinum oraculum statutum est & sedes Domini. Hi sunt duo Corporis cui caput est Christus, quasi geminum constituti lumen oculorum. Haec sunt duae singulares columnae aerea suis propriis designate nominibus. Haec sunt duae olivae istae ad dexteram candelabri & ad sinistram eius. Isti sunt duo filij olei qui assistunt dominatori vniuersae terrae. QVOMODO amplificemus Zorababel? Nam & ipse quasi signum in dextera manu: & IESVM filium Iosedec, qui in diebus suis adificauerunt domum, & exaltauerunt templum sanctum Domini, paratum in gloriam sempiternam.

Multi sunt in Scripturis similes typi & figurae quibus adumbrati sunt hi duo Primarij Ecclesiae Viri ac Principes, & quibus recolendis ita potes immorari, ut quae sunt tamen aedificationis tuae vel proximi, non omittas reuoluere. Quod certe Christo Domino, atque ipsis Apostolis non minus erit gloriosum, quam si eorum memoriam cogitando vel dicendo celebriorem feceris. Quid enim magni confert quod nostri sint Principes si non sumus eorum subditi? Aut quomodo sumus eorum subditi, si non illis vltro nos subdimus in quibus nostri sunt Principes? Neque enim Dignitate tantum sunt principes ut colantur, sed autoritate & potentia ut nobis imperent quae sunt Christi & salutis, nosque ipsis obsequamur.

Nam



*Sicut fide, sic moribus, veri probantur subditi tantorum, &c. 721*

Nam arma militia nostra, inquit Vnus eorum pro utroque, *non carnalia sunt, sed Potentia Deo, ad destructionem munitiorum, consilia destruentes, & omnem altitudinem extollentem se aduersus scientiam Dei, & in captiuitatem redigentes omnem intellectum in obsequium Christi, & in promptu habentes vlciſci omnem inobedientiam.* Quasi diceret; noster Principatus seu nostra potestas non est similis Potestati terrenorum Principum, qui ferro armati, & robore militum cincti, suos sibi subditos in officio continent; Sed arma quibus utimur, ipsa est virtus & Potentia Dei quam nobis scilicet dedit Deus ad proponenda & persuadenda mysteria fidei & precepta morum quibus Christo seruitur. Quæ quidem potentia & auctoritas talis est ut si nobis non creditur nec obtemperatur, tam parata sit Inobedientibus ultio quam si Deo ipsi non paruissent. Quamobrem attendendum quid nobis imperent, & an imperatis fideliter obsequamur.

Et quidem quod spectat ad Intellectum seu fidem Catholicam nemo dubitat eam esse tenendam integerrime quam illi docuerunt: sed de voluntate & moribus quod scriptis reliquerunt suis, non ita forte persuasum habes æque illis esse obtemperandum. In quo certe tantum erras quantum si illos omnino tuos non agnosceres Principes. Neque enim omnino tuos agnoscis nisi te illis omnino subdas: nec te illis omnino subdes nisi Intellectu & Voluntate, nisi Fide & Moribus, utroque simul indiuisim; *Sicut fide sic moribus veri probantur subditi tantorum Principum.* Cur enim vno te illi subdas & non altero, cum sit par utrobique ratio? Dic aperte quod palam profiteris, Cur non auderes discedere ab illa integra fide quam docuerunt hi nostri Principes, quamque Romana tenet Ecclesia, nisi quia nobis à Christo tales constituti sunt ut quod de fide docuerunt, tam fixum firmumque sit nullo umquam ut tempore possit deficere; atque id modo tam verè certoque vigeat, quam si modo ab ipsis traderetur. *Ego rogaui pro te Petre, aiebat illi Dominus, ut non deficiat fides tua: hoc Ego singulare Priuilegium tibi concessum volui, ut non modo Tu fide non deficias, quod est commune aliis Apostolis, sed nec illa tua fides quam in Romana docebis Cathedra numquam deficiat, quod tibi est singulare & proprium.*

Sic sanctus Bernardus ad Innocentium; *Oportet, inquit, ad vestrum referri Apostolatum pericula quaque & scandata regni Dei, &*



722 Die 29. Iunij. In Festo Sanctorum Apostolorum Petri & Pauli.

praesertim quae de fide contingunt. Dignum namque arbitror ibi potissimum refarciri damna fidei, ubi non possit fides sentire defectum. Cui enim alteri sedi dictum est aliquando, Ego pro te rogavi, ut non deficiat fides tua? Vnde & Diuus Hieronymus ad Damasum, Obsecro, inquit, ut mihi literis tuis, siue tacendarum, siue dicendarum trium hypostasicon detur authoritas; non timebotres hypostases dicere, si iubetis.

l. 3. Apo-  
log. contra  
Rufin.

Itemque de sancto Paulo contra Rufinum: Scito Romanam fidem Apostolica voce laudatam eiusmodi praestigias non recipere, etiamsi Angelus aliter annuntiet quam semel praedicatum est, Pauli auctoritate munitam non posse mutari.

Rom. I.

Atque idcirco hic Idem Apostolus ad Romanos scribens, antequam eò deuenisset, congaudet illis quod fides eorum annuntietur in uniuerso mundo; sibi que ipse gratulatur quod eam ipsam fidem sit edoctus nec aliam profiteatur quam quae illis est tradita, quasi diceret, quod & Galatis scripsit: Ego ipse cum Petro contuli quod à Christo didici, ne in vacuum currerem; ne suspectus aliis essem, si cum Illo non conuenissem cuius indubitata fides erat.

Gal. I. & 2.

1. Pet. I.

O verè firmam Petram super quam aedificata est Ecclesia, & contra quam portae Inferi nil praualebunt. Nonne ita credis? Non quia praecise Petrus dixit aut Paulus, sed quia quod dixit Petrus & Paulus, hoc Christus dixit, hoc Deus reuelauit, Non enim doctas fabulas secuti notam fecimus vobis Domini nostri IESU Christi virtutem & praesentiam: sed speculatores facti illius magnitudinis. Sic illi passim quod à Deo acceperunt, se nobis tradere profitentur.

## II. PUNCTVM.

**S**ED Illi ipsi Duo Principes sic à Christo Domino sunt constituti, ut nos docerent Christianos mores quos aequè seruaremus ac fidem.

Tria hinc dicuntur. Primum illis ipsis non minus esse ordinatum à Christo Domino ut nos docerent mores quam fidem. Nam cum certum sit sola fide sine bonis moribus neque Christum coli, nec Christianum saluari posse: certe oportebat illos qui praecipue constituti erant ut Christi cultum & Christi Cultorum salutem praedicarent, de bonis moribus edocendis praceptum accepisse:

Matth. 28.

Euntes, inquit, docete omnes gentes, docentes eos seruare omnia quaecumque mandauimus vobis.

Secundum est, quod in illis docendis moribus & praceptis non



*Sicut fide, sic moribus, veri probantur subditi tantorum, &c. 723*

minus sint infallibiles nec minoris authoritatis & potestatis quàm in docenda fide. Cum enim eandem à Christo habeant auctoritatem ad vnum æque ac aliud : quid est quod in fide tradenda essent infallibiles, & non in moribus ? Nonne æque ad omnia quæ docebunt, illis est dictum : *Qui vos audit, me audit ; qui vos spernit, me spernit?* Luc. 10.

Atque hinc tertium est, quòd non minus obseruanda nobis sunt eorum præcepta moralia, quàm quos vocamus fidei Christianæ articulos, cum non minus illa nobis præcipiant, neque minus significant esse ad salutem necessaria, quàm eorum fides, quæ credenda docent. *Hanc ecce vobis, charissimi, ait sanctus Petrus, secundam scribo epistolam, in quibus vestram excito in commonitione sinceram mentem, ut memores sitis eorum quæ prædixi, verborum.* Et post multa : *Propter quod, charissimi, satagite immaculati & inuiolati Ei inueniri in pace : & Domini nostri longanimitatem, salutem arbitramini : sicut & charissimus frater noster Paulus, secundum datam sibi sapientiam scripsit vobis, sicut & in omnibus epistolis.* Et concludens ; *vos igitur fratres præscientes custodite, ne insipientium errore traducti excidatis à propria firmitate.*

Quinam porro illi essent Insipientes, antè aperuit cum dixit *venturos in nouissimis diebus in deceptione Illusores, iuxta proprias concupiscentias ambulantes, Et inanibus dictis auocantes à bonis moribus quos possent inducere ad liberiores genio laxandas secum habenas.* Quod ne faceremus nos præmonet, persuadetque sua & fratris sui Pauli auctoritate, quæ certe ad coercendam propriam concupiscentiam sicut iubet, plus apud nos valere debet quam Illusorum dicta vel errores Insipientium.

Sic apte sanctus Bernardus : *Hi mihi traditi sunt in Magistros & in Mediatore quibus securè me committere possim.* Et post multa : *Hi sunt Magistri nostri, qui à Magistro omnium, vias vite plenius didicerunt, & docent nos vsque in hodiernum diem. Quid ergo docuerunt vel docent nos Apostoli sancti ? Non piscatoriam artem, non scenofactoriam, vel quidquid huiusmodi est : non Platonem legere, non Aristotelis versutias inuersare, non semper discere, numquam ad Veritatis scientiam peruenire. DOCVERVNT ME VIVERE.* Putas parua res est scire vivere ? Magnum aliquid, imo maximum est. Non vivit qui superbia inflatur, qui luxuria sordidatur, qui ceteris inficitur pestibus, quoniam non est vivere, sed vitam confundere, & appro-



724 Die 29. Iunij. In Feflo Sanctorum Apostolorum Petri & Pauli.

*pinquare ufque ad portas mortis. Bonam autem vitam ego puto, & mala pati, & bona facere: & fic perfenerare ufque ad mortem. Expende hac acurate.*

III. P V N C T V M.

**S**ICVT ergo fide fic moribus veri probantur subditi tantorum Principum. Sicut enim qui fidem eorum non teneret, non se bonum & fidelem probaret Eorum subditum, quia non crederet quod docuerunt, tamquam Principes à Christo constituti vt nos docerent: ita plane qui mores ab eis traditos non obseruat; Quia propterea fic etiam constituti sunt Principes vt nos mores docerent, & eorum doctrinæ morum non minus adhareremus in Praxi quàm doctrinæ fidei. Sic enim non tantum pro fide Christiana, sed pro castis moribus quos docebant dicuntur esse accusati apud Neronem, & ab eo propterea condemnati. Atque idcirco sanctus ipse Petrus quanti à nobis deberent fieri præcepta morum & vitæ quæ tradidisset, sic vniuersim docebat: *Si refugientes coinquinationes mundi in cognitione Domini nostri & Saluatoris IESV Christi, his rursus implicati superantur, facta sunt eis posteriora, deteriora prioribus: melius enim erat illis non cognoscere viam Iustitiæ, quàm post agnitioem, retrorsum conuerti ab eo, quod illis traditum est sancto mandato.* Quasi diceret, numquam admissi essent ad fidem, nisi refugientes coinquinationes mundi bonos illos mores statuissent de quibus acceperunt à nobis præceptum: Nunc vero cum in fide progressi sunt, putabunt forte sibi esse licitum vt ab his nostris præceptis resiliant & rursus se mundo inquinent. At verò tantum abest vt id liceat, quin potius inde magis augeatur peccatum, & minus peccassent non accipiendo fidem & præcepta, quam non stare præceptis acceptis, cum fide retenta.

*Sic & sanctus Paulus. Testor coram Deo & Christo IESV; & electis Angelis, vt hac custodias sine præiudicio, nihil faciens in alteram partem declinando. P R A E C I P I O tibi coram Deo qui viuificat omnia & Christo IESV vt serues mandatum sine macula, irreprehensibile, usque ad aduentum Domini nostri IESV Christi. Hoc est esse Principem sic præcipere, & hoc est esse subditum sic parere vt præcipit.*

Ne te vero dicas obrui & confundi multitudiæ præceptorum



*Sicut fide, sic moribus, veri probantur subditi tantorum, &c. 725*

moralium quæ nobis tradunt hi Principes. Vide quid magis in te repugnet moribus tuo statui convenientibus, & vide quid contra præcipiant: Hoc est præceptum quod tibi tradunt, hoc est in quo vel maxime te illis probabis subditum, vel negabis.

An te Acedia torporue mentis constringit; nec forte satis vigilas in assidua virtutem Praxi? Audi sanctum Petrum: *Curam*, 2. Pet. 1. inquit, *omnem subinferentes ministrare in fide vestra virtutem: in virtute autem scientiam: in scientia autem abstinenciam*: Et quæ plura sequuntur vsque ad nonum capitis versum, ex quo disces non consilium sed præceptum esse, cum pænæ seu damna proponantur non obsequentibus.

An te piget obedire nonnullis superioribus? Audi sanctum Paulum: *Omnis anima potestatibus sublimioribus subdita sit. Qui resistit Potestati, Dei ordinationi resistit: qui autem resistunt, ipsi sibi damnationem acquirunt.* Rom. 13.

O quam diuersi modo mores ab illis quos docuerunt! ô quam vere & grauitè sanctus Leo: *Pudet dicere, sed necesse est non tacere. Plus impenditur Dæmoniis quàm Apostolis!* An hoc tibi dictum conueniat, apparebit hodie ex correcto vel incorrecto vitio cuius argueris. Nisi enim te corrigas, plus impendes & deferes Dæmonibus qui te in vitio retinent, quam sanctis illis Apostolis qui te ab eo reuocant. *Pudet dicere, sed necesse est non tacere.* Serm. 3. de Apost.

## DE SANCTO PETRO.

*Et ipsi tamquam lapides viui superedificamini.*

1. Pet. 2.

*Super lapidem unum septem oculi sunt.* Zacch. 3.

## VERITAS PRACTICA.

Cui sanctus Petrus petra viua non est, Petra est scandali.



RATIO EST, Quia idcirco sanctus Petrus petra viua dicitur, quia qui firmiter illi adharet, sana fide viuit sanisque moribus.

Sed qui non firmiter sic illi adharent, dicunt inter alia, ipsum fide & moribus peccasse Petrum, quod est Eum sibi facere Petram scandali siue occasionem sui peccati.

Ergo Cui sanctus Petrus Petra viua non est, Petra est scandali. Quod certe est diligenter cauendum.

### I. P V N C T V M.

**Q**UÆ de sancto Petro singularia dicunt Patres & Scripturæ Interpretes, quæque iam partim dicta sunt, hic possunt repeti & referri ad septem Capita designanda septem illis mysticis oculis quæ super lapidem vnum dicuntur inesse à Propheta Zaccharia. Multis autem ea modis referri possunt. Primo quidem circa Eius Personam, septem hæc annotantur. Primum: intuitus Petrum IESVS imponit ei nomen Cephæ seu Petri. Secundum: Ascendit Dominus in nauem Petri, vnde docet turbas, & tunc Petro singulariter dicitur, *Noli timere*, ex hoc iam homines eris capiens. Tertium: solus Petrus vnâ cum Domino ambulat super aquas, sicque vnicum se Christi vicarium designauit, quæ non vni populo sed cunctis præesse deberet, inquit sanctus Bernardus. Quartum: Petro inter omnes confitenti Christum Dominum, Filium Dei, respondet Dominus, *Et Ego dico tibi quia tu es Petrus, & super hanc Petram ædificabo Ecclesiam meam: Et tibi dabo clauēs regni cælorum*, Et quæ sequuntur Diuina Verba. Quintum: Cum de cunctis Apostolis dixisset Dominus: *Ecce Satanas expetit vos vt cribraret sicut triticum*, tum Petro singulariter, *Ego autem rogaui pro te, vt non deficiat fides tua, & tu aliquando conuersus confirma fratres tuos*. Sextum, In domo Pontificis negantem se Petrum Dominus respicit, tum poenitens Petrus peccatum amare deflet. Septimum denique, postquam Petrus insignem præ cæteris suum Christo indicauit amorem, *Pasce agnos meos*, inquit illi Christus, *Pasce oues meas*, Quibus Verbis concreditum illi ouile, ait sanctus Epiphanius.



*Cui sanctus Petrus petra viua non est, Petra est scandali.* 727

DEINDE vero hic alius rerum ab ipso gestarum Septenarius conficitur quo singulariter omnium Primus & facile Princeps agnoscetur. Primus de substituendo in locum Iudæ Apostolo verba faciens ad reliquos omnes fideles qui erant numero fere centum viginti, ab omnibus ne vno quidem refragante, auditur, & rem conficit. Primus, accepto Spiritu sancto sermonem habet apud Iudeos quorum circiter tria millia primo illo die conuersa sunt. Primus, inter omnes primum edit miraculum. Primus, primos ex Credentibus peccatores poena mortis mulctat. Primus, primum Hæresiarcham Simonem Magum refutat, arguit, & condemnat. Primus Gentilem Cornelium sibi ab Angelo missum de fide instruit, baptizat, & Ecclesiæ aggregat. Primus denique in primo generali Concilio palam loquitur, & agitatam de legibus abrogandis definit quæstionem.

SVNT qui ad primam Eius Sedem ex multis prærogatiuis, has septem singulares referant. Primò, quod vna & sola dicatur Apostolica. Secundò, quod quæ illi adhærent sedes Episcopales, semper teneantur Orthodoxæ, & veræ Ecclesiæ, non item aliæ. Tertio, quod tamquam suprema omnium de aliis omnibus iudicet & à nullo iudicetur. Quarto, quod leges condant quibus obedire fideles omnes debeant. Quintò, quod in fide & moribus errare non possit. Sextò, quod & locis & temporibus definita non sit, neque vnquam defecerit aut desitura sit aliquando. Septimò, quod sola de controuersis in fide definiat, & de sensu Scripturæ sacræ diiudicet.

ALII denique sunt qui hunc eximiarum S. Petri virtutum Septenarium texunt. Prima est Obedientiæ promptitudo quæ vocantem Christum sequutus est. Secunda est, Renuntiatio perfecta omnium. Tertia est singularis eius fides. Quarta, præcipuus in Christum Dominum amor. Quinta est, poenitentia continua. Sexta, insignis animi fortitudo, constantia, vigilantia, & omni ex parte perfecta Pastoralis cura. Septima est humilis Mansuetudo, quæ cum aliàs tum in aduersante sibi Paulo apparuit, & in eius laudandis Epistolis, in quibus se reprehensibilem esse vidit; Vnde hæc illa egregia sunt sancti Gregorij: *Se, inquit, minori fratri ad consensum dedit, atque in eadem re factus est sequens minoris sui, etiam ut in hoc præiret, quatenus qui Primus erat in Apostolatus culmine, esset primus & in humilitate. Pensate ergo, fratres charissimi,*



*in quo mentis vortice stetit qui illas Epistolas laudauit in quibus Scriptum se vituperabilem inuenit. Quæ illi mansuetudo tanta esse potuit, quæ quies animi, quæ soliditas atque imperturbatio cogitationis? Ecce à minore suo reprehenditur, & reprehendi non dedignatur. Non ad memoriam reuocat quod Primus Apostolorum vocatus est, non quod clauis regni cælestis acceperit; non quod peccata quacumque in terra soluerit, essent soluta & in cælo: non quod in mare pedibus ambulauit, non quod Paralyticos in IESU nomine iubendo erexerat: non quod agros, corporis sui umbra sanauerat: non quod mentientes Verbo occiderat; non quod mortuos oratione suscitabat. Ne igitur increpationis Verba dedignaretur audire, omnia dona quæ acceperat quasi à memoria repulit, ut unum fortiter humilitatis donum teneret.*

*Tomo I.  
l. I. de Rem.  
Pontif.*

Sic de singulis Eius virtutibus commendandis, atque aliis etiam titulis suprà commemoratis facile deduci possent ex sanctis Patribus, quæ fufius narrarentur: sed præsto illa sunt apud Controuersitas, & maxime Bellarminum: & dandus est tandem locus Veritati propositæ perpendendæ, quæ tam necessaria est ad Praxim, quam perniciosum est Petram illam viuam & vitalem, sanctum inquam Petrum, nonnullis fieri Petram mortis & Scandali. Quibus scilicet non est Petra vite, Petra est mortis. Cur porro? Expende rationem. Idcirco enim dicitur sanctus Petrus Petra viuua, non tantum quod ipse viueret cum dictus est Petra sed quod modo etiam in Ecclesia sic viuat tamquam eius Caput, vt qui firmiter illi adherent, sanâ fide viuant, sanisque moribus: neque illi aliter recte possint viuere aut sanè sentire de fide & moribus, quin illi tam firme adhæreant vt nulla vi ab eo possint dimoueri. Sic apte sanctus Hieronymus, ex oriente ubi tum degebat scribens ad Damasium Papam: Neque vero, inquit,

*Ep. 25. inter  
Selectas.*

*tanta vastitas elementi liquentis, & interiacens longitudo terrarum, me à pretiose Margarite potuit inquisitione prohibere. Vbicumque fuerit corpus, illuc congregabuntur & aquilæ. Profligato à sobole mala, patrimonio, apud vos solos incorrupta Patrum seruatur hereditas (sive auctoritas.) Ibi cespitem terra fecundo, Dominici seminis Puritatem centeno fructu refert: hic obruta sulcis frumenta in lolium auenasque degenerant. Et post pauca: Beatitudini tuæ, id est, cathedræ Petri communionem consocior. Super illam Petram, edificatam Ecclesiam scio. Quicumque extra hanc domum, agnum comederit, profanus est. Si quis in arca Noe non fuerit, peribit regnante diluvio. Itemque paulò post:*

*Non*



Cui sanctus Petrus petra viua non est, Petra est scandali. 729

Non noni Vitalem : Meletium respuo ; Ignoro Paulinum. Quicumque tecum non colligit , spargit : hoc est qui Christi non est , Antichristi est. Et sequenti epistola ad Eundem : Hinc presidis fulta mundi, Ariana rabies fremit : hinc in tres partes scissa Ecclesia ad se rapere me festinat. Monachorum circa manentium antiqua in me surgit auctoritas. Ego interim clamito : si quis cathedra Petri iungitur , meus est. Meletius , Vitalis , atque Paulinus ibi herere se dicunt. Possem credere si hoc unus assereret : nunc , aut duo mentiuntur aut omnes. Idcirco obtestor Beatitudinem tuam per crucem Domini , per necessarium fidei nostre decus , per Passionem Christi , ut qui Apostolos honore sequeris , sequaris & merito : ut mihi literis tuis apud quem in Syria debeam communicare , significes : Noli despicere animam pro qua Christus mortuus est. Quasi diceret : Tanti ego duco scire à te tamquam ab ipso Petro quid credere quidue agere debeam , ut in hoc vitam & salutem omnem constituam , si sic credidero & vixero prout mihi significaueris. Nonne tu idem cum tanto Doctore censes ?

## II. P V N C T V M.

**S**ED qui non firmiter Apostolica Petra sic adherent , dicunt inter alia ipsum in fide & moribus errasse Petrum , quod est sibi Eum facere Petram scandali.

Nempe hoc dicunt Hæretici ; & in peccatis obstinati : atque ideo sic sibi palpent in errore suo , ut sibi persuasum velint Hæretici , non electum à Domino Petrum , Petram & fundamentum Ecclesiæ , quod grauis peccator fuerit. Nec de peccatis cauendis aut deponendis multum moneantur peccatores , quod Petrus etiam peccauerit.

O quàm verè dictum à Sapiente : *anima dolosa errant in peccatis.* Prov. 13. Merus est enim dolus quo mens in sua prauitate obfirmata , velum obtendit suo vel errori vel peccato , ne in sua nuditate appareant & Conscientiam moueant. Estoenim , Hæretice , peccauit Petrus , non tamen fidem amisit , neque vmquam destitit corde credere illum esse Christum quem ore denegauit , cum illi Dominus expresse dixerit , *non defuturam eius fidem.* Peccauit tamen , & grauiter sic ore negando Dominum suum ; sed quid inde ? Non propterea fuisse Petram & primum à Christo Ecclesiæ fundamentum ? *non* propterea sic peccare permissus est , ut cum Pastor ouium fu-



turus esset, non dedignaretur errantes recipere, & peccatores reuocare seu reuocatos amplecti. Sic præclare sanctus Gregorius:

*Hom. 21. in Euang.* *Qua in re, inquit, considerandum nobis est cur omnipotens Deus eum quem cunctæ Ecclesia præferre disposuerat, ancilla vocem pertimescere, & seipsum negare permisit. Quod nimirum magna actum esse pietatis dispensatione cognoscimus, ut is qui futurus erat Pastor Ecclesiæ, in sua culpa disceret qualiter aliis misereri debuisset. Prius itaque eum ostendit sibi, & tunc præposuit cæteris, ut ex sua infirmitate cognosceret quàm misericorditer aliena infirma toleraret.*

*Ep. 19. ad Hier.* Sic qualiscumque illa fuerit culpa quam in ipso Paulus arguit, ad humilitatis exemplum euenisse non modo patet ex eodem sancto Gregorio, ut supra visum est, sed ex ipso sancto Augustino qui factum Apostoli contra Diuum Hieronymum vehementer tuetur: *Rarius, inquit, & sanctius exemplum Petrus, Pastoris præbuit quo non dedignarentur à posterioribus corrigi, quàm Paulus, quò confiderenter auderent minores maioribus pro defendenda Veritate, salua Caritate resistere. Vbi vides manifeste, quod tametsi daretur ex Augustino Petrum peccasse & iuste à Paulo reprehensum fuisse, semper tamen ipsum Augustinum censuisse Paulo Petrum esse priorem, cum aperte dicat à posteriori & minori fuisse correptum.*

*Serm. 3. de Apostolis.* Contra vero induratos peccatores & à Petri peccato Petram scandali, id est, occasionem sui peccati falsò & inique desumentes sic grauitè sanctus Bernardus: *Va tibi qui post lapsum, fortiozem te nobis exhibes! Ut quid tam rigidus es in tuam perniciem? Inclinare potius ut melius erigaris, & ne prohibeas frangi quod distortum est, ut possis melius solidari. Quid indignaris increpanti gallo? Tibi potius indignare. Pluiam voluntariam, ait Psalmista segregabit Deus hereditati tuæ, & infirmata est. Bona infirmitas quæ segregatur hereditati, quæ medicum non repellit. Induratos enim tamquam vas figuli in virga ferrea conteret: & hereditas infirmata est, ait, tu vero perfecisti eam. Notanda hæc Peccatori postrema verba, quasi ipsi diceretur, falsò & impiè tuam in peccatis excusas infirmitatem, cum in ea tu te ipse projicis, vel cum in eis diutius remoraris; tunc enim perficis tuam infirmitatem; quæ prius erat tantum inchoata; tunc abuteris tua infirmitate ad excusationem peccati, cum potius illa uti deberes ad peccati fugam & cautelam. Non idcirco peccauit Petrus ut peccares, sed potius ut eius exemplo disceres tibi cauendum, aut si forte peccaueris, cito resipiscendum; nec*



*Cui sanctus Petrus petra vna non est, Petra est scandali.* 731

desperandum vñquam post quodlibet perpetratum peccatum, cum ille in pristinum suum statum redierit; sed neque etiam præsumendum aut persistendum in peccato, cum ille statim respectus à Domino egressus fuerit foras, & amare fleuerit.

O quoties illum oculum qui respexit Petrum, despexisti?

### III. P V N C T V M.

**S**IC ergo Cui sanctus Petrus Petra vna non est, Petra est scandali, dum loco exempli virtutum & pœnitentiæ, quod à sancto Petro exprimere oportebat, sibi potius occasionem erroris & peccati fingit, trahitque ex Petra quandam tellis amaritudinem, vnde potius mellis & olei suauitatem educere poterat, ad æternam suam salutem. Sic ipse Christus Dominus qui lapis summus, angularis, electus & pretiosus dicitur, dicitur etiam lapis offensionis & Petra scandali, quod quia crucifixus est, non credatur Deus: aut si Deus creditur pro peccatis crucifixus, iam de peccatis propriis nihil nos esse sollicitos oporteat sed securos, sed certos de salute, quantumcumque quisque peccauerit, & in peccatis obierit, dum Christum credat crucifixum, salua sunt ei omnia. O verè Petram scandali, & offensionis ei qui sic de Christo sentiret! Qui ceciderit super lapidem istum, confringetur: super quem vero ceciderit, conteret eum. Ita plane de sancto Petro peccatore, Petra illa est de qua Iob, *Et petra fundebat mihi riuos olei*. Mirum enim quantæ inde in nos defluant misericordiæ, cum inde peccatorum remissio, inde venia, inde pœnitentia & quidquid ad salutem spectat, volenti deriuetur. Sed nolenti & scandalum sibi facienti, Petra illa est infœcunda in quam semen iactum dum decedit, deficit, exarescit & perit. *Radicem non habet, continuo scandalisatur*, inquit Dominus. 1. Pet. 2. Math. 21. Iob. 24. Math. 18.

O te ter miserum & infœlicem, qui cum posses esse fœlix alieno damno, maus esse miser tuo: & tanto majori tuo damno, quanto maior est tua culpa quæ sic Petram vitæ conuertit in Petram mortis & scandali. Exardesce ad hæc in teipsum, & audi sanctum Ambrosium: *Si Petrus Petra est super quam edificatur Ecclesia, recte primum signum mirabilium suorum Petrus fecit consolidando plantas hominis claudi: ut sicut in Ecclesia, fidei fundamenta continet, ita in homine, membrorum fundamenta confirmet*. Recte inquam pri-



*mum in Christiano pedes curat, ut iam non intrepidus nec imbecillis possit super Petram Ecclesiae, sed robustus & fortis incedere. Sic confortare, & esto robustus.*

## DE SANCTO PAULO.

*Imitatores mei estote, sicut & Ego Christi. 1. Cor. 11.*

### VERITAS PRACTICA.

Licet Pauli Magnitudo vix sit Imitabilis: vix tamen alius est magis Imitabilis quam magnus Paulus.

*RATIO HÆC EST INTER ALIAS, Quod vix est alius magis Imitabilis quam qui exemplo suo maiorem spem facit propositæ imitationis assequendæ.*

*Sed vix ullus est alius qui exemplo suo maiorem spem faciat propositæ imitationis assequendæ, quam magnus Paulus.*

*Ergo vix alius est magis imitabilis: Ac proinde audiendus, dum ad Imitationem sui nos adhortatur.*

### I. P V N C T V M.



*Q*UANTA esset magnitudo sancti Pauli, satis patet ex eius vita, rebusque gestis, quæ ex Actis Apostolorum, atque ex Ipsius Apostoli Epistolis colliguntur. Quia tamen nonnisi sparsim & per partes illic referuntur quæ sunt huius Divini hominis illustriora facta: si quis collectim ea desideret, adeat sanctum Ioannem Chrysostomum quem nobis Divina Providentia non minus subministravit Pauli prædicatorem: quam Paulum, Christi præconem. Oportebat sane talem Apostolum cui singularis hæc daretur Gratia, in gentibus evangelizare inuestigabiles Divinitas Christi, & illuminare omnes quæ sit dispensatio Sacramenti



absconditi à faculis in Deo. Verùm & oportebat tale os aureum quod singularem illam Apostoli gratiam nobis euidentius & dignius aperiret.

Et cum multa de Paulo Chrysostomus, tum illud insigne est & compendiose eximium quod ait Eum velut *Paradysum spiritua-* Hom. 1. de laudib. Pauli.  
*lem*, vnde quatuor fluuij Gratiarum in vniuersum emanent genus. Quatuor sunt scilicet præcipua Capita quò Gratia illa omnes referuntur. Primum est Diuina Sapientia seu rerum Diuinarum scientia de qua sic sanctus Chrysostomus: *Paulus Archetypus bono-* Rom. 4.  
*rum cui omnem prædicationem, res orbis, mysteria cuncta, vniuersamque dispensationem Deus concessit. Ipse cælum solem habens Iustitia, Ipse mare sapientia purissimum & profundissimum.*

Secundum est, Efficacia in dicendo, de qua sic Idem sanctus Doctor: Etenim homo ignobilis, abjectus, & circumforaneus qui artem Ibid.  
*exercebat in pellibus, intantum virtute progressus est, ut vix triginta annorum spatio Romanos & Persas, & Medos & Indos & Scythas & Aethiops, & Sauromatas & Saracenos, & omne prorsus humanum genus sub iugum mitteret Veritatis. Tertium est Eius sanctitas & virtutum omnium quantumcumque diuersarum associatio. Paulus,* Hom. 55. in Marth.  
*inquit Idem Panegyrestes, cum in terris esset; ubi Seraphim sunt, ibi conuersabatur, propius Christo assistens quàm hastati & stipatores regi assistunt; quippe cum isti aspectum huc illuc circumferant, Ille vero nulla rerum specie motus, vniuersam mentis aciem ad Regem (Christum) tenderet. Et rursum: Paulus omnium virtutum fuit arca, adeout etiamsi quis totum contra Eum, Iustorum chorum sigillatim appendat, inueniat trutinam, virtutum ponderibus à Pauli parte depressam.*

Quantum denique est infatigabilitas quædam animi & corporis dum per vniuersas totius orbis partes Christum annuntiat: In Commem. S. Pauli.  
*Totus factus Charitas, inquit os aureum, sicut missum in ignem ferum totus ignis efficitur, qui quasi communis totius mundi esset Pater,* Hom. 21. in 2. Corinth.  
*ita amore hominum, ipsos eorum imitabatur parentes, imo cunctos pietate & solitudine superabat. Itemque alibi fufius: Sicut medicus optimus, & Pater communis, & curator ac tutor, omnia agit, omnia curat, impedimenta remouet, offendentes reprimit, ubique circumcur-*  
*sat. Neque enim sicut is qui in prælio rem perficit, sed sicut is qui ad paratam ac promptam venit victoriam, trophæa statuit, suffodiens, destruens, desiciens Diaboli munitiones, & ministrorum machinationes,*



& vniuersum tandem orbem ad Christi exercitum ducit: & neque parum respirat: ab his ad illos, ab illis ad alios transfiliens quasi militum Dux quidam optimus asserens trophæa: Imo singulis horis sola tunica indutus irrumpens in aciem, aduersariorumque ciuitates & tela, & lanceas & iacula, & omnia in suum ius cogens.

Ex quibus & aliis vberius pertractatis, vnde hæc pauca decerpta sunt, euidenter patet quàm vix aut ne vix quidem tanta Magnitudo à nobis esset imitabilis: Et tamen certa est Veritas quæ modo proponitur expendenda, *Quod vix est ullus alius magis imitabilis quam magnus Paulus.* Rationes multæ possent afferri, sed hæc imprimis opportuna quæ docet vix esse alium magis imitabilem quàm Eum qui suo exemplo maiorem facit spem propositæ imitationis assequendæ. Hoc est enim quod vel maxime nos deterret ab imitandis Sanctis quod nobis persuadere non possumus posse nos eos imitari, quippe qui tam longe sumus remoti ab eorum sanctitate; vnde & quo illi sunt sanctiores, tanto minus id persuasum habemus; Quamobrem ad tam difficilem persuasionem inducendam nihil poterat dici aptius, quàm quod de certa spe dicitur quam qui è Sanctis certiorum aut maiorem facit, is se magis imitabilem reddit. Quod certe patuit in sancto Augustino cui dubitanti nùm posset casta sanctorum sequi vestigia, tum inquit Ipse, *Apparuit casta dignitas Continentie, serena & non dissolute hilaris, honeste blandiens ut venirem, neque dubitarem; & extendens ad me suscipiendum & amplectendum; pias manus plenas gregibus bonorum exemplorum.* Et quæ plura pergit quibus se mirum in modum ait esse excitatum, quia sic in spem venerat propositæ ad imitandum virtutis facilius consequendæ quàm putaret.

2. Conf. 11.

Pf. 36.

*Reuela Domino viam tuam, & spera in Eo: & ipse faciet: Et educet quasi lumen iustitiam tuam.* In hoc vel maxime deficiis.

## II. PUNCTVM.

**S**ED vix ullus est alius qui exemplo suo maiorem nobis faciat spem propositæ imitationis, seu ad imitandum virtutis assequendæ, quàm magnus Paulus.

Primo enim cùm nos exhortatur ad imitationem suam, sicut ipse est Imitator Christi, docet nos euidentissime non id à nobis



imitandum quæri quod ipse fecit : neque enim ipse sic Christum imitatus est , vt quæ omnia Christus gessit , Paulus gesserit. *Num-* 1. Cor. 7.  
*quid Paulus crucifixus est?* Sed suo modo Christum sequutus est, fa-  
 ciendo & patiando perfecte quæ Christus volebat ab ipso fieri &  
 sustineri, sicut Christus suo modo illa passus erat quæ à Patre sibi  
 erant ordinata vt pateretur. *Vnusquisque*, inquit, *proprium donum* 1. Cor. 7.  
*habet ex Deo: alius quidem sic, alius vero sic. Vnusquisque in qua vo-*  
*catione vocatus est, in ea permaneat. Vnusquisque in quo vocatus est,*  
*fratres, in hoc permaneat apud Deum.* Tanti refert hoc semel pro-  
 be intelligere, vt non semel sed iterum atque iterum repetat, se  
 nolle à quoquam aliud quam quod est proprium suæ vocatio-  
 ni, suæ ætati, suis viribus, suo denique statui tum interno tum  
 externo, tum animi, tum corporis & rerum etiam domestica-  
 rum. Vnde illud ad rem nostram peropportunum sequitur, vt  
 cum ad Eum imitandum appellamur, ad illa tantum quæ sunt  
 nostri officij prouocemur, vt illa nempe diligenter exequamur  
 in Christo, sicut Ipse suo in ministerio gnauus & sedulus fuit.  
*Vide*, inquit, *ministerium quod accepisti in Domino, vt illud impleas;* Coloss. 4.  
 Non meum quod accepi, sed illud tuum quod tibi à Domino  
 datum est, sicut mihi meum, & cuius rationem reddes non mei  
 ministerij, sicut nec ego tui; *Nam unusquisque nostrum pro se ra-*  
*tionem reddet Deo.* Quid clarius? Quid iustius? Rom. 14.

Atque ita, hoc aliud infertur quod erat præcipue demonstrian-  
 dum, cum nempe non sit alia tibi proposita virtus Pauli ad  
 imitandum, quàm quæ tibi domestica est, tibi propria est, &  
 tota tua, quid est quod deterrearis? Quid est quod non speres?  
 Quid est quod dubites vel affuturam gratiam, vel satis eam esse  
 potentem vt tuo perinde fungaris munere, ac Paulus suo?

Quod si tamen adhuc hæres; si vel gratiæ vel tibi sic diffidis  
 vt non putes vnumquam posse etiam in minimis quod Paulus in  
 maximis potuit: quæso te, Paulum cogita, quis esset ante ac-  
 ceptam gratiam, quis qualisue factus sit post acceptam; & vide  
 num ex istis, spes tam certa excitetur, quanta esse potest cum  
 Dei gratia ex cuiusvis exemplo. Quanta est enim distantia Sauli  
 persequentis Christum & Pauli Christum prædicantis, tanta est  
 ratio seu rationis efficacia ad demonstrandum quid possit in  
 nobis gratia, si velimus ei consentire; cum vnus sit Gratia opus,  
 quodcumque illud est grande opus, *Quod Saulus persequutor factus* Serm. I.



*In Conuer-* est Paulus predicator : propterea , inquit sanctus Bernardus , *Conuer-*  
*S. Pauli.* sionis eius memoria frequentatur quod & ipsa quoque memorantibus  
 utilis inueniatur. In hac enim memoria & peccator spem venie concipit , & pronocatur ad pœnitentiam : & qui iam pœnitet , perfectæ conuer-  
 sionis accipit formam. Quis desperet ultra pro magnitudine cuiuslibet criminis , quandoquidem Saulum audiat adhuc spirantem minarum  
 & cadis in Discipulos Domini , subito factum vas electionis ? Quis dicat iniquitatis pondere pressus , assurgere iam ad studia meliora non valeo : quando in ipso itinere quo Sanguinem sitiens Christianum , dirum toto corpore virus efflabat , persecutor crudelissimus in fidelissimum repente mutatus est Predicatorem ? Magnificè si quidem in hac una conuer-  
 sione , & misericordiæ magnitudo , & efficacia gratia commendatur.

Quod & ipse sanctus Apostolus sic agnoscebat , sicque omnibus notum volebat , vt omnes suo exemplo animaret ad illam spem quæ est vel maxime necessaria ad formandum imitandæ virtutis affectum : Sic enim ait : *Christus IESVS venit in hunc mundum*  
*peccatores saluos facere , quorum primus ego sum , sed ideo misericordiam consecutus sum , vt in me primò ostenderet Christus IESVS omnem patientiam ad Informationem eorum qui credituri sunt illi in vitam æternam.* Quem in Apostoli locum sic præclare sanctus Anselmus , ex Diuo Augustino : Si Saulus sanatus est , ego quare despero ? Si à tanto medico tam desperatus æger sanatus est , ego vulneribus meis illas manus non optabo ? Ad illas manus non festinabo ? Vt hoc dicerent homines ideo factus est Saulus de persecutore Apostolus , quia cum venit Medicus volens sibi famam comparare , infirmum querit aliquem desperatum , & ipsum sanat : & si pauperrimum inueniat , non ibi querit mercedem , sed commendat artem : Ita & Christus potentiam specialis medicine spiritualis suæ ostendit in Saulo , vt omnes deinceps nossent , Eum sanare posse cunctas infirmitates omnium confugientium ad se. Tune verò iam dubitare posses ?

Adde his verò quod non parum facit ad prouocandam imitationem , non modo Paulus fuit qualem se dicit ante conuer-  
 sionem , blasphemus & contumeliosus : sed post suam etiam ad Christum vocationem , & post acceptam baptismi Gratiam , sic internis & externis agitur motibus , molestiis , angustiis & pressuris , vt vix vllus hominum se infirmum magis & oppressum sentiat quam se hic passim profitetur Apostolus : nempe vt omnes non solum verbo sed facto doceat in quo potissimum sita sit virtus  
 hominis



hominis & operatio Gratia; non in apathia, non in obtusis sensibus, non in corporis aut animi ficta quadam vacuitate curarum & motuum: sed in pugna cum vitiis, in certamine cum concupiscentia, in negando consensu natu & prouocanti ad peccatum. *Vi-* Rom. 7.  
*deo, inquit in me & sentio quidquid in aliis hominibus deprauata possit natura; sed renitor, sed reluctor cum Dei Gratia per IESVM Christum. Sic pugno non quasi aërem verberans, sed castigo corpus meum, & in seruitutem redigo. In omnibus tribulationem patimur, sed non angustiamur: aporiamur sed non destituimur: persecutionem patimur, sed non derelinquimur; deijcitur sed non perimus: semper mortificationem IESV in corpore nostro circumferentes, ut & vita IESV manifestetur in corporibus nostris.*

Quasi diceret, si qua mundi aut carnis vexatione vos agitari & à virtute propterea dimoueri putatis, putate & certo credite nos eadem prorsus vexari molestia, cum interna tum externa: nec tamen Diuino freti subsidio, virtutem abdicamus, sed potius in illa & cum illa magis subsistimus: quæcumque virtutis impedimenta vos habere conclamat, hæc & Paulus habet: quæcumque vero Paulus habet virtutis & gratiæ necessaria subsidia, vos habetis. Vnde & concludit; *Has ergo habentes promissiones charissimi, mun-* 2. Cor. 7.  
*demus nos ab omni inquinamento carnis & spiritus, perficientes sanctificationem in timore Dei. CAPITATE NOS. Neminem læsumus neminem corrupimus, neminem circumuenimus. Id est, vt exponit sanctus Thomas, Capite nos in exemplum seruandæ simul charitatis & iustitiæ. Si naturæ deprauatæ motum essem sequutus, læssem eos certe qui me innocentem prius læserant; sed Diuina iuuante Gratia neminem læsumus aut vlla in re offendimus. Sic agite, sic naturæ resistite, sic gratiæ cooperamini. Quæ & didicistis, & ac-* Phil. 4.  
*cepistis, & audistis, & vidistis in me, hoc agite, & Deus pacis erit vobiscum. Quando scilicet, vos à me imitando non excusabitis quasi alius essem à vobis, quod falsum est, & quod si prætenditis, Deus pacis non erit vobiscum, quia non est cum mendacio & falsitate. Quamobrem, inquit, ESTOTE SICVT EGO, QVIA ET EGO SICVT VOS. Estote sicut ego, patientes, mansueti & humiles, quia & ego sum sicut vos intus in animo, & extra in mundo, afflicti, agitati & commoti. Sic tribulamur pro*  
*vestra exhortatione & salute qua operatur eandem tolerantiam passionum*



quas & nos patimur. Id est, vobiscum mala patior, vt vos mecum mala benè pati discatis.

*l. 19. Mor. 6. 5. & 6.* *Ab Paulè in cælo iam IESVM conspicis, & in terra adhuc hominem fugis, nempe gentis Aretæ regem. In paradysum duceris, secreta Dei verba agnoscis, & adhuc à Satana Angelo tentaris! Vnde sic fortis vt ad cælestia rapiaris: Vnde sic infirmus, vt in terra hominem fugias, & adhuc à Satana Angelo aduersa toles? Sic sanctus Papa Gregorius, qui & sibi fufe respondet id ita diuinitus factum, ad augendam virtutem Apostoli, & ad eius virtutis exemplum facilius exponendum.*

### III. P V N C T V M.

**L**ICET ergo Pauli magnitudo vix sit imitabilis: vix tamen alius est magis imitabilis quam magnus Paulus. Non enim inuitaris ad eius imitandam magnitudinem, sicut neque ad eius officij Apostolici sublimitatem: sed tamen inuitaris ad Illum imitandum, vt sicut ille humilis fuit & patiens, atque omni virtute commendabilem se suo in illo Apostolico munere præstitit, ita tu in tuo; Et ne forte dicaste non posse quod debes, idcirco Ille tibi proponitur qui minus quàm tu poterat, nisi adiutus fuisset ab illa Gratia quæ tibi tam præsto est ad obeundum munus tuum quàm ad suum illi affuit perficiendum. *Gratia Dei sum id quod sum*, inquit ille, & *gratia eius in me vacua non fuit*. Atque vt ij simus etiam qui esse debemus. *Adiuuantes*, inquit, *exhortamur, ne in vacuum gratiam Dei recipiatis*.

*1. Cor. 15.*

*2. Cor. 6.*

*Hom. 2. de laudib. Pauli.*

Totum est in illo Gratiaæ fidei usu: Vnde apte sanctus Chrysostomus: *Quid sit & homo, & quanta natura nostræ nobilitas, quanteque capax virtutis, in Paulo videmus, qui vitâ suâ docet quod inter Angelos hominesque non grande sit medium, si tamen nos ipsos diligentius excolamus. Non enim aliam ille est sortitus naturam, nec dissimilem nactus animam, neque alterum habitans mundum, sed in eadem terra, sub eisdem etiam legibus nutritus & moribus.*

Ad hæc quid animi? Quid virtutis? Quid melioris vitæ? Quid perfectioris Sanctimonix? Nihilne tali exemplo moueberis? An te adhuc posse negabis quod debes facere, aut refugies velle quod possis? Nihilne Sancto deferes? Nihil eius dictis? Nihil eius exemplis? Audi saltem illum: *Timeo ne forte sine causa labo-*

*Gal. 4.*



*Diuinæ Visitaciones rarò conueniunt cum humanis, &c. 739*  
*rauerim in te. Quid respondes? Potesne solo silentio tantum*  
*probrum concoquere?*

Vide in 2. parte, Feria 4. Cinerum, vbi hæc proponitur Veritas:

Non quidquid Christus egit, sed quomodo.

Et Feria 3. Hebdom. 1. in Quadragesima, vbi de internis Christi doloribus.



## IN FESTO VISITATIONIS Die 2. Iulij BEATÆ Mariæ VIRGINIS.

*Exurgens Maria, abiit in montana cum festinatione in ciuitatem Iuda. Et intrauit in domum Zacharia, & salutauit Eliſabeth. Luc. 1.*

### VERITAS PRACTICA.

Diuinæ Visitaciones rarò conueniunt cum humanis, nisi hæ raræ sint.

RATIO EST, Quia humana illæ Visitaciones quæ vtrò citroque dantur & accipiuntur, nisi sint raræ, sunt nimis familiares, nimis liberæ & effusæ.

Sed Diuinæ Visitaciones rarò conueniunt cum illis Visitacionibus quæ sunt nimis familiares, nimis liberæ & effusæ.

Ergo rarò conueniunt Diuinæ cum humanis, nisi hæ raræ sint. Quæ certe ratio multum valere debet ad coercendam liberiores illam licentiam quæ multi etiam Religiosi sunt frequentiores in visitando, sicque Diuinis priuantur Visitacionibus & gratiis. Quod est valde deplorandum.



## I. P V N C T V M.



VM ex Angelo nuntiante sibi Diuinum Verbum incarnandum, didicisset Beata Virgo cognatam suam Elizabeth concepisse filium in senectute sua: statim atque discessit Angelus, cognouit Diuinæ voluntatis esse vt grauidam illam suam cognatam, ipsa etiam Verbo Diuino foeta visitaret, & coleret: tum illicò paruit, siue vt sic volenti Deo tantum obsequeretur, siue vt officium suum Elizabethæ deferret, siue vt mutuò Diuina in se collata beneficia recolerent; siue vt esset nobis exemplo, quo fructu quoue sine sint habenda colloquia, & mutux visitationes transigendæ. O certè cælitus injectam Virgini talem mentem! ô sanctè nauatam Eius operam quæ tanto malo quale in frequentibus illis congressibus reperitur, modum & remedium afferre queat.

Perpendi quidem possunt ex Euangelica rei gesta historia, quæcumque pietatem tuam acuent, de quibus satis fuisse supra in Aduentu, tota secunda Hebdomada: siue promptam mireris obedientiam, siue festinum iter modestæ Virginis, siue suauem & Diuinum Amicæ cum Amica congressum, siue quas profert Elizabetha laudes Diuinæ matris; siue quos sentit Infans Ioannes ab Infanti IESV anticipatos pietatis sensus; siue quid demum ex tanto delibes mysterio, tum vero attentius contemplare quanta sit huius sanctæ Visitationis, & earum quæ inter nos haberi solent differentia? Nihil illic vaniloquij, nihil otiosæ confabulationis est, nihil de regnorum statu, nihil de Regum bellis, nihil de alienis moribus, nihil leue, nihil ridiculum, nihil desultorium; sed omnia religiosa, pia, sancta, cœlestia; de Diuinis beneficiis vnus est ambarum sermo; Tota est Elizabeth in celebranda Virgine Matre: Tota Virgo Mater in magnificendo Domino, Quas effundit illa laudes in Virginem, Virgo refundit in ipsum Deum totius Boni fontem. *Magnificat anima mea Dominum, & exultauit Spiritus meus in Deo salutari meo.* Reuolue singula pensulatim: Tum vt tali ex congressu discas tuos reformare: Audi Veritatem propositam de Diuinis & humanis Visitationibus opportune conferentem. Audi quantum humanæ Diuinis præiudicent; & quantum inde detrimenti totam in vitam importetur.



*Diuinae Visitationes rarò conueniunt cum humanis, &c. 741*

Raro enim Diuinae conueniunt cum humanis, nisi haec humana sint rariora. Et quidem Ratio quae affertur est planior quam ut fufius probari debeat: nam nisi sint raræ Visitationes, sunt frequentes; si sint frequentes, sunt nimis familiares, sunt nimis liberae, nimis effusae. Contracta sunt Rationis repagula, pudor exutus est, licentia regnat, verecundiae locus sublatus; amicitiae dicuntur permitti omnia. *Sicut urbs patens & absque murorum ambitu, ita vir* Prov. 25.  
*qui non potest in loquendo cohibere spiritum suum.*

Nonne hoc ita euenit? Nonne & tibi sapius? O quoties minor homo rediisti ex hominibus sic effulse frequentatis! *Effusus es sicut* Gen. 49.  
*aqua, non crescas, Dicebat Iacob Rubeno primogenito suo. Tibi vero quod pejus est, effusus sicut aqua, decrescas.*

II. PUNCTVM.

**S**ED Diuinae scilicet Visitationes rarò conueniunt cum illis humanis visitationibus quae sunt nimis familiares, nimis liberae & effusae.

Primo quidem dicendum esset quid sit in genere Diuina visitatio. Deinde quot Eius species enumerentur. Ac postremo quam Diuinis obstant humanae liberiores & effusiores.

De primo, consulendus est liber Exercitiorum sancti Ignatii ubi de regulis agitur ad discernendos Spirituum motus: Inde sub nominibus Consolationis & Desolationis facile discas Diuinam tunc esse visitationem quando Deus sensibili aliquo suae praesentiae signo dato, animam plenius occupare sentitur, & in vnaquaque facultate diuersas operationes sic exercere, ut ipsa etiam anima moueatur ad nonnullos actus conformes Diuinis illis quas persentit operationibus & gratiis. *Visitasti terram & inebriasti eam.* Ps. 64.  
*VISITA vineam istam.* Ps. 79.

Quod spectat ad secundum, tres praecipuae recensentur visitationis Diuinae species. Prima est terrens, conturbans & pauore quodam concutiens animam quae vel in peccato est, vel in affectu aliquo inordinato, vel in tepido statu, vel in quadam mentis incuria, vel in periculo tentationis & lapsus nisi aduertat; vel si denique lapsa sit, admonetur suae culpa. *Adam ubi es? CAIN* Gen. 3. & 4.  
*quid fecisti? Visitabo in virga iniquitates eorum.* Secunda est Instruens, Ps. 88.  
monens, docens & variis intellectum collustrans luminibus ut animi statum melius cognoscat; ut peccati foeditatem & virtutis



præstantiam norit acutius: vt quæ de Christo Domino sunt, plenius intelligat: & quos in via virtutis progressus facere debeat apertius intueatur. *Intellectum tibi dabo, & instruam te in via hac qua gradieris.* Quò apte referas illud Sapientis; *Nisi ab Altissimo fuerit emissa visitatio, ne dederis in illis cor tuum.* Tertia est afficiens, & appetitum siue rationalem siue sensituum diuersis mouens affectibus in spem æternorum, in gaudium Diuinæ voluntatis effectæ, in desiderium patiendi, in amorem Dei, in zelum Diuinæ gloriæ proximorumque salutis, & alios pro diuersa personarum dispositione, aut Diuina in ipsas ordinatione ac beneplacito. *Vitam & misericordiam tribuisti mihi: & visitatio tua custodiuit spiritum meum.*

IAM vero quod tertium est & præcipuum, Diuinæ illæ Visitationes raro conueniunt cum humanis quæ sunt effusiores & liberiores, quia sic effulse loquendo & conuersando, anima quodammodo tota effunditur, vt nec recipiendo nec audiendo Deo sit capax; *Si venerit ad me non videbo eum: si abierit, non intelligam.* S. AEP E. enim est gratiæ donum, inquit ibi sanctus Gregorius, quod iram deputat: & saepe Diuinæ districtiōis ira est, quod gratiam deputat. Quoniam effusi estis sicut vituli super herbam, inquit Propheta: *Confusa est mater vestra nimis, & adequata pulueri quæ genuit vos; id est Conscientia. Ecce nouissima erit, deserta, inuia & arens. Ab ira Domini non habitabitur, sed redigetur tota in solitudinem,* id est, destituetur Diuinis gratiis quas alioquin nisi nimis effusa fuisset, recepisset.

Adde quod cum *in multiloquio non desit peccatum*, peccatum autem opponat nubem Diuino soli ne se communicet, non est mirum si non conueniant. *Non est mihi voluntas in vobis. INIQUITATES vestre diuiserunt inter vos & Deum vestrum: & peccata vestra absconderunt faciem eius à vobis.*

Denique cum in illis liberioribus colloquiis res humanæ soleant semper pluris fieri quam Diuinæ, hinc naturales appetitus & cupiditates rerum sublunarium crescunt & roborantur; contrā verò, rerum cœlestium decrescit valor & pondus. Ac proinde vel negantur eis visitationes & communicationes Diuinæ quæ res illas pluris æstimant quam merentur: vel si conceduntur aliquæ, pereunt illicò velut semen secus viam iactum quod pedibus in-



cedentium conculcatur, & volucres cœli comedunt illud. Id est Diabolus, vt ipse Christus Dominus interpretatus est.

O quam sapienter ille insipientiam suam agnoscebat quod nimis esset locutus, & qui se propterea sic arguebat: *Qui leuiter loquutus sum, respondere quid possum? Manum meam ponam super os meum. Vnum locutus sum, quod utinam non dixissem: & alterum quibus ultra non addam.* Tum paulò post, acrius in se exardescens: *Ideo insipienter locutus sum, & quæ ultra modum excederent scientiam meam. Idcirco ipse me reprehendo, & ago pœnitentiam in fauilla & cinere.* Si talis illi doloris sensus propter vnum aut alterum verbum leuius dictum, qualis tibi habendus est propter tam multa profane fusa?

### III. PUNCTVM.

**D**IVINAE igitur Visitaciones rarò conueniunt cum humanis nisi hæc rara sint, Quia quæ participatio Iustitiæ cum iniquitate? Aut quæ societas luci ad tenebras? Qui frequentiores sunt in illis humanis congressibus, de mundo sunt, ideo de mundo loquuntur, & mundus eos audit. Nos ex Deo sumus; Qui nouit Deum audit nos: qui non est ex Deo, non audit nos. Quasi diceret dilectus Discipulus: sicut libenter mundani mundana loquuntur, sic non libenter de Diuinis audiunt, quia non quadrant simul Diuina & mundana; atque hoc ipso quo mundana placent, Diuina displicent. Neque tantum mundanos putes, inquit ille, qui de mundo loquuntur, sed qui loquentes libenter audiunt; Et hæc est nota mundanæ vel religiosæ animæ, si libentius de mundo vel de Deo loquentem audiat. Quod & alter sanctus Ioannes sic exprimebat: *Qui est de terra, de terra est, & de terra loquitur: Qui de cœlo venit, super omnes est. Et quod vidit & audiuit, hoc testatur, & testimonium eius nemo accipit.* Id est, cum terreni & mundani homines toti sint in terrenis, loquendo, conuersando, & viuendo; non audiunt Eum qui de cœlo venit & qui de cœlo loquitur, quia sic terrena non conueniunt cum cœlestibus, sic humana discordant cum Diuinis.

Atque hinc Diuinus Amator animarum, vt animam quo velit modo, visitet; *Ducam, inquit, eam in solitudinem, & loquar ad cor eius.* Neque illam tantum intelligit solitudinem quæ corporali



praesentia nos sejungit ab aliis : sed illam etiam qua praesentes & simul agentes ita temperate res vniuersas tractamus , vt sicut monet Apostolus , *Qui vtuntur hoc mundo , tamquam non vtantur.*

1. Cor. 7.

Iob. 39.

Cant. 2.

Serm. 53.

Legi posset Diuus Gregorius in hunc Iobi locum , *Cui dedit in solitudine locum , & tabernacula eius in terra saluginis.* Videri vero debet sanctus Bernardus ad haec Canticorum verba : *En dilectus meus loquitur mihi.* Sermo est integer , & illustris de Visitationibus Domini , quae sunt animae sibi recte vacanti : Vnde haec pauca ex multis ad coercendas deinceps liberiores illas Visitationes quae Diuinis obstant , atque ad procurandum cum gratia , interiorem animi & exteriorem vitae statum , qui Sponso venturo viam paret : *Arguit nos pro certo , inquit , negligentia & incuria ipsa inopia nostra. Nam si quis nostrum integrè & perfectè , iuxta verbum Sapientis , cor suum tradat ad vigilandum diluculo ad Dominum qui fecit illum , & in conspectu Altissimi deprecetur , simulque votis omnibus studeat parare vias Domini , rectas facere semitas Dei sui : Cui cum Propheta sit dicere , oculi mei semper ad Dominum , & quia prouidebam Dominum in conspectu meo semper : Nonne hic accipiet benedictionem à Domino , & misericordiam à Deo salutari suo ? Visitationibus profecto frequenter , nec vnquam ignorabit tempus visitationis suae , quantumlibet is qui in spiritu visitat , clandestinus veniat , & furtiuus , vt pote verecundus amator. Adhuc ergo longe agentem bene vigilans anima , sobria mente respiciet , & deinceps vniuersa comperiet quae in Dilecti aduentu sponsam tam solerter quam signanter aduertisse monstrauimus , quia ipse ait , qui mane vigilauerint ad me , inuenient me. Et quae plura prosequitur. Sed ô praeclare positas quascumque vigilias , quae tali compensantur Dono !*

Ecclesi. 31.

Quod de comedendo ait Sapiens , Tu etiam de loquendo memineris vsurpare : *Cessa prior , causa disciplina ; & noli nimius esse , ne forte offendas.*

Eadem quippe est oris intemperantia in loquendo , quae est in edendo.

Et quae est regula Temperantiae in edendo , eadem est in loquendo.

In hac 3. parte , Fer. 6. Hebd. 7. Vide & in 1. parte , Die 14. Ianuarij.

IN





## IN FESTO SANCTÆ MARIÆ MAGDALENÆ.

*Vides hanc mulierem ?* Luc. 7.

### VERITAS PRACTICA.

Tantum à perfecta pœnitentia deficies, quantum à pœnitente Magdalena discedes.

*RATIO EST, Quia tantum à perfecta pœnitentia deficies, quantum aberis ab his omnibus observandis, quæ ad perfectam pœnitentiam requiruntur.*

*Sed quantum à pœnitente Magdalena discedes, tantum aberis ab his observandis quæ ad perfectam pœnitentiam requiruntur.*

*Ergo tantum à perfecta pœnitentia deficies, quantum à pœnitente Magdalena discedes. Quod sanè est & ad pœnitentis Magdalene commendationem perillustre ; & ad nostram salutem peropportunum.*

### I. PUNCTVM.



OTA est historia huius Peccatricis mulieris de qua iam supra in hac parte sunt multæ Veritates propositæ. Nunc quod pluris omnium refert, audienda sunt hæc Christi Domini Verba : *Vides hanc mulierem ?* Quasi diceret, vides absolutum Exemplar perfectæ pœni-



Exodi 30.  
c. 38.

Pf. 50.

tentiæ? Sic est poenitendum sicut illa demonstrat poenitens. Hoc est labrum æneum de speculis mulierum fabrefactum in quo la-  
uandi sunt quicumque sacrificium illud quod est *spiritus contribu-*  
*latus*, sunt oblaturi. *Tantum denique à perfecta poenitentia deficies,*  
*quantum ab hac Poenitente quæ dicitur Magdalena discedes.*

Sic in ipso primo Considerationis aditu, subiicienda nobis est Ve-  
ritas quæ expendenda proponitur, vt ei scilicet declarandæ sub-  
feruiant singula quæ de hac Poenitente refert historia, tum Euan-  
gelica, tum Ecclesiastica. Quamobrem, neque diutius immoran-  
dum est in prima propositione, qua dicitur, tantum te à perfecta  
poenitentia recessurum, quantum aberis ab his omnibus obseruan-  
dis quæ ad perfectam poenitentiam requiruntur. Nam licet hoc  
necessario fuerit præmittendum tamquam fundamentum totius  
discursus, tam aperte tamen patet, vt probatione non sit opus ad  
intelligentiam, sed affectu Voluntatis ad Praxim & exequutio-  
nem eorum omnium quæ præscribuntur tamquam necessaria vo-  
lenti serio poenitere. Nonne id vis aliquando? Nonne scis tam  
necessariam esse veram & perfectam poenitentiam, vt si vera non  
sit, nulla sit salus; non sit autem vera nisi concurrant ea omnia  
quæ ad eius formandam veritatem conducunt? O quàm vere alio-  
quin dicitur de his poenitentibus qui non vere conuertuntur, *Non*  
*sunt reuersi in toto corde suo, sed in mendacio!* Quod dices aliis,  
primò tibi dictum puta.

Ier. 3.

## II. P V N C T V M.

**S**ED quantum à poenitente Magdalena discedes, tantum aberis ab his  
obseruandis quæ ad veram & perfectam poenitentiam requiruntur.

Thren. 5.

Non exigitur quidem tanta gratia, neque talis effectus gratiæ,  
quantum ad omnes perfectionis gradus, qualis apparet in hac  
peccatrice poenitente; sed sicut non dubitatur esse necessaria quæ-  
dam præueniens gratia qua clamamus, *Conuerte nos Domine ad te,*  
*& conuertemur*, Ita plane dubitari non debet, quin secundum il-  
lam gratiam nobis communicatam, ea debeamus obseruare quæ  
obseruanda proponuntur in illa Poenitente quæ proponitur om-  
nibus tamquam perfectum Exemplar perfectæ poenientiæ.

Sis licet in minori gratiæ seu perfectionis gradu: at iuxta illum  
tamen gradum sic conari debes eam imitando exprimere, vt non



quidem tam perfecte quam illa diligas; tuo tamen in gradu perfecte diligas & conuertaris, si quæ illa præstat, obserues: Aut certe si ea desis obseruare, tantum desis à vero pœnitente seu à vera pœnitentia, quantum ab illis obseruandis defueris. Idcirco etiam dictum à Domino: *Conuertimini ad me, & ego conuertar ad vos*: Zacch. 8. Quasi diceret, sicut sine me ad vos prius conuersio non potestis inchoare soli vestram Conuersionem: Ita neque ego solus illam perficiam nisi mecum collaboretis, Et nisi me conuersum ad vos per primas gratias sequamini vestro conatu, sicque incipiat conuerti, non conuertar ad vos per necessarias consequentes, ac proinde nulla erit Conuersio. Atque vt manifeste videatis quid facto vobis sit opus, videte hanc peccatricem, videte & facite secundum exemplar quod vobis demonstratur, vt sitis sicut illa, verè pœnitentes & verè conuersi. Quænam autem sunt illa? Tres vulgo pœnitentiæ partes referuntur, sed illis tribus tria quædam alia connectuntur, quorum defectu vix forte hæcenus illarum vnâ partium peregisti. Vide vt in te deficiunt, vide vt insunt in Beata Magdalena, vt inde ad te atque ad alios transferas.

Primum est, audire libenter admonentem de salute, vel adire Concionatorem Apostolicum, vel legere librum aliquem efficacem, vel conuenire hominem probum & pium de Conscientia. Hoc est primum quod fecisse Magdalena narratur: quantumcumque peccatrix esset, sororem tamen suam Martham libens audiebat: persuadet Martha sorori Prophetam illum audire qui dicitur **I E S V S**: consentit Magdalena, prædicantem audit Dominum, tangitur audiendo, compungitur, & ecce tota conuertitur. O Hebr. 4. quale illud Verbum quod fuit penetrabilius omni gladio ancipiti ad dirumpenda tot prauitatis vincula! Itane vero tu monentes audis? Itane viros efficaciores adis quorum verbis accendaris? Hoc est forte quod magis times & odisti; seueriores sunt, inquis, & arctiorem faciunt viam cœli. Hoc est quod te perdit quia hoc est quod in via perditionis te retinet. *Via stulti recta in oculis eius: qui* Prou. 12. *autem sapiens est, audit consilia.*

Secundum in quo deficiis, est, quod licet peritos audias Concionatores, tibi tamen particulatim non applicas quod illi dicunt generatim de peccato, de Diuinis Iudiciis & horrendis pœnis quæ peccatores manent; quasi aliis dicerentur & non tibi, quacumque dicuntur de difficili salute Diuitum, vel eorum quorumlibet qui



praua mundi cupiditate tenentur, quasi non sis ex illis Diuitibus & mundanis ad quos Diuinus sermo dirigitur; Nempe te non ita diuitem putas quàm velles, ficque non putas omnino eum esse de quo Scripturæ loquuntur: nec miser cogites quod satis fit ad æternam perditionem velle esse Diuitem sicut expresse monet Apostolus: *Qui volunt Diuites fieri incidunt in tentationes & in laqueum Diaboli*; & quæ plura refert; ficque de aliis concupiscentiis, satis est ad peccatum, velle peccare, vel epulari & indulgere genio largius, licet non actu indulgeas, quia forte non potes commodè; quomodocumque tandem id accadat, verendum tibi maximopere est ne ex illis sis qui audiebant quidem Dominum neque tamen auditis mouebantur, quia vt illis exprobrat Dominus: *Vos estis qui iustificatis vos coram hominibus, Deus autem nouit corda vestra*. Non sic Magdalena, non sic: non ad alios refert sed ad se vnam, quæcumque audit; se velut vnam peti, se vnam vrgeri sentit, ficque cum Dauide inclamat, *Conuersa sum in arumna mea, dum configitur spina; delictum meum cognitum tibi feci, & iniustitiam meam non abscondi*.

Sed esto mouearis aliquando, & non possis dissimulare qui sis; Tertium est tamen aliud in quo plurimum deficis, nempe in dies differs conuerti; quod expresse verat Scriptura; *Non tardes conuerti ad Dominum, & ne differas de die in diem*: Tu quasi expresso voluntatis oppositæ actu nihil putas festinandum; In re, inquis, tam seria & momentosa non est properandum; satis tibi videris velle modò, quod aliquando facias; atque interim vnus idemque semper manes, semper amans pecuniæ & honoris & voluptatum: neque ab his vnquam desistes nisi quando desistes viuere, vel quando ita dolore tuæ vitæ deficientis oppriméris, vt de solo dolore liceat cogitare. Itane salutem animæ ludis? Itane conuerti hoc est, an potius Deum irridere!

Quàm longe alia est Magdalena! Statim atque sensit aculeum, non ad mensem, non ad hebdomadam; non ad proximum festum, non ad crastinam sequentem diem, sed illà ipsâ horâ, vt cognouit quod IESVS accubisset in domo Pharisei, prodit illa continuo & ad pedes sui Redemptoris se prona conjicit. Quod certe tempus & diuersorium facile probant, nullam à primo conuersionis sensu, interjectam fuisse moram; nam si quid retardare voluisset, non profecto tempus illud elegisset, illumue locum conuiuij



quo peccatricem vel pœnitentem mulierem apparere, insolitum & portento simile foret. *Nescit quippe tarda molimina, Spiritus sancti Gratia*; vel si properantem retardas gratiam, retardata offenditur, & offensa deserit offendentem. Si diutius expectasset accedere, numquam forte accessisset. *Væ pregnantibus in illis diebus* quos sibi quisque suo præscribit consilio. S. Ambr. Matth. 24.

Atque vt horum trium defectu plane intelligas, quomodo tres illæ Partes quæ magis dicuntur pœnitentiam conficere, plane deficiant; Disce ab exemplari tuo, quales esse deberent, & quales in te sunt. *Vides hanc mulierem?* Vides vt lachrymas vbertim fundit, vt his lauat pedes Domini, vt capillis suis eos tergit, & vnguento vngit? Quorsum hæc omnia, nisi vt vehementiam interni doloris de peccato indicet, qui dolor ita necessarius est, vt sine ipso nulla sit vel Contritio vel Attritio de peccato? Non est quidem doloris sensus & affectus ita necessarius: sed effectus, & quem vocant appretiatium dolorem de peccato, tam necessariè requiritur quàm ipsa Contritio vel Attritio cum Sacramento, quæ nihil aliud est quàm ipse talis dolor de peccato, vt quocumque pretio proposito iam non liberet, nec deinceps, vlllo modo peccare. Dices forte te id ita velle: sed quid sit verè velle, disce à Magdalena; *Vides hanc mulierem?* Vides vt quæ fuerunt peccati quondam instrumenta, procul à se amoveat, vel si amovere non potest, quàm vehementer illa in se oderit & detestetur, nempe oculos, vestes, capillos, torques & similia peccati nutrimenta? *Quod sibi turpiter exhibuerat*, inquit sanctus Gregorius, *hoc iam Deo laudabiliter offerebat*. Itane tu? Non quæritur à te vt tam largiter ex dolore fleas si forte non id possis? Neque vt tua bona projicias & effundas in pauperes: sed id tantum, aut certè præcipuè vt deponas affectum ab illo præsertim objecto quod fuit causa peccati. Hoc est quod quæritur & quod ita debes vt nisi reddas, nihil agas. Non tua sed te quærit Dominus; at te numquam illi reddes, nisi ab objectis quibus implicaris, te retrahas & vere dicas: *Tuus sum ego, saluum me fac*. Vnde hæc apta Prophetæ Verba: *Et contaminabis laminas sculptilium argenti, & vestimentum conflatilis auri tui, & disperges ea sicut immunditiam menstruata*: Egre-  
dere, dices ei. Vide quæ supra de his fusius, in 1. parte, Dominica  
4. Aduentus. Hom. 33. in Euang. Ps. 118. Is. 30.

PARS alia pœnitentis est Confessio, cuius necessaria perfectio



confistit in sinceritate detegendi peccata omnia, nullo vt pudore, nullo vt timore sciens volens quidquam omittas, sed potius in illis ipsis firmitus hæreas enarrandis quæ naturalem possent mouere ruborem, tum vt magis offenso Deo satisfiat, tum vt cautius consulatur Conscientiæ, quæ se alioquin nisi caueatur, tetam vellet, & leuiter idcirco delibat quod pleno funditus dicendum est ore & corde, sicut ipsi Christo patere non dubitatur.

Iosue 7.

*Fili mi, Da gloriam Domino Deo Israel, & confitere atque indica mihi quid feceris, ne abscondas. Responditque Achan Iosue, & dixit ei, Vere ego peccaui Domino Deo Israel, & sic & sic feci; Vidi enim inter spolia pallium coccineum; Et quæ plura singillatim ac distinctè aperit. Sic prorsus vnicuique fideliter ac sincere procedendum est.*

Hom. 33.

*Sic Magdalena non erubuit, ait sanctus Gregorius. Nam quia semetipsam grauiter erubescere intus, nihil esse credidit quod verecundaretur foris. Sic peccatum suum confitetur & confitendo exag-*

Serm. 93.

*gerat, quasi esset peccatum totius ciuitatis, seu quasi vna, omnium ciuitatis esset causa peccatorum. Sic luculentè sanctus Chrysologus expendit quod ait Euangelista, Mulier in ciuitate peccatrix. Ciuitate, inquit, peccauerat, quia fama sua famam totius tetigerat ciuitatis, sicque iam non peccatrix solum, sed ipsius ciuitatis facta fuerat ipsa peccatum. Hec cognouit quod nisi ab illo solo, ciuitatis peccatum non posset auferri, qui solus mundi venerat abolere peccatum.*

**DENIQUE** quod postremam illam spectat partem quæ Satisfactio dicitur, saltem illa est necessaria quæ Scandalum datum eluit, quæ aliena damna reparat, & suæ vitæ statui conformes edit fructus. Quo in genere quid luculentius, quàm quod à prima illa suæ Conuersionis hora supremum vsque ad spiritum Beata poenitens fecit, de qua dicitur quod in vastam altissimi montis speluncam se contulit, vbi triginta vixit annos ab omni hominum consuetudine longè disincta. Tu verò non dicam quid simile, sed quid non dissimile facis? Profitetur illa se poenitentem: Tu vix auderes coram nonnullis quædam pietatis opera prodere, ne te forte irrideant. Denudat se illa suis pretiosis vestibus: Tu pretiosiores quotidie pro humano more appeteres. Totam se illa Christo addicit: Tu te totum mundo & mundanis affectibus. Inhæret illa Cruci & Crucifixo, quibuscumque suis periculis: Tu ne honoris leue damnum velles pro Christo pati. Secessit illa & mundo vt soli Christo viuat: Tu nihil asperius ducis quam humanis ab-



*Tantum à perfecta pœnitentia deficies, quantum, &c. 751*

ducī congressibus, quàm non videre & non videri! O te nimis excæcatum si non vides quantum ab illa distes!

### III. P V N C T V M.

**S**IC ergo etiam manifeste patet quantum à vera & perfecta pœnitentia deficias.

Quid est enim ab ea deficere, nisi ab his obseruandis recedere, quæ ad veram & perfectam pœnitentiam requiruntur? Quænam porro sunt illa nisi quæ in pœnitente Magdalena, tamquam in viua pœnitentium forma sunt declarata? Vidisti vero quantum ab hac forma distares: Quid est ergo quod non simul videas quantum à vera distes pœnitentia? Vel si satis aperte id vides, quid animi sentis? Quid restat sensus vere Christiani, vbi res agitur tanti momenti & ponderis? Numquid qui cadit, non resurget? Et qui auersus est, non reuertetur? Quare ergo auersus est populus iste auersione contentiosa? Apprehenderunt mendacium, & noluerunt reuer-<sup>ier. 8.</sup>ti. Attendi & auscultavi, nemo quod bonum est loquitur, nullus est qui agat pœnitentiam super peccato suo dicens, quid feci? Omnes conuersi sunt ad cursum suum, quasi equus impetu vadens ad prælium. *VVLNVS*, & liuor & plaga tumens non est circumligata, nec curata medicamine, neque lota oleo. *DEDIT* ei Deus locum pœnitentia, & ille abutitur eo in superbiam. Hoc est videlicet, hoc est quod te retardat, quia tardat Dominus, quia expectat, quia bonus est, quia misericors, quia longanimis. Itane vero propterea differendum? An diuitias bonitatis eius & patientiæ & longanimitatis contemnis? Ignoras quoniam benignitas Dei ad pœnitentiam te adducit? Secundum autem duritiam tuam & impœnitens cor, thesaurizas tibi iram in die iræ, & reuelationis iusti iudicij Dei, qui reddet unicuique secundum opera eius.

Apte vero etiam sanctus Gregorius Sermonem de hac nostra Pœnitente concludens, Rationem inde accipit & Motiuum non differendæ pœnitentiæ, quod Deus idcirco expectet ne differamus, idcirco bonitatem suam offert, vt ea moti facilius inducamur ad reditum. Ecce, inquit, vocat, & quos inquinatos denuntiat.<sup>Hom. 33. 19</sup> Hos etiam amplecti querit, à quibus desertum esse se queritur. Nemo ergo tantæ misericordiæ tempus perdat, nemo oblata remedia Diuinæ pietatis abjiciat. Ecce superna benignitas auersos nos renocat, & nobis



reuerentibus clementia sue sinum aperit; Vnusquisque ergo penset quo debito constringitur, quando Deus illum expectat ne contemptus exasperetur. Et post allatum Ieremiæ locum, Attendi & auscultauit: Videte tantæ pietatis sinum, considerate apertum vobis misericordiæ gremium: Quos male cogitantes perdit, bene recogitantes quarit. Ad vos ergo, fratres charissimi, ad vos oculos mentis reducite, & pœnitentem peccatricem mulierem in Exemplum vobis Imitationis anteferte. Et quæ plura prosequitur, quæ eò tendunt vt animus à re nimis amata vnde est peccatum, auertatur, quia in ea præcipue auersione consistit status animi pœnitentis, vt alibi demonstratur.

---

*Possset hac etiam formari Veritas:*

Magdalena, seu Anima verè pœnitens, verus est Christi triumphus.

*Vel sic aptius:*

Sicut Amor de Christo triumphat in Cruce: ita Christus de amore, in anima peccatrice, Cruci subiecta.

RATIO EST, Quia idcirco Amor de Christo triumphat in Cruce, quia Christum quodammodo vincit, spoliat & ita sibi subiectum habet, vt quidquid iubet Amor, hoc Christus in Cruce faciat & patiatur. Sed in anima peccatrice vere pœnitente & Cruci subiecta, qualis est Magdalena, hoc ipsum Christus facit de amore mundano. Nempe illum in ea vincit anima, & ita sibi subiectum tenet vt quidquid Christus velit, hoc anima vere pœnitens faciat & patiatur, aut non sit vere pœnitens. Ergo sicut Amor de Christo triumphat in Cruce, ita Christus de amore in anima peccatrice Cruci subiecta. Vnde & aliter possset concipi Veritas:

Quem non perfecte pœnitet, Christi triumpho inuider.

Ratio supponit quod per se est clarum, nempe inuidere Christi triumpho



*Quem non perfectè poenitet, Christi triumpho inuidet.* 753

triumpho nihil aliud esse quàm impedire ne triumphet de nobis: quo supposito sic declarat Veritatem; Ille impedit ne de se Christus triumphet qui se non finit perfecte Christo subijci. Sed quem non perfectè poenitet, non finit se perfectè Christo subijci. Ergo ille impedit ne de se Christus triumphet. Quod est maiorem Christi obscurare Gloriam quam de te possit consequi, & quam ei deberes omnibus modis procurare.

Videri potest Dñus Bernardus sermone sexagesimò quarto, in Cantica, vnde hæc fundamentalis propositio est eruta: *Triumphat de Deo amor*, nempe in Cruce, *vbi semetipsum exinanivit, ut scias amoris fuisse quod plenitudo effusa est, quod altitudo adequata est, quod singularitas associata est*; Quod & fufius demonstrare est facile per analogiam ad triumphi seu ad triumphantis proprias qualitates; quo in sensu dixit Apostolus: *Deo gratias qui semper triumphat nos in Christo IESV.* De quo & alibi, *Expolians principatus & potestates traduxit confidenter palam triumphans illos in semetipso.* Vide & supra in hac 3. parte, Feria 5. primæ Hebdomadæ, in Solemnitate sanctissimi Sacramenti, vbi hæc habetur Veritas:

Quæ hodiernum Christi triumphum res vna magis illustrare debuerat, hæc vna magis obscurat.



## IN FESTO SANCTI IACOBI Die 25. Iulij. APOSTOLI.

*Potestis bibere Calicem, quem Ego bibiturus sum?*  
*Dicunt ei, Possumus.* Matth. 20.

VERITAS PRACTICA.

Sicut possumus, sic debemus.

*Id est,*

Qua ratione tenemus nos posse bibere Calicem Domini: eadem tenemur bibere.

3. Pars.

Ccccc



*RATIO qua tenemus nos poffe bibere Calicem Domini, hac eft inter alias, quod à Domino nobis offertur bibendus.*

*Sed ipfa hac ratio perfuadet nos teneri ad fumendum & bibendum talem Calicem.*

*Ergo qua ratione tenemus nos poffe bibere Calicem Domini, eadem tenemur bibere. Quod breuius dici poteft, Sicut poffumus fic debemus. Sic debemus loqui & facere exemplo fancti Iacobi, quod hodie proponitur imitandum.*

I. P V N C T V M.



*IC eft vnus è filiis Zebedai dictus Iacobus maior, frater germanus Ioannis Euangelifta, quorum Mater accedens ad Dominum & adorans, petiit, vt vnus eorum ad dexteram Ipfius aliquando regnantis federet, & alter ad finiftram. Quibus respondens Dominus: Nefcitis, inquit, quid petatis; Potestis bibere calicem quem Ego bibiturus fum? Dicunt ei, poffumus. Ait illis: Calicem quidem meum bibetis, federe autem ad dexteram meam vel finiftram, non eft meum dare vobis, fed quibus paratum eft à Patre meo. Id eft, non fic immeritis aut personis fauore datur ficut putatis, fed oportet vnumquemque illud ante mereri fecundum Gratias ipfi à Deo datas. Secundum formam ferui loquitur, inquit fanctus Auguftinus. Diuus vero Hieronymus fic paulo fufius: Regnum Dei, non eft tantum dantis, fed etiam accipientis; quicumque fe dignum praeberit, accipiet quod non persona fed vite paratum eft.*

*1. de Trin.  
c. 12.*

*Sapienter autem monet fanctus Ioannes Chryfoftomus, non effe mirum fi adeo imperfecti fuerint Apostoli vt primas fedes ambierint, nondum enim myfterium crucis erat confummatum, nondum gratia fpiritus in corda ipforum infufa. Quod fi virtutem ipforum difcere cupis, quales post datam gratiam fpiritus fuerint, confidera, & videbis omnem ab illis peruerfam affectionem fuiiffe fuperatam. Et post multa, perpendendum exponit quomodo statim ab hac opinione ipfos remouit Dominus, contraria eis differens. Nam vos, inquit, de honoribus & de coronis mecum agitis; Ego vero de luctamine atque fudore differo. Non pramiorum hoc tempus eft, nec illa gloria mea modo*



apparerebit : sed cadis & periculorum tempus præsens est. Perspice autem qualiter ipso interrogationis modo & hortatur & allicit. Non enim dixit, Potestisne eadem subire, potestisne vestrum effundere sanguinem? Sed quonam pacto potestis bibere Calicem? Deinde alliciens inquit, quem ego habiturus sum; ut ipsa cum eo communicatione laborum, promptiores redderentur.

Quod & re ipsa præstiterunt. Nam Iacobus inter omnes Apostolos primus pro Christo sanguinem suum rudit in ipsa Ierosolymorum ciuitate, vt refertur in Actis Apostolorum : *Misit Herodes Rex manus vt affligeret quosdam de Ecclesia : occidit autem Iacobum fratrem Ioannis gladio.* IOANNI autem martyrij animus non defuit, ait sanctus Hieronymus, *Missus enim est in feruentis olei dolium, & inde ad suscipiendam coronam, Christi athleta processit, statimque relegatus in Pathmos insulam fuit, sicque bibit calicem confessionis quem & tres pueri in camino ignis biberunt, licet persecutor non fuderit sanguinem.* Act. 12.  
l. 3. Com-  
ment. in  
Marth.  
c. 20.

Atque hinc orta Veritas quo sensu est proposita, sicut possumus, sic debemus, Id est, qua ratione agnoscimus & certo tenemus nos posse calicem Domini bibere, eadem prorsus persuaderi debemus nos ad hoc ipsum teneri, prout occasio patiendi sese obtulerit.

Quænam est autem illa ratio? Nempe Calix ille seu illa quæuis aduersitas quæ nos affligit, non nisi permittente Deo sic nobis obuenit. Ille est qui nobis Calicem offert, dum hæc offertur patiendi occasio: *Calix in manu Domini vini meri, plenus mixto.* DAVID *calicem in manu tua.* Non sic autem daret aut offerret nisi vires daret ad ferendum quod ferendum offert. *Fidelis Deus est,* inquit Apostolus, *qui non patietur vos tentari supra id quod potestis, sed faciet etiam cum temptatione pronentum, vt possitis sustinere.* Nam & propterea dicitur Calix Domini, id est, pars adæquata nostris viribus ab ipso Domino sic ordinata, sicut antiquitus apud Iudæos solebat Paterfamilias aut primus inter Conuiuas unicuique partem calicis & potus ministrare, vt omnes secundum ætatem & vires biberent, vt iam alibi dictum est. Sic Dominus Calicem porrigit, id est, proportionatam nobis partem crucis & aduersitatis tolerandæ subministrat: *Quæ merito ferri unicuique suadet, inquit sanctus Leo, quia propriis modis atque mensuris ab unoquoque toleratur.* Ps. 74.  
Ex. 23.  
1. Cor. 10.  
Fer. 5. Dom.  
2. in Quadr.  
Serm. 9. de  
Quadrages.

Sic diserte sanctus Augustinus in illa Psalmi verba: *Ignis &* Ps. 11.



Ps. 116.

sulphur, & spiritus procellarum; pars calicis eorum; CALICEM, inquit, propterea puto appellatum, ne quid prater modum atque mensuram, vel in ipsis peccatorum suppliciis per Diuinam providentiam fieri arbitremur. Et ad illum verbum, Calicem salutaris accipiam & nomen Domini inuocabo: O HOMO quis tibi dedit calicem salutaris quem accipiens & inuocans nomen Domini retribues ei pro omnibus quae retribuit tibi? Quis nisi Ille qui ait, Potestis bibere calicem quem ego bibiturus sum? Quis tibi dedit imitari passiones suas nisi qui propter te passus est prior? Dat itaque imitari si velis, qui te inuitat ad imitandum: Et tibi si aliquando in difficultatibus videaris deficere, non tam potestatis quam voluntatis iste defectus est. Expende quam id verum & probrosum.

## II. PUNCTVM.

**A**T verò illa ipsa ratio plane persuadet nobis id esse volendum quod possumus, seu quod idem est, nos inde prorsus teneri ad sumendum & bibendum Calicem quem porrigit Dominus.

1. Reg. 3.

Nam cum sit Dominus, nosque eius serui: quid æquius quam seruum cognoscentem Domini sui voluntatem, sese totum illi conformare? Dominus est: quod bonum est in oculis suis faciat. Hic vel vnus Titulus omnem omnino à nobis obseruantiam & voluntariam exigit seruitutem.

Prov. 11.

Deinde vero, cum voluntas eius sit tam æqua, tam iusta & omni ex parte sancta, nemo certe nisi proteruius & impius, tantæ possit æquitati contrahenire. Vnde in hunc sensum apte illud deriuatur quod ait Sapiens, Pondus æquum voluntas eius; Nempe vt ille iniquus esset qui pondus non seruaret æquum; sic plane qui agnitam non seruaret Diuinam voluntatem: quia nobis esse debet velut pondus æquum, velut solum pondus iustum quo res omnes nostras appendere & aestimare debeamus, cum prater Dei voluntatem, in rebus nihil sit nisi falsitas, inanitas, & merum nihil.

Ecclesi. 2.

His adde, quod cum Diuina providentia certis quibusdam mediis vnumquemque regat ad finem suum, sicut nihil consultius quam nos illis mediis quantumcumque asperis & difficilibus stare & inhaerere; sic nihil deploratius quam nos inde discedere. Sustine sustentationes Dei, conjungere Deo, & sustine, vt crescat in nobis vita tua. Probationes sunt nostræ fidei & fidelitatis, Vnde



Statim sequitur in eodem Scripturæ loco saepe reuoluendo: *Omne quod tibi applicitum fuerit, accipe, & in dolore sustine, & in humilitate tua patientiam habe, quoniam in igne probatur aurum & argentum: homines vero receptibiles in camino humiliationis.* Nonne propterea diximus dictum à Domino, supremas illas sedes quas petebat Iacobus cum Ioanne fratre, non ita dari vt petebant, sed ante probandos eos esse quibus concederentur, & antè bibendum Calicem cum Christo Domino, quàm cum ipso regnandum? Nonne sic ipsi Domino patiendum fuit, vt ita intraret in gloriam suam? Nonne sic ipse Dominus vt Petro indicaret quam libenter vellet pati: *Calicem*, inquit, *quem dedit mihi Pater, non bibam illum?* Quasi hoc ipsum diceret quod hic demonstramus: aut potius quasi suo Ipse dicto & exemplo probaret quod dicimus, Hoc ipso videlicet quo Deus est qui dat bibendum Calicem, bibendus est. Hoc eius meritum à nobis exigit: hoc illi tam multis & validis debemus nominibus, vt vel vni ex his non possemus id negare: quantò minus tam multis? Profer si quid habes contra, & confer cum Christi merito.

Luc. 24.

Ioan. 18.

## III. PUNCTVM.

**S**ICVT igitur possumus, sic debemus: Sicut scimus esse patiendum, sic est patiendum: sicut scimus posse, sic oportet velle: sicut scimus idcirco nos posse quia Dominus est qui Calicem bibendum affert, quem certe non afferret nisi possemus bibere, & nisi daret simul posse quod vult nos pati & agere: sic profecto quia ipse est Dominus, sic nos velle oportet quod ipsum velle nouimus. *A Domino egressus est sermo*, dicunt serui probi & fideles, *non possumus extra placitum eius quidquam aliud loqui.* Certe poterant libera sua voluntate resistere Diuino placito, sicut multi resistunt: sed dicunt se non posse, quasi dicerent se non aliter debere facere; Hoc est enim non posse quod non potes rationabiliter, quod non potes religiosè, quod non potes Christianè. *Non enim possumus aliquid aduersus Veritatem, sed pro Veritate*, ait Apostolus. Gen. 24. 2. Cor. 13.

Et certe in multis casibus, tam necessario patiendum est, vt velis nolis, sic oporteat pati: At nonne tum satius est sic libenter pati quia sic Deus modò vult, quàm repugnare & fugere,



Pron. 14.  
Ibid. 9.

cum propterea non desinas pati ? Hinc illa Sapientis præclare dicta : *Impatiens operabitur stultitiam. Qui impatiens est sustinebit damnum* ; Quali diceret , solus impatiens sustinet damnum ex aduersitate , cum patiens ex illa proficiat.

Matth. 23.

Sed esto , sit tibi liberum & facile te à bibendo Calice modò auocare , quem tamen vides à Domino perrigi : Potestne Dominum à te auocare ? Nam vnum & idem est porrectum fugere Calicem , & fugere porrigentem. Non auderes negare Eum esse , cum tibi non illud accidat nisi Eo permittente , & volente. Non auderes dicere , non possum ferre quod offertur , quia Dominus est qui nihil offert quod non possis. Quid ergo dices ? Quid est quod audebis ? Nempe hoc vnum , *Nolo*. Licet ipse sit Dominus qui Calicem attulerat , licet velit me bibere , licet possim , *Nolo tamen* , O infame Verbum ! ô proteruam vocem ! Sic tamen est , sic propterea dictum : *Quoties volui , & nolui* ? Obstupesce , Confundere , & exardesce contra.

Eccle. 4.

2. Tim. 3.

Ier. 49.

*Funiculus triplex difficile rumpitur*. Hunc tibi funiculum facito ex his tribus simul considerandis in quolibet casu aduerso. Primum est , Diuina voluntas sic ordinans. Secundum est , huius ordinationis seruata vel non seruata magnum momentum ad salutem & perfectionem tuam. Tertium est , exemplum Christi & sanctorum omnium de quibus asseritur quod *omnes qui pie volunt viuere in Christo IESU , persecutionem patientur*. *ECC E* quibus non erat iudicium ut biberent Calicem , *bibentes bibent* : & tu quasi innocens relinqueris ? *Non eris innocens , sed bibens bibes*. Vide in 2. parte , totam Hebdomadam 2 in Quadragesima. Et in 4. parte , Fer. 5. Hebdom. 18. Vbi hac expressa declaratur Veritas :

Si non agis quod vult Deus , hoc vnum infame habes quod respondeas : *Nolo* , non placet.



Qui non vult mortificantem Dominum, non vult viuificantem. 759



## IN FESTO SANCTÆ ANNÆ. Die 26. Iulij.

*Dominus mortificat & viuificat.* 1. Reg. 2.

### VERITAS PRACTICA.

Qui non vult mortificantem Dominum, non vult viuificantem.

*RATIO EST, Quia qui non vult Dominum ordinate, seu quo se ille modo suaque communicat, non vult illum absolute. Sed qui non vult illum prius mortificantem quàm viuificantem; non vult illum ordinate nec quo se ille modo communicat. Ergo absolute non vult illum viuificantem. Quod perinde damnosum est, ac dicere: nolle Deum sibi propitium.*

### I. PUNCTVM.

**Q**UONIAM futurum erat, inquit sanctus Ioannes Damascenus, ut Dei Genitrix & Virgo ex Anna oriretur, natura Gratia factum anteuertere minime ausa est: Verum tantisper expectauit, dum gratia fructum suum produxisset; Itemque alibi, Quemadmodum prisca illa Anna, cum sterilitatis morbo laboraret, per orationem ac promissionem, Samuelem procreauit: eodem modo hæc etiam per obsecrationem & promissionem, Dei genitricem à Deo accepit, ut ne hic quoque cuiquam ex illustribus matronis cederet. Itaque Gratia, nam hoc sonat Anne vocabulum, Dominam parit, id enim maria nomine significatur. Verè etenim rerum omnium conditarum Domina facta est, cum Conditoris mater extitit. Rursumque Idem sanctus Pater de hac quam vocat *Lectissimam* & summis laudibus dignam mulierem; Merito igitur, Anna Diuino Spiritu plena, leto hilarique animo personat, Congaudete mecum qua Promissionis germen ex

Orat. de  
Natiuit.  
Virg. Ma-  
ria.

l. 4. de Fide  
per c. 15.

Suprà.



sterili ventre peperit, ac benedictionis fructum uberibus meis, ut optaueram, nutrio. Sterilitatis mœstitiā exui, & latam fecunditatis vestem indui. Congaudeat mecum hodie Anna illa Phenenna aduersaria: & nouum hoc atque inopinatum miraculum quod in me gestum est, suo exemplo concelebre.

Alludit scilicet ad Canticum Annæ matris Samuelis, quod habetur primi Regum secundo capite, ubi hæc inter alia de sua sterilitate & fecunditate: *Donec sterilis peperit plurimos, & quæ multos habebat filios, infirmata est. Dominus mortificat & viuificat, deducit ad inferos & reducit. Dominus pauperem facit & ditat: humiliat & subleuat; Et quæ sequuntur conformia, ex quibus deducitur quod sicut illæ Beata mulieres prius senserunt Dominum mortificantem quàm viuificantem, sic & nos non nisi vnum ab altero expectemus; Aut certe, Qui nolit Deum mortificantem, audiat ex Veritate proposita, quod Eum etiam nolit viuificantem.*

Ratio est valde consideranda, quotiescumque agitur de Deo inuocando, seu de Diuinis petendis aut recipiendis: Nempe hæc omnia non nisi ordinate & quo se velit Deus modo communicare, petenda sunt & expectanda. Cum enim ut ait Sapiens, *Sap. 11. Omnia in mensura & numero & pondere disponat Deus*, Sic nos etiam meritò sibi suoque Diuino subiectos ordini & prouidentia accommodatos exigit; sic vult hyeme se i quod æstate colligatur, sic vult in iuuentute colligi quod in senectute possideatur: sic vno Verbo suis omnia spatiis & temporibus attemperauit, ut qui vellet aliquid aliter atque ordinatum est, non illud velle dicendus esset, neque enim vellet rationabiliter, sed insanè, impie & infandè. Hoc esset enim tentare Deum, hoc esse petere miraculum, hoc esset velle Deum peruertere suum ordinem; Quæ non nisi temeraria præsumptione cogitari possunt, cum ne quidem pro salute animarum ordinatus rerum cursus immutetur. Numquid Deum docebit quispiam scientiam, qui excelsos iudicat? Numquid Deo potest comparari homo, etiam cum perfectè fuerit scientia? Numquid semitam seculorum custodire cupis, quam calcarunt viri iniqui? *Iob. 21. Ibid. 22. Acquiesce igitur ei, & habeto pacem, & per hæc habebis fructus optimos. Suscipe ex ore illius legem, & pone sermones eius in corde tuo.* Sic apte apud Iobum, & passim in Scripturis.



II. PUNCTVM.

**S**ED qui non vult Dominum prius mortificantem quàm viuificantem, non vult Dominum ordinate, seu quo se ille modo & ordine communicare statuit.

Hic est enim ordo seu ordinarius agendi modus Dei, vt priusquam insignem aliquam Gratiam cuiquam conferat, permittat eum affligi, & eo maxime laborare atque egere bono quod illi collaturus est, vt euidentius postea possit agnoscere beneficium, nec inde gloriatur nisi in Domino.

Sic Tobias agnoscebat acceptam gratiam, *Benedico te Domine Tobias 11. Deus Israël quia tu castigasti me, & tu saluasti me. Tu flagellas & sa- Ibid. 13. luis, deducis ad inferos, & reducis.* Sic Sapiens: *Tu es Domine qui Sap. 16. vita & mortis habes potestatem, & deducis ad portas mortis, & reducis.* Sic beatus Iob: *Ipsè vulnerat & medetur: percutit, & manus eius Iob. 5. sanabunt;* Sic ipse denique Deus: *Ego, inquit, occidam, & ego vi- Deut. 32. uere faciam: percutiam, & ego sanabo.*

Quibus Scripturæ locis consonant sancti Patres. Mos est, inquit in Ps. 29. sanctus Basilius, *sacri eloquij, si quando tristitia lataque commemorat, tristitia letis in ordine preponere, fruitio enim boni efficitur incundior, tristibus iam exactis. Beneficium pœnæ est posterius: percutiam & ego sanabo: Ego occidam, & ego viuere faciam. Quæ nos affligunt, præcur- Ad caput 30. Ier. runt: quo maiore cum constantia multiplicem gratiam nobis collatam conseruemus.* Sic sanctus Hieronymus: *Primum tristitia annuntiantur ut post malorum magnitudinem lata succedant. Gratiior quippe est sanitas agrotatione depulsa: & doloris magnitudo in magnitudinem vertitur gaudiorum.* Et ad Marcellam scribens: *Dominus te in laboribus ho- Ep. 4. minum posuit, & salutifero paterne pietatis verberè visitauit, vt in paucis vexatam in multis bene disponderet.*

Sanctus quoque Gregorius Nazianzenus sic eloquenter: *Domi- Orat. 32. nus, inquit, mortificat & viuificat, qui sola voluntate omnia facit at- que immutat: qui ex nocte diem facit, ex hyeme ver, ex tempestate tranquillitatem, ex siccitate pluuiam.* Et post allata exempla Iosephi & Hebræorum, sic pergit, *quid hoc admirabilius, aut illustrius Diuinae magnificentia argumentum, cum ex rebus perditis ac deploratis, iter secundis aperire voluerit?* Sanctus vero Papa Gregorius de his fusissime in moralibus. Ac paucis denique sanctus Bernardus sue



Serm. 16. in  
Cantica.

ad Intellectum siue ad affectum: Paterna vox est, percutiam & ego sanabo. Non est proinde quod à Patre formides, qui etsi feriat, numquam vindicat. Id est, numquam ita ferit vt tantum feriat & puniat; sed simul feriendo sanat & benefacit, sicut & sanando ferit ac percutit. O verè paternam simul ac maternam manum!

### III. P V N C T V M.

Is. 58.

Ioan. 7.

Is. 21.

Deut. 4.

Sapien. 1.

Ecol. 11.

**Q**VI non vult igitur mortificantem Dominum, non Eum vult, nec Eum certe habebit viuificantem, quia non Eum vult ordinate, non vult conformiter voluntati & ordinationi Diuinæ. Me etenim de die in diem querunt, & scire vias meas volunt, quasi gens qua Iustitiam fecerit, & iudicium Dei sui non dereliquerit. Quasi diceret, non me inuenient quia non bene querunt. Queritis me, & non inuenietis; & ubi ego sum, vos non potestis venire; nisi vos videlicet cum gratia disponatis. Venit mane & nox: si queritis querite, nempe vt oportet, vnde & addit conuertimini, venite. Quod & alibi apte exprimitur: Cum quaesieris Dominum tuum, inuenies eum: si tamen toto corde quaesieris, & tota tribulatione anima tue. Quasi diceretur, non aliter Eum inuenies; Quoniam inuenitur ab his qui non tentant illum, inquit Sapiens: & proinde ab his qui tentant illum non inuenitur. Tentant autem vt diximus, qui perperam & contra ordinatum rerum statum aliquid petunt.

Mane semina semen tuum, & vespere ne cesset manus tua; hoc est, vtere mediis ordinatis ad habendum quidquid petis; sicut necessario seminandum est & laborandum volenti triticum: quin & oportet vt semen iactum in terram prius mortificetur quam viuificetur. Sic plane nobiscum à Deo agitur. Et quidem magis gratiose & munifice nobiscum agitur, quàm si nihil à nobis expeteretur. Sic enim nos Cooperatores suorum donorum efficit, in quibus obtinendis maior est gloria, de nostro aliquid contulisse ad meritum, quàm ex mero fauore nobis omnia fuisse data.

Sic beatæ Annæ plus debemus quod dum sterilis esset, suis obtinuit precibus nobilem illum suum partum, Beatam Virginem Dei matrem, quàm si sterilis non fuisset, nec orasset. Quamobrem opportune sanctus Ioannes Damascenus: O par Beatum, Ioachim & Anna, vobis omnis Creatura obstricta est. Per vos enim omnium donorum prestantissimum Creatori obtulit, nempe castam Matrem qua sola

In Natiuit.  
B. Virg.



Nulla operando potest esse major Gloria, quàm querendo, &c. 763

Creatore digna erat. Et alibi. Dignum sanè quidem ac maxime dignum est Eam laudare quæ Divina benignitate, oraculum accepit, ac talem & tantum nobis fructum edidit, ex quo dulcis IESVS prodiit. Hæc eo affectu dicas quo vis à Beata impetrare Anna, ut sicut mortificantem Dominum libens sustinuit antequam vivificantem sentiret, sic tu sustineas & sentias.

Vide in 2. parte, Die 20. Martij. De sancto Ioachimo.



## DE SANCTO IGNATIO FVNDATORE SOCIETATIS IESV.

Ad maiorem Dei Gloriam.

*In gloriam meam creavi eum, formavi eum, &  
feci eum. Is. 43.*

### VERITAS PRACTICA.

Nulla operando potest esse major Gloria, quàm querendo maiorem Dei gloriam.

*RATIO HÆC EST INTER ALIAS, Quod nulla operando potest esse major Gloria, quàm operando sicut Ipse Deus operatur.*

*Sed querendo maiorem Dei gloriam, operamur sicut Ipse Deus operatur.*

*Ergo nulla operando potest esse major Gloria, quàm querendo maiorem Dei Gloriam.*

Ac proinde cùm sanctus Ignatius in formando Societatis IESV Instituto, atque in omnibus suis operibus, maiorem Dei Gloriam semper quæsierit,

D d d d d ij



patet, quanta sit dignus gloria, & in quo Eum præcipue imitari possimus cum Gratia.

## I. P V N C T V M.

Præb. 46.

Ps. 18.



Ecclesi. 43.

AMETSI nulla est Creatura quam Deus non fecerit ad suam Gloriam, *Vniuersa enim*, vt ait Sapiens, *propter semetipsum operatus est*: dicuntur tamen aliquæ præ cæteris vt coeli, vt stellæ, vt Luna & Sol enarrare gloriam Dei, quia luculentius & splendidius notam faciunt Eius potentiam, magnificentiam, sapientiam, & alias Diuinas perfectiones. *Vas admirabile, opus Excelsi SOL. Magnus Dominus qui fecit illum*; Quasi diceret Sapiens, hoc est quod statim dici debet post visum tam admirabile opus; quale est Sol: Magnus & magnificandus qui fecit illum.

Is. 49.

Sic planè dici potest de Sanctis, omnes præcipue sic formati sunt ad maiorem Dei Gloriam; *Seruus meus es tu Israel, quia in te gloriabor*: sed tamen sunt aliqui de quibus in particulari ait, *In gloriam meam creauit eum, formauit eum, & feci eum*, quia per ipsos magis glorificatur, magis notificatur, magis honoratur; Hoc est enim glorificari Deum, cum omnis gloria sic definiatur, *Clara cum laude notitia*. Vnde qui clarius & latius notificant Deum, dicuntur etiam Eum magis glorificare. *Date gloriam laudi eius; dicite Deo, quàm terribilia sunt opera tua, Domine*.

Ps. 65.

Hos inter quàm iure merito referri debeat sanctus IGNATIVS non modo historici eius vitæ Authores referunt, sed & ipsi Commissarij Apostolici & Iudices ordinati ad instruendum quem vocant processum eius Canonizationis, post longam & acuratam, vt fieri solet, inquisitionem; post multa multorum testium iuratorum examina, post maturam denique omnium, vnde certa nosci possunt vestigia Veritatis, discussionem, sic discernunt, sic definiunt, sic grauissima Iudiciali sententia pronuntiant: *Tanto erga Deum amore flagrabat, vt tota die Illum exquireret: & nihil aliud cogitaret, nihil aliud loqueretur, nihil aliud cuperet quàm placere Deo, & Illius obtemperare voluntati*. Itaque se illi totum committebat, *Illum omnino sequi decreuerat, etiamsi toto celo, terraque priuaretur*. *Omnes suas cogitationes, verba, opera in Deum tamquam in finem re-*



Nulla operando potest esse major Gloria, quàm quarendo, &c. 76 §

ferebat; ad Deum ac Dei gloriam honoremque destinabat: atque hoc veluti symbolum AD MAIOREM DEI GLORIAM, in ore semper habebat.

Ex abundantia quippe cordis os loquebatur, & corde simul ac lingua sese ita exacuebat in opus, vt non modo quidquid faceret, id faceret ad Dei gloriam, sed quidquid ad maiorem Dei Gloriam se posse facere cogitaret, id omnino totum tentabat: & si quid non posset facere, hoc ipsum etiam non posse nec facere, referebat ad eundem finem. Hæc tria sunt præcipua Capita vnde zelus sancti Ignatii pro Dei gloria cognosci potest, quæ quidem tria sic patent per vniuersum quem exigit vitæ cursum, ab ipso primo Conuersionis momento ad extremum vsque spiritum, & per eam quam in hunc finem instituit Societatem, vt sit facilius ea legere vel ipsis intueri oculis, intuendo religiosum eius Institutum, quàm scribendo vel narrando referre.

Nonnulla tamen suggeram ex quibus illud triplex Caput facilius declaretur. Ac primum de primo capite quo asseritur Ipsum omnia sua referre solitum ad maiorem Dei Gloriam, tres sunt quidam veluti fontes vnde hæc Praxis emanabat, totidemque notæ sunt certissimæ quibus constet Eum sese in illa constanter exercuisse. Primò, statim atque conuersus est, agnouit apertissime, & singulari affectu gustauit vniuersale hoc principium quod ipse vocat *fundamentum Exercitiorum*, Nempe Hominem esse duntaxat natum Deo colendo, salutique suæ procurandæ. Hunc vnum illi finem esse propositum, hoc Vnum necessarium, hoc vnum cogitandum: cætera quæ sunt super terram tanti ducenda esse, quantum ad illum finem ducunt vel abducunt.

Secundò, cum ab illo fine propensiones animi quas vocant naturales, nos vel plurimum auocent, sic illis edomandis studuit, vt quæ est vniuersis hominibus magis communis, superbia seu vanitas: & quæ ex proprio temperamento particularis illi erat, Iracundia, tam foeliciter in Eo essent edomitæ, vt nullum earum vestigium appareret, nihilque minus ille timeret quam vanitatem: & nihil medici minus crederent quam illum esse iracundum. Atque ex his fiebat vt omni exutus amore proprio, facile cerneret quod vellet à se Deus, & expedite compleret.

Tertio denique, si forte aliquando hæreret dubius de certa Dei voluntate, maiorique eius gloria, non se præcipitem rebus agen-



Coll. l. c. 20.

dis ingerebat, non suæ fidebat prudentiæ, non Zelo, non Spiritui, non feruori se ita permittebat quin semper probaret Spiritus, vtrum ex Deo essent, atque vt peritus Trapezita probaret quid esset melius, quid esset potius: sicut commendatum à Domino refert imprimis Cassianus, *Efficiamur*, inquit, *secundum preceptum Domini, probabiles Trapezita, quorum summa peritia est ac disciplina, probare quodnam sit aurum purissimum*, Et quæ fufius ibi profequitur. Ac propterea sanctus Pater præscripserat sibi regulas quas vocabat *Electionis*, quarum vsu familiari sic utebatur, vt ad singulas prope actiones in quibus aliquid esset dubij, & ancipitis curæ, vtram se in partem ferret, tria hæc obseruaret: Primo momenta rationum vtriusque partis expendebat, & sanctiora semper sequebatur. Secundo, cogitabat quid petenti à se consilium de tali negotio responderet, vt illud ipsum quod alteri daret consilium acciperet. Tertiò denique, sistebat se iudicandum in illo particulari quod à morte instat iudicio, & à se percontabatur quid tum vellet egisse, moxque indubitanter eò se ferebat. O si sic saperent homines, si sic intelligerent & nouissima prouiderent, profectò studiosius Diuinam gloriam quam suam quærerent.

N V N C verò quod secundum est Caput quàm solerter indagaret, Quid præter solitum posset aggredi quod maiori cederet gloriæ, tria sunt etiam in quibus generatim id obseruetur, & quæ ad particularia deriuari possint. Primum est in seipso excolendo & aptando cum Gratia, quid fecerit, quid laborarit, quid suscepit. Nullum est enim genus poenitentiae, nulla mortificationis species, nulla paupertatis, humilitatis cæterarumque virtutum Praxis quam non in summo genere per triplicem perfectionis viam, & per quaternam dimensionem in tota sua latitudine, & longitudine, sublimitate & profundo coluerit, exercuerit & habitum compararit: cumque animaduerneret se virum illiteratum minus esse idoneum promerendæ Diuinæ gloriæ, studia literarum iam annos natus triginta tres, suscepit & perfecit. Secundum est quid in aliis per sese fecerit quamdiu vixit, quo de argumento lege caput vndecimum libelli, qui *gloria sancti Ignatii inscribitur*.

Tertium est, quid per alios ad omnem posteritatem egerit, conuocando propterea Socios, Societatem propterea instituendo, &



his informando legibus quæ totæ essent ad maiorem Dei Gloriam : nullum omittendo genus obsequij quod impendi posset in salutem animarum, nullum admittendo genus officij, quod illa possent impedire obsequia. Et licet vbique paterent occasiones iuuandî proximi, Diuinæque promouendæ Gloriæ, quamcumque se in mundi partem daret : vt tamen illud propositum assequeretur religiosius & certius, nec in eo exequendo tantisper deuiaret, peculiari voto se suosque voluit astringere Summo Pontifici, vt vbicumque terrarum ipse videret maiorem fore Dei Gloriam, illuc eos mitteret, etiam pedestres si vellet, etiam sine vlllo viatico, etiam inter Turcas & inter certa vitæ discrimina, nec possent vllam eò proficiscendi excusationem prætere. Quis mihi det hoc gemino Spiritu vel sic posse iuuare alios, vel sic ab aliis velle adiuuari?

QVOD postremum est Caput; si quid majus non posset facere, hoc ipsum ad maiorem Dei Gloriam referebat, vel agnoscendo id nolle à se Deum, vel aduertendo ipsum velle alia cum quibus illa repugnarent quæ alioquin pia & sancta iudicabat. Non poterat quippe Orientem adire cum Sociis, nec ipsas sacras Ierosolymorum plagas reuîsere, quod è Diuina Gloria tam opportunum iudicabat ad infidelium conuersionem : Romæ resideat necesse est, inde ne discedat officij ratio exigit; Non discedet, ibi residebit, ibi vitam aget & agere desinet; Ac tunc Ierosolymam non petere, credet esse maiorem Dei Gloriam. Non poterat chorum seu quotidianum Ecclesiæ cantum cum exercitationibus literariis conjungere; Chorus omittatur, sed non alio fine quam vt majori seruiatur Dei Gloriæ. Non poterat denique Societatis institutum sartum tectum conseruare, nisi duæ struerentur portæ, quarum altera pateret dyscolis, & altera clauderetur probatis & prouectis Viris, ne in Præsules assumerentur: quod vtrumque non carebat suis difficultatibus & incommodis, quæ sanctus Pater certe præuidit: sed ad maiorem Dei Gloriam toleranda iudicauit.

Atque ex multis hæc pauca delibasse sufficiat, vt dum Veritatem Practicam quæ perpendenda proponitur expendemus, facilius agnoscamus quo Ille dignus sit cultu quæue gloria, qui Diuinæ Gloriæ sic studiosus fuit, vt ea quæ posset agere omnia, & quæ etiam non posset agere, eò referret & dirigeret, quantum dirigi



poterant; Atque in ea præcipuè religionis parte quâ in primis excelluit, prouocemur ad illum imitandum; Cum & reuera nihil sit vtilius, nihil optabilius, & vt habet Veritas, *Nulla cuiquam operando maior esse possit gloria, quàm querendo maiorem Dei gloriam.* Cuius quidem Veritatis multa possent afferri rationes.

Dici enim primo posset, nullam esse maiorem gloriam quàm ipsius Diuinæ Gloriæ participationem, quam sibi demeretur quisquis illam Deo procurat. Deinde vero, cum querere maiorem Dei Gloriam nihil sit aliud quam offerre Deo quod Ipse carius & præstantius ducit; nonne hinc aperte posset demonstrari, quanta sit inde Gloria querenti & donanti Deo tale bonum? Adde quod cum Deus numquam patiatur se liberalitate vinci ab homine, dixeritque conceptis & expressis Verbis, *Quicumque glorificauerit me, glorificabo eum:* Quis non videt inde quantum Gloriæ redundare possit in Eius opus qui quærit Dei Gloriam?

Sed his prætermis, Ratio quæ affertur, videtur magis Practica & vniuersæ rei spirituali magis obsecundans: Nempe nulla est operando maior gloria quàm Ipsum supremum Opificem, operando imitari, & quantum homini fas esse potest, sic Illum in agendo exprimere, vt ad eum modum & finem quo Deus operatur, ita & operari homo dicatur: non ex æqualitate quidem, quod nec fieri nec cogitari potest, sed ex illa omni similitudine quæ cum Deo possit haberi, prout intelligebat Apostolus, ad illam nos exhortans: *Imitatores Dei estote, sicut filij charissimi.* Tam gloriosum est sic imitari Deum aut illi similem fieri, vt in ea similitudine Dei, sit posita beatificæ visionis gloria. *Nondum apparuit quid erimus*, ait sanctus Ioannes, *scimus quoniam cum apparuerit, similes ei erimus, quoniam videbimus eum sicuti est.* Hoc est videlicet quod ambiebat posse suis viribus Rex ille superbiæ qui dicebat: *Ascendam super altitudinem nubium, similis ero Altissimo:* In quo certe peccauit, vnde & pœna statim additur; *Verumtamen ad infernum detrahêris in profundum lacu;* Non punitur quod præcise Altissimo voluerit esse similis, sed quod aliter id posse voluerit quàm ordinasset Deus. Sicut quando primis nostris Progenitoribus proposuit quod futuri essent sicut Dij: nihil habuit quidem perniciosius quod illis proponeret, vt patuit ex euentu, sed nihil habuit potentius quo illos in talem perniciem attraheret, quia nihil erat gloriosius & amabilius quam sic esse similem Deo. In qua quidem similitudine

1. Reg. 2.

Ephes. 5.

1. Ioan. 3.

Is. 14.

Gen. 3.



*Nulla operando potest esse maior Gloria, quàm querendo, &c. 769*

similitudine desideranda non peccarunt, sed in modo similitudinis exprimendæ, nempe per scientiam boni & mali seu per illius pomi esum quo fuerant interdicti. Nam si obedire præcepto, si operari & custodire locum illum deliciarum voluissent, tunc Deo similes tam vere exstitissent, quam verè sic sancti sic beati fuissent.

O quam sapienter Dominus arguebat Iudæos gloriæ cupidos: *Ioan. 8.* non quod gloriam cuperent, sed quod humanam tantum cuperent, non illam quæ à solo Deo est, aut non illis modis quibus illam Deus concedit: sic plane non modo liquet quod nulla operando maior est gloria, quàm sic operari sicut Deus operatur, propter Diuinam similitudinem quæ ex simili operandi modo contrahitur; verum & patet quod nulla sit gloria magis expetenda quàm quæ ex tali similitudine provenit.

## II. P V N C T V M.

**S**ED querendo Diuinam Gloriam operamur sicut ipse Deus operatur.

Non quidem adæquatè, vt dictum est, nec completè sicut Deus, sed quantum humanitùs Diuina fauente Gratia dici & fieri potest, nempe ex eodem fine & motiuo, quæ Finis Circumstantia sicut vna est ex præcipuis quæ in operando maxime consideratur, ita si per eam in operibus nostris conuenimus cum Deo, conuenimus excellentiori modo qui optari possit. Quod autem vnus & idem sit finis querentis Diuinam Gloriam & Dei operantis, tam euidentis est quàm certo constat Deum in operando nihil aliud posse querere quam suam ipsius gloriam. Cum enim Deus sit Finis vltimus cuius gratia fieri debent omnia, vt benè & ordinate fiant: si quid faceret non relatum ad Seipsum tamquam ad vltimum finem, non bene illud & ordinate faceret, nam ipsa est relatio actionis ad finem quæ facit ipsius ordinationem. Vnde si deesset talis relatio, deesset etiam ordinatio, ac proinde opus esset inordinatum, quod de Diuinis operibus cogitare, est impium.

Quando vero dicitur Deus se spectare & se querere tamquam finem, perinde est ac si diceretur, querere bonum aliquod suum; nullum est autem aliud bonum quod possit magis querere quam



If. 48.

suam gloriam, id est, quàm ut cognoscatur & ametur, nam nullum est aliud bonum quod non possideat. Atque ex illa etiam infinita perfectione qua cunctis bonis abundat, necessario infertur, nihil aliud à se posse quærere, nam quidquid extra ipsum est vel nihil est, vel utcumque in se consideretur, tam modicum bonum est præ summo bono quod est ipse Deus, ut si se relicto creatum illud haberet pro fine, perperam videretur agere, & pluris quodammodo facere quod longe minus est: quæ inordinatio non potest in Deum cadere. *Propter me, propter me faciam, ut non blasphemem, & gloriam meam alteri non dabo. Ego ipse, Ego primus & Ego novissimus.*

O quàm id iustum, quàm id sanctum & æquum! Neque est timendum ne quid inde nobis depereat, ne nostra minus procurret Deus, aut minus nobis consulat, quia in eo ponit suam gloriam ut bonitatem suam nobis ostendat, quâ cognitâ moueamur ad Eum diligendum: Et Ipse amore nostro prouocatus nouis semper nos cumulet beneficiis.

## III. P V N C T V M.

Escl. 23.

**N**ULLA igitur operando potest esse major Gloria, quàm quærendo maiorem Dei Gloriam. Nam sic Operans non tantum operatur opus Dei, sed illud operatur modo & fine Diuino, modo quo ipse Deus operatur, modo tam excellenti ut Deus excellentiorem non habeat. Vnde fit ut intellectu, voluntate, & operatione Operans sit conjunctus cum Deo: quia hoc vnum cogitat & intendit: hoc vnum vult & operatur quod ipse Deus: quâ conjunctione & vnione quid gloriosius, quid magnificentius? *Gloria magna est sequi Dominum*, inquit Sapiens, *longitudo enim dierum assumetur ab eo*; Quasi diceret, sic sequendo & imitando Deum in operando, tam multa & excellenter bona edet opera, ut vel mereatur longo viuere tempore, vel quamtuluncumque viuat, longi temporis semper emolumentum referat. Quia vnus duntaxat dies quo sic opereris omnia, sicut ipse Deus operatur, mille annis æquiualeat, merito & dignitate.

Videri potest Lessius opusculo de perfectionibus Diuinis, libro decimo quarto, capite tertio, vnde hac ad rem nostram pauca, sed apta: *Quare cum Deus*, inquit, *ordinatissime agat, necessario de-*



Nulla operando potest esse major Gloria, quàm quærendo, & c. 771

bet magis intendere suam Gloriam quàm perfectionem Creatura. Gloria enim Dei pluris est æstimanda quàm omne bonum creatum. Vnde etiam homo non potest sibi excellentius bonum proponere in operando, quàm Gloriam Dei, nec melius actiones suas peragere quàm referendo illas ad Gloriam Dei, ad quam etiam Beati omnes sua referunt.

Addo, quòd inde etiam maiorem Gloriam consequuntur, quàm si suam propriam quærent & non Diuinam. Sicut enim sancti dicuntur dare Gloriam Deo quando illum magnificant & Diuinas eius perfectiones deprædicant; sic à Deo sanctis datur Gloria, quando ipsorum virtutem probat, & spectandam proponit Angelis atque hominibus. Quæ certe Gloria sic à Deo sanctis communicata, maior quodammodo est ipso quem sancti Deo tribuunt, honore & gloria. Nam cum honor sit potissimum in honorante, id est, in opinione seu Iudicio Illius qui honorem defert alteri; profecto hinc sequitur vt quo Persona honorans est dignior, quouè eius Iudicium est certius, tanto amplior honorata persona recipiat honoris partem; Vnde cum nullum Diuino Iudicio iudicium sit certius, nullaue persona dignior quam ipse Deus, nulla etiam maior esse potest Gloria quam quæ à Deo prouenit. *Non qui seipsum commendat*, inquit Apostolus 2. Cor. 10. nec quem commendant homines, *ille probatus est: sed quem Deus commendat*. Vnde & ipse Deus maiorem sibi solus Gloriam impertitur, quàm omnes Creaturæ possint ei conferre. Ipse est sua Gloria, Ipse suus honos, suum decus, & omnia sua. Sic & sanctorum Gloria Deus est, qui sanctos approbando, magis eos glorificat, quam si communibus omnium quotquot sunt hominum & Angelorum encomiis prædicarentur. Et cum eos maxime probet qui suæ propriæ gloriæ & vtilitatis obliti, solam spectarunt Diuinam Gloriam, quanto putamus honore in cœlis honoratum Illum qui de solo Deo colendo & glorificando cogitauit in terris? Si danti potum aquæ tanta est merces & Gloria, quanta Math. 10. in Euangelio promittitur, quid danti Deo Gloriam, quo dono nullum est Deo carius? Quid danti maiorem ac maiorem semper Gloriam, quo dandi modo nullum est ditius? *Bono animo* Ecclesi. 35. *Gloriam redde Deo*, dicebat Sapiens, *quoniam Dominus retribuens est, & septies tantum reddet tibi*, Id est, longè pluries quàm tu ipsi dederis aut quàm putes te accepturum.

Videri possunt quæ in laudato libello de Gloria sancti Ignatii

Eeeee ij



commemorantur ad Eius Gloriam, quam ex variis accipit Sanctis nempe ex sancto Carolo; sancto Philippo Nerio; sancto Francisco Xaverio; sanctaque Theresia: nec non quam multis etiam miraculis existimationem & Gloriam serui sui Deus conseruaue- rit; sed quia tempus manifestandæ sanctorum Gloriæ, tempus ipsum est manifestandi Christi, tunc vere apparebit, tunc certo manifestabitur quanta sit Gloria Glorificantis Deum. *Coloss. 3.* Cum Christus apparuerit vita vestra, tunc & vos apparebitis cum ipso in Gloria. Nec minor Dei bonitas in remunerandis bonis quam sit eius Iustitia in puniendis malis: Vnde si de mundana quadam anima dicitur: *Apoc. 18.* Quantum glorificauit se & in deliciis fuit: tantum date illi tormentum & luctum: Quid de humili & solum Glorificanti Deum, dici putandum est, nisi quantum se humiliauit & Deum Glorificauit, tantum date illi honorem & gaudium.

Vtram ex illis duabus Sententiam tibi dicendam velles? Et tamen te tuæ Gloriæ major cura sollicitat quàm Diuinæ! Caue hoc vitium vanitatis, soli Deo da Gloriam, imitare sanctum Ignatium, venerare Illum propterea sanctius, nec vnquam timeas, ne ex tuis Deo datis quidquam tibi depereat.

---

DE EODEM, AD ILLA VERBA  
PSALMI SEXAGESIMI SEPTIMI.

*Ibi Benjamin adolescentulus, in mentis excessu.*

VERITAS PRACTICA.

Qui excellentior mentis excessus est, sic ad exemplum nostrum excellit in vita sancti Ignatii, vt tota sit Eius vita simul ecstatica, & tota exemplaris.

RATIO EST, Quia excellentior mentis excessus, ille est qui dicitur mentis operatiue seu effectiue.  
Sed hic excessus sic excellit in vita sancti Ignatii, vt exprimitur in Veritate proposita.



Excellentior mentis excessus, excellit in Vita S. Ignatij, &c. 773

Ergo & certa Veritas, & certe admiranda, quæ duo nobis proponit in sancto Viro valde disjuncta, nempe totum esse ecstasticum, & totum exemplarem, quorum ex uno quanta est Sancti Gloria, tanta in nos ex altero, redundat spiritualis utilitas.

## I. PUNCTVM.



RELIGIOSORVM Ordinum Fundatores si Patriarchæ dicuntur, & quod pene omnes sentiunt, si quandam præ se ferunt similitudinem cum duodecim illis Iacob filiis qui fuerunt Capita duodecim tribuum Israelis & populi Dei: manifestè patet quod sanctus Ignatius Fundator Societatis IESV, sicut tempore postremus est, ita Benjamin qui natus minimus inter suos fuit, locum & nomen possit usurpare. *Ibi Benjamin adolescentulus.*

Numerate à magno Antonio qui primus Coenobitas instituit, quotquot deinceps succedentibus sæculis celebriores condiderunt familias, Basilium, Augustinum, Benedictum, Norbertum, Brunonem & ceteros consequentes, vix plures reperietis quam duodecos, quorum se vltimum & longe minimum non tantum tempore, sed & merito semper profitebatur Ignatius.

Accedit alia ratio, quod sicut Benjamin filius Iacob, primo dictus est *Benoni*, hoc est *filius doloris*, tum verò post *Benjamin*, id est, *filius dextra*: sic quodammodo sanctus Ignatius primò fuit doloris filius quando ex accepto graui vulnere genitus est nouæ illi Gratia qua vocatus fuit à militia seculari ad spiritualem: Cuius Vocationis & Gratia cum singularis fuerit potentia & valde sublimis scopus quo ad suam maiorem gloriam Deus illum destinabat, nonne sic filius dextræ dici potest? Gen. 35.

Tertiò denique, sicut Benjamin dicitur in quodam mentis excessu præ ceteris insigniter exstitisse, sic sanctus Pater in hoc tam eximius & insignis fuit, vt cum plures inter se distinguantur mentis excessus, sintque aliis alij præstantiores, qui præter omnes excellere dicitur, dicatur etiam excelluisse in vita sancti Ignatij, neque id tantum ad concitandam de sancto Viro admirationem, vel ad extollendam eius Sanctitatem referatur: sed quod



magis mirum, ad similis vitæ nobis proponendum exemplar, sitque vitæ sancti Ignatii non solum tota ecstatica, quod certe mirum; sed tota simul exemplaris & ad imitationem efformata, ut nos ad eundem mentis excessum eius exemplo possimus aspirare; neque tantum de Illo, sed de vnoquoque nostrum dici possit si velimus cum Gratia; *Ibi Benjamin adolescentulus in mentis excessu.* Nonne hoc stupendum? Nonne hoc omni studio confectandum? Quamobrem, hic sermonis sit scopus; qui ut facilius capiatur, distinguendi sunt ante omnia qui dicuntur mentis excessus; & qui sit eorum excellentior & ad praxim accommodatior, diligentius inuestigandum.

Tres omnino species ecstasis siue excessus mentis referuntur ab his, qui de mystica tractant Theologia: sed non eodem modo proferuntur. Sunt qui non aliter eos distinguant quam per diuersas animæ facultates, Intellectum, Voluntatem & Memoriam; Quam alij distinctionem sic dilucidant, ut prima species sit lucis, secunda verò ardoris, & tertia dicatur operationis seu vitæ. Addunt denique alij, quandoquidem non de excessu simpliciter, sed de mentis excessu agitur, sic eius triplicem aptius notificari speciem, si dicatur prima esse solius mentis in excessum raptæ; secunda mentis, ad excessum simul rapientis voluntatem seu affectum; tertia mentis quam vocant operatiuæ seu effectiuæ, cum se mens raptam & rapientem ita insinuat in ipsas totius vitæ partes & operationes, ut quidquid homo agit & patitur, quidquid homo sentit, cogitat, loquitur, operatur; quidquid vno verbo vivit, totum hoc in excessu sit vitæ; id est, excedat communem vivendi morem, non tantum qui naturalis dicitur, sed qui etiam supernaturalis appellatur. Sicut enim solius mentis aut voluntatis simul excessus est cum sola mens in admirationem Divinorum raptæ, consuetos naturæ & gratiæ motus atque operationes excedit; aut cum voluntas simul in ardorem & affectum supra quam ordinariè sentiri solet, abripitur: ita excessus vitæ est quando ipsa hominis vitæ, suo modo, supra omnem humanum modum in omnem virtutem extollitur.

Et quia talis vitæ excessus ab ipsa mente diuinitus acta & affecta procedit, sic apte dicitur mentis excessus, non *solius* quidem mentis quæ prima dicta est species, nec voluntatis simul cum mente, quæ aliam constituit speciem, sed *mentis insuper effe-*



aiuæ quæ lucem intellectus & ardorem voluntatis ad Diuinos virtutum effectus reducit, vnde tota vita excessus est, tota vita ecstasica, cœlestis & Diuina.

In primo mentis excessu fuisse Benjaminum Interpretes docent ad illum nostrum versiculum: *Ibi Benjamin adolescentulus in mentis excessu*, quando scilicet vnâ cum aliis Patriarchis aliquando conueniebat ad celebrandas Dei optimi maximi laudes, & commemoranda beneficia quibus totum afficiebat mundum; Ita præ aliis omnibus Diuinæ bonitatis admiratione rapiebatur, vt extra se quodammodo raperetur & in ecstasim siue mentis excessum abiret.

In secundo excessu tunc erat Dauid, cum dixit, *Ego dixi in excessu meo, omnis homo mendax*. Id est, in feruore mentis & in ardenti voluntatis affectu quem ex Diuinis concepî verbis; sensi me commotum vt dicerem, *omnis homo mendax*, non tantum vt mentiri possit, sed vt reuera mentiatur, quando ex humano affectu de rebus aliter sentit & loquitur quàm de his iudicet & loquatur Deus. ps. 119.

In tertio denique sanctus Apostolus, qui non tantum raptus est vsque ad tertium cœlum, sed de suo alio mentis excessu manifeste scribit Corinthiis, dum expressis ait verbis, *siue mente excedimus, Deo: siue sobrii sumus, vobis*, id est, si me auditis interdum sublimia quædam de me prædicantem quæ profecto excedunt communem viuendi morem, id ita viuimus & ita loquimur propter Deum: siue pauciora de his à me accipitis, sic temperati sumus & sobrii propter vos, me vt vobis accommodem, ne vos ego nimis obstupefaciam, atque vt ea etiam quæ dico facilius intelligatis. 2. Cor. 5.

Quænam autem essent illa sublimia quæ mentis excessum vocat, non alia sanè sunt quam quæ paululum ante descripserat, dum de suo viuendi genere sic loqueretur: *Habemus thesaurum istum in vasis fictilibus, vt sublimitas sit virtutis Dei, & non ex nobis. In omnibus tribulationem patimur, sed non angustiamur; aporiamur sed non destituimur: persecutionem patimur sed non derelinquimur: desicimur sed non perimus: semper mortificationem IESV in corpore nostro circumferentes, vt & vita IESV manifestetur in corporibus nostris. Semper enim nos qui viuimus, in mortem tradimur propter IESVM, vt & vita IESV manifestetur in carne nostra mortali*. Et paucis inter- 2. Cor. 4.



jectis. Propter quod non deficimus, sed licet is qui foris est, noster homo corrumpatur: tamen is qui intus est, renouatur de die in diem. Id enim quod in presenti est momentaneum, & leue tribulationis nostrae supra modum in sublimitate, aeternum gloria pondus operatur in nobis, non contemplantibus nobis quae videntur sed quae non videntur. Quae enim videntur, temporalia sunt: quae autem non videntur, aeterna sunt.

Hoc est scilicet mente excedere, dum, vt ait S. Anselmus, Excedens mente omnem humanam fragilitatem & seculi temporalitatem, & omnia quae nascendo & occidendo vanescunt, habitabat corde in ineffabili quadam contemplatione eorum de quibus dicit, quod audiuit ineffabilia Verba quae non licet homini loqui, unde & ait, sobrii sumus vobis, sobrie de his loquimur vt vos ea capere possitis.

At vero hic mentis excessus non solius mentis aut voluntatis excessus est, sed operationis & effectus, dum ex illa mentis siue sublimium & aeternarum contemplatione rerum, Apostolus suam omnem regebat vitam, vt quidquid ageret aut pateretur, tam sublime esset in effectu quam ipse rerum affectus sublimium, unde talis emanabat effectus.

Ex quibus apertè patet quàm hic ceteris excellentior mentis excessus sit, nam vt fuse & praelare describit Celeberrimus ille sanctitate & doctrina Spirituali Gebennensis Episcopus, in tractatu de amore Dei, toto septimo libro, quidquid mali esse potest in prima & secunda excessus mentis specie, non est in tertia; quidquid boni reperitur in illis, reperiri potest in ista; & potest aliquid emolumenti Spiritualis ex ista percipi quod non ex aliis; Quae tria certe quocumque in subiecto reperiuntur, manifestam illius faciunt praeter ceteris eiusdem generis, dignitatem & excellentiam. Et verò hinc quàm vere reperiuntur, patet: Primò quidem priores duas excessus species, potest Daemon excitare, potest in ecstasim animum rapere, potest & voluntatem inflammare, non vero quidem amore Dei, sed falso & supposititio, qui cum saepe pro Diuino accipitur, sic miseros illudit homines. Vnde Apostolus suos praemonens, Ipse, inquit, satanas transfigurat se in Angelum lucis.

2. Cor. II.

Et quando ille abesset Illusor, solusque amor excellentiae propriae qui vix vnquam deserit hominem, suas hinc partes ageret, quis nescit quantum ex illis excessibus mentis, qui vel in intellectu

vel



vel in voluntate consistunt, possit excitari superbiæ, vanitatis, & quam plurimum huiusmodi vitiorum? Nonne idcirco idem Apostolus, *Ne magnitudo, inquit, reuelationum extollat me, datus est mihi stimulus carnis meæ, Angelus Satana qui me colaphizat?*

At vero in excessu mentis operatiuæ, nihil tale timendum est, totus enim in solida veræ virtutis exercitatione ponitur, totus in humilitate & patientia, quæ protecto virtutes longe à Dæmonis illusionibus & fallaciis sunt positæ.

Deinde dico, quod quidquid boni est in intellectu & voluntate, quidquid lucis & ardoris, quidquid vno verbo, Charitatis illius quæ animum cum Deo iungit, totum in opera diffundi potest, imo & debet si vera est Charitas, quæ in agendo & patiando potissimum vera esse agnoscitur.

Addo denique, cæteris paribus, plus, operando, virtutis & meriti posse comparari quàm intelligendo & volendo, ac proinde plus aliquid in hoc excessus genere quàm in aliis reperiri, vnde & eius supra cæteros excellentiam quis non videt? Quam & expresse docet sanctus Thomas in illis quæstionibus quas de vita Contemplatiuæ & Actiuæ mouet; quarum illa quidem si cum altera comparetur, præstantiorem optinet locum, si vero mixta quæ dicitur vita in contentione excellentiæ veniat, palmam sine dubio referat, primasque supra omnem quæ contemplando ponitur, teneat. Quid autem aliud excessum mentis operatiuæ dicimus, quam illam ipsam mixtam vitam, cum non sit excessus mentis nisi aliquid de contemplatione habeat, neque sit mentis operatiuæ nisi de actione simul aliquid comprehendat.

Quod vtrumque luculenter sanctus Gregorius in Moralibus suis exhibet ad illa verba Iob: *Numquid ad præceptum tuum eleuabitur aquila, & in arduis ponet modum sibi? Ad præceptum Dei eleuatur aquila, dum* *IVSSIONIBVS DIVINIS OBTEMPERANS, IN SVPERNIS SVSPENDITVR FIDELIVM VITA.* Quibus sane verbis, sicut non poterat expressius designari Excessus mentis effectiuæ, qui totus in Diuinis consistit iussionibus exequendis, sic neque poterat excellentius & sublimius prædicari quàm comparatione facta cum illa quæ ad præceptum Dei eleuatur aquila, & in arduis ponit nidum sibi. Et uero pergit sanctus Doctor, & exemplo Apostoli qui sine dubio mixtam agebat vitam, & hoc præsertim in excessu mentis operatiuæ



Philip. 3.  
Ephes. 2.

Philip. 3.  
Ephes. 2.

Esaiæ 58.

viuebat, vt dictum est, quantæ sublimitatis & excellentiæ vita hæc sit, ita declarat: *Quæ in arduis nidum ponere dicitur, quia terrena desideria despiciens, spe iam de cælestibus nutritur. In arduis nidum ponit, quia habitationem mentis suæ in abjecta & infima conuersione non construit. Videamus aquilam nidum spei sibi in arduis construentem, qui ait: Nostra conuersatio in cælis est: Et rursus: qui conresuscitauit & consedere nos fecit in cælestibus. In arduis habet nidum: quia profecto in supernis figit consilium. Non vult mentem in ima dejicere, non vult per abjectionem conuersationis humana in infimis habitare. Tunc Paulus fortasse in carcere tenebatur, cum se consedere Christo in cælestibus testaretur. Sed ibi erat, ubi ardentem iam mentem fixerat, non illic ubi illum necessario pigra adhuc caro retinebat. Hoc namque esse speciale specimen Electorum solet, quod sic sciunt præsentis vite iter carpere, vt per spei certitudinem nouerint iam se ad alta peruenisse, quatenus cuncta quæ præterfluunt, sub se esse videant, atque omne quod in hoc mundo eminet, amore æternitatis calcent. Hinc est enim quod sequenti se animæ per Prophetam Dominus dicit: Sustollam te super altitudines terræ. Quasi quædam namque inferiora terræ sunt, damna, contumelia, egestas, abjectio, quæ ipsi quoque amatores sæculi dum per late viam planitiem ambulant, vitando calcare non cessant. Altitudines autem terræ sunt, lucra rerum, blandimenta subditorum, diuitiarum abundantia, honor & sublimitas dignitatum, quæ quisquis per ima adhuc desideria incedit, eo ipso alta æstimat, quo magna putat. At si semel cor in cælestibus figitur, mox quam abjecta sint cernitur quæ alta videbantur. Nam sicut qui in montem conscendit, eò paulisper cætera subterjacentia despicit, quò ad altiora gressum amplius tendit, ita qui in summis intentionem figere nititur, dum annisu ipso nullam præsentis vite gloriam esse deprehendit, super terræ altitudines elenatur, & quod prius in imis desideriis positus super se credidit, post ascendendo proficiens sibi subesse cognoscit. Quas ergo illic Dominus facturum se esse pollicetur, dicens: Sustollam te super altitudines terræ, hæc apud beatum Iob solum sese facere posse testatur, dicens: Nunquid ad præceptum tuum elenabitur aquila, & ponet in arduis nidum sibi? Ac si diceret: vt ad meum, qui quod exterius precipio, hoc intrinsecus gratia occulte largitatis inspiro. Quasi diceretur, quantumcumque sit arduum & sublime quod proponitur, satis est potens Diuina Gratia, quæ hoc ipso quod proponit agendum aliquid, dat agentis vires vt quod possit velit, & quod velit possit. O potentem non solum Dominum,*



fed & seruū, qui Domini sui potentia tam potens est, vt quid-  
quid Dominus iusserit, seruus possit!

II. & III. P V N C T V M.

**S**ED hic excessus sic excellit in vita sancti Ignatij, vt tota sit simul  
ecstatica & tota exemplaris.

Non illi certē defuerunt excessus alij, nam quoad primum,  
cū saepe aliās, tū aliquando per totum octiduum ita exanimis  
iacuit, vt qui proxime aderant, sepulchro illum condidissent, nisi  
latentis vitæ reliquias ex tenui cordis palpitatione deprehendis-  
sent, ac tandem velut ē somno euigilans, ah, IESVS! suauiter  
ingeminabat, & quasi nihil insuetum accidisset, placide surgens,  
omnes admiratione compleuit.

De secundo, qui est voluntatis sese quodammodo excedentis  
seu à se transeuntis in Deum, sic aperte Relatio quam vocant Ca-  
nonizationis: *Neque vero, inquit, tantummodo custodiuit cor suum  
ab iis quæ sunt contra dilectionem: sed etiam à seipso amorem omnium  
rerum quæ Deus non sunt prorsus abiecit, atque in eundem transtulit Deum,  
omnemque affectionem ad Dei dilectionem referre conatus est.*

Hæc & plura passim vbicumque de Illo agitur, quæ certe tam  
manifestam indicant ecstasim voluntatis, siue quem diximus ex-  
cessum mentis affectiua, quàm verè talis in Deum affectus voca-  
tur ecstasis. Sed hæc missa faciamus, & in illo vno excessu quī  
non modo est excellentior, verum & ad imitationem accommo-  
datior, immorantes, ostendamus non in parte tantum, non in  
virtute aliqua particulari, non in quibusdam duntaxat actioni-  
bus, sed in tota vniuersim sancti Viri vita, quantum eluxerit,  
quàm constanter & perpetuò viguerit, ac regnarit; totaque ipsa  
vita excessus vitæ siue mentis effectiua; aut vno verbo, Vita tota  
ecstatica dici iure queat.

Tribus id modis indagari potest, nempe illius vitæ Ingressum,  
Progressum, & Egressum attentius intuendo, quæ tria mihi vi-  
dentur aptissime simul connexa in his suprā dictæ Relationis  
contractis Verbis: *Ineffabilis Dei Bonitas excitauit Spiritum Ignatij  
Loyole, qui ex medio honorum cursu, atque à seculari terrenaque mi-  
litia, admirabili quadam ratione vocatus vitam admirabili sanctitate  
traductam, pio in Domino conclusit exitu.* Quod enim vocatur hic



*admirabile*, perinde prorsus est ac infuetum & excedens solitum viuendi morem, vnde cum in his tribus & totus vitæ cursus comprehendatur, & in his ipsis totus dicatur admirabilis, nonne hoc ipsum relinquitur de tota vitâ dicendum?

Etuerò triplex illud Caput sigillatim contemplemur. Adeamus illum lecto iacentem ex vulnere, pios quosdam de vitâ Christi ac sanctorum voluentem libros spectemus. Quid inde sensus, quid animi referat, percontemur. *Sequor*, inquit, *quò me Deus vocat*, sed quò tandem? *Ad conciliandos Christo Infideles & totum ipsum conuertendum orbem*. Hic illi scilicet cum seipso conuertendo, statim ab ipso vitæ melioris exortu, propositus Finis **TOTIVS VNIVERSI CONVERTENDI**. Tune verò miles ignare hoc cogites? Tu mundane, mundum conuertas? Si de te solo ageretur, si de domo ac familia tua, si de ditione ac subditis apud quos Domini plurimum valet exemplum, certe & hoc mirum esset quod vix bene conuersus, hanc de aliis cogitationem & curam susciperes. Sed tamen id concedi posset zelo recenti: At de vniuerso tu cogites tetraurum orbe! Tu scilicet Affricam penetres, Tu Asiam, Tu Europam; Americam & efferatas quantumuis gentes adeas, alloquaris, attrahas, & tibi seu Deo subdas? Hoc est enim mundum conuerrere, sic cunctas vniuersi partes peragrarè, subicere, transmutare moribus, institutis, & seipfis totis? An vnius hoc hominis opus ac munus? An militis hoc cogitare! An ignari hoc aggredi! Dic quibus id armis & sumptibus? Dic quibus machinis sic vniuersum inuertas orbem? An putas ense domari animas? Aut si verbo, si doctrina, si pietate demulcentur, quid tibi vel tantillum ex illis sacris dotibus, qui vix scribere noris ac legere?

Non erat dubium quin hæc simul in mentem venirent militi, cum miles mentem susciperet de mundo conuertendo: Et tamen à tali mente nunquam auertitur; non rei nouitas & difficultas, non ignorantia, non egestas, non solitudo, non vastitas, non quidquid demum dicas, mentem hanc eius mutet; Ibit vel vnus ad omnes populos; prædicabit vel ignarus ipsis Euangelium Philosophis, expugnabit vel inermis armatas quaslibet acies, aut certe socios sibi adijunget eiusdem animi, se disciplinis erudendum tradet, & fauente Deo se modis omnibus tanto idoneum operi comparabit.



Itane Lector de hoc sensisses homine? Sanusne tibi mente visus esset quem sic audisses loquentem, proponentem, statuentem? Nonne hic mentis excessus est, & mentis effectiua quæ tam arduum, tam sublime, tam Diuinum opus audeat aggredi?

Hoc itaque primum ex tribus est, vnde constat excessus ille mentis de quo hic agimus, hinc nempe constat euidenter quod qui primus melioris Ignatio vitæ fuit ingressus, fuit simul ingressus vitæ ecstatiæ. Nunc quod secundum est de progressu videamus. Progressum dico non illius Diuini operis quod de Infidelibus ad Christum adducendis, & de ipso toto, si Deus annuat, mundo conuertendo suscepit; non hunc inquam, progressum intelligo declarandum: nam ipsis tam aperte patet oculis, quàm Ipse religiosus Societatis Ordo, qui longe lateque patens per vniuersum terrarum orbem, ad hunc vnum finem ab illo sancto Patre est conditus, vt proximi salus comparetur. Sed illum dico progressum vitæ ecstatiæ cuius ingressum vidimus, progressum dico mentis excessus, in quibus omnibus sese deinceps Vir ille sanctus exercuit. Scimus quid fecerit, scimus illum iam natu grandem, primis nauasse operam literarum rudimentis, nec ignoramus quem inde fructum tulerit, quos sibi socios aggregarit, quas ipse adierit plagas, vel domi residens quibus familiam suam instruxerit documentis: sed an istis in omnibus sic constanter, quemadmodum inceperat, vixerit, vt in excessu mentis semper vixisse dicendus sit, hoc est quod quæritur, dum progressus vitæ inquiritur.

Nullus est equidem Author quem ego sciam, qui sic expressis terminis de illius vitæ progressu egerit: sed nullus est Author qui de vita eius scripserit, ex quo non facile possit demonstrari sic omnino vixisse Ignatium. Nam cum apud omnes sit constantissimum in id maxime Virum illum euigilasse, toto vitæ tempore, nihil vt corruptæ naturæ motibus omnino daret, sed totum Rationi, totum Gratia, totum Deo: quid est quod manifestius illum ecstatiæ vitæ progressum manifestare possit quàm illud perpetuum & numquam intermissum, quod vocat Apostolus, *Rationabile obsequium?* Rom. 12.

Audi verò quid Orlandinus, historia Societatis Author in hanc rem referat: *Hoc habuit eximie Beatus Pater vt ratione plurimum & consilio uteretur, crebrò usurpans à belluis hominem ratione differre.* Quod quanti referat, ita viuere, sic explanat. *Et sanè vti incuria,*



considerandique negligentia vitiorum omnium seminarium, ita cura & consideratio cunctarum est parens & alumna virtutum. Nemo quippe malum quia malum amat, sed imagine fallacis boni deceptus, rerum illecebre caducarum, consuetudo sensuum, prava vulgi opiniones, Demonum instinctus cupiditates inflammant easque communes notitias vel natura vel fidei lumine comprehensas, quibus vitanda turpia, honesta sectanda cognoscimus, paulatim obscurant, hebetant, languescunt, ut ratio debilitata & quodammodo exarmata facile tot undique oppugnantibus hostibus, succumbat. At Consideratio frenum est quo mens perturbationes atque sensus ne abjiciant se ferino impetu ad fallacem presentis boni speciem coercet ac sustinet: lima est ac malleus quibus boni mali que notitias illustrat, exacuit, corroborat, unde ad ipsam mentem & voluntatem vis & vigor emanat.

Hoc Author ad verbum omnia, quorum sensus non est, sola ratione fieri, quod est in viris perfectis praestantissimum. Nam praequam quod Divina opus est gratia, sine qua nihil prorsus boni fit, opus est vero etiam maioribus quibusdam gratiis, quarum praecipue nutu & imperio mens humana & voluntas illustrentur, inflammentur, & agantur, ut bonum aliquod sit praestantissimum, & ex illo eminentis boni genere quod in sancto Ignatio veneramur, nec certe magna est Viri commendatio, nisi forte Pagani & Stoici, si dicatur ratione tantum naturali vel cum aliquali etiam gratia vitam ac mores suos componere: longe est alia in Christianis ac sanctis viris Ratio, nempe illa quae Superior & Sublimior appellatur, de qua sic S. Augustinus: *Sublimioris rationis est indicare de ipsis corporalibus secundum rationes incorporales & sempiternas, quae nisi supra mentem hominum essent, incommutabiles non essent.* Hac in sanctis viris adsit oportet supernaturalis Ratio, ut sancti sint, hoc profitemur; sed ne tamen naturalis desit, non est minus fatendum; neutra sit sola, sed simul utraque sic sibi subordinata, ut quantum naturalis ratio dominatur appetitui, tantum huic naturali rationi Superior altera praestet & imperet. Sic Idem sanctus Augustinus, *ut quod est in homine praecipuum & excellens, hoc imperet ceteris non reluctans quia sunt nobis bestiaeque communia: atque id ipsum quod excelsit in homine, id est Mens & Ratio subjiciatur potiori quod est ipsa Veritas, Unigenitus filius Dei.* Neque enim imperare inferioribus potest nisi superiori se ipse subjiciat. *Hac vita consummati perfectique Sapientis.*

l. 12. de  
Trin. c. 2.

l. 1. de  
Serm. Dom.  
in monte  
g. 2.



Quando itaque de Sancto narratur Ignatio quod sit plurimum ratione usus, non aliter quam de vtraque simul ad usum applicata ratione, debet intelligi, vel de naturali suum munus agente cum tali subordinatione ad Superiorem, ut illâ ipsâ curâ & diligentia qua cauebat ne contra naturalem rationem appetitus quidquam in se Ipso moueret, eâdem prorsus aduerteret, ne ipsa ratio sine Superiori moueretur.

Quod quàm perfecte fieret, sic Idem habet Author Historicus: Hoc igitur acerrimo, ac generali telo plurimum Beatus Pater usus est: atque ita ut nulla umquam voluntatis appetitio, ac ne cælestis quidem dulcedinis copia intelligentiæ eius usui officeret. Nam duo cum sint cælestium Christi auxiliorum genera, altera ad afficiendas voluntates, ad mentes altera collustrandas, fere ita fit, ut cum vberius voluntati superna vis infunditur, agatur homo potius, quam ducatur: eoque rationis perexiguus usus sit. At in Ignatij animo genus utrumque & copiosissimum, & mire concors fuit, ut, cum incenderet vehementissime eius voluntatem flamma cælestis, suum tamen integrum regnum rationi, diuinæque luci relinqueret; ab eaque regi, ac temperari ardor ille se sineret. Inde, quam Lainius ardentissimam sancti Viri Charitatem, & immensa Diuinæ gloriæ studia, summamque cum summo Bono conjunctionem, & quàm facile ad cælestia auferretur, spectans, dicebat, in rebus Diuinis Ignatium patienti, quàm agenti propiorem videri: ut Ignattus quoque ipse de se erat illi professus: Ita tamen Idem rationem adhibebat, ita contendebat neruos industria, vndique sibi adminicula, cura, & arte conquirens, & singula circumspecte dimetiens, ut ad studia quamuis pia, nollet impetu ferri, sed consilio duci. Hæc autem recta est via, qua Deus hominem ire vult: in cuius mente, intelligentiæ idcirco lumen accendit, ut illud sequens, rationabile offerat obsequium, matura scilicet consultatione delectum, & suis vndique conditionibus absolutum: atque hoc pacto simul ab fraudibus illudentis Dæmonis defendatur; simul constantius, ac perseuerantius agat. Ergo, siue complacens sibi summa bonitas in Ignatio erudiendo formare multorum magistrum, siue id generosæ eius indoli, & capacissimæ consilij menti maxime congruebat, suauissime illum per vias rectas ad perfectam, consumatamque iustitiam, regnumque suum deduxit scientia sanctorum plenum; videntem singula, ac notantem, gressusque suos assidue præcedentem rationis oculis, ac iusto prudentiæ pede præfinientem. Atque hinc æstimanda sunt Ignatij apud Deum promerita, & præclara facta numeranda.



Quæ quidem præclara facta pergit Historicus numerare: At vero nobis quod est nostri propositi sufficiat inde iam dicta confirmare, quàm totus esset Ignatius in illo mentis excessu qui effectius dicitur, cum totus esset supra se, non tantum quoad inferiorem illam partem cui Ratio præsidet naturalis: sed quantum insuper ad hanc spectat Rationem quæ tota sursum in æternam Legem, & Diuinam transfertur Mentem.

Est verò & aliud in vita sancti Ignatii non minus euidentis argumentum, vnde hic eius vitæ progressus totus ecstasticus colligi possit: Nempe, cum à sua Conuersione, totum illud quo deinceps vixit tempus posuerit in assequendo fine quem sibi de salute proximi procuranda præfixerat, profecto non minus dicendum est tempus illud in excessu mentis esse traductum, quàm dum primo sibi finem proposuit. Neque enim minus, imo magis gloriosum & sublime est, finem intentum consequi, quàm finem ipsum intendere. Quàm multi mira proponunt, quàm pauci vero quod proponunt, efficiunt! *Omnes quidem currunt, sed vnus accipit præmium*, qui nempe scopum attingit. Cum itaque tam excelsum sit opus quoduis, quàm excelsus est finis propter quem opus agitur, cumque sanctus Ignatius, illum ipsum in operando finem semper habuerit quem in opere inchoando sibi destinarat, cur non progressus operis æque dicetur excelsus & excessus, atque ipsius primus ingressus? Quod ex eo vel maxime confirmatur, quod prima illa Gratia cuius virtute miles adhuc Ignatius, tantum potuit sibi opus destinare, numquam in eo vacua fuit, sed tam ultra semper progressa est quàm ipsum opus latè processit. Non erat vero Gratia tantum collata Ignatio vt opus illud faceret, sed vt eo fine faceret quo ad faciendum fuerat primò excitatus, vnde sicut manifestè pater Gratiam illi adfuisse in opere, sic in operis fine non defuisse certum est, cum finem Deus magis respiciat quàm ipsum opus. Quod si verò totus vitæ Ignatii cursus non minus constanter ex illo fine processerit quàm ab illo fuerat generose susceptus, quid sequitur nisi quod quaritur, talem eius fuisse progressum vitæ, qualis ingressus fuit, siue quod idem est, talem in eius vitæ progressu perstitisse mentis excessum, qualis fuit in ingressu.

Neque dicas, non ita esse mirum, si miles factus Sacerdos, se in curam impendat proximi, quàm si miles propterea fieri velit Sacerdos. Esto enim sit minus mirum, non est tamen minus excelsum



cellsum & Diuinum, imo ex quo miles Sacerdos factus est, quis non videt illum Intellectu & voluntate perfectiorem esse oportere, atque ex consequenti fieri, vt finis siue Intentio sit purior sacratior, sanctior.

Neque rursus obijcias, finem posse mutari operis, licet opus ipsum non mutetur. Id enim etiam concedatur de mundanis & parum in virtute promotis mentibus: At certe de Ignatio, tam alienum id esse cognoscet quisquis tantillum de gestis ab eo rebus legerit vel audierit, vt nihil in eius vita frequentius repetatur, quam vel eum vniuersim cupiditates omnes animi repressas habuisse, vel particulatim illum honoris à laudis appetitum quo à recto fine mens humana detorqueri solet facilius. Raro de se loquebatur, sed quoties tamen salus animarum vel Dei gloria postulare, sua non minus bona quam peccata, sine vlla prorsus vanæ gloriæ titillatione narrabat; illudque interdum auditus est dicere, se per Diuinam gratiam à nullo sibi minus timere quam à vanitatis vitio. Quamobrem nihil est huius humanæ vitiositatis quod illum à rectitudine sibi proposita de conuertendis ad Christum proximis vniquam inflecteret: quin potius ex illo pleno & integro cupiditatum animi quo fruebatur imperio, reddebatur in dies aptior ad illum sublimem finem excelsius attingendum. Diceres illi euenisse quod olim Mosi quem Deus iussit sibi dolari & parari duas tabulas, in quibus duplex illud magnum mandatum de diligendo Deo & proximo, quod cætera omnia continet, suo imprimeret digito: sic plane est quod in sancto admiremur Ignatio; duas Ille velut tabulas, vtrumque scilicet cordis appetitum sic continua sui mortificatione dolauit & perpoliuit, vt in eius corde Deus legem Charitatis inscripserit, qua Deum vnum propter se, & proximi salutem tantummodo quaereret propter ipsum Deum: quo ex insigni dono factum est vt qui ante acceptam Diuinitus perfectam illam Charitatem iam erat propriis cupiditatibus expurgatus, post vero etiam amplius & perfectius à seipso totus in Deum transferit, nihil vt prorsus de proprio resideret.

Quod singulariter obseruatum habemus in illa Relatione summo Pontifici facta, de qua iam supra dictum est, vbi cum relatum de sancto Viro esset à seipso amorem omnium rerum quæ Deus non sunt prorsus abieciisse, tum paulo post additur, *Hanc*



*in Deum Charitatem adeo puram in suo corde aluit retinuitque, ut etiam sui ipsius amorem à se prorsus amandarit.* Videretur idem dici, videretur inanis esse verborum repetitio, sed non ita profectò. Nam aliud est ex primis quibuldam gratiis amorem à se proprium primùm expellere, tum ex abundantiori dono abundantius eundem perpurgare amorem, proscribere, amandare. Aliud est dum iuuando vacas proximo, nihil præter Deum quærere; & aliud prorsus est, nihil in cæteris quibuscumque rebus quærere, quam proximum adiuuare propter Deum. Qui proximum eo tantum fine iuuat ut Deo placeat, bene quidem operatur; sed qui ob eundem finem nihil plane aliud in cunctis suæ vitæ actibus quærît, melius agit; hoc est enim prorsus seipsum totum in id vnum impendere.

Hoc est autem vnum quod quærebat Ignatius, siue studeret, siue cessaret, siue comederet, siue ieiunaret, siue oraret, siue laboraret: ad hoc vnum omnia referebat ut se suosque aptius ad salutem animarum componeret. Hic illi vnus finis & scopus, non in ipso tantum propositus erat opere quo iuuarentur animi: sed in ipso toto vitæ degendæ tempore, cuius singulas partes & momenta tam pure reuocabat ad hunc ipsum finem quàm si actu cum proximis ageret. Ex qua vniuersali mentis intentione, sic per omnes sparsa vitæ actus, quis non videat quod hic potissimum inquirimus, in Ignatii vitæ progressu talem fuisse mentis excessum, & ecstasim, qualem in ingressu mirati sumus?

Erat videlicet in illo continuo mentis suspendio de quo præclare sanctus Gregorius ad illa Verba Iob, *Elegit suspendium anima mea, & mortem ossa mea.* OMNE inquit, quod suspenditur proculdubio ad imis eleuatur: anima igitur suspendium eligit ut ossa moriantur, quia dum mentis intentio ad alta subleuat, omnem in se fortitudinem vitæ exterioris necat. Et alibi: *Machina mentis, vis est amoris, quæ hanc dum à mundo extrahit, in alta hominem sustollit.* Et rursus: *Pondus quoddam est quod omnem animam quam replet, leuet.* Atque etiam expressius in illud Ezechielis: *Emissa similitudo manus apprehendit me in cinctu capitis mei, & eleuauit me Spiritus inter terram & cælum:* QVIA inquit, cum nostra mens sese per custodiam colligit, vis superna sursum nos ab infimis trahit: bene vero inter terram & cælum subleuatum se asserit quia quilibet sanctus in carne mortali

Iob. 7.  
L. 8. Mor.  
14.

6. Mor. 17.

28. Mor. 2.  
Ex. 8.

31. Mor. 7.



positus, plene quidem adhuc ad superna non peruenit, sed tamen ima dereliquit.

Quod non tantum de contemplatione dictum à sancto Patre intelligas, sed multo magis de actione seu de vita mixta sic Idem sanctus Doctor declarat ad illud quod in libro Iob legitur: *Sta* <sup>ib. 37.</sup> *& considera mirabilia Dei: SVNT* nonnulli quippe qui Dei miracula iacentes considerant, quia operationis eius potentiam non sequentes admirantur; saepe quidem superna iudicia mirantur, predicamenta caelestis patriae cum audiunt diligunt, mira opera internae dispositionis obstupefcunt: sed tamen amando & viuendo ad haec eadem opera assurgere negligunt. Iacentes ergo Dei miracula considerant qui eius potentiam sciendo pensant, sed viuendo non amant. Per contemplationem quidem in consideratione oculos tendunt, sed tamen per intentionem sese à terra non erigunt, unde bene in Balaam exprobratione dicitur, qui cadens apertos habet oculos.

Quod est itaque respectu iacentium stare, vel comparatione stantium sursum erigi & suspendi, hoc est quod egit & quod fuit toto vitae progressu Ignatius. Vnde quo alio aptiori vocetur nomine hic progressus, quam continuus mentis excessus?

Denique, si quid hanc in rem, vltra desideres, percurrere Virtutes eius omnes siue Theologicas siue Morales, ex quibus tota eius vita contexta est; & quam manifeste videbis totas in excessu esse, tam erit facile de toto eius vitae progressu, prorsus idem concludere.

Fides, vt ordinariè solet exerceri sic credenda credit, sicut & Spes speranda sperat quae sunt scilicet à Deo reuelata qui est prima veritas, & à Deo promissa qui est summa bonitas & potentia, qui tam potens est in faciendo quam fidelis in dicendo. At quando credenda & speranda tot sunt circumsepta difficultatibus & pene simul oppositis inuoluta obstaculis, vt quantum ex vna parte est quod credas & quod speres, tantum ex alia videtur esse quod non credas neque speres, tunc profecto Fides qua creditur, & Spes adjuncta qua speratur, dicuntur in excessu esse, seu excedere modum credendi ac sperandi communem, quia non sic in aliis ordinariè sibi obstant credenda & speranda. Talis fuit Abrahami Credentium Patris fides & fiducia, quod *contra spem in spem crediderit*, <sup>Rom. 4.</sup> vt loquitur Apostolus, contra spem scilicet suscipienda prolis quia se videbat & Saram conjugem extra potentiam eius haben-



da, sperauit tamen & credidit Deo promittenti, quod est eximiae fidei.

Hæc autem prope est fides Ignatij, hæc in Deum constans eius fiducia, quando in suo mentis excelsu de Infidelibus, atque vniuersim de cunctis peccatoribus conuertendis consilium capit & ad foelicissimum perduxit exitum. Quanta, vt diximus, erant obstacula tanti consilij? Quis crederet ignarum hominem, eò vniquam peruenturum? Quis imparatus ab illo subsidio quod ad tale opus omnino est necessarium, speraret se opus aliquando perfecturum? Et tamen credidit, credidit se à Deo vocari tale in opus, & non obstantibus quæ tam multa se ingerebant retinaculis, sperauit futurum quod euenit. Excessus fidei est, excessus spei est. *In Deo meo transgrediar murum*: supra quàm fieri posse videtur, faciam.

Ps. 17.

Charitatis in Deum vel proximum hic summus esse videtur actus, si quantum vitæ est, totum in Diuinum effundatur obsequium. Quid vltra faceret qui nihil vltra videtur posse? At Ignatij Charitas non modo totum quod est vitæ propriæ Deo glorificando & proximo beatificando consecrat, sed modum inuenit quo talem ad finem tot homines sese Deo ac proximo dedant quot ipsius instituto possunt adungi per consequentes & numquam nisi ad aternitatem desituros annos: quotue adiuuari poterunt, eorum continuis & non cessantibus vbique locorum obsequiis & sacrificiis. Excessus est Charitatis quæ cum illa tantum quæ potest debeat, facit se debitor omnium in quæ non potest temporum.

Temperantis est animi, nullas exquirere delicias, paucis esse contentum, soli seruire necessitati, si quæ contingant aspera, libenter ferre, aut etiam sibi vltro interdum accersere. Quis in hoc porro virtutis genere fuerit Ignatij animus, sic eius vitæ Scriptores referunt: *Totam Hebdomadam excepto die Dominico, ieiunabat, pane emendicato simplici, & aquâ contentus: humo nudâ vel asseribus nullâ re stratis, inter mendicorum quisquilias cubabat: cibi ac somni parcissimus, cilicio asperrimo, & præterea catena seu cingulo ferreo carnes atterebat: capite & pedibus initio nudis, & sine vllis calceis; Deinde cum studiis daret operam, soleis calceorum perforatis, utebatur. Inuera hyeme seniente semiamictus faciebat, quamuis è cælo densa nix caderet, ac tristi gelu cuncta inhorrescerent. Singulis quoque diebus ter sese flagellis etiam ferreis, quam acerrime cadebat: & constanter id omne refugiebat, quod aliquam posset afflictio corpori delectationem vel le-*



uamen asferre. Itaque cum esset decoro vultu, & egregia totius corporis firmitate, fractis paulatim viribus, omnis ille vigor acerrimi bellatoris, & forma viridis Iuuenta prorsus elanguit. In extrema deinde etate, penitentiarum senectute, studiis, laboribus, malisque assiduis fracta, etsi ea victum exigeret meliorem, cibi potusque fuit parcus adeo, ut domestici obstupescerent, & gustatum funditus perdidisse videretur, nisi si quando pauculis vesceretur castaneis, quae in Italia & Hispania, mendicorum cibaria sunt.

Nonne haec sunt virtutis excessus? Et quidem excessus tam manifestus ut quia nimius excessus est, vitij potius videatur excessus quam virtutis. Nam cum virtus in medio sit posita quod inter extrema duo continetur, quorum alterum excessus est, & alterum defectus dicitur, Nonne perinde virtus laeditur si cadas in excessum, ac si labereris in defectum? Sed respondetur ex Diuo Thoma Medium illud esse varium pro varietate personarum, & finium propter quos virtus exercetur. Sic enim fieri potest ut quod vni erit excessus vitiosus, non erit excessus alteri, vel erit excessus virtutis: quod non potest aptius declarari quam in sancto Ignatio qui cum omnem virtutem exerceret eo fine ut vocanti se Deo ad animarum salutem responderet, seque idoneum tanti operis redderet administrum; rationi consonum & Diuinae Iustitiae congruum iudicabat sic se omnibus cruciare modis tum ut praeterita vite contractas elueret maculas plenius, tum ut nouo statui se conformans, inciperet a seipso quod aggrediebatur munus conuertendi peccatores, atque in seipso id totum simul experiretur quod postea singulis accommodate per partes distribueret, fieretque illud in praxi quod iam ante audiuius ex Apostolo, *sive excedimus, Deo: sive sobrii sumus, vobis.* Excessus nostros aiunt Sancti, non humano sed Diuino metimur Iudicio, cuius si statera ponderamus quid a nobis velit Deus & a vobis, quod vobis excessus esset vitij, nobis est excessus virtutis.

Quod si attente considerassent hi qui facta sancti Ignatii voluerunt in inuidiam trahere, non essent opinor ausi nomen eius violare. Quidquid enim contra effutiunt, in excessum virtutis eius totum effunditur. Nimiam eius carpunt prudentiam, nimiam fortitudinem, nimiam religionem, nimium zelum, nimiam denique virtutem omnem, quam idcirco probro vertunt quia nimia quia extrema quia excessus est: sed recogitent in quo virtutis me-

1. 2. q. 64.

a. 2.

2. Cor. 5.



dium sit positum, & intelligent sic Ignatij virtutem in excessum abiisse, vt suum numquam deseruerit medium.

At vide Lector, quonam sit deuoluta oratio, vt iam nobis virtutum Ignatij non sit demonstrandus excessus, sed cum ipsis pateat aduersariis, declaranda potius est ratio cur talis excessus fuerit; Nempe sic exigebat ille finis quem sibi Diuinitus propositum sentiebat de salute omnium procuranda, ex quo fine cum omnes eius elicerentur virtutes, tam excelsas & sublimes illas esse oportebat quàm finis ille sublimis est & excelsus.

Videretur quidem ex vna parte, tam sublimem & excelsum finem obitare posse, quò minus tam perfectæ virtutes posent exerceri, cum in eo fine attingendo tam multa Religiosos distraherent vt religiosa disciplina vix satisficiant. Sed cum ex alia, sic sibi suisque sanctus Religionis Institutor sapienter prouiderit vt se ab humanis in Diuina totos erigerent: quæ aliis essent obstacula, sibi media faciunt & adiumenta suo fini consequendo; neque minus religiosè & solitarie mediis in ipsis viuunt turbis, quàm si desertis in locis viuerent. *Sedebit quippe Solitarius & tacebit, quia leuauit super se.* Quod Propheta dictum si de Viro solitariam agentem vitam, intelligendum esset, videretur potius dicendum fuisse à Propheta, *quia sedit solitarius & tacuit, leuauit supra se*: nam solitudo & taciturnitas sunt causæ cur tale genus hominum se supra se leuet: ac proinde non tam de illo Scriptura loquitur quam de viro mixtam agentem vitam, in quo sublimi vitæ genere quia leuauit super se, idcirco sedebit solitarius & tacebit. Id est, tametsi viuatur inter homines, viuet tamen perinde ac si esset solitarius; & loquetur perinde ac si taceret, nam supra quàm homo solet viuere vel quàm solet loqui, viuet ille & loquetur.

Vultis tandem videre quàm perfecte Ignatius hoc excellenti modo sederet solitarius & taceret? Videte postremum eius vitæ actum, quod est etiam tertium & postremum Caput vnde vita eius ecstatica tota esse demonstratur, nempe in egressu vitæ sicut fuit in ingressu & progressu.

Non dubitarim ego quidem quin deficiente vita, duos illos priores excessus mentis de quibus dictum est, excellentius senserit, cum sibi reuelatam habuerit foelicissimam illam horam, qua exutus mortali corpore, frueretur Deo suo plenius & amantius, sed in tertio duntaxat hæreamus mentis excessu qui ad



opus refertur supra communem operandi siue agendi morem. Quid magis solitum ac commune sanctis Ordinum Fundatoribus quam instante morte suos omnes conuocare, amplecti, admonere, & postremis quæ acutius pungunt, urgere ad virtutem Verbis? Quod sane laudabiliter multi præstiterunt, sed hanc tamen laudem fugit Ignatius, nulli suum quem proxime sibi norat instantem obitum, cuiquam prænuntiat, præterquam vni quem è tota domo elegit vt suo nomine summum adiret Pontificem, qui sibi proximè morituro plenariam impertiri dignaretur indulgentiam. De cætero, cum nihil etiam grauius nec ipsis medicis appareret quo instare illud tempus videretur: en se vnum cum vno Deo seruat: en solitarium & tacentem se solo spectante cœlo, mori prælegit: en cunctis absentibus, & iis etiam qui agroto solent adhiberi vigilibus, placidissimam cum Domino IESV noctem transigit, & postremum diem claudit.

Si palam sibi moriendum esset, optaret sane palam vniuerso mundo tanquam reum pro Christo mori. Sed quandoquidem hoc publicum & infame moriendi genus negatum est, morietur quo potest obscuro mortis genere, vt omnem à se laudis & honoris splendorem amoliat, non se Patrem, non se Fundatorem, non se Authorem ordinis audiat à filiis vel fratribus conclamari, deplorari, & paternam rogari benedictionem. Quasi vnus aut non quasi vnus ex illis pro nullo habeatur, & corpus etiam exanime procul ab aliorum sepultura in sterquilinum projiciatur. O vere mentis excessum quantus haberi potest in supremo vitæ excessu! Quod vnum in pestilentia timent omnes acerbius ne solitarij moriantur, hoc acerbum mortis genus mauult Ignatius quam illustre & gloriosum, ne quid vel tantillum viuens aut moriens humanæ concedat cupiditati, quam prorsus mortuam & in holocaustum penitus Deo datam ad extremum vsque spiritum constantissime consecrauit.

SE D numquid verendum est, ne dum altius illum qui se ita depreffit euehimus, hunc etiam à nobis longius distrahamus, nec possimus eum imitando sequi, quem tamen in exemplum nobis proponimus? Non est, mi lector, non est, quod hac in parte vereamur: nam quo in eminentiori loco virtus sancti Ignatij posita fuerit, eo erit non modo ad venerationem illustrior,



sed ad imitationem paratior : Vnde illud tandem conficietur quod proposita Veritas continebat , vt licet vita S. Ignatij tota sic exstatica , tota sit tamen exemplaris. Ratio hæc est scilicet inter alias, quod illa vita est magis exemplaris quæ nos ad magnam sanctitatem facili via ducit. Duo hæc simul inuicem iungi debent. Nam si vulgaris est sanctitas quantumcumque via sit facilis , non est multum exemplaris vita. Sit verò magna sanctitas , nec sit ad illam via facilis , vix erit qui non refugiat difficultatem. Cum autem illa duo concurrunt , vt sit exquisita sanctitas , & via facilis ad illam pateat , quis tùm illustre non videat exemplar vitæ ? Hoc est autem quod euidenter patet in vita sancti Ignatij , cuius sanctitas in hoc vno præsertim elucet , in quo est vera & summa sanctitas , nempe in fine spectando quo à Deo vocaretur , siue quod idem est , in vna Dei voluntate fideliter adimplenda. Modus autem quem præsertim abhibuit , hic est vt quacumque media forent aptiora , conquireret , & quacumque se offerrent , ac quidquid demùm ageret , eò totum purè referret , vt finem illum propositum attingeret , vt Diuinam illam voluntatem adimpleret. Quid præsentius ? Quid facilius ? Quid opportunius nobis ad imitandum ? Sicut enim sanctus Ignatius non est ita sanctus quod militiam deseruerit sæcularem , quòd studiis inferioribus se grandæuus addiderit , quod multa denique vel egerit vel passus sit , quàm quod purè propter Deum cuncta egerit , propter eius voluntatem , propter salutem proximi , quæ significata erat Dei voluntas : Sic plane nostra eius Imitatio non ita versatur in his rebus præstandis quas præstitit , quam in quibusuis nostris ordinariis & domesticis eodem quo ille fine , digerendis. Non enim à nobis eadem Deus quæ ab Ignatio voluit fieri : sed quæ à nobis vult fieri , vult eodem recto fine à nobis fiant quo Ille sua præstitit.

Quod quanti sit apud Deum meriti , quantumue præstet ad veræ sanctitatis augmentum , & optatam omnibus facilitatem , sic Societatis Historicus sapienter obseruauit : *Cum enim in actione honesta , non spectanda solum materia sit , sed etiam modus & finis , ex quibus rei quidem per se bonæ honestas amplificatur , media autem imperitur . cum hic sanctus vir non modo res præstantissimas ratione summa tractaret , sed medias quoque & quotidianas vite necessitates , ad prudentiæ normam diligentissime exigeret , & ad finem altissimum erigeret ;*



geret; quasi mercator, qui non pretiosarum modo mercium magna exerceret negotia; sed viam inuenisset, qua & quam minima faceret impendia, & quidquid attingeret faceret pretiosum, haud dubie tot annorum assidua cura, thesaurum quendam prope inestimabilem Diuina gratia, recteque factorum congescit. Ex eodem metiendum est capite, quantos in perfecta virtute progressus habuerit. Cum enim ad insignem progressum quolibet in studio necessaria ea sint, primum ut finis, ac terminus praeoscatur: deinde ut recta incatur via: ne si in incertum, vel per ambages erretur, sit labor itineris, non profectus: postremo ut assiduitas, conatusque progrediendi apte adhibeatur: qui totum vite Ignatij cursum animo lustret, non obscure hac illum singulari Dei beneficio prestantissime omnia adeptum sentiet. Non errore via per ambages vagatus est; non ignoratione optimi defatigatus circa media, sed ipso statim mutata vite exordio ab summo inchoans, simul ubi consideret absoluta virtus, simul rectam viam Deo monstrante didicit, simul denique eam incitatissimo capessuit impetu, quem quinque, & triginta annis non relaxauit vnquam, sed continenter magis, magisque contendit.

Sic itaque nostro in statu contendamus, sic finem nostrum attingemus. Quid potentius ad hanc contentionem excitandam? Nam in hoc fine attingendo & summa est nostra sanctitas, & summa sanctitatis facilitas. Summa est inquam sanctitas, quia sic Diuina voluntas efficitur quæ est nostra sanctificatio: summa est autem sanctitatis facilitas quia non aliud quam quod agimus quæritur, sed aliter tantum fiat, non humano, sed Diuino ductu ac fine. Qua de re cum sint expressæ alibi Veritates, fatis hic modo sit eas indicare.

Non aliud, sed aliter.

*In 1. parte, Die 7. Ianuarij.*

Non quidquid Christus egit, sed quomodo.

*In 2. parte, Feria 4. Cinerum.*

Quam gloriosa est similitudo Christi, tam gloriosa est obedientia.

*In 3. parte, in fine, ubi de votis.*



DE EODEM SANCTO, AD HÆC  
VERBA ISAIAE 49.

*Ecce dedi te in lucem gentium, ut sis salus mea,  
vsque ad extremum terra.*

ALIA VERITAS PRACTICA.

Quanto salutem omnium studio procurauit sanctus Ignatius, tam studiosi omnes Illius esse debent quibus est curæ sua salus.

RATIO EST, Quia quanto hîc salutem omnium studio procurauit sanctus Ignatius, tam potens est in cœlo præ aliis ad eorum salutem promouendam qui fuerint ipsius studiosi, quine ad Illum propterea studiosè recurrerint adiuuandi.

Sed quibus est curæ sua salus, tam studiosos esse par est illius Sancti, quàm potens est in cœlo præ aliis ad eorum promouendam salutem.

Ergo quanto salutem omnium studio procurauit sanctus Ignatius, tam studiosi omnes Illius esse debent quibus est curæ sua salus.

DISCVRSVS non minus est facilis quàm utilis. Prima propositio continet dogma commune de diuerfis Sanctorum meritis quibus par in cœlo respondet gloria, beatitudo, potentia, & singularis quædam efficacia ad certas quasdam hominibus communicandas gratias quas alij non conferrent. Sic vñtatum in Ecclesia cernimus, ut vel pro certis malis depellendis vel bonis quibusdam impetrandis, ad vnum e Sanctis potius quam ad alium recurratur, quia videlicet hæc illi singularis à Domino data est Gratia & Potentia ut sic colatur Sanctus in Deo, & Deus in Sancto glorificetur. Sic autem dicitur illa singularis Sancti potentia ipsius



meritis respondere, quatenus inter se habent quandam analogiam & similitudinem, vt qui dum viueret, misericordiae, castitatis aut alterius virtutis & bonorum operum laude præcelluerit, parem in coelo vim habeat similis gratiae conferendae. Vide sanctum Bernardum sermone de sancto Nicolao & de alijs sanctis.

Cum itaque sanctus Ignatius dum viueret, singulari salutem omnium studio procurarit, quod facile est ex eius vita declarare, plane id sequitur vt modo in coelis, tantum præ ceteris possit in hoc genere beneficij conferendi, quantum in terris excelluit bene merendo de omnibus, & omni studio salutem proximi conquirendo. *Euge serue bone & fidelis quia super pauca fuisti fidelis, super multa te constituam.* Hæc est videlicet remuneratio multiplicati talenti, vt in quo quis administrando fidelis fuerit, fiat potentior in eo dispensando. Quod & alia Parabola Dominus expressum nobis voluit paulo distinctius, cum sic negotiantem seruum inducit rationem suæ negotiationis reddentem: *Domine, Mna tua decem mnas acquisiuit. Et ait illi: Euge bone serue, quia in modico fuisti fidelis, eris potestatem habens super decem ciuitates. Et alter venit dicens, Domine, mna tua fecit quinque mnas. Et huic ait, Et tu esto super quinque ciuitates.* ANIMAE significantur, inquit sanctus Ambrosius, quibus iure præponitur, Sicut enim Angeli præsumt, ita qui vitam meruerunt Angelorum.

SECUNDA propositio est euidens ipso naturæ lumine, confirmari vero etiam potest tum sanctorum Patrum dictis, tum piorum exemplis hominum qui sua vota his potius deferunt, à quibus sperant certius se quod orant obtenturos.

Sic apte Diuus Ambrosius ad sanctos Petrum & Andream, qui primi ex omnibus sua reliquerunt omnia, recurrendum ait pro cupiditatibus nostris reprimendis, *Ama, inquit, propinquitatem Petri, affinitatem Andreae, vt pro te rogent: & recedant cupiditates tue Verbo Dei pulsa.* Quasi diceret: Illi sunt præcipue adeundi qui sunt in dono quod postulas conferendo præcipui.

Sic itaque, si tibi curæ est tua salus, studiosum te Illius Sancti exhibe, qui quantum in terris saluti omnium procurandæ studuit, tantum in coelis modo potest eam procurare omnibus sibi studiosis, demerendo illis gratias efficaces, quas alioquin forte non accepissent & quarum defectu periissent.



O gratiæ nullis sat dignis quæsitæ precibus : ô gratiæ nullis  
sat multis obtentæ votis !



Die 4. Au-  
gusti.

# IN FESTO S. DOMINICI

## ORDINIS FF. PRÆDICATORVM

### FVNDA TORIS.

*Surrexit quasi ignis , & verbum ipsius quasi facu-  
la ardebat. Ecclesi. 48.*

### VERITAS PRACTICA.

Nec lucere tantum , nec ardere tantum : sed vtrum-  
que simul.

*SENSVS EST , Quod sicut lucere tantum nisi ardeas parum  
est ; ita & ardere tantum nisi luceas , non est satis ; sed simul  
oportet lucere & ardere.*

*RATIO EST , Quia idcirco lucere tantum , nisi ardeas parum  
est , quod lux sine ardore nec aliis proffit & lucenti nocet.  
Sed ardor sine luce nec prodest etiam aliis , & ardenti sæpe nocet.  
Ergo nec lucere tantum nec ardere tantum. Sed vtrumque simul.*

1447. 5.

Sicut Elias de quo est Scripturæ Textus propositus : Sicut san-  
ctus Ioannes Baptista de quo Dominus , *Erat , inquit , lucerna ar-  
dens & lucens : & sicut sanctus Dominicus cuius sanctissima vi-  
ta , lux ardens fuit & ardor lucens , in vniuerso terrarum orbe.*

### I. P V N C T V M.

**Q**VALES quantique futuri sint aliquando Viri quidam  
Illustres , nonnulla solent signa portendere. Tale illud  
fuit quod narratur de Matre sancti Dominici , quæ cum  
grauida esset , sibi visa est in quiete continere in aluo catulum ore



*Nec lucere tantum, nec ardere tantum : sed vtrumque simul.* 797

præferentem facem, qua editus in lucem, orbem terrarum incenderet. Cui Diuino portento sic vniuersalis Ecclesia suffragatur, vt minime dubitet dicere, *Hoc somnio significatum, fore vt splendore sanctitatis ac doctrina, gentes ad Christianam pietatem inflammarentur*; additque Veritatem exitu comprobata, *id enim & præstitit per se & per sui Ordinis Socios deinceps est consequutus*. Quo Ecclesiæ testimonio quid illustrius & luculentius?

Hanc insignem Vitæ commendationem suo etiam nomine videbatur præferre. Quod est enim significatione Dominicus, hoc reipsa erat Vir totus Domini IESV, totus in Eius obsequium impensus & expensus. Quærit sanctus Thomas, an ipse Christus vocari posset homo Dominicus; & negat posse, quia ipse est Dominus; *Sed quæ ad Illum spectant*, inquit, *hoc efferuntur nomine, vt caro, voluntas & passio Dominica*; Vnde & nos Dominicum diem dicimus qui colendo præcipue Domino totus addictus est; & Antiqui Sanctissimum Eucharistiæ Sacramentum, breuiori & visitatori nomine *Dominicum* nuncupabant. O illustre nomen! ô illustrem nomine Virum, sed & reipsa illustriorem qui vita sua refert quod nomen profert.

Verum vt hæc distinctius illustrentur, reuocari huc debent quæ iam supra ex sancto Bernardo relata sunt, aliud esse lucere tantum, aliud ardere tantum, & aliud lucere simul & ardere. *Est S. Ioanne, Serm. de* enim, inquit, *tantum lucere, vanum: tantum ardere, parum: Lucere & ardere perfectum*. Ex quibus sancti Patris Verbis quantæ sanctitatis & perfectionis fuerit sanctus Dominicus licet colligere, nam si lucere simul & ardere perfectum est, certe quo quis luxit simul & arsit vehementius, ille censendus est perfectior: Talis autem fuit sanctus Dominicus vt & primo luxerit tanta doctrina scribendique peritia, cui nulla par esset: Deinde vero sic ardebat dicendo, vt omnes ab impietate reuocaret ad verum Dei cultum.

Numerata sunt hominum centum millia quæ in vna Galliæ Prouincia, suis sacris concionibus ad meliorem conuertit frugem. Tum ne in vno tantum laboraret loco, vel aliquo duntaxat tempore, scripsit librum contra errores sui temporis, vt vbique & semper prodesset omnibus, cumque aduersarij suos item libellos ventitarent, hanc illis optionem proposuit sanctus Pater, vt omnes ex vtraque parte libri compositi conicerentur in ignem, & qui



liber consumptis aliis reperiretur integer, ille sanam doctrinam contineret; qua optione capta, solum Dominici librum sic flammae sunt reueritae ut ipsam libri doctrinam & Viri sanctitatem ad omnes consequentes annos praedicarent.

*Luc. 12.* Erat videlicet Sacratior quidam Ignis in sancti Dominici Verbis ac Scriptis, cui nostras inferior tanta facilitate cederet, quanta Creatori creatura. Erat quippe Diuinus ille ignis quem Dominus venerat in terram mittere, atque ut accenderetur vel maxime desiderabat. Quamobrem quam Christo carus esset Dominicus, vel ex hoc vno liceret cogitare quod ignem illum ubique locorum accenderet cuius accendendi desiderium erat Christi ardentius. Quid enim carius cuiquam esse potest quam ut illud obtineat quod vehementius optat & sanctius? Iam non miror si tantum Dominico Christus deferret, ut cum paratus esset Christus vniuersum delere orbem, ob infames quae tum vigeant cupiditates, solo Dominici ac Francisci tum viuentis intuitu, posuerit manu tela & incendia, seruaritque mundum incolumem in hanc usque diem.

Certe illi nostra debet Gallia quod grauius à se malum depulerit, & quod bonum optabilius impetrarit. Depulit enim haeresim tum grassantem, quo malo nullum est perniciosius: & impetrauit Regem sanctum Ludouicum, quo bono non est aliud in regno melius. O si nobis haec conferretur gratia, ut quod in mente pejus est deperiret: & quod melius est vel daretur vel augeretur! Exprome affectum Sancto: Atque ut ipsum quoquo modo imiteris, expende Veritatem propositam; Adjunge auctoritati & Exemplo sanctorum, Rationem allatam, cur lucere vel ardere tantum non sufficiat. Nempe neutrum seorsim habitum prodest aliis, & habenti nocet.

*Luc. 11.* Ac primò quidem lucere tantum quid est, nisi apparere hominibus, nisi doctum & peritum videri: nisi ex his esse quibus dicebat Dominus, *Ve vobis legisperitis, quia tulistis clauem scientiae, Ipsi non introistis, & eos qui introibant prohibuistis.* Sic aptè sanctus Bernardus, *Ve vobis fratres, si luxerimus tantum.* Nam *lucemus quidem & magnificamur ab hominibus, sed mihi pro minimo est, ut ab humano iudice die.* Qui enim indicat me, Dominus est qui feruorem ab omnibus exigit, splendorem verò non item. Sicut itaque lucere tantum, idem est ac docere, & doctrinae famam sibi potius concii-

*Serm. de S. Ioan.*



*Nec lucere tantum, nec ardere tantum: sed utrumque simul.* 799

liare quam probitatis: sic plane qui sic dicunt & non faciunt, nihil aliis profunt qui magis mouerentur factis & exemplis quam dictis; quin potius & ipsis valde nocent, quod, ut ait sanctus Isidorus, *Interdum Doctoris vitio, etiam ipsa vera doctrina vilescit: quia dum non viuit, sicut docet, ipsam quam predicat veritatem contemptibilem facit.* *SI non habueris opera,* inquit sanctus Chrysostomus, *non tantum loquens non profuisti, sed & potius laesisti. Melius est tacere.* Quare? Quoniam opus mihi reddis impossibile. Cogito namque quod si tu tanta differens non efficis, multo magis ego venia dignus.

QUANTVM vero sibi ipsis noceant, sic Idem acute & grauius: Bene viuendo & bene docendo, populum instruis quomodo debeat viuere: Bene autem docendo & male viuendo, Deum instruis quomodo te debeat condemnare. Nempe Ille seruus qui cognouit voluntatem Domini sui, & non preparauit, & non fecit secundum voluntatem eius, vapulabit multis.

## II. P V N C T V M.

**S**ED ardor sine luce nec prodest etiam aliis, & ardenti saepe nocet. Hoc est enim velle mouere alios antequam doceas quale sit illud ad quod impellis; Quæ mera est cæcitas & labor cassus & damnum illud ingens quod indicabat Dominus: *Cæcus si cæco ducatum præstet, ambo in foveam cadunt.* DICEBAT QVE suis: *Euntes in mundum vniuersum predicate Euangelium omni creature, Euntes docete omnes gentes docentes eos seruare omnia quaecumque mandauimus vobis.* Quomodo enim seruabunt tam difficilia, nisi credant? Aut quomodo credent nisi doceantur & distinctè instruantur de omnibus? Aut denique quomodo docebuntur nisi tu lucem præferas? Propterea captius ductus est populus meus, quia non habuit scientiam. Propterea dilatauit infernus animam suam, & aperuit os suum absque ullo termino. Nam si dilucide scirent homines quanto in salutis versentur discrimine, cum Euangelicis non se conformant consiliis & præceptis, forte cauerent attentius; atque idcirco Apostolus tam crebro & frequenter: *Hoc scitote,* inquit, *intelligentes, quod omnis fornicator aut immundus,* & quæ prosequitur, quasi diceret, & sciant omnes nos docere quæ cauenda sunt, & intelligant quæ docemus ut caueant.

Quod idem ut facerent sui Timotheus, Titus & alij cum tri-



bus datis ad ipsos Epistolis vehementer inculcet, idcirco ait S. Augustinus, *Tres illas Apostolicas Epistolas ante oculos habere debet cui est Doctoris persona imposita. Neque tantum ut Dicentem auditores audiant, sed ut plane intelligant quid dicat*; Sic paulò ante Idem sanctus Doctor, *Qui docere vult, inquit, quamdiu non intelligitur; nondum se existimet dixisse quod vult, ei, quem vult docere: quia etsi dixit quod ipse intelligit, nondum illi dixisse putandus est, à quo intellectus non est: si vero intellectus est, quocumque modo dixerit, dixit.* Quæ paucis dicta fulsissime prosequitur sanctus Gregorius ad illa

*Iob. 38.* Verba Iob, *Quis dedit gallo intelligentiam?* GALLO, inquit, *Intelligentia desuper tribuitur quia Doctori Veritatis, virtus Discretionis, ut nouerit quibus, quid, quando, vel quomodo inferat, Diuinitus ministratur.* Non enim una eademque cunctis exhortatio conuenit, quia nec cunctos par morum qualitas astringit. Tum pergit copiosius id declarare; Ex quibus aperte patet quàm parum aut nihil aliis proficit ardor sine luce, cum nisi luceas & vnumquemque accomodate & opportune doceas, Zelum Dei forte habeas, sed non secundum scientiam: qui zelus indiscretus & inordinatus dicitur, quo quidem nihil perniciosius & ipsis Zelatoribus euenire posse

*Serm. 19 in Cant.* affirmat sanctus Bernardus, ut supra iam dictum est: *Facillime, inquit, Zelo tuo spiritus illudet erroris, si scientiam negligis. Nec habet callidus hostis machinamentum efficacius ad tollendam de corde dilectionem, quam si efficere possit ut in ea incautè, & non cum ratione ambuletur.* Et alibi, ad hæc sponsæ Verba, *Introduxit me rex in cellam vinariam: ordinauit in me Charitatem.* Omnino necessarie: *Importabilis siquidem absque scientia est Zelus. Vbi ergo est vehemens emulatio ibi maxime discretio est necessaria quæ est ordinatio Charitatis. Semper quidem Zelus absque scientia, MINVS EFFICAX, MINVSQVE UTILIS INVENITVR; PLERVMQVE AVTEM ET PERNICIOSVS VALDE SENTITVR.*

Quid clarius ad rem nostram? Aut si quid ultra desideres, Vide in 2. parte, FERIA 2. Quinquagesimæ, vbi hæc explicatur Veritas: *Scientia sine zelo, arma sine milite: zelus sine scientia, miles sine armis.*



III. PUNCTVM.

**N**EC igitur lucere tantum, nec ardere tantum : sed utrumque simul, ad exemplum sancti Dominici, qui studebat quidem ut luceret, sed in libro Charitatis studebat, ut arderet simul ac luceret; sicque mirabiles illos fructus retulit cum ad propriam suam perfectionem, tum ad proximorum salutem, qui enarrantur fusius in Eius vita, & quibus hi priuantur qui tantum lucent aut tantum ardent; quia tantum lucere vanum est, & tantum ardere, periculosum : Non solæ linguæ nec solus ignis in Discipulos congregatos descendit, sed linguæ igneæ ut docendo lucerent simul & arderent. *Sic luceat lux vestra coram hominibus*, dicebat Dominus, non ut vos tantum audiant, sed ut videant opera vestra bona & glorificent Patrem vestrum qui in cælis est. Quod utrumque præclare apud Prophetam exprimitur; *Lex veritatis fuit in ore eius, & iniquitas non est inuenta in labiis eius : in pace & in equitate ambulauit mecum*, ET MVLTOS AVERTIT AB INIQUITATE. *Labia enim sacerdotis custodiunt scientiam, & legem requirent ex ore eius : quia Angelus Domini exercituum est.*

Vide quid horum in te desit. Forte minus audes dicendo, & minus audes arguere delinquentes, quapropter audi rursus sanctum Bernardum : *Ferueat etiam in nobis zelus iste, Carissimi, Ferueat amor Iustitiæ, odium iniquitatis. Nemo vitia palpet, peccata dis- simulet nemo, nemo dicat, Numquid custos fratris mei sum ego? Nemo quod in se est, æquanimiter ferat cum viderit ordinem depravare, minui Disciplinam. Est enim consentire, silere cum arguere possis : & scimus quia similis pœna facientes maneat, & consentientes.*

Videri etiam debent in 1. parte, quæ habentur in Communi Doctorum, Confessorum non Pontificum, & Fundatorum Religiosi ordinis. Et in 2. parte, Fer. 6. Hebdom. 2. post Pascha.





IN FESTO  
TRANSFIGURATIONIS  
DOMINI.

*Hic est filius meus dilectus in quo mihi bene com-  
placui : Ipsum audite. Matth. 17.*

VERITAS PRACTICA.

Nullus est Christianus qui non credat Christum esse  
filium Dei; & vix ullus est Christianus qui hoc ve-  
rè credat.

RATIO quoad postremam Veritatis partem hæc est, quod qui  
non credit Christo in omnibus, non credit Christum esse filium  
Dei.

Sed vix ullus est etiam Christianus qui credat Christo in omnibus.  
Ergo vix ullus est qui credat Christum esse filium Dei; Quod  
certe est stupendum, & non silendum.

I. PUNCTVM.

**A**SSUMPSIT IESVS Petrum & Iacobum & Ioannem fra-  
trem eius, & duxit illos in montem excelsum seorsum, & trans-  
figuratus est ante eos. Videri possunt apud Euangelistas quæ  
plura de hoc Mysterio referuntur. Et in 2. parte, Dominica 2.  
Quadragesimæ. Necnon in 4. parte, Feria 5. Hebdomadæ 15.  
Nunc vero, ad illam Dei Patris vocem, quæ tùm de nube audita  
est: *Hic est Filius meus dilectus in quo mihi bene complacui*, Valde  
admiranda & fructuosa proponitur Veritas, si quod in illa est præ-  
cipuum, attentè perpendatur.



*Vix ullus est Christianus qui credat Christum esse filium Dei. 803*

Nam quod primò dicitur: *Qui non credit uniuersim & in omnibus Christo Domino, non credit Christum esse filium Dei*, sic quidem præmitti debuit, sed nullam habet difficultatem. Licet enim aliqui possint vni resistere veritati cognita & non aliis simul propositis, tamen ordinatæ loquendo si quis non credit Christo loquenti, vix alia potest esse causa, quàm quod non credat esse vera quæ dicit Christus: si enim vera esse crederet quæ Christus dicit, tum certe Christo crederet, cum alicui credere nihil aliud sit quam id esse verum quod dicit credere: Vnde à contrario non alicui credere nihil aliud est, quàm non credere verum esse quod dicit: *Quod scimus loquimur, aiebat ipse Dominus, & quod vidimus testamur: & testimonium nostrum non accipitis. Si terrena dixi vobis & non creditis: quomodo si dixero vobis cœlestia, credetis?* Quasi diceret, nihil vobis dico quod non sciam esse verum: vos vero si verum illud esse non credatis, neque mihi credetis. Nunc autem quod qui non credit uniuersim & in omnibus vera esse quæ Christus dixit, non credat Christum esse filium Dei, tam apertum est & manifestum quàm aperte patet filium Dei nihil nisi verum dicere, aut si quis verum non dicat non posse esse filium Dei; Nam qui loquendo verum non dicit mendax est, mendacem autem esse filium Dei, quis nisi blasphemus dicat? Quis Veritatem posse esse mendacem, nisi vesanus & omni prorsus sensu destitutus ausit cogitare? Sic itaque prorsus indubitata est hæc propositio, Quod qui Christo loquenti non credit in omnibus, non credit Christum loquentem esse filium Dei. *Loquor vobis & non creditis! O stulti & tardi corde ad credendum in omnibus!*

*Ioan. 3.*

*Ioan. 702.  
Luc. 244.*

## II. P V N C T V M.

*S E D vix ullus est Christianus qui Christo credat in omnibus.*

Hæc est accuratius declaranda & attentius expendenda propositio. Cum autem multa sint in Euangelio quæ Christus dixit & quibus aperte non creditur, tum inde Symbolum quoddam facile potest confici, quod distinctos duodecim complectatur articulos.

Primus est, *Beati pauperes. Beati qui nunc esuritis. Beati qui nunc fletis. Beati cum vos oderint homines propter filium homines. Væ vobis diuitibus qui habetis consolationem vestram. Væ vobis qui saturati estis.*

*Luc. 6.*



*Vae vobis qui ridetis nunc. Vae cum benedixerint vobis homines.* Nonne hæc & his similia quæ plura leguntur in Euangeliiis, dicta sunt à Christo Domino? At quis hæc esse vera credat? Quis nollet esse pauper si crederet pauperes esse beatos, cum nullus sit qui non esse beatus velit? Quis vellet esse diues si diuites crederet miseros cum nullus esse velit miser? Et tamen vix ullus est qui non velit esse diues & qui non timeat esse pauper: nec alia certè de causa quàm quod credit beatos esse diuites & miseros esse pauperes. Nonne hoc est manifestè Christo non credere?

*Matth. 6.* Secundus articulus. *Nemo potest duobus Dominis seruire: aut enim unum odio habebit, & alterum diligit: aut unum sustinebit & alterum contemnet. Non potestis Deo seruire & Mammonæ.* Id est, diuitiis seu cupiditati habendarum diuitiarum. Hic est Dominus cui simul & Deo seruire, negat nos posse Christus. At vero Christianus vix ullus est in sæculo qui non seruiat illi cupiditati, quo etiam sensu hic intelligitur vt supra ostensum est: & tamen non propterea crederet se non posse simul seruire Deo, nam id nollet profiteri; Non credet igitur Christo.

*Matth. 7. Luc. 13.* Tertius articulus. *Intrate per angustam portam, quia lata porta & spatiosa via est quæ ducit ad perditionem, & multi sunt qui intrant per eam. Quàm angusta porta & arcta via est quæ ducit ad vitam, & pauci sunt qui inueniunt eam!* In quibus Christi Domini Verbis, illud maxime quia quod vsurpat est obseruandum: sic enim reddens rationem cur sit intrandum per angustam portam quia lata & spatiosa via est quæ ducit ad perditionem, manifeste docet duas tantum esse vias per quarum alterutram nos oporteat necessario incedere. Vix autem hoc creditur à sæculari Christiano; nam vix ullus est qui se in arcta putet esse via, neque tamen fatebitur se in lata esse, & se propterea periturum quod in arcta non sit via, vnde tertiam quandam viam fingat necesse est, nec proinde Christo credat duas tantum vias asserenti.

*Matth. 11.* Quartus articulus. *Tollite iugum meum super vos, & discite à me quia mitis sum & humilis corde: & inuenietis requiem animabus vestris. Iugum enim meum suauis est, & opus meum leue.* At quis hoc credit? Quis nolit requiem animæ suæ? Cur non igitur Christi iugum se subdit vnde est illa quies? Videsne quam pauci sint qui reuera iugum illud ferant? Cur porro nisi quia credunt illud esse durius & difficilius? At quid est hoc credere nisi Christo non credere?



*Vix ullus est Christianus qui credat Christum esse filium Dei. 805*

Quintus. *Omnis qui se exaltat, humiliabitur.* Nihil magis veretur qui se exaltat, quam ut humilietur; & profecto si crederet se verè humiliandum, non se exaltaret: & tamen vix est ullus Christianus in mundo qui se quantum possit non exaltet, nec ullo modo propterea timeat se humiliandum! Undenam tanta illi præsumptio, nisi quia non credit Christo? Luc. 14. 18.

Sextus. *Nisi conuersi fueritis, & efficiamini sicut paruuli, non intrabitis in regnum cælorum.* Vix est ullus eorum etiam qui hæc Christi Verba sæpe audierint, qui vel intelligant vel curent intelligere; tantum abest ut contentur se his conformare. An vero propterea si non sint sicut paruuli quo sensu Christus intelligit, se credent non intraturos in regnum cælorum? Non credent scilicet quia desperarent. Et tamen Christus dixit: Christo non credunt. Matth. 18.

Septimus. *Quod hominibus altum est, abominatio est ante Deum.* Vide quid sit altum hominibus: Vide quàm illud appetat pene omnis Christianus: Vide quantis exultet gaudiis si quod appetiit, obtinet. Itane vero propterea se suumque illud gaudium credet eam esse quam Christus dicit abominationem ante Deum? Non credet. Et tamen illud est quod hominibus altum est; & quod hominibus altum est, Christus aperte dicit esse abominationem ante Deum. Sed Christo dicenti non creditur. Luc. 16.

Octauus. *Quamdiu non fecistis vni de minoribus his, nec mihi fecistis. Et ibunt hi in supplicium æternum.* Quamcumque suauem & facilem his Christi Domini Verbis, si modo vera sit, afferas interpretationem, contrà tamen videbis vix ullum esse qui dum vni negat pauperi cui dandum esset, se Christo negare credat, aut se propterea supplicium illud æternum subiturum quod minatur Christus. At si Christo crederet, quomodo id negare auderet: aut si negare audet, quomodo dici potest Christo Domino credere? Matth. 8.

Nonus. *Beatius est magis dare quam accipere.* Non leguntur quidem in Euangelio, hæc Christi Verba, sed nulli dubium esse potest, quin sint Eius Verba cum sic Apostolus expresse dicat, *Oportet suscipere infirmos, ac meminisse Verbi Domini IESU, quoniam ipse dixit: Beatius est magis dare quam accipere.* Nonne credis Apostolo? Nonne credis hoc esse Christi Verbum? Credisne vero Verbum hoc? Credisne beatius tibi esse si tua des quàm si accipias tibi data? Act. 20.



Itane das tam libenter ac tu accipis? Ah te miserum & infidelem qui credis Christum dixisse beatus esse magis dare quam accipere quia sic refert Apostolus; & hoc ipsum non credis esse quod Christus dixit!

Inc. 9.

Decimus. *Qui me erubuerit & meos sermones, hunc filius hominis erubescet, cum venerit in maiestate sua & Patris, & sanctorum Angelorum.* Non est tantummodo Christum erubescere, quando de fide agitur apud Infideles; sed quando etiam de cauendo peccato res est: siue omittendo siue committendo aliquid propter solos homines, ne ab eis videlicet irridearis. Quod alio loquendi modo Christus dixit *scandalizari propter Verbum*: Id est confundi, non audere id facere quod alioquin faceres nisi timeres aliquod probum. Iam vero quam multi sunt Christianis qui hoc timent, qui sic scandalizantur, & qui sic erubescunt Christum? Timentne vero illi quod Christus dixit fore ut ipsos erubesceret & confunderet? Plane non timent, quia timore isto grauiori, leuiorem expellerent alium; & mallet confundi ab hominibus quam à Christo. Quid est autem quod hanc horrendam non timeant confusionem à Christo denuntiata, nisi quia Christo non credunt?

Inc. 12.

Vndecimus. *Stulte, hac nocte animam tuam repetunt à te, quae autem paraſti, cuius erunt? Sic est qui sibi thesaurizat, & non est in Deum diues.* Quis Christianorum saecularium credit hunc esse stultum qui sibi sic thesaurizat? Quis potius non eum sapientem praedicet qui nulli facta injuria, thesauros opum accumulet? Quis sibi propterea credat timendum ne qua nocte non putat derepente moriatur? At nonne illud est tamen quod Christus disertis & expressis Verbis dicit? Est illud sane, sed Christi Verbis quantumcumque disertis & expressis non creditur.

Inc. 16.

Duodecimus. *Quid hoc audio de te? Redde rationem villicationis tuae.* Constans est omnium Patrum sensus atque interpretatio, quod ex his Verbis, & ex tota quam affert Christus Parabola de Villico dissipante bona Domini sui, voluerit nobis declarare quod sumus omnes velut eius villici, qui quaecumque bona possidemus, siue quae dicuntur fortunae, siue quae corporis & animi naturalia vel supernaturalia, sic à Deo euncta recepimus, ut sit illi omnium reddenda ratio. Si quid eorum bonorum aliter aut alio sine fuerit usurpatum, quam ipse ordinarat, tunc dici dissipatum



*Vix vllus est Christianus qui credat Christum esse filium Dei.* 807

bonum, & dissipatori dies dicta, qua in iudicium aduocetur: quando vel nulla viderentur alia mala perpetrata, solumque hoc dissipatoris bonorum Domini crimen objiceretur; satis graue timendumque est crimen, inquit Dominus, vt vnusquisque merito in se reuertatur & dicat, *Quid faciam?*

Quis hoc vero Christianus tam verè dicit, quàm vere videt se pene omnia dissipasse bona Domini Dei sui? Quis propterea vel tantillum mouetur vt rebus suis prospiciat sicut iste villicus de quo laus est in Euangelio? *Filij, scilicet, huius seculi prudentiores filiis lucis in generatione sua sunt.* Sed quare prudentiores sunt nisi quia credunt saeculo suggerenti talem prudentiam; alij vero non credunt luci & Veritati? *Hoc est Iudicium, quia lux venit in mundum, Ioan. 3: & dilexerunt homines magis tenebras quam lucem. Erant enim eorum mala opera.*

### III. P V N C T V M.

**V***IX vllus est igitur Christianus qui Christum credat esse filium Dei, Quia vix vllus est qui Christo credat in omnibus: & certum ex fide est, quod qui Christo non credit in omnibus, non credit Christum esse Dei filium, qui non aliud potest loqui quàm verum; Vnde & Ipse, vel de vno ait articulo, Qui non credit, iam* *Ioan. 34* *iudicatus est, quia non credit in nomine vnigeniti filij Dei: Quasi diceret, quantumuis alia crederet, si vel vnum quod dixit Christus non credat, non alia credit ex illa fide quam debet vnigenito Dei filio, qui mentiri non potest: nec ipsum proinde Christum esse Dei filium, talis dicendus est credere. At vero qui dici non potest credere Christum esse Dei filium, dicine poterit Christianus? Audi sanctum Cyprianum contra quasuis excusationes aut interpretationes quas possis fingere: Vnde hac incredula cogitatio? Vnde impia & sacrilega ista meditatio? Quid facit in domo fidei, perfidum pectus? Quid, qui Christo omnino non credit, appellatur & dicitur Christianus? Pharizæi tibi magis congruit nomen, nam cum Dominus in Euangelio de eleemosynis disputaret; Et quæ fufius pergit.* *Serm. de Eleemos.*

**Q***UIA verò licet etiam crederes, non sufficeret ad Christiani nomen adimplendum nisi fidem operibus comprobares: Videri propterea hic posset attentius quam longè sis ab his operibus*



quæ Christus præcepit aut consuluit, & propter quæ obseruanda non minus à Patre dictum est, *Ipsam audite*, quàm vt credatur.

Sicut porro Symbolum fidei ex numeratis articulis contextum est, ita & quidam Decalogus confici potest ex decem Christi præceptis siue consiliis quæ in primo sermone quem habuit præcipuè commendauit, & quæ ab ipsis Christianis tam parui æstimantur quàm suprà expensi articuli. Breuius tamen referetur, quia plana sunt omnia, vel facile possunt explanari.

*Matth. 5.* Primum contra iram, *Ego dico vobis quia omnis qui irascitur fratri suo, reus erit iudicio. Esto consentiens aduersario tuo cito, dum es in via cum eo; Vide antecedentia & consequentia: Vide & quam paucis hæc curæ sint.*

*Ibid.* Secundum contra lasciuiam, *Ego dico vobis quia omnis qui viderit mulierem ad concupiscendum eam, iam mæchatus est eam in corde suo: Quod si oculus tuus dexter scandalizat te, erue eum, & projice abs te. Et si dextra manus tua scandalizat te, abscide à te, & projice eam.*

*Marci 9.* Additque alibi, *Et si pes tuus te scandalizat, amputa illum.* De quibus suprà fufius. Sed his præceptis vel consiliis quis obedit? Quis acquiescit? Satis porro deinceps fuerit, solum Christi præceptum producere, cum illicò manifestè appareat quàm sint pauci vel penè nulli qui præceptum seruent.

*Ibid.* Tertium itaque est contra perjuriam & Iuramenta: *Ego dico vobis, non iurare omnino.*

*Ibid.* Quartum contra vindictam, *Ego dico vobis non resistere malis sed si quis te percusserit in dexteram maxillam tuam, præbe illi & alteram. Et ei qui vult tecum iudicio contendere, & tunicam tuam tollere, dimitte ei & pallium: & quicumque te angariauerit mille passus, vade cum illo & alia duo. Qui petit à te, da ei: & volenti mutuari à te, ne auertas.*

*Ibid.* Quintum contra Inimicitias & odia: *Ego dico vobis: Diligite inimicos vestros, benefacite his qui oderunt vos: & orate pro persequentibus & calumniantibus vos.*

*Ibid. 6.* Sextum contra vanitatem: *Attendite ne Iustitiam vestram faciatis coram hominibus, vt videamini ab eis. Alioquin mercedem non habebitis apud Patrem vestrum qui in cælis est.*

*Ibid.* Septimum contra Auaritiam: *Nolite thesaurizare vobis thesauros in terra, vbi arugo & tinea demolitur, & vbi fures effodiunt & furantur. Thesaurizate autem vobis thesauros in cælo, vbi neque arugo neque*



I. P V N C T V M.

**I**NTRAVIT IESVS in quoddam castellum, & mulier Luci 10.  
quedam Martha nomine, excepit Illum in domum suam, & huic  
erat soror nomine Maria, quæ etiam sedens secus pedes Domini,  
audiebat verbum illius. Martha autem satagebat circa frequens ministe-  
rium, quæ stetit, & ait: Domine, non est tibi cura quod soror mea reli-  
quit me solam ministrare? Dic ergo illi ut me adjuvet. Et respondens di-  
xit illi Dominus: Martha Martha, sollicita es, & turbaris erga plurima.  
Porrò, VNUM EST NECESSARIUM. MARIA OPTI-  
MAM PARTEM ELEGIT QUÆ NON AVFERE-  
TUR AB EA.

Quàm apte quadret hoc hodiernum Euangelium Assumptæ  
Beatæ Virginis dicetur in declaratione Veritatis propositæ, cuius  
Praxis quale sit momentum & meritum sicut patet ex illa glorio-  
sissima Virginis Matris Assumptione, sic quanta sit illius Assum-  
ptionis gloria non potest melius demonstrari quam ex ipsa Veri-  
tate proposita, seu ex Vno ipso necessario de quo Christus Domi-  
nus; Quæ & optima pars est quam elegit Maria Mater eius San-  
ctissima, ratione cuius hodie sublimem illam ad Gloriam euecta  
est cui nulla in cœlis par esse cognoscatur post Filium.

Præmittenda est itaque toti Discursui Veritas, *Quod quidquid  
est in Assumpta Beata Virgine gloriosius, quod sane ex multis unum est  
aliquid singulare, hoc est assumptum scilicet ex Illo vno necessario de quo  
loquitur Christus.* Hoc est in illo fundatum. Hoc est inde deprom-  
ptum, hoc est inde glorificatum.

Ratio est valde moralis, practica & peropportuna his qui suæ  
perfectioni vacant. Cum multa nempe considerari possint quæ ad  
huius triumphî magnificentiam concurrerunt, cum representari  
possint nouem illi Angelorum Chori qui certatim concelebrent  
resurgentem, ascendentem & triumphantem Virginem matrem:  
Cum Ipse Christus Dominus sua præsentia triumphum cohone-  
stare & manu ducere dignissimam Matrem suam in paratum sibi  
thronum, sit facile contemplari: Cum & ipse Thronus ad similitu-  
dinem throni Salomonici describi possit, de quo dicitur, *quod non* 3. Reg. 10.  
*est factum tale opus in vniuersis regnis.* Ac cum pleraque alia pro-  
iusque pietatis sensu possint cogitari: Tum verò unum est singu-



818. Die 15. Augusti. In Festo Assumptionis B. Mariae Virginis.

lare & solidum, quod præ cæteris omnibus vere gloriosum, vere illustre est & vere memorandum, Singularis illa scilicet Gloria propriæ Beatitudinis seu beatificæ Visionis, quam adepta est, quam consecuta est, quam possedit hodie & in æternum possessura est supra omnes Beatos alios, supra quolibet Angelorum choros, vno Christo inferior, cæteris omnibus eminentior & excelsior, non sola solum sede seu gradu quodam ad dignitatem externam sublimiori, sed ipsius quam vocant essentialis Beatitudinis possessione tam gloriosa, tam beatifica, tam eximia & singulari, ut Illa vna plus illius gloriæ possideat quam ceteri simul omnes Beati, vereque de se dicat: *In plenitudine Sanctorum detentio mea.* Hoc est Vnum videlicet gloriosius, hoc est illustrius & ad omnem memoriam insignius.

*Ecclesi. 24.*

Nam cum vera Beatitudo veraque coelestis Gloria non in triumphis illis consistat qui ad humanum nostrum morem componuntur, sed in ipsa sola Dei visione & amore Deifico: quid sequitur nisi hoc ipsum etiam præ cæteris vnum esse quod vere gloriosum, verè beatum, vere sit prædicandum? Atque eo magis prædicandum, eo magis gloriosum & beatum censendum, quò lumen gloriæ seu illa Dei visio & Diuinus amor magis affluent & abundabunt?

*Cant. 6.*

Hoc est vel maxime quod ipsi mirabantur & celebrabant Angeli; *Quæ est ista quæ progreditur quasi Aurora consurgens, pulchra ut luna, electa ut sol, terribilis ut castrorum acies ordinata?* Nempe ut *aurora consurgens*, dum viueret, progrediebatur semper in amore Diuino, & ex illis iustis erat de quibus Sapiens: *Iustorum semita quasi lux splendens procedit, & crescit usque ad perfectam diem.* Pulchra erat ut luna, non quæ suis decrescit spatiis, sed quæ semper plena & lucida, siue corpus siue animum Virginis spectes, nullus ibi defectus. *Electa ut sol* qui cum sit singularis in sua specie, & vnus in mundo recte representat singularem illum coelestis gloriæ statum ad quem euecta est, tanto claritatis splendore supra omnes Sanctorum cætus, quantus est solis splendor supra omnes astrorum ordines. *Nihil splendoris in aliis*, ait sanctus Hieronymus, *quod non re-luceat in Maria.* Sic propterea denique *ut castrorum acies ordinata* dicitur, quod illa vna contineat vniuersam Sanctorum aciem, siue Sanctitatem consideres, siue beatitudinem, siue potentiam qua contra Dæmones, in gratiam hominum plus Vna valet apud Fi-

*Prov. 4.*



lium, quàm quidquid creatum est. *Vna est columba mea, perfecta mea, viderunt eam filiae, & beatissimam predicauerunt, & reginae laudauerunt eam. Multae filiae congregauerunt diuitias, tu supergressa es vniuersas.* Congaude illi plenius, & protestare quod si etiam maiorem & beatioram illam posses facere, faceres. Sed verè id non dices nisi saltem hodie quod possis ad eius promerendum cultum, sic facias.

Cant. 2.

Prou. 31.

II. P V N C T V M.

**S**ED ex illo vno necessario de quo Christus Dominus in Euangelio, assumpta est illa caelestis gloria & singularis beatitudo, ad quam euecta est hodie Beatissima Virgo, super omnem Creaturam.

Id est, ex continua illius Vnius necessarij Praxi promeruit vt sic glorificaretur, Inde assumptum est eius meritum vt sic assumeretur ad talem gloriam. Neque enim praeiise quod Virgo mater, vel mater Christi, vel plena gratia fuerit, ad tantam euecta est beatitudinem; sed quod simul bonis suis operibus seu praeclaris virtutum & perfectae praesertim Caritatis actibus quamdiu vixit, se dignam fecit tali foelicitatis aeternae Gloria. Nam cum velut merces, velut brauium, & velut corona Iustitiae detur vnicuique mortaliū immortalis in coelo Gloria, sic oportet totum antecedentis vitae promeritum considerari, vt ex aequo respondeat illa consequens merces, & aeterna compensatio, vt illud adimpleatur: *Vnusquisque mercedem propriam accipiet secundum suum laborem. Vnusquisque quod fecerit bonum, hoc recipiet à Domino.*

1. Cor. 3.  
Ephes. 6.

Iam vero quid est illud Vnum necessarium in Praxi? Quomodo Beata Virgo sese in illa exercuit? Et quale inde est meritum affecta? Tria sunt nobis modo breuiter explananda. De primo cum multa dici possint secundum literalem, allegoricum, moralem & anagogicum Scripturae sensum, quae patent apud Interpretes, tum eo praecipue recidunt omnia vt dicatur esse voluntas Dei bona, beneplacens & perfecta, Id est, in substantia, in modo & in fine: nihil vt aliud purè spectetur quam quod velit Deus, prout velit & quia sic vult. Hoc enim vnum verè censendum est necessarium in hac vita, sine quo ad aeternam perueniri non potest, licet adsint cetera omnia: & quo posito secure peruenitur, licet alia desint omnia. Quod est autem verius illud bonum sine

Rom. 12.



quo perueniri non possit ad æternam vitam, & cum quo certissime perueniatur, nisi voluntas Dei? Tolle hanc ab homine, quid proderit quidquid fecit, si non fecit quod Deus voluit? *Numquid vult Dominus holocausta & victimas, & non potius ut obediatur voci Domini? Melior est enim obedientia quam victima, & auscultare magis quàm offerre adipem arietum.* Vnde expresse sanctus Thomas: *Quæcumque alia virtutem opera ex hoc meritoria sunt apud Deum, quod fiant ut obediatur Diuinæ voluntati. Nam si quis etiam martyrium sustineret, vel omnia sua pauperibus erogaret, nisi hoc ordinaret ad impletionem Diuinæ voluntatis, meritoria esse non possent, sicut nec si fierent sine Charitate.* Qui autem voluntatem Dei fecerit, quantumcumque parua fecerit, *Ipse intrabit in regnum cælorum*, ait ipse Rex cœli & terræ.

Hæc est optima pars quam elegerat Maria Magdalena præ sorore sua Martha. Nempe ut sedens secus pedes Domini audiret Verbum illius, audiret quid à se vellet, in hoc vno tota esset ut quid loqui vellet, audiret, & quod audiret exequeretur. Martha autem quæ satagebat circa frequens ministerium, bonam quidem partem & ipsa elegerat, sic ministrando Discipulis & ipsi Christo Domino, sed non optimam sicut Magdalena, quia non Vnum necessarium sicut Illa elegerat: non stabat in vno sicut illa, non stabat in vna Dei voluntate audienda & facienda sicut illa: Nimis erat sollicita & nimis turbabatur erga plurima: volebat aliquid aliud aut alio modo & fine, quàm vellet Christus. Maria autem Magdalena nihil aliud, sed hoc vnum, atque hoc vno plane modo & fine, quo Christus vellet: sicque in Christo tota erat, tota illi adhærebat, tota illi viuebat, totalitate quadam indiuisibili & inseparabili, quæ distinguebat munus eius à Martha munere: quia Martha non sic indiuisa erat; Nempe quantum erat nimis sollicita & turbata, tantum erat à Christo diuisa, & ab vno necessario, diuisione scilicet repugnanti perfectissimæ & vniuersæ Charitati quæ vnum Deum pure respicit, pure amat, pure quærit in omnibus, pure inuenit, & inuento pure fruitur, quæ est pars optima quæ non auferitur à possidente quia perseverat in cœlo ad omnem æternitatem.

Sic sanctus Augustinus postquam dixit, non opus Martha fuisse reprehensum à Domino, sed munus distinctum: fuse ostendit in his duabus Mulieribus duas vitas esse figuratas, præsentem &



futuram, temporalem & æternam. In Martha, inquit, erat imago presentium, in Maria futurorum. Quod agebat Martha, ibi sumus: quod agebat Maria, hoc speramus. Hoc agamus bene, ut illud habeamus plene. Quasi diceret, plenitudo & perfectio illius Vnius necessarij & optimæ partis non habetur nisi in Cœlo, vbi plene possidetur; sed interim tamen similitudo aliqua cœlestis & beatæ illius vitæ inchoatur in hac præsentî, quando scilicet ad Mariam imitatione propius accedimus quam ad Martham. Id est, quando magis sejungimur ab aliis omnibus ut vni Deo vacemus, vni obsequamur & salutem operemur. Vnde & pergens sanctus Doctor: Nam & modo, inquit, inde aliquid agimus remoti à negotiis, sepositis familiaribus curis: conuenistis, statis, auditis. In quantum hoc agitis, Mariæ similes estis.

Quod autem alij Patres & Interpretes vitam contemplatiuam & actiuam in his duabus fororibus esse expressam dicunt, & tanto contemplatiuam actiuæ anteferri, quantò Maria Marthæ, seu quantò pars optima bonæ præfertur, non aliter intelligendum est quàm ut exponit Diuus Thomas, id ita quidem verum esse de duabus illis vitis consideratis in genere suo, sed nihilominus, inquit, posse tamen contingere quod aliquis in operibus vitæ actiuæ plus mereatur quàm in operibus vitæ contemplatiuæ: puta si propter abundantiam Diuini amoris, ut eius voluntas impleatur, propter ipsius Gloriam, interdum sustinet à dulcedine Diuina contemplationis ad tempus separari: sicut Apostolus dicebat ad Romanos nono: optarim ego ipse anathema esse à Christo pro fratribus meis, quod exponens Chrysostomus in libro de Compunctione dicit, ita totam mentem eius demerserat amor Christi, ut etiam hoc quod ei præ cæteris omnibus, amabilius erat, esse cum Christo, rursus id ipsum, quia ita placeret Christo, contemneret.

Ex quibus sanctorum Patrum Verbis liquet quod sicut cæteris paribus melius est, exercitio Mariæ vacare quam Marthæ, si tamen cætera non sint paria, id est, si major sit Dei Gloria, magisque appareat eius voluntas ut quis se exerceat in actiuam quam in contemplatiuam vitam, tunc melius illi esset exercitium Marthæ, quam Mariæ, quia nihil melius quam Diuina voluntas; quapropter si Martha debet Mariæ cedere, si actiuam debet deferi propter contemplatiuam, non alio potiori iure hoc fit, quam quia sic melius agnoscitur Dei voluntas & impletur: Vnde si ut dictum est agnosceretur Deum aliter velle de aliquo, tunc propter eandem ratio-



822 Die 15. Augusti. In Festo Assumptionis B. Mariæ Virginis.

nem, Contemplatiua deberet deferi, & Marthæ deberet Mariæ cedere.

2. 2. q. 188.  
ad 6.

Quod si ex Diuina voluntate & ordinatione, sic simul miscerentur & vnirentur illæ duæ Vitæ vt neutra præjudicaret alteri, sed potius sese mutuo adiuuarent, tunc Mixta illa Vita perfectior & excellentior esset quàm sola contemplatiua vel actiua sola. Sic expresse sanctus Thomas, ex quo concluditur tanto perfectius Illud vnum attingi necessarium, & optimam possideri partem, quanto excellentius mixta illa vita tenebitur, quantoque fidelius ambæ sorores Martha & Mariæ simul conuenient, sicut videre est in Beatissima Virgine.

Hoc est secundum Caput nunc ita explanandum vt pateat quomodo sanctissima Virgo Deipara duas duarum sororum vitas simul conjunxerit, ac perfectius etiam quam ipsa Magdalena in Praxi Vnum illud necessarium exercuerit. Quod quidem explicari posset duobus modis, primo vt intelligatur sic aliquando vacasse Diuinis & internis rebus, vt tùm velut Magdalena solis illis vacaret, nec quid vllò modo de terrenis & externis cogitaret. Interdum vero etiam sic actiuam, velut Martha, exercebat vitam, vt tota esset in illo exercitio; sicque vtramque diuerso vitam tempore coleret, semper quidem perfecte in suo genere, sed non semper in eodem vitæ genere, sicut sanctus Gregorius Nazianzenus refert de sua Matre Nonna, Rem, inquit, *suam domesticam industria sua ita auxit quasi pietatem colere nesciret, Deo autem ac Diuinis rebus ita se addixit, tamquam à rerum domesticarum procuracione plurimum abesset, nec ab alterutro horum impedita est, quo minus alterum impleret; tota in domesticis, & tota in Diuinis.* Quod certe non est parum laudandum in foemina.

Sed alter est agendi modus qui longe videtur nobilior & perfectior: vt scilicet simul agas contemplando, & agendo contemplaris. Potest quidem deferri actio si non sit necessaria, sed numquam deferitur Contemplatio nec cum ipsa etiam cessat actio; sicut Beati numquam deferunt Beatitudinem & contemplationem Dei, licet circa nos operentur. Sic B. Virgo sic indefesse Diuinis & humanis intendebat, vt si quid esset exterius operandum numquam omitteret, sic etiam verò Illa opus suum externum operabatur vt de Diuinis contemplandis numquam remitteret. Vacabat internis & Diuinis vt Magdalena, sed non sicut Magdalena:



quia simul vacabat externis si esset opus: vacabat vero externis ut Martha, sed non sicut Martha, quia simul internis & Diuinis intendebat. Nullum est externi generis officij à Martha Christo præstitum, nec vllum internæ pietatis officium ipsi à Magdalena redditum, quod non simul ex æquo Maria Virgo reddiderit. Quasi vna illa simul eodem tempore, atque eodem obsequij actû, Magdalena esset & Martha. *In hac vna & summa Maria,* Serm. 2 de Assumpt. inquit sanctus Bernardus, *& Marthæ negotium, & Mariæ non otiosum otium inuenitur.* Petrus vero Damiani paulo fufius, alludens ad duas manus quæ in throno Salomonis visebantur: *Dua,* ait, *manus, actiuam & contemplatiuam vitam significant, quæ Virginem pro-* Serm. de Natuit. Virg. *pensiori diligentia ambierunt. Adeunt nec actio contemplationem minueret, & Contemplatio non desereret actionem. Recordare quia non erat ei locus in diuersorio, quomodo Filium suum propriis lactauerit uberibus, & omnes vagientis paruuli sustinuerit actiones, & tunc intelliges quia plurimum ministravit. Tum vero de contemplatione: Considera quia ipsa est qua in contemplatiua dignitatis superuecta dulcedinem, in ipsius Dei substantiam lucidiores infixit obtutus. Laeu eius, inquit Canticorum secundo, sub capite meo: & dextera illius amplexabitur me.*

Fufissime autem sanctus Anselmus: *Sicut Mater est singularis, inquit, ita & istarum vitarum effectus, quarum istæ sorores typum tenent, in ea extitit singularis. Numquam in aliqua persona, immo in omnibus sic Martha operata est: Numquam alias sic Maria contemplata est, numquam illa vel hac alias quod suum est, sic exhibuit. Et post descriptam Marthæ actionem, per vlitata misericordiæ corporalis opera, sic ad beatam Virginem cuncta illa refert: Ita non quemlibet ex minimis sed summum Dei Filium hospitem suscepit: nudum carne, vel etiam pannis operuit: esurientem pavit: sitientem lacte potauit: infirmum per infantiam & iacentem non solum visitauit, sed etiam balneando, fouendo, leniendo, gestando frequentauit, ut merito de ea dicatur, Martha satagebat circa frequens ministerium: Comprehenso & crucifixo quasi in carcere posito affuit. Et post multa de hoc actiuæ genere, sic pergit in eius explicanda contemplatiua: Quid de Deo non sapiebat in qua, Sapientia Dei latebat, & in cuius utero corpus sibi aptabat? Christus est, ut ait Apostolus, Dei virtus, & Dei Sapientia, & in eo sunt omnes thesauri Sapientia & Scientia absconditi. Christus autem in Maria. Ergo Dei virtus & Dei Sapientia, & omnes thesauri* Homilia in Euangelii hodiernum.



*Sapientia & Scientia in Maria. Hac non tantum ad pedes, sed etiam ad caput Domini sedens audiebat Verbum ex ore eius. Hac conseruabat omnia verba Angelorum, Pastorum, Magorum, nec non ipsius Filij sui, conferens in corde suo. Nemo umquam sicut Ista gustauit quàm suauis est Dominus. Inebriabatur ab vbertate domus Dei & torrente voluptatis suae potabatur. Nec mirum, quoniam apud eam, imo intra eam erat fons vitae de quo manabat tanta perfectio vtriusque vitae. Circa plurima vt Martha occupabatur: circa vnum vt Maria delectabatur, quia vnum est necessarium; plurima auferuntur, vnum manet. Singulariter igitur partem Martha peregit, singulariter optimam partem Maria elegit.*

Quibus sancti Patris Verbis nil superest adjungendum, nisi quod tertio loco propositum fuit, quale inde meritum Beatissima Virgo Deipara sit consecuta, vt inde coelestis illa gloria & singularis Beatitudo ad quam hodie fuit euecta, desumpta fuerit. Sic autem facile demonstratur: Nam cum omne meritum nostrum cui Beatitudo proportionata respondet in coelis, situm sit in quantitate & qualitate bonorum operum; profecto quanta extiterint numero, & qualia perfectione opera, tanta futura sit beatitudo necesse est: Et cum sint nonnulla principia ex parte Dei, & ex parte nostra vnde illa quantitas & qualitas operum peti soleat, hinc manifestè sequitur vt quod erit principium huiusmodi quantitatis & qualitatis operum, illud ipsum erit singularis huius gloriae quam possidet, fundamentum. Quodnam est autem illud principium ex parte B. Virginis, nisi Vnum illud necessarium, cui sic affixa erat vt quod spectat ad quantitatem bonorum operum, tanta numerari possint quanta possunt recenserì momenta, quibus à primo suae Conceptionis exordio, ad supremum vsque spiritum mereri potuit. Sicut enim nunquam destitit actu & re ipsa inhærere summo illi Bono in quo est positum illud Vnum necessarium; ita plane non cessauit à merito; quin potius cum secundum totam gratiae latitudinem semper operaretur, sic in singula meritis procedebat momenta, vt vnoquoque actu, vnoquoque suspirio, suum duplo meritum adaugeret. O quis numeret quò tandem vsque peruenerit?

Atque ita ratiocinandum est de qualitate tantorum eius operum. Nihil excellentius, nihil sublimius. Quid enim excellentius pura & perfecta Charitate? Quamnam vero purior & perfectior

Caritas



Charitas quàm quæ ex puriori corde procevit? Quodnam denique purius esse Cor potest intelligi, quàm quod vni Deo sic adhæret vt nulla prorsus humana re vel ad momentum inde diuellatur? *Dilectus meus mihi & ego illi. Tenui eum, nec dimittam donec introducam illum in domum matris meæ.* Id est, in coelestem ipsam beatitudinem, vbi numquam excidit nec decrescit.

O quàm vere sanctus ille Doctor qui asserit, *amorem Diuinum ec-* S. Dionys.  
l. de Div.  
Nom. c. 43  
*tasim facere, siue amantes ita in Deum rapere vt viuant in Deo potius quam in seipsis, verèque dicant, vno ego iam non ego, viuit verò in me Christus;* Quasi dicerent, quotquot sunt actus vitæ, tam sunt excellentes & perfecti quàm ipse Christus excellenter & perfecte viuit, qui sic in ipsis viuit sicut & ipsi viuunt in Eo. O vere pars animæ optima quam Maria elegit, cum illud vnum elegit necessarium cui toto quo vixit tempore, non adhæsit modo sed inhæsit in ipsum transformata *Vnum. Ego dilecto meo, & ad me conuersio eius.* Cant. 7.

### III. P V N C T V M.

**Q**UOD unum est igitur in Assumpta Virgine gloriosius, hoc est Assumptum ex illo Vno necessario de quo Christus ad duas illas egit sorores, quæ Virginem Matrem sic expresserunt, vt Illa Vna simul fuerit & fecerit quod illæ ambæ circa Dominum IESVM; Atque ex illa Praxi Virgo sanctissima tantum est affecuta perfectionis & meriti vt quidquid in coelis possidet, inde possideat: & quidquid in coelis est post Christum gloriosius, propterea possideat quia sic vno illo necessario in Praxim exercito sibi illud promeruit. Hinc rursus sacri Comites eius triumphi: *Quæ est ista, inquiunt, quæ ascendit de deserto, deliciis affluens, innixa super dilectum suum?* Totus illi videlicet mundus erat velut desertum, quia nihil in mundo præter vnum Deum spectabat. Inde verè deliciis affluebat quia inde summam illam qua fruebatur beatitudinem prorsus hauserat. Innixa denique est super dilectum suum, quia totum id agnoscit provenire ex Illo qui humilitatem respexit ancillæ suæ, vnde illam beatam dicunt omnes generationes; & quia fecit illi magna qui potens est, & sanctum nomen eius.

O quantum Illa iam magnificat Dominum suum! ô quantum à Domino etiam & magnificatur, & magnificanda proponitur! Quid hodie conferes ad eius magnificentiam? Cogita quidquid



voles, nihil illi gratius, aut gloriosius, nec tibi quidquam vtilius aut facilius inuenies quàm si Eam velis imitari, secundum datam tibi gratiam, in illo vno necessario ad Praxim quotidianam reuocando.

Prou. 8.

Nihil illi gratius, primò quidem quia nihil Christo Filio & Domino suo gloriosius, cum id vnum præcipue commendauerit, id vnum in vita egerit, id vnum vt agamus ad suam gloriam nostramque spiritalem vtilitatem vehementius desideret. Deinde quod Ipsa sciat ex rei Veritate, & ex propria cognorit experientia, nihil esse opportunius ad ingentem meritorum cumulum promerendum, quam si huic vni negotio inuigilemus, insistamus, induremur & immoriamur. Hoc est quò nos inuitat cum his Sapientiæ verbis nos allicit ad consecretandas vias suas: *Nunc ergo filij, audite me, Beati qui custodiunt vias meas. Audite Disciplinam, & estote sapientes, & nolite abjicere eam.* Quid ab illa petis aliud, cum potius id tibi sit attendendum quod Illa petit à te? Si quam etiam, eius fauore, gratiam postules, nonne illam facilius largietur ad id efficiendum quod ipsa ex te desiderat, quam si quid aliud quantumuis pium & salubre cupias? Nec illud frustra est additum, *Estote Sapientes*, quasi diceret, in hoc ostenderis an sis sapientes, necne; si quod est tam facile simul ac vtile, vobis cordi & curæ sit, cum in re tanti momenti quale est salutis negotium, nemo id Sapiens recusset quod est iudicatum à Christo, & ab eius Matre, opportunius ad salutem.

Rectene illi iudicant & nobis consulunt? Cur non ergo assentiris? Quid magis humano conforme Iudicio quàm Veritas? Et hæc est Veritas Euangelica præcipue commendata? Quid magis appetit humana voluntas quam Bonum? At quale bonum aptius quam quod Veritas ait vnum hoc esse necessarium? Quid denique Memoriam magis iuuat quam rerum addiscendarum necessitas & breuitas? Quid porro breuius & magis necessarium, cum sit vnum & vnum duntaxat necessarium?

Nonne tam sæpe audiisti cauendum esse ab homine vnus negotij, quia scilicet cum illud vnum habeat, totus in eo curando est: & hunc hominem qui sit vnus huius negotij maxime cauet Dæmon qui contra nos est vigilantior quam nobis ipsi simus, ideoque omni modo conatur inde nos auocare, & multa interponere quæ nos auertant. Itane plus apud te valebit, quam Beatissima



*Stellam è corona Virginis extrahit, qui humilitati, &c. 827*

Virginis consilium & oblata Gratia? Dic Virgini, dic illi quidem vehementer, *ne id patiatur*; sed audi etiam tibi dicentem, *Ne mihi aduerseris dum tibi preesto sum*. Vide in 4. parte, Feria 2. Hebdom. 23. Vbi opportunè ad seriem Euangelicam de hoc vñonecessario.

IN EODEM FESTO. AD HÆC  
APOCALYPSIS VERBA.

*Et signum magnum apparuit in cælo. Mulier amicta Sole, & Luna sub pedibus eius, & in capite eius corona stellarum duodecim. Apoc. 12.*

VERITAS PRACTICA.

Stellam è corona Virginis extrahit, qui humilitati suæ partem aliquam detrahit.

*SENSVS ET RATIO EST, Quod stellam è corona Virginis extrahit qui non ex æquo æstimat omnes humilitatis partes & gradus ex quibus velut stellis Corona eius texta est. Sed qui humilitati suæ partem aliquam detrahit, non ex æquo æstimat omnes humilitatis partes & gradus.*

*Ergo & Is stellam è corona Virginis extrahit. Quod cum sit valde impium, amanda est humilitas omni ex parte, nec quicquam hic in terris refugiendum, quantumcumque nos humiliet & graue videatur, quod in cælis magnam habet repositam gloriam.*

I. P V N C T V M.

**M**ULIEREM illam quæ à sancto Ioanne describitur, Virginem De Symbolo ad Catechiz. Mariam significasse, quæ Caput nostrum integra integrum peperit, nullus vestrum ignorat, inquit sanctus Augustinus. *Signum magnum in cælo est, Quia præ cæteris beatis omnibus emi-*

M m m m m ij



S. Bern.

net, ac spectabilis, speciosa, gloriosa & Illustris apparet. *Amicta est sole*, quia quidquid creatæ lucis & gloriæ communicatur per partes aliis, totum in eam affluit & circumlucet. *Luna sub pedibus eius est* quia toti præcipue sic dominatur orbi terrarum, ut nihil nos habere voluerit Deus nisi per Mariam. Denique in capite eius corona est stellarum duodecim, Id est, tot varij cœlestis gloriæ gradus quot Virgo dum viueret diuersos humilitatis actus exercuit, & gradus sibi comparauit, quibus ex æquo in cœlis, respondent diuersimodè, fulgentes gloriæ radij, qui caput eius velut corona stellata cingunt & ornant.

Matth. 23.

Phil. 2.

Ephes. 4.

Stella enim est Symbolum humilitatis, quæ cum parua nobis appareat, magna tamen in se est, & magnos habet effectus; Sic perfecta Humilitas quàm parua est in terris, tam magna in cœlo est. Hæc est virtus quæ perseuerans vsque ad mortem coronatur in cœlis, exaltatur, sublimatur, & tanto altius euehitur, quanto hic depressa fuit. Rata est sententia Domini, *Qui se humiliauerit exaltabitur, & quantum quis se humiliauerit, tantum is exaltabitur.* Sic de ipso primùm Christo decretum est: *Qui humiliavit semetipsum factus obediens vsque ad mortem, mortem autem crucis, propter quod, inquit Apostolus, & Deus exaltauit illum.* Et rursum: *Qui autem ascendit, quid est nisi quia & descendit primùm in inferiores partes terræ; Qui descendit, ipse est & qui ascendit super omnes cœlos, ut impleret omnia.*

Sic & consequenter Beata Virgo, quæ ascendit super omnes Creaturas, ipsa est quæ descendit infra omnes. O quanta fuit descendens humilitas! ô quanta resurgens è tumulo, & ascendens in cœlum, & in Reginam hominum atque Angelorum coronatæ gloria! Quanto splendore cœlum ornat Caput illud coronatum! Quam iucundè lucet beatis omnibus corona illa stellarum duodecim! Sed væ tibi quisquis es qui ad eius exemplum perfecte & integrè non vis humiliari! Audi quid pecces, audi quid audeas: *Stellam è corona Virginis extrahis: qui humilitati tuæ partem aliquam detrahis.*

Quæ proposita Veritas ut manifestior fiat, ac simul magis appareat humilitas in Virgine exaltata, & Virgo in humilitate coronata, declarandæ sunt illæ Virtutis partes siue gradus qui stellis duodecim designantur.

PRIMVS est, *Cognitio sui*, Qua vnusquisque à se nihil ha-



bere cognouit sed à Deo, cui refert totum acceptum. *Omne datum optimum & omne donum perfectum desursum est.* Hanc sui perfectissimam cognitionem haud dubie Beata Virgo habuit, satisque declarauit suo illo magnifico Cantico, quo præter vilitatem suam quam respexit Deus, cætera omnia quæ ab Elizabetha prædicabantur Deo retribuit. *Magnificat anima mea Dominum.*

Iam vero huic gradui respondet ea gloria qua vbique sic honoratur, & colitur, vt quæ sunt propria Christo Domino, de illa per communicationem eiusdem gratiæ censeantur & dicantur; vt quod sit Ianua cœli, mediatrix, vita, spes nostra, & similia. *Tu es spes unica peccatorum, per te speramus veniam delictorum, & in Te Beatissima, nostrorum est expectatio premiorum.* Sic sanctus Augustinus. Serm. 18. de Sanctia.

SECUNDVS gradus, *Se infra omnes ducere & reputare.* Sic illa se ancillam & vltimam omnium non verbo tenus, sed corde & re ipsa sentiebat. At modo prima & super omnes exaltata cognoscitur. Nempe illa quæ dicebat, *Nardus mea dedit odorem suum,* iam ipsa dicit: *quasi Cedrus exaltata sum in Libano, & quasi cypressus in monte Sion:* quæ sunt arbores eminentissimæ, sicut nardus, humillima. Cant. 2. Eccles. 24.

TERTIVS gradus, *Non se tantummodo reputare vltimum, sed & reputari velle & talem libenter estimari,* postremum semper quærendo locum. Sic illa libentissimè: Sic illa quasi vna è plebe infra omnes audiebat loquentem filium; sic illa non modo post Apostolos, sed post ipsas etiam mulieres quæ nominantur adesse in cænaculo postrema recensetur. Nunc vero nullus est hominum & Angelorum cui non præsit & non præemineat, vno Deo inferior. Regina est Esther cui duæ seruiunt famulæ, natura scilicet angelica & humana. Matth. 12. Act. 17. Esther 15.

QVARTVS, *Silere & celare dona diuinitus sibi data,* nisi purè ad gloriam Dei sint reuelanda. Sic illa prorsus reticebat, nec quidem dilecto sponso Iosepho mysterium Incarnationis Dominicæ communicauit, licet illum de se grauida non parùm anxium & sollicitum sciret. Iam vero manifestata est omnibus eius gloria, nil Mariæ nomine clarius, nihil eius dignitate & merito notius: *Beati me dicent omnes generationes.*

QVINTVS, *Singularitatem euitare, & popularis occasiones auertere fugere.* Sic illa in purificatione & sæpe alias cum se posset pro-



830 Die 15. Augusti. In Festo Assumptionis B. Mariæ Virginis.

bare Virginem & Matrem Dei, tamen abstinuit: nec patrasse miraculum, nec docuisse mysterium, aut vix à quoquam nominata dum viveret, reperitur. At modò, quot Sanctorum praconiis, quot Patrum Scriptis, quot Christianorum omnium votis & vocibus celebratur? *Tu gloria Ierusalem, tu latitia Israel, tu honorificentia populi nostri.*

*Ecclesi. 15.* SEXTVS. Si laudes euitari non possint, sic eas audire quasi non audias, quasi tuæ non sint, sed ipsius Dei, nec his aliter delecteris quam in Deo. Sic illa dum laudatur; *Et exultauit spiritus meus in Deo salutari meo.* Nunc verò videns id Deum velle, suas ipsa laudes suis inspirat, quamnam sint sibi iucundiores, indicat, *Ecclesi. 14.* quæ sint gratiora obsequia: quæ munera ditiora. *Ego mater pulchra dilectionis, & timoris & agnitionis, & sanctæ spei. In me gratia omnis viæ & veritatis. In me omnis spes vitæ & virtutis.*

SEPTIMVS, *Contemptum libenter pati quando sic Deo placet.* Sic illa cum Filius in Cruce contemneretur, *stabat iuxta crucem,* & quantum Matri accedit de filij gloria vel ignominia, tantum illa de illatis filio probbris & contumeliis, suam hauriebat partem. Nunc autem à filij gloria, gloria Mariæ Matris sic est indiuisa vt vix sit dies Christo facer, vix vllæ ad Christum preces deferantur, vix vlla Saluatori reddantur vota, quin simul Beata parens inuocetur, & colatur: nihilque demum tutius Christo possit offerri, quam per manus Mariæ matris. *Beatus homo qui obseruat ad postes ostij mei.*

*Prov. 8.* OCTAVVS, *Paupertatem profiteri, carere necessariis, egen- tem vitam agere, & non nisi mendicato victitare.* Sic illa frequen- tius, non modo cum in Bethleemitica specu, & in Ægypto de- morandum fuit: sed cum Filius ageret inter homines, atque ita pauper esset vt non haberet vbi Caput reclinaret, ministrarentque illi piæ nonnullæ mulieres, credine tum potest Matrem aliquid possedisse? Nonne de suis filio communicasset? Aut si filio magis placebat pauperem vltro vitam agere, numquid & idem matri placuit? Quid quod ab ipsis egenis, preces efflagitabat & subsidium, *Luc. 8.* vt refert sanctus Ambrosius, *In prece, inquit, pauperis spem reponens.* At modò Illa est gratiarum omnium Dispensatrix, & Cœli Thesauraria, quæ de se ipsa dicit: *Mecum sunt diuitiæ & gloria, ut ditem diligentes me, & thesauros eorum repleam.*

*Prov. 8.* NONVS: *Subjici & obedire aliis, ex affectu humilitatis.* Sic illa non tantum sponso, in omnibus, sed cuius hominum, si cuiquam



cedendum & parendum fuisset, vt sæpe contingit pauperibus qui passim repudiantur. Nunc vero huic obediunt & Angeli & Dæmones, nullaque est Creatura cui non dominetur. *Omnium, inquit, excellentium & humilium corda, virtute calcaui.* Ecclesi. 24.

**DECIMVS**, *Argui quasi erraueris, cum sis tamen innocens.*

*QVID est quod me quarebatis? Nesciebatis quia in his quæ patris sunt, oportet me esse. QVID mihi & tibi est mulier? Nondum venit hora mea.* Quibus filij verbis videbatur Virgo mater argui & errare, cum nihil tamen peccaret. At modo, inquit Petrus Damiani, *accedit ad aureum illud Diuina seueritatis tribunal, non rogans, sed imperans, Domina non ancilla. Quomodo enim potestati tuæ obuiare poterit potestas illa quæ de tuis visceribus traxit originem?* Luc. 2.  
Ioan. 2.

**VNDECIMVS**. *Recusari, aut raro accipere quod iuste & rationabiliter videretur dandum, neque ullo modo negandum.* Sic illa si desiderio solum suo satisfactum voluisset, numquam à Christi oculis & præsentia se separatam voluisset. Et tamen tamdiu se separatam vidit & sustinuit, vt vix ab eius Resurrectione ad sequentes vitæ annos cum illo egerit. Nunc vero nihil plane illireculatur; *Pete mater, neque enim fas est vt auertam faciem tuam.* *QVID vis Esther regina? Quæ est petitio tua?* 3. Reg. 2.  
Esther 5.

**DVODECIMVS**, *Ejici patria, exulare, interdici suis bonis, & exponi omnibus miseriæ modis.* Sic illa non modo fugiens in Ægyptum cum filio, sed post eius Ascensionem in cælum, cum tantæ persecutiones mouerentur in Iudæa, & vbique contra Christianos, vt omnibus vel moriendum vel secedendum esset: nonne illa tum ejecta est & in insulam Pathmos cum Ioanne, cui à filio data erat in matrem venit exul, & multos ibi annos extorris & particeps vniuersæ tribulationis quam subirent alij, demorata? *Nunc autem ad eam gemunt & suspirant omnes exules filij Eux, cuius patrocínio liberentur & æterna tandem quiete potiantur.* Sic sanctus Thomas: *Sicut nauigantes, inquit, per stellam diriguntur ad portum: Ita Christiani per Mariam ad salutis gloriam.* Apoc. 1.  
Opusc. de  
Salut. An-  
gel.

Quibus ita declaratis, & non minus affectu quam intellectu decursis, Ratio Veritatis propositæ sic procedit, quod stellam è corona Virginis extrahis si non ex æquo æstimas omnes illos humilitatis gradus, ex quibus velut stellis corona eius texta est, prout supra descripti sunt. Nam extrahere stellam ex illa corona, nihil aliud est quam in mente tua non putare vnum ex illis gradibus



tanta dignum gloria quanta hîc prædicatur. Si autem ex æquo non omnes æstimas, perinde est ac si non putares aliquos aut ex illis vnum non ea dignum gloria quæ declarata est. Licet enim gradus possint esse inæquales meritis, dicuntur tamen ex æquo, id est, similiter omnes illam mereri gloriam, quæ relucet & quæ celebratur in memorata corona: ac proinde similiter merentur vt ita de his iudices & sentias; aut certe si non ita sentis & iudicas, tu inde tantum apud te subtrahis gloriæ & splendoris, quantum de æstimatione diminuis, cum in illa tua æstimatione & iudicio consistat tota gloria, qua dignum putas quemlibet humilitatis gradum. Sicut si quem diceres gloriosum & multum celebrares à diuitiis & deliciis quibus in vita potitus est, ego non eum propterea crederem ita gloriosum aut celebrandum, quia non multum æstimo diuitias neque delicias, & quam modica est apud me diuitiarum ac deliciarum æstimatio, tam parua & nulla est illorum gloria qui abundant diuitiis. Sic prorsus ratiocinari debes de illis duodecim gradibus seu stellis Coronæ Virginalis, si quem ex illis apud te minus æstimas: minus etiam facis gloriam inde redundantem in Caput Beatæ Virginis, atque ita extrahis aut quantum in te est obscuras illum splendorem, qui ex tali stella seu ex parte talis gradus in beatifica relucebat corona. Velle ne ita eius obscurare gloriam? *Qui elucidant me*, inquit, *vitam æternam habebunt.* At vero, qui obscurant illam, quid putas habituros?

## II. P V N C T V M.

**S**ED si humilitati tuæ partem aliquam detrahis, non ex æquo æstimas omnes humilitatis partes & gradus.

Nempe illam partem quam detrahis, hoc ipso satis indicas te non similiter æstimare sicut alias humilitatis partes, in quibus te exerceas, aut quas non à te repellis sicut istam, quæ idcirco dicitur detrahi quod illam in Praxi repudies.

Recenseatur ille humilitatis gradus, aduocetur in mentem & discursum pars illa quam auersaris: sit ea scilicet quæ septimo & quæ octauo ponitur loco de contemptu tui & paupertate vitæ. Fatearis te in his humilitatis partibus deficere, nec te posse persuaderi ad illas amplexandas. Nonne hoc idem est ac non illas æstimare



æstimare in Praxi sicut alias de quibus es persuasus? Quid est enim persuasum esse de re quapiam facienda, nisi rem illam ita æstimare factu utilem aut necessarium, ut in effectum efficacem veniatur? Nonne qui persuadere vellet tales humilitatis gradus, rationem persuadendi depromeret ab utilitate vel excellentia vel necessitate, vel aliqua demum alia Bonitatis & Commendationis parte qua solet animus persuaderi? Vnde si tu nondum persuasus es ad Praxim illarum humilitatis partium, nonne hoc idem est ac profiteri te nondum videre illas esse utiles aut necessarias aut aliqua ratione bonas & amplexandas? Nonne hoc denique est non illas æstimare? Quid est enim æstimare in Praxi virtutem aut aliquam virtutis partem? Quid est quod tu ipse humilitatem æstimes ex aliqua sui parte, nisi quod iudices illam partem vel excellentem vel utilem aut necessariam? Vnde à contrario quid sequitur de aliis partibus à quarum Praxi abhorres, nisi quod aliud de illis iudices? Quid sequitur nisi quod iudices illas non esse ita utiles ac necessarias, & vno verbo nisi quod illas non ita æstimes? *Non est nobis pars in David*, Dicunt quidam rebelles: Id est, partem illam deferimus, condemnamus, impugnamus.

2. Reg. 20.

Sitne verum aut falsum tuum iudicium, nihil hîc attinet dicere, cum sit satis ad exponendam propositionem id demonstrari, quod ex humilitatis gradibus seu partibus si quid detrahis, si quid detrectas facere, si quid repudias, non illud ex æquo æstimas sicut alia quæ non ita refugis & auersaris. O homo, quis te constituit iudicem & arbitrum in Diuinis illis decernendis?

### III. P V N C T V M.

**S**TELLAM ergo è Corona Virginis extrahis, qui humilitati tue partem detrahis. Quam enim partem detrahis, non illam in Praxi æstimas sicut alias: quam autem humilitatis partem non æstimas, non illam ducis ea dignam gloria quæ celebratur in corona Beatissimæ Virginis, nam illa gloria est æqualis & vniformis, est vna eademque omnium stellarum illustratio: Tu vero qui aliter sentis & iudicas de illis gradibus humilitatis, aliter etiam sentias necesse est de illis stellis seu de illarum gloria: & prout erit modica quorundam graduum æstimatio, tam parua & obscura erit stella seu gloria quæ illi respondet gradui, sicque

3. Pars.

Nnnnn



Act. 13.

in tua mente, in æstimatione, & in illa parte appretiatiua quæ est pars animi tui nobilior, tam parui facis gloriam quæ Virgini ex contemptu proprio, & paupertate vitæ accessit, quam tu parui facis talem contemptum, talemque paupertatem. O te peruersum qui sic perueris cœlestia! *O te inimicum omnis iustitiæ qui non desinis subuertere vias Domini rectas!*

Rom. 9.

Nec dicas te probare & æstimare in Virgine quod in te non probas nec æstimas. Si enim illud æstimares in Virgine, in te etiam æstimares, aut te ipsum condemnares. Nam si id probas in Virgine, non aliter probas quam quod Illa recte iudicauit & æstimauit. Si autem Illa recte iudicauit, tu qui oppositum de re eadem sentis, nonne te ipsum falsi condemnas iudicij? Aut Illa errauit aut falleris: Quia non potest esse tam diuersum de re vna duorum iudicium quin alterutrum erret & fallatur. Nam quod est valde notandum, non modo Illa iudicauit talem sibi gradum humilitatis esse necessarium, sed & tibi etiam quando sic vellet Deus vt contemnereris sicut illa contempta est, atque idcirco etiam libenter tulit illum sui contemptum vt sic facilius persuadereris eius exemplo tibi similem esse ferendum; Vnde si fateris illam recte sensisse, fatendum tibi est te errare in diuerso de te iudicio; aut si te non putas errare, Illa decepta est cum iudicauit exemplum suum tale esse vt capax foret tibi persuadendi bonum esse contemni & humiliari, quando sic vellet Deus. Tunc enim tibi est æque necessarium atque illi fuit: Cur enim illi, nisi quia Deus sic voluit? Et cur non tibi, si Deus æque vult? *Quid adhuc quaeritur? Voluntati enim eius quis resistit? Quis nisi erret?*

Prou. 8.

Putasne tibi vel vllas huius virtutis partes aliquando necessarias? Omnino putas, quia de quibusdam tantum nobis est contentio? Sed cur illas dicis esse necessarias nisi quia Deus ita constituit & ordinauit? At quando ita permittit vt aut contemptum patienter feras, aut pecces non ferendo injuriam: Nonne ita tibi contemptum illum ordinat & constituit, quantum scis esse ordinatum & constitutum ne vniquam peccato consentias?

Caue ne peccatum peccato adjicias, ne in Christum ac Virginem simul pecces. Vterque enim te pramonet Verbis Sapientiæ,

*Qui in me peccauerit, lædet animam suam.*



Reginam sine regno dicimus cum B. Virginem dicimus, &c. 835

EODEM DIE, AD HÆC  
PSALMISTAE VERBA.

*Astitit Regina à dextris tuis, in vestitu deaurato,  
circumdatus varietate. Ps. 44.*

VERITAS PRACTICA.

Reginam sine regno dicimus, cum Beatam Virginem  
dicimus huius præcipue regni Reginam, nobis non  
illi subiectis.

RATIO EST MANIFESTA, Quia Regina sine regno  
esse dicitur si regnum ei non est subiectum.

Sed nobis non subiectis, regnum hoc non est subiectum Beatae Vir-  
gini.

Ergo Reginam sine regno dicimus, cum illam dicimus huius præci-  
pue regni Reginam, nobis non illi subiectis. Quod est illi pro-  
brosus potius quam honorificus, ac proinde cauendum.

I. PUNCTVM.

**C**ONSIDERARI possent Tituli quibus Beata Virgo  
vere Angelorum ac hominum Regina est. Primus Mater-  
nitatis, hoc ipso enim, inquit sanctus Ioannes Damascenus, <sup>l. 4. de Fide.</sup>  
quo facta est mater Regis regum, & Domini Dominantium, facta est <sup>c. 15.</sup>  
ipsa consors regni & Regina totius vniuersi. Maria rerum omnium effecta  
est Domina, cum Creatoris mater extitit. Expressius etiam sanctus  
Athanasius: Quandoquidem ipse rex est qui natus est de Virgine, idem <sup>Serm. de</sup>  
que Dominus & Deus; eapropter & Mater quæ eum genuit & Regina & <sup>Deipara.</sup>  
Domina proprie & verè censetur.

Secundus titulus desponsationis factæ à Spiritu sancto de qua sic <sup>l. de Excell.</sup>  
S. Anselmus: Ipse Spiritus Dei venit in eam, singularique gratia præ <sup>Virg. c. 4.</sup>  
omnibus Reginam & Imperatricem cæli & terra, & omnium quæ in eis  
sunt, fecit sponsam suam.

Nnnnn ij



Tertius titulus est, Excellentia Gratiarum & donorum Spiritualium. Nam quæ excellunt in vno genere, prima sunt illius generis, & ita dicuntur regnare in cæteris quæ sub illo genere continentur, vt sint eorum regula & mensura, cui quantum se alia conformant, tam perfecta sunt in suo genere. Nemini autem est dubium quin cæteris omnibus Creaturis rationalibus quæ sunt capaces Gratiæ, sanctissima Virgo præcellat. Tanta est Virgo, inquit sanctus Chrysologus, *vt quantus sit Deus satis ignoret ille, qui huius Virginis mentem non stupet, animum non miratur.* Sanctus quoque Bernardus: *Nihil tibi o Domina æquale, nihil comparabile. Omne quod est, aut supra te, aut infra te est. Supra te solus Deus: infra te omne quod Deus non est.*

Serm. 140.

Quartus est, Gloria, seu gloriosa dispensationis Gratiarum quæ talis est in Beata Virgine vt nulla dicatur dari hominibus Gratia quæ per manus Mariæ non transeat. Sic aperte sanctus Bernardus: *Altius, inquit, intuemini quanto deuotionis affectu à nobis eam voluerit honorari qui totius boni plenitudinem posuit in Maria: vt proinde si quid spei in nobis est, si quid gratiæ, si quid salutis ab ea nouerimus redundare, quæ ascendit deliciis affluens. Totis ergo medullis cordium, totis præcordiorum affectibus & votis omnibus Mariam hanc veneremur, quia sic est voluntas eius qui totum nos habere voluit per Mariam.*

In Natiuit.  
B. Virg.

Quintus, Electionis cum quis in particulari aut plures vniuersim consenserunt in electionem eius vt sui ipsorum dominaretur, & se suaque omnia velut Regina regeret; qualis Electio singulari pietate Ludouici decimi tertij Gallorum Regis facta est anno millesimo sexcentesimo trigesimo septimo, in quam vniuersi Gallum libentissime communibus omnium votis consenserunt, tum quot annis hac Die, paribus animis, consensum suum renouant & ratum fixum tenent.

O Gallia dignitatem! o Regni securitatem! o Reginae potentiam!

Verum quid dicimus, & quid facimus, cum illam facimus & dicimus Reginam nostram nisi nos illi perfecte subiciamus? *Reginam sine regno dicimus & facimus, quod certe est intolerandum.*

Sic tamen est, & Ratio tam euidentem id demonstrat vt mirum sit si non intelligamus, aut si intelligentes non aliter eius honori prospiciamus. Tum enim manifeste Regina sine regno est si quod-



cumque dicatur eius regnum non est ei subiectum, quod perinde est ac dicere si nullos habet subiectos quibus imperet, si nullum habet locum ubi regnet. Quid clarius? Esto habeat ius & fiat illi injuria si iure suo non utitur, interim tamen dum illo priuatur, tam verè potest dici sine regno esse, quàm verum est illam non regnare. Regina Vasthi est, regina nomine, nomen vacuum, inanis titulus; mera verba, res nulla. *Facta est quasi vidua Domina gentium.* *Esther 15.* Itane de Virgine sentiendum? Itane de illa Virgine quæ vera est Esther quæ nos morti destinatos liberauit?

II. P V N C T V M.

**S**ED nobis illi non subiectis, regnum hoc non est subiectum Beate Virgini.

Nos enim vel maxime sumus Eius regnum, nos eius proprie ferui & subditi sumus: nobis vt imperaret, Rex Christianissimus se suumque regnum, id est suos, id est, nos omnes dedit, dedit & consecrauit. Tolle à regno homines, quid supersunt nisi ferae animantes, aut insensata creaturæ? Itane verò Virgini hæc sunt oblata, quando illi regnum oblatum est? Si per Diuinas gratias quarum Illa est dispensatrix præcipuè regnat, vbinam effundet gratias, nisi adsint qui soli gratiarum capaces sunt, homines? Nisi adsint humanae voluntates quibus solis ditandis & regendis dona coelitus effunduntur? *Da mihi animas*, inquit Illa, *cetera tibi tolle.* Tu vero è contra dices, Tibi cuncta sunt, præter animas. Hoc si reuera diceret, nonne nos diceret non illi esse subiectos; & nonne diceret, nobis illi non subiectis, regnum hoc illi non esse subditum, cum nos simus eius regnum?

*Noluerunt me regnare super se*, Id est, apud eos omnino non regnare. Sic loquuntur qui secundum Deum loquuntur, nam sublati hominibus super quos regnent, non est ubi regnent. *Sede tacens & intra in tenebras filia Chaldaeorum, quia non vocaberis ultra Domina regnorum*: Tollentur scilicet à te regna, cum tollentur homines quibus dominando regnabas. Quid clarius ad intellectum? Quid acutius ad affectum?



## III. P V N C T V M.

**R**EGINAM igitur sine regno dicimus cum Beatam Virginem dicimus huius precipue regni reginam, nobis non illi subjectis, Qui regnum Eius sumus in quibus omnibus aut regnet necesse est, aut in hoc regno non plene regnet. *Qui creavit me*, ait Illa, *requieuit in tabernaculo meo, & dixit mihi: in Iacob inhabita, & in Israel hereditare, & in Electis meis mitte radices.* In quibus Verbis tria sunt notatu digna; Primum est quod ab ipso Deo quem genuit ius regnandi accepit. Secundum deinde est quod regnum eius est in Iacob, in Israel, id est, in homines. Tertium denique quod his in quibus regnat, Diuinæ signum est electionis; *In electis*, inquit, *meis mitte radices* æternæ scilicet vitæ. Sic Illa paulo post supra dicta: *In me gratia omnis viæ & Veritatis, in me omnis spes vitæ & virtutis. Transite ad me omnes qui concupiscitis me, & à generationibus meis implemini: Spiritus enim meus super mel dulcis, & hereditas mea super mel & fauum.* Id est, nihil graue & molestum in regno meo, cum in id potius regnem ut si quid esset graue, mitigarem. *Transite vero ad me*, emphaticum est & energicum verbum: quasi diceret. Transite à voluptate ad virtutem, à libidine ad Rationem: à natura deprauata ad gratiam: à lege mortis ad legem vitæ: ab ancilla quæ est caro indomita ad Reginam vestram quæ & Mater vestra est, nihil ut in ea timeatis austerum.

Vide quid obset quo minus in te regnet, neque hinc discedas quin vere ei dicas quod est in Scriptura: *Dominare nostri, Tu & Filius tuus.*

Vide & in Festo Annuntiationis, in 2. parte.

E O D E M D I E , A D H Æ C  
S A L O M O N I S V E R B A.

*Pete mater mea: neque enim fas est ut auertam faciem tuam.* 3. Reg. 2.

## V E R I T A S P R A C T I C A.

Quàm Christus in Matrem pius est, concedendo illi omnia: tam sumus impij negando quod postulat.



*Quàm Christus in Matrem pius est concedendo illi omnia, &c. 839*

RATIO EST, Quia idcirco Christus concedit Matri omnia quia Eius filius est; & quia pium est sic filium Matri concedere quicquid petit.

Sed nos etiam sumus Eius filij; & à nobis nonnulla postulat quæ denegare filios Matri tam impium est, quam esset pium illi concedere.

Ergo quàm Christus in Matrem pius est concedendo illi omnia quæ ab Ipso petit: tam sumus Impij negando illi quod postulat. Quod certe est expauendum.

### I. PUNCTVM.

**R**EVOCANDA est in memoriam ex libris Regum historia, qua narratur sedente Salomone rege in throno Dauid Patris sui, venisse ad ipsum Bethsabæ matrem ut loqueretur ei pro Adonia. Et surrexit rex, inquit Scriptura, in occursum eius; adoravitque eam, & sedit super thronum suum: positusque est thronus matri regis quæ sedit ad dexteram eius, dixitque ei: Petitionem unam paruulam ego deprecor à te, ne confundas faciem meam. Et dixit ei rex: Pete mater mea, neque enim fas est ut auertam faciem tuam. 3. Reg. 2.

In quibus Verbis & factis tria designantur quæ aptè conueniunt assumptæ in coelos Virgini Matri. Primum est venisse Filium in occursum eius, & cum eo multa Beatorum ac præsertim Angelorum millia, de quorum ministerio & celeberrimo in coelos introitu, licet tantisper cogitare. Secundum est, positum esse thronum Matri iuxta Filium, Id est, locum separatum, excelsum, sublimem, singularem de quo Ipsa sub nomine Sapientiæ: *Thronus meus in columna nubis*, admirando scilicet modo factus. Admirare. Ecclesi. 24. Tertium denique est sedentem illic Beatam Virginem postulare pro nobis, & paratum Eius Filium tanto foelicius illi concedere omnia quæcumque petit quàm Illa in petendo prudentior est Bethsabæ Matrè Salomonis: & quàm Christus est melior & beneficentior Salomone, de quo & de seipso dixit: *Ecce plus quam Salomon hic.* Matth. 12. ADVOCATAM, inquit S. Bernardus, *premisit peregrinatio nostra quæ tamquam Indicis mater, & mater misericordiæ* Serm. 1. de Assumpt.



840 Die 15. Augusti. In die Assumptionis B. Mariæ Virginis.

*suppliciter & efficaciter salutis nostræ negotia pertractabit. Quia verò Praxim spectamus, & quia nonnulla sunt quæ à nobis simul atque à Filio Beatissima Virgo postulat, quæ tam nefande & impiè illi negamus, quàm pie constanterque Christus illi concedit omnia; idcirco tantæ impietatis ad talem comparatæ pietatem ut nos pudeat & pœniteat, sic proponitur Veritas modò expendenda: Quam Christus in Matrem pius est concedendo illi omnia, tam impij sumus negando illi quod à nobis petit.*

Ratio allata paucis multa complectitur, quæ breviter etiam attingemus, vel quia satis ex se patent, vel quia facile est unicuique quod velit amplius aliunde sibi comparare. Prima itaque propositio tria hæc distincte continet: Primum, Beatam Virginem sic de nobis esse sollicitam apud Filium, ut inter rationes cur in cœlum sit assumpta, hæc afferatur ab Ecclesia, ut sic efficacius res nostras agat. Certe sic orat Sacerdos in sacro Missæ sacrificio: *Munera nostra, Domine, apud Clementiam tuam, Dei genitricis commendet oratio, quam idcirco de præsentī saculo transfulisti, ut pro peccatis nostris apud te fiducialiter intercedat.*

Secundum est, tam propensum esse in Matrem Filium ut quidquid Mater petat, concedat filius, quia illa Mater eius est, quia hic filius eius est. Sic deserte sancti Patres: *Gaudet Filius orante Matre*, inquit Theophilus Alexandrinus, *quia omnia quæ nobis eius precibus donat, ipsi matri se donare putat, & accepta ab illa sine Patre, humanitatis vices reddere.* Sic Arnoldus Carnotensis, Abbas bonæ vallis, sancti Bernardi Discipulus, tractatu de laudibus Virginis matris: *Habet homo, inquit, Mediatorem causæ suæ filium ante Patrem: & ante filium, matrem. Christus nudato latere, Patri ostendit latus & vulnera: Maria Christo pectus & ubera. Nec potest ullo modo esse repulsa, ubi concurrunt & orant omni lingua disertius, hac clementia monumenta, & Charitatis insignia.* Sanctus quoque Anselmus post multa de hoc argumento, sic concludit: *Dum igitur à quovis, suo nomine inuocatus Dominus non statim exaudit, profecto id iuste facit. Inuocato autem nomine Matris, etsi merita inuocantis non merentur ut exaudiatur: merita tamen Matris intercedunt ut exaudiatur.*

Tertium denique, sic constanter Filium Matri esse beneuolum ac indulgentem, quia sic pium est Matri deferre filios. Certe hanc pietatem filiorum in parentes non modo sacræ leges & profanæ

Pro Epistolâ  
Temporē  
S. Hieron.  
in Bibl.  
Pat.

de Excell.  
Virg. c. 6.



*Quam Christus in Matrem pius est concedendo illi omnia, &c. 841*

profanae praecipunt, sed & ipsa profitetur natura non tantum in hominibus à vera religione alienis, sed in feris ipsis animantibus quarum mira sunt exempla naturalis huius pietatis. At nullum tale est exemplum in hoc genere tam potens & suaue quam Christi Domini propter rationes infra dicendas. O quantus honor Matri sic in omnibus audiri à Filio! Quanta hinc hominum foelicitas talem in coelis habere Matrem quae nec ipsos recusat dum postulatur; nec recusetur à Filio dum pro ipsis postulat!

## II. PUNCTVM.

**S**ED nos etiam sumus Eius filij: & à nobis nonnulla postulat quae illi denegamus: & quae negare filios matri tam impium est, quam piium Christo est illi concedere.

Tria hic etiam separatim expendenda. Primum est, nos esse filios Beatissimae Virginis Matris, quae Mater nostra triplici quadam ratione dici potest. Primo per adoptionis gratiam qua fratres Christi sumus, & sicut Ille, sic sumus Filij Dei & Filij Virginis, *Ecce mater tua: PROPTER quam causam non confunditur fratres eos* Ioan. 19. *vocare dicens, Nunciabo nomen tuum fratribus meis: inquit Aposto-* Hebr. 2. Pf. 21. *lus.*

Secundo per Moralem & Spiritualem quandam parturitionem, cum iuxta Crucem pendentis & morientis Filij posita, consensit in eius mortem, qua redimerentur homines ab aeterna morte & vitam viuerent Spiritualem ac aeternam. Sicut enim Deo Patri debemus hanc Spiritalem & aeternam vitam, atque hoc etiam nomine Pater noster est, quia nobis dedit Filium suum qui moriendo vitam illam mereretur nobis aliquando conferendam: Sic suo modo eandem debemus Virgini Matri vitam, & eo nomine mater nostra est, quia eundem nobis dedit Filium pro materno iure quod in Illum habebat, & in eundem finem quo Pater dedit; neque enim Christus minus erat filius Matris suae quam sui Patris: nec minus quodam sensu Mater poterat suum filium dare in redemptionem nostram, quam dedit Pater, vnde sanctus Bonaventura non dubitauit de illa dicere quod Christus de suo dixit Patre: *Sic Maria dilexit mundum ut filium suum unigenitum daret: & addit,* Ioan. 3. *nullo modo dubitandum est, quin virilis Mariae animus voluit tradere filium suum pro salute generis humani, ut mater per omnia conformis es-*



set Patri & Filio. Sic Arnoldus qui supra, Carnotensis: *Omnino tunc erat una Christi & Mariæ voluntas, vnumque holocaustum ambo pariter offerebant Deo, hæc in sanguine cordis, hic in sanguine carnis: unde communem in mundi salute cum illo effectum obtinuit*: Sic denique sanctus Ioannes Damascenus: *Quos in partu dolores effugerat, passionis tempore sustinuit: nempe ut quos dolores effugerat Christum pariens, sustineret reparturiens*. Vide Diuum Bernardum sermone tertio In Purificatione Beatæ Virginis, vbi de duplici sacrificio vespertino, & matutino.

l. 4. de Fide  
Orthod.  
c. 15.

Apoc. 20.

Tertio, cum toties post perpetratum peccatum indigni vitæ & gratiæ prorsus essemus, nihilque aliud iam nos maneret quàm mors illa secunda quæ Infernus & damnatio dicitur: Illa tum Virgo Sanctissima nostri miserta, fatalem illam mortem auertit: Illa peccati veniam exorauit: Illa Gratiæ obtinuit & qua è peccato resurgeremus, & qua rursus viueremus vitæ filiorum Dei, atque ad illam vnde excideramus æternam beatitudinem reuocaremur; Nonne vel hoc nomine tam vere mater nostra est, quam verè mater est misericordiæ quæ nos ad perditam licuit redire vitam? Agnosce & venerare.

In 7. Mart.

SECUNDVM in hac secunda Propositione contentum, hoc est, Sanctissimam illam Matrem nostram à nobis nonnulla petere quæ illi denegamus. Quod quidem mirum & auditu nouum videri potest, sed tamen ita verum est & perspicuum, vt non sit verius dicere quod ait sanctus Hilarius, *De nostro est beata illa æternitas promerenda*: quàm verum est affirmare nonnulla Matrem nostram à nobis petere, quo ipso tempore illam rogamus, vel vniuersim pro salute nostra, vel particulatim pro singulari quadam gratia. Nam illud quod à nobis necessario est conferendum, vel ad salutem vniuersam, vel ad illud particulare donum quod petimus: illud est, inquam quod à nobis æque Mater postulat, ac postulamus ab Ea quidquid nobis esse opus arbitramur. Quod vt facilius etiam intelligatur, aduerte, vix quidquam in Praxim venire virtutis aut boni operis exercendi, in quo non sit aliquid facilius, & aliquid simul difficilius. Ac quidem ad illud facilius exequendum sufficit communis & ordinaria gratia quæ nulli deesse dicitur: Ad aliud vero difficilius, maiori opus est subsidio, Diuinaque nobis gratia vehementius exoranda. Tum vero propterea conuertimur, aduolamus & aduoluimur ad thronum beneficentissimæ nostræ



Matris; oret illa Filium, exoret illa maiorem gratiam, potentius illa impetret sine quo nihil à nobis fiet, subsidium. Bene habet, non deerit, non te repellet oratura pro te Filium, nec à Christo filio repelletur, vt diximus. Verùm, neque tu Illi nec tibi desis. Est ordo quidam in gratiis & in operibus exercendis: fac prius quod est factu facilius cum illa gratia quæ te nondum deseruit, tum sic disponeris ad maiorem quam petis gratiam & ad aliud difficilius exequendum. Atque hoc est quod te rogat simul ac illam rogas. Sicut in illis nuptiis quæ factæ sunt in Cana Galilææ, quando petiuit à filio vinum, petiuit simul à Conuiuiis aquam: petiuit vt darent quod habebant quia sic ordinatum erat à Filio vt non id aliter daret quo egebant. Sic plane quando tibi peccatorum veniam, vel insignem Castitatem, vel feruentem orationem vel quid aliud difficilius ab Eodem suo filio petit, petit à te simul eodemque prorsus tempore, vt quod tuum est non omittas: vt quod est facilius in illa materia de qua tum agitur, non negligas. *Da quod habes si vis quod non habes.* Hæc Veritas fuscè probata est in prima parte.

*Ioan. 2.*

*Dom. 2. post Epiph.*

Nec dicas, te non Illam audire petentem sicut Illa te audit: nam hoc ipso quo non ignoras vnum pendere ab alio, nec aliter consequens dari nisi prius antecedenti dato, tum te oportet scire & intelligere, sic illud à te peti quod est necessarium ad aliud, sicut tu hoc aliud consequens petis. Ipsa est rerum natura & exigentia quæ hoc petit & quam non ignoras. Si petis messem ad Agricola, petit à te sementem, etiamsi nihil dicat, quia non est messis sine semente. Si petis à Sacerdote peccati absolutionem, petit ille à te peccati Confessionem, quia non est ordinaria peccati absolutio sine peccati confessione. Sic, si petis à Beata Virgine talem Castitatem vt vel nullo impuro mouearis motu, vel nulla inficiaris cogitandi macula, petit à te vt contineas linguam, oculos & congressus si quos liberiores facis; quia sic res ipsa exigit vt animi cogitatio non sit munda, nisi mundi sint oculi.

*Nunc ergo filij audite me, audite disciplinam & nolite abjicere eam.* *Prov. 2.*

Hoc est in quo deficiamus, hoc est quod illi negamus, hæc sola causa est cur quæ rogamus non impetremus. Nam cum vt dictum est, neque bonitas illi desit vt nos audiat, nec potestas vt audiat à filio; Quid potest superesse ad effectum, quid potest interesse ad orationis tuæ defectum, nisi quod tu tibi desis, nisi quod



Prou. 1.

tu illi neges aquam vt vinum impetret? An accusabis eius bonitatem quod nolit benefacere cum id possit? An de illius potestate detrahes quasi non posset quod vellet? Neutrum potes sine blasphemia, vnde hoc solum superest vt illi neges quod petit: & quod vetat Sapiens, *dimittas legem matris tue*, quam si obserua- res, *redderetur gratia capiti tuo*, & *torques collo tuo*, vt Idem ait.

Ecclesi. 7.

I A M verò quod tertium est, quàm sit id impium, sic te filium matri tuæ denegare quod illa petit, tu ipse attentius considera, perpendendo qualis illa sit Mater, quali iure quod petit, exigat: quali quantoque vinculo tenearis ad eius obsequium, quàm gra- uiter ferre possit non modo se à te recusari, sed non posse tibi prodesse, quod nolis leue nescio quid concedere, sine quo neque Illa nec Filius salutem tuam promouere possint. Sic videt eua- nescere preces tuas, sic deuotionem perire, sic periclitari salu- tem, sic ipsas gratias inanes reddi, sic se ipsam tibi velut inuti- lem & otiosam fieri, cum sine te nihil in te operetur. Nonne hoc ingratum, nonne hoc impium? *Gemitus matris tue ne obliniscaris.*

## III. P V N C T V M.

Ps. 93.

**Q**UAM Christus igitur in Matrem pius est concedendo illi om- nia, tam sumus impij, negando illi quod à nobis petit: Cum non alio nomine concedat ei Christus quàm quia postulat mater, quàm quia filius eius est; Et nos eodem gloriemur nomine, nos Eius filij simus, nostra sit illa mater cui triplicem debemus vitam, spiritualem, æternam & ipsam naturalem, quæ post peccatum to- ties perire debuerat quoties peccatum est, nisi manum illa pe- rimentis Iustitiæ tenuisset, & reuiuiscendi gratiam impetrasset. *Paulo minus habitasset in Inferno anima mea.*

Ps. 134.

Non ita certe Christus obstringebatur Matri suæ à qua vnâ naturalem & semel tantum vitam acceperat: atque ita etiam ac- ceperat vt quidquid Filio dedit mater, prius mater à Filio rece- perit. Adde quod cum Illa Filium rogat in nostri gratiam, quam- tumcumque is qui rogatur sit Eius filius; Eius tamen simul & no- ster est Dominus, qui pro suo summo Dominio posset si vellet & illi & nobis recusare postulata, postquam præcipue tot modis à nobis offensus est, vt Diuinæ Iustitiæ vis quædam inferri videatur, quando sic fulgura in pluuiam desinunt, & pœna peccatorum



in veniam defleuntur. At vero Illa est ita mater nostra vt sit etiam Domina, sit Regina, sit summa post suum filium potestatis in nos omnes, quæ de nobis posset statuere, ordinare, imperare pro sua libera voluntate, quale illud cumque esset quod iuberet. Et tamen, ô quid mirer magis, an eius bonitatem an nostram ingratitudinem! Nihil à nobis exigit nisi rogando, nisi amanter postulando; nec quidquam postulat nisi quod bono nostro cedat, nisi quod multis nominibus debeamus, licet id non postularèt. Et nos eò vsque ingrati sumus & impij, vt vix aliquando quidquam concedamus, vix eius postulatis tantillum deferamus! *Filius noster iste proteruus & contumax est, monita nostra* *Deut. 21.*  
*audire contemnit!*

Expende rem accuratius, reuolue hæc animo tuo Verba, *Recusare tanta Matri quod tam iuste petit!* Nonne ipso verborum sono sentis quàm id sit plane ingratum, injustum, impium, imo & inconsultum ac vesanum, cum tu alioquin frustra illam roges nisi ab illa rogatus tam libenter rogantem exaudias quàm cupide velis exaudiri? Dic sodes, quid intendis, quid rogas, quorsum illam precaris, si quod tibi offert negas, negando conditionem qua tibi offert? Nonne hoc est vel præsumere se posse aliter quàm coelitus sit constitutum, obtinere: aut desperare salutem? Nonne hoc est hypocritam agere, cum te dissimules velle & petere quod reuera non vis? Nonne hoc denique præuaricari est, cum vna manu destruas quod altera ædificas, & te illi opponas quam rogas vt se opponat tuo Iudici? Hoc vno magis offenditur quàm in cæteris honoretur, quia illud vnum maxime curat vt quod tuum est diligenter agas; Quod si negaueris, scito id illi esse grauius, quàm tibi foret, si tibi negaretur quod petis ad salutem, nam illa te magis saluum desiderat quam tu ipse velis.

O pete Mater, neque enim fas est vt auertam faciem tuam.

E O D E M D I E : A D H Æ C  
C A N T I C O R V M V E R B A.

*Fulcite me floribus: stipate me malis: quia amore  
languéo. Cant. 2.*



846 Die 15. Augusti. In die Assumptionis B. Mariae Virginis.

## VERITAS PRACTICA.

Quò te minùs sentis amare Christum, hoc ipso magis amore mori poteris.

RATIO EST, Quia quò te minus sentis amare Christum, hoc ipso magis dolere poteris.

Sed tunc magis amore mori poteris, cum reuera magis dolebis quòd minus Christum ames.

Quò te ergo minus sentis amare Christum, hoc ipso magis amore mori poteris.

QVOMODO Beatissima Virgo Deipara sit ex Amore Filij mortua, fuisse habes apud Dominum de Sales Episcopum Gebennensem in tractatu de amore Dei, libro septimo, & libro sexto antecedenti ubi quaecumque ad hanc materiam, atque ad proposita Veritatis elucidationem spectare possint, reperies. Tu tantum ad Praxim reuoca.



Die 20.  
Augusti.

## IN FESTO S. BERNARDI

A B B A T I S.

*Homo sanctus manet in Sapientia, sicut Sol.*  
Ecclesi. 27.

## VERITAS PRACTICA.

Vera Deuotio inter varietates locorum & temporum,  
inuariabilis.




*Vera Deuotio inter Varietates locorum & temporum, &c. 847.*

*RATIO EST, Quia Vera Deuotio est prompta & vera voluntas seruiendi Deo.*

*Sed talis voluntas inter Varietates locorum & temporum est inuariabilis.*

*Ergo & Vera Deuotio, sicut videre est in sancto Bernardo, qui propterea Deoti nomen obtinuit.*

## I. P V N C T V M.

 *UOD in libro Esther legitur, Paruus fons creuit in fluium* *Eph. 10, & 11.*  
*& in lucem solemque conuersus est, apte applicari potest sancto Bernardo qui è loco Fontanis dicto in Burgundia: lux magna Gallix & Sol totius Christiani orbis exitit. Hic enim non modo splendore virtutum & miraculorum toti luxit Ecclesix, sed velut Sol vnïuersa lustrans sic vnus à Deo destinatus erat ad eius componenda negotia, vt vix vlla esset contentio inter Principes, Reges & Dynastas, cuius non esset arbiter; vix vllum apud sacros Præfules & Summos ipsos Pontifices opus promouendum cui non præficeretur; vix vllum denique in Ecclesia Concilium contra Schismaticos & in Imperio bellum contra Infideles quod non imprimis vocaretur, & cuius nutu pene omnia gererentur.*

*Sed quod ad solis similitudinem magis accedit, sicut Sol inter varias anni tempestates aut diuersos noctium dierumque recursus, vnus semper Idemque inuariatus manet, sic plane Deuotus sanctus Bernardus inter tot varietates locorum & temporum, inter tot diuersas & molestas negotiorum moles vnus idemque semper sui similis fuit, vt vere Homo ille sanctus sit de quo Sapiens: Qui manet in Sapientia & in deuotione sicut Sol.*

*Vis audire quantis externis agigaretur motibus aut diuersis etiam videretur indui formis? Clamat, inquit, ad suos Clareualenses, clamat ad vos mea monstruosa vita, mea arummosa conscientia. Ego enim quadam Chimera mei saculi; nec Clericum gero, nec Laicum. Nam Monachi iam dudum exui conuersionem, non habitum. Nolo scribere de me, quod vos per alios audisse existimo, quid actitem, quid studeam, per quæ discrimina verfer in mundo, imo per quæ iactet præcipitia.* *Ep. 249. 1.*



Gen. 1.  
Ser. 43.

At vero audi ex eodem ipso dum in illa sponsæ Verba ex Cantico Canticorum scribit, *Fasciculus myrrhæ Dilectus meus mihi, inter vbera commorabitur*, Audi & mirare qualis intus in animo permaneret, quàm constans, quàm inuariatus, & vnus Idemque in Italia atque in Gallia; vnus inter Principes atque plebeios: vnus inter sæculares atque Religiosos: vnus denique atque idem in prosperis, & in aduersis. *Et ego*, inquit, *fratres*, *ab ineunte mea conuersione pro aceruo meritorum quæ mihi deesse sciebam, hunc mihi fasciculum colligare, & inter vbera mea collocare curavi, collectum ex omnibus anxietatibus & amaritudinibus Domini mei*; Et post multa de illis amaritudinibus patientis Christi, *Hæc me*, inquit, *erigunt in aduersis, in prosperis reprimunt, & inter leta tristiaque vite presentis, via regia incedenti, tutum præbent utrobique ducatum, hinc inde mala imminetia propulsando.*

Videri possunt quæ fufius ibi prosequitur, atque ex eius dictis confirmari Veritas debet, cuius exemplo formatur; *Quod scilicet vera Deuotio inter varietates locorum & temporum sit inuariabilis.*

2. 2. q. 82.  
a. 1.

Ratio autem petitur ab ipsa Deuotionis natura, quæ vt ait sanctus Thomas, nihil aliud videtur esse quàm *voluntas quadam prompta tradendi se ad ea quæ pertinent ad Dei famulatum*. Ipsa sunt eius Verba quæ & variis Scripturæ locis & sanctorum Patrum dictis facillime possent illustrari, ac contra falsas quasdam deuotionis Ideas quas sibi quisque format, produci. Videntur porro cuncta his paucis comprehensa Verbis: *Det vobis cor omnibus vt colatis eum & faciatis eius voluntatem, corde magno, & animo volenti.* Expende Verba.

3. Macch. 1.

## II. P V N C T V M.

**S**ED talis voluntas inter varietates locorum & temporum est inuariabilis, Id est, semper & vbique cum Gratia potest esse prompta & parata se tradere ad ea omnia quæ ad Dei famulatum spectant.

Cum enim gratior & acceptior Dei famulatus sit Voluntatem Dei facere, cumque inter varietates locorum & temporum semper spectari & fieri possit Diuina voluntas; quid est quod nostra voluntas si cum Gratia velit, non possit illam Diuinam facere tam promptè & constanter in vno loco & tempore, sicut in alio?

Dices



Dices forsan, difficultates & implicatas occupationes interuenire & obstare quò minùs semper æquali facie & animo acceptentur & gerantur: nec proinde ex æquo, Diuina voluntas fiat neque Deo seruiatur. Responſio est facilis, id quidem posse dici quoad sensum & primos animi motus, qui vel in potestate nostra non sunt, vel si subsint rationis imperio, possunt à voluntate dirigi & sic inflecti vt quidquid sensus & pars inferior sentiat, Ratio tamen & pars illa superior qua verè Deo seruitur & eius voluntas efficitur, sit semper eadem, semperque conformis Diuinæ prouidentia & voluntati, quæ sic de rebus & euentis disponit.

Sic Dauid in tam variis quas gerebat rerum vicibus & figuris: *Paratum cor meum Deus, paratum cor meum. SEMPER laus eius in Ps. 56. ore meo.* Quin quod Romanus Philosophus de suo id Sapiente prædicat: *Sapiens, inquit, malis non premitur sed utitur. Nouit in aduersis æque ac in secundis suam explicare virtutem. Non ex ebore tantum Phidias sciebat facere simulachra: faciebat ex ære. Si marmor illi, si viliorẽ materiam quis obtulisset, fecisset quale ex illa fieri optimum posset. Sic Sapiens: si licebit, virtutem in diuitiis explicabit: sin minus, in paupertate. Si poterit, in patria; sin minus, in exilio. Si poterit, Imperator; sin minus, miles. Si poterit, integer; sin minus, debilis.* Et Christianus hoc non posset Diuina fauente Gratia? Confundere, si quid tale cogitasti.

### III. P V N C T V M.

**V**ERA ergo deuotio inter Varietates locorum & temporum est inuariabilis, aut non est vera: Nam in hoc sita est vera Deuotio vt quantum cum Diuina Gratia fieri poterit, semper sit prompta & parata nostra voluntas ad Diuinam efficiendam. Sic autem semper prompta & parata esse potest in quacumque varietate locorum & temporum, cum ista varietas sit à Diuina voluntate quæ nos circumquaque dispergit sicut ventus nubes; Vnde est illud egregium Iobi trigésimo septimo: *Frumentum desiderat nubes, & Iob. 37. nubes spargunt lumen suum: quæ lustrant per circuitum quocumque eas voluntas gubernantis duxerit ad omne quod præceperit illis super faciem orbis terrarum.* Sic de Apostolis & Apostolicis viris dicitur; *Qui sunt isti qui vt nubes volant?* At sic volando per vniuersum orbem & per tot varia suorum ministeria munerum, nonne pietatem



2<sup>a</sup> Cor. 4.

colere aut Deuotionem conseruare poterant; voluntatem suam ita obfirmando inter illas varietates vt in vno Deo, vna eademque persisteret? *In omnibus tribulationem patimur*, inquit Vnus pro omnibus, *sed non angustiamur: aporiamur sed non destituimur, semper mortificationem IESV in corpore nostro circumferentes*. Et post multa: *Propter quod non desicimus: sed licet is qui foris est, noster homo corrumpatur, tamen is qui intus est renouatur de die in diem*. Sicque nos Idem omnes efformabat, vt exhiberemus nosmetipsos sicut Dei ministros, in multa patientia, in necessitatibus, in angustiis, per arma Iustitie, à dextris & à sinistris: & quæ ibi plura prosequitur.

Ibid. 6.

Serm. 43.

Sic sanctus etiam Bernardus exemplo sui nos prouocat ad habendam memoriam patientis Christi & conseruandum vbique pietatis affectum. *Hunc & vos, dulcissimi, tam dilectum fasciculum colligite vobis, hunc medullis inserite cordis, hoc munite aditum pectoris, vt & vobis inter vbera commoretur*. Habete illum semper non retro in humeris, sed ante præ oculis, ne portantes & non odorantes, & onus premat & odor non erigat. Momentote quia accepit eum Simeon in vlnas suas, Maria gestauit in utero, fuit in gremio, sponsa sibi inter vbera collocavit. Et post pauca: *Exemplo ergo sint vobis vt & vos similiter faciatis*. Si enim ante oculos habueritis quem portatis, pro certo videntes angustias Domini, lenius vestras portabitis, ipso auxiliante Ecclesia sponso qui est super omnia Deus benedictus in sæcula.

2<sup>a</sup> Cor. 15.

DEO gratias qui dedit nobis victoriam per D. N. IESVM CHRISTVM. Itaque fratres mei dilecti, stabiles estote & immobiles abundantes in opere Domini semper.

Vide in 2. parte, Fer. 5. Sexagesimæ. Et Fer. 3. Octau. Ascensionis, Vbi hæc habetur Veritas:

Sic internis externa sunt temperanda, vt neutrum eorum importunè, & vtrumque opportunè sibi cedat.



Mortificatione potius tibi sunt omnia subtrahenda, &c. 851



# IN FESTOS BARTHOLOMÆI Die 28<sup>a</sup> Augusti

## A P O S T O L I.

*Detracta pelle hostiæ, artus in frusta concident.*  
Leuit. 1.

### VERITAS PRACTICA.

Mortificatione potius tibi sunt omnia subtrahenda,  
quàm quid mortificationi detrahendum.

*RATIO EST, Quia mortificatione potius tibi sunt omnia  
subtrahenda, quàm tibi vera desit & Christiana mortificatio.*

*Sed si quid quouis modo mortificationi detraberetur, tibi vera  
& Christiana deesset mortificatio.*

*Ergo mortificatione potius tibi sunt omnia subtrahenda, quàm quid  
mortificationi detrahendum. Quod tamen rarum est, & exem-  
plo huius sancti Apostoli excitandum.*

### I. P V N C T V M.

**H**OC habuit sanctus Bartholomæus Apostolus in suo Mar-  
tyrio eximium & singulare, vt sicut antiquitus hostia iu-  
beatur offerri, detracta pelle, & in partes concisa, sic  
ille inaudito supplicio post innumeros iam exanthlatos labores in  
citeriori India & in majori Armenia pro Christo, passus est sibi vi-  
uo pellem detrahi & caput abscindi, sicque se velut viuentem ho-  
stiam Deo immolari. O quale hominis pectus, quale animi ro-  
bur, & amoris Diuini fortitudo! Nam si Iosephi fidelitas in Do-  
minum suum, si Ionathæ amor in Dauidem commendantur, quod Geni. 39.  
1. Reg. 12.

Ppppp ij



ille pallium, hic tunicam deferuerint; quanto majori dignus commendatione & praconio sanctus hic Apostolus qui pellem qui sanguinem, qui caput, qui vitam & omnia sua Domino tam horrendis modis consecrauit?

O quantum poterat & valebat in Beatis illis viris amor Christi, pro quo talia tam libenter paterentur! O quantum illa tanta quae pro Christi amore passi sunt, deberent animos nostros commouere ad hunc Christi amorem in nobis excitandum, & aliquam animi nostri testificationem exhibendam? Propterea hic Veritas proponitur expendenda, quae quantum fieri potest cum Gratia nos ad exemplum huius sancti Apostoli conformes omnino faciat, persuasum illud habendo, *Quod mortificatione potius nobis sunt omnia subtrahenda, quam quid mortificationi detrahendum.* Quod ne in primo aditu nimis nouum & arduum videatur, hoc ipsum est quod commendabat Ille Romanis qui ait: *Obsecro itaque vos fratres, per misericordiam Dei, ut exhibeatis corpora vestra hostiam uiuentem, sanctam, Deo placentem, rationabile obsequium vestrum.*

Rom. 12.

Ratio verò quae affertur, valde est consideranda, quòd quae spectant ad hanc materiam de vera mortificatione minus forte nota, dilucidet, & in quotidianam Praxim adducat. Cum enim prima propositione dicitur Mortificatione potius tibi omnia subtrahenda quam tibi desit vera & Christiana mortificatio, manifestè indicatur falsam quandam esse & non Christianam mortificationem, ac proinde quamnam sit vera, quamnam falsa, necessario declarandum. Sic autem est, non omnes qui se cruciant aut mortificant, verà se mortificatione exercent.

3. Reg. 18.

l. 6. de Institut. c. 7.

l. 2. de Morib. Manich. c. 13.

Tertullianus anno 200.

Quantum se cruciarent Prophetae Baal, refert sacra Regum historia. Quantis se Athletae diuexarent modis, ut in stadio palmam possent consequi, scribit fuisse Cassianus in Institutis. Quanti laboris esset patiens perduellis ille Catilina, quamque Apostolis nostris pene similis in laborando, narrat sanctus Augustinus in libris de Moribus Manichaeorum. Quam multi fuerint haeretici qui Catholicos arguebant quasi Psychicos & animales quod non ita ieiunarent ac ipsi, satis compertum est in Ecclesiasticis authoribus. Quam multi etiam nunc in mundo laborant diuitiis conquirendis, & rebus augendis domesticis! Itane vero propterea quis sanus dicat veram illos habere mortificationem? Cur porro? Quia haec est sola vera mortificatio quae nos totos Deo subicit propter ipsum



Deum. Quantumcumque illi se diuexarent non se totos sed ex parte tantum; non propter Deum sed ex naturali cupiditate aut alio prauo motiuo se continebant. At verò qui verè, qui ex animo, qui ex virtute sese mortificat, sese totum Deo subjiciat necesse est, aut virtus non est: *Habentes speciem quidem pietatis, virtutem autem eius abnegantes.* 2. Tim. 3.

Dicitur autem hæc mortificatio Christiana, quia Christus eam docuit Verbo & exemplo: quia Christiani eam profitentur, iam inde à Baptismo vbi omnibus morimur, vt Christo soli viuamus; quia sic complantati facti similitudini mortis Christi, sic & eius resurrectionis sumus: Quia sic vetus homo noster exuitur, crucifigitur, & moritur, vt nouus induatur & viuat in nobis: Quæ omnia quam sint Christiani officij nullus ignorat. Ac proinde postquam Apostolus monuit vt exhiberemus corpora nostra tamquam viuentem hostiam, addit proxime: sanctam, Deo placentem, Quasi diceret, Deo sacratam & placitam, neque ob alium finem excogitatam. Quod & confirmat expressius, statim addens: *Et nolite conformari huic seculo, sed reformamini in nouitate sensus vestri, vt probetis quæ sit voluntas Dei bona, & beneplacens & perfecta.* Rom. 6. Ibid. 12.

Ex quibus ipsa etiam prima Propositio satis aperte patet, quod satius esset tibi perire omnia & mortificatione subtrahi, quàm tibi veram deesse & Christianam mortificationem. Cum enim sola hæc sit vera mortificatio, si tibi hæc deesset, tibi omnis deesset, & plane immortificatus habereris; nam quantumcumque aliis te torqueres & vexares, tanto esses miserior, quantò plura inconsulto, non verè, non Christianè patereris. *Tanta passi sine causa!* Gal. 3.

Addè quòd sine vera mortificatione, nulla est Christiana virtus, nulla religio, nulla Christi seruitus, nullum Dei obsequium: Vellesne te illò redigi? Nonne malles tibi potius perire omnia quam Christianam virtutem & religionem? Nonne cum Apostolo tam sæpe dicis: *Quis nos separabit à Chritate Christi? Tribulatio? An angustia? An fames? An nuditas? An periculum? An persecutio? An gladius, sicut scriptum est, quia propter te mortificamur tota die, aestimati sumus sicut oves occisionis. Sed in his omnibus superamus propter eum qui dilexit nos.* Itane sentis ex animo? Rem. 8.



## II. P V N C T V M.

**S**ED si quid quouis modo mortificationi detraheretur, tibi hac vera & Christiana deesset mortificatio.

Quâ nempe parte detraheretur, non esses subjectus Deo: quantumcumque autem sit illa pars tui modica & exigua, qua non sis subjectus Deo, veram & Christianam à te aufert mortificationem quâ in eo vera & Christiana est, vt audiuiſti, quod totum hominem, totum inquam, nullâ prorsus exclusa parte subicit Deo; nam illum Deo subicit tamquam mortuum, tamquam hostiam, tamquam holocaustum, quâ sane Symbola nullam hominis partem excludunt. *Hac custodias sine praeiudicio, nihil faciens in alteram partem declinando.*

2. Tim. 5.

Is. 61.

Act. 5.

Non enim ita spectatur, sicut alibi est demonstratum fuisse, quid mortificando dones quàm quid non dones, quàm quid reserves, si quid restet ad totum donandum, quod totum tam religiose quaeritur, vt si desit ex aliqua parte, totum desit quod dandum erat, & nihil est datum. Nam hoc vnum in hoc dono spectabatur vt in eo totum daretur: *Quia ego Dominus diligens iudicium, & odio habens rapinam in holocausto.* Quantumcumque minuta sint & pauca quæ dantur, si nihil superest, sat magnum & diues est donum, quia totum est quod Deus quaerit: sed hoc etiam ita quaerit, vt quantumcumque magna & numero & pondere dederis, si totum non dedisti, nihil dedisti. *Anania, nonne manens tibi manebat, & venundatum in tua erat potestate?* Quæ sunt intelligenda de his ad quæ vel voto vel ex aliqua virtute obligamur, si quæ pars desit, peccatur; & quantum peccato Deus offenditur, tantum offendi dicendus est illo partis defectu quæ debebatur, vel ex voto vel ex alia quauis virtute.

Mat. 9.

Atque hoc ipsum est quod accidit quando quid mortificationi necessariae ad virtutem detrahitur: hoc ipso enim quo quid deest mortificationi, virtus deest: & defectu virtutis, vitium est, peccatum est, Dei offensa est; ac tum aperte patet quàm longe absit vera & Christiana mortificatio, quæ peccatum omne profcindit. *Incircumcisi sunt corde.*

Accedit quod licet abesset culpa, quando tamen mortificationi pars aliqua detrahitur, vix aut ne vix adest vera mortificatio;



quia pars illa quæ detrahitur, sæpe est gratior Deo, sæpe minus fuisset detrahenda, sæpe magis eras ex illa mortificandus parte. At vera mortificatio quod Deo magis placet, magis spectat & præfert cæteris, aut non est vera. *Et hoc oro*, inquit Apostolus, *ut Charitas vestra magis ac magis abundet in scientia, & in omni sensu ut probetis potiora.* Phil. 1.

Denique vel propter Deum te in cæteris mortificas partibus, præterquam ista, quæ mortificationi detrahitur; vel non propter Deum. Si propter Deum, ais, cur non æquè hanc illi sacrificas partem quam ex æquo vellet cum aliis? Aut si non propter Deum, quod verius est, nonne tùm euidenter deest vera & Christiana mortificatio quæ solum Deum spectat? *In omni bonitate, & iustitia, & Veritate: probantes quid sit beneplacitum Deo.* Ephes. 5.

### III. P V N C T V M.

**M**ORTIFICATIONE igitur tibi sunt omnia potius subtrahenda quàm quid mortificationi detrahendum: Quia deesset alioquin vera & Christiana mortificatio, quæ totum ita subicit hominem Deo, ut nisi sit illi totus subjectus, non sit vera mortificatio, neque ex consequenti vera vlla virtus aut vera vlla religio, quibus bonis conseruandis si necesse est omnia mortificatione subtrahi, nonne in hanc mortificationem potius consentiendum est quàm in talem bonorum iacturam, quæ vitâ ipsâ longē debent esse cariora? *Ergo*, inquit Apostolus, *debitores sumus non carni, ut secundum carnem viuamus. Si enim secundum carnem vixeritis, moriemini: si autem Spiritu facta carnis mortificaueritis, viuetis.* Rom. 8.  
Hæc est videlicet tam vera Christiani vita, quam vera est animæ vita, Deus: Neque enim aliter vere & perfecte viuit in anima seu in homine Deus, nisi sit illi homo ex omni parte subjectus; sicut anima non viueret in toto corpore, si quæ pars esset corporis vitæ capax, quam non animaret.

Quàm autem verè Deus sit animæ nostræ vita, rectè & aptè sanctus Augustinus. Dicebat Epicurus, *mibi frui carne, bonum est.* de verbis Apostoli.  
Dicebat Stoicus, *mibi frui mea mente, bonum est.* Dicebat Apostolus, *mibi autem adherere Deo, bonum est.* Errat Epicurus, fallitur Stoicus. Tunc enim rectè anima viuit, si non secundum carnem, non secundum seipsam, sed secundam Deum viuit. Sicut enim anima carnis, ita Deus anime est vita.



Velleſne non in te toto viuere animam tuam? Et voles Deum tuum non in te toto viuere! Hoc eſt amare animam ſuam pluſquam Deum, hoc eſt fouere animale ſuam vitam pluſquam Diuinam; hoc eſt indignum eſſe Chriſtiano nomine, & ipſo Chriſto Domino dicenti tam aperte: *Qui non accipit crucem ſuam, & ſequitur me, non eſt me dignus.* Vide in ſingulis partibus, verbo *Mortificatio, Crux.* Præſertim vero in 1. parte, in Comuni de ſanctis Martyribus. In 2. vbi de Paſſione Domini, tota ferè Quadrageſima. In 3. Feria 5. Hebdom. 2. Vbi hæc proponitur Veritas:

Satius eſſet nullo die velle viuere, quam non omni die, velle cum Chriſto mori.



Die 25.  
Augusti.

## IN FESTO S. LVDOVICI R E G I S.

*Certamen forte dedit illi vt vinceret.* Sap. 10.

### VERITAS PRACTICA.

Ille inter potentes potentiffimus, qui contra magnam peccandi potentiam, certat & vincit.

*RATIO EST, Quia ille inter potentes potentiffimus, qui cum plurimis, acerrimis & infeſtiſſimis hoſtibus certat & vincit.*

*Sed in magna peccandi potentia ſunt illi hoſtes acerrimi.*

*Ergo qui contra talem potentiam certat & vincit, ille eſt inter potentes potentiffimus, qualis fuit ſanctus Ludonicus Rex Gallorum.*

I. PVNCTVM.



I. P V N C T V M.

**V**IX dum è pueris excefferat sanctus Ludouicus, cum illi pugnandum fuit in suo regno, cum perduellibus & factiosis. Vix dum etiam pacem regno attulerat, cum illi foris hostes & bella suscepta sunt, quæ vix vmquam cessarunt. At vero longe acrius illi certandum fuit cum seipso, cum Regia dignitate, cum libera viuendi licentia, cum omnibus mundi illecebris, cum ipsa denique peccandi potentia, qualis in potentissimo Rege reperitur. Hoc est certamen forte quod dedit illi Deus vt vinceret, & vincendo palmam referret Christianæ Fortitudinis, tum sanctitatis Lauream, & æternæ Coronam beatitudinis assequeretur.

Sic enim vere est apud Deum & apud quoslibet recte sentientes, *Quod ille est inter Potentes Potentissimus, & consequenter inter Illustres Eminentissimus & inter Sanctos Sanctissimus, qui contra magnam peccandi licentiam & potentiam certat & vincit.* Quod sic modò vniuersim declarandum est, vt particulatim ostendatur id ita in sancto Ludouico contigisse, & inde Sanctum ac Beatum extitisse.

Ac primo quidem hæc est vniuersalis & indubitata Propositio quod ex fortiori certamine, Certantis fortitudo, Vincentisque potentia noscitur, atque is omnium consensione gentium inter potentes & inter fortes nominetur Fortissimus, qui in eo vincat certamine vbi certandum est cum hostibus numero plurimis, robore fortissimis, exercitatione peritissimis, & crudelitate sæuissimis. Adde etiam vbi hostibus ex loco & tempore, & aliis circumstantiis longe major est vincendi facilitas, & victis damna importentur extrema. Nonne tum is qui crederetur vincendus si fortiter decertando vincat, Fortissimi nomen mereatur?

Lege caput vicesimum tertium libri secundi Regum, vbi Fortes Dauidis recensentur, & obserua quantum ex vno Regis desiderio moueantur homines qui nec ipso Dei iubentis imperio se patiuntur duci!

II. P V N C T V M.

**S**ED in magna peccandi potentia qualem habere solent Reges, Principes & alij Potentes sæculi, tales sunt hostes: nempe plurimi, infensissimi, exercitatissimi, & supra modum acerrimi.



Non quod Reges aut quiuis hominum maiorem habeat legitime potentiam aut ius vllum peccandi, *Nemini enim mandauit Deus impiè agere, & nemini dedit spatium peccandi*, quin potius, *Potentes potenter tormenta patientur, & fortioribus fortior instat cruciatio*; Sed quod illis tum omnia suppetant ad peccandum; Si potestate abutuntur, dicuntur posse peccare quod reuera peccent, licet non vero iure. Quæ sunt autem illa quæ ad peccandum prouocant? Nonne pecuniæ, illecebræ, conuiuia, mulieres, adulationes, parasiti, ludus, luxus, summa potestas in homines, impunita licentia, & si quid simile à corruptis sensibus, à deprauato mundo, atque à Dæmone in hominum perniciem excogitari possit, de quibus fule Sapiens: *Venite & fruamur bonis quæ sunt, & utamur creatura tamquam in iuuentute, celeriter: vino pretioso & unguentis nos impleamus*, Et quæ plura refert ex sensu eorum qui quod male possunt, male volunt: nec aliud habent quo sese vehementius acuant quam quod possunt quod volunt, aut si quis se opponat, opprimatur, circumueniatur. *Sit fortitudo nostra lex iustitia*. Quali dicerent, illud licere putemus quod possumus facere, quantumcumque sit nefas.

Hoc est quod vno verbo dixit Dominus: *Ecce qui mollibus vestiuntur, in domibus Regum sunt*. Vocantur quippe mollia, quæcumque emolliunt animos & inflectunt ad peccandum, & eò quidem sunt crudeliora quò molliora, quia crudelitas in pelliciendo est, nec dirius vmquam est animæ quàm cum illi est mollius & blandius à mundo & à carne. *Inueni amariorem morte mulierem*, inquit Sapiens: Cur porro nisi quia nihil est mollius? Sic enim pergit, *quæ laqueus venatorum est, & sagena cor eius, vincula sunt manus illius*.

Quàm multi sint porro hi hostes, numera si numerare potes quam multæ in tota vita possint occurrere peccandi occasiones, quæ tam crebræ & obuix sunt quàm faciles sunt oculorum motus & humanæ cordis cogitationes; Tot enim sunt hostes quibuscum semper certandum est; & illi quidem hostes intestini, indiuidui & qui non adeo fatigantur expugnando, vt magis ac magis exercitentur & acuantur. *Non saturatur oculus visu, nec auris auditu impletur. INFERNVS & perditio numquam implentur: similiter & oculi hominum insatiabiles. SANGVIS VGAE duæ sunt filix, dicentes: affer, affer. Ignis vero numquam dicit, sufficit*.

Ecclesi. 15.

Sap. 6.

Sap. 2.

Matth. 11.

Eccle. 7.

Eccle. 1.

Pr. 27.

Ib. 30.



Denique Scriptura teste cum non sit potestas supra terram qua com-<sup>Iob. 40</sup>  
paretur potestati Dæmonis, qui factus est ut nullum timeret: Dæmon  
autem suam illam omnem potestatem jungat cum carnis &  
mundi blandioribus illecebris ad pelliciendas Principum animas  
in peccatum, ut sic facilius eorum subditos in eandem trahat per-  
niciem: Nonne illi hostes erunt eò infensiores quo plures erunt  
peccandi illecebræ? Nonne periculum præsentius? Nonne dam-  
num infestius?

*Vae qui potentes estis ad bibendum vinum, & viri fortes ad miscen-<sup>15. 5.</sup>  
dam ebrietatem! VAE mundo à scandalis! VAE, vae, vae habitantibus<sup>Marth. 18.</sup>  
in terra!<sup>Apoc. 8.</sup>*

### III. P V N C T V M.

**I**LLE est igitur inter potentes potentissimus qui contra magnam pec-  
candi potentiam certat & vincit: Quia certamen illud præ cæ-  
teris tam potens & forte est propter multitudinem, potentiam &  
quaslibet superiores hostium partes, ut in illo qui vincat, nulli cer-  
tando cedat. Non est enim nobis colluctatio tantum aduersus carnem<sup>Ephes. 6.</sup>  
& sanguinem, sed aduersus principes & potestates, aduersus mundi re-  
tores tenebrarum harum, contra Spiritualia nequitie in cælestibus.  
Id est, contra spirituales nequitias quæ circa nos versantur in æ-  
re, & hoc vnum habent ut nos decipiant & in peccatum addu-  
cant ac perniciem sempiternam.

Hac in pugna Sapientissimi & fortissimi quique Reges & Duces  
deuicti sunt: Samsones, Salomones, Dauides & alij pene innu-  
meri sua in peccando infatuati potentia; Vnde & quo potentiores  
in malo erant, eo impotentiores in bono facti sunt. De hac pugna  
expresse dicitur, *Beatus diues qui inuentus est sine macula, & qui<sup>Ecclesi. 31.</sup>  
post aurum non abiit, nec sperauit in pecunia & thesauris. Quis est hic,  
& laudabimus eum? Fecit enim mirabilia in vita sua: qui potuit trans-  
gredi & non est transgressus, facere mala & non fecit, ideo stabilita sunt  
bona illius in Domino, & eleemosynas illius enarrabit omnis Ecclesia  
sanctorum.* Id est, tam multa & præclara bona faciet, ut nullus  
sit qui non illum laudet; quia qui potest male facere & non fa-  
cit, tanta sit instructus fortitudine necesse est ut non mediocri-  
bus contentus, ad summa & perfecta contendat.

Talis autem fuit sanctus noster Ludouicus, qui mediis in di-



uitiis Euangelicam Spiritus paupertatem seruauit: qui castimoniam in deliciis domesticis: modestiam in regali cultu: pietatem in armis; moderationem in prosperis; & in aduersis constantiam tam æquali semper cursu tenuit, vt numquam non dissimilis esset aliis qui suis abuterentur facultatibus, sibi verò semper similis in temperato rerum vsu & ad Virtutem composito. Quod vel maxime patuit cùm religiosum bellum suscepit aduersus infideles; Nonne tum poterat exardescere ad foeliciorem belli exitum quàm qui semel & iterum accidit? Quid iustius quam expugnare Dei hostes? Quid porro iniquius videbatur quam se ab illis videre expugnatum? Vidit tamen sanctus Ludouicus, & tam æquo vidit oculo atque animo, vt perinde paratus esset vinci ac vincere, sic volente Deo: nec minus vicit ab hoste victus, quam si hostem vicisset. Se victus etenim vicit, & seipsum sic vicisse gloriosius fuit quam debellasse barbarum.

Neque porrò satis Illi fuit peccato abstinuisse in peccati perpetrandi potentia, quod certe tamen illustre est ad omnem sæculorum memoriam: sed quod insignius fuit, illam ipsam potentiam qua multum in regno valebat sic traducere solitus erat ad quodlibet pium opus, vt quo alij abutuntur ad vitium, ille ad virtutem vteretur. Diuitias alij ludo, theatris, venationi & epulis impendunt immodicis: Ille pauperibus nutriendis, nosocomiis extruendis, monasteriis ædificandis. Alij Dignitati suæ volunt indulgeri ne ieiunent aut vt vetitis cibis abstineant: Ille pro sua dignitate vrgebat sibi multiplicari ieiunia, & solo pane vesci. Alij apparitores habent & satellites qui ab aula plebeios & proletarios arceant: Ille suos habebat, qui oppressos, qui pauperes, qui viduas & egentes ad se introducerent & ab omni vendicarent injuria. Alij honoribus & prosperis exaltantur: Ille se his deprimebat. Alij se sui temporis Dominos putant vt vacent nugis & otio; Ille vt pietati vacaret, vt horas canonicas quotidie persolueret, vt duobus interesset Sacris. Alij nec à Deo vellent sibi resisti suis in prauis desideriis & consiliis: Ille nec pia sua desideria vellet consequi nisi Deo propitio, nisi Deo volente, qui si aliter de se suisque decernat, longe magis hac Diuina decreta, quamuis grauius, quamuis infausta, quamuis lethalia malit, quam regnum & quam ipsam vitam, Nam illi viuere, & illi regnare, Christus erat.



O mirum & insolitum certandi ac vincendi modum ! Hoc est hostem armis suis debellare, hoc est Holofernem aut Goliathem suo iugulare gladio, hoc est *exhibere membra sua non arma iniquitatis peccato* vt alij solent Principes, *sed arma iustitiae in sanctificationem*, Quod est Christianissimi maxime proprium Regis. Hoc enim verè est esse Christianissimum Regem, sic tanto esse sanctiorem, quanto potentior : sic tantò amplius esse Christianum quantò est amplior Regis potentia.

O rursus admirandam Regis sanctitatem quæ ex peccandi potentia coaluit in talem perfectionis cumulum, vt quot fuerint peccandi genera, & occasiones in Regia Dignitate, tot fuerint Virtutis actus & Sanctitatis gradus ! Hoc est, vt dixi, quot pene momenta vitæ dinumerari possint, tot sint bonitatis vestigia, quia tot sint repressæ malitiæ signa quæ non nisi contrario bonitatis motu reprimi potuit. Quod de alio viuendi statu quàm de supremo & summo vix dici potest : Quia vix est alius status vbi natura deprauata magis acuat ad vitium, vnde oportet Summos Principes aut esse optimos aut pessimos : pessimos quidem si naturæ deprauatæ obsequantur, optimos vero si resistent. Quod quidem est tam arduum & difficile vt quo etiam tempore Salomon esset Regum Sapientissimus, non minus timeret abundare diuitiis quam egere. *Mendicitatem*, inquit, *& diuitias ne dederis mihi : tribue tantum victui meo necessaria, ne forte satiatus illiciar ad negandum & dicam, quis est Dominus ? Aut egestate compulsus furer, & perjurem nomen Dei mei.* Nimis enim procliue est labi & perire quando in alterutro viuendi status extremo fueris, siue excessus ille sit, siue defectus. Et rarus ille est qui æque in Praxi sciuerit abundare, ac penuriam pati. *Non est minus miraculum*, inquit sanctus Ioannes Chrysostomus, *castum esse Iosephum in domo impudica, quàm saluos esse tres pueros in ardenti fornace Babylonica.* O quale ergo miraculum, sanctus in regno suo Ludouicus, qui regnando millies poterat quod Iosephus aliquoties : & nolendo bene, quod male poterat, tot se gradibus Sanctitatis supra quemuis euexit, quot pluribus modis & vicibus peccare potuit, & noluit.

O Rex non minus Sancte quàm potens : Te libenter rogarem pro viris illis principibus qui potentes sunt ad peccandum, suam illam vt potentiam tuo coercerent exemplo : sed nimis experior meo damno, non solos Principes & Primates Viros, sed & in-



362 Die 25. Augusti. In Festo S. Ludouici Regis.

simos quosque ac vulgares posse peccare & sua sapius abuti  
potentia: quamobrem Te pro vtriusque rogo & dimissè precor  
vt omnes hanc fructuosissimam sæpe expendamus Veritatem,  
*Quod si peccare possumus, possumus etiam cum Gratia non peccare: Nec*  
aliter vti debemus potentia qua valemus, quàm vt liberè & li-  
benter nolumus illa vti. Quod enim non debemus facere, licet  
possimus; non est magis faciendum quam si non possemus. Ne-  
que potentia & libertate vti ad peccandum, potentiæ ac liber-  
tatis vsus est, sed abusus. Hoc etiam omnes intelligamus, non  
tam esse potentiæ quam infirmitatis, posse peccare. Aut si po-  
tentem reputamus eum qui quod velit possit, adjungamus illud,  
dum nihil velit ille Potens nisi quod bonum & sanctum est. Vide  
in 2. parte, Die 25. Aprilis, Vbi hæc Veritas exhibetur:

Fortioris est animi, non vinci à bonis blandienti-  
bus, quàm ipsa vincere mala terrentia.



Die 18.  
Augusti.

## IN FESTO S. AVGVSTINI EPISCOPI ET DOCTORIS.

*Sagittæ tuæ infixæ sunt mihi. Pl. 37.*

### VERITAS PRACTICA.

Sagittæ Diuini amoris quantò magis lethiferæ, tanto  
magis viuificæ.

*RATIO EST, Quia sagittæ Diuini amoris tanto sunt magis  
viuifica quanto magis cor purgant ab omni alio humano affectu.  
Sed quanto sunt magis lethiferæ tanto magis cor purgant ab omni  
alio humano affectu.*

*Ergo & tanto magis sunt viuifica, quanto magis lethiferæ. Quod*



Utrumque miro modo excelluit in sancto Augustino qui de se sic Domino loquebatur : Sagittaueras Tu cor nostrum Charitate tua. 9. Conf. 2a

I. P V N C T V M.

**Q**UAE in prima parte habentur Considerationes & Veritates, Communes omnibus Pontificibus, Doctoribus, & Fundatoribus ordinum, eae omnes tam singulariter conueniunt sancto Augustino, quam singularis & eximius fuit in illis Titulis & Gradibus. Quaecumque sparsim etiam de Diuino amore proponuntur, totae ad Illum referri possunt qui totum se ad Diuinum amorem in se & in nobis formandum transtulit. Denique qui vno velut intuitu quae sunt pene immensa tanti Viri merita sibi aut aliis repraesentare velit, depromat ex libro Ecclesiastici quae de Simone illustri Oniae filio, refert Sapiens : *Sacerdos magnus, qui in vita sua suffulsi domum, & in diebus suis corroborauit templum, In diebus ipsius emanauerunt putei aquarum, & quasi mare adimpleti sunt supra modum. Qui curauit gentem suam, & liberauit eam a perditione. Et post pauca : Quasi Stella Matutina in medio nebulae, & quasi Luna plena in diebus suis lucet. Et quasi Sol refulgens, sic ille refulsit in templo Dei. Quasi arcus refulgens inter nebulas gloriae, & quasi flos rosarum in diebus vernis, & quasi lilia quae sunt in transitu aquae, & quasi thus redolens in diebus aestatis. QUASI IGNIS EFFVLGENS, ET THVS ARDENS IN IGNE. Quasi vas auri solidum, ornatum omni lapide pretioso, Quasi oliua pullulans, & Cypressus in altitudinem se extollens, in accipiendo ipsum stolam gloriae, & vestiri eum in consummationem Virtutis.* Ecclesi. 50.

In quibus Verbis primum quod mireris est multiplicitas Symbolorum quae singula sancto Augustino apte quadrant, si pro Templo Ecclesiam vniuersam acceperis. Secundum est, diuersitas & quasi repugnans rerum conjunctio quae simul de Eodem dicuntur. Nam si Stella est, quare Sol dicitur? Si quasi rosa, cur quasi lilium? Si quasi oliua, cur Cypressus? Quis non videt vnum pene negare aliud? Sed ablit hoc de Scriptura Sacra cogitare: Non poterant aptius exhiberi quae tam varia S. Augustinus exercuit Christianae religionis munera, quam paruis illis simul &



magnis rebus, quia reuera sic paruus humilitate & modestia semper fuit, vt magnus numquam esse desineret, Virtute, Scientia, & omni laudis genere.

Tertium verò quod magis rarum & magis mirum est, sic excellenter effulgit Intelligentia & Doctrina, vt Sol refulgens merito dici possit: simul vero sic affectu & voluntate in Diuinum exarsit amorem, vt quasi ignis & thus ardens in igne dicatur. Quod quidem de Illustribus aliis viris satis commune est in temperato quodam gradu, quo simul lucent & ardent: Sed in eo summo gradu quo sanctus Augustinus refulsit, & Diuini flamma incendij totus exarsit, tam mirum est & singulare vt præter causam quam refert sanctus Thomas ab elatione Scientiæ petitam, affirmant alij id ita simul non reperiri, quod Doctores habeant animum in illa quibus student objecta distractum & diuisum, quæ animi diuisio non apte conueniat inflammandæ voluntati; Vnde vt dixi, tanto id magis est in sancto Augustino mirum, quanto is supra Doctores alios in plura diuisus est Scientiarum objecta, nec propterea tamen quidquam de ardenti eius Charitate decessit, quin potius se in Eo Scientia & Charitas sic mutuis & reciprocis confouebant subsidiis, vt ab ardore Charitatis reluceret Scientia: & à luce Scientiæ Charitas inflammaretur. *Erat lucerna ardens & lucens*, Non prius lucens quam ardens, nec enim prius à luce ardor quam lux ab ardore processit, vt notat sanctus Bernardus. Præcessit quidem tempore Scientia Charitatem, sed Charitas dignitate, potentia, & vi quadam superiore Scientiam Augustini sic in se transulit, vt non esset eius inflata nec inflans Scientia sed inflammata simul & inflammans. Sicut enim ferrum ignitum non iam ferri sed ignis naturam obtinet, sic eius Scientia Charitate inflammata, quidquid humanum erat, exiit & in Diuinum transit.

Hoc videlicet effecerunt Diuinæ illæ sagittæ quibus transfixus est; hæc est illarum vis admiranda quemcumque feriant, vt quod est humanum purificent & quodammodo conuertant in Diuinum, ac propterea dicuntur lethifera & viuifica, Imo & *quanto magis lethifera tanto magis viuifica*. Quod quomodo in nobis etiam fieri possit sicut in sancto factum est Augustino, nunc ex Veritate proposita, paulo attentius perpendendum. Hinc enim manifeste apparebit, quoniam sit verus & vere Diuinus amor, hinc patebit quibus

2. 2. q. 82.  
a. 3.

Ioan. 5.

Serm. in  
Natiuit.  
Ioan.



quibus veris indiçis sagitta coelestis dignoscatur à *sagitta volante* Pf. 202  
*in die, à negotio perambulante in tenebris, ab incurſu & Daemonio me-*  
*ridiano.* Nempe sagitta Domini sagitta salutis est, sagitta vitæ,  
 sagitta viuifica, veram animæ conferens vitam, id est, ipsam  
 Charitatem quæ ex Deo est quæ in eo est, & ad eum solum ten-  
 dit. Vt autem talis sit, vt sit inquam ita viuifica debet prius esse  
 lethifera, debet prius mortem quandam inferre cordi, quæ Mors  
 quo magis certa fuerit, erit & vita certior.

Ratio quæ id euidenter declarat, est, quod vera & viuifica Cha-  
 ritas sit de corde puro, vt ait Apostolus, puro inquam ab omni 1. Tim. 2  
 alio quouis affectu qui non subordinetur & subjiçiat Charitati.  
*Aurum est ignitum, probatum, locuples,* id est, defecatum ab omni Apor. 3  
 alio quouis metallo; neque enim tam probatur aurum in igne, vt  
 ardeat, quam vt purificetur & mundetur: sic neque amor ita  
 probandus est, quando ardet in corde nondum puro & circumci-  
 ſo, quam si puritas cordis eſſet maior, & ardor minor; qua de re  
 plura in prima parte, in 3. Hebdomada Aduentus. Nunc ſufficiat  
 quod aiebat Deo ſanctus Auguſtinus: *Minus te Domine amat qui te-* In Soli.  
*cum aliquid amat, quod non propter te amat:* Quia videlicet Deus de c. 192  
 toto corde vult diligì, vnde quanto Cor est minus purum, tanto  
 magis de toto tollitur, & tanto minus Deus diligitur. Atque id-  
 circo quod primum & quod præcipuum requirit in corde Char-  
 itas, est illa cordis munditia de qua ſic rurſum ſanctus Auguſtinus,  
*Exinani quod implendum eſt: bono implendus es, funde malum: puta* In 1 Ioan. 3  
*quia melle te vult implere Deus, ſi aceto plenus es, vbi mel pones? Fun-*  
*dendum eſt id quod portat vas, mundandum eſt ipſum vas.* Et quæ  
 plura refert. Tum de ſe alibi. *Quam ſuaue mihi ſubito factum eſt ca-* 9. Confess. 24  
*rere ſuauiatibus; & quas amittere metus erat, iam dimittere gaudium*  
*erat. Ejiciebas enim eas à me, vera tu & ſumma ſuauiſſas: ejiciebas &*  
*intrabas pro eis omni voluptate dulcior, ſed non carni & ſanguini: om-*  
*ni luce clarior, ſed omni ſecreto interior: omni honore ſublimior ſed*  
*non ſublimibus in ſe. Iam liber erat animus meus à curis mordacibus*  
*ambiendi & acquirendi, & volutandi, atque ſcalpendi ſcabiem libidi-*  
*num.*

Videſne quantum Auguſtini pectus purificaretur à Domino?  
 Videſne quantum etiam ipſe Dominus, tuum purificare vellet?



## II. PUNCTVM.

**S**ED quanto sunt magis lethifera sagittæ Domini seu Diuini amoris, tanto magis purgant animum ab omni alio prauo affectu.

Sic enim propterea lethifera dicuntur sagittæ Diuini amoris, quod alios affectus interimant, vnde & fortis vt mors dilectio dicitur, quia scilicet, vt cum nostro sancto Augustinus ait Diuus Gregorius, *Quod mors agit in sensibus corporis, hoc agit dilectio in cupiditatibus mentis. Sunt enim nonnulli qui sic diligunt Deum vt omnia visibilia negligant, & dum in æterna, mente tendunt, ad omnia temporalia pene insensibiles fiunt. In his nimirum vt mors, dilectio fortis existit, quia sicut mors exteriores corporis sensus ab omni proprio & naturali appetitu interficit, sic dilectio in talibus viris omnia terrena desideria contemnere mentem alio intentam compellit.* Non sic porro in omnibus Charitas vim suam exerit, quia non sic omnes se Charitati totos dedunt, ac proinde cum dicitur, quod sunt sagittæ Caritatis magis lethifera, perinde est ac si diceretur, quo sunt acutiores & potentiores ad illam suam vim & violentiam exercendam, quod sinuntur liberius efficere & operari in animis nostris sensualem illam mortem: Tum illud denique aduenit quod in propositione sequitur, *tanto magis purgari animum ab omni alio prauo affectu*, quia sic purgari animum nihil est aliud quam ipsum mori suis prauis affectibus, vnde quo his verius moritur, verius purgatur.

Quod luculentè admodum his Iobi verbis exprimitur: *Sagittæ Domini in me sunt, quarum indignatio ebibit spiritum meum, & terrores Domini militant contra me.* Nempe indignatur Charitas contra nostras cupiditates quas secum pati non potest tamquam indignas suo consortio: tum vero talis indignatio ebibit spiritum, id est exhaurit, euacuat, & absorbet quidquid impurum est. Quod si resistit cupiditas, si sibi sua perire dolet, si quo metu terretur, terrores Domini contra militant, hoc est, timor humanus Diuino repellitur, & hoc est quod petebat Dauid, *Confige timore tuo carnes meas, à Iudiciis enim tuis timui.*

Atque hoc etiam ipsum est quod in se sentiebat & mirabatur S. Augustinus: *Quid est illud quod interlucet mihi & percutit cor meum sine lesione, ET INHORRESCO ET INARDESCO? Inhorresco, inquantum dissimilis ei sum: Inardesco, inquantum similis*

Aug. in  
Ps. 47.  
Greg. in  
Cant. 8.

Iob. 6.

Ps. 118.

Et. Conf.  
9.



ei sum. Quâm vero hinc plene purgatus esset terreno quouis affectu, sic ibidem expressit: *Domine amo te: percussisti cor meum verbo tuo, & amavi te. Quid autem amo cum te amo? Non speciem corporis, nec decus temporis, nec candorem lucis, non dulces melodias suauium cantilenarum omnimodarum, non florum & unguentorum & aromatum suaueolentiam, non manna & mella, non membra acceptabilia carnis amplexibus, non hæc amo cum amo Deum meum.* Quæ dum ibi plura prosequitur, non modo significat Deum non esse aliquid simile terrenis illis bonis, sed nec seipsum talibus bonis affici cum Deum amat, quasi diceret se lethifera illa Diuini amoris sagitta sic esse vulneratum, vt tam plene purgatus esset aliis affectibus quâm opus esset ad vnum Deum plene amandum.

O Diuina dilectionis spicula! en paratum pectus, en Cor vobis apertum, sic me confodite, sic vulnerate, sic me totum impetite, vt totus à me deficiam & vestro numquam saner vulnere, in quo est vera sanitas.

### III. P V N C T V M.

**S**AGITTÆ Diuini amoris igitur quânto magis lethifera, tanto magis viuifica, Tanto magis puræ, seu tanto magis est purus amor inde proueniens, & tanto magis est ille amor qui mortificando viuificat, qui pauperem faciendo, ditat, qui humiliando subleuat, & qui auferendo Spiritum nostrum, suum Diuinum conferet iuxta illud Psalmi: *Auferes Spiritum eorum & deficient, & in puluerem suum reuertentur. Emittere Spiritum tuum & creabuntur, & renouabis faciem terræ.* **NOLVERUNT** habere Spiritum suum, inquit ibi sanctus Augustinus, *habebunt Spiritum Dei.* O diues commutatio! ô quis sic mori nollet vt sic viueret? Et tamen tam pauci sunt qui sic Spiritu Dei viuant, quia suo nolunt mori! Tam pauci sunt qui viuificas amoris Sagittas sentiant, quia nolunt sentire lethiferas. Vellent sibi & Deo viuere: nollent sibi quidquam perire pro Deo possidendo. Quasi Deus non præponderaret omnibus. Non sic, non sic sanctus Augustinus qui quantumcumque desertis omnibus vni Deo suo coniunctissime viueret, ad ipsa tamen omnia magis ac magis deferenda sic animam suam frequentissime, sic nos secum excitabat: *Ibi fige mansionem tuam, ibi commenda quidquid habes anima mea, saltem fatigata fallaciis. Vt quid*



868 Die 28. Augusti. In Festo S. Augustini, Episcopi & Doctoris.

peruersa sequeris carnem tuam? Ipsa te sequatur conuersa. Si placent corpora, Deum ex illis lauda, & in artificem eorum retorque amorem: ne in his quæ tibi placent, tu displiceas. Si placent anime, in Deo amentur. Rape ad Eum quas potes, & dic eis: Hunc amemus, hunc amemus. State cum eo, & stabitis. Requiescite in eo, & quieti eritis. Quò itis in aspera? Quò itis? Bonum quod amatis, ab illo est. Quò vobis adhuc, & adhuc ambulare vias difficiles & laboriosas? Non est requies vbi queritis eam. Querite quod queritis, sed ibi non est, vbi queritis. Beatam vitam queritis in regione mortis: non est illic. Quomodo enim beata vita, vbi nec vita? Et descendit huc Vita nostra & tulit mortem nostram, & occidit eam de abundantia vite sue, & tonuit clamans, vt redeamus hinc ad Eum. Numquid & post descensum vite non vultis ascendere & vinere? Sed quò ascendistis quando in altum istis, & posuistis in cælum os vestrum? Descendite vt ascendatis, & ascendatis ad Deum: cecidistis enim ascendendo contra eum. Dic eis ista, vt plorent in conualle plorationis, & sic eos rape tecum ad Deum, quia de Spiritu eius hæc dicis eis, si dicis ardens igne Charitatis.

Nonne tibi tot amoris tela videntur quot Verba? Ergo his etiam sine te affici.

Nec timeas te nimis multis obrui.

Non his obruitur telis animus, quibus magis erigitur.

Non his multiplicatis oneratur, sed hæc multiplicanda sunt potius, ne oneretur animus.

Quæ certe alia posset esse Veritas vel seorsim vel conjunctim cum præcedente aut sequentibus expendenda, Cuius hæc est Ratio, Quia obrui animum vel onerari multis, est impediri multiplicitate rerum, ne rectè afficiatur. Sed cum Diuini amoris tela & motiua multiplicantur, tantum abest vt animus illa impediatur multitudine, quin potius adiuuatur: quia varietate reficitur, renouatur, instauratur, & fouetur. Ergo multiplicanda sunt potius tela & motiua Diuini amoris, quam decurtanda ne animus oneretur. Quod quomodo faceret sanctus Augustinus, & vnde tanta tamque diuersa quibus magis ac magis in Deum afficeretur, erueret, sic paucis habeto.

Primò considerandum sibi proponebat gratuitum illum Diuinum amorem qui nos etiam immerentes prauenit in benedictionibus dulcedinis suæ, & de vasis iræ fecit vasa misericordiæ, &



ubi abundauit delictum, ibi abundet Gratia. Vide libri noui Confessionum caput primum, ubi hæc inter alia sanctus Doctor: *Vbi erat tam annoso tempore, & de quo imo altoque secreto euocatum est in momento liberum arbitrium meum, quo subderem ceruicem leni Iugo tuo, & humeros leni Sarcinae tuae? Christe IESV adjutor meus & Redemptor meus.*

Secundò, dum cogitaretur hæc Diuini amoris Bonitas, tanta in Eius animo fiebat commotio quòd illam aliquando peccatis suis offendisset vt quot erant animi poenitentis motus, tot sentirentur tela quibus compungebatur, ac magis excitabatur ad Illum quem neglexerat diligendum. *O putredo, inquebat, o monstrum vite, & mortis profunditas? An ille petiuit liberè quod non licebat? Non ob aliud nisi quia non licebat? Quid retribuam Domino quod recolit hunc memoria mea, & anima mea non metuit inde? Diligam te Domine, & gratias agam, & confitebor nomini tuo, quoniam tanta dimisisti mihi mala, & nefaria opera mea.* 2. Confess. 7.

Tertiò, quantumcumque moueretur ac doleret animus, tam parùm se commoueri ac dolere sentiebat præ desiderio dolendi vehementius, vt desiderium illud esset velut alia quædam sagitta quâ vsque ad mortem percutiebatur, quia eò vsque & ultra si fieri posset poenitentiam continuare & augere voluisset: *Semper, inquit, doleat, & de dolore gaudeat, & non semper doluisse doleat.* l. de Vera Poenit. c. 13.

Quartò denique, cum Amantissimus Christi Domini, amorem suum videret Crucifixum, sic configi cum Eo desiderabat, vt ipsis quodammodo Christi clauis semetipsum Cruci affigeret, *optaretque cum Apostolo dicere, Christo confixus sum cruci: Sicque fiebat inter Christum & Augustinum quod factum erat inter Dauidem & Ionatham, cum Dauidi Ionathas dedit arcum & sagittas, & Dauid Ionathæ defleuit mortem, hoc affectu: Doleo super te frater mi Ionatha, decore nimis & amabilis super amorem mulierum. Sicut mater unicum amat filium, ita ego te diligebam.* Gal. 2. 1. Reg. 18. 2. Reg. 18.

Sic sanctus Augustinus sese in hoc pietatis genere magis ac magis exercebat: *Rogo te per illa salutifera vulnera tua quæ passus es in cruce pro salute nostra, vulnera hanc animam meam peccatricem, pro qua etiam mori dignatus es: vulnera eam igneo & potentissimo telo tuæ nimie Charitatis. Tu Sagitta electa, & gladius acutissimus qui durum scutum humani cordis penetrare tua potentia vales; confige cor* In Mediis c. 37.



870 Die 28. Augusti. In Festo S. Augustini, Episcopi & Doctoris.  
*meum iaculo tui amoris, ut dicat tibi anima mea, Charitate tua vulnerata sum.*

Nonne sic posses vulnerari? Nonne sic affici? Nonne saltem desiderare? Saltem orare? Quando cor linguam non excitat, saepe cor lingua mouet, cum Diuina Gratia.

EODEM DIE : AD HÆC  
CHRISTI VERBA.

*Qui fecerit & docuerit, hic Magnus vocabitur in regno cœlorum. Matth. 5.*

VERITAS PRACTICA.

Magnus amor, magnus est Doctor.

**R**atio est, quia magnus est Doctor qui fecerit & docuerit: & quo plura melius fecerit & docuerit, tanto magis magnus est Doctor. Sed magnus Amor, hic est qui non modo facit facere & docere, sed qui mouet ad plura melius facienda & docenda. Ergo magnus amor magnus est Doctor. Quæ quidem omnia facile est ex Verbis & operibus sancti Augustini demonstrare quam vera sint, & quam verè in Illo fuerint. Perpende hæc pauca ex multis ad illud Psalmi, *Qui sedes super Cherubim. CHERUBIM*, inquit, *sedes est Gloria Dei, & interpretatur plenitudo Scientiæ. Ibi sedet Deus in plenitudine Scientiæ. Licet intelligamus Cherubim sublimis esse cœlorum potestates atque virtutes, tamen si vis, eris Cherubim: Si enim Cherubim sedes est Dei, audi quid dicat Scriptura: anima Iusti sedes est Sapientia. Quomodo, inquis, ero plenitudo Scientiæ? Quis hoc implet? Habes unde impleas. Plenitudo legis Charitas. Noli per multa ire atque distendi. Terret te ramorum diffusio, radicem tene & de magnitudine arboris noli cogitare. Sit in te Charitas, & necesse est plenitudo Scientiæ consequatur. Quid enim nescit qui Charitatem scit, quandoquidem dictum est: Deus charitas est?*

Vide in 2. parte, Feriam 2. Pentecostes.



Quò quisquis est Dei amantior, eò est augustior & amabilior. 874

EODEM DIE : AD HÆC VERBA,  
A V T S I M I L I A.

*Dilectus Deo & hominibus, cuius memoria in benedictione est. Ecclesi. 45.*

V E R I T A S P R A C T I C A.

Quò quisquis est Dei amantior, eò est augustior & amabilior.

**R**atio est evidens, quia quo quisquis est Dei amantior, eò est sanctior & beator: Nam vt ait sanctus Augustinus: *Ille tenet* Serm. de laudib. Charitatis. In Ps. 103. *& quod patet & quod latet in Diuinis eloquiis, qui Charitatem tenet in moribus: Et rursum: In omnibus Scripturis supereminentissimam viam, supereminentissimum locum Charitas obtinet: non ad eam aspirant nisi boni. Hanc nobiscum non communicant mali: possunt communicare Baptismum, possunt communicare orationem, possunt communicare istos parietes; Charitatem nobiscum non communicant. Ipse est enim fons proprius bonorum, proprius Sanctorum de quo dicitur, nemo alienus communicet tibi. Supereminens enim via Charitatis tenet eos qui propriè pertinent ad regnum cælorum. Ergo præceptum Charitatis super cælos, super omnes libros: ei enim subduntur libri, ei militant omnes lingue sanctorum, & omnis motus Dispensatorum Dei & animæ & corporis.*

Sed quò quisquis est sanctior & beator, eò est Augustior & amabilior, seu quod idem est, quo quisquis est sanctior, eo maiori cultu & veneratione dignior est; Nam sanctitas & beatitudo est proxima ratio propter quam veneramur sanctos. Vnde Regius Psalter, *Sanctitas & magnificentia in Sanctificatione eius*, Id est, vt interpretatur sanctus Augustinus, *Cum Sanctificatus fueris, eris & magnificus.* Ps. 96. *Hoc annuntiamus cum ædificamus domum.* Quasi diceret, quando Ecclesiam ædificamus in qua Sancti colantur, hoc annuntiamus vobis idcirco eos à nobis coli quia Sancti sunt; & quia sanctitatem omnem suam acceperunt à Deo, propterea Eorum cultus ad ipsum Deum refertur qui in sanctis colitur, sicut in Illo Sancti coluntur.



372 Die 29. Augusti. In Festo Decollationis S. Ioannis Baptiste.

Ergò quo quisquís est Dei amantior, eò est augustior & amabilior, sicut reuera est sanctior & beator. Ergo & sanctus Augustinus qui Dei amantissimus fuit, fuit etiam Sanctissimus & est in coelo Beatissimus, & est à nobis præcipuo quodam cultu colendus. Vide quid in eius honorem hodie, quidue ad eius imitationem facias.



Die 29.  
Augusti.

## IN FESTO DECOLLATIONIS S. IOANNIS BAPTISTÆ.

*Herodes misso spiculatore præcepit afferri caput eius in disco. Et decollauit eum in carcere, & attulit caput eius in disco: & dedit illud puella, & puella dedit matri suæ. Marci 6.*

### VERITAS PRACTICA.

Mors Ioannis, Vox clamantis in deserto cordis est, contra proprias Concupiscentias.

SENSVS ET RATIO EST, Quia quidquid cordi nostro representatur quod ipsi manifestet propriæ concupiscentiæ prauitatem & perniciem, potest apte dici, Vox clamantis in deserto cordis contra proprias eius concupiscentias.

Sed mors sancti Ioannis Baptiste talis est: nempe sic representatur cordi ut ipsi manifestet propriæ concupiscentiæ prauitatem & perniciem.

Ergo hæc mors Ioannis, quedam est velut Vox clamantis in deserto cordis contra proprias eius concupiscentias. Quæ quidem Vox tanto nunc magis est audienda, quanto minus forte alias ei attenditur.

L. PVNCTVM



I. P V N C T V M.

**A**RGVEBAT Ioannes Herodem Regem, quod uxorem fratris sui Philippi Herodiadem rapuisset. Rex autem Ioannem inclusum carcere continebat. Tum vero accidit ut cum in conuiuio regio filia Herodiadis saltasset & placuisset Herodi, obtinuit ex suggestione Matris à Rege, Caput Ioannis. Ergo abscissum Caput affertur in disco. Quale ferculum! Quale conuiuium! Quæ omnia fusius apud sanctum Marcum legi possunt, unde illud præcipue discas ad Praxim, quanta sit etiam in nobis Concupiscentiæ deprauatio! Verè enim Mors Ioannis non modo contra Herodem aut Herodiadem Vox est clamantis in publico, sed & in deserto cordis nostri contra nostras ipsas concupiscentias: Quæ quidem Veritas sic modo expendi debet, ut in quamlibet reprimendæ concupiscentiæ datam occasionem Praxis transferatur.

Ratio vero Veritatis est euidentissima quoad illam primam partem qua dicitur, quidquid cordi nostro repræsentatur quod ipsi manifestet propriæ concupiscentiæ prauitatem & perniciem, id apte dici potest Vox clamantis in deserto cordis contra proprias concupiscentias.

Sic enim dicitur Abele occiso, *Vox sanguinis fratris tui clamat ad me de terra.* Et, *Habemus aspersonem sanguinis melius loquentem quàm Abel.* Sic dicuntur panni nascentis pueri IESV in præsepio clamare contra mundi vanitatem. Sic dicitur suam unicuique Conscientiam testimonium reddere & inter se inuicem cogitationes accusare, aut etiam defendere. Vnde & quidquid ita Cordi nostro sese offert unde se cognoscat & arguat, tum certe Vox illi clamans dici debet, cui si forte cor obsurdescat, Vox inde alia clamat ad aures Domini Sabaoth, sicut fraudata merces operariorum, & vindictam clamat voluntariæ furditatis, & obduratæ malitiæ. *Descendam & videbo utrum clamorem qui venit ad me, opere compleuerint.*

Quàm verè autem Cor peccatoris Desertum dici possit, vide in prima parte: Dominica tertia Aduentus.



## II. P V N C T V M.

**S**ED Mors sancti Ioannis Baptiste sic representatur Cordi, ut ipsi manifestet propria concupiscentiae prauitatem & perniciem.

Non tantum quia representat nobis quod quantumque facinus est perpetratum in Decollato Ioanne, totum est à prauitate Concupiscentiae siue Herodiadis siue Herodis: sed quia etiam in ipsa eorum inordinata concupiscentia, manifestatur nostrae inordinatio. Sicut enim Inordinatio Herodiana concupiscentiae tum maxime apparuit, quando quod erat totius mundi pretiosissimum Caput S. Ioannis posthabetur mulierculae saltatrici: sic inde suo modo apparet quanta sit nostrae deordinatio, cum res mundanas inordinate diligimus, & ex earum affectu voluntatem Dei negligimus, aut praetermittimus, & ipsum Deum offendimus. Licet enim non sit tam graue nostrum crimen quale illud Herodis fuit, occidendo Sanctissimum Virum; tamen si occisionem illam consideremus tantum ut Inordinationem quandam humanam, abstrahentes cogitationem à peccato siue ab offensa Dei, nonne semper humano iudicio seu coram hominibus & secundum leges politicas ac ciuiles, magna foret deordinatio? Quid est enim deordinatio, nisi cum inferius superiori antefertur, & quod est maior illius inferioris à superiori, distantia, quaecumque tandem sint illa extrema quae sic confunduntur, eò maior est Inordinatio? At qualis illa quantaque distantia etiam humano Iudicio inter puellam & Virum illum quo inter natos mulierum non surrexit Maior? Quem etiam Herodes magni ducebat, & quo audito multa faciebat? Magna itaque semper esset inordinatio, etiam si nullum in ea peccatum cogitaretur.

Iam vero non separemus mente & cogitatione, sicut re ipsa non est separatum ab inordinatione cordis nostri peccatum quod in ea reperiri potest, quaecumque illud fuerit, etiam veniale: & hanc ipsam inordinationem nostram comparemus cum illa quam consideramus tantum, ut humanam & ciuilem in Herode: Nonne nostra tanto maior apparet quanto est Deus maior Ioanne? Seu quanto maior est inter Deum & res humanas distantia, quam inter Ioannem & puellam? Sicut enim ut dictum est magnitudo deordinationis Herodiana petitur à magna distantia Ioannis & puellae



quæ illi præfertur, sic nostræ inordinationis magnitudo peti debet ab illa quæ est inter Deum & res concupitas quas illi præferimus, quæ cum longè maior sit quam alia, maior sit etiam nostræ inordinationis magnitudo necesse est, seu maior deprauatio. *Transite ad insulas Cethim, & videte: & in Cedar mittite, & considerate vehementer, & videte si factum est huiusmodi.* Ponderandum illud, *considerate vehementer*, quasi diceretur, nisi sic vehementer consideres, non intelliges: Sed si attente considerare volueris, tunc aperte videbis, nihil in humanis rebus reperiri tam inordinatum, tam indignum, tam iniustum & execrandum, quàm quod in Diuinis reperitur, cum vel vno veniali peccato summa illa Diuina Majestas pro re leui offenditur. *Sanctum meum violasti in omnibus* *offensionibus tuis!* Ezech. 5.

III. P V N C T V M.

**M**ORS ergo Ioannis Vox est clamantis in deserto cordis nostri contra proprias ipsius concupiscentias, Quia ex tali morte apparet earum malum & deordinatio, quatenus scilicet consideratur humana tantum Herodis actio citra offensam Dei, & eius deordinatio cum nostris peccatis comparatur; In qua comparatione vidimus, nostram tanto maiorem apparere, quanto esset majus interuallum meriti & dignitatis inter Deum à nobis offensum, & Ioannem ab Herode decollatum. Estò non sit mortale peccatum nostrum, nec Deicidium sicut Herodis peccatum fuit homicidium: plus est tamen, Deum vel minima offendi culpa quam Ioannem occidi, si occisus consideretur sine vlla Dei offensa, quemadmodum hic nobis considerandus proponitur. Major est denique inordinata nostræ concupiscentiæ prauitas quàm cuiuslibet hominis inordinatio non peccantis. Hoc tibi Ioannes moriens clamat sicut Herodi iam mortuo suum exprobrabat crimen. Os aureum illud exangue conticescendo, totum hoc damnat quod Scripturæ condemnant: *Ne sequaris in fortitudine tua concupiscentiam cordis tui:*

*POST concupiscentias tuas non eas: & à voluntate tua auertere.* NON *regnet peccatum in vestro mortali corpore, vt obediatis concupiscentiis eius.* O MNE quod est in mundo, concupiscentia carnis est, & concupiscentia oculorum & superbia vite. NON concupisces ex rebus eius *aliquid.* Ecclesi. 5.  
Ibid. 18.  
Rom. 6.  
I. Ioan. 2.  
I. Reg. 15.



876 Die 29. Augusti. In Festo Decollationis S. Ioannis Baptista.

Vide in 2. parte, Feria 5. post Cineres, Vbi hæc explanatur Veritas:

Quà latè patet mundus, nihil est vsquam ita contemnendum, quàm quod intus in te vno latet, Nempe *Concupiscentia*.

SI quæ Septembris Festa in huius tertix Partis tempus forte inciderent, habetur eorum Consideratio in quarta sequenti parte.







# DEVOTIS RELIGIOSIS.

IN DIE PROFESSIONIS EDENDÆ:

VEL QVO PRIMVM VOTA RELIGIOSA  
NUNCVPANTVR.

*Holocausta tua in conspectu meo sunt semper. Pl. 49.*

## VERITAS PRACTICA.

Professus idem ac profitens.

SENSVS EST, Quod sicut profitens dum Professionem edit, aut dum prima vota nuncupat, debet in eo esse animo vt quocumque viuat loco & tempore, velit viuere conformiter perfectioni status quem amplectitur: Ita & semper perseueret in eo ipso animo & eadem voluntate, nec minus aliquando se obligatum sentiat post multos professionis annos, ac dum actu profite- tur: sicut reuera non minus est obligatus coram Deo, qui pro- pterea profitenti & vouenti dicit: *Holocausta tua in conspectu meo sunt semper.* Id est, te tuaque opera omnia semper aspicio sicut dum actu te in holocaustum offerebas, vnus & idem perinde mihi es, professus ac profitens; sicque teipsum de futuro à teipso de praesenti, plane indiuisum volo, & tibi prorsus idem persuasum.

RATIO petitur à ratione holocausti quod totum est Dei, & quod offerri Deo debet in professione seu prima votorum nuncupatione, vt sit religiosa & legitima sui oblatio.



378 In die Professionis, vel quo primum vota religiosa eduntur.

*Sed nisi professus idem esset ac profitens, quo sensu dictum est, non esset oblatum holocaustum, vel ipsum esset ablatum.*

*Ergo id ita fieri debet modo & deinceps, ut sit professus idem ac profitens.*

## I. P V N C T V M.

**Q**UÆCUMQUE modò sunt in vniuersa rerum natura: quacumque olim extiterunt; & quæ aliquando futura sunt, ita sunt in conspectu Dei omnia, ut nihil illi prorsus sit præteritum aut futurum, sed cuncta merè præsentia, cuncta subiecta eius oculis, cuncta denique siue vniuersim, siue singillatim in eius mente, sicut in eius nutu posita. *Non est*, inquit Apostolus, *ulla creatura inuisibilis in conspectu eius: omnia autem nuda & aperta sunt in oculis eius.* Dicuntur tamen aliqua singulari quodam modo esse in conspectu eius vel ab illo respici, quod illa potissimum cara ducat & nobis singulariter commendata velit: Sic passim in Scripturis: *Oculi eius in pauperem respiciunt: HUMILIA respicit in cælo & in terra: OCULI mei erunt aperti & aures mee erectæ ad orationem eius qui in loco isto orauerit.* Id est, certis signis & effectis indicabo me præsentem illi loco vel personis, vel negotiis de quibus ibi est sermo, ut sic etiam discant homines, illud ipsum non parui facere quod audiunt à Deo magni fieri.

Cum itaque Deus vellet holocausta quæ à populo suo sibi quondam offerebantur, rite & sanctè offerri, *Holocausta*, inquit, *tua, in conspectu meo sunt semper*, Hoc est Sacrificium quod præ cæteris spectro, & quod spectari volo ut integre & sincere fiat: *Nam ego Dominus diligens iudicium, & odio habens rapinam in holocausto.* Ac cum præterea tale esset Sacrificium ut de hostia immolata nihil prorsus reseruaretur sicut in aliis Sacrificiis, sed tota incenderetur in honorem Dei, periculum erat ne Sacerdotes aut alij offerentes Sacrificium, sibi aliquid retinerent, nec plane totum daretur Deo, quod ut sacrilegum & valde odiosum dicebatur Deus detestari, ut ipsi homines ab hac impietate detererentur.

Et vero sicut in illis holocaustis Mosaicis & cruentis, Deus

Hebr. 4.

Ps. 10. &  
112.

2. Par. 7.

Is. 61.



Christianas & Spirituales hostias potissimum intuebatur, ita quando dicebat se in conspectu habere semper holocausta, non tam de illis veteribus quam de nouis, non tam de carnalibus quam de Spiritualibus, intelligendus est, ipso teste Psalmista Regio qui sic aperte Deo: *Holocaustis*, inquit, *non delectaberis: Sacrificium* <sup>Pf. 50.</sup>  
*Deo Spiritus contribulatus.* Et rursus: *Sacrificium & oblationem no-* <sup>Pf. 39.</sup>  
*luisti, aures autem perfecisti mihi: holocaustum pro peccato non postu-*  
*lasti, tunc dixi: ecce venio. In capite libri scriptum est de me ut facerem*  
*voluntatem tuam, Deus meus volui, & legem tuam in medio cordis mei.*  
 Quasi diceret, hoc est maxime holocaustum quod tibi placet, ut tui  
 toti simus, & tuæ voluntatis obsequio mancipati. Quod & alibi  
 clarius: *Introibo in domum tuam in holocaustis, reddam tibi vota mea,* <sup>Pf. 65.</sup>  
*que distinxerunt labia mea:* Id est, hæc sunt videlicet holocausta  
 quæ Tu præcipue respicis, ut tibi vota mea distinctè & attente  
 faciam, & prout illa feci, reddam: prout animo me affectum sensi  
 dum illa facerem, sic bene semper affectus permaneam, & tam  
 constans in omnibus meis promissis ac votis exoluendis persistam,  
 quàm libens & voluntarius illa professus sum.

Hoc est quod paucis istis Verbis, *Professus idem ac profitens*, pro-  
 ponit Veritas modo expendenda. Vnus & Idem Is qui hodie pro-  
 fessionem facit, permaneat affectu & effectu in totos consequen-  
 tes annos, qualis modo est affectus dum profitetur. Sic profitendo  
 sit affectus sicut debet perfecte viuere, toto quod superest viuendi  
 tempore: sicque perfecte semper viuat, sicut affectus erat pro-  
 fitendo.

Ratio est euidentis siue ex dictis, siue ex ipsa rei perspicuitate,  
 quia professio seu votorum nuncupatio ut sit legitima, debet esse  
 holocaustum: nec aliam affert rationem sanctus Thomas cur Re- <sup>2. 2. q. 186.</sup>  
 ligiosi vel religiosus status appellentur hoc nomine, vel cur hic <sup>4. 1.</sup>  
 status sit perfectionis status, quàm quia religiosi se totaliter man-  
 cipant Diuino seruitio quasi holocaustum Deo offerentes, quod  
 est maxime proprium virtutis Religionis, *Vnde antonomastice no-*  
*men hoc illi datum est statui, in quo sic homo se Deo totum immolat.*  
 Et affert in confirmationem, hæc sancti Gregorij Verba: *Sunt* <sup>Hom. 20.</sup>  
*quidam qui nihil sibi metipsis reseruant, sed sensum, linguam, vitam,* <sup>in Eze-</sup>  
*atque substantiam quam perceperunt, omnipotenti Deo immolant.* <sup>chielem.</sup> Vnde  
 & sanctus Thomas concludit statum esse perfectionis, *Quia, in-*  
*quit, in hoc nominis perfectio consistit, ut totaliter Deo inhaereat.*



At vero quod hic potissimum agitur de holocausto & de professionis similitudine cum hoc genere Sacrificij, ut plene intelligas, adeundus ipse est sanctus Gregorius, ubi supra citatur, qui rem fule prosequitur: *Sciendum vero est, inquit, quia hoc inter Sacrificium atque holocaustum distat, quod omne holocaustum Sacrificium est, sed non omne Sacrificium, holocaustum. In Sacrificio etenim pars pecudis, in holocausto vero totum pecus offerri consueverat. Vnde & holocaustum latina lingua totum incensum dicitur. Pensemus ergo quid est Sacrificium, quid holocaustum. Cum enim quis suum aliquid Deo vouet, & aliquid non vouet, Sacrificium est; cum vero omne quod habet, omne quod viuit, omne quod sapit, omnipotenti Deo vouerit, holocaustum est. Nam sunt quidam qui adhuc mente in hoc mundo retinentur, & tamen ex possessis rebus subsidia egentibus ministrant, oppressos defendere festinant. Isti in bonis quae faciunt, Sacrificium offerunt, quia & aliquid de actione sua Deo immolant, & aliquid sibi metipsis reseruant. Et sunt quidam qui nihil sibi metipsis reseruant, sed sensum, linguam, vitam atque substantiam quam perceperunt, omnipotenti Domino immolant. Quid isti nisi holocaustum offerunt, imo magis holocaustum sunt?*

Quid clarius dici poterat, quid expressius? Poteritne aliquid dubij superesse, aut si nihil positenti restat dubij, quantum ad rei intelligentiam, poteritne restare aliquid, quantum ad eius voluntatem, ut se totum non imolet, nec sit verum holocaustum?

## II. P V N C T V M.

**S**ED nisi professus idem esset ac profitens, quo sensu dictum est, non esset tale holocaustum, vel non tale permaneret: non esset totum oblatum, vel quod oblatum esset, esset sublatum.

Hic est enim duplex sensus quo dictum est, Professus idem sit ac profitens: primo quidem ut profitens dum professionem facit probe intelligat & plene velit se obligare ad acquirendam sui status perfectionem, sicut expresse sanctus ait Bernardus; *Cum vouemus, promittimus operam dare, ut perfectionem vite attingere possimus: à quo conatu qui recedit, voti transgressor reputandus est.*

Deinde vero, ut postquam professus est & quamdiu professus viuit, memor suae professionis sic perfectioni vacet, sic perfecte viuatur, sicut promissit & statuit profitendo, *Qui velle cepistis ab*  
*anno*



anno priore, inquit Apostolus, nunc verò & facto perficite: ut quem admodum promptus est animus voluntatis, ita sit & perficiendi, ex eo quod habetis.

Quæ duo nisi adsint, suo fideliter modo, & tempore, non erit professus idem ac profitens, nec holocaustum erit, aut non permanebit. Non erit certè holocaustum nisi profitens se totum immolet; ac se non totum immolabit, nisi se in totam vitam, in totas actiones, in tota verba, & vno verbo in totum quidquid est, se perfectioni velit dedere & consecrare. In hoc nempe est ratio holocausti, nihil ut velit reseruare, in præparatione, ut vocant, animi. Vnde sunt illa egregia sancti Bernardi iam supra memorata. Age ergo qui relinquere vniuersa disponis, te quoque inter reliquenda numerare memento: Imò verò maxime & principaliter *In illud Ecce nos reliquimus omnia.* abnega te ipsum, si desideras sequi Eum qui exinanivit propter te, se metipsum.

Quod si quidem profitendo se totum immolat, totum se volendo impendere in quidquid perfectum est, ipso autem deinceps tempore quo venit ad rem, quo perfectio requiritur in orando, in conuersando, in officio persoluendo, in omnibus denique religiose peragendis, non nisi negligenter & perfunctorie peragantur; tunc holocaustum aufertur: de toto demitur aliquid, & tantum demitur, quantum de illa perfectione tollitur quam requirebat actio ut religiose fieret. Sic enim holocaustum intelligitur sese ad omnem vitam extendere, ut pars quælibet vitæ sit holocaustum. Quod præclare sanctus Gregorius in eo pergens loco ubi supra relatus est: *Israeliticus*, inquit, *populus primum sacrificium in Aegypto obtulit, secundum vero, id est holocaustum, in eremo.* Qui itaque habet adhuc mentem in saculo, sed boni iam aliquid operatur, Deo sacrificium obtulit in Aegypto; qui vero præsens seculum deserit, & agit bene quæ valet, quasi iam Aegypto derelicta, sacrificium præbet in eremo, quia repulso strepitu desideriorum carnalium, in mentis suæ quiete atque solitudine, Deo immolat quidquid operatur. Vnde & sic concludit: *Majus est Holocaustum Sacrificio, quia mente quæ huius mundi delectatione non premitur, totum in omnipotentis Dei Sacrificio incenditur quod habetur.*

Quod & alibi repetit, explicans illud Apostoli, *Exhibeatis Rom. 12. corpora vestra, hostiam viuentem, sanctam, Deo placentem: HOSTIA* *Hom. ult. in Exech.* quippe occiditur ut offeratur, sed hostia viuens est corpus Domino ap-



882 *In die Professionis, vel quo primum Vota religiosa eduntur.*

*plicitum: quod & hostia dicitur & viuens, quia viuit in virtutibus, & est à vitiis occisum: hostia videlicet quia iam huic mundo est à prauis actibus mortuum: viuens vero quia cuncta quæ præualet bona operatur. Verum à contrario, hæc omnia sancti Patris dicta reuoluamus, si Religiosus non immolat quidquid operatur, si non totum incendit quod habet, si non totus viuit in virtutibus, si non cuncta quæ præualet bona bene operatur. Nonne is tam verè non erit holocaustum, quàm vere tale esse dicebatur, sese totum immolando ad omne opus perfectè peragendum?*

### III. P V N C T V M.

**P**ROFESSVS igitur idem ac profitens: Qualis est profitens, talis sit professus: & qualis debet esse professus, talis sit profitens. Hoc intendat, hoc cogitet, hoc proponat, hoc statuatur, & hoc intelligat idem esse profiteri seu professionem religiosam facere, quod esse diceretur, Hæreticum profiteri religionem Catholicam, nempe vt is sic abjuraret hæresim, nihil vt deinceps erroneum aut alienum à fide vellet; Ita plane Religiosus nihil sæculare, nihil sensuale, nihil mundanum, quod totum profitando sic immolat vt immolatio per totam continuetur vitam, & per singulas vitæ partes, quarum si vel vna desit non immolata, tum simul desit immolatio per holocaustum facta; quia quod immolatur per holocaustum, aut totum imoletur, totum incendatur necesse est, aut non sit holocaustum, sed rapina, sed sacrilegium, sed incentiuum Diuini odij. *Omne, inquit Deus, quod Domino consecratur, siue homo fuerit, siue animal, siue ager, non vendetur, nec redimi poterit. Quidquid semel fuerit consecratum, sanctum sanctorum erit Domino; Id est, maxime & inuiolabiter consecratum: Et omnis consecratio quæ offertur ab homine, non redimetur, sed morte moriatur.* At quæso te quomodo Deus volebat hominem sibi consecratum mori nisi morte illa qua nobis morimur vt viuamus Deo? Sic mortua & sacrificata dicitur à Iephte Patre filia, non morte quam vocant violenta, sed ciuili, sed religiosa separatè viuendo à communi hominum cætu & victu, cùm aliquin dubitetur an licuisset Patri Filiam immolare, nec tam verè dixisset de suo voto sic cruentè adimplendo, quam verè dixit: *Aperi os meum ad Dominum, & aliud facere non poterò.*

*Leuit. 27.*

*Iud. 11.  
Vide ibi  
Estium.*



Hoc est videlicet quod profitens debet profiteri, & ad singulas vitæ actiones reuocare; aperit os suum Domino quando profitetur se religiose velle viuere, & aliud viuendo non potest facere; quia non debet aliud professus facere quam quod profitens statuit.

Anathema dictum est Iericho & cuncta quæ ibi esset supelle-<sup>Iosue 7.</sup>tili, quod miser Achan infringens miserè periit. *Memores estote*<sup>Luc. 12.</sup> *uxoris Loth*, dicebat Dominus, quasi diceret, ne quidem oculi conjiciendi sunt in mundana quæ deferuntur, ne oculum concupiscentia, ne concupiscentiam culpa, & ne culpam pœna sequatur, sicut illa Mulier periit, *Quia retrospexit*, inquit sanctus<sup>Gen. 19.</sup> Ambrosius. *Et statua salis facta est*, ait Diuus Augustinus, *vt admonendo homines ne retrospiciant, & se à spe Diuina promissionis auertant, tanquam condit cor eorum ne sint fatui.*

Vellesne aliquid reseruare pecuniæ? Putaresne votum paupertatis rite factum nisi pecuniam omnem eiurares? At vero *sunt in illud*<sup>Ecce nos relig.</sup> *Loculi non modo pecuniæ*, inquit sanctus Bernardus, *sed propriæ voluntatis*. Consecranda, consecranda est illa voluntas integra, nihil vt ex illa magis supersit quam ex pecunia. Sic vere Sacrificium fiet, sic vere holocaustum, & holocaustum perpetuum, quale est illud Christi Domini qui cum semel tantum se obtulerit, sic tamen perseverat illa oblatio, vt non quotidie tantum renouetur, sed quoties in die Sacrosanctum Missæ Sacrificium celebratur.

O dignitatem religiøsæ professionis quæ profitentem Christo reddit similem, si sui similis profitens sic esse velit vt sit idem semper professus ac profitens! Ô motiuum ita inchoandi nobilissimum, Ô vinculum ita perseverandi strictissimum! Sic incipiamus hodie sicut volumus aliquando mori: vt sic aliquando moriamur sicut incipimus hodie. *Hodie Dominus Deus tuus præcepit tibi vt facias mandata hæc atque iudicia. Et custodias & impleas ex toto corde tuo, & ex tota anima tua. Dominum elegisti hodie, vt sit tibi Deus, & ambules in viis eius, & obedias eius imperio. Et Dominus elegit te hodie, vt sis ei populus peculiaris sicut locutus est tibi. Nonne id ita vis? Nonne id ita semper velle cum Gratia profiteris?*<sup>Dent. 28.</sup>

Vide in 2. parte, Feria 5. Hebdom. 3. in Quadragesima.





## DE VOTO PAUPERE

*Elegi te in camino Paupertatis. Il. 48.*

### VERITAS PRACTICA.

Quò quis Pauperior, eò Ditiior.

**RATIO EST,** Quia quò quis abundat pluribus & melioribus diuitiis, ille est Ditiior.

*Sed quò quis est pauperior, pluribus abundat diuitiis & melioribus.*

*Ergo est Ditiior, Ac proinde ne quid extra puritatem voti paupertatis quæras, quod in ipsa paupertate melius reperiis, si purè votum serues.*

### I. PUNCTVM.

2.2. q. 186.  
a. 6. & 7.



**VM** ex Diuo Thoma, tria Religiosorum vota tribus opponantur Concupiscentiis; Illud commodi consequitur Religiosus, vt per illa vota sanctè obseruata, breui facili-que compendio ad perfectionem Caritatis perueniat: Sed illud semper restat incommodi, vt nisi diligenter aduertat & caueat, Concupiscentia numquam ex toto extincta reuiuiscat interdum, & quæ sua sunt eò quæret auidius quo est repressa strictius. Sic videmus in multis & plangimus, amore bonorum temporalium, Paupertatem Religiosam valde labefactatam; Sic amore voluptatum, Castitatem non parum laxam; Sic denique amore vanitatis & gloriæ, neglectam Obedientiam.

Quamobrem vt his efficacius occurratur malis, ac puritati votorum consulatur, sic formantur hæ Considerationes & Verita-



tes de tribus votis, vt ostendatur ex perfecta votorum obseruatione tantum abesse, vt quid boni vel vtilis, vel delectabilis vel honesti depereat, quin potius eo magis crescat quo vota melius obseruabuntur. Quod vt primo in paupertate pateat, sic habet Veritas modo expendenda: *Quo quis pauperior, eò Ditiior.*

Nempe ille est eo Ditiior quò pluribus abundat & melioribus diuitiis, Sicut ille est Doctior qui meliori est instructus disciplina; Ille est sanior & pulchrior qui plures & nobiliores corporis partes saniores & pulchriores habet: Ille est Sanctior qui veræ Sanctitatis intensiores habitus possidet & frequentiores actus edit. Quid clarius? Sed quid rarius? *Saluum me fac Domine, quoniam defecit Sanctus, quoniam diminuta sunt Veritates à filiis hominum.* Ps. ix.

II. P V N C T V M.

**S**ED quo quis est pauperior, eo abundat pluribus & melioribus diuitiis.

Primo quidem non est dubium quin diuitiæ spirituales & cœlestes sint meliores quàm terrenæ, siue earum dignitatem spectes siue vtilitatem & necessitatem. Nam si de sola Sapientia Sapiens verè dixit, *Diuitias nihil esse duxi in comparatione illius*: quid de illis Gratiarum thesauris quos secum aduexit Christus & nobis largi communicat? Audi sanctum Petrum: *qui vocauit nos propria glória & virtute, per quam maxima & pretiosa nobis promissa donauit, vt per hac efficiamini Diuina consortes nature.* Audi & sanctum Ambrosium: *quid enim est quod conferri possit his de quibus Deus dixit: Et inhabitabo in illis. Quid magnificentius hospite cœlesti? Quid beatius possessione Diuina?* Sap. 7. 2. Pet. i. 2. Sermon. 8. in Ps. 118.

Deinde verò certum est, quò quis fuerit pauperior, id est, quo quis affectu circa res terrenas fuerit religiosiori & plenius mortificato, ille abundabit pluribus donis Spiritualibus, quia erit capacior illis recipiendis: hanc enim solum capacitatem requirit Deus vt se suaque largius impartiat. *Dilata os tuum & implebo illud.* Ps. 80. **AFFER** mihi adhuc vas. **EXIN ANI** vt implearis. **SCIO** tribulationem & paupertatem tuam, ait Dominus, sed diues es. **MELIUS** est parum cum timore Domini, quam thesauri magni & insatiabiles. 4. Reg. 4. S. Aug. Apoc. 2. **EST** homo marcidus abundans paupertate & oculus Dei respexit illum Pr. 25. *in bono, & erexit eum ab humilitate ipsius, & exaltauit caput eius.*



Ecclesi. II.

2. Cor. 8.

Sic magnifice dictum à Psalte Regio : *Parasti in dulcedine tua pauperi Deus*. Et apte huc transferas quod scribit Apostolus de Macedonibus : *Altissima paupertas eorum abundavit in diuitias*, Id est, profundissima & ex imo fundo vacua, ac proinde capacissima & aptissima diuitiis Spiritualibus comparandis & continendis.

Is. 48.

Ibid. 1.

1. Reg. 2.

Ps. 112.

Adde quod illa ipsa dona coelestia licet ex se satis nobilia & pretiosa, sunt tamen in eo nobiliora & pretiosiora quàm est pauperior & minus affectus erga res humanas: Nam sicut aurum purum & defacatum, est nobilius & pretiosius quàm permixtum, ita donum coeleste quando est purum in animo, est pretiosius; est autem eo purius in animo nostro, quò animus est magis liber & purus ab illis terrenis affectibus qui sunt velut scoria & faeces quibus non minus dona coelestia inficiuntur & diminuuntur, quàm aurum & argentum permixtione alterius inferioris metalli. Eapropter *elegite*, inquit Dominus, *in camino paupertatis*; Quod & alibi repetit & declarat apertius: *Excoquam ad purum scoriam tuam, & auferam omne stannum tuum*. Id est, per paupertatem purificabo affectus tuos sicut in camino purificatur aurum. Sic Dominus *pauperem facit & dedit*; & sic *de stercore erigit pauperem, ut collocet eum cum principibus*. Hinc est illud Apocalypsis celebre dictum: *Suadeo tibi emere à me aurum ignitum, probatum, ut locuples fias*. Quis? Et cui suadet? Quomodo? Et quid suadet? Contemplare attentius.

## III. P V N C T V M.

Gen. 41.

Serm. 4. de  
Quadr.

Matth. 19.

Is. 33.

Prov. 13.

2. Cor. 6.

Iac. 2.

Tob. 4.

**Q**UO quis ergo pauperior, eo est Ditior, Cùm diuitiis abundet pluribus & melioribus, vereque possit dicere cum Patriarcha Iosepho: *Crescere me fecit Deus in terra paupertatis meae*. SEMPER *dines est Christiana paupertas*, ait sanctus Leo, *quia plus est quod habet quàm quod non habet*. Nec pauet in isto mundo indigentia laborare, cui donatum est in omnium rerum Domino, omnia possidere. Hoc est videlicet *Centuplum* de quo Christus Dominus: *Hæ sunt diuitia salutaris* de quibus Propheta Isaïas: *Hic est dines cum nihil habeat*, de quo Sapiens: *Hi sunt, nihil habentes & omnia possidentes* de quibus Apostolus: *Hi sunt pauperes quos elegit Deus in hoc mundo, diuites in fide, & heredes regni quod repromisit Deus diligentibus se*, ut ait sanctus Iacobus. *Hi sunt qui cum Tobia debent dicere; Pauperem quidem vitam gerimus, sed multa bona habebimus si timuerimus Deum*.



Et recesserimus ab omni peccato, & fecerimus benè: Et iterum, *Suf- 1b. 5.*  
 ficiebat nobis paupertas nostra ut diuitias computaremus in ea. Hi sunt  
 vel maxime propter quos Christus egenus factus est cum esset dives, *2. Cor. 8.*  
 ut illius inopia diuites essent. Ad quæ Apostoli Verba, scitè sanctus  
 Augustinus; quid factura sunt diuitie eius, cuius paupertas nos diui-  
 tes facit?

Ne vero in aliquod extremorum labaris: aut negligentia in *l. 5. ciuit.*  
 colenda paupertate: aut superbia in perfecto eius cultu, sapien- *c. 18.*  
 ter Idem sanctus Doctor te admonet: Quomodo se audebit extollere  
 de voluntaria paupertate Christianus, ut in huius vite peregrinatione  
 expeditior ambulet viam quæ perducit ad patriam, ubi veræ diuitie  
 ipse Deus est, cum legat L. Valerianum qui in suo defunctus est Consu-  
 latu, usque adeo fuisse pauperem, ut nummis à populo collatis eius se-  
 pultura curaretur: Legat Q. Cincinnatum cum quatuor iugera posside-  
 ret & ea suis manibus coleret, ab aratro esse abductum ut Dictator fie-  
 ret, victisque hostibus, ingentem gloriam consecutum, in eadem pau-  
 pertate mansisse? Et post alia quædam exempla: Hac, inquit, pro-  
 posita sunt necessaria commonitionis exempla, ut si virtutes quarum ista  
 utcumque sunt similes, quas isti pro ciuitatis terrena gloria tenuerunt,  
 pro Dei gloriosissima ciuitate non tenuerimus, pudore pungamur: si te-  
 nuerimus, superbia non extollamur.

Vide in 1. parte, In die Natalis Domini. In 3. parte, Fer. 2.  
 Hebdom. 3. In 4. parte, tota pene Hebdomada 17.



## DE VOTO CASTITATIS.

*Non est census super censum salutis corporis: & non  
 est oblectamentum super cordis gaudium. Ecclesi. 30.*

### VERITAS PRACTICA.

Major est voluptas, voluptatem nolle quam velle:  
 Voluptatem vicisse, quam cæpisse.



**RATIO EST**, *Quia voluptas animi & bonæ Conscientiæ major est quàm voluptas corporis.*

*Sed voluptatem nolle & vicisse, voluptas est animi seu bonæ Conscientiæ: Et voluptatem velle aut capisse, voluptas est corporis.*

*Ergo major est voluptas, voluptatem nolle quàm velle: voluptatem vicisse quàm capisse. Ac proinde cum neutra simul voluptas esse possit, neque tu possis sine alterutra viuere; tam fugienda est voluptas corporis, quàm consecrandum est gaudium bonæ mentis.*

### I. P V N C T V M.

**I**AM in ipso primo Considerationis aditu, propositam Veritatem contemplare. Iam incipe admirari quantum sit Castitatis bonum, quæ cum sit virtus tam honesta tam utilis & necessaria, vt per se patet, simul etiam tam suaui est & tam iucunda vt sit iucundius & delectabilius nolle & vicisse voluptatem oppositam, quàm eam velle & capisse. Quæ certe Veritas attente considerata, multum valere debet ad religiosissimam huius Virtutis custodiam, cum non nisi ex prauo voluptatis affectu violetur. At ecce, major est voluptas si prauum illum affectum represseris, si foedam illam voluptatem nolis & viceris.

Nam vniuersim loquendo, hic est communis eorum omnium qui recte de rebus sentiunt, sensus, hoc humana dictat ratio, nec non ipsa clamat experientia, quod voluptas animi longe major est quàm corporis. Hoc è sacris Authoribus nullus est qui non affirmet; è profanis vero qui scripserunt sanius & sapientius Aristoteles, Plato, Seneca, Tullius, Epictetus & alij, in id ipsum ita conspirant omnes, vt de his scribat sanctus Hieronymus, nihil aliud esse professos suis in Scholis & disciplinis, quàm voluptatem animi præferendam esse voluptati corporis. Sic enim ait contra Iouinianum, Virginitatis aduersarium, Pythagorei frequentiam urbium declinantes in solitudine, & desertis locis habitare consueverunt. Platonici quoque & Stoici in templorum locis & porticibus versabantur.



versabantur, ut admoniti angustioris habitaculi Sanctitate, nihil aliud quam de virtutibus cogitarent. Sed & ipse Plato cum esset dives, & thoros eius Diogenes lutatis pedibus conculcaret, ut posset vacare Philosophia, elegit Academicam villam, ab urbe procul non solum desertam, sed & pestilentem, ut cura & assiduitate morborum, libidinis impetus frangeretur, Discipulique sui nullam aliam sentirent voluptatem, nisi earum rerum quas discerent.

Sanctus vero Thomas qua solet eruditione perspicua, natura-<sup>1. 2. q. 30.</sup> lem hanc affert rationem: Si comparentur, inquit, delectationes in-<sup>4. 5.</sup> telligibiles spirituales, delectationibus sensibilibus corporalibus, sic secundum se & simpliciter loquendo, delectationes spirituales sunt majores: & hoc apparet secundum tria quæ requiruntur ad delectationem; scilicet bonum conjunctum, & id cui conjungitur, & ipsa conjunctio. Nam ipsum bonum spirituale est majus quam corporale bonum, & est magis dilectum, cuius signum est quod homines etiam à maximis corporalibus voluptatibus abstinere ut non perdant honorem qui est bonum intelligibile. Similiter etiam ipsa pars intellectiva est multo nobilior & magis cognoscitiva quam sensitiva. Conjunctio etiam utriusque est magis intima, & magis perfecta, & magis firma. Intimior quidem est quia sensus sistit circa exteriora accidentia rei, Intellectus vero penetrat usque ad rei essentiam, objectum enim intellectus est, quod quid est. Perfectior autem est, quia conjunctioni sensibilis ad sensum adjungitur motus qui est actus imperfectus, unde & delectationes sensibiles non sunt totæ simul, sed in eis aliquid pertransit, & in eis aliquid expectatur consummandum: sed intelligentia sunt absque motu, unde delectationes tales sunt totæ simul. Est etiam firmior, quia delectabilia corporalia sunt corruptibilia, & cito deficiunt: bona vero spiritualia sunt incorruptibilia.

Hæc ad Verbum sanctus Thomas: neque his obstat quod voluptates corporis à pluribus expetantur quam animi; Nam, ut ait Idem sanctus Doctor, magis nota sunt corporales quam spirituales, quia in sensu & in appetitu consistunt ubi vehementius delectatio sentitur. Et sub pretextu quodam necessitatis facilius assumuntur præsertim ab his qui natura corrupta potius quam Rationi & virtuti cedunt quorum major est numerus: Unde fit ut se ineptos spiritualibus deliciis reddant & vix eas norint. Sed si despectis corporalibus sese internis & spiritualibus dederent, tanto magis spirituales corporalibus præstare nossent, quanto animus corpori, & quanto pars nostri nobilior præcellit infimæ.



An tu Ægyptias ollas, pepones, porros, capas, & similia vulgi esculenta delicatiores esse credas cibos, quam coeleste illud Manna quo Hebræi quotidie vesciebantur? Et tamen illos vulgares cibos vehementius appetebant quam suum manna suauissimum, vnde hæc præclare sanctus Gregorius: *Quid per pepones nisi terrena dulcedines? Quid per porros aut cepas exprimitur que plerumque qui comedunt lachrymas emittunt, nisi difficultas vite presentis quæ à dilectoribus suis, & non sine luctu agitur, & tamen cum lachrymis amatur? Manna igitur deferentes cum peponibus ac carnibus porros cepasque quaesierunt, quia videlicet peruersæ mentes dulcia per gratiam quietis dona despiciunt, & pro carnalibus voluptatibus laboriosa huius vite itinera etiam lachrymis plena concupiscunt: contemnunt habere ubi spiritualiter gaudeant, desideranter appetunt ubi & carnaliter gemant: peruerso iudicio perturbata tranquillis, dura lenibus, aspera mitibus, transitoria æternis, suspecta securis anteponunt.*

Denique aut oportet esse desperatos, indolentes, cauteriatæ Conscientiæ, & in eo statu animi constitutos qui est omnium miserrimus, vt alibi est demonstratum: aut si superest bonæ mentis stimulus, illud oportet omnino profiteri, tantum interesse inter voluptatem corporis & animi, quantum inter perturbatam & pacatam Conscientiam. Nam cum voluptas corporis tantisper inordinata non possit capi sine læsa Conscientia, sine læso Numine, sine salutis suæ periculo, sine Gratia detrimento; tantum necesse est perturbetur Conscientia, quantum amat aut timet Deum, quantam de salute sua solitudinem gerit, & quantum Gratia defert. Vnde, quod dixi, aut nihil illis Diuinis mouetur, aut si mouetur, conturbatur: & perturbata quid solatij quid delectationis percipiet? Aut mediocrem certe aut vehementem voluptatem: si mediocrem, an putas conferendam cum illa secura mente quæ est iuge conuiuium, & cum manna illo abscondito quod nemo scit nisi qui accipit? Aut cum illo ligno vitæ quod à Christo gustandum offertur? Quod si vehementem sentis: at nonne tanto magis commoueri debet Conscientia quanto vehementior est voluptas, cum ex illa vehementia crescat peccatum nisi resistat, ex peccato vero crescat Conscientiæ commotio, vel ex resistentia decedat necesse est delectatio? Vnde tandem quid sequitur nisi aut nullam esse Conscientiam, nullam religionem, nullum Dei metum, nullam salutis curam,

In l. parte,  
Hebdom. 3.  
post Epiph.

Prou. 15.  
Apoc. 2.  
Ibid.



*Major est voluptas, voluptatem nolle quàm velle.* 891

nullam æternorum fidem, nullam spem futurorum: aut certe præ animi voluptate, nullam esse voluptatem corporis, quæ sentiri non potest cum religione Conscientiæ, cum Dei metu, cum salutis cura, cum spe ac fide æternorum? Vtrum mauis fateri?

## II. P V N C T V M.

**S**ED voluptatem nolle & vicisse, voluptas est animi seu bonæ mentis & Conscientiæ.

Est enim voluptas aliqua vt fati per se sentitur, non est autem voluptas corporis, cum sit potius eius expugnatio & victoria; quid restat igitur quàm vt sit voluptas animi, & illa requies de qua Dominus: *Et inuenietis requiem animabus vestris, Iugum enim meum suauē est, & onus meum leue?* Nam sicut nihil est aliud iugum illud Christi tollere quàm naturam deprauatam seu corporalem voluptatem subjugare, & Christianæ legi subicere: sic suauitas quæ in illo tollendo iugo percipitur, ipsa est animi voluptas & requies quæ in subjuganda illa corporis voluptate sentitur. *Quàm suauē mihi subito factum est carere suauitatibus nugarum,* inquebat sanctus Augustinus, & *quas amittere metus fuerat, iam dimittere gaudium erat. Ejiciebas enim eas à me, vera tu & summa suauitas: ejiciebas & intrabas pro eis omni voluptate dulcior, sed non carni & sanguini.* Marth. xii. 9. Conf. 1.

Certe pax animi, voluptas quædam est & iucunditas ipsius animi. At vero, vndenam illa pax animi nisi ex repressis & domitis concupiscentiis, seu quod idem est, ex refrænata carnis voluptate quæ militat aduersus animam & pacem eius turbat nisi refranetur? Ac proinde quid clarius quàm refrænasse & vicisse voluptates corporis, voluptas est animi, cum sit pax animi, pax autem animi sit ipsa eius voluptas?

Denique, cuinam promittitur manna illud absconditum de quo ante, nisi vincenti? Cuinam autem vincenti nisi voluptatum corporis? Quid porro est illud manna nisi voluptas animi, vnde tandem quid restat nisi voluptatem nolle & vicisse, ipsam esse animi voluptatem?

## III. P V N C T V M.

**E**ST ergo major voluptas, voluptatem nolle & vicisse, quàm velle & capisse, Cum sit voluptas animi, quæ tanto est major vo-  
Vuuu ij



luptate corporis, quanto non solum animus maior est & præstantior corpore, sed quantum omni creatura Creator est maior, à quo est illa voluptas animi, & contra quem est voluptas corporis.

De bono  
pudic.

Serm. 5. in  
Quadrage.

1. Cor. 6.

Coll. 12. c.  
13.

Exodi 32.  
Cant. 3.  
1. Tim. 5.

Sic expressis Verbis sanctus Cyprianus: *Nihil, inquit, fidelem sic delectat quàm integra immaculati pudoris Conscientia. Voluptatem vicisse, voluptas est maxima, nec ulla est maior victoria quam quæ de cupiditatibus refertur.* Sanctus item Bernardus apte; *Quis vestrum est qui non sepe expertus sit conscientia bonæ delectationem? Qui non gustauerit saporem Castitatis, Humiliatis, Caritatis? Non est hac delectatio potus, neque cibi aut similis cuiuslibet rei: Delectatio tamen est, & maior omnibus illis; Divina enim est & non carnalis delectatio, & cum in his delectamur, plane delectamur in Domino.* Hoc ipsum breuius dixerat sanctus Hieronymus; *quanta felicitas, non uxoris servum esse sed Christi, non carni servire sed spiritui; qui enim adheret Deo, unus spiritus est.*

Sic & alij omnes sancti Patres, quos inter sanctus Ephrem, sermonem integrum de hoc argumento scripsit. Sed recte monet Abbas Cheremon apud Cassianum, *Vix quemquam posse huius virtutis de qua hic agitur, suavitatem sermone exprimere: tamquam, inquit, si quis dulcedinem mellis ei qui numquam quicquam dulce gustauerit, velit sermonibus enarrare. Profecto nec ille saporis illius suavitatem quam numquam ore percepit, auribus capiet: nec ille dulcedinem quam gustus voluptate cognovit, verbis poterit indicare, sed propria tantum agnitione suavitatis illectus, necesse est ut experti saporis incunditatem intra semetipsum solummodo tacitus admiretur.*

Est verò contrà quod mireris in te vel in aliis, quod cum sit tanta voluptas voluptatem vicisse, non vincas semper cum possis, nec ideo vincas quia non satis expugnas, nec ideo satis expugnes, quia plus voluptatis sentias non expugnando quam pugando. O te miserum si non hinc sentis tuam miseriam! Pugna, expugna, nec desiste nisi vincas cum gratia. *Ponat vir gladium super femur suum. VNIVSCVIVSQUE ensis super femur suum. TE IPSVM castum custodi.*

Vide in 1. parte, Feria 6. Hebdom. 4. in Aduentu. Et in 2. parte, Feria 2. Hebdom. 5.



*Quàm gloriosa est similitudo Christi, tam gloriosa est obedientia. 893*



## DE VOTO OBEDIENTIÆ.

*Quos præsciuit & prædestinavit conformes fieri imaginis filij sui, ut sit ipse Primogenitus in multis fratribus. Rom. 8.*

### VERITAS PRACTICA.

*Quàm gloriosa est similitudo Christi, tam gloriosa est Obedientia.*

*RATIO EST EVIDENS, Si nullâ re propius ad similitudinem Christi acceditur quàm Obedientia. Quam id Vero sit Verum.*

*Ratio est, quia illa re propius acceditur ad similitudinem Christi quæ est in Eo eminentior & nobis maxime propria.*

*Sed nulla res est quæ sit in Christo eminentior, & nobis magis propria quàm obedientia.*

*Ergo nulla re propius ad eius similitudinem acceditur quàm illa ipsa obedientia; Proindeque quàm gloriosa est similitudo Christi, tam gloriosa est obedientia quæ hanc singulariter contrahit similitudinem.*

### I. PUNCTVM.

**C**VM in paruis & abjectis rebus sita sit plerumque Religiosi obedientia, & inde ex superbia seu ex vano amore gloriæ, difficultates nascantur, discat hodie Religiosus nihil esse gloriosius quàm obedire, etiam in illis paruis & abjectis rebus, quia sic propius ad similitudinem Christi accedet, quàm similitudine



nihil cuiquam mortalium potest esse gloriosius, nihil beatius, nihil tutius aut securius ad futuram beatitudinem, cum prædestinati designentur hoc potissimum charactere, vt sint conformes *Imagini filij Dei.*

Ratio autem huius propositæ Veritatis hæc est, quòd nullo signo propius & verius vniuersim acceditur ad similitudinem personæ alicuius, aut particulatim ad Imaginem Christi, quàm re illa quæ est in eo eminentior, & quæ est nobis maximè propria. Quod vt melius intelligatur, aduerte in subjectis heterogeneis cuiuscumque generis & speciei, & maximè in personis quæ ex diuersis qualitatibus & perfectionibus componuntur, alias aliis esse eminentiores, & singulari quadam ratione ac differentia, quam vocant indiuidua, proprias & veluti particulares, in quibus eminent & excellunt; Nam sicut vniuscuiusque est rei natura, ita est vna quadam perfectio inter alias per quam in se particulatim constituitur & ab aliis differt. Sic palma præcipuè commendatur sua firmitate, sic Leo sua generositate, Sol suo lumine, & homo vniuersim Ratione ac Iudicio: in particulari autem, tali gradu iudicij, Sapientiæ vel Doctrinæ.

Atque hinc fit, vt si similitudinem alicuius hominis cum aliis creaturis, aut alicuius creaturæ cum homine velis instituire, non alia sit aptior & conuenientior quàm circa illud quod est eminentius in objecto cuius similitudinem vis exhibere. Quapropter non quemlibet hominem comparabis cum palma aut cum leone, sed fortem & constantem, quia id magis eminet in palma & leone. Non quoduis magnum & velox corpus compones cum lucidissimo sole, sed illud duntaxat quod est splendidum & luminosum, quia in hoc præcipuè Sol excellit & eminet. Sic non comparabis omne animal quod habet pedes cum homine, sed illud quod habet faciem hominis, quanta quidem in bellua potest esse humana facies, quia facies in homine pars est eminentior, aut si quod animal propius accedat ad Rationem, tum vero illud est homini magis simile quia Ratio est in qua maximè viuít & commendatur omnis homo.

Sic proportionatè de Christo Domíno, cum multa in eo sint, & omnia quidem eximia & sublimia, dici tamen potest vnum esse aliquid suo quodam modo eminentius, & nobis magis proprium & propositum ad imitandum, ad quod qui propius accesserit, is



*Quàm gloriosa est similitudo Christi, tam gloriosa est obedientia. 895*

Illi erit similitudine & repræsentatione propior. Sicut ex antiquis Patribus cum penè omnes illum in aliquo repræsentarent; *Nullus enim iustus fuit*, vt ait sanctus Gregorius, *qui non eius per figuram nuncius extiterit*: Alij tamen aliis eò nobilius & expressius illum figurabant quo magis accedebant ad id quod erat magis proprium Christo Saluatori, vt Abraham & Isaac in suo sacrificio: Ioseph, Moyses & Iosue in salute populis data: Proindeque nos etiam eò propius ad eum accedemus, quò rem seu virtutem quæ est in eo singularis siue præcipua, quæue nobis præcipuè conueniat, imitatione referemus. Nam affectare aliam quæ non esset conueniens, hoc crimen primi est Angeli, primique hominis quod à nobis Deus auertat. *Dominum Deum vestrum sequimini: & ipsum time*, Id est, *Deum. 1. p.* videte quomodo Eum, & quo vsque sequamini.

## II. P V N C T V M.

**S**ED nulla res est quæ sit eminentior in Christo, & nobis Religiosis magis propria, quam Obedientia.

Id quidem mirum videri posset. Primò quidem quia omnes virtutes Christus habuit in pari gradu: & vbi est paritas, nulla est eminentia, nisi quod virtus vna in se excellat aliis, qualis est inter omnes, Charitas potius quam Obedientia. Deinde si quas à nobis præsertim virtutes exigit, videntur esse potissimum Humilitas, & Mansuetudo, ad quas diserte & expresse nos inuitauit dicens. *Discite à me quia mitis sum & humilis corde.* *Matth. 23.*

His tamen non obstantibus vere dicitur Obedientia in Eo eminuisse, quòd fuerit forma quadam & motiuum illud quod dicitur formale aliarum omnium omnino virtutum & actionum quas operatus est viuens & moriens. Nam si fuit humilis, si mansuetus, si patiens, ita fuit ex obedientia: humilitas seu objectum humile in quo humiliabatur & patiebatur, erat velut materia in qua exercebat obedientiam & in qua nos vult eam exercere. Non humiliabatur nec patiebatur nisi vt obediret: & in hac materia sic obediebat quia est difficilior & melius indicat animum obedientem: Vnde Obedientia erat forma & motiuum humilitatis patientiæ & aliarum virtutum; ac proinde tanto excellentius eminebat præ cæteris virtutibus, quanto præstat Forma materia.

De Charitate autem quia debet esse ordinata, sic per obedien-



tiam ordinabatur vt diligeret obediendo & obediret diligendo. Sic expresse sanctus Thomas, eadem ratione, inquit, passus est ex  
 3. p. 9. 47. Charitate & Obedientia, quia & precepta Caritatis ex Obedientia im-  
 4. 2. plevit, & obediens fuit ex dilectione ad precipientem. Sic ipse Domi-  
 10an. 14. nus vtrumque simul iungens, vt cognoscat mundus, inquit, quia di-  
 ligo Patrem, & sicut mandatum dedit mihi Pater, sic facio: Surgite, ea-  
 mus hinc. Quod quàm esset convenientissimum vt sic obediret, Respectu Patris, respectu nostri & respectu Dæmonis, fusius ibidem  
 Rom. 5. prosequitur sanctus Thomas. Breuius autem Apostolus: Sicut per  
 Inobedientiam vnius hominis peccatores constituti sunt multi: ita &  
 Phil. 2. per Vnius Obedientiam iusti constituuntur multi. Et rursum: Humilianit  
 semetipsum factus obediens vsque ad mortem, mortem autem Crucis. Vbi adhuc sanctus Thomas egregie: Si fuisset passus non ex obedi-  
 entia, non fuisset ita commendabilis, quia obedientia dat meritum Passio-  
 nibus nostris. Sed quomodo factus est obediens? Non voluntate Diuina quia ipsa est regula, sed voluntate humana qua regulata est in omnibus  
 secundum voluntatem Paternam: Verumtamen non sicut ego volo, sed si-  
 cut Tu. Et conuenienter introducit in passione obedientiam, quia prima  
 prænarratio est facta per inobedientiam.

Neque vero id tantummodò verum est de eius Passione & Mor-  
 te, sed de Natiuitate, de Circumcisione, & de singulis quibusque  
 vitæ partibus ab ipso primo vitæ ortu ad extremum vsque Spiri-  
 tum, Vnde Apostolus ex Psalte Regio, Ideo ingrediens mundum  
 Ps. 39. dicit: hostiam & oblationem noluisti, corpus autem aptasti mihi. Ho-  
 10abr. 10. locautomata pro peccato non tibi placuerunt. Tunc dixi, Ecce venio. In  
 capite libri scriptum est de me, vt faciam Deus voluntatem tuam. Deus  
 meus volui, & legem tuam in medio cordis mei. Quod sæpissime Chri-  
 10an. 6. stus Dominus repetiit: Descendi de cælo, non vt faciam voluntatem  
 10abr. 8. meam, sed voluntatem eius qui misit me. A M E ipso facio nihil, sed  
 10abr. 12. sicut docuit me Pater, hæc loquor. EGO ex meipso non sum locutus,  
 sed qui misit me Pater, ipse mihi mandatum dedit quid dicam & quid  
 loquar. Et scio quia mandatum eius vita æterna est. Quæ ergo ego lo-  
 quor, sicut dixit mihi Pater, sic loquor. Nonne hoc est obediens  
 esse? Nonne hoc est insignem & eminentem in obediendo præ-  
 fertim esse? Nonne hoc est Obedientiam præ cæteris commenda-  
 re virtutibus?

Quàm sit vero hæc virtus Religiosis maxime propria tam aperte  
 constet, quàm patet euidenter illis virtutes esse proprias, & eas  
 maxime



*Quàm gloriosa est similitudo Christi, tam gloriosa est obedientia. 897*

maxime quæ votis continentur. *Sola autem obedientia virtus est*, ait *1. 35. 2<sup>o</sup> cor.* sanctus Gregorius, *quæ virtutes ceteras menti inserit, insertasque curat*. *10.*  
*stodit. SOLVM obedientia votum est*, inquit sanctus Thomas, *2. 2. q. 186. 4. 8.*  
*quod alia omnia religiosa contineat, quod unum sufficit ad religiosum statum constituendum, & sine quo nullus nec status, nec religiosus esse potest.* Potestne aliquid magis esse proprium quam quod est ita necessarium & excellens?

### III. P V N C T V M.

**N**ULLA re igitur propius ad similitudinem Christi acceditur quam obedientia, Cum sit illa virtus quæ est eminentior in eius vita & morte, quamque nos imitari magis expediat & necesse sit, si religiose volumus vivere: *Animas vestras castificantes in obedientia Charitatis*, ait sanctus Petrus, ut sicut ex Charitate debet procedere obedientia, ita ex obedientia Charitas exerceatur; & quidquid sit, hoc animo fiat, quia sic Deus mandat, sic Deo gratum est, *Ita Pater quoniam sic fuit placitum ante te*; Ex quo quidem Diuino Diuini Patris placito, quidquid tandem fiat, quantumcumque sit modicum & exile, mirum in modum nobilitatur & dignitate & merito. Sed ex Christi similitudine nobilitas illa & dignitas actionis siue obedientiæ religiosæ tantum crescit, ut nihil sit Deo gratius. Quod enim grati sumus Deo, nostris in operibus, id provenit à Christo Filio in quo sibi bene complacet & propter quem ipsi placent quicumque placent, unde fit ut qui sunt magis conformes & similes Filio, magis ipsi placeant propter Eum quem magis repræsentant: Et cum præsertim nos Filio similes efficiat Obedientia, quis non videt nos inde etiam fore Patri gratiores; & id fore nobilius ac excellentius quidquid obediens gesserimus? Nam si ipse Filius iudicauit nulla re Patri se futurum gratiorem quam obedientia, quanto id magis de nobis iudicandum est, cum præsertim sic Filius Patri obediens fuerit, ut suo nos exemplo sic efformaret, doceretque facto & verbo sic jungendam simul Charitatem & Obedientiam. *Manete*, inquit, *in dilectione mea. Si præcepta mea seruaueritis, manebitis in dilectione mea, sicut & ego Patris mei præcepta seruavi, & maneo in eius dilectione.* *1<sup>o</sup> cor. 13.*

O quale est illud sicut, quàm perfectum in Christo; quàm mancum & imperfectum in nobis! Expende acurate, nam hoc est.



Hebr. 13.

exemplar nostrae obedientiae, sicut ille integre; sicut in omnibus; sicut semper & ubique: sicut in abiectionis & vilibus; sicut ex corde magno & animo volenti, sic nos *obediamus Praepositis nostris, & subjaceamus eis*. Sic Christus obediebat Patri, obediendo Caesari, Pilato & aliis Satanæ ministris, quibus eum Pater subiectum voluit. Et tu detrectare audebis obedientiam tuis Praepositis tibi à Christo sapientissime constitutis! Multa certe sunt quae te Inobedientem arguant & accusent: Sed nihil capitalius quam quo fingis te excusatum, nempe in asperis & abiectionis, cum minus rationabiliter videntur imperata. Nam in his praecipue Christus obediendo eminebat, & nihil est excellentius, nihil sublimius, nihil optabilius quam illud exercere in quo eminebat, cum in eo potissimum sit posita similitudo Christi: aut si quid humanum putas excellentius, vide quid putes, vide quid cogites, nempe esse aliquid Christo sublimius, esse aliquid supra Christum, esse aliquid quod sit dignius quam esse Christo similem. Velle ne id sentire?

Vide in 2. parte, Fer. 4. Cinerum, Sabbato Hebd. 4. post Pascha. Et Fer. 4. infra Octau. Ascensionis.



## DE RENOVATIONE

### V O T O R V M.

AC PRIMVM DE TRIDVANA RECOLLECTIONE  
QVAE RENOVATIONEM ANTECEDIT.

*Arborem fici Quidam habebat plantatam in vinea sua, & venit quarens fructum in illa, & non inuenit. Dixit autem ad Cultorem vineae: Ecce anni tres sunt ex quo venio quarens fructum in ficulnea hac, & non inuenio: Succide ergo illam, ut quid etiam terram occupat? At ille respondens dicit illi: Domine, dimitte illam & hoc*



Religiosus infra vel supra regulam suam uiuens, &c. 899  
anno usque dum fodiam circa illam, & mittam  
stercora, & si quidem fecerit fructum: sin au-  
tem in futurum succides eam. Luc. 13.

EX hac Parabola desumitur Materia Considerationum totius  
Tridui, in hunc finem, ut agnoscat Religiosus se vocatum in Reli-  
gionem ut fructum ferat suæ conformem vocationi, se propterea  
interdum visitari à Domino qui debitum repetat fructum, quem  
nisi Religiosus reddat, periclitetur de sua vocatione & salute.

Quæ tria spectant tres differentias temporis, præteritum, præ-  
sens & futurum, in quibus ordinandis tota consistit perfectio ut  
ait sanctus Bernardus ad illa Moysi verba, *Vtinam saperent & intel-* Serm 2. de  
*ligerent, ac nouissima præuiderent. In quibus utique verbis, inquit, tria* Apost. Pe-  
*video nobis commendari, sapientiam, intelligentiam, prouidentiam.* tro & Paul.  
*Arbitror sane tribus ea assignari posse temporibus, ut aternitatis quadam*  
*imago reformari videatur in nobis, presentia moderantibus per sapien-*  
*tiam, præterita per intelligentiam dijudicantibus, nouissima prouiden-*  
*tibus ad cautelam. Hac nempe spiritualis est exercitiij summa, hac for-*  
*ma studij spiritualis, ut sapienter disponamus presentia nostra, recogni-*  
*temus in amaritudine anime nostra præterita, futura quoque sollicitè*  
*prouideamus. Sobrie & iuste & pie uiuamus in hoc seculo, ait Apostolus,*  
*ut uidelicet in presenti sobrietas obseruetur: ut iusta satisfactione præ-*  
*terita quæ nobis sine fructu salutis præteriere tempora, redimantur; ut*  
*pietatis clypeum imminentibus de futuro periculis opponamus.*

## PRIMODIE.

### DE FINE VOCATIONIS RELIGIOSÆ

QUI EST FRUCTVS VOCATIONI

CONFORMIS.

*Arborem fici habebat Quidam plantatam in vinea*  
*sua. Luc. 13.*

Xxxxx ij



VERITAS PRACTICA.

Religiosus infra vel supra regulam suam viuens, Ficus est ficum non ferens.

RATIO EST, Quia ficus ficum non ferens, est religiosus non offerens fructum conformem suæ Vocationi.

Sed quisquis infra vel supra regulam suam viuit, non affert fructum conformem suæ Vocationi.

Ergo religiosus sic infra vel supra regulam suam viuens, ficus est ficum non ferens. Quod certe est diligenter expendendum.

I. PUNCTVM.

1. Cor. 1.  
Ephes. 1.

**B**ENEDICTVS Deus & Pater Domini nostri IESV Christi per quem vocati estis in societatem filij eius. QUI benedixit vos in omni benedictione spiritali in cælestibus in Christo, sicut elegit nos in ipso ante mundi constitutionem, ut essemus sancti & immaculati in conspectu eius in Charitate.

Dan. 3.

Serm. de  
Ingrat.

Hæc & similia quilibet Religiosus dicat de Beneficio suæ vocationis: Benedicite omnes Religiosi Domino Deo Deorum, laudate & confitemini ei, quia in omnia sæcula misericordia eius. MAGNA est super nos, inquit sanctus Bernardus, magna valde misericordia Dei nostri, quos tam ineffabili spiritus sui virtute, tam inestimabili dono gratiæ suæ, eripuit à vana nostra conuersatione huius sæculi, in quo eramus aliquando sine Deo, aut certe quod execrabilius est contra Deum, non ignorantiam habentes, sed contemptum. Et quæ plura fusiùs habet.

Ps. 114.

Breuius vero Psalmista Regius vno aut altero versiculo: Convertere anima mea in requiem tuam, quia Dominus benefecit tibi. Quia eripuit animam meam à morte, oculos meos à lachrymis, pedes meos à lapsu. Nempe à tribus grauissimis mundi malis, à morte peccati, à lachrymis miseriarum, & à lapsu occasionum peccandi. Tum quod sequitur: Placebo Domino in regione viuorum, tria opposita bona Religiosi complectitur: Primum quidem quod hoc vnum habeat agendum, Placere Deo. Deinde vero quod sit in socie-



tate eorum quibus in idipsum adiuuetur. Ac denique futurus sit aliquando cum illis qui semper uiuant & placeant Deo.

Atque hæc quidem insignia sunt Religiosi status beneficia, sed tamen hac condicione tibi collata, vt collabores Gratiaë vocationis & fructum feras illi conformem, tete continendo intra eius fines, perinde atque arbor fert fructum iuxta genus suum: vt expresse nobis proponit Dominus in illa Parabola, vnde est eruta Veritas modo attentius expendenda; *Quod Religiosus infra vel supra regulam viuens, ficus est ficum non ferens.*

Ratio est facilis quoad vtramque partem. Primo enim licet sanctus Hieronymus, & quidam alij per ficum infructuosam & succidendam intelligant populum Iudaicum, siue Synagogam, aut ipsam ciuitatem Ierusalem euertendam; tamen communis est aliorum Interpretum sensus, designari etiam vnumquemque eorum qui singulari quadam gratia vocatus sit ad certum quoddam vitæ genus vbi Deo seruiat, sibi & proximo vacet impensius. Arbor enim plantata in vinea, vineæ Cultori commendata, & tam sæpe ac sollicitè à Domino suo visitata, significat non vulgarem aliquam Personam, sed selectam, Dilectam, & singulariter charam, qualis est Ecclesiasticus, Religiosus, aut si quis alius in sæculo ad perfectiorem quendam vocatus statum. Habet hoc etiam particulare ficus, vt bis in anno ferat fructus, quo Symbolo præsertim hi denotantur, qui ad ferendos spirituales fructus tam sibi quam proximis aptum & fœcundum vitæ genus colunt.

Verum quod præcipua consideratione dignum est, sicut arbor ficus non pyra, non poma, non cerasa, sed ficum affert, sic vnaqueque Vocatio seu status vocationis in quo quisque viuit Religiosus, certum quendam & proprium continet perfectionis gradum quo penè ab alijs statibus distinguitur, sicut ficus à ceraso. Alia est perfectio seu alius est perfectionis gradus Carthusiani, alius Franciscani, & alius Iesuitæ. *In domo Patris mei, mansiones multe sunt,* Ioan. 14. ait Dominus; Et sicut stella differt à stella in claritate, sic varia *1. Cor. 15.* sunt & diuersa non modo statuum sed sanctorum merita. *Nam* *Ibid.* *vnusquisque proprium donum habet ex Deo. Alius quidem sic, alius vero sic:* vt sæpe dictum est ex Apostolo. Quæ si de singulis personis quoquo modo dici possunt, multo tamen magis de statibus & religiosis institutis intelligenda sunt, in quibus est certa voca-



902 Die prima triduana recollectionis. De fine vocationis religiosæ.

tionis gratia quæ est differentia quædam indiuiduans, quâ, vt dixi, ab aliis distinguitur, quam omnes illius instituti professores singulariter participant, & cuius ductu ac spiritu moueri debent, sicut rotæ illæ in rotis, apud Ezechielem, in quibus erat spiritus vitæ.

Ezech. 1.

Atque hinc fit vt quod est in prima propositione, Religiosus non ferens fructum conformem suæ vocationi, seu non viuens conformiter suo statui, sit velut ficus sine ficu. Quantumvis enim mira & sublimia ederet, si non sunt conformia suæ personæ suouæ statui, aut à suis superioribus non approbata, non sunt fructus, sed folia. *Quis quesuit hæc de manibus vestris? NON*

Is. 1.

2. Par. 26. *est tui officij Ozia, vt adoleas incensum Domino. Sed Sacerdotum qui consecrati sunt ad huiusmodi ministerium: egredere de sanctuario, ne contempseris, quia non reputabitur tibi in gloriam hoc à Domino Deo.*

1. Reg. 13.

*Statimque orta est lepra in fronte eius.* Sic Saul offerens holocaustum quantacumque se necessitate compulsus diceret, vt placaret faciem Domini, hoc à Samuele audiit: *Stulte egisti, nec custodisti mandata Domini Dei tui, nequaquam regnum tuum ultra consurget: quesuit Dominus sibi virum iuxta cor suum.* Hoc est scilicet esse iuxta cor Dei, quando quis conformiter suo statui viuit: quia sic se conformat Diuinæ voluntati quæ in tali statu declaratur.

1. Cor. 15.

*Vnusquisque in suo ordine.*

II. P V N C T V M.

**S**ED quisquis infra vel supra regulam suam viuit, non affert fructum conformem suo statui.

Id est, qui minus quàm debet, aut supra quàm licet, ex regula seu ex ordinatione & mente Superiorum aggreditur, is non viuit conformiter suæ vocationi; quod quidem satis patet in eo qui minus quam potest & quàm debet, facit: minus est habens, seu numero seu merito; seu quantitate seu qualitate fructus. De alio vero qui supra quam licet, ex regula seu mente superiorum quidquid agit, non est minus certum, cum non minus peccari possit per excessum quam per defectum. *Ne declines ad dexteram neque ad sinistram: auerte pedem tuum à malo: vias enim quæ à dextris sunt nouit Dominus.* Id est, Ipse scit quid sit nobis faciendum, & declarat vnicuique per suas regulas aut superiores: quantumcumque dextrâ suâ bonâ intentione quisquis sibi videatur agere

Prov. 4.



quod ex propria voluntate facit, non est propterea tutus & securus, nouit Dominus quid sit dextrum aut sinistrum in nobis: Et ne quis in hoc erret, sibi non debet soli fidere. *Prudentia tua* Prov. 23.  
*pone modum. Noli esse iustus multum, neque plus sapias quam necesse* Eccle. 7.  
*est, ne forte obstupeſcas, Id est, ne forte tibi potius obſis quam pro-*  
*ſis. Si à recta via paululum declinaueris, ait sanctus Hieronymus,* In Isaiam.  
*non interest utrum ad dexteram vadas, an sinistram: cum verum iter* l. 14. c. 52.  
*amiseris.* Serm. 19. &  
 71. in Cant.

Multus est sanctus Bernardus in hoc argumento qui supra relatus videri potest. Aptè vero sanctus Gregorius Nazianzenus: *Virtutem excessus & defectus peræque labefactant, non secus ac regulam* Orat. 26.  
*additio aliqua vel subtractio. Nemo igitur Sapientior sit quam conueniat, nec lege exactior, nec luce splendidior, nec norma rectior, nec*  
*præcepto Dei sublimior: Quasi diceret, non minus peccat qui supra*  
*regulam quam qui infra viuit, quia non minus peccat in regu-*  
*lam quæ perinde excessu offenditur ac defectu. Quod si zelo fru-*  
*ctus faciendi mouetur is qui excessu peccat, non est fructus vo-*  
*candus, qui non est conformis statui, nec est conformis statui, qui*  
*status leges excedit & regulas.*

O quam præclare dictum & factum; *Ordinauit in me Chari-* Cant. 2.  
*tatem!*

### III. P V N C T V M.

**R**ELIGIOSVS igitur infra vel supra regulam viuens, Ficus est  
*ficum non ferens, Quia non fert fructum conuenientem suo*  
*statui, cui non potest conuenire, quod disconuenit legi & regulæ*  
*à qua potissimum habet vt sit certus status & distinctus ab aliis.*  
*Quantumcumque se moueat aut se agitet & tribulet Religiosus,*  
*nihil agit si supra quam licet agit. Numquid de tributis ficus?* Matth. 7.  
*Numquid ex præsumptione virtus? Numquid præsumit qui su-*  
*pra quam licet, licere sibi arrogat? Hoc est sæculi vitium seu sæ-*  
*cularium error, qui se regi non sinunt, vt semper infra aut su-*  
*prà quàm debent audeant: à quo errore Apostolus nos reuo-*  
*cans, Nolite, inquit, conformari huic sæculo, sed reformamini in no-* Rom. 12.  
*uitate sensus vestri, vt probetis quæ sit voluntas Dei bona, & benepla-*  
*cens, & perfectæ. Dico enim vobis per gratiam quæ data est mihi, om-*  
*nibus qui sunt inter vos, non plus sapere quam oportet sapere, sed sc-*



*pere ad sobrietatem, & unicuique sicut Deus dimisit mensuram fidei. Sicut enim in uno corpore multa membra habemus, omnia autem membra non eundem actum habent, ita multi unum corpus sumus in Christo.*

Alia hæc est similitudo valde apta confirmandæ Veritati & quam sancti Patres multis illustrent; sed modo ea sufficiat quæ de arbore fici nobis proponitur, cuius hoc est etiam proprium & præ cæteris arboribus singulare, ut cum verum suum fructum non profert, duplex aliquod genus apparentis producat fructus, nempe immaturum, exile, quos vocant inchoatos grossos, qui sunt flores potius quam fructus: aliud vero est quod in altitudinem se extendit & quæ ficus celsa seu fatua dicitur, id est, inanis & vacua. Quo duplici fructus apparentis genere, quam aperte designentur illi qui vel infra vel supra regulam viuunt, quis non videt?

Denique nec omittendum, quod illi apparentes fructus aut quæcumque sint ficus nisi sint bonæ, valde malas esse, nec esse fructum suauiore quando bonus est, nec insuauiore quando est malus. Quod apte illos etiam significat qui Religiosum amplectuntur institutum; sicut ex iis boni sunt qui se suis continent regulis, & legibus, & valde boni sunt: ita qui supra vel infra regulas viuunt, mali sunt, & valde mali. Quod ostensum sibi à Domino Ieremias expresse refert: *Ostendit mihi Dominus, & ecce duo calathi pleni ficis, positi ante templum Domini. Calathus unus ficus bonas habebat nimis, ut solent ficus esse primi temporis: & calathus unus ficus habebat malas nimis, quæ comedi non poterant, eo quod essent mala. Et dixit Dominus ad me: Quid tu vides Ieremia? Et dixi, ficus, ficus bonas, bonas valde: & malas, malas valde, quæ comedi non possunt eò quod sint mala. Tum personis adaptat similitudinem.*

Ex utris vero te putas esse? Agnosces ex vocatione qua vocatus es: agnosces ex ministerio quod in illa geris: agnosces ex regulis quas ad illud recte gerendum habes: Hinc tota res pendet: *Hac meditare, in his esto, insta in illis. Vide in 3. parte, Dominica 7.*



*Quod te imparatum magis reddit ad reddendum fructum, &c. 905*



SECUNDA DIE.  
DE FRUCTU VOCATIONIS  
QUEM AB VNOQVOQUE REPETIT  
DOMINVS.

*Et venit quarens fructum in illa, & non inuenit.*  
Luc. 13.

VERITAS PRACTICA.


*Quod te imparatum magis reddit ad reddendum fructum, hoc te paratiorem deberet reddere.*

RATIO EST, *Quia quod te imparatum magis reddit, est incertitudo exigendi & reddendi fructus.*

*Sed ex illa incertitudine paratior esse deberes.*

*Ergo quod te imparatum magis reddit ad reddendum fructum, hoc est quod te paratiorem deberet reddere.*

I. PUNCTVM.

VAM cara Domino esset illa Ficus plantata in vinea, satis ipse indicat singulari cura quam præ se fert visitanda interdum arboris, & exigendi ab ea fructus. Sic suos Christus Dominus, sic quos singulariter fecit suos, singulariter etiam curat, inuisit, fouet, arguit, & quem ab eis expectat fructum suo tempore repetit. *Etenim Dominus dabit benignitatem, & terra nostra dabit fructum suum.* Ps. 84. Quanti erant in mundo admonendi, reuocandi, conuertendi, cum Dominus illos septem Viros præcipua quadam sollicitudine admonet quibus in Apocalypsi parti- Apoc. 1. 3.



culatim & diuersis dicit modis : Scio opera tua, & laborem & patientiam, sed habeo aduersum te quod arguam, Esto vigilans. Si non vigilaueris, veniam ad te tamquam fur, & nescies qua hora veniam ad te.

O vere admirandam in suos Christi curam ! ô vere arguendam, si quæ sit, horum incuriam ! Quid responderes Christo si iam à te fructum exigeret tuæ vocationis, tui ministerij, tui talenti ? Habesne parata quæ debes reddere ? An clamabis inducias, dilationem, & longiora tempora ? Sed quousque tandem ? Vide quid te imperatum reddat ad reddendum debitum fructum. Forte illud, quod te paratiorem deberet reddere. Considera vehementer exproposita Veritate, & Primum illud quo declaratur Veritas admirare, quàm verum & quam certum sit illud vnum quod te imparatum magis reddit, esse *Incertitudinem temporis* quo venit Dominus exacturus rationem tuæ vocationis & repetendi à te fructus. Quid enim aliud te retardaret ? Non ignoras quis sit ille fructus reddendus ? Aut si forte ignoras, non excusaris, nam debes & potes scire. An ignoras quod benignitas Dei te adducit ad poenitentiam tuæ superbix, tuæ vanitatis, & loquacitatis ? Atque ex consequenti ad particulare studium humilitatis, caritatis, patientiæ, contemptus tui, puræque Deo placendi voluntatis ? Nonne id certo certius habes quod te humilem, mansuetum, & obedientem in eo perfectionis gradu quem meretur tua vocatio, Christus Dominus expetit, exigit, & modis omnibus promouet ?

Nec te latere potest quàm sit sollicitus, quàm iustus & fidelis siue in remuneranda virtute, siue in puniendo vitio. Quanti denique referat in vtramque partem aut paratum aut imparatum esse ad debitum reddendum fructum, nimis aperte patet. Quid ergo restat quod te imparatum efficiat nisi hac incertitudo temporis, hæc incertæ mentis suspensio de hora & de modo quo exigit ? Nam si tibi certo persuaderes certum aliquod & definitum tempus quo res sine mora esset transigenda, nonne tibi prospiceres ? Nonne si audires à Domino, *Stulte, hac nocte animam tuam repetunt à te*, magis paratus esses ad proximam noctem quàm forte vniquam paratus sis, quia tibi hoc dictum non cogitas ? Sic differente Domino reditum, *capit seruus percutere conseruos suos, manducare & bibere cum ebriosis*. Sic moram faciente sponso domitauerunt virgines & dormierunt. At vā imparatis, vā lampadibus non accensis, vā quibus dictum est : *Clausæ est ianua, nescio vos. Nescio vnde sitis.*

Luc. 12.

Matth. 24.  
Ibid. 15.



II. P V N C T V M.

**N**EMPE illa ipsa est incertitudo temporis quo fructus est exigendus quæ nos paratiores deberet reddere.

Idcirco enim incertum est tempus, vt omni simus parati tempore: Idcirco enim quoscunque Dominus de hoc præparatione sermones habuit, tam apertis eos explanauit Parabolis quæ hanc præparationem exigent vt nihil sit in humanis rebus planius, nihil familiarius, nihil euidentius. Nihil porro frequentius repetitum & inculcatum quam quod ex illis Parabolis infert, *Et vos estote parati, quia qua hora non putatis, filius hominis veniet. De die illa, vel hora, nemo scit. Videte, vigilate & orate, nescitis enim quando tempus sit. Vigilate ergo, nescitis enim quando Dominus domus veniat: serò, an media nocte, an galli cantu, an mane; ne cum venerit repente, inueniat vos dormientes. Quod autem vobis dico, omnibus dico, vigilate. PARATOS igitur esse nos conuenit, inquit sanctus Hilarius, quia diei ignoratio intentam sollicitudinem suspensæ expectationis exagitat.* Luc. 12.  
Marc. 13.  
Comm. 2.  
Matth. 26.

Nec refert quod de morte & de iudicio particulari videantur illa potissimum intelligi. Nam eadem planè est ratio temporis quo paratum esse oportet, ad reddendum fructum, siue in morte, siue in vita, siue in morbo, siue in sanitate: quia tota ratio est quod tunc oporteat esse paratum quando exigitur: Vnde si hac in vita & in sanitate exigitur, tum oportet ita esse paratum ac si in morbo vel morte peteretur. Licet enim tantum non videatur imminere damnum, si quod Christus in vita petit recusetur, ac si petenti recusaretur in mortis articulo; tamen non minus est audiendus: Nam Idem Christus est & idem Dominus, qui pro iure suo sua petit quando & quoties ab vnoquoque vult; & tanta est nostra obligatio tum reddendi quod petit, quantum est eius Dominium, quanta est illius Potestas, & quantum Ius petendi sibi debita. Contemplare quantum sit illud Dominium, quanta illa Potestas, & quale Ius illud quod in te habet, quàm altum quàm absolutum & quàm æquum.

Quod si etiam magis placet tuum hîc spectare lucrum aut detrimentum, Esto sane id velim species, tua enim res perinde agitur, vt sis semper paratus ac aliquoties. Cur enim aliquoties? Cur



in morbo? Cur in morte, nisi quia imparato periculum est pœnæ alicuius subeundæ: sicut accidit imparatis illis seruis de quibus institutæ sunt Parabolæ supra dictæ? At nonne idem pœnæ periculum te manet omni tempore quo paratus non fueris, ac in ipso mortis momento? Nonne te modo Christus æque punire potest si te modo imparatum & infructuosum inuenerit, ac alio quouis tempore? Nonne & ipsum quod præcipue times mortis tempus est incertum & dubium, vt quauis illud expectus hora, & tanta expectes sollicitudine & cautione quasi si omni hora moriturus esses? Nonne id agnoscis ita imperatum nobis à Domino? At nonne ex consequenti agnoscis illam esse mortis aut exigendi fructus incertitudinem quæ nos paratiores deberet reddere? *Finis venit, venit finis, euigilauit aduersum te, ecce venit.*

### III. P V N C T V M.

**Q**UOD te igitur imparatum magis reddit ad reddendum fructum, hoc te paratiorem deberet reddere; Nempe illa incertitudo temporis quo fructus exigatur à Domino qui tempus idcirco vitæ & mortis, ac ipsius exigendi fructus incertum esse voluit vt nullum esset tempus quo non timeres & caueres: cum præcipue Dominus toties monuerit se ita velle nos omni esse paratos tempore, vt si quod sit tempus quo minus parati simus, tum Ille venturus sit, sicut fur illo venit præcipue tempore domum furaturus vbi domestici minus aduigilant. Sic Ille, *Si ergo, inquit, non uigila-ueris, veniam ad te tamquam fur, & nescies qua hora veniam ad te.*

Mirum certe quod sic Dominus infame furis nomen sibi applicare voluerit vt in quarta post parte ponderatur opportunius: sed magis mirum quod cum id sciamus ab eo dictum, tam parum moueamur ad illam continuam & non interruptam sollicitudinem conseruandam, vt potius inde minus solliciti simus, vnde nos magis vrget & vult esse sollicitos.

Hoc est quod supra deploratur, non creditur Christo, non creditur Christus; nec ab ipsis etiam qui fidei propugnandæ constituti sunt defensores! Hoc est quod ipse prædixit Dominus, *Verumtamen filius hominis veniens, putas inueniet fidem in terra?* *VIRVM fidelem quis inueniet? DOMINE, oculi tui respiciunt fidem: percussisti eos, & non doluerunt. VOSMETIPSOS tentate se*

Luc. 18.

Prov. 20.



Quanto minus puniri timet infructuosus, tanto iam magis, &c. 909

estis in fide : Ipsi vos probate. *VIGILATE*, state in fide, viriliter  
agite, & confortamini.

1er. 5.

2. Cor. 13.

4. Cor. 16.

Vide in 4. parte, Feria 4. Hebdom. 27.



## TERTIA DIE. DE POENA RELIGIOSI, SVA IN VOCATIONE INFRUCTVOSI.

*Ecce anni tres sunt, ex quo venio quaerens fructum  
in ficulnea hac, & non inuenio; succide ergo il-  
lam, ut quid etiam terram occupat?* Luc. 13.

### VERITAS PRACTICA.

Quanto minus puniri timet Infructuosus : tanto iam  
magis punitus est.

*RATIO EST, Quia quanto minus puniri debet Infructuo-  
sus, tanto minus sentit miserum suum statum, tantoque mi-  
nus ei providebit.*

*Sed tanto iam magis punitus est quanto quis minus sentit mise-  
rum suum statum, quantoque minus ei proaidet.*

*Quanto igitur minus puniri timet infructuosus, tanto iam magis  
punitus est. Quod sane cuique est & maxime Religioso irreligi-  
ose viventi perpendendum.*

### I. PUNCTVM



*ANTEQVAM Dominus similitudinem arboris Fici re-  
ferret, Aderant quidam ipso in tempore, ait sanctus Lucas,  
nuntiantes illi de Galileis, quorum sanguinem Pilatus miscuit  
cum sacrificiis eorum. Et respondens dixit illis: putatis quod hi Galilaei*

Luc. 13.



pra omnibus Galileis peccatores fuerint, quia talia passi sunt? Non, dico vobis, sed nisi pœnitentiam habueritis, omnes similiter peribitis. Sicut illi decem & octo supra quos cecidit turris in Siloe, & occidit eos; putatis quia & ipsi debitores fuerint, præter omnes homines habitantes in Ierusalem? Non, dico vobis, sed si pœnitentiam non egeritis, omnes similiter peribitis.

Tum verò his ita prolatis, adiunxit nostram fici Parabolam in eundem finem & scopum quo superiora dixerat; nempe vt qui fructum non ferrent suæ vocationi conformem, timerent & resipiscerent: aut certe si non timerent nec pœnitentiam agerent, punirentur & perirent sicut arbor infrugifera succiditur, & igni datur. Quamobrem Tu qui præcedenti die potuisti agnoscere, quàm minùs esses habens, quàm parùm esses fructuosus, aut quàm reuera infructuose hactenus vixeris, timesne intentatas tibi cœlestes minas? Timesne ita seriò vt ex sancto timore resipiscas & meliorem cogites frugem? Neque enim verus est timor si desit resipiscencia: neque vera est resipiscencia nisi sint certa melioris vitæ consilia. *Conuertere Iacob & apprehende.* Quod vt efficacius cum Diuina præstes Gratia, peropportune Veritas expendenda proponitur, *Quòd quântò minùs puniri times, tanto iam magis punitus es.*

Mat. 4.

Ratio est tam facilis & obuia vt sint tantum enuntiandæ propositiones, nec pluribus declarandæ. Quid enim apertius vel ex Scripturis, vel ex ante-dictis, vel ex ipsis terminis quàm quòd primo dicitur, quanto quis minus puniri timet quàm est pœna dignus, qualis est infructuosus, tanto minus miserum suum sentit statum, tantoque minus ei prospiciet? Sicut enim timoris est declinare à malo, siue culpæ siue pœnæ: sic vbi deest timor, malum non euitatur, non sentitur, non agnoscitur; Nam si agnosceretur, timeretur, vitaretur, Vnde apte in Prouerbiis, *Sapiens timet & declinat à malo: stultus transilit & confidit.*

Prou. 14.

## II. P V N C T V M.

**S**ED tanto iam magis punitus est, quântò quis minus sentit miserum suum statum, quântòque minus illi prospiciat.

Sicut enim pœnæ & miseriæ grauiores sunt illæ quas vocamus spirituales, sic inter has pœnas illæ censentur damnosiores, quæ



*Quanto minus puniri timet infructuosus, tanto iam magis, &c. 911*

nos ita priuant cognitione & sensu miseriae nostrae, vt nobis exprobre-  
retur, *Nescis quia tu es miser, & miserabilis, & pauper, & ca-* Apo. 3.  
*cus, & nudus.*

*Quid miserius misero, & non miserante seipsum, inquit S. Augu-*  
*stinus. Quod & praeclare Diuus Gregorius; Prima, inquit, virtus 6. Mor. 132*  
*est ne perpetrari debeant sed vitari peccata: secunda autem saltem per-*  
*petrata corrigere: sed plerumque culpas non solum imminentes minime*  
*vitamus; verum etiam nec commissas agnoscimus. Et peccatoris mens*  
*tanto altius tenebrescit, quanto nec damna sua cecitatis intelligit.*  
*NESCIERVNT neque intellexerunt, in tenebris ambulant, moue-* Ps. 81.  
*buntur omnia fundamenta terra. Id est, ita sunt insensibiles vt quid-*  
*quid ad eos permouendos adhibeatur, nihil profit, non si terram*  
*vniversam vel ab ipsis moueas fundamentis. Vel sic forte aptius,*  
*quasi diceretur: ex illorum ignorantia & cecitate hoc damnum*  
*accidit, vt quae sunt fundamenta Religionis, inde concutiantur*  
*& dissipentur: nempe fides, timor, & pietas, & Conscientia &*  
*si quid simile, totum perit pereunte sensu suae miseriae. Commo-* Sap. 40  
*uebit illos à fundamentis, & vsque ad supremum & desolabuntur.*

### III. P V N C T V M.

**Q**UANTO igitur minus puniri timet infructuosus, tanto iam  
magis punitur; Cum nulla sit grauior poena, quam esse in  
culpa & culpam nolle agnoscere, nec afferre velle remedium,  
cuius defectu funditus pereas, *Nisi poenitentiam habueritis, omnes si-*  
*militer peribitis.*

Hanc punitionem spiritualementem & perditionis inde sequentis  
periculum luculente sanctus Gregorius declarauit, explanans hec  
Isaiae Verba: *Descende, sede in puluere, virgo filia Babylonis, sede in* Isa. 47.  
*terra, non est solium filia Chaldaeorum. HOC, inquit, loco, humana* l. 6. Mor.  
*mens virgo non incorrupta, vt arbitror, dicitur, sed infœcunda. Et 9.*  
*quia Babylon confusio interpretatur, rectè infœcunda mens Babylonis fi-*  
*lia vocatur, quia in eo quod nequaquam bona opera germinat, dum*  
*nullo ordine recta vitae componitur, quasi confusione matre generatur.*  
*Cui apertè per increpationem dicitur Diuina voce: DESCENDE;*  
*In alto quippe humanus animus stat, quando supernis retributionibus*  
*inhiat, sed ab hoc statu descendit cum turpiter victus, sese defluen-*  
*tibus mundi desideris subijcit. Cui bene mox additur. SEDE IN*



**PVLVERE** : Descendens enim in puluere residet quia Cælestia deserens, terrenis cogitationibus aspersus, in infimis vilescit. Vbi adhuc ingemiscendo subjungitur : **SEDE IN TERRA**, Ac si aperte exprobrans dicat, quia cælesti conuersatione noluit te erigere, sub te metipso prostratus in terrenis actibus humiliare. Vnde & necessario protinus additur, **NON EST SOLIVM FILIAE CHALDÆORVM** : Chaldaei namque feroces interpretantur, valde autem feroces sunt qui voluntates proprias sequentes nec suis parcere moribus sciunt : ferocia sunt terrena desideria quæ non solum contra præcepta Conditoris sed sæpe etiã contra percussorum verbera, duram atque insensibilem mentem reddunt. Et post nonnulla : Et quia agere intellecta dissimulat, cecatur etiam recte ut nesciat quod agat, & sæpe iusto iudicio in sua voluntate relinquitur, & sub ea quæ anxie appetit, laboriosa mundi ministeria relaxatur : Vnde aperte illic subditur, Quia ultra non vocaberis mollis & tenera, tolle molam, & mole farinam ; Quia mens prauis desideriis dedita, in eo quo anxie appetit, huius sæculi labore relinquitur, ut foris mundo velut ancilla seruiat quæ intus Deum ut filia nequoquam amat!

At verò, nonne hoc est expauendum ? Nonne hoc est iam puniri ? Nonne hæc est poena infructuosa animæ debita ? Nonne idcirco præcauenda est talis poena, producendo fructus vocatione nostra dignos ; aut redimendo tempus infructuose actum ? Nec dicas, te non trahi timore, sed duci potius Charitate quæ foras pellit timorem, nam falsum est te infructuosum duci Charitate quæ non est otiosa & quæ magna semper operatur, aut Charitas non est. Vnde sicut conceditur præferendam esse timori Charitatẽ, sic negari non potest si desit Charitas, meliorem esse timorem quo malum culpæ & poenæ vitatur, quàm defectu timoris & amoris sterilem fieri & sterilitatis suæ poenas ferre. Sic Christus Dominus hoc sancto timore proposito concludebat esse vigilandum & orandum : postquam enim de futuri die Iudicij fufe dixit, monuitque attendendum ne dum grauamur curis huius vitæ superueniret in nos repentina dies illa, quæ tanquam laqueus in omnes superueniet, Tum addit, Vigilate itaque omni tempore, orantes ut digni habeamini fugere ista omnia quæ futura sunt, & stare ante filium hominis. O stare ante filium hominis ! Hæc est summa beatitudinis, ait Interlinearis, In præsentia Iudicis sui securum consistere. Ut e contra, hæc est extrema infelicitas, non illic



*Frustra tibi cultor, si culturam non pateris.*

913

Illic posse stare. O quàm consultius hic fructuosè timere, ne illic infructuose tremas! *Da locum timori Altissimi, quia omnis sapientia* Ecclesi. 12. *timor Dei.*

## E O D E M D I E.

AD HÆC POSTREMA VERBA PARABOLÆ.

*Domine, dimitte illam & hoc anno, usque dum fo-  
diam circa illam, & mittam stercora: & si qui-  
dem fecerit fructum: sin autem, in futurum suc-  
cides eam.* Luc. 13.

## V E R I T A S P R A C T I C A.

*Frustra tibi Cultor, si culturam non pateris.*

*RATIO EST PLANA ET FACILIS, Quia si  
non vis excoli, frustra est tibi Cultor.*

*Sed si culturam non poteris, non vis excoli.*

*Ergo frustra tibi Cultor si culturam non pateris. Quòd certe est  
tam damnosum quàm commodum fuit infructuosæ arbori seu  
menti Cultorem habuisse qui pœnam succisionis deprecaretur.*

*CULTORES illi nostri sunt, vel Angeli Tutelares, vel Di-  
rectores aut Superiores, vel utriusque simul qui sæpe paratam auer-  
tunt negligentiae nostræ perniciem, eorumque precibus & cultu-  
ra reseruamur si forte resipiscamus; sed quia resipiscenti necessa-  
ria est imprimis correctio, increpatio, mortificatio, humilitas &  
humiliatio, quæ sunt illa mittenda stercora de quibus agit Cultor,  
nos tales increpationes & humiliações aspernamur, nos talem  
culturam non patimur, sicque frustra nobis est. Cultor quia nolu-  
mus excoli dum Cultoris culturam non patimur. *Circumfodere est* De Verbi  
*humilitatem & patientiam docere, inquit sanctus Augustinus, stercus Domi-*  
*sordes sunt, sed fructum dant; sordes cultoris, dolor est peccatoris.**

*Sanctus vero Gregorius dum hoc ipsum fusius ad eundem re-*

3. Pars.

Zzzzz



Hom. 31. in  
Euang.

fert sensum, quàm simus nostro damno talis culturæ impatien-  
tes, sic præclare prosequitur. *Quid est, inquit, circa ficulneam fo-  
dere nisi infructuosas mentes increpare? Omnis quippe fossa in imo est:  
& nimirum increpatio dum mentem sibi demonstrat, humiliat. Quo-  
ties ergo aliquem de peccato suo corripimus quasi ex cultura debito cir-  
ca infructuosam arborem fodimus. Et post multa de stercoreatione,  
Mittitur ergo cophinus stercoreis ad radicem arboris, quando prauitatis  
sue conscientia tangitur memoria cogitationis, cumque se per pœniten-  
tiam ad lamenta mens excitat, & ad bonæ operationis gratiam refor-  
mat, quasi per tactum stercoreis redit ad fecunditatem operis, radix  
cordis. Et fetore ergo ad fructum reuiuiscit arbor, quia de consideratio-  
ne peccati ad bona se opera resuscitat animus. Et sunt plerique qui in-  
crepationes audiunt, & tamen ad pœnitentiam redire contemnunt, &  
infructuosi Deo, in hoc saculo virides stant. Sed audiamus quid ficul-  
nea cultor adjungat: si quidem fecerit fructum: sin autem in futu-  
rum succides eam: quia profecto qui hîc non vult ad fecunditatem  
pinguescere per increpationem, illic cadet, unde iam resurgere per pœ-  
nitentiam non valet: & in futurum succidetur, quamuis hîc sine fru-  
ctu viridis stare videatur.*

Audisne anima quid sit increpationem & humiliationem illi  
adjunctam non libenter recipere? Hoc nempe est culturam fu-  
gere. Fugienti vero culturam quid prodest Cultor? Et à Cultore  
deserta si fueris, quid restat nisi à Deo deferi, cui te solus Cultor im-  
meritam hæc conferuarat? Expende hæc accuratè.



## DE RENOVATIONE

VOTORVM ET SPIRITVS,

*Quis mihi tribuat ut sim iuxta menses pristinos, se-  
cundum dies quibus Deus custodiebat me? Iob. 29.*

VERITAS PRACTICA.

Vota non rectè renouas, nisi te Vota renouent.



*Vota non rectè renouas, nisi te vota renouent.* 915

**RATIO EST,** *Quia vota non rectè renouas nisi assequaris finem cur vota renouas.*

*Sed nisi te vota renouent non assequeris finem cur vota renouas.*

*Vota ergo non rectè renouas, nisi te vota renouent.* Quamobrem sic coniungenda est simul Renouatio votorum & spiritus, vt si alterutrum separatim renouare velles, neutrum renouares.

### I. P V N C T V M.

**Q**UAM ex multis quæ à nobis agenda sunt, alia nos aliis magis minusue moueant, non tam saepe sui merito & pretio quàm nostro languore & fastidio: sic sapienter à Diuina Prouidentia res ordinatæ sunt, vt quæ minus naturali nos afflatu attrahunt, necessitate quadam his iungerentur quæ nos facilius mouent; & ita simul concatenata omnia nos eò placide ducerent quo nonnisi repugnantes aut remissi traheremur. Danda est Inimico venia, quis non repugnet? Sed nisi à te detur; tibi à Deo non concedetur, quis non consentiat? Sic dandæ inimico veniæ difficultas emollitur ex illa connexionem quam habet cum venia nobis à Deo concedenda. Quod cum vniuersim in cunctis pene agendis annotare sit facile, tum particulatim id in Renouatione nostra semestri vel annua licet obseruare.

Renouandus est animus, reuocandus est primus ille feruor quo Religionem ingressi sumus, restauranda sunt cuncta in integrum quæ languere videntur, hoc agitur cum de Renouatione agitur, sed in praxim adduci quod dicitur non est ita proclive ingenio fatiscenti & languido; nauseabit ad has voces, contrà renitetur & tepor ille animi qui erat renouatione hac excutiendus, hanc renouationem excutiet nisi quid adhibeas quo mens expurgetur & stimuletur acrius.

Opportune idcirco factum, & plane Diuinitus inspiratum sancto Ignatio Fundatori Societatis IESV, vt renouando animo iungeretur votorum renouatio, qua facile id fieret quod vix alioquin fieri posset. Cum enim tanta sit & tam alte impressa memoria nostræ votorum Religio, vt nullus nisi perditus quidquid ad

Zzzzz ij



Votum spectat, nisi sanctè & Religiose velit attrectare; Nihil poterat aptius excogitari ad perfectè instituendam animi renouationem, & primum Religiosi spiritus inflammandum feruorem, quam si Votis renouandis iungeretur illa Spiritus Renouatio, simulque omnes vota renouaturi discerent ac probe intelligerent non se rectè & religiose Vota sua renouaturos nisi simul ex renouatis votis renouaretur Spiritus. Quid tibi Religiose, Voto est Religiosius? At de voto agitur cum de renouando spiritu agitur. De Religione qua nuncupantur vota, negotium est cum de renouatione spiritus spiritualiter negotiaris. Quis voti reus esse vellet? Reus erit, qui vota renouabit non renouato spiritu. Quamobrem quantus est metus & horror tam execrandi reatus contrahendi, tantus esse debet timor non renouandi animi, cum vnum alteri cōnectatur, vt patebit apertius ex declaratione Veritatis propterea proposita, & modo attentius expendenda: *Non rectè, non Religiose vota renouas nisi te vota renouent, nisi simul ex renouatis votis spiritu renoueris.*

Ratio paucis complectitur quidquid alij tractant de hac materia fusius quæ videri possunt. Primo quidem vota non rectè renouas nisi finem assequaris vel pretendas assequi cur vota renouantur. Cum enim in bono quouis opere bonus finis sit sibi semper præfigendus, tum vero maxime in votis Deo nuncupandis, in quibus tota vis, tota Religio, totus valor pendet ex mente seu ex fine ac Intentione vouentis & votum admittendis. Non est inquam, aliud in voto, quàm quod intendit votum faciens & recipiens; Vnde si vouendo aliud intenderet, qui votum facit, quàm qui recipit, nullum esset votum, non enim intendit vouendo quod debebat intendere: & tale votum nullum est quod caret suo debito fine, sua intentione, sua veluti essentia & anima: Imo esset graue peccatum sic vouere, nisi quid legitime excusaret vt ignorantia, vel metus rationabilis, aut vis illata, aut quid simile canonicum & regulare, sine quo alioquin Deum irrideret, Deum contemneret, & se graui Religione obstringeret qui Deo votum offerret non eo fine & animo quo esset offerendum.

*Ecclesi. 1. Attende in illis, inquit Sapiens, ne forte cadas, & adducas animæ tuæ inhonationem, & reuelet Deus absconsa tua, & in medio Synagoge elidat te, quoniam accessisti malignè ad Dominum, & cor tuum plenum est dolo, & fallacia.*



II. P V N C T V M.

**S**ED nisi Vota te renouent, non assequeris finem cur vota renouantur. Vel clarius: Nisi renouando vota intendas te renouare, non habebis finem & intentionem quam in renouandis votis debes habere.

Nam hæc est horum certa & determinata intentio, vt expresse habetur in Constitutionibus & Instituto Societatis IESV, à quo idem ceteræ quæ sua vota renouant hauserunt Religiones. Neque enim renouantur vota vt noua vel majori vouentes obligatione se astringant, cum quanta voti potest esse obligatio, iam in prima eius nuncupatione tota contracta sit; ac proinde nullus alius superest renouandi voti finis, quàm vt renouetur is animus quo primo factum est tale votum. Vnde id tandem sequitur quod qui votum renouat nisi hunc habeat finem, non habet finem sui voti; nam eum debet habere quem habet ipsa Religio, quem habuit eius Fundator, quem habent Superiores, eius legum ac eius mentis Interpretes.

Sicut enim cum religiosa primum vota in quolibet Instituto & ordine religioso fiunt, sic omnino fieri debent à Nouitio prout talis est Instituti ratio & regula: Vnde in ipsa Votorum formula sæpe hæc exprimuntur verba, *secundum regulam*, vel *omnia intelligendo iuxta Constitutiones*: sic plane in ipsis renouandis votis se quisque conformare debet suo instituto, cuius cum alius finis non sit quam renouare animum, non alius etiam esse potest vota renouantis, aut si alius fuerit, non erit is qui esse debet.

An putas quod admissus fuisses in religionem si finem religionis non habuisses in primistuis votis? Putasne vero te admittendum ad votorum renouationem, nisi finem eiusdem religionis habeas in illis votis renouandis? Putasne si Superior id resciret, id indulgeret? Superiorem potes fallere, potes latere: sed non Deum. *Ego ego sum, ego vidi, dicit Dominus, Habitatio tua in medio doli: in dolo renuerunt scire me, dicit Dominus.* 1er. 7.  
Ibid. 9.

III. P V N C T V M.

**V**OTA ergo non rectè renouas nisi te vota renouent, nisi sic ea renoues vt renouari velis cum Gratia in eum primum statum quo ante primò facta sunt.

Cum enim apertè demonstratum sit Vota religiosa non rectè



fieri aut renouari nisi finis religionis in qua fiunt, illis à vouente præfigatur, neque alius religionis cuiuslibet statutus sit finis quàm vt per ea renouetur animus, vt dictum est: profecto manifeste patet quod si hunc finem tui renouandi non habeas, non recte vota renouas: denudas enim illa & spolias meliori bono quod in votis inest, nempe suo fine proprio, & motiuo quod vocant formali & quod audiisti esse tam necessarium vt nili quid vouentem excuset, non possit religiosè votum facere suo fine destitutum.

Deut. 32.

Quid est autem ex his quæ legitime possunt excusare, quod causari possis? An ignorantia? An metus grauis? An coactio seu defectus libertatis? Nihil horum penitus. Neque enim potes ignorare quod est tam tritum & obuium. Aut certe *interroga Patrem tuum & annuntiabit tibi: maiores tuos & dicent tibi*. Satis porro aperte id dicunt etiam non interrogati, quando hanc indicunt votorum renouationem, quando secessum aliquem paulo ante præcipiunt, quando antecedentis vitæ recognitionem iubent, quando sacræ lectionis, orationis, & religiosæ cuiuslibet exercitationis frequentiore vsum commendant. Quorsum hæc spectant omnia nisi vt Animo cum votis simul renouando, ipse animus præparetur & accingatur?

Quid potest verò metui si dum vota renouas, te renouare intendas? Nihil tibi nouum imponitur, nihil asperius, nihil grauius, nihil aliud quam quod tu ipse iam voluisti, iam vouisti, iam fecisti, nec modo quidem detrectas facere, sed forte languidius & negligentius quam par esset; atque vt hic languor curetur, & recalescat animus ad primum vocationis ardorem, hoc tantum quæritur quando renouandus animus quæritur, hoc tantum quæritur quod iam pridem debes, & quod negare non potes nisi te ipsum neges, & te tui poeniteat quod Dei seruus sis, & libertus Christi.

3. Reg. 11.

An auderes id conqueri & dolere? An te magis coactum minusue liberum modo dices ad redonandum Deo animum tuum quàm ad illum primo donandum? Quid fecit tibi? Quid iniquitatis in eo inuenisti? Dic illi, *quam re indiges apud Eum*, vt propterea pigeat te cum illo esse? Eò vsque Deus, ipse Deus eo vsque se demittit, vt quærat à te cur primo, cum illum minus, noffes non dubitaueris te ad eius obsequium corde magno & animo volenti mancipare, post verò dum Ei assueuisti, de corde illo & animo tantum remiseris, vt nisi repugnanter obsequaris?



*Audite cæli & auribus percipe terra, quoniam Dominus locutus est: 1p. 1.  
 Filios enutriui & exaltaui; ipsi autem spreuerunt me. Cognouit bos  
 possessorem suum, & asinus praesepe Domini sui: Israel autem me non  
 cognouit, & populus meus non intellexit. INCRASSATVS est di- Deut. 32  
 lectus, & recalcitrauit, incrassatus, impinguatus, dilatatus dereliquit  
 Deum factorem suum! ET DIXI: cum fecisset hæc omnia: ad me 1er. 3  
 reuertere, Reuertere auersatrix Israel, & non auertam faciem meam à  
 vobis. Conuertimini filij reuertentes, dicit Dominus, quia ego vir  
 vester; Et quæ plura proponit quibus mirum in modum emol-  
 litur animus, & valde roboratur Ratio de renouatione animi  
 adjungenda votis renouandis.*

En videlicet parata simul cum ipsa votorum renouatione Gra-  
 tia, qua & animum possis renouare si velis, qua tibi cuncta præ-  
 terita condonentur delicta, & dona quibus excidisti, renouen-  
 tur; & nouum robur addatur ad omnia perfectius digerenda,  
 nouus homo denique totus renascatur vetere mortuo, perinde  
 quasi nihil deliquisses. Hæc est plane vis illius Gratia quæ ad re-  
 nouationem animi tam certo promittitur quàm certo excitamur  
 ad illam renouationem quæ sine tali gratia non potest perfici.

Quod sit autem adjuncta hæc Gratia Renouationi votorum,  
 tria sunt quæ ostendant. Primum est: Ipsa Institutio faciendæ bis  
 in anno renouationis votorum, ad hunc finem vt simul fiat Spi-  
 ritus Renouatio. Siue enim consideretur vt à Domino particu-  
 latim inspirata, siue vt à sancto Fundatore ordinis approbatæ,  
 vnà cum ipso fundata ordine: dubitari non potest quin ea ipsa  
 Gratia quæ Fundatori data est ad stabiliendum suum ordinem,  
 sese extendat ad hanc eius partem quæ perfectioni acquirendæ &  
 conseruandæ tam apta est, vt quotidiana constat experientia.

Secundum est, ipsa Operis excellentia, seu ipsum Renouatio-  
 nis votorum Meritum, quod certe non est ex se minus quàm  
 primæ votorum nuncupationis, cum sit eadem plâne vouentis &  
 vota renouantis intentio, perfecte Deo seruiendi, eademque  
 prorsus voueat quibus ei seruiatur. At vero certum est primam il-  
 lam votorum nuncupationem tanti esse valoris & meriti, vt ve-  
 teribus omnino condonatis delictis, nouam afferat nouæ degen-  
 dæ vitæ gratiam.

Tertium est, illa quæ inter vota Religiosa & animum reno-  
uatum intercedit similitudo & paritas. Quid est enim vouere



vota Religiosa nisi se totum dare Deo velut in holocaustum, vt supra visum est? Et quid est aliud renouare animum nisi reuocare illam mentem quæ sit tota Dei, si qua forte parte deflexisset? Vnde sicut non dubitatur dari Gratia Religiosis ad obseruanda sua vota, nec non ad perfecte viuendum, seque totos suæ vocationi conformandos: ita certè tenendum est vel illam ipsam valere Gratiam vel nouam addi, ad renouandum & reuocandum quod semel datum est. *Leuaui oculos meos ad cælos, & sensus meus redditus est mihi. B O N I S donabo maioribus quam habuisti ab initio. T V N C erumpet quasi mane lumen tuum, & sanitas tua citius orietur.*

Daniel. 4.  
de Nabuch  
Ezech. 36.  
Is. 58.

Ex quibus tandem & manifestius videas, & concludas certius, quod proposita continet Veritas, te Vota recte non renouare nisi te Vota renouent: nam præter dicta de defectu finis & intentionis, hoc accedit præterea quod non possis recte renouare vota sine Gratia quæ illi adjuncta est renouationi, quæ quidem Gratia si tum adsit, aderit & renouatio animi quam secum infert: Aut si talis deest gratia, nec ipsa recte renouabis vota. Quid clarius ad intellectum? Et quid efficacius ad voluntatem, vt te cognita Veritati conformare velis, renouando simul animum cum renouatis votis; ne te scilicet oblata prius gratia, & tot inde sequentibus bonis: ne te reum constituas voti perperam facti: *Ne consenesceas in malo: Ne fias eo vsque tepidus vt euomaris ex ore Christi: ne denique frustra illud gemas aliquando, Inueteraui inter inimicos meos, Et non sit qui te renouare possit cum velis, qui cum posses noluisti. Quis mihi tribuat vt sim iuxta menses pristinos? Tam frustra tum id dices quando tempus effluerit, quam fructuose tibi dicendum est hodierna die, qua se Christus offert qui tibi tribuat vt sis iuxta menses illos pristinos, secundum dies quibus Deus custodiebat te, quando splendebat lucerna eius super caput tuum, & ad lumen eius ambulabas in tenebris. Sicut fuisti in diebus adolescentiæ tuæ, quando secreto Deus erat in tabernaculo tuo.*

Ecclesi. 11.

Pf. 6.

Iob. 29.

Iudith. 13.

Pf. 67.

*CONFIRMA me Domine Deus Israel, & respice in hac hora, ad opera manuum mearum, vt sicut promissisti hoc quod credens per te posse fieri cogitaui, perficiam. M A N D A Deus virtuti tuæ, confirma hoc Deus quod operatus es in nobis. Vide in 1. parte, Dominica 1. Aduentus, Die 7. Ianuarij. Et in singulis partibus, Verbo Renouatio.*

FINIS TERTIÆ PARTIS.



## INDEX

## RERVM PRÆCIPVARVM TERTIÆ PARTIS.

**A**BNEGATIO. Hanc præcipuè docuit Christus, & eius exemplar reliquit in sanctissimo Sacramento. pag. 83.

*Acedia.* Septimum vitium capitale opponitur septimæ petitioni orationis Dominicæ, nec sinit hominem velle à malo liberari. 300. V. *Negligentia.*

*Adversitas.* Ad eam tolerandam multum iuvat sacra Communio, quæ & iuvatur etiam ex adversis patienter toleratis. 117. Quam sit beatum adversa pati pro Christo. 195. Res adversæ non possent quemquem deicere nisi se prius illis subiceret. 635. Calix est Domini non recusandus. 754. Qui non vult mortificantem Dominum, non vult vivificantem. 759.

*Affectus.* Constringunt voluntatem. 49. Duo sunt præcipui Complacentiæ & Displacentiæ. 82. Inordinati impediunt fructum Communionis. 100. Toti sunt Christo tradendi. 114. Nihil paratius ad bonam Communionem quam eorum puritas. 118. 633. affectus erga personas præsertim cavendi. 227. terreni purificandi. 277. Affectum probat effectus. 420. impediunt plenam peccatorum remissionem. 488. corrumpunt iudicium. 679. nos à Deo disungunt in orationibus. 684.

*S. Aloysius.* Societatis Iesv. In eius die Festo. 705.

*Amor Dei.* Ex cognitione Dei negativa. 17. ex eius beneficiis. 71. De amando

Deo variæ Veritates. 329. Divini amoris sagittæ quantò magis lethifera, tantò magis vivifica. V. *Charitas.*

*Amor proximi.* De diligendis inimicis. 235. de condonandis debitis. 288. de aliis bonis proximo præstandis. 588. Quo quisquis est Dei amantior, eo est amabilior. 871.

*Amor sui.* Divino amore exhauritur. V. *Concupiscentia.*

*Anima.* Quanta sit animæ pereuntis iactura. 578. V. *Salus.*

*S. Anna.* In eius die Festo. 759. 851.

*Avarus.* Impeditur à debita facienda eleemosyna. 265. inordinate mortem timet. 277.

*S. Barnabas.* In eius die Festo. 705.

*S. Bartholomæus.* In eius die Festo. 851

*Beatitudo.* Nullum affert fastidium. 58. de illa sub variis nominibus quæ Beatitudines Evangelicæ dicuntur, videnda est tota Hebdomada tertia & quarta. Quid ad illam assequendam præcipuè conferat ex parte nostra. 824.

*Beneficium.* Quibus beneficiis Christus mundum affecit. 111. quomodo sint agnoscenda beneficia. 621.

*S. Bernardus.* In eius die Festo. 846.

*Blasphemia.* Sæpe affingitur Christo. 128.

*Castitas.* 142. Vbi de munditia cordis. Continendi sunt propterea sensus.

223. quam sit impudens Impudicus, dum etiam orat Deum. 295. De voto

Castitatis. 887.

Aaaaaa



*Certamen.* Magnum certamen certare contra peccandi potentiam. 856.

*Charitas.* Res est omnium maxima. 211. quomodo operiat multitudinem peccatorum. 324. quomodo nos Diuinos faciat. 648. De corde puro est. 865.

*Christus D.* Vita eius abscondita. 42. Conuersatio eius cum hominibus. 47. quadruplex eius thronus gratiæ. 51. ut se nobis communicat. 52. quanta hinc eius bonitas. 54. quam sit pulcher in omnibus. 57. Tituli quibus à nobis est colendus. 64. Triumphus eius in sanctiss. Sacramento. 70. quæ consideranda in eius miraculis. 86. de illius virtutibus. 106. de illius efficacia ad nobis aliquid persuadendum. 235. Tituli quibus id à nobis quod iubet, exigit. 239. Negotiator est Euangelicus qui sua omnia dedit pro Margarita pretiosa. 402. quam illi reddit anima subiectionem extra corpus, debet in corpore. 437. Iudex est omnium, & quam sit illi hoc honorificum. 608. de eius Transfiguratione. 802. Quod à multis etiam Christianis non creditur esse filius Dei. 803. quod à suis abesse putatur longius, hoc ipso propius illi adesse putandus est. 810. præter cæteras Virtutes insignis in illo fuit obedientia. 893.

*Cognitio Dei, & sui.* Duo modi cognoscendi & amandi Deum. 12. Non minus errat qui non satis, quam qui nimis Deum scire veller. 19. Ad cognoscendum Deum maxime apti sunt mundi corde. 182. quibus modis se manifestet, & nos nobis ipsi. 560. V. *Deus.*

*Communio.* Si sit infrequens, iniuriosa est Christo. 52. quæ sit fructuosior. 98. 112. 113. 118. 632.

*Concupiscentia, Cupiditas.* Sicut nullo errore, ita nulla oportet cupiditate

violari. 2. triplex concupiscentia directe opposita mysterio sanctiss. Trinitatis. Ibid. nihil concupiscentia deterius. 113. 122. quo minus ex ea mortificabis, tanto magis ab ea mortificaberis. 229. quo magis oculata est, magis est cæca. 440. facit latam viam & perditionem animarum. 500. Vel Domino Deo, vel libidini seu concupiscentiæ renuntiandum. 652. Quomodo augeat vel minuat peccatum. 693. studium refræmandæ concupiscentiæ certius est signum salutis. 616. Mors S. Ioannis Baptistæ vox quædam est clamantis in deserto cordis contra proprias eius concupiscentias. 872.

*Confessio.* Dolosa quædam est, eorum scilicet qui nolunt agnoscere se ibi peccare ubi se nolunt corrigere. 326. V. *Pœnitentia.*

*Confirmatio.* Sat multa de hoc Sacramento. 555.

*Conscientia.* Miris eam modis Christus illustrat, & quale hoc sit beneficium. 561.

*Contritio.* Exemplum in Magdalena. 749. impeditur ab affectibus inordinatis. 488.

*Conuersatio.* Qualis Christi cum hominibus. 42. 91. qualis nostra esse debeat. 740.

*Conuersio.* Sicut panem consecratum, ita & nos Christus in se veller conuertere. 86. quanti referat omnium vel vnius peccatoris Conuersio. 152. multum valet eleemosyna conuertendo peccatori. 260. Multum etiam Verba Christi lachrymantis. 409. Conuersionis exemplar est Magdalena. 746. V. *Peccatum, Pœnitentia.*

*Correctio.* Eius necessitas. 475.

*Decalogus.* Ex decem Christi præceptis conficitur, quorum vix vni obeditur. 808.

*Deus.* Vnus & trinus, & cur præcipue



- sanctus dicitur. 34. Multa de Illo cognoscendo & amando. 10. quomodo est absconditus. 41. quomodo videtur in creaturis. 181. quanta eius in peccatores misericordia. 291. Solus est timendus. 471. quot modis nobis loquatur. 545. Quomodo se illustrius manifestet. 560. quid sit adorare Deum in Spiritu & Veritate. 565. quomodo dicatur Deus quærere suam gloriam. 767. quomodo exigat rationem Villicationis & Vocationis. 358.
- Deuotio.* Vix vlla est in templis à fastu vestium. 68. Vera deuotio inter varietates locorum & temporum inuariabilis. 848.
- Diabolus.* De peccatore triumphat. 75. quod nihil possit contra nos nisi velimus. 332. Eius obedientia condempnat nostram inobedientiam. 429.
- Difficultas.* Tota est ab Immortificatione. 230. tollitur à Christo D. 233. quænam dici possit in salute comparanda. 354. V. *Certamen.*
- Dilatio.* Non potest dici longa, quantumcumque mors tardet. 357. cauenda Confitendi dilatio. 748.
- Discordia.* Quàm sit damnosa. 194.
- Diuitiæ, Diuites.* Quàm sit cauendus diuitiarum affectus. 265. quo quis pauperior, eò ditior. 884.
- S. Dominicus.* In eius die Festo. 796.
- Donum.* Hilariter faciendum. 267. Nos ipsi toti Deo dandi. 395.
- Eleemosyna.* Ars omnium artium quæstuosissima. 257. importunis non neganda. 368.
- Eucharistia.* Cur cæna magna dicatur. 98. V. *Communio. Sacramentum.*
- Examen.* Quam sit exactè de se faciendum. 359.
- Excessus mentis.* Quam sint varij, & quis eorum excellentior. 774.
- Excusatio.* Nulla est si non facis quæ potes. 34. 94. 134. irascentes se præsertim excusant, sed falsò. 216. 278. Non est dicendum, non putabam. 380. merus est dolus. 729.
- Executio seu efficacia* 226. Multum propterea confert exemplum Christi D. 235. affectum probat effectus. 420.
- Exemplum.* Tenemur ad bonum dandum. 207. non omnia in exemplum sunt danda omnibus. 675. V. *Imitatio.*
- Familiaritas.* Parit contemptum in humanis, sed non in Diuinis. 55.
- Fides, Fidelitas.* In quo sita fidelitas. 34. de fideli vñ gratiarum. 107. quàm sit modica fides. 162. 803. Vbi de quodam fidei Symbolo ex dictis Christi composito. Quanti sit animi, se Diuinæ fidei supponere. 316. quanta sit dignitatis fides, & quomodo periret nisi pereat vana gloria. 617.
- Fiducia.* Qualis habenda est ad Deum. 254. 320. 471. quid à nobis requirat, vel non requirat. 697.
- Finis.* Ponitur finis vltimus in peccato mortali. 8. 9. finis noster Deus. 271. dicitur etiam Christus, & salus esse finis noster. 629. 668. quam sint cauendi respectus humani. 390. media quæ sunt ad finem necessaria, pari sunt affectu volenda sicut ipse finis. 594. V. *Intentio.*
- Fortitudo.* Roboratur exercitio. 119. sita est præcipue in seipso vincendo. 315. quanta in nobis esse possit per Christum. 351. 465. 472. 637.
- Fragilitas.* Quanta sit hominis. 355. 586.
- Gaudium.* Quodnam sit beatum gaudium. 168.
- Gloria.* Nulla maior quàm quæ est Christi. 127. tota debetur Deo. 244. tota quam quærimus, est à Iudicio humano quod est valde obscurum & incertum. 613. Nisi vana pereat gloria, peribit fides. 613. quid sit quærere Dei gloriam. 769. V. *Finis, Intentio, Humilitas, Laus.*
- Gratia.* Cooperandum Gratia. 39. 78.



170. Gratia Christi thronus. 51. De gratia Cōmunionis. 102. 640. Cauendus gratiarum abusus. 135. 349. 376. 484. 543. 648. Sine Christi gratia nihil possumus. 465. 555. 570.
- Gratitudo.* Quid minus potes reddere quacumque debes, & magis debes reddere quacumque potes. 33. Verè paucorum est vera gratitudo, & in quo sita sit. 620.
- Homo.* Quis ab originali peccato plagas acceperit. 586.
- Humilitas.* Quam sit Deo grata. 26. humilitas Dauidis coram arca testamenti. 63. quanta à nobis debeatur sanctiss. Sacramento. 64. externa simul & interna sit. 66. omni ex parte sit indiuisa. 832. maxime necessaria in prosperis. 187. humiliatio via est ad humilitatem. 343. quanti fiat à Christo qui sua omnia dedit pro illa habenda. 401. quanta esse debeat ex cognitione nostri. 556. quanam sit magis laudabilis. 600. quam sit diues & magnifica. 604.
- S. Iacobus.* In eius die Festo. 753.
- S. Ignatius.* In eius die Festo. 763.
- Ignorantia.* Quanam excuset vel non excuset à peccato. 383.
- Imitatio.* In quo consistat. 735. 792. quam sit gloriosa Dei imitatio. 768.
- Impudicus.* Ut se inducit in tentationem, & orando Deum irridet. 295.
- Indulgentia.* Quam pauci eas lucentur. 488.
- Ingratitudo.* Apparet in vsu sanctiss. Sacramenti. 113. V. *Gratitudo.*
- Inimici.* Diligendi propter Christum. 235. condonandæ illis injuriæ. 289.
- Intemperantia.* Opponitur quartæ petitioni orationis Dominicæ. 284. quanam dicenda est in edendo & loquendo. 336.
- Intentio.* Quam sit injustum & injuriosum Deo aliquid aliud præter ipsum intendere. 243. quam diligenter procuranda recta Intentio. 273. 391. 624. 629. 668. 771.
- S. Ioannes Baptista.* In eius Natiuitate. 709. In eius Decollatione. 872.
- Ira.* Qualis in Christo D. contra indigne communicantes. 132. male se excusat. 218. repugnat tertie petitioni orationis Dominicæ & voluntati Diuinæ. 279. 426.
- Iudicium.* Quale exerceat Christus in sanctiss. Sacramento. 131. Iudicij particularis Consideratio. 362. quam graue sit futurum superbo Iudicium. 609. quam sint humana iudicia incerta & obscura. 613. cauendum temerarium de aliis. 676. Nemo sui bonus Iudex. 677.
- Iustitia.* Quid sit esurire Iustitiam, & quam beatum. 174. Iustitia Diuina pœnam peccatis proportionatam infert. 543.
- Lachryma.* Quam sit beatus luctus. 168. De Christi Lachrymis. 410.
- S. Laurentius.* In eius die Festo. 810.
- Laus.* In quo sita vera Laus. 125. 200. quam sit timenda mundana. 202. nec eius aspectu bonum est agendum, nec despectu omittendum. 209. sic est fugienda Laus, ut non fugiantur laudabilia. 600. V. *Gloria*, *Respectus humanus*, *superbia*.
- Libertas.* Quæ sunt in nobis libera multum distinguenda sunt à non liberis. 386. liberis & voluntariis maxime gaudet Christus. 438. liberè peccare non est libertatis vsus sed abusus. 862.
- Lingua, Loquela.* Quæ est in edendo regula, hæc eadem est in loquendo, nempe necessitas. 337.
- S. Magdalena.* Quam multum dilexerit. 323. Et in eius die Festo. 745.
- Magnificencia.* Sit humilis, sicut & humilitas magnifica. 603.
- Mansuetudo.* Quantum à Christo commendetur. 426. 466. qui sint mites, & quam beati. 164.



*Margarita.* Quænam sit Euangelica quæ dicitur pretiosa. 400.

*S. Maria, Virgo.* Nostram curat salutem. 153. In Festo Visitationis. 739. Assumptionis. 816. & sequent. ubi multa quæ ad illam spectant.

*Mediocritas, Moderatio.* 456. In mediocritate virtus. 599.

*Meritum.* Vnde sit petendum. 824.

*Miseria.* Quinam præcipue sunt censendi miseri. 173. 200.

*Misericordia.* Quænam sit à nobis facienda, & quàm beatum sit esse misericordem. 177. 588. in remittendis debitis. 288.

*Missiones* à pag. 478. ad multas sequentes.

*Mors.* De inordinato eius timore. 276. signa futura mortis in peccato. 712.

*Mortificatio.* Quotidie moriendum cum Christo. 125. mortificatio sensuum quàm sit necessaria Castitati. 223 & saluti. 227. quo se quis minus mortificat, tanto magis mortificabitur. 230. 462. mortificatione cœlestes homines fiunt. 645.

*Mundus.* Eius iudicia Diuinis opposita. 200. 400. mundana omnia nihil sunt præ cœlestibus & æternis. 469. 706. & seq.

*Necessitas.* Vnum est necessarium. 819.

*Negligentia.* Quanta sit nostra, patet ex Christi cura pro nobis. 144. In minimis non minima culpa. 213. 348. 390. qui negligit, negligetur. 480. De negligenti & infœcundo Religioso far multa in fine ubi de votis Religiosis, siue de triduana Recollectione ante votorum Renouationem. 898.

*Obedientia.* Deo reddenda, repugnante licet natura, exemplo creaturarum omnium. 241. Dæmonum obedientia nostram condemnat inobedientiam. 428. Non minus in corpore quàm extra corpus anima Deo deberet

obedire. 437. quàm gloriosa est similitudo Christi, tam gloriosa est obedientia quæ nos ei præsertim similes facit. 893.

*Oblatio.* Sit integra nostri in omnibus. 395.

*Obstinatio.* 49. 410. 414. 426.

*Occasio.* Opportunè, importunè prædicandum. 580.

*Officium.* Quinam suo potissimum dici debeant deesse officio. 348. Continere se quisque debet in officio suo. 457. 674. V. *Religio, Vocatio.*

*Opera.* Quam pauca sint bona patet ex defectu causarum. 306. quantum valeant in Iudicio post mortem. 370. debent esse conformia Vocationi. V. *Vocatio.*

*Oratio.* De quacumque re fiat, debet esse ordinata, debent seruari seruanda. 341. quàm sit impium non orare pro salute proximi. 452. quòd sæpe vehementius Deum oras, ore quidem illi adstas propius, sed corde distas longius. 683.

*Patientia.* Quantum profit. 119. In ea possidentur animi. 165. seruanda patientiæ motiua. 197. 755. 761. 814.

*S. Paulus.* In eius die Festo. 718. 733.

*Paupertas.* Quæ sit paupertas spiritus, & quàm beata. 261. 265. De voto paupertatis, quò quisquis pauperior ediditior. 884.

*Pax.* In mansuetudine. 164. In bona voluntate. 175. De pacificis & quàm sint beati. 192. pacifica sit & quieta sollicitudo quæuis. 386. pax in pugna. 460. optabilius bonum bellum quàm mala pax. 473.

*Peccatum.* Quàm sit oppositum Deo. 5. subtrahit voluntatem à Diuino seruitio. 73. reditus à peccato. 140. quot quantisque præiudicet. 152. quantum profit ad peccati remissionem misericordia. 178. ut cauendum in minimis. 214. quàm dolosè quidam sua



- regant peccata, nec confiteantur. 326. ad peccatum committendum quæ cognitio sufficiat. 382. cauendum omni modo. 474. De malo peccati mortalis. 509. fusè, quàm iusta & proportionata puniatur pœna. 543. quomodo augeatur vel minuatur per concupiscentiam. 693. peccandi potentia, magna ad peccandum illecebra, magnum certamen contrà certare. 838.
- Perfectio.* Tota in tribus obseruandis sita est. 82. tres eius viæ seu gradus. 203. quàm sit necessarium sic gradatim procedere. 205. ad perfectionem consequendam Indiuisum esse oportet à Deo. 566. quàm sit perfectè Christo seruiendum. 628. unicuique sua perfectio est ex Diuina voluntate, seu vocatione. 675.
- Perseuerantia.* Quàm sit studiosè curanda Religioso professò. 877.
- S. Petrus.* In eius die Festo. 718. 723.
- Pœnitentia, pœna.* Motiua pœnitendi. 156. pœnæ culpis respondentes. 543. Pœnitentiæ forma & exemplar, Magdalena. 745.
- Præcipitatio.* Quale sit vitium. 204.
- Præiudicium.* Quæ sint salutis periclitantis præiudicia. 356. 493. 712.
- Præsumptio.* Quàm cauenda. 140.
- Professio.* Quo die fit à Religiosis. 877.
- Prosperitas.* Nisi te humiles in prosperis, prospera te humiliabunt. 187.
- Prouidentia.* Qui se à Diuina subtrahunt, quomodo errent. 139. 760. Non timendum ne Deus nobis desit, sed ne desimus Deo. 250. 256. multum spectari debet Diuina Prouidentia in procuranda salute proximi. 456.
- Prudentia.* Qualis filiorum sæculi & Lucis. 346. Vera prudentia discernit quodnam sit melius bonum. 616. Ne innitaris prudentiæ tuæ. 681. 689.
- Ratio.* Adhibenda est ne peccemus. 380. V. *Vigilantia.*
- Religio.* Religiosus supra vel infra regulam viuens, ficus est ficum non ferens. 900. De religiosa perfectione procuranda, de religiosis votis, & de aliis eò spectantibus. V. in fine huius partis. 877.
- Renouatio.* Quotidiana sit oportet. 37. triduana relectio quæ præcedit renouationem votorum, & de ipsa votorum renouatione. 898.
- Renuntiatio.* Sit integra & perfecta eorum omnium quæ possidentur. 396.
- Resignatio.* Se conformat Diuinæ voluntati. 282.
- Respectus humanus.* Quàm sic cauendus. 390. V. *Finis, Intentio.*
- Rustici.* Eorum fœlicitas vel infœlicitas. 528.
- Sacramentum.* De conuenientia sanctissimi Sacramenti cum omnibus vitæ Christi mysteriis. 30. & seq. De eius frequentia, cultu, effectis, & aliis eò spectantibus. In 1. & 2. Hebdomada huius partis.
- Salus.* Salutis nostræ negotium, negotium est totius vniuersi. 152. nullum esse aliud tale negotium patet ex circumstantiis quæ negotium aliquod comitantur. 333. vnde petenda sollicitudo procurandæ salutis. 226. 305. 350. 369. 433. 493. 502. 664. quæ vehementer Christus sitiat nostram salutem. 550. Signa futuræ salutis. 716.
- Sanctitas.* Imitanda in Deo præ cæteris attributis. 4.
- Scandalum.* Vt debet euitari. 208. 575. qui nobis sunt scandalo, diligenter euitandi. 225.
- Scientia.* In ea debet esse moderatio. 21.
- Sollicitudo.* Nimia de rebus ad vitam spectantibus vetatur. 286. 434. sollicitum maxime faciunt circumstantiæ concurrentes in negotio. 355. 369. sollici-



- tudo sic quieta. 387. major sit animæ quam corporis. 433. octo rationes in vno Euangelij textu contra nimiam sollicitudinem. 659. nisi sic prima regni cælorum cura, nulla erit. 664. quarum rerum debeat esse sollicitudo, & quarum nulla sit. 698.
- Spes.* Qualis esse debeat. 320. V. *Fiducia.*
- Spiritus sanctus.* Tantò vnusquisque est magis aut minus bonus & sanctus, quantò magis minusue participat de Spiritu sancto. 703.
- Superbia.* Quàm sit inuisa Deo. 26. stupenda in vestibus, & noxia dum in templis oratur. 68. cauenda multum in prosperis. 187. opponitur primæ petitioni orationis Dominicæ, & nostro fini. 272. patet in Pharizæo quàm sit damnanda. 444. multum eam deprimit nostri cognitio. 556. superbo maxime formidandum Diuini Tribunal Iudicij. 609.
- Temperantia.* Commendatur in 4. petitione orationis Dominicæ. 285. Eadem est in loquendo quæ in edendo. 336.
- Tempus.* Tempore opportuno exercenda virtus. 107. 108. 570. opportunè, importunè insistendum pro conuertendis peccatoribus. 579.
- Tentatio.* Quomodo dicatur Deus ad illam nos inducere, & quomodo potius nos ipsos inducamus. 294. Nil potest Dæmon contra nos, si velimus resistere cum gratia. 332.
- Tepiditas.* Quàm odiosa Christo D. 141. 650.
- Timor.* Quis sit verus. 249. motiua timendæ damnationis. 305. 410. motiua timendi Dei & peccati. 471. 504. 509. V. *Salus, sollicitudo.*
- SS. Trinitas.* De hoc Mysterio à pag. 2. in multas sequentes.
- Tristitia.* Quasi tristes, semper autem gaudentes. 171. tristitia inordinata miseros facit. 174. soli peccato ex-
- piando est utilis. 253.
- Vanitas.* Quanta sit hominum. 128. quàm inuisa & injuriosa Deo. 246. cauenda præcipue in magnis & speciosis. 393.
- Verbum Dei.* Non redit vacuum, aut profit necesse est recipienti, vel oblit. 375.
- Veritas.* Indiuisibilis est. 566.
- Vigilantia.* Necessaria est ad vitandum peccatum & peccati excusationem. 383. tanto major adhiberi debet, quanto incertior est hora reddendæ rationis. 905.
- Vindicta.* Quàm sit cauenda. 288.
- Visitatio.* De Diuinis & humanis Visitationibus, quàm parum inter se conueniant. 740.
- Virtus.* Gradatim in ea procedendum. 204. De arcta virtutis via per quam pauci ambulant. 496. exercenda occurrenti occasione. V. *Tempus.* Virtus in medio. 599. 598.
- Vita.* Quæ sit vita spiritalis. 43. vita abscondita. 44. vitæ spiritalis compendium. 82. vitæ spiritali cætera cedant omnia. 112. 641. Vita mixta, vita excellentior. 777. 821.
- Vnio.* Magna Christi nobiscum in sanctissimo Sacramento. 88. quomodo nos indiuisos esse oporteat à Deo. 566.
- Vocatio.* Vocationi conformiter viuendum, & de fructu vocationis quem ab vnoquoque repetit Deus. 905.
- Voluntas.* Non minus excolenda quàm Intellectus. 2. vt se opponit Deo. 8. quæ sit bona & efficax. 35. 301. 420. 571. 594. quæ sic obstinata in malo. 49. voluntatem præcipue vult Deus, quæ tamen illi præcipue negatur. 71. Nihil vere magnum nisi quod tale iudicat & vult Deus. 100. volenti nihil difficile. 234. voluntatis Diuinæ certiora signa. 279.




*Voluptas.* Voluptatem vicisse, maxima voluptas est. 887.

*Nota.* Sunt holocausta, & quæ plura de his desiderantur, in fine huius partis. 884.


*Zelus.* Motiva Zeli concipiendi. 156. 452. 574 ne sit amarus. 219. non luceat nec ardeat tantum, sed utrumque simul. 798.

# FINIS.












Biblioteka Jagiellońska



stdr0029973







Veritates Primae

Part III A. 1. 1. 1.

Domini. SS. Trinit. ad D. 1. 1. 1.

per 1. 1. 1.

1. 1. 1.  
1. 1. 1.  
1. 1. 1.